

Holy Bible

Aionian Edition®

भड्लाई बाइबिल

Bhadrawahi Bible

AionianBible.org

The world's first Holy Bible untranslation

100% free to copy and print

also known as “ The Purple Bible ”

Holy Bible Aionian Edition ©

भड्लाई बाड्बिल
Bhadrawahi Bible

CC Attribution ShareAlike 4.0, 2018-2024

Source text: eBible.org

Source version: 2/21/2024

Source copyright: CC Attribution ShareAlike 4.0
The Love Fellowship, 2020

Formatted by Speedata Publisher 4.19.2 (Pro) on 5/8/2024

100% Free to Copy and Print

TOR Anonymously

<https://AionianBible.org>

Published by Nainoia Inc

<https://Nainoia-Inc.signedon.net>

We pray for a modern public domain translation in every language

Report content and format concerns to Nainoia Inc

Volunteer help is welcome and appreciated!

Celebrate Jesus Christ's victory of grace!

Preface

भद्रवाही at AionianBible.org/Preface

The *Holy Bible Aionian Edition* © is the world's first Bible *un-translation*! What is an *un-translation*? Bibles are translated into each of our languages from the original Hebrew, Aramaic, and Koine Greek. Occasionally, the best word translation cannot be found and these words are transliterated letter by letter. Four well known transliterations are *Christ*, *baptism*, *angel*, and *apostle*. The meaning is then preserved more accurately through context and a dictionary. The Aionian Bible un-translates and instead transliterates eleven additional Aionian Glossary words to help us better understand God's love for individuals and all mankind, and the nature of afterlife destinies.

The first three words are *aiōn*, *aiōnios*, and *aiōdios*, typically translated as *eternal* and also *world* or *eon*. The Aionian Bible is named after an alternative spelling of *aiōnios*. Consider that researchers question if *aiōn* and *aiōnios* actually mean *eternal*. Translating *aiōn* as *eternal* in Matthew 28:20 makes no sense, as all agree. The Greek word for *eternal* is *aiōdios*, used in Romans 1:20 about God and in Jude 6 about demon imprisonment. Yet what about *aiōnios* in John 3:16? Certainly we do not question whether salvation is eternal! However, *aiōnios* means something much more wonderful than infinite time! Ancient Greeks used *aiōn* to mean *eon* or *age*. They also used the adjective *aiōnios* to mean *entirety*, such as *complete* or even *consummate*, but never infinite time. Read Dr. Heleen Keizer and Ramelli and Konstan for proofs. So *aiōnios* is the perfect description of God's Word which has *everything* we need for life and godliness! And the *aiōnios* life promised in John 3:16 is not simply a ticket to eternal life in the future, but the invitation through faith to the *consummate* life beginning now!

The next seven words are *Sheol*, *Hadēs*, *Geenna*, *Tartaroō*, *Abyssos*, and *Limnē Pyr*. These words are often translated as *Hell*, the place of eternal punishment. However, *Hell* is ill-defined when compared with the Hebrew and Greek. For example, *Sheol* is the abode of deceased believers and unbelievers and should never be translated as *Hell*. *Hadēs* is a temporary place of punishment, Revelation 20:13-14. *Geenna* is the Valley of Hinnom, Jerusalem's refuse dump, a temporal judgment for sin. *Tartaroō* is a prison for demons, mentioned once in 2 Peter 2:4. *Abyssos* is a temporary prison for the Beast and Satan. Translators are also inconsistent because *Hell* is used by the King James Version 54 times, the New International Version 14 times, and the World English Bible zero times. Finally, *Limnē Pyr* is the Lake of Fire, yet Matthew 25:41 explains that these fires are prepared for the Devil and his angels. So there is reason to review our conclusions about the destinies of redeemed mankind and fallen angels.

The eleventh word, *eleēsē*, reveals the grand conclusion of grace in Romans 11:32. Take the time to understand these eleven words. The original translation is unaltered and a note is added to 64 Old Testament and 200 New Testament verses. To help parallel study and Strong's Concordance use, apocryphal text is removed and most variant verse numbering is mapped to the English standard. We thank our sources at eBible.org, Crosswire.org, unbound.Biola.edu, Bible4u.net, and NHEB.net. The Aionian Bible is copyrighted with creativecommons.org/licenses/by-nd/4.0, allowing 100% freedom to copy and print, if respecting source copyrights. Check the Reader's Guide and read online at AionianBible.org, with Android, and TOR network. Why purple? King Jesus' Word is royal... and purple is the color of royalty!

Table of Contents

NEW TESTAMENT

मत्ती	11
मरकुस	29
लूका	43
यूहन्ना	62
प्रेरितों के काम	77
रोमियों	96
1 कुरिन्थियों	105
2 कुरिन्थियों	114
गलातियों	120
इफिसियों	123
फिलिप्पियों	126
कुलुरिसियों	128
1 थिस्सलुनीकियों	130
2 थिस्सलुनीकियों	132
1 तीमुथियुस	134
2 तीमुथियुस	137
तीतुस	139
फिलेमोन	141
इब्रानियों	142
याकूब	149
1 पतरस	151
2 पतरस	154
1 यूहन्ना	156
2 यूहन्ना	158
3 यूहन्ना	159
यहूदा	160
प्रकाशित वाक्य	161

APPENDIX

Reader's Guide


Glossary

Maps

Destiny

Illustrations, Doré

NEW TESTAMENT



यीशु ज़ोवं, “हे बाजी एन माफ़ करां एन न ज़ानन् कि एना कुन लोरेम केरने।”
ते तैनेई तैसेरे लिगडां केरे लेइ पेरची छेडतां शर्त रखवू ते एण्पू मामेई बंटां।
लूका 23:34

मत्ती

1 अब्राहमेरी औलादी मरां दाऊद राज़ो थियो, दाऊद राज़ेरे औलादी मरां यीशु मसीह थियो। यीशु मसीहेरे दादे-पड़दादां केरां नंवां इना आन। 2 अब्राहमेरू मट्टु इसहाक थियूं, इसहाकेरू याकूब, याकूबेरां मट्टां यहुदा ते तेसेरे ढूला थियो। 3 यहुदा ते तामारेरां मट्टां परेस ते जेरह थियां, परेसेरू मट्टु हेसोन, हेसोनेरू एराम, 4 ते एरामेरू अम्मीनादाब, अम्मीनादाबेरू नहशोन, नहशोनेरू सलमोन, 5 ते सलमोन ते तेसेरी कुआन्श राहाबेरू मट्टु बोआज थियूं, ते बोआज ते तेसेरी कुआन्श रूतरू ओबेद, ओबेदेरू यिश्, 6 ते यिश्रू मट्टु दाऊद राज़ो थियो, दाऊद राज़ेरू मट्टु सुलैमान तैस कुआन्शी सेइं पैदा भोव, जै पेइली उरियाहरी कुआन्श थीं। 7 सुलैमानेरू रहबाम, रहबामेरू अबिव्याह, अबिव्याहेरू आसा, 8 ते आसारू यहोशाफात, यहोशाफातेरू योराम, ते योरामेरे खानदानेरे मरां उज्जियाह पैदा भोव। 9 उज्जियाहरेरू योताम, योतामेरू आहाज, आहाजेरू हिजकियाह, 10 ते हिजकियाहेरू मनशे, मनशेरू आमोन, आमोनेरू मट्टु योशियाह थियूं 11 ते योशियाहेरां पोद्लडां युकुन्याह ते तेसेरे ढूला थियो, जैना गिरफ्तार भोइतां बाबेलेरी गुलेमीं मां गानेरे वक्ते मां ज़मोरां थियां। 12 गिरफ्तार भोइतां बाबेलेरी गुलेमीं मां गानेरे पत्ती युकुन्याहेरू शालतियेल ते शालतियेलेरू जरुब्बाबेल, 13 ते जरुब्बाबेलेरू अबीहूद, अबीहूदेरू एलयाकीम, एलयाकीमेरू अजोर, 14 ते अजोरेरू सादोक, सादोकेरू अखीम, अखीमेरू एलीहूद 15 ते एलीहूदेरू एलीआजर, एलीआजारेरू मत्तान, मत्तानेरू याकूब, 16 ते याकूबेरू यूसुफ, ते यूसुफ मरियमरो मुन्श थियो, ते मरियमरू मट्टु यीशु पीए, जैस जो मसीह ज़ोतान। 17 एन्चरे अब्राहमे करां दाऊद राज़े तगर च़ेवथे पीड़ी भोइ, ते दाऊद राज़े करां यहुदी केरे गिरफ्तार भोइतां बाबेलेरी गुलेमीं मां गाने तगर च़ेवथे पीड़ी भोइ, ते गिरफ्तार भोइतां बाबेले मां गाने करां देइतां यीशु मसीह तगर च़ेवथे पीड़ी भोइ। 18 यीशु मसीहेरू ज़म एन्चरे सेइं भोव, कि ज़ैखन तैसेरी अम्मा मरियमरी कुडमाइ यूसुफ नंवे एक्की मैन्हु सेइं भोरी थी, त तैन केरे ढूला भोने करां पेइले मरियम पवित्र आत्माेर शक्ति सेइं दोर्जीती भोइ। 19 तैसरो मुन्श यूसुफ ज़ै धर्मां मैन्हु थियो, ते तैस बदनाम केरनि न थियो चातो। तैनी चुपचारे इन सोचू, कि मीं एस सेइं ढूला नई बनानो। 20 हेजू ते एन सोचने लोरो थियो, त प्रभुएरे एक्की स्वर्गदूते तैस सेइं सुपने मां एइतां ज़ोव, “हे यूसुफ! तू ज़ै दाऊदेरे खानदाने मरां आस, तू मरियम अपनि कुआन्श बनाने करां न डर, किजोकि ज़ैन तैसारे पेटे मां आए तैन पवित्र आत्माेर तरफां आए। 21 तैस मट्टु भोनुए, ते तू तैसेरू नवं ‘यीशु’ रेखां, किजोकि तैए अपने लोकन तैन केरे पापन करां मुक्ति देलो।” 22 एन सब किछ एल्हेरेलेइ भोव, कि ज़ैना वचन प्रभुए यशायाह नेबेरे ज़िरिये ज़ोरे थिये पूरे भोए कि, 23 “हेरा, अक अइलाई कुई पेटे भारी भोली, ते तैस अक मट्टु भोलू, ते लोक तैस जो इम्मानुएल ज़ोले” ज़ेसेरो मतलब ई आए, परमेशर असन सेइं साथी आए। 24 तैखन यूसुफ निइलारां बीइडो त तैनी परमेशररे स्वर्गदूतेरू ज़ोनु मन्नु, ते मरियमी सेइं ढूला बनाव ते अपने घरे आनी। 25 एन ज़ातगर तैस मट्टु न भोवं तांतगर ते तैस सेइं साथी न झुल्लो ते ज़ैखन तैस मट्टु भोवं त यूसुफे तैस मट्टेरू नवं यीशु रख्खू।

2 हेरोदेस राज़ेरे ज़माने मां ज़ेइस यहूदिया इलाकेरे बैतलहम नगरे मां यीशु पैदा भोव, त पूर्वरां किछ जोष्टी लोक यरूशलेम नगरे मां आए। 2 ते तैना लोकन पुछ्छने लगगे, “यहुदी लोकां केरो राज़ो ज़ै ज़मोरोए ते कोइ आए? किजोकि असेईं पूरबे मां तैसेरो तारो लोरोए, ते आस तैस कां मथ्यो टेकने ओरेस।” 3 ज़ैखन हेरोदेस राज़े ए गल शुनी, त हेरोदेस राज़ो ते कने यरूशलेम नगरेरे सारे लोक घबराए। 4 ते हेरोदेस, यहूदी लोकां केरे प्रधान याजक ते शास्त्री लोक अकोट्टे केरतां तैन पुछ्छने लगगे, “मसीह कोइ पैदा भोरो लोइ?” 5 तैनेई तैस सेइं ज़ोव, “यहुदिया इलाकेरे बैतलहम नगरे मां, किजोकि (बड़े पेइले) मीका नेबे एन्चरे लिखोरूए, कि परमेशरे ज़ोव, 6 “हे बैतलहम नगर, तू ज़ैन यहूदिया इलाके मां आस, यहूदियारे इलाकन मां

तू बडू खास नगर आस, किजोकि तीं मरां अक एरो हाकिम निसेलो ज़ै मेरे लोक इस्राएलेरी रखवाली केरेलो” 7 ज़ैखन हेरोदेस राज़े एन शुनु, त तैनी जोष्टी चुपचारे कुजेइतां तैन करां तारो निसनेरे ठीक वक्तेरे बारे मां पतो कियो। 8 ते तैनी जोष्टी एन ज़ोइतां बैतलहम नगरे जो भेजे, कि “गाथ, ते तैस बच्चेरे बारे मां रोइचारे पतो केरा ते ज़ैखन तुसन पतो लगगे, त (वापस एइतां) मीं भी पतो देइयथ ताके अवं भी तैस कां गेइतां मथ्यो टेकी।” 9 तैना जोष्टी (हेरोदेस) राज़ेरी गल शुन्तां (यरूशलेम नगरेरां) च़ले जे। ते अकदम तै तारो, ज़ै तैनेई पूरबे मां लोरो थियो, तैन अग्री-अग्री च़लो ते तैस घरेरे बा रूको ज़ैडी तैन मट्टु थियूं। 10 ज़ैखन तैनेई तै तारो लव, त तैना बड़े खुश भोए। 11 तैखन तैना घरे अन्तर जे ते तैन मट्टु तैसेरी अम्मा मरियमी कां लाव ते तैस मट्टे कां मथ्यो टेको। तैखन तैनेई अपने-अपने खज़ानेरे झोले खोलतां सोनु, लोबान ते मुर तैस कां च़ाढू। 12 जोष्टी केरे तैडू निसनेरां पत्ती, तैन सुपने मां ए बिस्तार मैल्लो कि वापस हेरोदेसे कां न गेइयथ। एल्हेरेलेइ तैना वापस कोन्ची होरि बत्तां अपने मुलखे जो च़ले जे। 13 जोष्टी केरे गानेरां पत्ती, अचानक प्रभुएरो अक स्वर्गदूत यूसुफे सुपने मां मैल्लो ते ज़ोने लगगे, “उठ, बच्चो ते तेसेरी अम्मा नेइतां मिस मुलखे जो नश। ते मेरे ज़ोने तगर तैडी रेइयां, किजोकि हेरोदेस राज़ो बच्चे तोपतां मारने चाते।” 14 यूसुफ निइलारां उठो ते मट्टु ते तेसेरी अम्मा साथी नेइतां रातो-रात मिस मुलखे जो च़लो जेव। 15 हेरोदेसेरे मरने तगर यूसुफ तैडी राव, ताके प्रभुएरू तैन वचन पूरू भोए, ज़ैन होशे नेबे लिखोरू थियूं, “मीं मिस मुलखे मरां अपनु मट्टु कुजाव।” 16 ज़ैखन हेरोदेसे जोष्टी केरे धोखे बैजरो पतो लगगे, त तैस बडी सरक आई। तैनी अपने मैन्हु भेजतां, ज़ैन गल्लां केरो पतो तैस जोष्टन करां मैल्लोरो थियो, तैनी बैतलहम नगरे ते तेसेरे आसेपासेरे इलाकन मां सिपाही भेजतां सारां मट्टां, ज़ैना दूई सालां केरां या दूई सालन करां निकड़ां थियां मारां। 17 ज़ैखन एन भोव, त तैखन तैन वचन पूरू भोव, ज़ैन यिर्मयाह नेबे ज़ोरू थियूं। तैनी ज़ोव, 18 “रामाह नगर मां बेडे लेरां ते मातमेरि आवाज़ शुनोई, राहेल अपने बच्चां केरे लेइ लेरां देने लोरी, तैसरो दिल ठंडो न भोए, किजोकि तैसेरे बच्चे मेरि जोरन।” 19 हेरोदेसेरी मौतारां पत्ती, ज़ैखन यूसुफ मिस मुलखे मां थियो, त अचानक प्रभुएरो स्वर्गदूत तैस सुपने मां लेइहोव ते तैस सेइं ज़ोने लगगे, 20 “उठ, बच्चो ते कने तेसेरी अम्मा साथी नेइतां इस्राएल मुलखे जो वापस च़लो गा, किजोकि ज़ैना लोक बच्चे मारने चाते थिये, तैना मेरि जोरेन।” 21 फिरी यूसुफ निइलारां बीइडो, ते बच्चो ते तेसेरी अम्मा साथी कन्ता इस्राएल मुलखे जो वापस आव। 22 एन ज़ैखन यूसुफे एन शुनु कि अरखिलाउस अपने बाजी हेरोदेसेरी ठैरी यहूदिया इलाके पुड राज़ केरने लगगोरो, त तै तैडी गाने करां डरो। एल्हेरेलेइ ज़ैखन यूसुफे सुपने मां परमेशररो बिस्तार मैल्लो, त तै गलील इलाके जो च़लो जेव। 23 ते तैडी पुजतां तै नासरत नंवेरे नगर मां राने लगगे, ताके तैन वचन पूरू भोए, ज़ैन परमेशरे अपने नेबी केरे ज़िरिये जोरो थियूं। तैनेई ज़ोव, “तैस जो नासरी ज़ोले।”

3 तैन दिहाइन मां यूहन्ना नंवेरो मैन्हु, ज़ै बपतिस्मो देनेबालो थियो, यहूदिया इलाकेरे सुनसान ठैरी मां अवं। तै लोकन ज़ैना तैस कां एइते थिये, तैन ई प्रचार केरतो थियो, 2 “अपने पापन करां मनफिराथ, किजोकि स्वर्गेरू राज़ नेइ ओरूए!” 3 ई तैए ज़ेसेरे बारे मां यशायाह नेबे एन ज़ोरू थियूं, “कोई सुनसान ठैरी मां लोकन, ज़ैना तैस कां गातन, तैन उच्ची आवाजी सेइं ज़ोले कि ‘तुसन कां प्रभु एजनेबालो आए, एल्हेरेलेइ तैसेरी बत तियार केरा ते कने तैसेरेलेइ सडकां सिद्धी केरा।’ (यानी, प्रभुएरे लेइ तुस अपने दिल साफ़ केरा)” 4 यूहन्ना आम लिगड़ां लातो थियो ज़ैना लिगड़ां ऊंटेरे बालन सेइं बनोरां थियां। तै अपनि कमरी पुड चमडेरू मज़ बंधतो थियो। ते तै टिट्टां त कने जंगलेरू माछी खातो थियो। 5 तैखन यरूशलेम नगरेरे बड़े लोक ते यहूदिया इलाकेरे बड़े लोक ते यरदन दरियारे आसे-पासेरे इलाकन मरां लोक यूहन्नारी गल्लां शुन्नेरे लेइ तैस कां एइते थिये। 6 ते तैनेई अपने पाप मेन्तां यूहन्ना करां यरदन दरियाए मां बपतिस्मो नीयो। 7 एन ज़ैखन तैनी हेरू कि बड़े फरीसी ते सडकी लोक बपतिस्मो नेनेरे लेइ तैस कां एजने लोरेन, त तैनी

तैन सेईं ज़ोव, “तुस ज़ेहरीले सप्येरे ज़ेरे बुरे आथ! तुसन केनि ज़ोव कि, एजनेबाले परमेशरेरे कोपे करां नशशा? 8 सज़ाईं करां बचनेरे लेइ तेना कम्मां केरा, ज़ैन सेईं पतो लग्गे तुसेईं सच्च्चे पापन करां मन फिरावरपो। 9 ते अपने-अपने दिले मां एन न सोचा कि ‘अब्राहम इश्शो बाजी आए’ (परमेशर तुशशे पाप सिर्फ एल्हेरेलेइ माफ़ न केरेलो कि तुस अब्राहमेरी औलाद आथ), किजोकि अवं तुसन सेईं ज़ोताई कि परमेशर इन घोड़न मरां भी अब्राहमेरे लेइ औलाद पैदा केरि सकेते! 10 ते हुन्ना त बुटां केरे ज़ीलन पुड़ परमेशरेरो मैक्कु रख्खोरपो, एल्हेरेलेइ ज़ै कोई तैस बुटेरो ज़ेरो भोते, ज़ै रोडो फल न दे, तै कटनोए ते अग्गी मां छुडनोए। 11 अवं त तुसन पैनी सेईं बपतिस्मो देताई किजोकि तुसेईं मनफिरोरोए, पन मसीह ज़ै मेरे बाद एजनेबालोए, तै मीं केरां भी महान आए। अवं त तैसेरो गुलाम भोनेरे काबल भी नई कि तैसेरे बूट छुई। तै तुसन पवित्र आत्माई सेईं ते अग्गी सेईं बपतिस्मो देलो (ज़ैना मन फिरान, तैनन)। 12 तैसेरू छज्ज तैसेरे हथ्ये मां आए ते तै खलाइ रोडेचारे साफ केरेलो, तै गेहुं अपने कोठारे मां रखेलो, पन झाझी तैस अग्गी मां फुकेलो ज़ै कथे न हिश्शो। (एल्हेरेलेइ पापन करां मनफिराथ नई त परमेशर तुसन सज़ा देलो) 13 तैस मौके यीशु गलील इलाके मां यरदन दरियाए बन्ने पुड़ यूहन्ना कां अव, ताके तैस करं बपतिस्मो ने। 14 पन यूहन्ना, यीशु जो इन ज़ोइतां रोकने लागे, “मीं तीं करां बपतिस्मो नीयोरो लोइते, फिरी किजो तू मीं करां बपतिस्मो नेने ओरोस?” 15 पन यीशुए तैस ईं जुवाब दित्तो, “हुनी तू एन्चरे भोने दे, किजोकि एन्चरे केरतां अस तैन केरतम ज़ैन परमेशर चाते।” तैखन यूहन्ना तैसेरी गल मन्नी। 16 ते यीशु ज़ैखन बपतिस्मो नेइतां पैनी मरां बेइर अव, त तैस मौके हेरा अम्बर खुल्ली ज़ोव। ते तैनी पवित्र आत्मा कबूतेरी शकली मां एप्पु पुड़ एइती लाई। 17 ते तैखन हेरा अम्बरे मरां ए आवाज़ आई (त यीशुएरे बारे मां ज़ोव), “एन मेरू ट्वाळू मडू, अवं एस पुड़ बडो खुश आई।”

4 तैल्ला पत्ती, पवित्र आत्मा यीशु सुनसान ठैरी मां नीयो, ताके शैतान तैसेरी अज़मैइश केरे। 2 40 दिहाइ ते 40 रातन किछ न खानेरां पत्ती तैस ढलुख लागी। 3 त तैखन शैताने ज़ैस जो अज़माने बालो भी ज़ोतन, तैस कां एइतां ज़ोव, “अगर तू परमेशरेरू मडू आस, त इन घोड़न जो हुक्म देइतां साबत केर, कि एना रोटी बनन ताके तू खेइ सकस।” 4 यीशुए तैस जुवाब दित्तो, “अवं न केरेलो किजोकि परमेशेरी किताबी मां लिखोरूप, ‘मैन्हू सिर्फ रोटेईं सेईं ज़ींतो न राए, बल्के तै हर गल मन्ने सेईं ज़ींतो राते, ज़ै परमेशर ज़ोते।” 5 फिरी शैताने तै पवित्र नगर यरूशलेमे मां नीयो ते मन्दरेरी उच्चि छम्पी पुड़ नेइतां खडो कियो। 6 तैखन तैनी यीशु सेईं ज़ोव, “अगर तू हकीकति मां परमेशरेरू मडू आस त इट्टां बिछड़तां साबत केर, किजोकि पवित्रशास्त्रे मां लिखोरूप, ‘तै तेरे लेइ अपने स्वर्गदूतन हुक्म देलो, ते तैना तीं अपने हथ्यन मां ट्वालले, ताके तेरे पावन केन्ची घोड़न सेईं ठोकर न लग्गे।” 7 यीशुए तैस सेईं ज़ोव, “(नई, अवं छाल न मारेलो, किजोकि) परमेशेरी किताबी मां एन भी लिखोरूप, ‘तू प्रभु अपने परमेशेरे अज़मैइतां इन साबत केनेरी कोशिश न केर कि तै अपने वादे पूरे केरते या नई।” 8 तैखन शैताने, यीशु एककी बडे उच्चे पहाड़े पुड़ नीयो, ते तैडी दुनियारां सारां राज़ां ते तैन केरि धन दोलत तैस हिराई। 9 तैखन तैनी यीशु सेईं ज़ोव, “अगर तू मीं कां मथ्यो टेकस ते मेरी आराधना केरस, त अवं इन सब किछ तीं देलो।” 10 यीशुए तैस जो ज़ोव, “हे शैतान! दूर भो, किजोकि परमेशेरी किताबी मां लिखोरूप, ‘तू सिर्फ प्रभु अपने परमेशेरे कां मथ्यो टेक ते तैसेरी आराधना केर।” 11 तैखन शैतान तैस करां चलो जेव, ते अकदम किछ स्वर्गदूत यीशु कां एइतां तैसेरी सेवा केरने लग्गे। 12 एक्सां केन्चे यीशु जो ज़ोव, कि यूहन्ना ज़ै बपतिस्मो देनेबालो थियो, कैद कियोरोए त यीशु यहूदिया इलाकेरां, गलील इलाके मां वापस अव। 13 ते नासरत नगर शैरतां कफनरहूम नगरे मां राने लग्गे, ज़ैन समुन्दरेरे बन्ने पुड़ आए, ज़ैडी जबलून ते कने नप्ताली गोट्लेरे लोक राते थियो। 14 ताके तैन वचन ज़ैन यशायाह नेवे ज़ोरू थियुं पूरू भोए, तैनी ज़ोव, 15 “ज़ैना लोक जबलून ते नप्ताली गोत्रां

केरे इलाके मां आन, ज़ैना गलील समुन्दरेरे नेडे यरदन दरियाए उस पार, गलील इलाके मां आन, ज़ैडी गैर यहूदी लोक भी रातन, 16 (तैना लोक) ज़ैना पापेरे आंधरे मां बिश्शोरेन, तैनेई बड्डी लौ लई। ते लौ तैन पुड़ चमकी ज़ैना हमेशारे मौतारे आंधरेरे मुलखे मां बिश्शोरेन।” 17 तेइसेरू देतू यीशुए परमेशेरी खबर लोकन शुनानेरी सेवा शुरू की। तैनी लोकन ज़ोव, “अपने पापन करां मनफिराथ, किजोकि स्वर्गू राज नेडे ओरुए।” 18 एक्सां ज़ैखन यीशु गलील समुन्दरेरे बन्ने चलोरो थियो, त तैनी दूई मैन्हू लाए ज़ैना मेछली ट्लानेबाले थियो। तैना मेछली ट्लानेरे लेइ समुन्दरे मां ज़ाल छेड्डी राओरे थियो। तैन मरां एक्केरू नवं शमोन, ज़ैस जो पतरस भी ज़ोतन, ते तैसेरो ढूला ज़ेसेरू नवं अन्दियास थियुं। 19 यीशुए तैन सेईं ज़ोव, “एज्जा मेरे चले बना। अवं तुसन शिखालेलो कि केन्चरां होरे मैन्हू मेरे चले बनानेन।” 20 तैना अकदम अपना ज़ालां छेइतां यीशु पत्ती चले जे। 21 ते तैना तैट्टां थोडे ज़ेरे अग्गर जे, त यीशुए होरे दूई ढूला, यानी याकूब त कने तैसेरो ढूला यूहन्ना अपने बाजी जब्दी सेईं साथी किशती मां लाए। तैना किशती मां ज़ालां ठीक केरने लग्गेरे थियो। यीशुए तैना भी कुजाए (कि तैना तैसेरे चले बनन)। 22 ते तैना भी तैखने किशती ते अपने बाजी तैडी ज़ेरे छेइतां यीशु सेईं साथी चले जे। 23 तैल्ला पत्ती, यीशु सारे गलील इलाके मां हंतो फिरोरो राव। तै तैन केरे प्रार्थना घरन मां लोकन शिक्षा देतो राव ते परमेशेरे राज़ेरी खुशखबरी शुनातो राव। ते तै लोकां केरि हर किसमेरी बिमेरी ते कमज़ोरी दूर केरतो राव। 24 यीशुएरे बारे मां ई खबर सारे सीरिया इलाके मां मुशूर भोइ जेई। एसेरे वजाई सेईं, ज़ैडी कोन्ची तै जेव, तैडी लोक सेबभी बिमारन ज़ैना हर किसमेरी बिमेरी ते तकलीफन मां फसोरे थियो, ते ज़ैन लोकन पुड़ भूतां केरो सायो थियो, ते ज़ैना मिरागे रोगी थियो, ते ज़ैना अधरंगे रोगी थियो, तैना यीशु कां आने ते यीशुए तैना सारे बज़्ज़ाए। 25 एसेरे वजाई सेईं मैन्हू केरि बडी भीड़ यीशु पत्ती चली। तैना लोक गलील, दिकापुलिस इलाकां केरे, यरूशलेम नगरेरे, यहूदिया इलाकेरे, ते यरदन दरियाए पैरीं पासेरे इलाकां केरां ओरे थियो।

5 यीशु तैना हछे लोक लेइतां एककी पहैडी पुड़ चलो जेव, ते ज़ैखन तै शिखालनेरे लेइ बिश्शो त तैसेरे चले तैस कां आए। 2 तैखन यीशु तैन लोकन शिक्षा देने लग्गे, 3 “परमेशर तैन लोकन बरकत देते, ज़ैना ज्ञानतन कि तैन परमेशेरी ज़रूरेते, किजोकि तै तैन पुड़ राज़ केरेलो। 4 परमेशर तैन लोकन बरकत देते, ज़ैना दुखी आन, किजोकि परमेशर तैन तस्सली देलो। 5 परमेशर तैन लोकन बरकत देते ज़ैना नम्र आन, किजोकि परमेशर तैन, तैना सैरी बरकतां देलो ज़ैन केरो तैनी वादो कियोरोए। 6 परमेशर तैन लोकन बरकत देते, ज़ैना परमेशेरी नज़री मां रोडी गल्लां केनेरी बडी इच्छा रखतन, (जेन्चरे कोई ढूलुखोरो खाने पीनेरी इच्छा रखते) तैन परमेशर अपनी मेर्जी पुड़ चलेनेरे लेइ शक्ति देते। 7 परमेशर तैन लोकन बरकत देते, ज़ैना दया केरतन, किजोकि परमेशर भी तैन पुड़ दया केरेलो। 8 परमेशर तैन लोकन बरकत देते, ज़ैन केरे मन साफ आन, किजोकि तैन परमेशर दर्शन देलो। 9 परमेशर तैन लोकन बरकत देते, ज़ैना शैनतरां कम्मां केरतन, किजोकि तैन जो परमेशेरे बच्चे जोले। 10 परमेशर तैन लोकन बरकत देते, ज़ैना परमेशेरी नज़री मां रोडि गल्लां केनेरे वजाई सेईं सताए गातन, किजोकि परमेशर तैन पुड़ राज़ केरते।” 11 “परमेशर तुसन बरकत देलो, ज़ैखन लोक तुसन मेरे चेलो भोनेरे वाजाई सेईं तुशरी तुहीन केरन ते स्तान ते झूठ ज़ोइतां हर किसमेरी बुरी गल्लां तुशशे बारे मां ज़ोन। 12 तैखन तुस खुशी रेइयथ ते मघन भोइयथ, किजोकि परमेशेरे ज़ैन इनाम स्वर्ग मां तुशशे लेइ रख्खेरूप तैन बडू बडूए, किजोकि लोकेई बडे पेडले तैना नबी भी एन्चरे सतारे थियो।” 13 “तुस इस दुनियारे लोकां केरे लेइ लूनेरे ज़ेरे आथ, पन अगर लूनेरो स्वाद चेलि गाए, त फिरी दुबारां केन्चरे तैसेरो स्वाद वापस आनेले? फिरी तैन कोन्ची कम्मरू न राए, सुवाए बेइदोव शारनेरां ते लोकां केरे पावेई सेईं ढलेन्चोनेरां।” 14 “तुस इस दुनियारे लोकां केरे लेइ लोअरे ज़ेरे आथ। ज़ैन नगर पहाड़े पुड़ बसते तैन कथे भी छेप्पी न सके। 15 लोक

बलतो दीयो हेटी मां न रखन, पन तैस उच्चै ठैरी रखतन ताके घरेरे सैरी मैनु लौ पुज्जे। 16 ते एन्चरे तुशुशी लौ मैनु केरे सामने एरी चमके, ताके तैना तुशुशां रोड़ां कम्मां हेरतां तुशुशे स्वर्गेरे बाजेरी तारीफ़ केरन।” 17 “एन न बुझथ कि अवं मूसोरे कानून या नेबी केरे कितानन मां लिखोरी गल्लां रद केरने ओरोई। अवं तैन रद केरने नई बल्के पूरी केरने ओरोई। 18 किजोकि अवं तुसन सेईं सत्र ज़ोताई, कि ज़ां तगर धरती त अम्बर खतम न भोए, तांतगर परमेशेरे कानूने मरां अक मात्रा या बिंदी भी न टलेली, ज़ां तगर सब किछ लिखोः पूरू न भोए। 19 एल्हेरेलेइ ज़ै कोई इन निकड़े करां निकड़े हुक्मन मरां केन्ची एक्की ज़ेरे टलोइते ते होरन भी एन्ने केरनू शिखालते, तै स्वर्गेरे राज्जे मां सेबभन करां निकड़ो भोलो, पन ज़ै तैन हुक्मन पुड़ अमल केरते ते होरन भी एन हुक्मन पुड़ च़लनेरे बारे मां शिखालते त तै स्वर्गेरे राज्जे मां बड्डो भोलो। 20 किजोकि अवं तुसन सेईं ज़ोताई कि ज़ां तगर तुस शास्त्री ते फरीसी लोकन करां रोड़े च़ारे कानूने न मन्नेले, तांतगर तुस स्वर्गेरे राज्जे मां दाखल न भोइ सकतथ।” 21 “तुसेईं शुनेरू थियू कि परमेशेरे इशेसे दादे-पड़दादन सेईं ज़ोरू थियू, ‘खुन नई केरनो, ते ज़ै खुन केरेलो त तैस आदालत सज़ा देली।’ 22 पन मेरू ज़ोनू एने कि ज़ै कोई अपने दूलाए पुड़ क्रोध केरते, परमेशेरे तैसेरो इन्साफ़ केरेलो, ते ज़ै कोई अपने दूलाए जो निकम्मो ज़ोते त तैस भी महासाप मां जुवाब देनो पेंनोए, ते ज़ै कोई अपने दूलाए जो ‘बेवकूफ़’ ज़ोलो त परमेशर तैस नरकेरे अगारी सज़ा देलो। (Geenna.g1067) 23 एल्हेरेलेइ अगर तू अपनि च़दतल मन्देरे मां आनस, ते तैड़ी तीं याद एज्जे कि मीं अपने दूलाए सेईं किछ गिलोए। 24 त तू अपनि च़दतल बलिदान च़ादनेरे ठैरी पुड़ छेडतां पेड़ले अपने दूलाए सेईं मेल-मलाप केरां, फिरी अपनि च़दतल च़ेदां। 25 अगर कोई मैनु तीं पुड़ दाओ केरतां तीं आदालती मां नेनो चाते, त तू बत्तां तैस सेईं मेल-मिलाप केरां न त तैनी तू हाकिमे कां खड़ो केरनोस, ते तैनी तू सिपैहीएरे हवाले केरनोस ते सिपैहिए तू केद केरतां छेडनोस। 26 अवं तुसन सेईं सत्र ज़ोताई कि ज़ां तगर तू पाई-पाई न देलो त तांतगर तैदां छुटी न सकेलो।” 27 “तुसेईं शुनेरू थियू, कि ई हुक्म दित्तोरो थियो, ‘बदमाशी नई केरनि।’ 28 पन अवं तुसन इन भी ज़ोताई कि ज़ै कोई केन्ची कुआन्शी पुड़ गेन्दी नज़रां सेईं तकते, तैनी अपने दिले मां पेड़ली तैस सेईं बदमाशी केरि छुट्टी। 29 अगर तेरी देइनी अछ तीं पाप केरनेरे लेइ ठोकर खुवाए, त तैस केदतां शार, किजोकि तेरी पूरी जान नरके मां छुट्टे गाने करां तेरे लेइ एने रोडूए कि तेरी जानी मरां अक अंग नाश भोए। (Geenna.g1067) 30 अगर तेरो देइनो हथ तीं पाप केरनेरे लेइ ठोकर खुवाए त तैस केदतां शार, किजोकि तेरी पूरी जान नरकेरी अग्गी मां गाने करां तेरे लेइ एन्ने रोडूए कि तेरी जानी मरां अक अंग नाश भोए।” (Geenna.g1067) 31 “एन भी ज़ोरू थियू, ‘ज़ै कोई अपनि कुआन्शा शारे त एन ज़रूरीए कि फारखी लिखतां हावाले केरे।’ 32 पन अवं तुसन सेईं ज़ोताई, कि ज़ै कोई अपने कुआन्शी बदमेशेरे अलावा होरि केन्ची गल्ली पुड़ फारखी दे, त तै तैस केरां बदमेशी केरवाते। ते ज़ै कोई तैस शैरीरी कुआन्शी सेईं इला बनाते, त तै भी तैस सेईं बदमाशी केरते।” 33 “तुसेईं शुनोरू, कि ई हुक्म दित्तोरो थियो, ‘झूठी कसम नई केरनि, पन कसम प्रभुएरे लेइ पूरी केरथ।’ 34 पन अवं तुसन सेईं ज़ोताई कि कथे कसम न केरथ, न स्वर्गेरी, किजोकि तै परमेशेरो तखत आए। 35 न ज़मीनारी किजोकि परमेशर तैड़ी पाव रखते, ते न यरूशलेम नगरेरी किजोकि तैन महा राजां केरू नगर आए। 36 ते न अपने दोगेरी कसम केरथ, किजोकि तुस अपने अक बाल भी छित्तो या कालो न केरि सकतथ। 37 पन हांएरी ठैरी हां ते नाएरी ठैरी न ज़ोथ, किजोकि ज़ैन किछ एस करां जादे तैन बुरेईं यानी शैतानेरे पासेरां आए।” 38 “तुसेईं शुनोरूए, कि मूसेरे कानूने मां लिखोःए, कि अछछरे बदले अछ ते दंतरे बदले दंत। 39 पन अवं तुसन सेईं ज़ोताई कि, बुरे मैनु करां बदलो न नेइयथ। अगर कोई तेरे देइनी खैखोड़ी पुड़ थप्पड़ बालो त तू बाएं पासो भी तैसेरे पासे रेख्वां। 40 ते अगर कोई मुकदमो केरतां तेरी कमीज़ नेनी चाए त तू कोट भी तैसेरे हवाले केरां। 41 ते अगर कोई सिपाई तीं भारो छूने अक मील नेने चाए त तू दूई मील गेइयां। 42 ज़ै कोई तीं करां किछ मग्गे, तैस दे। ते ज़ै कोई तीं करां

ओधार मग्गे तू तुत्तर न फिरेइयां।” 43 “तुसेईं शुनोरूए, कि मूसेरे कानूने मां लिखोरूए, कि ‘अपने पड़ोसी सेईं अपनो ज़ेरो प्यार केरथ ते दुश्मने सेईं बेर रेखथ।’ 44 पन अवं तुसन सेईं ज़ोताई, कि अपने दुश्मन सेईं प्यार केरा, ते ज़ैना तुसन सतातन तेन केरे लेइ प्रार्थना केरा। 45 ज़ैस सेईं तुस अपने स्वर्गेरे बाजी केरे बच्चे बेनि सकतथ, ज़ै अपनो दिहाडो अपने रोड़े लोकन पुड़ चमकाते ते बुरे लोकन पुड़ भी, ते धेर्मी लोकन पुड़ झड़ी देते ते बुरे लोकन पुड़ भी। 46 किजोकि अगर तुस तैन्ने लोकन सेईं प्यार केरथ ज़ैना तुसन सेईं प्यार केरतन त तुसन कुन इनाम मैलेलू? कुन चुंगी घिन्ने बाले भी एन्ने न केरन?” 47 “ते अगर तुस सिर्फ अपने दूलान जो नमस्कार ज़ोथ, त तुस होरन करां जादे कुन केरतथ? कुन गैर कौमां केरे लोक ज़ैना परमेशेरे कानूने न मननू तैना भी एरू न केरन? 48 तुसन तैन लोकन सेईं प्यार केरनेरी ज़रूरत आए, ज़ैना तुसन सेईं प्यार न केरन, एन्चरां तुस सिद्ध भोले ज़ेन्चरे स्वर्ग मां रानेबालो तुशुशो बाजी सिद्ध आए।”

6 “खबरदार, तुस अपने रोड़ां कम्मां सिर्फ लोकन हिरानेरे लेइ न केरा, नई त तुशुशो स्वर्गेरो बाजी तुसन कोई इनाम न देलो। 2 एल्हेरेलेइ ज़ैखन तू गरीब मैनु दान देस, त तू दुबूरो न बजेइयां, ज़ेन्चरे पाखंडी लोक प्रार्थना घरन मां ते गेल्लन मां केरतन, ताके लोक तेन केरि तारीफ़ केरन। अवं तुसन सेईं सत्र ज़ोताई कि ज़ैन इनाम तैन मैलनू थियू, तैन सिर्फ इन्ने, कि लोकेई तेन केरि तारीफ़ की (परमेशेरे करां तैननू कोई इनाम न मैलेलो)। 3 पन ज़ैखन तू गरीब मैनु दान देस, त केन्ची पतो न लोड़े लग्गोरो कि तीं कुन दित्तू। 4 ताके तेरू दान छप्पोरू भोए, तैखन तेरो बाजी ज़ै छेपतां तकते, तीं इनाम देलो।” 5 “ज़ैखन तू प्रार्थना केरस त पाखंडी लोकां केरो ज़ेरो न बेना, ज़ैना प्रार्थना घरन मां ते सड़कां केरे मोड़न पुड़ खेडोइतां प्रार्थना केरनि सुखातन, ताके लोक तेन तवकन ते तैन केरि तारीफ़ केरन। अवं तुसन सेईं ज़ोताई कि ज़ैन इनाम तैननू मैल्लोरू लोड़तू थियू, तैन सिर्फ इन्ने, कि लोकेई तेन केरि तारीफ़ की (परमेशेरे करां तैननू कोई इनाम न मैलेलू)। 6 पन ज़ैखन तू प्रार्थना केरस त अकेल्लो अपने कमरेरो अन्तर गा, ते दार बद केरतां अपने परमेशेरे कां ज़ै लेइहोए न तैस कां प्रार्थना केरा। तैखन तुशुशो बाजी परमेशर ज़ै लेइहोए न, ज़ै हर वक्त तीं तकतो राते तै तीं इनाम देलो। 7 प्रार्थना केरते बार, गैर कौमां केरू ज़ेरू बकबक न केरां, किजोकि तैना समझतन कि तेन केरे बकबक केरने सेईं तैन केरि प्रार्थना शुनी गाली। 8 तेन केरे ज़ेरे न बना, किजोकि तुशुशो बाजी तुशुशे मग्गे करां पेड़ले तुशुशी ज़रूरतां जानते।” 9 “एल्हेरेलेइ तुस एन्चरे प्रार्थना केरा, हे इशेसे बाजी, तू ज़ै स्वर्ग मां आस, लोक तेरी आदर केरन किजोकि तू पवित्र परमेशर आस। 10 तू सेबभी लोकन पुड़ ते चीज़न पुड़ राज़ केरस। तेरी मज़ीं ज़ेन्चरे स्वर्ग मां पूरी भोचे, इस धेरती पुड़ भी भोए। 11 इशुशी रोजेरी रोटी अज़ असन दे। 12 ते ज़ेन्चरे अस ज़ैना इशे खलाफ़ बुराई केरतन, तैन माफ़ केरतम, तेन्चरे तू भी इशुशी बुरेईं माफ़ केर। 13 अज़मैइशेरे ज़िरिये असन पाप केरने न दे, पन बुरेईं यानी शैताने करां बचेइयां, (किजोकि राज़, शक्ति ते महिमा हमेशा तेरी भोती राए। आमीन।)” 14 “एल्हेरेलेइ अगर तुस लोकां केरे पाप माफ़ केरेले, त तुशुशो स्वर्गेरो बाजी भी तुशुशे पाप माफ़ केरेलो। 15 ते अगर तुस लोकां केरे पाप माफ़ न केरेले, त तुशुशो स्वर्गेरो बाजी भी तुशुशे पाप माफ़ न केरेलो।” 16 “ज़ैखन तुस बरत रखत, त पाखंडी लोकां केरू ज़ेरू अपनू तुत्तर न बगेइथ। तैना अपनू तुत्तर बिगाइतन, ताके लोकन पतो लग्गे कि एनेईं अज़ बरत रखोरूए ते तैन केरि तारीफ़ केरन। अवं तुसन सेईं सत्र ज़ोताई कि ज़ैन इनाम तैन मैलनू थियू तैन मैल्ली जेव। 17 बल्के ज़ैखन तू बरत रखस त अपनू तुत्तर थोइयां ते दोगे तेल मेल्लां। 18 ताके लोक नई, पन तेरो स्वर्गेरो बाजी, ज़ै लेइहोतोए न तै लाए कि तीं बरत रखोरूए ते तीं इनाम देलो।” 19 “एप्पू जेईं धरती पुड़ दौलत अकोट्टी न केरा, ज़ैड़ी कीडे खातन ते मोरचो लोतां नाश केरते, ते चोर तुशुशे घर टलोइतां च़ोरी केरतन। 20 बल्के रोडू केरतां अपने लेइ स्वर्ग मां दौलत अकोट्टी केरा ज़ैड़ी न कीडो लग्गे, ते न मोरचो लग्गे ते न चोर च़ोरी केरेले। 21 किजोकि ज़ैड़ी तेरी दौलत भोली, तैड़ी

तेरो दिल भी लगगेलो।” 22 “अछु जानैरे लेइ दीयेरी ज़ेरि आए, एल्हेरेलेइ अगर तेरी अछु रोड़ी साफ आए, त तेरी सारी जान लौ भोली। 23 अगर तेरी अछु खराब आए, त सारी जानी मां आंधरू भोलू। बस अगर जै लौ तीं मां आए तै आंधरू बेनि गाए, त तैन केत्रू आंधरू भोलू!” 24 “कोई मैन्हु दूई मालिकां केरि सेवा एककी वक्ते मां न केरि सके। न त एककी सेइं दुश्मनी केरेलो ते होरि सेइं प्यार केरेलो, या एककेरो बेनतां रालो त होरि न सुखालो। तुस परमेशरेरी ते दौलतरी, दुइयां केरि सेवा न केरि सकतथ। 25 एल्हेरेलेइ अवं तुसन सेइं जोताई, कि तुस अपने जिन्दगरी ज़रूरतां केरे लेइ फिक्क न केरा, कि तुस कुन खाले या कुन पीले, ते न अपने जानारी कि कुन लामेले। कुन प्राण रोटी करां ते जान लिगड़े करां बेधतां नई!” 26 “अम्बरेर चुड़ोल्लन हेरा! तैना न किछ बेन, ते न किछ कट्टन, ते न अकोट्टे केरतां रखन, फिरी भी तुश्शो स्वर्गरो बाजी तैन खाने जो देते ते तैन केरि हेरगेश केरते। कुन तुश्शी कदर तैन करां जादे नई? 27 तुसन मां एरो कौन आए, जै फिक्क केरतां अपनि उमर अक घड़ी भी बधैई सकते?” 28 “ते लिगड़े लेइ किजो फिक्क केरतथ? जंगले मां सोसनेरां फूडू हेरा कि तैना केन्चरे बेडोतन, न तैना मेहनत केरन, ते न तैना लिगड़ां बनान। 29 फिर भी अवं तुसन सेइं जोताई कि राजो सुलैमाने भी अपने सारे धन दौलतरे बावजूद भी तैन केरां जेरां लिगड़ा न लां। 30 एल्हेरेलेइ ज़ैखन परमेशर मैइदानरो घास, जै अज आए ते कालां लौवेन मां फुकनोए, एरी खूबसूरती देते, त हे घट विश्वासे बाले लोकव, कुन तै तुसन लिगड़ न देलो? 31 एल्हेरेलेइ तुस फिक्क केरतां एन न जोइयथ, कि “कुन खामेले, या कुन पीमेले, या कुन लामेले?” 32 किजोकि गैर कौमां एन गल्लां केरि फिक्की मां रेइचन। ते तुश्शो स्वर्गरो बाजी जानते, कि तुसन कोनां-कोनां चीजां केरि ज़रूरत आए। एल्हेरेलेइ तुस कोन्ची चीजरी फिक्क न केरा। 33 पन पेइले तुस अपने आपे परमेशरेरे राज़ेरे लेइ अर्पण केरा, ते तैन कम केरा ज़ैन परमेशरेरी नज़री मां रोडू भोते, त इना सैरी चीजां भी तुसन मैल्ली गैली। 34 एल्हेरेलेइ कालेरे बारे मां फिक्क न केरथ, किजोकि कालेरी दिहाड़ी अपने लेइ एप्पू फिक्क आनेली। अज़ेरे लेइ अज़ेरो दुख सुद्धोए।”

7 “केन्ची पुड़ दोष न लेइयथ, तुसन भी दोष न लगगेलो। 2 किजोकि जेन्चरे तुस होरि पुड़ दोष लाएले, तेन्चरे परमेशर भी तुश्शो इन्साफ केरेलो। जेन्चरे तुस होरि लोकन सेइं बर्ताव केरतथ, तेन्चरे परमेशर तुसन सेइं बर्ताव केरेलो।” 3 “तू अपने ढूलाएरी एछ्छी मां कूड़ो किजो तकतां, पन तेरी एछ्छी मां न गन आए, ते तैसेरो तू खियाल भी न केरस? 4 ज़द तेरी एछ्छी मां नग आए, त तू कौस ऐशी सेइं अपने ढूलाए जो जोई सकतां कि, ‘एई, अवं तेरी एछ्छी मरां कूड़ो केड्डी!’ 5 हे पाखंडी! पेइले अपने एछ्छी मरां नग कढ, ते फिरी अपने ढूलाएरी एछ्छी मरां रोड़े चारे तेकतां कूड़ो केड्डी सकतस।” 6 “जैना लोक परमेशरेरू वचन शन्नू न चान, तैन न शुनाथ। अगर तुस एन्चरे केरेले, त पवित्र चीज़ कुतरन कां छडनेरे बराबर ते कने मोती सूरन कां छडनेरे बराबर भोले, कि तैना तैन पव्वन हैठ ड्लन्चन ते बेदलोइतां तुसन पुड़ हमलो केरेलो।” 7 “परमेशरे करां मग्गा, त तुसन दित्तू गालू। ते तोप्पा, त तुसन मैल्ली गालू। ते दार गुडकाथ, त तुश्शे लेइ खोल्लू गालू। 8 किजोकि जै कोई मगते ते हासिल केरते, ते जै कोई तोपते तैस मैल्ली गाते, ते जै कोई दार गुडकाते त तैसेरेलेइ खोल्लू गालू। 9 तुसन मां एरो कौन आए, कि अगर तैसेरू मट्टू रोटी मग्गे, त तै तैस घोड़ दे? 10 या अगर मछली मग्गे, त तैस सप दे? 11 ते तुस बुरे भोनेरे बावजूद भी अपने मट्टन रोड़ी चीजां देनी ज्ञानतथ, त तुश्शो स्वर्गरो बाजी तुसन रोड़ी चीजां कि न देलो, जैना तैस करां मगतन? 12 ज़ेरू तुस चातथ कि लोक तुसन सेइं केरन, तुस भी तैन सेइं तेरहु केरा, किजोकि मूसरे कानूनेरी त कने नेबी केरि लिखोरी शिक्षा ईए आए।” 13 “तुस परमेशरेरे राज़े मां सिर्फ सुन्कडे दारेरां बत्तां गेइ सकतथ। किजोकि तैन दार चोडू, ते तै बत बडी खुल्ली आए जै नाशेरे पासे गाचे, ते तैस बत्तां गानेबाले बडे आन। 14 किजोकि तैन दार सोंकडू आए, ते तै बत असुखती आए, जै हमेशारे जिन्दगारे पासे गाचे, ते

तेरहां गानेबाले थोड़े आन।” 15 “झूठे नेबन करां खबरदार रेइयथ, जैना तुसन कां भैड्डां केरे रूपे मां एइतन पन असली मां तैना मारने बालां गिदां भोतन। 16 तुस तैन केरे कम्मन सेइं तैन पिशानेले, कुन लोक झल्लन सैहीयरां दाख कढतन ते केरी सैहीयरां फेगू ट्लोइतन? 17 एल्हेरेलेइ हर एककी रोड़े बुट्टे रोड़ो फल लगते, ते हर एककी बुरे बुट्टे बुरो फल लगते। 18 रोड़े बुट्टे बुरो फल न लग्गे, ते न बुरे बुट्टे रोड़ो फल लग्गे। 19 ते ज़ैस बुट्टे रोड़ो फल न लग्गे तै केटतां अग्गी मां फुकतां छडतन, तेन्चरे झूठे नेबन भी सजा मैलेली। 20 बरसा, तुस तैन केरे कम्मन सेइं तैन पिशानेले।” 21 “मींजो, ‘हे प्रभु, हे प्रभु,’ जोनेबाले सारे मैन्हु स्वर्गरे राज़े मां दाखल न भोले, पन जै, मेरे स्वर्गरे बाजी केरे मेज़ीं पुड़ चलने बालोए तै ज़रूर दाखल भोले। 22 इन्साफेरे दिहाड़ी बडे लोक मीं सेइं ज़ोले कि, ‘हे प्रभु, हे प्रभु,’ कुन असेईं तेरे नंवे सेइं भविष्यवाणी नई कियोरी? ते तेरे नंवे सेइं भूतां नई कढोरां ते तेरे नंवे सेइं बडे चमत्कार नई हेरेवरे? 23 तैखन अवं तैन जो साफ ज़ोलो, ‘अवं तुसन कथे न ज़ैनी, ओ बुरां कम्मां केरने बालाव, मेरे तुत्तर अग्रां दूर भोथ।’” 24 “एल्हेरेलेइ जै मेरी गल्लां शुनते ते तैन पुड़ अमल केरते त तै तैस अक्लमन्द मैनेरो ज़ेरो भोलो, जैनी अपनू घर शफडी पुड़ बनेवरुए। 25 झड़ी लग्गी ते हड़ाई आई ते अंगुबारी भोइ ते तैस घरे पुड़ पुज़ी, पन तैन घर न डुल्लू, किजोकि तैसेरी मुनीयाद पेक्की शाफ़डी पुक कढेरी थी। 26 पन ज़ै मेरी गल्लां शुनते ते तैन पुड़ अमल न केरे, त तै तैस बेवकूफ मैनेरो ज़ेरोए भोलो, जैनी अपनू घर रेती पुड़ बनेवरु थियुं। 27 झड़ी लग्गी ते हड़ाई आई अंधगुबारी भोइ ते तैस घरे कां पुज़ी ते तैन घर डुल्ली ज़ोवं ते बरबाद भोवं।” 28 ज़ैखन यीशुए एना सैरी गल्लां शुनेइतां झैडी, त सारे लोक तैसेरी शिक्षा शुन्तां हैरान भोए। 29 किजोकि यीशु तैन शास्त्री लोकां केरि ज़ेरि नई, बल्के अधिकारे सेइं शिक्षा देतो थियो।

8 ज़ैखन तै पहैडी पुड़ा उन्डो अवं, त बडे लोक तैस पत्पती चले। 2 तैखन एककी कोडे यीशु कां जैन्धु केरे बारे बिश्तां तैस कां मिन्नत केरतां ज़ोवं, “हे प्रभु अगर तू चास त मेरू कोड बज़्जोई सकतस।” 3 यीशुए तैस पुड़ हथ रेखतां ज़ोवं, “अवं चाताई, तू बज़्जोस।” ते तै कोडी तैखने साफ भोइ जेव। 4 यीशुए तैस सेइं ज़ोवं, “हेर, एस गल्लेरे बारे मां केन्ची सेइं किछ न जोइयां। बल्के अपनो आप याजक हिरा। तैल्ला पत्ती, तू अपने बेज़्जोनेरे वजाई सेइं चढतल चाढ, जेसेरे बारे मां मूसा नेबे कानून मां हुक्म दित्तोरोए, ताके लोकन पतो चले कि तू बेज़्जोरोस।” 5 ज़ैखन यीशु कफरनहूम नगर मां अवं त अक रोमी सूबेदार ज़ै 100 सिपेहिन केरो अफसर थियो, तैनी यीशु कां एइतां बिनती की। 6 “हे प्रभु, मेरो नौकर अधरंगेरो मरीज़ घरे बिमार भोरोए, तै चलनेरे काबल नई, ते तै बेडि तकलीफी मां आए।” 7 तैनी तैस सेइं ज़ोवं, “अवं एज्जेलो ते तैस बज़्जोइलो।” 8 सूबेदार ज़ोने लगे, हे प्रभु अवं एस काबल नई कि तू मेरे घरे मां एज्जी सकस; पन तू अगर सिर्फ ज़बाना सेइं जोस त मेरो नौकर बेज़्जोलो। 9 किजोकि अवं भी केन्चरे अधिकारे मां कम केरताई, ते सिपाही मेरे अधीन आन, ते ज़ैखन एककी जो ज़ोताई कि गा, त ते गाते ते होरि जो ज़ोतां एई, त ते एइते, ते अपने सेवके जो ज़ोताई इन कम केर त तै केरते। 10 यीशु एन शुन्तां हैरान रेइ जेव, ते एप्पू पत्ती चलने बाले मैन्न सेइं ज़ोने लगे, “अवं तुसन सेइं सच ज़ोताई, कि मीं इस्पाएल मुलखे मां इस गैर यहूदी मैनेरो ज़ेरो मैन्हु नई लोवरो ज़ै मीं पुड़ एत्रो विश्वास केरे।” 11 अवं तुसन सेइं ज़ोताई कि बडे गैर कौमां केरे लोक पुर्वेरां ते पछमेरां एइतां अज़ाहमे, इसहाक ते याकूबे सेइं साथी परमेशरेरे राज़ेरी धामी मां शामिल भोले। 12 पन इस्पाएली लोक बेइर आंधरे मां छुड़े गाले ज़ैडी तैना लेरां देते ते दंत च़ापते राले। 13 ते यीशुए तैस सूबेदारे सेइं ज़ोवं, “घरे जो गा, ज़ेरो तेरो विश्वासे तेरे लेइ तेरहु भोलू।” ते तैखने तैसेरो नौकर बेज़्जोइ जेव। 14 ज़ैखन यीशु पतरसेरे घरे जेव, त तैनी हेरू, कि पतरसेरी शिखी बडो भुखारे, ते तै लेटोरी थी। 15 तैनी तैसारे हथ ट्लातो ते अकदम तैसारे भुखार उतरी जेव, ते तै खडी उट्टां तैसेरी सेवा केरने लग्गी। 16 ज़ैखन डुलोइ भोइ त लोकेई बडे बिमार, ज़ैन पुड़ भूतां केरो सायो थियो तैस कां आने, ते तैनी तैना भूतां

अपने वचने सेइं कदां, ते सारे बिमार बड़्झाए। 17 ताके यथायाह नेबेरी ज़ोरी तै गल पूरी भोए कि, “तैनी एप्पू इश्शी कमज़ोरी हटेइ ते इश्शी बिमैरी भी मुकेइ।” 18 यीशुए अपने चेत्रे पासम मैन्हु केरि भीड़ लेइतां अपने चलन, गलील समुन्दरे पार गानेरो हुकम दित्तो। 19 ज़ैखन तैना पार गानेरी तियारी करेने लग्गे, त तैखन अक शास्त्री मैन्हु तैस कां एइतां ज़ोने लग्गे, “गुरु, तू जेरहां भी गालो त अवं तीं पत्ती च़लेलो।” 20 यीशुए तैस जो ज़ोवं, “लीई केरि कूढां, ते अम्बरेरे चुड़ोल्लू केरे आले भोतन, पन मैनेरे मट्टे यानी मीं कां कोई ठार नई ज़ैडी अवं झुल्ली सेक्खी।” 21 चलन मरां एक्के हारे तैस सेइं ज़ोवं, “हे प्रभु, मीं घरे गानेरी अज़ाज़त दे, मेरे बाजरे मरनेरां बाद अवं तैस देवतां एक्जेलो ते फिरी तीं पत्ती च़लेलो।” 22 यीशुए तैस जो ज़ोवं, “तू मेरो चेलो बन ते मीं पत्ती च़ल, ते ज़ैना लोक आत्मिक तरीके सेइं मरंन तैन अपने मैन्हु मरने बलगने दे।” 23 ज़ैखन यीशु किशती मां च़ढे त तैसेरे चले भी तैस सेइं साथी च़ले। 24 ते अचानक समुन्दरे मां अक बड़ो तूफान अव ते किशती छेलेहईं सेइं छपने लग्गी ते यीशु तैस मां झुल्लोरो थियो। 25 तैखन चेलेईं तै बीछेइतां तैस सेइं ज़ोवं, “हे प्रभु, असन बचा! अस त डुबने लोरेम!” 26 तैनी तैन सेइं ज़ोवं, “हे घट विश्वास बालाव, तुस किजो डरतथ?” तैखन तैनी खडे उट्टां तूफान त समुन्दर डांटो, ज़ोने तूफान रुकी जेव त समुन्दर बडे शांत भोव। 27 लोक हेरान भोइतां तैने लग्गे, “ए मैन्हु कौन आए कि तूफान त समुन्दर भी एसेरो हुकम मन्तन!” 28 ज़ैखन तै गलील समुन्दरेरे पार, गिरासेनी इलाके मां पुजो, त दूई मैन्हु जैन पुइ भूतां केरो सैयो थियो कन्नर मांमैइं यीशु कां मिलने आए। तैना एत्रे निगार थिये, कि कोई भी तैस बत्तां निस्सी न थियो बटतो। 29 तैना ज़ोरे-ज़ोरे चिन्दां मारने लग्गे ते ज़ोने लग्गे, हे परमेशेरा मट्टां, तीं असन सेइं कुन कम्म? कुन तू वक्ते करां पेइले असन नरके मां छडने ओरोस? 30 तैन केरां दूर सूरं केरो अक बड़ो घान च़रने लोरो थियो। 31 भूलेईं यीशु कां मिनत केरतां ज़ोवं, “अगर तू असन कढने चातस त उन सूरं केरे घाने मांजो भेज।” 32 तैखन यीशुए ज़ोवं, “गाथ,” तैना भूतां तैट्टां निस्तां तैन सूरं केरे घाने मां जेआं, ते सूरं केरो सारो घान उछड़तो-उछड़तो डैल्ले मां गेइतां सारे सूर मेरि जे। 33 तैखन सूरं केरे च़ारनेबालेईं एन हेरु, त तैना डेरि जे, ते तैनेईं नगरेरे लोकन सेइं सारो बिस्तार दित्तो, ते ज़ैन पुइ भूतां केरो सैयो थियो तैन केरो हाल भी शुनाव। 34 तैस नगरेरे सारे लोक यीशु सेइं मिलनेरे लेइ आए ते यीशु लेइतां लोक मिनत केरतां ज़ोने लग्गे, इश्शी इलाके मरां च़लो गा।

9 फिरी यीशु किशती मां च़ेइतां दरियाए पार जो जेव, ते अपने नगर मां अव। 2 ते हेरा, किछ मैनेईं अक अधरंगी मैन्हु खट्टी पुइ छुइतां तैस कां आनो, ज़ैखन यीशुए तैन केरो विश्वास हेरो, त तैस अधरंगी मैन्हु जो ज़ोवं, “मट्टा, गा हिम्मत रख, तेरे पाप माफ़ भोए।” 3 एस गल्ली पुइ किछ शास्त्री एप्पू मांमैइं ज़ोने लग्गे, “ए त परमेशेरी तूहीन केरते।” 4 यीशुए तैन केरि मनेरी गल्लां बुइतां तैन जो ज़ोवं, “तुस अपने-अपने मने मां एन्चरां किजो सोचने लग्गेरेथ? 5 एन ज़ोनु कुन सुखतुए कि गा तेरे पाप माफ़ भोए,” या एन ज़ोनु कि “उठ, ते च़ल फिर?” 6 एन अवं किछ केरनेबालेईं, ज़ैस सेइं तुसेईं बुइनुए कि मैनेरे मट्टे (यानी मीं) धेरती पुइ लोकां केरे पाप माफ़ केरनेरो अधिकार आए।” तैखन तैनी तैस अधरंगी मैन्हु जो ज़ोवं, “अपनि खट छुइतां अपने घरजो च़लो गा।” 7 तै अधरंगी मैन्हु तैखने अपनि खट छुइतां घरजो च़लो जेव। 8 लोक एन हेरतां डेरि जे ते परमेशेरी बड़्याईं केरने लग्गे, कि ज़ैनी मैन्हु एत्रो अधिकार दित्तोरोए। 9 ज़ैखन यीशु तैट्टां अग्रोवं च़लो त तैनी अक मत्ती नंवेरो मैन्हु, चुंगी नेनेबालो दफ़्तरें मां बिश्शोरो लाव, ते यीशुए तैस जो ज़ोवं, “तू मीं पत्ती च़ल।” तै तैखने यीशु पत्ती च़लो। 10 ते ज़ैखन यीशु अपने चेलेरे घरे गेइतां रोटी खाने बिश्शो ज़ेसेरु नवं मत्ती थियूं, त बडे चुंगी नेनेबाले ते पापी मैन्हु भी आए ते यीशु त तैसेरे चलन सेइं साथी रोटी खाने बिश्शो। 11 ज़ैखन फरीसी लोकेईं एन हेरु, त तैनेईं तैसेरे चलन पुच्छु, “तुश्शो गुरु चुंगी घिन्ने बाले ते पैपी लोकन सेइं साथी रोटी किजो खाते?” 12 एन शुन्तां यीशुए तैन मिसाल देइतां ज़ोवं, “सज़र लोकन

डाक्टरेरी ज़रूरत न भोए, पन बिमारन भोचे।” 13 फिर भी तुस गेइतां एस गल्लोरो मतलब कढा, “अवं बलिदान नई बल्के दया पसंद केरताईं, किजोकि अवं धर्मी लोकन नई बल्के पापी लोकन कुजाने ओरोई।” 14 तैखन यूहन्नारे चले यीशु कां एइतां ज़ोने लग्गे कि कुन वजा आए, कि अस ते फरीसी लोक त बरत रखतम, पन तेरे चले किजो बरत न रखन? 15 यीशुए तैनन जुवाब दित्तो, “इलाएरे दिहाडे, ज़ैखन लाडो जैनी सेइं साथी राते, कुन जन शौग बनेइं सकतन? पन तैना दिहाडे एज्जले, ज़ेइस लाडो तैन केरां अलग कियो गालो (यानी मारो गालो), तैखन तैना (अपने दुखेरे वजाईं सेइं) बरत रखेले। 16 अवं तुसन अक होरि मिसाल देताईं, नंवे लिगडेरी टलोईं पुराने लिगडे कोई न लाए। किजोकि नंवे लिगडेरी टलोईं पुराने लिगडे अपने पासे खिच्ची छुइली। ते तैन पेइले केरां भी जादे छिन्दोल्लू। 17 ते नंवेो दाछारो रस पुरैनी मसकन मां न भरन, किजोकि मसकां फैंटी गाचिन ते दाछारो रस ज़ैया भोइ गाते ते मसकां भी कोन्ची कम्मरी न रान। एल्हेरेलेइ नंवेो दाछारो रस नेर्वीं मसकी मां छडतन ताके दुइये बरबाद न भोन।” 18 यीशु एन गल्लां हेजू मसां ज़ोने लोरो थियो, त प्रार्थना घरेरो अक प्रधान अव ते यीशु कां मथ्यो टेकतां ज़ोने लग्गे, मेरी कुई मेरि ज़ोरीए, “पन तू अगर एइतां तैस पुइ हथ रखखस त तै हुन्ना ज़ींती भोइ गानीए।” 19 यीशु तैस सेइं साथी च़लो जेव, ते चले भी तैस सेइं साथी जे। 20 ते एरु भोवं कि अक कुआन्श भी थी, ज़ैस 12 सालां केरि खून च़लनेरी बिमारी थी। तैसां यीशु पत्पती एइतां तैसेरे चोगे सेइं हथ लाव। 21 किजोकि तै अपने दिले मां एन ज़ोती थी, कि अगर अवं यीशुएरे चोगे सेइं हथ लाएली त अवं बेइज़ोइ गानीं। 22 यीशुए बेदलोइतां तैस कुआन्शरे पासे तक्कू ते ज़ोवं, “हे कुईए, विश्वास रख, तेरे विश्वासे सेइं तू बेइज़ोरस” ते तै तैखने बेइज़ोइ जेईं। 23 ज़ैखन यीशु तैस प्रधाने घरे पुजो, त लोक नगारो बजाते ते लेरां देंते लाए। 24 तैखन यीशुए तैन लोकन सेइं ज़ोवं, “दूर भोथ, किजोकि कुई मरीं नई, बल्के झुल्लोरीए।” एन शुन्तां तैना लोक हसने लग्गे। 25 पन ज़ैखन लोक तैट्टां दूर कढे, त यीशुए अन्तर गेइतां कुइयोरो हथ टलाव, त तै ज़ींती भोइ। 26 ते एस गल्लरी खबर सारे इलाके मां फैली जेईं। 27 ज़ैखन यीशु तैट्टां अग्रोवं च़लो, त दूई काने तैस पत्ती चिन्दां मारते ज़ोने लग्गे, “हे दाऊदेरा मट्टां असन पुइ दया केर!” 28 ज़ैखन ते घरे अन्तर जेव, त तैना काने तैस कां आए, ते यीशुए तैन सेइं ज़ोवं, “कुन तुसन विश्वासे, कि अवं तुसन बड़्झेईं सकताईं?” तैनेईं जुवाब दित्तो “हौं प्रभु, अस विश्वास केरतम, तू असन बड़्झेईं सकतस।” 29 तैखन तैनी तैन केरि एक्खन सेइं हथ लाव ते ज़ोवं, “तुस विश्वास केरतथ कि अवं बड़्झेईं सकताईं, अवं तुसन बड़्झेइलो।” 30 ते तैना लहने लाए, ते यीशुए तैन रोडेचारे समझेइतां ज़ोवं, “खबरदार ज़ैन मीं तुश्शे लेइ किंयू तैसेरे बारे मां कोन्ची सेइं न ज़ोइयथ!” 31 पन तैनेईं बेइर गेइतां सारे मुलखे मां एस चमत्कारेरे बारे मां ज़ोवं। 32 ज़ैखन तैना बेइर च़लोरोरे थिये, त लोकेईं अक मैन्हु ज़ै गल्लां न थियो केरि बटतो, किजोकि तैस पुइ भूतेरो सैयो थियो, तै तैनेईं यीशु कां आनो। 33 ते ज़ैखन भूतेरो सैयो तैस मरां कढो, त लट्टी गल्लां केरने लग्गे, लोक बडे हेरान भोइजेइ ते ज़ोने लग्गे, असेईं एरो ज़ेरो माजरो इझाएले मां पेइले कथे नई लाहोरो। 34 पन फरीसी लोक ज़ोने लग्गे, “ए त भूतां केरे गुरेरी मदी सेइं भूतां कढते।” 35 यीशु त कने तैसेरे चले गलील इलाकेरे डुलोव्वन ते नगरन मां ते प्रार्थना घरन मां जे। ते तै शिक्षा देतो राव, ते परमेशेरे राज़ेरी खुश्खबरी शुनातो राव, ते लोकां केरि हर किसमेरी बिमारी ते कमज़ोरी दूर केरतो राव। 36 ज़ैखन तैनी बडे लोक लाए त तैस तैन लोकन पुइ बड़ो तरस आव, किजोकि तैना तैन भैट्टां केरे ज़ेरे थिये ज़ैन केरो कोई पुहाल न भोए, तैन केरो बड़ो बुरो हाल थियो ते तैना टपेलोरे थियो। 37 तैखन यीशुए अपने चलन सेइं ज़ोवं, “पकोरी फसलरे ज़ेरे बडे लोक तियार आन ज़ैना परमेशेरे वचने पुइ विश्वास केरनु चातन, पन कम केरनेबाले थोडे आन ज़ैना तैन परमेशेरे राज़ेरे बारे मां ज़ोन। 38 एल्हेरेलेइ तुस फसलरे मालिके कां प्रार्थना केरा कि तै जादे कम केरनेबाले भेजे, कि तैना लोकन परमेशेरे राज़ेरे बारे मां ज़ोन।”

10 फिरी यीशुए अपने 12 चले एप्पू कां कुजाए, ते तैन भूतां केरो सैयो कड्हेनेरो ते हर बिमारी ते तकलीफ दूर केरनेरो अधिकार दितो। 2 12 प्रेरितां केरां नव्यां इना आन, शमीन जैस जो परसस जौतन ते तैसेरो द्वाला अन्द्रियास, जब्देरू मट्टू याकूब ते कने तैसेरो द्वाला यूहन्ना, 3 फिलिप्पुस, बरतुल्लै, थोमा, ते मर्ती चुंगी घिन्ने बालो, हलफईरू मट्टू याकूब, ते तद्दे। 4 शमीन कनानी, ते यहूदा इस्करियोती जैनी तै टुलुवेवरो भी थियो। 5 एन 12 यीशुए एन जौइतां भेजे, “गैर कौमां केरे पासे न गेइयथ, ते कने सामरी लोकां केरे केन्ची नगर मां न गेइयथ। 6 बल्के इस्राएलेरे घरानेरी हेरोरि भेडुन कां गेइयथ। 7 ते चलते-चलते, एन जौते गेइयथ कि स्वर्गूरू राज नेडे ओरूए। 8 बिमारन बड़्झेइयथ, मुडन जौते केरथ, कोढी केरू कोढ साफ केरथ, ते भूतां केरो सैयो केदथ, तुसन एन सब किछ मुफ्त मौलोरूए ते मुफ्त देइयथ। 9 ते साथी सोन्नु, चाँदी ते पेंडसे न रेखथ। 10 ते न बत्तारे लेइ झोलो नेइयथ ते न दूई-दूई लिगडां, ते न बूट ते न सोटी, किजोकि मज्दूर अपनि मज्दूरारो हकदार भोते।” 11 “जैखन तुस केन्ची नगर या डुलोव्वे मां गाथ त तुस एरे मैनेरो पतो केरथ, कि कौन अतबाररे काबल? तैदां ज्ञां तगर गानेरो वक्त न एज्जे ते तांतगर तैडी तैस्से कां रेइयथ। 12 ते घरे मां अन्तर गांते बार तैन जो शान्ति देइयथ।” 13 “अगर तैन घर तुशे काबल न भोलू त तुशुशी शान्ति तुसन पुइ वापस एज्जेली। 14 जै तुसन कबूल न केरे ते तुशुशी गल न मन्ने त तैस घर या नगर मरां बेइरोवं गांते बार अपने पावां केरि धूइ तैडी झेइयथ।” 15 “अवं तुसन सेइं सच जौताई कि इन्साफेरे दिहाडे तैस नगरेरो हाल सदोम ते अमोरा नगरां केरे हाले करां भी जादे बुरो भोलो।” 16 “हेरा, अवं तुसन भेडुं केरे गिदन मां भेजने लोरोई, एल्हेरेलेइ तुस सप्यां केरे जेरे हुशार ते कबूतरां केरे जेरे सादे बेनथ। 17 मैन्न करां हुशार रेइयथ तैना तुसन दलेइतां सभान मां पैश केरेले ते प्रार्थना घरन मां तुसन कोडां केरि मार दुवाले। 18 ते तुसन मेरी वजाई सेइं गवर्नरन ते कने राजन कां हाजर केरेले, ताके तुस तैन मां ते गैर कौमन मां मेरे गवाह बन्थ। 19 पन जैखन तैना टुलुवेइतां हावाले केरेले, त तुस फिक्क न केरथ, कि अस कुन जोमेले ते केन्चरे जोमेले, किजोकि जैन किछ जौनु भोलू तैखने अवं तुसन जौइलो। 20 किजोकि जौने बाले तुस नई, बल्के पवित्र आत्मा भोलो जै तुशे स्वर्गेरि बाजी परमेशेरे तरफां आए।” 21 “द्वला, द्वाला ते बाजी मट्टे मारनेरे लेइ सोंफेले, ते मट्टां अपने अम्मा बाजी केरे खलाफ भेइतां तैन मारालो। 22 मैने नव्वेरो वजाई सेइं सब लोक तुसन सेइं बैर केरेले, पन जै आखरी तगर बरदाशत केरेलो तैस्से मुक्ति मैलेली। 23 जैखन लोक तुसन एककी नगर मां सताले, त होरि नगर मांजो नेशशी गेइयथ, अवं तुसन सेइं सच जौताई कि एस करां पेइले तुस इस्राएलेरे सैरी नगरन मां तुशु सफर पूरू न भोलू, त अवं मैनेरू मट्टू एज्जी गालू।” 24 “चेलो अपने गुरू करां बड्डो न भोए, ते न नौकर अपने मालिके करां। 25 चेलेरे लेइ त एन्ने बड्डुए कि तै अपने गुरेरो जेरो भोए, ते नौकरेरे लेइ एन्ने बड्डुए कि तै अपने मालिकेरे बराबर भोए, अगर तैनेई मालिके जो शैतान जौवं, त तैसेरे घरेबालन जो केत्रू जौनुए!” 26 “तुस तैन करां न डेरथ, किजोकि कोई चीज छप्पोरी नई, जै खोल्ली न गाली, ते कोई भेद छप्पोरो न रालो, बल्के सारो भेद बांदो भोलो। 27 जैन किछ अवं तुसन सेइं आंधरे मां जौताई, तुस तैन दीसां जौइयथ, ते जैन किछ तुशे कन्ने पत्र बल्हे सेइं शुनावं गाते, तुस लाए पुइ गेइतां तैसेरो प्रचार केरथ। 28 तुस तैन करां न डेरथ जैना जानी त मारतन, पन आत्मा न मैरी बटन, परमेशेरे करां डरा, जै आत्माई ते जानी दुइने नरके मां नाश केरि बटते। (Geenna g1067) 29 कुन एककी सिकेरी दूई चडोली न बिकन? फिरी भी तुशुशो बाजरे मेरजरे बगैर तैन मरां अक भी धेर्ती पुइ न झेडी बटन। 30 परमेशर तुशुशे हज गल्लरी फिक्क केरते इडी तगर तुशुशे दोगरे बाल भी गन्नोरेन। 31 एल्हेरेलेइ डरा न, तुशुशी कदर बेडि चडोलन करां भी बडी जादे।” 32 “जैना लोक, मैन्हु केरे सामने मेरो इकरार केरतन कि तैना मेरे चेलन, त अवं भी अपने स्वर्गेरो बाजी केरे सामने तैन केरो इकरार केरेलो, कि तैना मेरे चेलन। 33 पन जैना लोक, मैन्हु केरे सामने इन जौने करां डरेले, कि तैना मेरे चेलन, त अवं भी तैन केरो अपने स्वर्गेरो

बाजरे सामने इन्कार केरेलो, कि एना मेरे चले नई।” 34 “इन न सैमझथ कि अवं धेर्ती पुइ एल्हेरेलेइ ओरोई लोक मेल मिलापे सेइं रान, पन मेरू एज्जनु लोकन एप्पू मांमेइं लडनेरी वजा भोइ, मेल मलाप नई। 35 अवं एल्हेरेलेइ ओरोई कि मट्टे बाजी करां ते कुइये अम्मा करां ते तुशी शिखी करां अलग केरि। 36 मैनेरे दुश्मन त तैसेरे अपने घरेरे लोक भोनेन।” 37 जै कोई अम्मा या बाजी मीं करां जादे दलारे समझते, तै मेरो चेलो बन्नेरे काबल नई ते जै कोई मट्टे या कुइये मीं करां जादे समझते, तै भी मेरो चेलो बन्नेरे काबल नई। 38 जै कोई मेरो चेलो भोनेरी वजाई सेइं दुःख झैल्लनेरे लेइ त कने मरनेरे लेइ तियार नई, त तै भी मेरो चेलो बन्नेरे काबल नई। 39 जै कोई मरने करां बचनेरे लेइ मेरो इन्कार केरेलो, त तैन हमेशारी जिन्दगी न मैलेली। पन जै मीं पुइ विश्वास केरनेरे वजाई सेइं अपने जान देनेरे लेइ भी तियार भोलो, त तैस हमेशारी जिन्दगी मैलेली। 40 “जैना तुसन कबूल केरतन, तैना मीं कबूल केरतन, जैना मीं कबूल केरतन, तैना सिर्फ मीं नई, पन तैना परमेशेरे भी कबूल केरतन, जैनी अवं इडी भेजोरोई।” 41 “जै नेबन, नबी सैमझतां कबूल केरेलो, परमेशर तैस नेबी केरे बराबर इनाम देलो, ते जै धर्मी मैन्हु धर्मी सैमझतां कबूल केरते, परमेशर तैस धर्मी बराबर इनाम देलो। 42 जै कोई इन निकडन मरां एककी मेरो चेलो बुझतां सिर्फ अक कटोरो ठंढू पानी पियालो, अवं तुसन सेइं सच जौताई तैस पक्कू इनाम मैलनु आए।”

11 जैखन यीशुए अपने 12 चलन हुक्म दितो, त तै तैदां चलो जेव, ताके चेलां केरे नगरन मां गेइतां शिक्षा दे ते प्रचार केरे। 2 यूहन्ना नेबे कैदखाने मां मसीहेरे कम्मां केरे बारे मां शुन्तां तैस कां अपने चले इन पुछ्ने भेजे। 3 “तैनी तैन सेइं जौवं, एजनेबालो मसीहू तू आस, जेसेरे बारे मां परमेशेरे वादो कियोरोए, या आस केन्ची होरि बलगम?” 4 यीशुए तैन जुवाब दितो, “जैन किछ तुस शुन्तन ते लातथ तैन गेइतां यूहन्ना सेइं जौथ। 5 कि काने लातन, ते टोन्टे चलतन, ते कोढी केरू कोढ शुद्ध भोते, ते टोँऊने शुन्तन, ते मुइदे जौते भोतन, ते गरीबन खुशखबरी शुनाई गातीए 6 परमेशर तैस बरकत देते, जै मीं पुइ शक न केरे।” 7 जैखन यूहन्नारे चले तैदां चले जे, त यीशु लोकन सेइं यूहन्नारे बारे मां जौने लगे, “तुस सुनसान ठैरी कुन हेरने जोरे थिये? कुन हवाई सेइं हिलते निरेठे डाले? 8 त फिरी होरू कुन हेरने जोरे थिये? माघां लिगडां लेइतां कोई? हेरा जैन माघां लिगडां लेइतां भोतन तैना महलन मां रातन। 9 फिरी तुस कुन हेरने जोरे थिये? कुन कोई नेबी? हॉं पन अवं तुसन सेइं जौताई कि नेबी करां भी बड्डे हेरने जोरे थियो। 10 ई तैए यूहन्ना आए जेसेरे बारे मां परमेशर पवित्रशास्त्रे मां जौते, कि हेरा, ‘अवं अपने बिस्तार देनेबालो तीं अग्री भेजताई, जै तेरे लेइ बत तियार केरेलो।’” 11 अवं तुसन सेइं सच जौताई, कि जै कुआन्शन करां जरमोरोए तैन मां यूहन्ना बपतिस्मो देनेबाले करां कोई बड्डो नई भोरो, पन जै स्वर्गेरि राज्जे मां निकडे करां निकडोए तै तैस करां भी बड्डोए। 12 यूहन्ना बपतिस्मो देनेबालेरे दिहाडन करां अज तगर प्रचार भोइ रावरोए, ते स्वर्गेरू राज जल्दी बधने लोरूए, पन बडे निग्गर लोक तैस पुइ हमलो केरतन। 13 सारे नेबी केरे लेख, ते मूसोरो कानून यूहन्ना तगर भविष्यवाणी केरते राए। 14 अगर तुस चाथ ते मन्थन, एलियाह जेसेरे बारे मां नेबेईं जोरू थियू, कि तै एजनेबालो थियो तै ईए। 15 जै कोई समझनु चाते, तै ध्याने सेइं शुने ते समझे। 16 “अवं इस ज़मानेरे लोकां केरि मिसाल केस सेइं देई, इना तैन मडुं केरे जेरेन जैना बजारन मां बिश्तां अपने दोसन सेइं शिकैयत केरतन, 17 कि असेईं तुशुशे लेइ बाजो बजाव, ते तुस न नछ्रे, ते असेईं शोग कियो ते तुसेईं छाती न पिटी। 18 किजोकि यूहन्ना बपतिस्मो देनेबालो जादे तर बरत रखतो थियो, ते शराब न थियो पीतो, ते तैना तैस जो जौतन कि एस पुइ भूतेरो सैयो आए। 19 ते मैनेरू मट्टू यानी अवं खातो पीतो अवं, हेरा, ते तैना जौतन पेटू ते शराबी मैन्हु ते चुंगी नैनेबाले ते पापी लोकां केरो दोस्त, पन अक्लमन्द कौने तैसेरे कम्मेईं सेइं पतो चलते।” 20 तैखन यीशु फिरी तैन नगरन मां गेइतां तैट्टेरे लोकन झिडकतां जौने लगे, जैन मां तैनी चमत्कार कियोरे थी, पन तैनेई अपने पापन करां मन न फिराव। 21 “हे खुराजीन नगरेरे लोकव!

तुसन पुड़ अफ़सोस, हे बैतसैदा नगरिरे लोकव तुसन पुड़ अफ़सोस, कि ज़ैना चमत्कार तुसन मां किये, अगर एना चमत्कार सूत ते सैदा नगरन मां कियोरें भोथे, त तैन लोकेई केइसरेरें देतेरी टाट पलेटां ते मांजनी मां बिश्तां अपने पापन करां मनफिरावरो भोथो। 22 पन अवं तुसन सेइं ज़ोताई, कि इन्साफेरे दिहाड़े परमेशर, ज़ै सज़ा सूत ते सैदा नगरां केरे लोकन देलो, तुशशी सज़ा तैस करां भी जादे भोली। 23 ते हे कफरनहूम नगरिरे लोकव, कुन तुस सोचतथ कि स्वर्गें मां तुशशी आदर भोनीए! नई तुस त नरके गाले ज़ैडी पापी लोकन सज़ा मेलेली! किजोकि ज़ैना चमत्कार तुसन मां किये, अगर मां एना सदोम नगरें मां कियोरें भोथे त सदोम नगर अज़ तगर भी भोनू थियूं। (Hadēs 986) 24 पन अवं तुसन ज़ोतां कि इन्साफेरे दिहाड़े परमेशर ज़ै सज़ा सदोम नगरिरे लोकन देलो, तुशशी सज़ा तैस करां भी जादे भोली। 25 तैखन यीशुए ज़ोवं, “हे बाजी, स्वर्ग ते धेरतरें प्रभु, अवं तेरु शुक़ केरतां कि तीं एना गल्लां अक्लमन्द ते समझदार लोकन करां छपेइतां रेख्खी ते तैन लोकन पुड़ बैदी की, ज़ैना निक्के बच्चां केरे ज़ेरे आन। 26 हाँ, हे बाजी तीं एन्ने रोडू लग्गू। 27 “मेरे बाजेई सब किछ मेरे सुपुर्द कियेरुए; कोई होरो मट्टे न ज़ाने, सिर्फ बाजी ज़ानते; कोई बाजी न ज़ाने सिर्फ मट्टे ज़ानते, या ते मैन्हु बाजी ज़ानते ज़ैस पुड़ मट्टे बांदो केरने चाए। 28 “हे महँतन केरनेबाले लोकव, ते भारे सेइं थकारे लोकव मां कां एज्जा; अवं तुसन आराम देइलो। 29 मेरे अधीन एन्चरे भोथ जेन्चरे दांत जूए हैठ भोते, ते ज़ैन किछ अवं तुसन शिखालताई तैस शिख्खा, किजोकि अवं शरीफ आई ते दिलेरो नम्र आई ते तुशशी जानी आराम मेलेलो। 30 ज़ै भार अवं तुसन देइलो ते पोल्लोए, तुस तैस आरामे सेइं छुई सकतथ।”

12 यीशु आरामेरे दिहाड़े ऊडारन मामेइं एक्की बत्तां व़लोरें थियो, ते तैसेरे चेलन द्रुलुख लग्गी, ते तैना शिल्लां द्लोइतां खाने लग्गे। 2 फरीसी लोकेई एन लेइतां यीशु सेइं ज़ोवं, “तक! तेरे चले तैन कम केरने लोरैन ज़ैन आरामेरे दिहाड़े केरनु जेइज़ नई।” 3 यीशुए तैन जुवाब दित्तो, “कुन तुसेईं पवित्रशास्त्रे मां कथे नई पढ़ेरु कि जेइस इश्शे पूर्वज दाऊद राज़ो त तैसेरे साथी द्रुलुखोरें थिये त तैनेई कुन कियेरु थियूं? 4 तै केन्चरे परमेशरेरे घरे मां जेव, ते ज़ैना चैद्वोरी रोटी थी तैदां एन्तां एप्पू भी खेइ, ते अपने सैथन भी दित्ती, ते तैनेई भी खेइ हालांकी तैना रोटी खैनी तैन केरे लेइ जेइज थी, तैना सिर्फ याजक खेइ सकते थिये। 5 या तुसेईं मूसेरो कानूने मां एन भी नई पढ़ेरु, कि याजक मन्दरे मां आरामेरे दिहाड़ेरी विधि न मन्ने पुड़ भी बेकसूर भोतन। 6 पन अवं तुसन सेइं ज़ोताई कि इडी तैए, ज़ै मन्दरे करां भी बड्डोए। 7 अगर तुस एल्हेरो मतलब ज़ानेथे कि, अवं बलिदान नई बल्के दया पसंद केरताई, त तुस बेकसूर कुसुरवार न बनाथे। 8 किजोकि मैनेरु मट्टू यानी अवं आरामेरे दिहाड़ेरो भी प्रभु आई।” 9 यीशु तैदां निस्तां तैन केरे प्रार्थना घरे मां जेव। 10 तैडी अक मैन्हु थियो, जेसेरो हथ शुक़कोरो थियो, तैनेई यीशु दोष लानेरे बहाने सेइं तैस पुच्छू, “कुन आरामेरे दिहाड़े कोई बझानो जेइज्जे?” 11 तैनी तैन जो ज़ोवं, “तुसन मरां कौने, जेसेरी अक्के भेइ भोए, ते तै आरामेरे दिहाड़े गते मांजो बिछड़े, त तुस कुन तैस तैदां बेइर न कढेले? 12 मैनेरी कीमत त भैडी करां केत्री जादे! एल्हेरेलेइ आरामेरे दिहाड़े रोडू कम केरनु जेइज्जे।” 13 तैखन यीशुए तैस मैन्हु जो ज़ोवं, “अपनो हथ अग्रोवं केर।” तैनी मैने अपनो हथ अग्रोवं कियो, ते अकदम तैसेरो हथ बेज्जोव। 14 तैखन फरीसी लोक बेइर गेइतां तैसेरी खलाफ साज़िश केरने लग्गे, कि एस केन्चरे मारम? 15 इन बुइतां यीशु तैदां व़लो जेव। ते बडे लोक तैस पत्ती चले, ते तैनी तैना सब बज्झाए। 16 ते तैनी तैना खबरदार किये, कि मेरे बारे मां केन्ची सेइं न जोइयथ। 17 ताके यशायाह नेबेरी जोरी तै गल पूरी भोए: 18 “हेरा ई मेरो सेवके ज़ै मां चुनोरिए, ई मेरो द्लारोए ज़ैस पुड़ मेरो दिल खुशे, अवं अपनि आत्मा तैस पुड़ छडेले, ते तै गैर कौमन मां गेइतां इन्साफेरी खबर शुनालो। 19 तै न लइई केरेलो, ते न शौर, ते बज़ारन मां कोई तैसेरी आवाज़ न शुनेलो। 20 ते ए द्लेन्चोरें निरैठरे डाले न द्लोडेलो, ते न बलतो दीयो हिशाहो ज़ां तगर इन्साफ भारी न भोए। 21 ते तैसेरे नंचे पुड़ गैर कौमां

उमीद रेखेली।” 22 तैखन लोकेई अक मैन्हु यीशु कां आनो ज़ै कानो ते लट्टो थियो ते तैस पुड़ भूतेरो सैयो थियो, ते तैनेई तैस कां आनो, तैनी ते ठीक कियो, ते तै लहने लग्गे ते गल्लां भी केरने लग्गे। 23 एन हेरतां लोक हेरान भोइतां ज़ोने लग्गे, “कुन एन दाऊदेरु मट्टूए?” 24 पन फरीसी लोकेई एन शुन्तां ज़ोवं, “ए त भूतां केरे प्रधान शैतानेरी मदती सेइं भूतां केरो सैयो कढते।” 25 यीशुए तैन केरे मन्नां केरे खियाल ज़ैनतां तैन सेइं ज़ोवं, “ज़ैस राज्जे मां फूट पेचे, तैन राज़ बनोरु न रेइ सके, ते केन्ची नगर या खानदाने मां फूट पेचे, तैन भी बनोरु न राए। 26 अगर शैतान एप्पू अपने भूतां कढे, त तै अपनो मुखालफ एप्पू भुओ, त फिरी तैसेरु राज़ केन्चरे बनोरु रेइ सकते? 27 अगर अवं शैतानेरी मदती सेइं भूतां केरो सैयो कढताई त तुशशे अपने मैन्हु केसेरी मदती सेइं कढतन? तैन्ना तुशशो हाकिम भोले। 28 पन अगर अवं परमेशरेरी आत्मा रे मदती सेइं भूतां केरो सैयो कढताई त परमेशरेरु राज़ तुशशे नेडे पुजोरुए। 29 या कोई मैन्हु केन्ची ज़ोरेबाले मैनेरे घरेरे मां गेइतां तैसेरो माल तांतगर लुट्टी न सके, ज़ांतगर कि तै पेइले तैस ज़ोरेबाले मैन्हु बंधी न छडे। तैखन तै तैस ज़ोरेबाले मैनेरो माल लुट्टी सकते। 30 ज़ै मां सेइं साथी नई तै मेरे खलाफे, ते ज़ै मां सेइं साथी नई तै अकोट्टु न केरे ते इरां उरां बिट्लते। 31 एल्हेरेलेइ अवं तुसन सेइं ज़ोताई कि, मैन्हु ते केरे सारे पाप ते तैनेरी माफ़ भोली, पन पवित्र आत्मारी तुहीन माफ़ न भोली। 32 ज़ै कोई मैनेरे मट्टेरे खलाफ किछ ज़ोलो, त तैसेरो ए पाप माफ़ कियो गालो, पन ज़ै पवित्र आत्मारी तुहीन केरे, त तैस मैन्हु न इस दुनियाई मां माफ़ भोले ते न एजने बैली दुनियाई मां माफ़ भोले।” (aiōn g165) 33 “अगर बुट रोडे, त तैसेरे फल भी रोडो भोले, अगर बुट बुरोए त तैसेरे फल भी बुरो भोले, किजोकि बुट अपने फले सेइं पिशेनोते। 34 तुस ज़हरीले सपेरे बच्चां केरे बुरे भोइतां रोडी गल केन्चरे ज़ोई सकतथ? किजोकि ज़ैन दिले मां भोते तैन्ने ज़बानी पुड़ एइते। 35 रोडो मैन्हु दिलेरे रोडे खज़ाने मरां रोडी गल्लां कढते, ते बुरो मैन्हु बुरे दिलेरे बुरे खज़ाने मरां बुरी गल्लां कढते (दिल खज़ानेरो ज़ेरोए)। 36 अवं तुसन सेइं ज़ोतां, कि ज़ैना-ज़ैना निक्केमी गल्लां मैन्हु ज़ोले, इन्साफेरे दिहाड़े लोकन अपनि हर एक्की तैस गल्लरो हिसाब देनो भोले। 37 किजोकि तू अपने गल्लेई सेइं धर्मा ते अपने गल्लेई सेइं दोषी भोले।” 38 इस पुड़ किछ शास्त्री ते फरीसी लोकेई तैस सेइं ज़ोवं, “हे गुरु अस तीं करां कोई निशान हेरनो चातम।” 39 तैनी तैन जुवाब दित्तो, “इस ज़मानेरे बुरे ते बदमाश लोक निशान हेरनो चातन, पन तैन योना नेबेरे निशानेरे अलावा होरो कोई निशान न दित्तो गालो। 40 जेन्चरे योना नबी द्लाई दिहाड़े ते द्लाई रातन मेछलरे पेटे मां राव, तेन्चरे मैनेरु मट्टू यानी अवं भी द्लाई दिहाड़े ते द्लाई रातन ज़मीनी मां रालो। 41 नीनवेरे लोक इन्साफेरे दिहाड़े इस ज़मानेरे लोकन सेइं साथी खडे भोइतां एन दोषी बनाले, एल्हेरेलेइ कि तैनेई योनारो प्रचार शुन्तां पापन करां मन फिराव, ते हेरा इडी तैए, ज़ै योना करां भी बड्डोए, पन तुसेईं पापन करां मन फिरानो न चाव। 42 दक्षिणेरी रानी इन्साफेरे दिहाड़े इस ज़मानेरे लोकन सेइं साथी खडी भोइतां दोषी बनाली, किजोकि तै बडे दूरां सुलैमान राज़ेरु ज्ञान शुन्नेरे लेइ ओरी थी, पन हेरा इडी तैए, ज़ै सुलैमाने करां भी बड्डोए।” 43 “ज़ैखन केन्ची मैन्हु मरां भूतां केरो सैयो निसते, त तै अपने आरामेरे लेइ बेरान ठारां हंठते, पन ज़ैखन तैस ठार न मैल्ले। 44 तैखन ज़ोते, कि अवं वापस अपने तैस्से घरे मां गाताई ज़ैस मरां निसोरो आई, ते ज़ैखन तै वापस एइते, त तैस तैन घरे खाली, धोवेरु ते साफ सुधरु सज़्जो-सजेवरु मैलते। 45 तैखन तैन गाते ते सत बुरां भूतां एप्पू सेइं साथी आनते, ते तैन सब तैस मां रहतन, ते तैस मैनेरो हाल पेइले हाले करां भी जादे बुरो केरतन, तेन्चरे इस ज़मानेरे बुरे लोकां केरो हाल भी एरो भोनोए।” 46 ज़ैखन ते मैन्नु सेइं गल्लां केरने लोरो थियो, त तैसेरी अम्मा ते कने तैसेरे द्लवा खडे थी, तैना तैस सेइं गल्लां केरनि चाते थिये। 47 केन्चे गेइतां तैस सेइं ज़ोवं, “बेइर तेरी अम्मा ते द्लवा खडे आन, तैना तीं सेइं गल केरनि चातन।” 48 एन शुन्तां तैनी पतो देनेबाले जो ज़ोवं, “कौने मेरी अम्मा, ते कौन मेरे द्लवा?” 49 ते अपने चेलां केरे पासे हथ अग्रोवं केरतां ज़ोवं, “हेरा मेरी अम्मा, ते मेरे द्लवा इना आन। 50 किजोकि ज़ै

कोई मेरे स्वर्गे बाजरी मेर्जा पुड चलते तैए मेरो ढूला ते मेरी बेइन्न, ते मेरी अम्मा आए।”

13 तैस दिहाड़े यीशु घरेरां निस्सो, ते गलील समुन्दरे बन्ने पुड गेइतां बिश्शो। 2 तैसेरे चेत्रे पासन लोकां केरि एत्री भीड अकोट्टी भोइ, ते तै एककी किशती मां चढो ते बिश्शी जेव, ताके तै सेबभी लोकन परमेशेरी गल्लां केरि शिक्षा देइ सके, ते सारे लोक बन्ने पुड खडे राए। 3 तेखन तैनी तैस सेइं कहैनी केरे तरीके सेइं बेडि गल्लां जोई, “एक्सां अक बीज बनेबालो बीज बने जो जेव। 4 बीज बनेते बार किछ बीज बत्तरे डलेखी बिछडू त चुडोल्लेई एइतां तैन बीज चुनू। 5 किछ बीज घोडनबाली ज़मीनी पुड बिछडू, ज़ेडी तैस डुग्धी मिन्ती न मेलनेरे वजाई सेइं तैन लूशी उगू ते बूटो लगो। 6 पन ज़ैखन दिहाड़ो निस्सो, त तै निकडो बूटो फुककोई जेव। ज़ील न छडुनेरे वजाई सेइं शुक्की जेव। 7 ते किछ बीज कंटां केरे झैल्लन मां बिछडू। ज़ैखन तैडी बूटो लगो, त कंटां केरे झैल्लेई भी बेडोइतां ते बूटो दबेइ छडो। 8 पन ज़ैन रोडी ज़मीनी मां बिछडू, त तैस फल भी लगो केन्ची शौव गुणा केन्ची शठ गुणा, ते केन्ची टली गुणा। 9 ज़ै कोई समझनू चाते, तै ध्याने सेइं शुने ते समझै।” 10 चेलैई यीशु कां एइतां पुच्छू, “तू लोकन सेइं कहैनी केरे तरीके सेइं गल्लां किजो केरतां?” 11 तैने जुवाब दित्तो, “तुसन त स्वर्गे राज़ेरे भेदां केरि समझ दित्तोरीए” पन होरि लोकन नई। 12 किजोकि ज़ैस कां परमेशेरी मर्जां समझनेरी इच्छा आए, तैस परमेशर जादे समझ देलो। पन ज़ैस कां परमेशेरी मर्जां समझनेरी इच्छा नई, तैस केरां, थोडी ज़ेरि समझ, ज़ै तैस कां आए, तै भी नी गाली। 13 अवं तैस सेइं एल्लेरेलेइ कहैन्न मां गल्लां केरतां, कि तैन, तैना बार-बार शुनेले, पन मेरी गल न समझेले। 14 तैन केरे बारे मां यशायाह नेबेरी भविष्यवाणी पूरी भोतीए, “तुस कन्नेई सेइं त शुनेले पन समझेले न, तुस एछडन सेइं त लाएले पन पिशेनी न सकेले।” 15 “किजोकि एना लोकां केरे दिलन पुड चरभी भेरोरीए, ते एना कन्न सेइं उकडु शुन्तन, ते एनेई अपनि एछडी तुमोरिन, एरू न भोए कि तैना एछछेई सेइं लहन, ते कन्नेई सेइं शुन्त ते दिले सेइं समझन, ते मेरे पासे फिरन ते अवं तैन बज्जेई।” 16 “पन तुशथी एछडी धन आन, कि तुस लातथ ते तुशथे कन्न धन आन किजोकि तुस शुन्तन। 17 अवं तुसन सेइं सत्र ज़ोताई, कि बडे नेबी ते धेरमी लोकेई चाव कि ज़ैन गल्लां तुस हेरतथ तैना हेरन, पन न हेरी बेदि, ते ज़ैना गल्लां तुस शुन्तन शुन्त, पन न शुनी बेदि।” 18 “हुनी तुस बीज बनेबालेरी कहैन्नो मतलब शुना। 19 बीज बनेबालो तै आए, ज़ै परमेशेरी गल्लां लोकन शुनाते। ज़ैना मैनु परमेशेरी गल्लां शुन्तन, तैन मरां किछ लोक तैस बत्तरे ज़ेरे आन, ज़ेडी बीज बिछडते। तैना त परमेशेरी गल्लां शुन्तन, पन शैतान अकदम एइतां तैन मैनु केरे दिले मरां परमेशेरी गल्लां केडी छडते। 20 ते ज़ैन घोडनबाली ज़मीनी मां बेवं, एना तैना आन, ज़ैना खुशी सेइं वचन शुन्तन कबूल केरतन। 21 पन एणू मां ज़ील न रखनेरे वजाई सेइं तैन थोडे दिहाडी केरूए, ते ज़ैखन वचनेरे वजाई सेइं तैन पुड मुसीबत या जुलम भोते त तैखने ठोकर खातन। 22 होरे किछ लोक ज़ैना परमेशेरी गल्लां शुन्तन, तैना तैस कंटां केरे झैल्लां केरे ज़मीनेरे ज़ेरे आन। पन दुनियारो फिर ते दौलतरे वजाई सेइं धोखो खातन, ते तैना बेफल रेइ गाते। (aiōn g165) 23 ज़ैन रोडि ज़मीनी मां बेवं, एन तैना लोकन ज़ैना वचन शुन्तन ते समझतन, ते तैस फल भी लगते कोन्ची शौव गुणा कोन्ची शठ गुणा, ते केन्ची टली गुणा।” 24 यीशुए तैन अक होरि मिसाल देइतां ज़ोवं, “स्वर्गेर राज तैस मैनेरू ज़ेरूए ज़ैनी अपने ऊडारे मां रोडू बीज बेवं। 25 पन ज़ैखन लोक झूलोरो थिये, त तैसेरे दुश्मने एइतां तैसेरे ऊडारे मां गेहुं केरे बीजे मांमेई जंगली बीज बेवं। 26 ज़ैखन पटलां ते शिल्लां लगां लगने त तै जंगली डाल भी साथी लगगो। 27 मालिकेरे नौकरेई एइतां तैस सेइं ज़ोवं, ‘हे मालिक, कुन तीं अपने ऊडारे मां रोडू बीज न थियूं बेवरू, फिरी जंगली तैस मां कोइं आव?’ 28 तैनी तैन सेइं ज़ोवं, एन केन्ची दुश्मनेरू कम्मे, नौकरेई पुच्छू कुन तू चातस, कि अस गेइतां तैन पुट्टी छडम?’ 29 पन तैनी ज़ोवं नन्ना, एरू न भोए कि तैस सेइं साथी तुस गेहुं भी पुटथ। 30 फसल

लुन्ने तगर दुइये साथी बेडोने देथ, ते लुनते बार अवं एणू लुन्ने बालन सेइं जोइलो, कि पेइले जंगली बीज लुन्तां अगगी मां फुकनेरे लेइ अकोट्टू केरा, ते फिरी तुस गेहुं मेरे कोठारे मां जम्हां केरतां रख्या।” 31 तैनी तैन अक होरि मिसाल देइतां ज़ोवं, “स्वर्गेर राज शरीएरे बीजेरू ज़ेरू आए, ज़ैन एक्के मैने आनू ते अपने ऊडारे मां बेवं। 32 एन बीज सेबभी बीज न करां निक्कु भोते, पन ज़ैखन तैन बीज बेव गाते, त तैन उगतां सारे निक्के-निक्के बुटन केरां बडू भोते। ते एरो बुट बनते इडी तगर कि अम्बरेरां चुडोल्लू भी तैस पुड बिशतन।” 33 तैनी तैन अक होरि मिसाल देइतां ज़ोवं, “स्वर्गेर राज अम्लटेरू ज़ेरूए, ज़ैन केन्ची कुआंशां आनू, ते हडे अट्टे मां मलाव ते सारू अट्टू खमीर बेनि ज़ोवं।” 34 एन सैरी गल्लां यीशुए तैन लोकन मिसाल देइतां शुनातो थियो, ते मिसाल देनेरे बगेर तै तैन किछ न थियो शुनातो। 35 ताके तैन वचन ज़ैन नेवे ज़ोवरो थियूं पूरू भोए, “अवं कहैनी केरे लेइ अपनि ज़बान खोल्लेले, ते तैना गल्लां ज़ोइलो ज़ैना दुनिया बन्ने करां पेइली छेप्पोरी थी।” 36 तैखन यीशु लोकन करां अलग भोइतां घरजो आव, ते तैसेरे चेलैई तैस कां एइतां ज़ोवं, “तू असन ऊडारेरे जंगली बीजेरी कहैन्नो मतलब समझा।” 37 तैनी तैन जुवाब दित्तो, “रोडू बीज बनेबालो मैनेरू मट्टूए। 38 ऊडार ई दुनियाए, ते रोडू बीज राज हासिल केरनेबाले लोक, ते जंगली बीज शैतानेरे लोक आन। 39 ते तै दुश्मन ज़ैनी तैन बेवरू थियूं ते शैताने, लुन्नेरो मतलब इस दुनियारो अन्त भोनेओ, ते लुन्ने बाले स्वर्गदूतन। (aiōn g165) 40 ज़ेन्चरे जंगली बीजेरे ग्लेव अकोट्टे केरतां अगगी मां फुकतन, तेन्चरे इस दुनियारो अन्त भोनेओ। (aiōn g165) 41 मैनेरू मट्टू अपने स्वर्गदूतन भेजेलू, ते तैन केरे राजे मां ठोकरारी वजा ते बुरां कम्मां केरनेबालन अकोट्टे केरेले। 42 ते तैन अगगारे कुण्डे मां छडेले, ज़ेडी तैना लोक लेरां देते ते दंत चापते राले। 43 तेइस धर्मी लोक अपने बाजी केरे राजे मां दिहाड़ेरे ज़ेरे चमकेले। ज़ै कोई समझनू चाते, तै ध्याने सेइं शुने ते समझै।” 44 “स्वर्गेर राज तैस दौलतरू ज़ेरू ए, ज़ै एककी ऊडारे मां दबोरी थी, ज़ै एककी मैने तोपणी, ते तैस मैल्ली थी, ते फिरी तैने छेपेटां छडी ते खुशी सेइं अपनू सब किछ बेचतां तैन ऊडार घिनु। 45 “स्वर्गेर राज तैस बुपेरेरू ज़ेरूए, ज़ै कीमती मोती तोपतो थियो। 46 ज़ैखन तैस अक कीमती मोती मैल्लो, त तैनी अपनू सब किछ बेचतां तै मोती घिने। 47 “स्वर्गेर राज तैस मेछली ज़ालेरू ज़ेरूए, ज़ैन समुन्द्रे मां छडू ते तैस मां हर किसमेरी मेछली लेगी। 48 ते ज़ैखन ज़ाल भेरोई ज़ोवं त डिरेई ज़ाल खिचतां कनारे पुड आनू, ते बिशते रोडी-रोडी मेछली ठोकरन मां रेख्थी ते बुरी-बुरी मेछली शरी छैडी। 49 दुनियारे अन्ते मां भी एरू भोनेओ, स्वर्गदूतेई एइतां दुष्ट लोक, धर्मी लोकन करां अलग केरनेन। (aiōn g165) 50 ते तैना आगारी भेठी मां छडनेन तैडी लेरां ते दंत चापने भोले। 51 “कुन तुसेई एन सैरी गल्लां सेमझी?” तैनेई ज़ोवं, “हाँ” असेई सेमझी। 52 फिरी यीशुए तैन सेइं ज़ोवं, “हर अक शास्त्री ज़ै स्वर्गेर राजेरे चेलो बनोरोए एककी एरे मुकान मालिकेरो ज़ेरोहे, ज़ै अपने खज़ाने मरां नर्वी ते पुरेनी चीजां कढते।” 53 ज़ैखन यीशुए एना सब कहैनी शुनेई त तै तैटां अग्रोवं झलो जेव। 54 ते अपने नगर मां एइतां तैटेरे प्रार्थना घरे मां गेइतां शिक्षा देने लगो, ते लोक तैसेरी शिक्षा शुनातां हैरान भोए ते ज़ोने लगो: “ए अक्ल बुधी ते एना चमक्कार एस कोइं हासिल भोए। 55 एन त तैस टलखानेरू मट्टू आए ते एसेरे अम्मारू नवं मरियम ते एसेरे ढूलां केरू नवं याकूब, यूसुफ, शमीन ते कने यहूदा आन, 56 ते एसेरी सब बेइन्नां इश्शे इडी रेइचन, फिरी एसमां ई काबलीत कोइं आई?” 57 एन्चरे तैन लोकेई इन्कार कियो। पन यीशुए तैन सेइं ज़ोवं, “नबी अपने नगर मां ते अपने घरेरे अलावा होरि कोन्ची ठारी बेइजत न भोए।” 58 ते तैने तैडी तैन केरे विश्वास न केरनेरे वजाई सेइं जादे चमक्कार न हिराए।

14 ज़ेइस हेरोदेस ज़ै मुलखेरे चेरवोवं हिस्से पुड हकोमत केरतो थियो, तैनी यीशुएरे बारे मां शुनू। 2 तैनी अपने नौकरन सेइं ज़ोवं, “ए यहूदान आए ज़ै बपतिस्मो देनेबालोए, ए मुडन मरां जीतो भोरोए, एल्लेरेलेइ तै चमक्कार हिराते।” 3 किजोकि हेरोदेसे अपने ढूलाए फिलिप्पेसेरी कुआन्श हेरोदियासेरी वजाई सेइं यहूदान टलेइतां बन्धवोरो ते कैदखाने मां छडोरो

थियो। 4 किजोकि यूहन्ना हेरोदेस सेइं जोरु थियूं, कि ए रखनी तेरे लेइ जेइज नई। 5 ते हेरोदेस तैस कल्ल केरनो चातो थियो, पन लोकन करां डरतो थियो, किजोकि लोक तैस नबी मन्ते थिये। 6 पन जैखन हेरोदेसेरी जर्म दिहैडी आई, त हेरोदायासेरे कुइयां मेहमाना केरे सामने नेघतां हेरोदेस खुश कियोरो थियो। 7 एल्हेरेलेइ तैनी वादो कियोरो थियो, “कि जैन किछ तू मगेली, अवं ती तैन्ने देलो।” 8 तैसां अपने अम्मारे शिखालने पुइ जोंव, “मींजैई यूहन्ना बपतिस्मो देनेबालेरी क्रोडी थाले मां मगा।” 9 राजे बडो अफसोस भोव, पन अपने मेहमाना केरे सामने ते कसम खानेरी वजाई सेइं हुक्म दितो कि देष। 10 ते तैनी कैदखाने मां लोक भेजतां यूहन्नारी क्रोडी कटाई। 11 ते तैसेरी क्रोडी थाले मां रेखतां कुइये कां दित्ती, ते तै अपनि अम्मा कां घिन्तां जेई। 12 तैखन तैसेरे चले आए, ते तैनेई तैसेरी लाश नेइतां देवतां छडी ते गेइतां यीशुए पतो दित्तो। 13 जैखन यीशुए एन शुनु, त तै किश्टरे जिरिये अकेन्ती ठारी जो चलो जेव, ते लोक एन शुन्तां नगर नगरेरे पैदल तैस पत्ती चले जे। 14 जैखन यीशु किश्टी मरां ओस्सो त तैनी बडे लोक पतोरों एइते लाए, ते तैस तैन पुइ बडो तरस अव, ते तैनी तैन केरे बिमार लोक बइज्जाए। 15 जैखन इलोइ भोइ, त यीशुएरे चलेई तैस कां एइतां जोंव, “ई सुनसान ठार आए, त गिरि भी बडू भोरु आए। ते एन लोकन भेज्जी छइ ते कोस्कोई इलॉव्म मां गेइतां किछ खाने जो घिन्ना।” 16 यीशुए तैन सेइं जोंव, “एना भेजने जरूरी नई! तुस्से एन किछ खाने जो देष।” 17 चलेई तैस सेइं जोंव, “इडी असन कां पंच रोटी ते दूई मेछली केरे अलावा होरु किछ नई।” 18 तैनी जोंव, “तैन इरां मीं कां आनां।” 19 तैखन यीशुए लोकन घासे पुइ उन्डे बिशनेरे लेइ जोंव, ते पंच रोटी ते दूई मेछली हथ्ये मां रेख्खी, ते अम्बरेरे पासे तेकतां शुक्रु कियूं, ते रोटी दलोडी-दलोडी अपने चेलन कां दित्ती, ते चलेई तैन लोकन दित्ती। 20 ते सारे मैन्हु खेइतां रेज्जी जे। तैल्ला पत्ती, यीशुएरे चलेई बच्चोरे टुकड़न सेइं 12 टोकरी भेरि। 21 रोटी खानेबाले लोकां केरि तैधात कुआन्शां ते बच्चां केरे अलावा कोई 5000 मइद थिये। 22 तैल्ला पत्ती, यीशुए अपने चेलन हुक्म दित्तो कि, तुस किश्टी मां चेट्ढतां मीं केरां पेइले समुन्दरेरे उस पार जो गाथ ते अवं एन लोकन वापस भेजतां एइताई। 23 लोकन भेजनेरे पत्ती, यीशु तैइं निस्तां नेडे एक्की पहेडी पुइ प्रार्थना केरनेरे लेइ जेव। ते इलोइरी ते अकेल्लो थियो। 24 तैखन किश्टी बन्ने करां दूर पुजोरी थी, किजोकि एप्रोवरां बडी तेज हवा चलोरी थी। 25 ते लगभग झेज्जोरे चेत्रे बजेई जैखन हेजू आंधरु थियूं, यीशु समुन्दरेरे पैनी पुइ चेलतां अपने चेलन कां आने। 26 जैखन चलेई यीशु समुन्दरे पुइ चलतो लाव त तैना डेरि जे, तैनेई बुझू, “ए भूत ओरोए, ते डेरतां चिन्दां लग्गे मारने। 27 यीशुए तैखने तैन सेइं रोडेचारे गल्लां की ते जोंव, “हिम्मत रेख्खा डरा नन्ना, अवं आई।” 28 पतरसे तैस जुवाब दित्तो, “हे प्रभु अगर तू आस, त मीं भी हुक्म दे ते अवं भी पैनी पुइ चलतो तीं कां एज्जी।” 29 तैनी जोंव, “एई!” तैखन पतरस किश्टी मरां ओस्तां यीशु कां गानेरे लेइ पैनी पुइ मेइं चलने लागो। 30 पन तेज हावी सेइं छेल्ली चलने लेगी ते ते डेरि जेव, ते डुबने लागो तैखन तैनी चिन्दां मरतां जोंव, “हे प्रभु मीं बच्चा।” 31 यीशुए लूशी अपने हथ्ये सेइं झफ देइतां पतरस ट्लातो, ते तैस सेइं जोंव, “हे घट भरोसे बाला तीं किजो शक की?” 32 जैखन तैना किश्टी मां बिश्वे ते हवां रुकी जेई। 33 तैखन जैना किश्टी मां बिश्वोरे थिये, त तैनेई तैस कां मथ्यो टेको ते ज़ोने लाग्गे, “तू सच्चरे परमेशेरु मट्टूस।” 34 जैखन तैना गलील समुन्दर पार केरतां गन्नेसरत न्च्वेरे जगाई पुइ पुज्जे। 35 त तैट्टेरे लोकेई यीशु पिशानो ते आसेपासेरे इलाके मां खबर दित्ती, ते सारे बिमार तैस कां आने। 36 ते तैनेई यीशु सेइं मिन्त केरते थिये कि, तैन तैसेरे लिगड़न सेइं हुन्ने दे। ते जेरेई तैसेरे लिगड़न सेइं हथ लाव तैना सब बेज्जोए।

15 तैखन किछ फरीसी ते किछ शास्त्री लोक यरूशलम नगरे मरां यीशु कां आए ते ज़ोने लाग्गे। 2 “तेरे चले बुजुर्गां केरि रसमरे खलाफ किजो चलतन, तैना रोटी खाने करां पेइले हथ न धोन?” 3 तैनी तैन जुवाब दित्तो, “तुस किजो अपने रसमन सेइं परमेशेरु हुक्म दलोइतथ? 4 किजोकि

परमेशेरु जोरुए, कि अपने हाज बच्चेरी इज्जत केरा, ते जै कोई अपने हाज बच्चे जो बुरु ज़ोलो तै मारो गालो। 5 पन तुस ज़ोतथ, कि जै कोई बाजी या अम्मा सेइं जोए कि, मीं करां जै किछ मइत तुसमन मैल्ली सकती थी, ते पेइली बलिदान भोरीए, यानी परमेशेरु जो च्ढतल च्ढाटोरीए 6 त तै अपने बाजी केरि इज्जत न केरे, एन्चरे तुस अपने रसमन सेइं परमेशेरु हुक्म दलोइतथ। 7 हे पाखंडी लोकव, यशायाह नेबे तुशे बारे मां ई भविष्यवाणी ठीक कियोरीए, 8 एना लोक ऐशी सेइं त मेरी बडी तारीफ़ केरतन, पन एन केरे दिल मीं करां बडे दूर आन। 9 एना लोक बेकैइदी मेरी आराधना केरतन, किजोकि एना मैन्हु केरे हुक्मां केरि शिक्षा देतन।” 10 फिरी मैन्हु एप्पू कां कुजेइतां जोंव, “शुना, ते समझा। 11 जै चीज ऐशी मां गाचे तैस सेइं मैन्हु जुट्टो न भोए, पन जैन तैसेरे ऐशी मरां बेइरोवं निस्ते, तैन्ने तैस जुट्टो केरते।” 12 तैखन चलेई यीशु कां एइतां जोंव, “कुन तू ज्ञानतस कि फरीसी लोकेई ए गल शुन्तां ठोकर खाइ?” 13 तैनी जुवाब दित्तो, “जै भूट मेरे स्वगरे बाजे नई लोरो तै ज़ीलना पुटतां छडनोए। 14 तैन केरि परवाह न केरा, तैन काने बत हिराने बालेन, अगर अक कानो होरि काने बत हिराए, त तैना दुइये गडे मां बिछडेले।” 15 एन शुन्तां पतरसे जोंव, “ए मिसाल असन समझा।” 16 यीशुए जोंव, “कुन तुस हेजू भी बेसमझाथ?” 17 “कुन तुस न ज्ञानथ, कि जैन किछ ऐशी मां गाते तैन पेते मां गाते, ते फिरी पेते मरां बेइर निस्ते? 18 पन जैन किछ मैनेरे अन्चरां निस्ते, तैन दिले मरां निसते, तैन्ने मैन्हु जुट्टो केरते? 19 किजोकि बुरे खियाल, कल्ल केरनो, अइलाए देइने गलत कम केरनु, बदमाशी, घोरी, झूठी गवाही देनी, ते तुहीन दिले मरां निसचे। 20 एन एरी गल्लन जैना मैन्हु जुट्टो केरचन, पन हथ धोने बगैर रोटी खाने सेइं मैन्हु जुट्टो न भोए।” 21 यीशु तैइं चलो जेव, ते सूर ते सैदारे आसेपासेरे इलाकेरे नेडे अव। 22 तेस इलाकेरी अक कनानी कुआन्श यीशु कां आई, ते चिन्दां मरतां जोने लाग्गी, “हे प्रभु दाऊदरा मट्टां, मीं पुइ दया केर, मेरी कुइये पुइ भूतेरो सैयोए, तैन भूत तैस बडू सतातो।” 23 पन यीशुए कोई जुवाब न दित्तो, तैसेरे चले नेडे एइतां तैस कां मिनत केरने लग्गे, “एस भेज, किजोकि ए चिन्दां मारचे ते इश्शो पीछो न छडे।” 24 तैनी जुवाब दित्तो, “अवं इस्राएलेरी हेरोरि भेइं केरे अलावा होरि कोन्ची कां नई भेजोरो।” 25 पन तै कुआन्श आई, ते तैस कां मथ्यो टेकतां जोने लाग्गी, “हे प्रभु मेरी मइत केर।” 26 तैनी जुवाब दित्तो, “बच्चां केरि रोटी नेइतां कुतरन देनी ठीक नई।” 27 तैसां जोंव “सच्चरे प्रभु, पन जैन टुकडे मालिकेरी मेजे पुडेरं इज्जतन तैना कुतरां भी खावने।” 28 यीशुए तैस जुवाब दित्तो, “ए कुआन्श तेरो विश्वास बडोए, जेरू तू चातिस तेरे लेइ तेरहु भोए” ते तैसारी कुई तैनेरे बेज्जोइ जेई। 29 यीशु तैइं निस्तां गलील समुन्दरेरे बन्ने पुइ अव, तैखन तै एक्की पहाडे पुइ गेइतां बिश्वी जेव। 30 ते बडे लोकां केरि भीड तैस कां आई, तैन लोकेई एप्पू सेइं साथी टोंटे, काने, लट्टे, डोंडे ते होरे आई एरे जेरे मैन्हु साथी आने, ते तैसेरे पावन कां छडे, ते तैनी तैना सब बइज्जाए। 31 जैखन लोकेई हेरु कि लट्टे गल्लां केरतन कमजोर तकडे भोतन, टोंटे चलतन ते काने लातन त तैना बडे हैरान भोइ जे ते इस्राएलेरे परमेशेरु तारीफ़ केरने लग्गे। 32 यीशुए अपने चले कुजेइतां तैन सेइं जोंव, “मीं एन लोकन पुइ बडो तरस एइते, एना मैन्हु टलेइ दिहैडी केरे देते बराबर मीं सेइं साथिन, ते एन कां खाने जो किछ भी नई। अवं एन नियन्ने भेजने न चैई, कोस्कोई एरु न भोए कि एना बत्ती मां रेइ गान।” 33 तैसेरे चलेई तैस जुवाब दित्तो “अस इस सुनसान ठैरी मां एत्रे लोकां केरे लेइ रोटी कोट्टां आनम, जैना सेबभी केरे लेइ पूरी भोन?” 34 यीशुए पुछ्छू, “तुसन कां केत्री रोटी आन?” तैनेई जोंव, “सत रोटिन ते किछ निक्की मेछली भी आन।” 35 तैखन तैनी लोकन ज़मीनी पुइ बिशनेरे लेइ जोंव। 36 ते यीशुए तैना सत रोटी ते मेछली टलेइ, ते परमेशेरु शुक्रे केरतां दलोडी, ते अपने चेलन कां दित्ती ते चलेई तैना मैन्न दित्ती। 37 सारे मैन्हु रोटी खेइतां रेज्जी जे। तैल्ला पत्ती, यीशुएरे चलेई मेछली त कने रोटी केरे बच्चोरे टुकड़न मरां सत टोकरे भेरतां सल्ले। 38 रोटी खाने बालां केरि तैधात कुआन्शां ते बच्चां केरे अलावा 4000 मइद थिये। 39 तैखन तैने तैना सब लोक भेजे ते एप्पू किश्टी मां च्ढतां मगदन इलाके जो चलो जेव।

16 किछ फरीसी ते किछ सद्कूकी लोक यीशु कां आए, “ते तैस अज़मानेरे लेइ तैस सेइं ज़ोवं, असन कोई अम्बरेरो निशान हिरा।” 2 तैनी तैन जुवाब दित्तो, “जैखन इलोन्न भोतीए त तुस ज़ोतथ कि मौसम रोडोए किजोकि अम्बर लाले। 3 ते झेझां ज़ोतथ कि अज आँधी एजनीए किजोकि अम्बर लाले ते बिदलारे, तुस अम्बर हेरतां अंदाजो लेइता ज़ोतथ, पन ज़मानेरो निशान न पिशैनी सकतथ! 4 इस ज़मानेरे बुरे ते बदमाशी केरनेबाले लोक निशान मगतन, पन तैन योना नेबेरे अलावा होरो कोई निशान न दित्तो गालो।” यीशु तैन शैरतां च़लो जेव। 5 ते यीशुएरे च़ेले समुन्दरे पार पुज़ी जे, पन तेनेईं रोटी साथी नेनी बिसरोरी थी। 6 यीशुए तैन सेइं ज़ोवं, “खबरदार फरीसी ते कने सद्कूकी लोकां केरे खमीरे करां हुशार रेइयथ।” 7 तैना एप्पू मांमेइं गलबात केरने लग्गे, “असेईं रोटी नईं आनोरी, एल्हेरेलेइ ते एरू ज़ोने लोरोए।” 8 एन ज़ैनतां, यीशुए ज़ोवं, “हे घट विश्वैसव, तुस एप्पू मांमेइं किजो सोची राओरेथ, कि असन कां रोटी नईं? 9 कुन तुसन याद नईं? ज़ताली मीं 5000 मैनु केरे लेइ पंच रोटी ट़लोइतां दित्तोरी थी, त तुसेईं बादे मां बच़्चोरी रोटी केरे केत्रे टोकरे भेरतां सल्लोरे थिये? 10 ते तैन 4000 मैनु केरे लेइ सत रोटी ते टुकां केरे केत्री टोकरी सैल्लोरी थी? 11 तुस की न समझथ, कि मीं तुसन रोटी केरे लेइ न थियूं ज़ोरू? पन फरीसी ते कने सद्कूकी लोकां केरे खमीरे करां हुशार रेइयथ।” 12 तैखन तैन केरि समझीं मां अव, कि तैनी रोटी केरे लेइ नईं, बल्के फरीसी ते कने सद्कूकी लोकां केरे खमीर यानी शिश्वाईं करां हुशार रामेरे लेइ ज़ोरू थियूं। 13 ज़ैखन यीशु कैसरिया फिलिप्पी इलाके मां अव, त तैनी अपने चेलन पुच्छू, “मैनेरू मट्टू कौने, लोक एस बारे मां कुन ज़ोतन?” 14 च़ेलेईं ज़ोवं, “किछ ज़ोतन यूहन्नां बपतिस्मो देनेबालोए, किछ ज़ोतन एलिय्याह, ते किछ ज़ोतन यिरमयाह नबी ते किछ ज़ोतन नेबन मरां कोई अक आए।” 15 यीशुए तैन पुच्छू, “पन तुस मेरे बारे मां कुन सोचतथ कि अवं कौन आई?” 16 शमौन पतरसे जुवाब दित्तो, “तू जीते परमेशेरू मट्टू मसीह आस।” 17 यीशुए ज़ोवं, “ए शमौन योनारे मट्टू तू धन आस, किजोकि ए गल मासे या खूने नईं बल्के मेरे स्वर्गेरे बाजे तीं पुड बांदी कियोरीए। 18 ते अवं तीं सेइं ज़ोताईं, तू पतरस आस ते अवं इस पक्के घोड़े पुड अपनि कलीसिया बनेइलो ते पातालरां दारां तैस पुड अस्सर न केरि बटेलां। (Hades g86) 19 अवं अपने स्वर्गेरे राज़ेरी चैबी तीं देइलो, ते ज़ैन किछ तुस ज़मीनी पुड बंधेले तैन स्वर्गं मां बंधोलू, ते ज़ैन किछ तू ज़मीनी पुड खोल्लोले तैन सब किछ स्वर्गं मां खुल्लेला।” 20 तैखन यीशुए चेलन जो ज़ोवं, ए गल केन्ची सेइं न ज़ोइयथ कि अवं मसीह आई। 21 एसेरे बाद यीशुए अपने चेलन ज़ोने लग्गे कि, “तैसेरू यरूशलेम नगरे मां गानू ज़रूरीए ताके यहूदी लोकां केरे बुजुर्गन, प्रधान याजकन ते शास्त्री लोकां केरे हेथेईं ते बड़ो दुःख झैल्ले, ते मारो गाए ते ते ट़लेइयवों दिहाड़े फिरी ज़ीतो भोलो।” 22 पतरस तैस अलग नेइतां झिडकने लग्गे, “हे प्रभु, परमेशर न केरे, तीं सेइं एरू कथे न भोलू।” 23 यीशुए मुडतां पतरसे सेइं ज़ोवं, “हे शैतान, मीं करां दूर भो, तू मीं करां पाप करानेरी कोशिश कराने लोरोस। किजोकि तू ज़ेन्चरे परमेशर सोचते तेन्चरे नईं बल्के ज़ेन्चरे मैनु सोचन तेन्चरे सोचतस।” 24 तैखन यीशुए अपने चेलन सेइं ज़ोवं, “अनार कोई मीं पत्ती एजनी चाते त ते अपने आपेरो इन्कार केरे, ते अपनू क्रूस छुइतां मीं पत्ती च़ले।” 25 “किजोकि ज़े कोई अपनि जान बघानी च़ालो, त ते तैस गुवालो, ते ज़े अपनि जान मेरे लेइ गुवालो, त ते तैस हासिल केरेलो। 26 अगर कोई सारी दुनिया हासिल केरे, ते अपने हमेशारे ज़िन्दगी गुवाए, त तैस कुन फेइदो भोलो? या मैनु हमेशारे ज़िन्दगारे बदले कुन देलो? 27 किजोकि ज़ैखन मैनेरू मट्टू अपने बाजेरी महिमाईं मां अपने स्वर्गदूतन सेइं साथी एज्जेलू, तैखन ते हक केन्ची तैन केरे कियोरे कम्मां केरो फल देलो। 28 अवं तुसन सेइं सच़ ज़ोतईं कि ज़ैना इडी खडे आन, ज़ां तगर मैनेरे मट्टे अपने राज़े मां एइते न लाएले, तांतगर न मरेले।”

17 शेइ दिहाइना बाद, यीशु अपने चले पतरस, याकूब त तैसेरे ढ़ला यूहन्ना सेइं साथी एक्की पहाड़े पुड जेव, ज़ेडी कोई भी न थियो। 2

तैडी तैन केरे सामने तैसेरी शकल बेदलोईं जेईं, तैसेरू तुत्तर दिहाड़ेरू ज़ेरू चमकने लगू ते तैसेरां लिगड़ां लोअरां ज़ेरां छित्तां भुआं। 3 तैखन तैनेईं मूसा ते एलिय्याह नबी यीशु सेइं गल्लां केरते लाए। 4 पतरसे यीशु सेइं ज़ोवं, “हे प्रभु इश्शू इडी रानू रोडूए, अगर तू चातस त आस ट़लाई डेरे बनाम, अक तेरे लेइ ते अक मूसेरे लेइ ते अक एलिय्याहरे लेइ।” 5 तै ए गल जोईं राहोरो थियो, अक बडी चमकती बिदलारन तैन पुड एइतां रुकी, ते तैस बिदलारी मरां ई आवाज़ आई, “एन मेरू ट़लारू मट्टूए, ज़ैस पुड अवं खुश आई, एसेरी शुना।” 6 च़ेले एन शुन्तां तुत्तेरे भारे बिछड़े ते बड़े डेरि जे। 7 पन यीशुए एइतां तैन सेइं हथ लाव, ते ज़ोवं, “उठा, डरा नन्ना।” 8 ज़ैखन तैनेईं च़ेब्रे पासन तक्कू, त यीशुएरे अलावा होरो कोई न लाव। 9 ज़ैखन तैना तैस पहाड़े पुडरां उन्डे ओरे थिये, त यीशुए तैन ई हुकम दित्तो, जैन किछ तुसेईं लाहेरू, “जां तगर मैनेरू मट्टू मुडन मरां ज़ीतू न भोए तांतगर केन्ची सेइं न ज़ोइयथ।” 10 तैसेरे च़ेलेईं तैस पुच्छू, “शास्त्री किजो ज़ोतन कि मसीहेरे एजनेरां पेइले, एलिय्याह नेबेरू दुनियाईं मां एजनु ज़रूरी आए?” 11 तैनी जुवाब दित्तो, “एलिय्याह ज़रू एज्जेलो ते सब किछ बहाल केरेलो। 12 पन अवं तुसन सेइं ज़ोतईं कि ‘एलिय्याह’ त पेइले ओरोए, पन लोकेईं ते न पिशानो, पन ज़ैन चाउ तैस सेइं तैने कियूं, एन्चरे मैनेरू मट्टू भी तैन केरे हथ्यन सेइं दुःख भोगेलो।” 13 तैखन च़ेलेईं बुझू कि असन सेइं यूहन्ना बपतिस्मो देनेबालेरे बारे मां ज़ोने लोरोए। 14 ज़ैखन तैना हळे मैनु केरि बडी भीडी कां पुजे, त अक मैनु तैस कां अव, ते ज़ैधू केरे बारे बिश्तां ज़ोने लग्गे। 15 “हे प्रभु मेरे मट्टे पुड दया केर, तैस मिरगरी वजाईं सेइं दौवरे एइतन, ते तैस बड़ो दुखे, ते बार-बार अगगी मां ते बार-बार पैनी मांजो खिरकते। 16 मीं तैन तेरे चेलन कां आनोरू थियूं, पन तैनेईं तैन ठीक न केरि बटु।” 17 यीशुए ज़ोवं, “हे घट विश्वावैसव ते ढीठ लोकव, अवं केइस तगर तुसन सेइं साथी भोनोईं, केइस तगर तुशरी झैलतो रेइलो? ते मीं कां आनां।” 18 तैखन यीशुए तैन भूत झिडकू, ते तैस पुडां सैयो निस्सी जेव, ते तैन मट्टू तैखने ठीक भोइ ज़ोवं। 19 तैखन च़ेलेईं अकेल्ले ज़ेरे यीशु कां गेइतां पुच्छू, “अस तैस मट्टे मरां भूतेरो सायो की न केइी सकते?” 20 तैनी तैन सेइं ज़ोवं, “अपने घट विश्वासेरे वजाईं सेइं, अवं तुसन सेइं सच़ ज़ोताईं, अगर तुशो विश्वास शेरीएरे ग्लेवे ज़ेरो भी भोए, त तुस उस पहाड़े जो ज़ोले कि, ‘इह्मां निस्तां उडी गा, त तैन गालू, ते तुशे लेइ कोई भी गल असुखती न भोली। 21 पन इस किसमेरां भूतां प्रार्थना ते बरते बगेर न निस्सन।” 22 ज़ैखन तैना गलीले मां थी, त यीशुए तैन सेइं ज़ोवं, “मैनेरू मट्टू भी मैनु केरे हवाले कियूं गालू। 23 तैना तैस मारेले, ते तैन ट़लेइयवों दिहाईं फिरी ज़ीतो भोलू।” च़ेले एन शुन्तां बड़े परेशान भोए। 24 ज़ैखन तैना कफरनहूम नगर मां पुजे, त प्रार्थना घरेरे लेइ चुंगी घिन्ने बाले पतरसे कां एइतां पुच्छू, “कुन तुशो गुरू प्रार्थना घरेरी चुंगी न दे?” 25 तैनी जुवाब दित्तो, “हाँ देते।” ज़ैखन पतरस घरे मां पुजो त यीशुए तैसेरे पुछ्नेरे पेइले तैस सेइं ज़ोवं, “हे शमौन तू कुन समझतस? दुनियारे राज़े कौन लोकन करां चुंगी घिन्तन अपने बचचन करां या होरि लोकन करां?” 26 पतरसे तैस सेइं ज़ोवं, “होरन करां।” यीशुए तैस सेइं ज़ोवं, “त मट्टा बरी भोइ जेआं। 27 फिरी भी एल्हेरेलेइ कि अस तैन ठोकर न देम, तू समुन्दरे पुड गेइतां कंटो लेइतां मेछली ट़लेइयां, ते ज़ै मछली पेइली लागेली, तैसरू आशी खोल्लां, ते तीं अक सिक्को मैलनोए, ते तै सिक्को नेइतां मेरी ते अपनि चुंगी देइयां।”

18 तैखन च़ेले यीशु कां आए ते पुछ्ने लग्गे, “स्वर्गेरे राज़े मां सेहबन करां बड्डो कौने?” 2 तैनी अक निकडो बच्यो एप्पू कां कुजाव, ते मझाटे खडो कियो। 3 ते ज़ोने लग्गे, “अवं तुसन सेइं सच़ ज़ोताईं, कि तुस अपनो आप बेदलतां निकडे बच्येरो ज़ेरे न बनथ, त तुस स्वर्गेरे राज़े मां कथी दाखल न भोले। 4 ज़े कोई अपनो आप इस बच्येरो ज़ेरो निकडो बनालो, त ते स्वर्गेरे राज़े मां बड्डो भोलो। 5 ते ज़े कोई एरे ज़ेरे निकडे बच्ये मेरे न्वंचे सेइं कबूल केरते, त ते मीं कबूल केरते।” 6 “ज़े कोई इन निकडन मरां ज़ैना मीं पुड विश्वास केरतन एक्केरे लेइ ठोकर बने, त तैसेरेलेइ एन्ने

रोऊ आए कि बड़े दूलातेरो दूलेइडोल तैसेरे गल्ले उन्डो दंडेइतां दुघे समनुद्रे मां डोबतां छुडोरो लोडते। 7 ठोकरां केरि वजाई सेईं दुनियाई पुड अफ्रसोस! ठोकरां लेग्नीनी त ज़रुरन पन, अफ्रसोस तैस मैन्हु पुड ज़ेसेरी वजाई सेईं ठोकर लग्गीए। 8 अगर तेरो हथ या तेरो पाव तेरे लेड ठोकरारो ज़िरयो बनते, त तू तैस केदतां छड, किजोकि तेरु टोंटु या कानु बेनतां ज़िन्दगी मां दाखल भोनु रोडूए, ते तेरे दुइये हथ पाव सथे भोने सेईं अगर तू हमेशारी अग्गी मां गास त तैल्ला केरतां तू टोंटो या कानो बेनतां रोडोस। (aiōnios g166) 9 अगर तेरी अछ तेरे लेड ठोकरां वजा बनती, त तू तैस केदतां शैरी छड, कानु भोइतां ज़िन्दगी मां दाखल भोनु तेरे लेड रोडूए, कि दुइये एछछी भोने सेईं तू नरकेरी अग्गी मां गास त तैल्ला रोडोस।” (Geenna g1067) 10 “हेरा इन निक्के चलन मरां तुस केन्ची घटिया न बुझा, अवं तुसन सेईं जोताई कि तैन केरे स्वर्गदूत हर वक्त स्वर्ग मां मेरे बाजी केरे हज़ूरी मां रातन। 11 (किजोकि मैनेरू मट्टू यानी अवं हेरोरे लोकन बघाने ओरोई।) 12 तुशु खियाल कुने? कि केसकोई कां 100 भैड्डां भोन, त तैस मरां अक हेरोए, त कुन तै नडेनुवं भैड्डां ज़ैडी खतरो न भोए तैडी छेदतां, तैस हेरोरि न तोपेलो? 13 ते अगर एरू भोए, तैस तै मैल्ले, त अवं तुसन सेईं सच्च ज़ोताई कि तै तैना नडेनुवं केरे लेड एनी खुशी न मनालो, ते तैस एककी भैडरे लेड जादे खुशी बनालो। 14 एन्चरे तुशुओ बाजी ज़ै स्वर्ग मांए, तै एन न चाए कि एन निकन मरां भी कोई नाश न भोए।” 15 “अगर कोई मीं पुड विश्वास केरनेबालो दूला तीं सेईं बुराई केरते, त तू अकैल्ले मां तैस समझा, अगर तै तेरी गल शुने, त तीं तै वापस परमेशरे कां आनो। 16 अगर तै तेरी गल न शुने, त तू एण्णु सेईं साथी अक या दूई मैन्हु नेइयां, किजोकि मूसेरे कानुनेरे मुताबिक हर शिकेइती मां दूई या दूलाई मैन्हु गवाह भोतन। 17 अगर तै तैन केरि भी न शुने, त तू कलीसियारे लोकन सेईं ज़ो, अगर तै कलीसियारे लोकां केरि भी न शुने, त तू तैस सेईं एरो बर्ताव केर जेन्चरां तै गैर कोमरो भोए या चुंगी घिन्ने बालो भोए।” 18 “अवं तुसन सेईं सच्च ज़ोताई, ज़ैन किछ तुस ज़मीनी पुड बंधेले त समझा कि स्वर्ग पुड बंधोलू, ते ज़ैन किछ तुस ज़मीनी पुड खोल्लेले त तैन स्वर्ग मां खुल्लेले। 19 फिरी अवं तुसन सेईं सच्च ज़ोताई, कि अगर तुसन मरां दूई ज़ने थेरती पुड अक मन भोइतां कोन्ची मसलेरे हल कढनेरे लेड परमेशरे करां ज़ै स्वर्ग मां आए मद्दत मगन, त तै तैन केरि मद्दत ज़रूर केरेलो। 20 किजोकि ज़ैडी दूई या दूलाई मैन्हु, मेरे नव्वे सेईं परमेशरे करां मद्दत मगनेरे लेड अकोट्टे भोतन, अवं तैडी तैन केरि मद्दत केरनेरे लेड तैन मां भोइताई।” 21 तेखन पतरसे यीशु कां एइतां पुछ्छू, “प्रभु अगर कोई तीं पुड विश्वास केरनेबालो, मीं सेईं बुराई केरतो राए, त अवं केत्रे बार तैस माफ़ केरि? कुन सत बार?” 22 यीशुए जुवाब दित्तो, “अवं तीं सेईं इन न जोई सत बार, बल्के सत्तेरे सत्तर बार माफ़ करां (यानी लगातार माफ़ केरतू रानु)। 23 बरसा अवं तुसन सेईं इन ज़ोताई, स्वर्गरे राज़ तैस राज़ेरू ज़ेरू आए, ज़ैनी सोचू कि अवं अपने नौकरन करां हिसाब घिनी। 24 ज़ैखन तै हिसाब घिन्ने लगे, त अक मैन्हु तैस कां हाज़र कियो, ज़ै दश हज़ार सोन्नेरे सिक्कां केरे तोड़ां केरो कर्जदार थियो। 25 तैस कां कर्जां मुकाने जो किछ न थियू, राज़े हुक्म दित्तो, एसेरे बाल बच्चे ते कुआन्श ते ज़ैन किछ भी आए सब बेचतां कर्जां उसुल केरा। 26 पन तै नौकर ज़ोवले हथ केरतां मालिके कां मिनत केरतां ज़ोने लगे, ‘मीं किछ मौको दे, ते अवं तेरो सारो कर्जां मुकालो।’ 27 मालिके तैस नौकरे पुड बड़ो तरस अवं, ते तैनी तै छैडी दित्तो ते तैसेरो कर्जां भी माफ़ कियो।” 28 “पन ज़ैखन तै नौकर तैदू चलो जेव, त तैस अक एरो नौकर मैल्लो, ज़ै तैसेरो साथी थियो, ते तैस तैनी 100 दीनार दित्तोरे थियो, तैनी ते गलेरां दूलाव ते ज़ोने लगे, ‘मेरो कर्जां कढ।’ 29 तैसेरो साथी नौकर तैस्से कां मिनत केरने लगे, ‘मीं किछ मौको दे ते अवं तेरो सारो कर्जां मुकालो। 30 पन तैनी तैसेरी अक गल भी न शुनी, ते तैनी तै देपतां छुडो कि ज़ां तगर कर्जां न देस तांतगर दप्पोरो रा। 31 ज़ैखन होरि नौकरेई एन शुनु, त तैना बड़े परेशान भोए, ते मालिके कां गेइतां सारो हाल शुनाव। 32 तैखन मालिके तै अपने नौकर कुजेइतां ज़ोवं, ‘ओ बेईमान नौकरा मीं तेरो सारो कर्जां माफ़ कियो, किजोकि तीं मीं कां छंदे कियोरे थियो। 33 कुन तेरे

लेड ज़रूरी न थियू, कि जेन्चरे मीं तीं पुड दया केरतां तेरो कर्जां माफ़ कियो, तेन्चरे तू भी अपने सैथन पुड दया केरतां तैन केरो कर्जां माफ़ केनेथो?” 34 मालिके सरक आई, ते तैनी तै नौकर सज़ा देनेबालां केरे हवाले कियो, कि ज़ां तगर मेरो सारो कर्जां न दे तांतगर दप्पोरो भोए। 35 “एन्चरे अगर तुसन मरां हर कोई, तैस मैन्हु ज़ै मीं पुड विश्वास केरते दिले सेईं माफ़ न केरे त मेरो स्वर्गे बाजी यानी परमेशर भी तुसन सेईं एन्चरे पैश एज्जेलो।”

19 ज़ैखन यीशुए एन गल्लां जोई छैडी, त तै गलीले मरां गेइतां यरदन दरियारे पार यहूदिया इलाके मां चलो अवं। 2 बड़े लोक यीशु पत्ती चले जे, ते यीशुए तैना तैडी बड़झाए। 3 तेखन फरीसी लोकेई यीशु कां एइतां तैस अजमामेरे लेड पुछ्छू, “कुन मैन्हु अपनि कुआन्श केन्ची भी वजाई सेईं फारखी देनी जेइजे?” 4 तैनी जुवाब दित्तो, “कुन तुसेईं नईं पढेरू कि ज़ैने तैना बनां तैनी शुरु करां मडद ते कुआन्श बनेवरां थियां। 5 ‘एल्लेरेलेड मडद अपने हाज बच्चे करां कनारे बिशतां अपनि कुआन्शी सेईं साथी रालो, ते तैना दुइये अक जान भोलां।’ 6 एल्लेरेलेड हुनी तैना परमेशरेरी नज़री मां दूई नईं, पन अक्के आन। एल्लेरेलेड ज़ैना परमेशरे ज़ोडोरेन, तैनन् कोई मैन्हु अलग न केरे!” 7 तैनेई तैस पुछ्छू, “फिरी मूसे ए हुक्म किजो दित्तो कि फारखी लिखतां छैडी देथ?” 8 तैनी तैन सेईं ज़ोवं, “मूसे तुशुस सखत दिलेरी वजाई सेईं अपनि कुआन्शन छडनेरो हुक्म दित्तोरो थियो, पन शुरु करां एन न थियू। 9 अवं तुसन सेईं सच्च ज़ोताई, कि ज़ै कोई अपनि कुआन्शी बदमेशरे अलावा कोन्ची होरि गल्ली पुड फारखी दे, ते तै केन्ची होरि सेईं इला बनाते, त तै (एण्णु) बदमाशी केरते। ते ज़ै तैस शैरोरी कुआन्शी सेईं इला बनाते, त तै भी बदमाशी केरते।” 10 चेलेई यीशु सेईं ज़ोवं, “अगर मडद ते कुआन्शारे रिशतेरोई हलाले त इला न लोडे बनोरो।” 11 यीशुए तैन सेईं ज़ोवं, “ए गल सब कबूल न केरि बदन, सिर्फ तैना ज़ैन परमेशर ई काबलीत दित्तोरी। 12 किछ त ज़र्मनेरे हिजडे भोतन ते किछन लोक बनातन, ते किछ एरे भी आन, कि ज़ैन स्वर्गे राज़ेरे लेड इला न बनान, ते ज़ैना इना गल्लां सेमझी सकतन तैना समझन।” 13 तैखन लोकेई बच्चे यीशु कां आने, कि तैन पुड हथ रेखतां प्रार्थना केरे, पन चेलेई तैना लोक झिडके। 14 यीशुए ज़ोवं, “बच्चे मीं कां एजने देथ, तैन न ठाका, किजोकि स्वर्गरे राज़ एरां केरूए।” 15 ते तै बच्चन पुड हथ रेखतां तैदू अग्रोवं चलो जेव। 16 हेरा, अक मैन्हु यीशु कां अवं ते पुछ्छने लगे, “हे गुरु अवं कुन भलू कम केरि, कि हमेशारी ज़िन्दगी हासिल केरि?” (aiōnios g166) 17 यीशुए तैस सेईं ज़ोवं, “तू मीं भलैइये बारे मां किजो पुछतस? परमेशरेरे अलावा होरो कोई भी रोडी नईं, पन अगर तू हमेशारी ज़िन्दगी हासिल केरनि चातस त हुक्म मनन।” 18 तैनी ज़ोवं, “कोन हुक्मन पुड?” यीशुए ज़ोवं, “खून नईं केरनो, बदमाशी नईं केरनि, चोरी नईं केरनि, झूठी गवाही नईं देनी, 19 अपने हाज बच्चां केरि सेवा केर, अपने पड़ोसी सेईं अपने बराबर प्यार केर।” 20 तैनी जवाने जुवाब दित्तो, “एना सब हुक्म अवं बचपनेरो मन्तो ओरोई। हुनी मीं मां को कमीए?” 21 यीशुए तैस सेईं ज़ोवं, “अगर तू सिद्ध भोनु चातस, त गा ज़ैन किछ तीं कां आए तैन बेचतां गरीब मैनन् दे, तेखन तीं स्वर्ग मां खज़ानो मैलेलो। ते एइतां मीं पत्ती चलो।” 22 पन तैनी जवाने ए गल शुनी, त बड़ो उदास भोइतां चलो जेव, किजोकि तै बड़ो अमीर थियो। 23 तैखन यीशुए अपने चलन सेईं ज़ोवं, “अवं तुसन सेईं सच्च ज़ोताई कि अमीर मैनेरू स्वर्गे राज़े मां दाखल भोनु मुशकले। 24 फिरी अवं तुसन सेईं ज़ोताई, परमेशरेरे राज़े मां अमीर मैनेरू दाखल भोने केरां ऊँटेरू साधनेरे पाए मरां निस्नु सुखू आए।” 25 एन शुन्तां चेलेई हेरान भोइतां ज़ोवं, “फिरी कसेरी मुक्ति भोइ बटतीए।” 26 यीशुए तैन केरे पासे तेकतां ज़ोवं, “मैनन् करां त एन न भोइ सके पन परमेशरे करां सब किछ भोइ बटते।” 27 एस पुड पतरस ज़ोने लगे, “हेर अस सब किछ शैरतां तीं पत्ती चलोरेम ते असन कुन मैलनूए?” 28 यीशुए तैन सेईं ज़ोवं, “अवं तुसन सेईं सच्च ज़ोताई, कि नव्वे दुनियाई मां ज़ैखन अवं मैनेरू मट्टू अपने महिमारे तखते पुड बिशेलू, त तुस भी मीं पत्ती चलने बाले 12 तखतन पुड बिशतां इसाएलेरे 12 गोत्रां केरो इन्साफ़ केरेले। 29 ते ज़ैनी केन्चे अपना घरां

ते ढूला या बेडन या हाज या बव या बच्चे या ऊडारां छड्डेरेन, तैस 100 गुणा फल मैलेलो, ते हमेशारी जिन्दगरी विरासत मैलेली। (aiōnios g166) 30 पन बडे मैन्हु जैना हुन्ना पेडले आन, तैना बादे मां पत्रोवं भोनेना। त जैना हुन्ना पत्रोवं आन, तैना बादे मां पेडले भोनेना।”

20 “स्वर्गुरू राज तैस जिमदारुरू जेरुए जै झेझां उट्टतां ते अपने दाछरी बागी मां मजदूर कम्मे लाए। 2 तैनी अक दीनार रोज मुजुरी देनेरे लेइ तैना बागी मां भेजे। 3 फिरी नौ बजेइ बेडर गेइतां तैनी बजारे मां काई लोक बेकार खडे लाए। 4 तैनी तैस सेइं ज़ोवं, ‘तुस भी मेरी बागी मां गाथ, ते जैन किछ जेइज भोलू अवं तुसन देलो।’ तैना कम्मे पुड जो जे। 5 फिरी तैनी दुपहरेइ ते टलेइ बजन नगर एन्ने कियूं। 6 पंचे बजेइ तैनी बेडर निस्तां किछ होरे लोक भी खडखडे लेइतां तैन पुच्छू, ‘तुस झेझेरे देंते किजो खेडोरेथ?’ तैनेईं जुवाब दित्तो, ‘अस केन्चे कम्मे नईं लोरे।’ 7 तैनी तैन सेइं ज़ोवं, ‘तुस भी मेरे बागी मां गाथ ते कम केरा।’” 8 “इलोझी तैनी बागरे मालिके अपने मुन्शी सेइं ज़ोवं कि, ‘पेडले लगगोरे मजदूर ते पत्ती कम्मे लगगोरे मजदूर सेबन अक-अक दीनार दिहाडी दे।’ 9 जैना पंचे बजेइं ओरे थिये, तैन भी अक दीनार पूरी दिहाडी मैलली। 10 जैना मजदूर झेझां कम्मे लगगोरे थिये तैन केरि बारी आई त तैनेईं सोचू कि असन जादे मैलन, पन तैन भी अक-अक दीनार मैललो। 11 ज़ैखन दिहाडी मैलली, त तैस मालिकेरे बारे मां तैना एणू मांमेइं बुराई करेने लगगे। 12 ‘पत्ती लोरे मजदूरेईं सिर्फ अक घैन्टो कम कियोरुए, ते तीं तैन भी असन बराबर ज़ेनेईं सैरी दिहैडी कम कियां मुजुरी दित्ती।’ 13 तैनी तैन मरां एक्की जुवाब दित्तो, ‘दोस्त मां तीं सेइं काई बेइन्साफी नईं कियोरी, कुन मां तीं सेइं अक दीनार दिहैडीरी गल न थी कियोरी?’ 14 एल्हेरेलेइं जै तेरी मजदूरीए तै टला ते चलो गा, ए मेरी मर्जीए कि बादे मां लगगोरे मजदूर भी एत्रे देईं। 15 कुन मां ए अधिकार नईं कि अपने माले मरां जैन चैईं तैन केरि? तू मां पुड एल्हेरेलेइं ज़लतस कि अवं खुल्ले दिले सेइं देने बालोईं?’ 16 एल्हेरेलेइं बडे मैन्हु जैना हुन्ना पेडले आन, तैना बादे मां पत्रोवं भोनेन, ते जैना हुन्ना पत्रोवं आन, तैना बादे मां पेडले भोनेन।” 17 यरूशलेम नगरे जो गांते बार यीशुए अपने 12 चलन अलग नेइतां तैन सेइं ज़ोवं, कि तैस सेइं कुन भोने बालुए। 18 “हेरा, अस यरूशलेम नगरे जो च़लोरैम, मैनेरू मट्टू प्रधान याजकां ते शास्त्री लोकां केरे हवाले कियूं गालू, ते तैना तैस मारनेरे काबल ठेरेले। 19 तैस गैर कौमां केरे हवाले केरेले, तैना मैनेरे मट्टेरी यानी मेरी हासी बनाले, ते तैस कोडे बाहेले, ते फिरी तैस क्रूसे पुड चाढेले, ते अवं टलेइयोवं दिहाडे फिरी ज़ींतो भोलो।” 20 तैखन जख्दी नन्वेरे मैनेरां मट्टां केरि अम्मा अपने मट्टन सेइं साथी यीशु कां आई, ते तैस कां मिनत करेने लाई ते तैस करां किछ मगने लगगी। 21 तैने तैस पुच्छू, “तीं कुन लोइते?” तैसां ज़ोवं, “वचन दे, कि मेरां इन्ना मट्टां तेरे राज़े मरां अक तेरे देइने पासे त होरू तेरे बांए पासे बिश्शन।” 22 पन यीशुए तैन सेइं ज़ोवं, “तुस न ज़ानथ कि कुन मगने लगगोरेथ! ज़ेन्चरे दुख अवं झ़लने बालोईं, कुन तुस झ़लली सकतथ? तैनेईं जुवाब दित्तो, हॉं झ़लली सकतमा।” 23 तैनी तैन सेइं ज़ोवं, “तुस मेरे ज़ेरो दुःख झ़ललेले, पन एन मेरू कम नईं कि एक्की देइने पासे ते होरि बांए पासे बिशैली, ए ठार जेसेरे लेइ मेरे बाजरे तरफां खरोरीए तै तैसेरे लेइए।” 24 एन शन्तां होरि दश चलेईं तैन दूईं ढलान पुड नराज भोइ जे। 25 यीशुए अपने सारे चले नेडे कुजेइतां, तैन सेइं ज़ोवं, “होरि कौमां केरे प्रधान अपने लोकन पुड राज़ केरतन, ते तैन केरे मालिक तैन पुड अधिकार रखतन। 26 पन तुसन मां एरू न लोइं भोरू, बल्के तुसन मां ज़े बड्ढो बननो चाते, ते सेबनी केरो सेवक बने। 27 ज़े कोईं तुसन मां प्रधान बनू चाए, ते सेबनी केरो गुलाम बने, 28 जेन्चरे कि मैनेरू मट्टू एल्हेरेलेइं नईं ओरुए कि कोईं तैसेरी सेवा केरे, बल्के एल्हेरेलेइं कि सेवां केरे, ते अपनि जान बडे लोकां केरे छुटकारेरे लेइ दे।” 29 ज़ैखन यीशु त तैसेरे चले यरीहो नगरे मरां च़लोरै थिये, त बडे लोक तैस पत्पती च़ले। 30 दूईं काने बत्ती मां बिश्शोरे थिये, तैनेईं एन शुनू कि यीशु इस बत्तां च़लोरैए, त तैना चिन्दां मारने लगगे, “हे प्रभु दाऊदरा मट्टां असन पुड दया केर।” 31

लोक तैन झिडकने ते ज़ोने लगगे कि चुप राथ, पन तैना मना चिन्दां मारने लगगे, “हे प्रभु, दाऊदरा मट्टां असन पुड दया केर।” 32 तैखन यीशु खेडोवं ते तैन कुजेइतां पुच्छने लगगी, “तुस कुन चातस अवं तुश्शे लेइ केरि?” 33 तैन कानेईं जुवाब दित्तो, “हे प्रभु अस चातम कि इश्शी एछ़न लौ एज्जी।” 34 यीशुए तैन पुड बडो तरस अव, ते तैनी तैन केरे एछ़न पुड हथ रखवो ते तैना लहने लगगे, ते दुइये काने यीशु पत्ती च़ले जे।

21 ज़ैखन यीशु ते कने तैसेरे चले यरूशलेम नगरेरे नेडे पुजे, त यीशुए ज़ैतून पहाडे पुड बैतफगे मरां अपने दूईं चले एन ज़ोइतां अग्रोवं भेजे। 2 “अपने सामने उस इलव्वें मां गाथ, ते तैडी पुजेले, त तुसन अक गधी बंधोरी मैलनिये, ते तैस साथी तैसेरो बच्चो भी भोनेए, तैस खोलतां इडी मीं कां आनां।” 3 अगर तुसन कोईं पुच्छे, त तुस ज़ोइयथ, कि प्रभुए एसेरी ज़रूरत आए, ते तै लूशी तैस वापस भेजेलो। 4 इन सब किछ एल्हेरेलेइं भोवं, कि नेबे ज़ैन वचन ज़ोरू थियूं, तैन पूरू भोवं, 5 “सियोनेरे कुइये सेइं जोथ, कि तेरो राज़ो तीं कां ओरोए, ते तै बडो हलीमी ते तै गैधी पुड च़ेइतां ओरोए, बल्के गधेरे बच्चे पुड।” 6 चले च़ले जे ते ज़ेन्चरे यीशुए ज़ोरू थियूं, तैनेईं तेन्चरे कियूं। 7 तैनेईं तै गधी ते तैसरो बच्चो आनो, ते तैन पुड अपना लिगडां छडां, ते यीशु तैस पुड च़ेइतां च़लो। 8 बडे लोकेईं अपना लिगडां बत्ती मां बिछां, ते किछेईं बुट्टा केरे डाल केटतां बत्ती मांमेइं छडोरे थिये। 9 ते तैना लोक ज़ैना यीशु सेइं साथी अग्री-अग्री ते पत्ती-पत्ती च़लोरै थिये, तैना नहरे देते थिये, “दाऊदरे मट्टेरी होशाना (तारीफ़), धने तै, ज़ै प्रभुएरे नन्वे सेइं एइते, स्वर्गें मां होशाना।” 10 ज़ैखन यीशु यरूशलेम नगरे मां पुजो, त सारे नगर मां हलचल मेजि जेई, ते लोक ज़ोने लगगे, “ए कौने?” 11 लोकेईं ज़ोवं, “ई गलीलेरे नास्तर नगरेरो नबी यीशुए।” 12 यीशुए परमेशोरे मन्दरेरे अंमने मां गेइतां, ज़ैना बुपारी बुपार केरते थिये सब तैइं कडे, तैनी सुनारां केरि दुकान ते कबूतर बेचने बालां केरि ठारां टलोडी। 13 ते तैनी ज़ोवं, “लिखोरुए कि मेरे मन्दरे जो प्रार्थना केरनेरू घर ज़ोले, पन तुसेईं त ए डैकू केरो अड्डो बनेवरोए।” 14 तैखन काने ते टोंटे मन्दरे मां यीशु कां आए, ते तैनी तैना सब बज्झाए। 15 पन ज़ैखन मन्दरेरे प्रधान याजक ते शास्त्री लोक एना कम्मां ज़ैना तैनी कियां, ते मट्टन मन्दरे मां दाऊदरी औलादरी होशाना (तारीफ़) जोते लाए, तैन बड्डी सरक आई। 16 ते तैस सेइं ज़ोने लगगे, “तू शुन्ने लोरोस कि एना कुन ज़ोने लोरेन?” यीशुए तैन सेइं ज़ोवं, “हॉं अवं शुन्ने लोरोईं, तुसेईं कथे नईं पढ़ेरू कि, ‘तीं मट्टन ते दुइ पौते बचन करां भी तीं अपनि पूरी तारीफ़ कमाई?’” 17 तैखन ते तैन शरतां नगरे बेडरोवं च़लो जेव, ते बैतनिय्याह नगरे मां जेव ते तैडी रात गुज़ारी। 18 झेझां ज़ैखन यीशु नगरे मांजो वापस ओरो थियो, त तैस ढलुख लगगी। 19 बत्तारे इलेखी अक फ़ेगोरो बूट लाव ते तैस कां जेव, ते पटलां केरे अलावा तैस पुड किछ न लाव, तैनेईं तैस जो ज़ोवं, “कथे भी तीं पुड फल न लगगेलो ते तैखने तै बूट शुक्की जेव।” (aiōn g165) 20 एन हेरतां चले हैरान भोइतां पुच्छने लगगे, “ई फ़ेगोरो बूट अकदम केन्चरे शुक्की जोरोए?” 21 यीशुए जुवाब दित्तो, “अवं तुसन सेइं सच ज़ोताई कि अगर तुस विश्वास रखथ, ते शक न केरथ, ज़ैन फ़ेगोरे बूटे सेइं भोवं तैन तुस भी केरि सकतथ, बल्के उस पहाडे जो ज़ोले कि इट्टां उखडतां समुन्द्रे मां गा, त तैन्ने भोलू।” 22 अगर तुश्शो विश्वास पक्कोए त ज़ैन किछ तुस प्रार्थनाईं मां मगगेले, तैन तुसन मैलली गालू? 23 यीशु मन्दरे मां शिक्षा देने लोरो थियो, त प्रधान याजक, ते लोकां केरे बुजुर्गेईं तैस पुच्छू, तू एन कम कसेरे अधिकारे सेइं केरतस? ते तीं एन कम केनी दित्तोरोए? 24 यीशुए तैन जुवाब दित्तो, “अवं भी तुसन अक गल पुछतईं, अगर तुस तैसेरो जुवाब देले, त अवं भी ज़ोइलो कि अवं एन कम कसेरे अधिकारे सेइं केरताईं। 25 यूहन्नारो बपतिस्मो कोट्टा थियो? स्वर्गेर तरफां थियो, या की इन्सानेरी तरफां थियो? तैना एणू मांमेइं गलबात केरने लगगे, कि अगर अस ज़ोतम कि, स्वर्गेर तरफां थियो, त फिरी तैनी ज़ोनुए कि फिरी तुसेईं तैसेरू याकीन की नईं कियेरू? 26 पन अगर अस ज़ोतम कि, ‘इन्सानेरी तरफां थियो,’ त लोकां केरो भी डरे किजोकि लोक यूहन्ना

नबी मन्ते थियो।” 27 एल्हेरेलेइ, तैनेई यीशुए जुवाब दित्तो, “अस किछ न ज्ञानम।” तैनी भी तैन सेइं ज़ोवं, “अवं भी तुसन सेइं न जोईं कि अवं इन कम्मां कसेरे अधिकारे सेइं केरताई।” 28 पन तुस इस मिसालरे बारे मां कुन सोचतथ? केन्ची मैनेरां दूईं मट्टां थियां, तैनी बड्डे मट्टे कां गेइतां ज़ोवं, “अज़ दाछरी बागी मां गा ते कम केर।” 29 तैनी जुवाब दित्तो, “अवं न गेई।” पन बादे मां पशतेइतां चलो जेव। 30 फिरी बाजे होरि मट्टे कां भी गेइतां एन्ने ज़ोवं, तैनी जुवाब दित्तो, “अच्छा खरी गाताई।” पन जेव नन्ना। 31 “एन दुइने मरां केनि अपने बाजोरो हुक्म मनो?” तैनेई जुवाब दित्तो बड्डे हुक्म मनो, यीशुए तैन सेइं ज़ोवं, कि अवं तुसन सेइं सज़ जोताई, कि चुंगी घिन्ने बाले ते बदचलन कुआन्शां तुसन करां पेइले परमेशरेरें राज़ मां दाखल भोली। 32 अवं इन ज़ोताई, यूहन्ना बपतिस्मो देनेबाले तुसन ज़ोवं, कि धार्मिकतारी जिन्दगी केन्चरां ज़ीनीए पन तुसेईं तैसेरु विश्वास न कियो, पन चुंगी घिन्ने बाले ते बदचलन कुआन्शां तैसेरु विश्वास कियूं, एन हेरतां भी तुसेईं पापन करां मन न फिराव ते तैस पुइ विश्वास न कियो। 33 अक होरि मिसाल शुना, एककी ज़मीनदारो अक दाछरी बाग लाई ते तैसेरे चेत्रे पासन बाइ दित्तो, ते दाछारो रस कढनेरे लेइ अक हौवज़ बनावं, ते तैस बागरी हेग्मेश केरनेरे लेइ अक उच्चि कूडी बनाई ते फिरी ते काशत केरनेबालन ठेके पुइ देइतां कोन्च दूर प्रदेशे जो चलो जेव। 34 ज़ैखन दाछ टलोइनेरो मौको अव त तैनी अपनो हिस्सो नेनेरे लेइ अपने नौकर तैन ठेकेदारन कां भेजे। 35 ते ठेकेदारोइं तैसेरे नौकर कोई झूसो कुटो कोई मारो ते केन्ची जेई घोडेईं दित्ती। 36 फिरी तैनी होरे नौकर भेजे ज़ैना पेइलन करां जादे थिये, पन ठेकेदारोइं तैन सेइं भी तेरहो ज़ेरो सलूख कियो। 37 आखकार तैनी अपनू मट्टु तैन कां भेजू, ते सोचू कि मेरे मट्टेरो त लिहाज़ केरेले। 38 “पन ज़ैखन ठेकेदारोइं तैसेरु मट्टु लाव, त तैना एप्पू मांमेईं मुशोरो केरने लागे, कि एपजा एस सेवां मारमं ते एसेरी बागी पुइ कब्जो केरम।” 39 “तैखन तैनेई तैन मट्टु टलाव ते बागारे बेइर शेरी छुड्डु। 40 एल्हेरेलेइ ज़ैखन बागरो मालिक एप्पू एज्जेलो, त तैन ठेकेदारन सेइं केरो सलूख केरेलो?” 41 तैनेई जुवाब दित्तो, तै तैन बुरन, बुरे तरीके सेइं मैरतां बागरो ठेको होरि ठेकेदारन देलो, ज़ैना मौके पुइ तैसेरो हिस्सो तैस देन। 42 यीशुए तैन सेइं ज़ोवं, “तुसेईं पवित्रशास्त्रे मां कथे नईं पढेरु, ज़ै घोइ मिस्त्रेईं रद्दी कियोरो थियो, तैए कूनेरो घोइ भोलो, एन कम परमेशरे कियोरुए, ते इश्शी नज़री मां एन आजीब आए?” 43 एल्हेरेलेइ अवं तुसन सेइं जोताई, कि परमेशरेरु राज़ तुसन करां निव गालू, ते एरी कौमी कां दित्तू गालू ज़ै वक्ते पुइ तैस फल दे। 44 ते ज़ै कोई इस घोडे पुइ बिछड़ेलो त तैसेरे टुकड़े-टुकड़े भोइ गाले, पन ज़ै एस उन्डो बिछड़ेलो त तैस पइतां छेडेले। 45 प्रधान याजक ते फरीसी लोकेईं यीशुएरी ए मसाल शुन्तां सेमझी जे, कि यीशु एन गल्लां इश्शे बारे मां ज़ोने लोरोए। 46 तैनेई यीशु टलानो चाव, पन लोकन करां डरते थिये किजोकि तैना यीशु नबी मन्ते थियो।

22 यीशु फिरी मसाल देइतां ज़ोने लागो। 2 “स्वर्गरु राज़ एककी राज़ेरु ज़ेरुए, ज़ैनी अपने मट्टेरे इला बनाव। 3 ते अपने नौकर भेजे कि तैना लोकन ज़ैन जेई इलाएरी धाम बनोरी थी, तैन कुजान पन तैना न आए। 4 तैखन तैनी अपने नौकर एन जोइतां भेजे, कि ज़ैन जेई इलाएरी धाम बनेवरीए, तैन ज़ोथ, रोटी बनोरीए ते मीं बडे-बडे जानवर कट्टोरन, ते सब किछ तियार भोरुए, ते इलाएरी धामी मां शामल भोथ। 5 पन तैनेई ध्यान न दित्तू ते कोई परवाह न की, कोई अपने ऊडारे मां चलो जेव, ते कोई अपने कारोबारे मां लागो ते कोई कोरां चलो जेव। 6 किछेईं तैसेरे नौकर टलेइतां तैन तैना बेइज़त किये, ते जानां भी मैरी छुडे। 7 ज़ैखन राज़े एन शूनू त राज़े बडी सरक आई, ते तेनी अपनि फ़ोज भेजतां तैना कातली मैरी छुडे ते तैन केरां नगरां फुके। 8 तैखन तैनी अपने नौकरन सेइं ज़ोवं, इलाएरी धाम तियार आए, पन ज़ैन कुजोरे थिये तैन एस काबल नईं। 9 एल्हेरेलेइ तुस हर पासे गाथ ते ज़ेरे तुसन मैलतन, तैना सब इरां कुजाथ। 10 तैखन तैना नौकर चले जे ते हर पासे गेइतां ज़ेरे बुरे तैन मैल्ले, सब अकोडे इलाए मां आने

ते मेहमानेइं सेइं घर भरतां भोवं। 11 “ते राज़ो मेहमान सेइं मिलने अन्तर अव, त तैसेरी नज़र एककी मैन्हु पुइ पेईं ज़ै इलाए मां इलेरां लिगडां लेइतां न थियो ओरो।” 12 राज़े तैस पुच्छू, हे दोस्त, तू इलाएरे लिगडन मां की नईं ओरो? पन तैन किछ न ज़ोवं। 13 “एस गल्ल्ती पुइ राज़े अपने नौकरन सेइं ज़ोवं, एसेरे हथ पाव बेंधतां बेइर आंधरे मां छुटा ज़ेडी ए लेरां देंतो राए, ते दंत च़ापतो राए।” 14 किजोकि परमेशरे हमेशरे जिन्दगरे लेइ त बडे कुजोरेन पन चुनोरे थोडेना।” 15 तैखन फरीसी लोक तैदां चले जे, ते एप्पू मांमेईं मुशोरो केरने लगगे एस केन्चरे गल्लन मां फ़साम। 16 एल्हेरेलेइ तैनेई अपने किछ चले हेरोदेस राज़ेरे लोकन सेइं साथी यीशु कां भेजे, ते तैनेई ज़ोवं, “हे गुरु अस ज्ञानतम कि तू सच्चोस, ते परमेशरेरी बत सच्चैईं सेइं शिखालतस ते कोन्चेरी परवाह न केरस किजोकि तू मैन्हु केरु तुतर हेरतां गल्लां न केरस। 17 एल्हेरेलेइ असन ज़ो, तू कुन सोचतस? महाराजो ज़ो चुंगी देनी जेइजे की नईं?” 18 यीशु तैन केरि चाल सेमझतां ज़ोवं, “हे पाखंडी लोकव मीं किजो अज़मातथ? 19 ज़ै सिको चुंगरे लेइ देतथ तैस मीं हिराथ, तैनेई अक दीनार तैस कां आनो। 20 यीशुए तैन पुच्छू, इस पुइ कसेरी शकल ते कसेरु नवं लिखोरुए?” 21 तैनेई जुवाब दित्तो महाज़ेरु, तैखन तैनी तैन सेइं ज़ोवं, “ज़ैन महाराज़ेरुए तैन महाराज़े जो देथे, ते ज़ैन परमेशरेरुए ए तैन परमेशरे जो देथ।” 22 तैना एन शुन्तां हेरान रेइजे, ते तैस तैडी छेइतां चले जे। 23 तैसेसे दिहेडी किछ सदूकी लोक ज़ैना ज़ोते थिये कि मरनेरां बाद कोई ज़ीतो नईं भोनो, तैनेई तैस पुच्छू, 24 “हे गुरु मूसे ज़ोरुए कि, ‘अगर कोई मैन्हु बेओलाद मेरि गाए, त तैसेरो इला तैसेरी कुआन्शी सेइं इला बनाए ताके अपने इलाएरे लेइ औलाद पैदा केरे।’ 25 इश्शे इडी सत इला थिये, पेइले इला बनेइतां मेरि जेव, तैस औलाद न थी तैनी अपनि कुआन्श अपने इलाएरे लेइ छेडी दित्ती। 26 ए वजा आए तैसेरे दुइयोवं ते टलेइयोवं भी एन्चरे किडू बल्के सत्ते इलान सेइं एन्ने भोतू राऊं। 27 आखकार ते कुआन्श भी मेरि जेई। 28 हुनी ज़ो ते कुआन्श मुइदन मरां ज़ीते भोनेरे दिहाडे तैन सत्ते इलान मरां कसेरी कुआन्श भोली? किजोकि ते सेबभी केरि कुआन्श बनोरी थी।” 29 यीशुए तैन जुवाब दित्तो, “तुस न पवित्रशास्त्र ते न परमेशरेरी शक्ति ज्ञानथ, ते एस्से वजाई सेइं तुस टेपलोरेथ। 30 किजोकि ज़ीते भोनेरां पत्ती तैना इला न बनाले, पन तैना स्वर्गं मां परमेशरेरे स्वर्गदूतां केरे ज़ेरे भोनेन।” 31 “पन मुइदन मरां ज़ीते भोनेरे बारे मां कुन तुसेईं इन वचन नईं पढेरु ज़ैन परमेशर तुसन सेइं ज़ोवं, 32 ‘अवं अब्राहमेरो परमेशर, ते इसहाकेरो परमेशर ते याकूबेरो परमेशर आई?’ ते मुवोरां केरो नईं बल्के ज़ीतां केरो परमेशरे।” 33 लोक तैसेरी ए शिक्षा शुन्तां हेरान रेइजे। 34 ज़ैखन फरीसी लोकेईं एन शूनू कि तैनी सदूकी केरु आशी बंद कियोरुए, त तैना तैस कां सब अकोडे भोए। 35 तैन मरां अक शास्त्री तैस अज़मानेरे लेइ यीशुए पुच्छू। 36 “हे गुरु, मूसेरे कानूने मां सेबभन करां बड्डो हुक्म कौ आए?” 37 तैनी ज़ोवं, “तू परमेशरे अपने प्रभु सेइं अपने सारे दिले सेइं ते अपनि सैरी जानी सेइं ते अपनि सैरी अक्ली सेइं प्यार केरा। 38 सेबभन करां बड्डो ते खास हुक्म ईए। 39 एसेरो ज़ेरो ईए, ‘अपने पड़ोसी सेइं अपने बराबर प्यार केरा।’ 40 इन्ना दूईं हुक्म मूसेरे कानून ते नेबी केरो आधारे।” 41 ज़ैखन फरीसी लोक भी तैडी जम्हां भोइजेइ, त यीशुए तैन पुच्छू। 42 “मसीहेरे बारे मां तुश्शो कुन खियाले, कि तैन केसेरु मट्टूए?” तैनेई जुवाब दित्तो, “दाऊदेरु मट्टू।” 43 यीशुए तैन सेइं ज़ोवं, “फिरि दाऊद आत्माईं मां तैस जो प्रभु किजो ज़ोते?” 44 “प्रभुए मेरे प्रभु सेइं ज़ोवं, मेरे देइने पासे बिश ज़ां तगर अवं तेरे दुश्मन तेरे पावन हैठ न हले-नेई। 45 बरसा, अगर दाऊद तैस जो प्रभु ज़ोते त तैन तैसेरु मट्टु केन्चरे सेइं भोइ सकते?” 46 तैन मरां केन्चे भी एककी गल्लरो जुवाब न दीईं बटो। पन तैस वक्तेरे बाद फिरी कोन्ची तैस पुच्छनेरी हिम्मत न भोइ।

23 तैखन यीशुए बडे लोकन सेइं ते अपने चेलन सेइं एन ज़ोवं। 2 “शास्त्री ते फरीसी लोक मूसेरो कानून समझाने बालेन। 3 एल्हेरेलेइ ज़ैन किछ तैना तुसन ज़ोतन तैन तुस केरा ते मेन्ना, पन तैन केरां ज़ेरां कम्मां न केरा, किजोकि तैना ज़ोने त ज़ोतन पन केरन नन्ना। 4 तैना अपने मेज़ीं

सेई कानून बनातन जैना लोकां केरे लेइ मन्ने मुशकिल भोतन, पन एप्पु अपने कानूने मन्नेरी कोशिश भी न केरन। 5 तैना जैन किछ केरतन सिर्फ मैनु हिनारे लेइ केरतन, तैना अपने कुपाए ते पैखडुन पुइ पवित्रशास्त्रे वचन लिखतां बड्डे-बड्डे जन्त्रां केरे जेरे बन्धतन, ते अपने चोगन पुइ लम्मो गुच्छा लातन (ताके लोक समझन तैना बडे धर्मी आन)। 6 तैना धामन मां खास ठैरी बिशुन चातन, ते प्रार्थना घरे मां खास कुर्सन पुइ बिशुन चातन। 7 ते तैना चातन कि लोक तैनन जो बजारन मां नमस्कार जौन, ते तैनन जो गुरु जौन। 8 पन तुस अपने आपे जो गुरु न जुवेइयथ, किजोकि तुशुओ अक्के गुरु आप, ते तुस सब दूलां केरे जेरे बराबर आथ। 9 ते दुनियाई मां केन्ची जो (आत्मिक) बाजी न जोइयथ, किजोकि तुशुओ अक्के बाजी आप जै स्वर्ग मां आप। 10 ते न केन्ची जो मालिक जोइयथ किजोकि तुशुओ अक्के मालिके जै मसीह आप। 11 पन जै तुस मां बड्डो भोनु चाते, त तै तुशुओ सेवक बने। 12 ते जै कोई अपनो आप बड्डो बनानेरी कोशिश केरते, त तै निकडो बनाव गालो, ते जै कोई अपनो आप निकडो बनाते त तै बड्डो बनाव गालो। 13 तैखन यीशुए जोंव, “हे पाखंडी शास्त्री ते फरीसी लोकव, तुसन पुइ अफ्रसोस, किजोकि तुस स्वर्गे राज्जे मां लोकन दाखल भोने न देथ, किजोकि न तुस एप्पु दाखल भोथ, ते न होइन दाखल भोने देथ। 14 हे पाखंडी शास्त्री ते फरीसी लोकव तुस पुइ अफ्रसोस, तुस विधवा कुआन्थां केरे घरन लुटतथ, ते लोकन हिरानेरे लेइ लेम्मी-लेम्मी प्रार्थना केरतथ, तुसन जादे सजा मैलेली।” 15 “हे पाखंडी शास्त्री ते फरीसी लोकव, तुसन पुइ अफ्रसोस! तुस अक मैनुअ अपने धर्मां आन्नेरे लेइ बडे दूर-दूर गातथ, ते जैखन तै तुशुशी शिक्षा मन्ते त तैस एप्पु करां दुगानो नरके मां गानेरे काबल बनातथ।” (Geenna g1067) 16 “हे बत हिराने बाले कानाव, तुसन पुइ अफ्रसोस, कि तुस जौतथ कि अगर कोई मन्देरी कसम केरे त कोई हर्ज नई, पन अगर मन्देरे सोन्नेरी कसम केरे, त तैसेरी कसमारे पाबंद भोलो। 17 हे बेवकूफ ते कानाव, बड्डू कुन आप सोन्नु या मन्दर, जेसेरी वजाई सेई सोन्नु पवित्र समझू गाते?” 18 “तुस जौतथ कि अगर कोई बलिदान चाढ़नेरे ठारारी कसम केरे, त कोई हर्ज नई, पन चैदोरी चीजरी कसम केरे त तैसेरो पाबंद भोलो। 19 हे कानाव! बड्डू कुन आप, चाढ़ोरी चीज या बलिदान चाढ़नेरे ठार जेसेरी वजाई सेई चाढ़ोरी चीज पवित्र समझी गाचे? 20 अगर जै कोई बलिदान चाढ़नेरे ठारारी कसम केरते, त तै सेबभी चैदोरी चीजां केरि कसम केरते। 21 जै कोई मन्देरी कसम केरते त तै मन्देरे मां रानेबाले परमेशरेरी कसम केरते। 22 ते जै कोई स्वर्गी कसम केरते, ते परमेशरेरे तखतेरी ते तैस पुइ बिशाने बालेरी कसम केरते।” 23 “हे पाखंडी शास्त्री ते फरीसी लोकव, तुसन पुइ अफ्रसोस, तुस पुतनेरो ते सोंफेरो ते ज़ीरोरे दशोव हिस्सो त देतथ, पन मुरेरे कानूनेरी खास गल्लां जेन्चरे इन्साफ केरनो, दया केरनि ते ईमानदार भोनु शारोरूप, ज़रूरी थियू तुस एन भी केरते राथे ते तैन भी न शारेथे। 24 हे बत हिराने बाले कानाव! तुस मशथे त छानतथ पन सथो कूँट निगलतथ।” 25 “हे पाखंडी शास्त्री ते फरीसी लोकव, तुसन पुइ अफ्रसोस, तुस कटोरो ते कने थाली बेइरमेई खूब मांजतथ पन अन्त्रमेई लालच ते बे सबरीए भेरताए।” 26 “हे काने फरीसाव पेइले कटोरो ते थाली अन्त्रमेई मांजा, ते फिरी बेइरमेई भी साफ भोए।” 27 “हे पाखंडी शास्त्री ते फरीसी लोकव तुसन पुइ अफ्रसोस, तुस तैन कबां केरे जेरेथ जैन बेइरमेई त सफेदीए ते बेइं रोडी लेहीयोचन, पन अन्त्रमेई मुइदां केरि हड्डी ते सब किसमेरी गेन्दगी सेई भेरतन। 28 एन्चरे तुस बेइरमेई लोकन बडे धर्मी लेइयोतथ, पन अन्त्रमेई दुनियारे पाखंडे ते अधर्मां सेई भेरतथ।” 29 “हे पाखंडी शास्त्री ते फरीसी लोकव तुसन पुइ अफ्रसोस, किजोकि तुस नेबी केरे आसथान सजातथ ते धर्मी लोकां केरि कबां बनातथ। 30 ते जौतथ कि, ‘अगर अस अपने दादे-पड़दादां केरे जमाने मां भोथे त नेबन मारने मां तैन केरू साथ न देथे।’ 31 एन्चरे तुस एप्पु मन्तथ कि तुस नेबी केरे कल्ल केरनेबालां केरि औलादी मरां आथ। 32 हुनी तुस अपने दादे-पड़दादां केरे पापेरे घडो भरते राथ।” 33 “हे जहरीले सप्यां केरे जेरे बच्चाव! तुस नरकेरी सजाई करां केन्चरे बचलेते। (Geenna g1067) 34 एल्हेरेलेइ हेरा अवं नेबन ते

अक्लमन्दन ते शास्त्री लोकन तुसन कां भेजताई, तुस तैन मरां किछन कल्ल केरेले, ते किछन कूसे पुइ चाढ़ेले, ते किछन अपने प्रार्थना घरे मां कोइई सेई बाले, ते नगरे-नगरे मां तैन मारनेरे लेइ तैन पत्ती लगगोरे रावो। 35 एल्हेरेलेइ सारे धर्मी केरो कल्ल जै इस धेरती पुइ भोरोए, तैन केरि सजा तुसन पुइ एज्जे, धर्मी हाबिलेरे कल्ले करां लेइतां, ते बिरिक्याहरे मट्टे जकयारहे कल्ले तगर जै तुसेई मन्देरे ते बलिदान केरनेरे ठारारे मझाटे मन्देरे अंगने मां कल्ल कियोरो थियो। 36 अवं तुसन सेई सच जौताई कि इस जमानेरे लोकन एना सैरी गल्लां केरे सजा मैलनी।” 37 फिरी यीशुए जोंव, “हे यरूशलेम नगरेरे लोकव, हे यरूशलेम नगरेरे लोकव, तुसेई केत्रे नबी कल्ल किये जैना बडे पेइले तुसन कां आप, ते जैना तुसन कां भेजे तुसेई तैन घोडेई बेई, मीं बडे बार सोचू कि तेरे बच्चन अकोट्टे केरि जेन्चरे कुकडी अपने बच्चन अपने फंगन हैठ रखचे पन तुस राजी न भोए। 38 हेरा तुशु घर तुशु लेइ बेरान भोइ गाते। 39 किजोकि अवं तुसन सेई सच जौताई, कि तुस मीं हुन्ना करां तैस दिहाइ तगर कथे न लेई सकेले, जांतगर मेरे बारे मां इन न जौले, ‘तैसेरी तारीफ भोए जै प्रभुएरे अधिकारे सेई एइते।”

24 जैखन यीशु मन्देरे मरां निस्तां ज़लरोरे थियो, ते तैसेरे चले तैस कां आप, ताके तैस मन्देरे रोडे-रोडे भवन हिरान। 2 तैनी तैन सेई जोंव, “कुन तुस एन सब किछ हेरने लोरेथ? अवं तुसन सेई सच जौताई कि इडी कोई घोडे पुइ घोड बाकी न रालो, जै बछोइ न गालो।” 3 जैखन तै जैतून पहाडे पुइ बिशोरो थियो, त तैसेरे चले अलग जेरे तैस कां एइतां तैस सेई जौने लगगे, “असन जौ कि एन गल्लां केइस भोनिन? ते तेरे एजनेरो ते दुनियारो अन्त भोनेरो कुन निशान भोनेए?” (aiōn g165) 4 यीशुए तैन जुवाब दितो, “खबरदार राथ, कोई तुसन न टपलाए! 5 किजोकि बडे मेरे नन्वे सेई एजनेन ते तैनेई जौनूए कि, ‘अवं मसीह आई,’ ते तैनेई बडे लोक टपलानेन। 6 तुस लड़ाई ते लड़ेई केरि अफवाह शुनेले, खबरदार डेरथ नन्ना, किजोकि एन गल्लां ज़रूरी भोनिन, पन तैस वक्ते खातमां नई भोनी। 7 किजोकि कौमी पुइ कौम, ते राज्जे पुइ राज्ज चढ़हाई केरेलू, ते ठारी-ठारी काल पेलो, ते भुंजल एज्जेलो। 8 मुसीबतां केरि शुरुआत भी एन्ने गल्लेई सेई भोनीए। 9 तेखन जैना तुशु खलाफन तैना तुसन टलेइतां बडी सखत सजा देले, ते कल्ल केरेले, ते मीं पुइ विश्वास केरनेरे वजाई सेई, सैरी कौमां केरे लोक तुसन सेई बैर रखेले। 10 तैखन बडे लोक मीं पुइ विश्वास केरनो शारले, एक्की होरि ट्लुवाले, ते एप्पु मामेई भी बैर रखेले। 11 ते बडे झूठे नबी दुनियाई मां निसनेन ते बडे लोक टपलानेन। 12 अधर्मां बधने सेई बडे लोक एप्पु मामेई प्यार केरनो शारले। 13 पन जै कोई आखरी दम्मं तगर मीं पुइ विश्वास केरेलो, त तैस्से मुक्ति मैलनीए। 14 ते परमेशरेरे राज्जेरी ई खुशखबरी दुनियारे हर पासे शुनाई गाली, ताके सैरी कौमां केरे लोकन मौको मैले कि तैना इस कबूल केरन, तैखन दुनियारो खातमां भोलो।” 15 “जैखन तुस तैस उज्जाने बाली भिटी चीजी, जेसेरे बारे मां दानिय्येल नेबे जोरू थियू, पवित्र ठैरी खडी लाएले, (ते पढ़नेबालो भी समझे)। 16 कि जैना तैस मौके यहूदिया इलाके मां भोले तैना पहाड़न पुइ जो नश्शन। 17 ते जैना लाए पुइ भोन त तैना कोई चीज नेने अन्तर न एजान। 18 ते जै मैनु ऊडारे मां भोलो, त तै लिगाडां नेने अन्तर न एज्जे।” 19 तैन दिहाड़न मां जैना दोजीती त दुइ पिपाती कुआन्था भोली, तैन केरे लेइ अफ्रसोसी 20 “ते प्रार्थना केरा कि तुसन हिनटडे या आरामेरी दिहाडी नश्शन न पे। 21 किजोकि तेइस एत्री बड्डी मुसीबत भोली, जेरी दुनियारे शुरू करां अज तगर नई ओरी, ते न कधी एज्जेली। 22 अगर तैन दिहाडां केरि तैथात घटेवरी न भोथी, त कोई प्राणी न थियो बजानो, पन चुनोरां केरे लेइ तैना दिहाडे घटेवरेन। 23 अगर कोई तुसन सेई जौए कि, ‘तक्का, मसीह इडी आए! या उडी आए!’ त तुस विश्वास न केरथ।” 24 “किजोकि झूठे मसीह ते झूठे नबी दुनियाई मां निसनेन, ते तैनेई निशान ते बडे-बडे चमत्कार हिरानेन, ते भोइसखे त चुनोरे लोक भी टपलानेन। 25 हेरा, मीं तुसन सैरी गल्लां भोनेरे पेइले जौरिन। 26 अगर कोई तुसन सेई जौए कि, ‘हेरा तै जंगले मांए,’ त तुस बेइर न गेइयथ; ‘हेरा, तै घरे

मां,' त तुस विश्वास न केरथ।" 27 "किजोकि जेन्नेर बिजली पूर्वरां, पछमं तगर चमकतीए एन्चरे मैनेरू मट्टू भी एज्जली।" 28 "जैडी जिंगम भोते तैडी इल्लां जम्हां भोजन।" 29 "तैन दिहाइना बाद दिहाइने कालो भोज गालो, त चाँदनी लौ न देली, त कने अम्बरेरां तारे बिछडने लगगेले, त अम्बरेरी सैरी शेक्ति हिलेइ गेली। 30 तैखन मैनेरे मट्टेरो निशान अम्बरे मां लेइहोनाए, ते दुनियारी सैरी कौमां छाती पिट्टेली, ते मैनेरू मट्टू अम्बरे मरां बिदलारी पुड बेडि शेक्ति ते महिमा सेइं एइते लाएले। 31 ते तै अपने स्वर्गदूत ते नडशिगैरी बडी आवाजी सेइं साथी भेजेले, ते तैसेरे चुनारे लोकन चेन्ने पासन अम्बरेरे एक्की पासेरां होरि पासे तगर सेरुभन जम्हां केरेले।" 32 "फेगरे बुटे करां ई सबक शिखा, जेरे तैसेरे डाल नर्म भोतन ते पट्लां निसतन त तुस बुझतथ कि गेमेरो मौसम एजनेबालो आए। 33 एसेरो जेरो, जैखन तुस एना गल्लां, जैना मीं जोई, भोते हेरेले, त तुस बुझ्जी छुट्टा कि मैनेरू मट्टू, यानी अवं बडे नेडे पुज्जोरोई। 34 अवं तुसन सेइं सच जोताई, कि जां तगर एन सब किछ पूरू न भोए, तांतगर एस पीडरो खतमों न भोलो। 35 अम्बर ते धरती टेली गाली पन मेरी गल्लां कथे न टेलेली।" 36 "भरे वापस एजनेरे दिहाइने बारे मां, या तैस वक्तेरे बारे मां कोई भी न जाने कि तै कताली भोली, स्वर्गेर स्वर्गदूते भी न ज्ञानन त कने परमेशरेरू मट्टू यानी अवं भी न जैनी, पन सिर्फ मेरो बाजी परमेशर ज्ञानते। 37 जेन्नेरे नूहेरे ज्ञानाने मां भोरू थियू, तेन्चरे मैनेरे मट्टेरे एजनेरे वक्ते भोनाए। 38 किजोकि तूफान एजने करां पेडले भी लोक खाते पीते थिये, ते डुला भी बनाते थिये, ते नूहेरे किशती मां गाने तगर एन सब किछ भोतू राऊं। 39 तैन पतो भी न थियो कि कुन भोने बालूए, इडी तगर कि तूफान अवं ते तैनी सब किछ रुडेइतां नेव, ते मैनेरे मट्टेरू यानी मेरू एजनु भी एरू भोनाए। 40 तैखन ऊडारे मां दूई मैनु कम करते भोले ते अक नीयो गालो, ते दुइयोवं तैडी रालो। 41 ते दूई कुआन्शां दूलाट पिती भोली त अक नी गाली ते होरि तैडी राली। 42 तुस बींझे राथ किजोकि तुस न ज्ञानथ कि तुश्रो प्रभु केइस एजनाए। 43 पन याद रखा, अगर घरेरे मालिके पतो भोए कि चोर कताली एजना, त तै बींझे बिशेथो ते अपने घरे चोरी न भोने देथो। 44 एल्हेरेलेइ तुस भी तियार राथ, किजोकि जैखन तुसन शक भी नई भोनी त मैनेरू मट्टू यानी अवं एज्जी गानोई।" 45 "ईमानदार ते अक्लमन्द नौकर तैसेरो जेरोए, जेसेरो मालिक तैस अपने नौकरन पुड पुछुनो गन्ने रखे ताके तै तैन मौके पुड रोटी दे, ते फिरी दूर सफरे पुड गाए।" 46 "तै नौकर धने जेसेरो मालिक एइतां तैस करां एरू जेरू केरतो लाए।" 47 अवं तुसन सेइं सच जोताई कि तै मालिक अपने घरेरो सारो अधिकार तैसेरे सुपुई केरेलो। 48 "पन अगर ते बुरो नौकर अपने दिले मां एन जोए कि मेरे मालिकेरे एजने हेजू बडू चिरे। 49 ते अपने सैथन मारने कुटने ते शैरपण सेइं खाए ते पीए। 50 त तेसेरो मालिक कोस्कोई एरी दिहेई एज्जे जेइस तैस नौकरे उमीदे न भोए, ते तैसेरो मालिक वापस एज्जी गाए। 51 ते मालिक तैस पक्की सजा देलो, ते तैसेरो हिस्सो पाखंडी लोकन सेइं साथी भोलो, जैडी लेरां देनी ते दंत च्वापने भोले।"

25 तैखन यीशुए अपने चेलन सेइं जोवं, जैखन मैनेरू मट्टू यानी अवं वापस एज्जेलो तैस मौके स्वर्गरू राज तैन दश अड्लैई कुइयां केरू जेरू भोलू, जैना अपनि मिसालां बैलतां लाडे सेइं मिलनेरे लेइ निरसी। 2 तैन मां पंच बेवकूफ थी, पन पंच अक्लमन्द थी। 3 जैना बेवकूफ थी तैनेई मिसालां त नी, पन होरो तेल साथी न नीयो। 4 "पन जैना अक्लमन्द थी तैनेई मिसालां केरे अलावा कुप्पन मां होरो तेल भी साथी नीयो।" 5 लाडो एजने चिरे लग्गू, ते तैना सब बलगते-बलगते डिगरी लेइ देने, ते झुल्ली जेई। 6 "अध्दी रात भोज त शौर मची कि लाडो ओरोए, ते तैस सेइं मिलनेरे लेइ एज्जा। 7 तैखन सैरी अड्लैई कुइयां बींझी, ते अपनि-अपनि मिसालां ठीक केरने लेगि। 8 बेवकूफ कुइयेई अक्लमन्द अड्लैई कुइयन सेइं जोवं, 'अपने तेले मरां थोडो जेरो तेल असन भी देथ, किजोकि इशरी मिसालां हिशशने लोरिन।' 9 पन अक्लमन्देई जुवाब दितो, 'असन कां एत्रो तेल नई, कि इशशे लेइ ते तुशशे लेइ पूरो भोए, तुस एरू केरा कि बेचनेबालन करां आनां।' 10

जैखन तैना तेल घिन्ने चेलोरि थी त तैत्रे मां लाडो पुजी जेव, ते जैना तियार थी, तैना लाडे सेइं साथी अन्तर डुलाएरे घरे मां चेलि जेई, ते दार बंद केरतां छू। 11 बादे मां तैना होरि अड्लैई कुइयां भी वापस पुजी ते लाडे जो जोने लेगि, 'प्रभु! प्रभु!' इशशे लेइ दार खोल्ले। 12 पन तैनी जुवाब दितो, 'अवं तुसन सेइं सच जोताई, अवं तुसन न जैनी।' 13 एल्हेरेलेइ खबरदार राथ, किजोकि तुस मेरे वापस एजनेरे दिहाइने बारे मां न ज्ञानथ।" 14 जैखन मैनेरू मट्टू यानी अवं वापस एज्जेलो त स्वर्गरू राज तैस मैनेरो जेरू भोनाए, जै दूर मुलखे जेव, तैनी अपने नौकर कुजाए ते सारी दौलत तैन दित्ती, ते तैन जोवं एस दौलती सेइं होरि भी कमाई केरा। 15 "तैनी एक्की पंच तोडे दित्ते होरि दूई तोडे दित्ते, ते एक्की अक्के तोडो दित्तो, हर एक्की तैसेरे काबलीतेरे मुताबिक दित्ते, ते एप्पू होरि मुलखे जो चलो जेव।" 16 जैस नौकरे पंच तोडे मैलोरे थिये, तैनी गेइतां कारोबार केरतां पंच तोडे होरे कमाए। 17 एन्चरे जैस नौकरे दूई तोडे मैल्लोरे, तैनी दूई होरे कमाए। 18 पन जैस नौकरे अक तोडो मैल्लोरे थियो, तैनी मित्ती घेइतां मालिकेरी रकम छुपेइतां छुडी। 19 बडे चिरेरां पत्ती तैसेरो मालिक वापस अवं, ते नौकरन सेइं हिसाब केरने लगो कि तैनेई तैन तोडां केरू कुन कियू। 20 "जैस नौकरे पंच तोडे मैल्लोरे थिये, तैनी गेइतां पंच होरे तोडे हाज़र कमाए ते जोने लगो, 'हे मालिक तीं पंच तोडे दित्तोरे, ते हेर मीं पंच तोडे होरे कमाए।' 21 मालिके तैस सेइं जोवं, 'शाबाश ईमानदार नौकरा तीं थोडी जेरि रकमी पुड इमानदेरी सेइं कम कमाव, अवं तीं बेडि चीजां केरो मुखियार बनालो, ते अपने मालिकेरी खुशी मां शामिल भो।" 22 ते जैस दूई तोडे मैल्लोरे थिये, तै भी अवं ते जोने लगो, 'हे मालिक तीं मीं दूई तोडे दित्तोरे थिये, ते हेर मीं दूई तोडे होरे कमाए।' 23 मालिके तैस सेइं जोवं, 'शाबाश ईमानदार नौकरा तीं थोडी जेरि रकमी पुड इमानदेरी सेइं कम कमाव, अवं तीं बेडि चीजां केरो मुखियार बनालो, ते अपने मालिकेरी खुशी मां शामिल भो।" 24 ते जैस अक तोडो मैल्लोरे थियो, त तै भी हाज़र भोव ते जोने लगो, 'हे मालिक अवं ज्ञानतो थियो तू बडो सखत मैनु आस, तू तैस मैनेरो जेरोस जैनी ऊडारे मां फसल नई बेवरी ते तै तैदां फसल कटते।" 25 एल्हेरेलेइ अवं डरो कि अगर अवं तेरी दौलत हिरेइलो त तू मीं सजा देलो, तांए तेरी दौलत मां ज़मीनी मां देबतां छुडी, हेर, 'तेरी दौलत ई आए।" 26 तैसेरे मालिके जुवाब दितो, हे दुष्ट ते निकम्मे नौकरा अगर तीं पतो थियो, कि अवं तैस मैनेरो जेरोई जैनी जैस ऊडारे मां नई बेवरू त तैदां कटते। 27 त तै पनी लोडू थियू कियोरू, कि मेरी दौलत शौकारां केरे हवाले केरस, तैखन अवं वापस एइतां अपनि दौलत सूते समेत उसुल केरेथो। 28 हुनी एन केरा कि एस करां ते तोडो नेइतां तैस देइस जैस कां दश तोडेन। 29 एल्हेरेलेइ जैस कां परमेशेरी मर्जी समझनेरी इच्छा आए, तैस परमेशर जादे समझ देलो। पन जैस कां परमेशेरी मर्जी समझनेरी इच्छा नई, तैस केरां, थोडी जेरि समझ जै तैस कां आए, तै भी नी गाली। 30 ते एस निकम्मे नौकरे आंधरे मां छुट्टा, जैडी ए लेरां देतो ते दंत च्वापतो राए। 31 जैखन मैनेरू मट्टू यानी अवं, अपने महिमा मां अपने स्वर्गदूतन सेइं साथी एज्जेलो त अपने महिमाते तखते पुड बिश्तां लोकन पुड राज केरेलो। 32 सैरी कौमां मीं कां अकोट्टी भोली, ते धर्मी लोक बुरे लोकन करां अलग किये गानेन, जेन्नेर पुहाल भैट्टन, छेल्लन मरां अलग केरते। 33 ते अवं धर्मी लोकन सेइं जैना मेरे देइने पासे भोले, ते बुरे लोकन जैना मेरे बांए पासे भोले। 34 तैखन राजो यानी अवं अपने देइने पासेरे लोकन सेइं जोलो, "एज्जा मेरे बाजेरे धन लोकव इन राज, जैन दुनियारे शुरु मां तुशशे लेइ तियार कियोरू। 35 किजोकि अंन नियन्नी थियो, ते तुसेई मीं रोटी खुवाई, अवं दलिशोरो थियो, ते तुसेई मीं पानी पियावं अवं परदेशी थियो, ते तुसेई अवं अपने घरे मां कुजाव। 36 अवं नगो थियो, ते तुसेई मीं लिगडां दित्तां, ते अवं बिमार थियो, ते तुसेई मेरी हेरगेश की अवं कैद थियो, ते तुस मीं मिलने आए।" 37 तैखन तैना धर्मी मैनु जोलो, "हे प्रभु असेई कैखन तू नियन्नी लाव, ते असेई तीं रोटी खुवाई या तू दलिशोरो थियो, ते असेई तीं पानी पियावं।" 38 असेई कैखन परदेशी समझतां तू अपने घरे मां रख्खो, या तू नगो थियो, ते असेई तीं लिगडां दित्तां? 39 ते अस कताली तीं बिमार या

कैद लेइतां तीं सेइं मिलने आए? 40 तैखन राज़ो यानी अवं जुवाब देलो, “कि अवं तुसन सेइं सच्च जोताई कि ज़ैखन तुसेईं इन लोकन सेइं ज़ेनेईं मीं पुड़ विश्वास कियो एक्की सेइं भी एरो बताव कियो त एन बुझा कि एन तुसेईं मीं सेइं कियूं।” 41 तैखन तै बाएं पासे बालन सेइं ज़ोलो, “हे लानती लोकव मेरे तुत्तरे अगारां तैस हमेशारी बैलती अगगी मांजो गाथ, ज़ै परमशेरे, शैतान त कने शैतानेरे दूतां केरे लेइ तियार कियोरीए। (aiōnios g166) 42 एह्लेरेलेइ ज़ैखन अवं नियन्नो थियो, ते तुसेईं मीं रोटी न खुवाई अवं दल्लिशोरो थियो, ते तुसेईं मीं पानी न पियावं। 43 अवं परदेशी थियो, ते तुसेईं अवं अपने घरे मां न रख्यो, अवं नगो थियो, ते तुसेईं मीं लिगड़ां न दितां, ते अवं बिमार ते कैद थियो, ते तुस मीं सेइं मिलने न आए।” 44 तैखन तैना लोक भी ज़ोले, “हे प्रभु असेईं कताली तू नियन्नो या ते दल्लिशोरो या परदेशी ते नगो या बिमार या कैद लाव ते असेईं तेरी सेवा न की?” 45 तैखन अवं अपने बाएं पासेरे लोकन जुवाब देलो, “अवं तुसन सेइं सच्च जोताई कि ज़ैखन तुसेईं मेरे इन निकड़े करां निकड़े लोकन पुड़ ज़ैना मीं पुड़ विश्वास केरतन एक्की सेइं भी एरो ज़ेरो बताव कियो त एन बुझा कि एन मींए सेइं कियूं। 46 एह्लेरेलेइ एन लोकन हमेशारे लेइ सज़ा भोली, पन धर्मी लोकन हमेशारी ज़िन्दगी मैलेली।” (aiōnios g166)

26 ज़ैखन यीशुए एन गल्लां की, त तै अपने चेलन सेइं ज़ोने लगे। 2 “तुसन पत्तोए कि दूई दिहैइना बाद फ़सह तिहारे, ते मैनेरू मट्टू कूसे पुड़ चाढ़नेरे लेइ दल्लुवाव गाए।” 3 तैखन प्रधान याजक ते कौमरे बुजुर्ग कैफा महायाजकेरे अंगने मां अकोट्टे भोए। 4 ते तैनेईं सल्लाह की, कि यीशु धोखे सेइं दलेइतां मेरी छडम। 5 पन तैना जोते थी, कि फ़सह तिहारेरे मौके पुड़ नई, एरू न भोए कि लोक हंगामो केरन। 6 तैस मौके यीशु बैतनिय्याह डलवें मां शमौन कोट्टेरो घरे मां थियो। 7 ते अक कुआन्श शंखमरमरी भांडे मां इत्र घिन्तां यीशु कां आई, तैखन तै रोटी खानेरे लेइ बिशोरो थियो, त तैसेरे दोगे पुड़ तै इत्र उलटाव। 8 चले एन लेइतां बड़े नाराज़ भोए तै ज़ोने लगे, “कि ए किजो बराबर कियो?” 9 अगए ए बेजोरो भोथो, त बड़ी कीमत मैलनी थी, जै गरीबन बेन्टां देथे। 10 यीशुए एन शुन्तां तैन सेइं ज़ोवं, “तुस एस कुआन्शी किजो तंग केरने लोरेथ? एसां त मीं सेइं रोड़ कियोरूए। 11 गरीब त हमेशा तुसन सेइं साथी भोनेन, पन अवं तुसन सेइं साथी हमेशा नई भोनो। 12 तैसां मेरी जानी पुड़ ज़ै ई इत्र उलटावरोए, तैसां मेरे दबनेरे लेइ कियोरू। 13 अवं तुसन सेइं सच्च जोताई, कि सैरी दुनियाई मां ज़ैडी भी खुशखबरी शुनाई गाली, तैडी तैसेरी यादगैरी मां एस गल्लेरे बारे मां भी ज़ोवं गालू।” 14 फिरी 12 चेलन मरां अक ज़ेसुरू नवं यहूदा इस्करियोती थियूं, प्रधान याजकन कां जेव ते ज़ोवं। 15 “अगर अवं यीशु तुसन दल्लुवेईं, त तुस मीं कुन देले? तैनेईं तैस दलाही चँदरे सिके दित्ते। 16 ते तै तेइसेरो तै ठीक मौके बलगने लगे कि यीशु केन्चरे सेइं दल्लुवाए।” 17 “अखमीरी रोट्टेरे तिहारेरी पेइली दिहाड़ी चले यीशु कां एइतां पुच्छने लगे कि, तू फ़सह तिहारेरी रोटी कोइ खानी चातस, ताके अस गेइतां तियारी केरम?” 18 तैनी ज़ोवं, “नगर मां अक फलानो मैनुए, ते तुस तैस कां गाथ ते तैस जोथ, कि गुरु ज़ोने लगगोरुए, मेरो वक्त नेइ पुजोरोए ते अवं अपने चेलन सेइं साथी फ़सह तेरे घरे मां मनेइलू।” 19 बससा ज़ेरो यीशुए अपने चेलन हुक्म दित्तोरो थियो, तैनेईं तेन्चरे फ़सह तिहारेरी रोटी तियारी की। 20 ज़ैखन डलोइ़ भोइ त यीशु 12 चेलन सेइं साथी रोटी खाने बिशो। 21 ते रोटी खांते बार यीशुए तैन सेइं ज़ोवं, “अवं तुसन सेइं सच्च जोताई कि तुसन मरां अक मीं दल्लुवालो।” 22 “एन शुन्तां तैना सारे चले उदास भोए, तैना बैरी-बैरी सेइं तैस पुच्छने लगे, हे प्रभु कुन अवं त नई?” 23 तैनी जुवाब दित्तो, “ज़ैनी मीं सेइं साथी थैली मां हथ छडोरोए, तै मीं दल्लुवालो। 24 मैनेरे मट्टेरे लेइ त ज़ेरू तैसेरे बारे मां लिखोरू तैस सेइं तेरहु कियूं गाते, पन अफ़सोस तैस मैनु पुड़ ज़ेसेरी वजाई सेइं तैन दल्लुवाव जेव, तैसेरेलेइ एन्ने रोड़ थियूं कि ते ज़मोरो न भोथो। 25 तैखन दल्लुवानेबालो यहूदा ज़ोने लगे, हे गुरु अवं त नई? तैनी तैस सेइं ज़ोवं, तीं एप्पू ज़ोवं।” 26 खांते बार यीशुए रोटी दल्लाती,

ते बरकत मेगातां दलोडी, ते चेलन कां देइतां ज़ोवं यांथ खाथ ई मेरी जाने। 27 फिरी यीशुए दाछेरे रसेरो कटोरो दलातो, ते परमेशेरेरू शुक्र केरतां चेलन कां दित्तो ते ज़ोवं, “यांथ तुस सब इस मरां पीया। 28 किजोकि ई मेरे नव्वे करारे मां मेरो तै खूने ज़ै बांके केरे पापां केरि मैफारे लेइ दित्तो गाते। 29 अवं तुसन सेइं ज़ोताई, कि अवं दाछारो ई रस फिरी कथे न पियेयो ज़ां तगर परमेशेरेरे राज़े मां तुसन सेइं साथी नव्वो न पीं।” 30 तैल्ला पत्ती, यीशु त कने तैसेरे चले परमेशेरेरू भजन जोइतां, यरूशलम नगरेरे बेइर ज़ैतून नव्वेरे पहैडी पुड़ चली जे। 31 तैखन यीशुए तैन सेइं ज़ोवं, “तुस अजे राती मेरी वजाई सेइं ठोकर खाले, किजोकि लिखोरूए, ‘अवं पुहाले मारेलो ते धनेरी भैडूं तितर-बितर भोली।’ 32 पन अवं ज़ीतो भोइतां तुसन करां पेइले गलील इलाके मां गेइलो।” 33 पतरसे तैस सेइं ज़ोवं, “अगर सारे तेरी वजाई सेइं ठोकर खान त खान, पन अवं तेरे बारे मां कथी ठोकर न खेइलो।” 34 यीशुए तैस सेइं ज़ोवं, “अवं तुसन सेइं सच्च जोताई कि अज राती कुकड़ बांग देने करां पेइले तू मेरो दलाई बार इन्कार केरेलो।” 35 पन पतरसे ज़ोवं, “अगर तीं साथी मीं मरनू भी पे, त तांभी अवं तेरो इन्कार न केरेलो ते सैरी चलेई भी एन्ने ज़ोवं।” 36 तैखन यीशु अपने चेलन सेइं साथी एक्की ठैरी पुजो, जैस ठारारू नवं गतसमनी थियूं, ते तै अपने चेलन सेइं ज़ोने लगे, तुस इडी बिश्शा, ते तांतगर अवं उडी अगर गेइतां प्रार्थना केरताई। 37 तैनी पतरस ते जेब्दरां दुइये मट्टां साथी नियां, ते तैडी ते बड़े परेशान भोने त कने घरबाने लगे। 38 फिरी यीशु तैन सेइं, इस दुखेरे वजाई सेइं मेरे प्राण निसने लोरेन इडी बिश्शारे राथ ते बाँजे राथ। 39 फिरी थोडो ज़ेरे अगर गेइतां तल्ले मां मथ्यो टेकतां खिरको ते प्रार्थना की, “हे बाजी अगर भोइसखे त ई कटोरो मीं करां टेली गाए, फिरी भी ज़ैन अवं चाताई तैन नई बल्के ज़ैन तू चातस तैने भोए।” 40 फिरी तै चेलन कां वापस अवं ते तैना झुलोरे लाए, ते तैने पतरसे सेइं ज़ोवं, “कुन तुस अक घड़ी भी मीं सेइं साथी बाँजे न बिश्शी सके?” 41 बाँजे बिश्शा ते प्रार्थना केरते राथ ताके तुस अज़मैइशी मां न राथ, आत्मा त तियारे पन जान कमजोरे। 42 यीशुए फिरी जेव, ते ई प्रार्थना की, “हे मेरे बाजी ई दुखेरो कटोरो मेरे पीने बगैर टेली न सखे, त तेरी मर्जी पूरी भोए।” 43 तैखन तै चेलन कां एइतां तैना फिरी झुलोरे लाए, किजोकि तैन केरि एछछी आँडले सेइं गिरकी भोरी थी। 44 तै तैन तैडी छेइतां चलो जेव, ते फिरी तैए प्रार्थना केरने लगे ज़ै पेइली कियोरी थी। 45 तैसेरां बाद तै चेलन कां वापस अवं, ते तैन सेइं ज़ोने लगे, “हुनी झुलोरे राथ ते आराम केरा, हेरा ते मौको नेइ पुजोरोए, ते मैनेरू मट्टू पापी लोकां केरे हवाले कियूं गाते। 46 उठा, चलमा। हेरा! मीं दल्लुवानेबालो नेइ पुज्जी जोरोए।” 47 ते एना गल्लां ज़ोने लोरो थियो, त यहूदा ज़ै 12 चेलन मरां थियो तैडी पुजो, तैस सेइं साथी बड़े मैनु थिये ज़ैना तलवारां ते लड्डां घिन्तां ओरे थिये तैना प्रधान याजकन ते कौमरे बुजुर्ग लोकेई भेजोरे थिये। 48 तैसेरे दल्लुवाने बाले तैन ई निशान दित्तोरो थियो, कि ज़ैस अवं फुम्मडी देइलो त तैए, ते तुस तैस दलेइयथ। 49 ते तैखन यहूदा, यीशु कां एइतां ज़ोवं, हे गुरु नमस्कार, ते एइतां तैस फुम्मडी दित्ती। 50 यीशुए तैस सेइं ज़ोवं, हे मेरे दोस्ता ज़ैस कम्मरे लेइ तू ओरोस तैन कम केर, तैखन लोकेई एगरोइतां यीशु पुड़ हथ रखे ते दलाव। 51 यीशुएरे सैथन मरां एक्के अपनि तलवार कडी, ते महायाजकेरे नौकरे पुड़ बाई ते तैसेरो कन्न कटो। 52 तैखन यीशुए तैस जो ज़ोवं, तलवारी मियाने मां रख किजोकि ज़ैना तलवार चलातन तैना तलवारी सेइं मारे गाले। 53 “कुन तू न ज़ानस अवं अपने बाजी करां मिनत केरि सकताई ते हुना स्वर्गदूतां केरि 12 फौवजां बल्के तैस करां भी जादे भेजते। 54 पन फिरी तैना पवित्रशास्त्रेरी गल्लां केन्चरे पूरी भोनिन ज़ैन केरू पूरू भोनू ज़रूरीए?” 55 तैखन यीशुए तैन हछे लोकन सेइं ज़ोवं, “अवं कुन कौई डैकू आई ते तुस मींजो डांग सोटे ते तलवारां दलेइतां मीं दल्लाने ओरेथ? अवं त रोज़ मन्देरे मां बिश्तां शिक्षा देतो थियो ते तैखन तुसेईं अवं नई दलातोरो? 56 पन एन सब किछ एह्लेरेलेइ भोवं, कि पवित्र बचने मां नेबी केरि लिखोरी गल्लां पूरी भोन, तैखन सारे चले तैस तैडी छेइतां चले जे।” 57 ते यीशु दल्लानेबाले तैस महायाजक कैफा कां घिन्तां जे, ज़ैडी तैना शास्त्री ते बुजुर्ग अकोट्टे भोरे

थियो। 58 ते पतरस भी दूरेरां देतो पत्पती तैस महायाजकेरे अंगनेर तगर जेव, ते तैडी पेहेदारन सेई साथी बिशतां यीशुएरो अन्त लोरो थियो हेरने कि कुन केरतान। 59 प्रधान याजक ते कने सारी महासभा यीशुएरे खलाफ गवाही तोपनेरी कोशिश केरि राओरे थिये, कि जैस सेई यीशु कल्ल कियो गाए। 60 पन कोई गवाह न मैल्लो, हालांकी बडे झूठे गवाह भी पैश भोए, आखकार दूई गवाह पैश भोए। 61 ते जोने लगगे, एनी जोरू कि “अवं परमेशेरू घर डोलतां ट्लेइ दिहाइन मां फिरी खडू केरि सकताई।” 62 तैखन महायाजक खडो भोइतां यीशु पुच्छने लगगे, “कुन तू कोई जुवाब न देस, इना लोक तेरे खलाफ कुन गवाही देतन?” 63 पन यीशु चुप राव, “तैखन महायाजक फिरी पुच्छने लगगे, तीं ज़ीते परमेशेरुी कसम भोए कि असन ज़ो, कि तू परमेशेरू मट्टू मसीह आस? 64 यीशुए जुवाब दित्तो, तीं एप्पू जोई छडू ते हुनी अवं भी ज़ीताई कि अज़रेरे बाद तुस मैनेरे मट्टे परमेशेरुे देइने पासे बिशोरे लाएले, ते अम्बरे पुइ बिदलारी मां एइते लाएले।” 65 तैखन महायाजके अपना लिगडां छिंदा, ते जोने लगगे, एनी परमेशेरुी तुहीन कियोरीए हुनी असन केन्ची गवाहेरी ज़रूरत नई, तुसेई हुन्ना एसेरू झूठ शुनेरूए। 66 तुशुथी कुन राईए? तैनेई जुवाब दित्तो ए कतलेरे काबल आए? 67 तैखन तैनेई तैसेरे तुत्तरे पुइ थुक ते तैस घुसेई ते होरेई थप्पइ मैरतां ज़ोवं। 68 “हे मसिह अगर तू नबी आस त भविष्यवाणी केर ते ज़ो, तीं केनि बाहोरिए?” 69 पतरस बेइर अंगने मां बिशोरो थियो, ते अक नौकरानी तैस कां आई ते जोने लगगी कि तू भी यीशु गलीली सेई साथी थियो। 70 तैनी सेबभी केरे सामने इन्कार कियो ते ज़ोवं, “मीं नई पतो तू कुन लोरिस ज़ोने? 71 तैखन पतरस बेइर फाटकेरे पासे जेव, त अक होरि नौकरानी तैस लेइतां तैन सेई ज़ैन तैडी थी जोने लाई, ई मैन्हु भी नासरतेरे यीशु सेई साथी थियो।” 72 पन तैनी सेबभी केरे सामने कसम केरतां इन्कार कियो, ते ज़ोवं, अवं एस मैन्हु सैइयां न ज़ैनी। 73 थोडे ज़िरेरां पत्ती तैना लोक ज़ैना तैडी खडखडे थिये, पतरसे कां आप ते जोने लगगे, सच्चे तू भी तैन्ने मरां अक आस, किजोकि तेरी बोली सेई बुजोते कि तू तैसेरो साथिस। 74 तैखन ते तैस जो गैई देइतां जोने लगगे, ते कसम केरतां जोने लगगे, “अवं एस मैन्हु सैइयां न ज़ैनी।” तैखन कुकडे बांग दित्ती। 75 पतरसे तैखन यीशुएरी तै गल याद आई, ज़ै तैनी ज़ोरी थी कि कुकडेरे बांग देने करां पेइले तू ट्लेइ बार मेरो इन्कार केरेलो, ते पतरस बेइर गेइतां हुस्बुकैइ-हुस्बुकैइ लेरां देने लगगे।

27 झेइर भौते सारे लोक ते प्रधान याजक, ते कौमेरे बुजुर्गेई मुशोरो कियो कि यीशुएरे कल्ल केरनेरो फैसलो कियो। 2 ते यीशु बंधतां नीयो, ते रोमी गवर्नर पिलातुसे कां नीयो। 3 ज़ैखन यहूदा ज़ैनी यीशु ट्लुवेवरो थियो तैस एसास भोव, कि यीशु मुर्जम बनोरोए त तैनी बडू पशतावं, ते तैना चँदरे ट्लही सिक्के प्रधान याजक ते बुजुर्गन कां वापस आने। 4 ते जोने लगगे, “मीं पाप कियो, कि अक बेकसूर मैन्हु, मारने लेइ ट्लुवाव,” ते तैना जोने लगगे, “असन कुने? तू ज़ान ते तेरू कम ज़ाने।” 5 तैखन यहूदा तैना सिक्के मन्दरेरे अंगने मां शैरतां छडे, ते तैटां गेइतां अपने आपे फांसी दित्ती। 6 प्रधान याजकेई तैना सिक्के सल्ले, ते जोने लगगे, “इन सिक्के इशे कानूनरे मुताबिक मन्दरेरे खज़ाने मां रखने जेइज नई, किजोकि ए कोन्ची मैन्हु मारनेरी कीमते।” 7 एल्हेरेलेइ तैनेई मुशोरो केरतां तैस रकमी सेई कुम्हारे करां अक ऊडार घिन्नु, ताके परदेशी केरे लेइ कन्नस्तान बनाव गाए। 8 तांए त अज़ तगर भी तैस ऊडारे जो खूनरू ऊडार ज़ोतान। 9 तैखन तै गल पूरी भोइ ज़ै यिर्याह नेबे ज़ोरी थी, कि तैनेई तैसेरी पूरी कीमत चँदरे ट्लही सिक्के निये, ए कीमत इस्राएलेरे लोकेई कियोरी थी। 10 ते तैन चँदरे ट्लही सिक्केई सेई कुम्हारेरू ऊडार घिन्ने जो दित्ते जेन्धरे प्रभुए मीं हुक्म दित्तोरो थियो। 11 ज़ैखन यीशु हाकिमेरे तुत्तरे अगर खडो थियो, ते हाकिम तैस पुच्छू, “तू यहूदी केरो राजोस?” यीशुए जुवाब दित्तो, “तू एप्पू जोने लोरोस।” 12 ते ज़ैखन प्रधान याजक ते बुजुर्ग तैस पुइ इलज़ाम लाने लोरे थिये त यीशुए कोई जुवाब न दित्तो। 13 तैखन पिलातुसे यीशु सेई ज़ोवं, “हेर एना तेरे खलाफ केत्री गवाहैई लोरेन देने तू शून्तस की नई।”

14 पन यीशुए तैस एक्की गल्लारो भी जुवाब न दित्तो; ते इडी तगर कि हाकिम बडो हैरान भोइ जेव। 15 ते हाकिमेरो अक दस्तूर थियो, कि फ़सह तिहाररे मौके पुइ अक कैदी ज़ैस लोक चाते थिये तैस हथरां छडतो थियो। 16 तैस मौके तेन केरो अक बडो मुशरू कैदी थियो, जेसेरू नवं बरअब्बा थियू। 17 ज़ैखन तैना लोक पिलातुसे कां जम्हां भोए, त पिलातुसे तैन पुच्छू, “तुस कुन चातथ, अवं केस हथरां छेड्डी? बरअब्बा कि यीशु ज़ैस जो मसीह ज़ोतन?” 18 किजोकि तै ज़ानतो थियो, कि तैनेई सिर्फ जलनी सेई तै ट्लुवोरोए। 19 ज़ैखन तै आदालतरी तखते पुइ बिशोरो थियो, त तेसेरी कुआन्शां तैस जो समाद भेजोरो थियो, “कि तू एस रोडे मैनेरे बारे मां किछ न करां, किजोकि मीं अज़ राती एसेरी वजाई सेई सुपने मां बडो दुःख भोरोए।” 20 पन प्रधान याजकेई ते बुजुर्ग लोकेई लोक बमकाए, कि तैना पिलातुसे करां बरअब्बा हथरां छडन ते यीशु मारन। 21 ज़ैखन हाकिमे तैन लोकन पुच्छू, “कि तुस एन दुईन मरां केस चातथ, अवं तैस हथरां छेड्डी,” तैन लोकेई ज़ोवं, “बरअब्बा।” 22 पिलातुसे तैन पुच्छू, “फिरी अवं यीशु ज़ैस जो मसीह ज़ोतन तैस सेई कुन केरि?” सब लोक जोने लगगे “एस क्रूसे पुइ च़ाढ़।” 23 हाकिमे ज़ोवं किजो? “एनी कुन बुराई कियोरीए? पन तैना मना ज़ोरे-जोरे जोने लगगे कि एस क्रूसे पुइ च़ाढ़।” 24 ज़ैखन पिलातुसे हेरू कि किछ भी बन्ने बालू नई बल्के उलटो फ़साद भोने बालोए, त तैनी पानी मेगतां तैन मैन्हु केरे सामने हथ धोए ते ज़ोवं, “कि अवं एस एक्की धैर्मी मैनेरे खूने करां बरी भोइताई, तुसे ज़ाना।” 25 ते सारे लोकेई जुवाब दित्तो, “एसेरो खून असन पुइ ते इशुी औलादी पुइ भोए।” 26 तैखन पिलातुसे बरअब्बा हथरां छड्ठो, ते यीशुए कोडे बावैहीतां तैन केरे हवाले कियो, ताके तैना तैस क्रूसे पुइ च़ाढ़न। 27 ते तैखन हाकिमेरे सिपैहीयेई यीशु महलेरे अंगने मां नेइतां सारे फोंजेरे सिपाही यीशुएरे चुफुरतां जम्हां भोए। 28 तैनेई तैसेरां लिगडां खोल्लां ते तैस अक लाल रंगेरो चोगो लुवाव। 29 फिरी कंटां केरू ताज तैसेरे दोग्गे पुइ रख्खू, ते तैसेरे देइने हथ्ये मां अक निरेठोरी लैठ दित्ती, ते तैस कां मथ्यो टेकतां तैसेरी हासी बानाने लगगे, ते जोने लगगे, “हे यहूदी केरे राजा नमस्कार।” 30 तैना तैस पुइ थुकते ते सोटी सेई तैसेरे दोग्गे पुइ बाते थिये। 31 ज़ैखन तैनेई तैसेरो मज़ाक बनाव, त तैसेरो चोगो खोल्लो, ते फिरी तैस तैसेरां लिगडां लुवां ते तैटां च़ले, ताके तैस क्रूसे पुइ च़ाढ़न। 32 ज़ैखन तैना तैटां च़लारे थिये, त तैन शमोन कुरेनी नंवेरो अक मैन्हु मैल्लो, तैन लोकेई तै ट्लातो ताके यीशुएरू क्रूसे छुइतां च़लाए। 33 ते यीशु गुलगुता नंवेरी ठेरी पुजे, जेसेरो मतलबे खोपडारी ठार। 34 तैडी तैनेई यीशु दाख़ारो रस ते ट्लिठो रस मिलेइतां पीने जेई दित्तो, पन तैनी पीनी न चाव। 35 ज़ैखन तैनेई यीशु क्रूसे पुइ च़ाढ़ो त शर्त रेखतां चिट्ठी छेइतां तैसेरां लिगडां भी एप्पू मामेइ बंटा। 36 ते तैडी बिशतां तैसेरो पैरोहो केरने लगगे। 37 ते तैनेई तैसेरो ज़ुर्म एक्की पेखडी पुइ लिखतां तैसेरे दोग्गे करां बा लाई ज़ैस पुइ एन लिखरू थियू, “ई यहूदी केरो राजो यीशु आए” 38 तैखन तैस सेई साथी दूई डैकू भी क्रूसे पुइ च़ाढ़े, अक यीशुएरे देइने पासे, ते होरो बांए पासे। 39 तैटां गानेबाले सारे लोक दोग हिलेइतां गाते थिये ते तैसेरी तुहीन केरते थिये। 40 ते ज़ोते थी इस मन्दरे डोलने बाला ते ट्लेइ दिहइन मां बानाने बाला, अपनो आप त बचा, “अगर तू परमेशेरू मट्टू आस त एस क्रूसे पुइरां उन्डो ओस।” 41 एन्धरे प्रधान याजक ते शास्त्री ते बुजुर्ग भी तैसेरी हासी बानाते थिये, ते ज़ोते थिये। 42 “एनी होरे बचाए पन अपनो आप न बचेइ बटो, ई त इस्राएलेरो राजो आए।” अगर हुन्ना भी तू क्रूसे पुइरां उन्डो ओस्स, त अस तै तीं पुइ विश्वास केरतम। 43 एसेरो भरोसो परमेशेरुे पुडे, अगर तै एस चाते त एस बचाए, किजोकि एनी जोरू थियू, “अवं परमेशेरू मट्टू आई।” 44 ते दूई डैकू भी ज़ैना तैस सेई साथी क्रूसे पुइ च़ाढ़ोरे थिये, तैना भी तैसेरी तुहीन केरते थिये। 45 दीसेरे 12 बजेई सारे मुख्खे मां आंधरू भोवं ते ट्लेइ बज़न तगर राव। 46 ते ट्लेइ बाज़ां केरे लगभग यीशुए बडे ज़ोरे सेई ज़ोवं, “एली, एली लमा शबक्तनी?” जेसेरो मतलबे, “हे मेरे परमेशर, हे मेरे परमेशर, तीं अवं किजो शारो?” 47 ज़ैना लोक तैडी खडखडे थिये, तैन मरां किछ शून्तां एन जोने लगगे, कि ए त एलिव्याह फुकारने लोरोए। 48 तैखन अक मैन्हु

देवइतां जेव, ते अक गलास पैनी मां डोबतां ते निरेठरे सोटी पुड़ टकेइतां पीनेरे लेइ तैसेरे ऐशी सेइं हुरावें। 49 किछ ज़ोने लगगे, “बलगा हुनी हेरतम, कि एलियाह एस बचाने एइते कि नई।” 50 ते यीशुए फिरी ज़ोरे सेइं चिन्ड मारी ते प्राण दित्ते। 51 तैखन मन्देरेरो पड़दो बां देता बुन तगर फेटतां दूई टुक्के भोइ जे, ते पहाड़ां ते सारी ज़मीन हीलने लगगी। 52 कब्रं खुल्ली जेई, ते बडे पवित्र लोक ज़ैना मौतरी निडुला मां झुलोरे थिये, ज़ींते भोइ जे। 53 ते कब्रन मरां निस्तां ज़ींते भोनेरां पत्ती पवित्र नगर मां दाखल भोए, ते तैडी बडे होरि लोकेई भी लाए। 54 तैखन तैनी सूवेदारे ते तैसेरे सैथेई ज़ैन यीशुएरी निगरानी केरने लोरे थिये, भुंजल गांते हेरो, त तैना डेरि जे, ते ज़ोने लगगे, “सच्चे एन परमेशेरू मट्टू थियूं।” 55 तैडी बडे कुआन्शां ज़ैना गलील इलाके मरां यीशु सेइं साथी तैसेरी सेवा केरती तैस पत्ती ओरी थी, ते दूरेरां तकने लोरी थी। 56 तैन मां मरियम मगदलीनी ते याकूब त योसेसेरी अम्मा मरियम ते जब्देरे मट्टां केरि अम्मा साथी थी। 57 ज़ैखन इलोइ भोइ त अरिमतियाहरो अक अमीर यूसुफ नंवेरो मैन्हु ज़ै एप्पू भी यीशुएरो चेलो थियो अव। 58 तैनी पिलातुसे कां गेइतां यीशुएरी लाश मगी, ते पिलातुसे लाश देनेरो हुक्म दित्तो। 59 यूसुफे लाश नेइतां एककी रोड़ि ज़ेरि च़ादरी मां पलैटी। 60 ते तै लाश एककी नर्वी कब्री मां ज़ै शफ़डी मां घड़ोरी थी रख्खी, ते तैस कब्री आग्रोरां अक बड्डो घोइ तैस उबरो छुड्डो। 61 ते मगदलीन इलव्वेरी मरियम ते होरि मरियम तैडी तैस कब्रारे सामने बिशोरी थी ज़ैस मां यीशुएरी लाश रखोरि थी। 62 होरसां तियैरारे दिहाड़ेरे बाद यहूदी केरे आरामेरे दिहाड़ेरे प्रधान याजक ते फरीसी लोक मिलतां पिलातुसे कां पुज्जे। 63 ते ज़ोने लगगे महाराज असन यादे कि तैनी धोखे बाजे अपने ज़ींते सांसेइं ज़ोरू थियूं, “अवं मरनेरे टलेइ दिहाड़ां बाद फिरी ज़ींते भोनोई। 64 एल्हेरेलेइ हुक्म दे ताके टलाई दिहाड़न तगर कब्री पुड़ पेरहो दित्तो गाए, कि एरू न भोए कि तैसेरे चेले एइतां तैसेरी लाश च़ोरन, ते लोकन सेइं ज़ोन कि तै मुड़दन मरां ज़ींते भोरोए, ए धोखो पेइले धोखे करां भी जादे बुरो भोलो।” 65 पिलातुसे जुवाब दित्तो, “तुसन कां पेरहो देनेबाले आन, गाथ ज़ेत्रू भोइसखे पेरहो देथ।” 66 तैखन तैनेई गेइतां घोडे पुड़ मोहर लार्ई, ते कब्रारे पेरहे लेइ पेरहेदार रख्खे।

28 आरामेरे दिहाड़ेरे बाद हफतेरे पेइले दिहाड़े टलेकड़ोते-टलेकड़ोते मगदलीन इलव्वेरी मरियम ते होरि मरियम ज़ैडी यीशुएरी लाश कब्री मां रख्खोरी थी, हेरने एई। 2 ते हेरा अक बड्डो भुंजल अव, किजोकि परमेशेरु अक स्वर्गदूत स्वर्गोरां ओरो थियो, ते तैस कब्री अगरां घोइ उन्डो बिछोइतां तैस पुड़ बिश्शी जेव। 3 तैसेरी शकल सूरत दिहाड़ेरी ज़ेरि रोड़ी थी, ते तैसेरां लिगड़ां हीवेरां ज़ेरां छित्तां सुफेद थियां। 4 पेरहेदार डेरतां थर-थर कम्बने लगगे ते ज़ेरे मुड़दे भोए। 5 स्वर्गदूते कुआन्शन सेइं ज़ोवें, “डरा नन्ना, अवं ज़ानताई कि तुस यीशुए तोपने लोरिथ, ज़ै क्रूसे पुड़ च़ाढोरोए। 6 तै इडी नई बल्के ज़ेन्चरे तैनी ज़ोरू थियूं, तै ज़ींते भोरोए, एज्जा तै ठार हेरा, ज़ैडी प्रभु थियो। 7 ते जल्दी गेइतां तैसेरे चलन पतो देथ, कि तै मुड़दन मरां ज़ींते भोरोए, ते तुसन करां पेइलो गलीले मां गाते, ते तुसेई तै लहन्नोए हेरा मीं तुसन एन ज़ोरूए।” 8 तैखन तैना कुआन्शां डेरतां भी ते खुशी सेइं भी कब्री मरां बेइर एई, ते दौवड़ती-दौवड़ती जेई ताके चलन पतो देन। 9 तैखन यीशु तैन मैल्लो, ते तैनी ज़ोवें तुसन शान्ति मैल्ले, ते तैनेई तैसेरे पाव बंते, ते तैस कां मथ्यो टेको। 10 तैखन यीशुए तैन ज़ोवें, डरा न ते गाथ ते मेरे चलन सेइं ज़ोथ कि गलीले मांजो गान, तैना मीं तैडी लाएले। 11 हेजू तैना कुआन्शां बत्तां थी कि ज़ैना चलन खबर देने च़लोरी थी, त पेरहेदारन मरां किछ नगर मां जे ते प्रधान याजकन सेइं सारो बिस्तार शुनाव। 12 ज़ैखन महायाजकेई बुजुर्गन सेइं मिलतां मुशोरो कियो, ते तैनेई ई फैसलो कियो कि सिपेहिन बडे पेइसे देन, कि तैना ई गल केन्ची सेइं न ज़ोन, कि कब्र केन्चरे खाली भोइ। 13 तैनेई पेरहेदारन एन ज़ोवें, कि तुस एन ज़ोइयथ, कि ज़ैखन अस राती झुल्लोरे थिये त तैसेरे चले आए ते तैनेई तैसेरी लाश नी। 14 अगर ए गल गुवनरि तगर पुजेली त अस तैस एप्पू समझामेले त तुसन कोई परेशानी न

भोली। 15 ते सिपेहेई पेइसे नीए ते ज़ेन्चरे तैनेई ज़ोरू थियूं तेन्चरे कमाव, ते अज़ तगर ए गल यहूदन मां मुशूरे। 16 11 चले गलीले मां जे, ते तैस पहाड़े पुड़ अकोटे भोए ज़ैडी गानेरे बारे मां यीशुए तैन ज़ोवरू थियूं। 17 ज़ैखन तैनेई यीशु लाव त तैस कां मथ्यो टेको, ते किछन हेजू भी शक थी, कि तै ज़ींते वापस ओरोए। 18 तैखन यीशु तैन केरे नेडे एइतां ज़ोवें, “थेरतरो ते स्वर्गोरो सारो अधिकार मीं दित्तोरोए। 19 एल्हेरेलेइ तुस गाथ ते सैरी कौमां केरे लोकन चले बनाथ, ते तैन बाजी, ते मट्टेरे, ते पवित्र आत्मारें नंवे सेइं बपतिस्मो देथ। 20 ते तैन तैना सब हुक्म मन्ने शिखाला ज़ैना मीं तुसन दित्तोरिन, ते हेरा, अवं दुनियारे आखरी तगर हमेशा तुसन सेइं साथी आई।” (aiōn g165)

मरकुस

1 ई यीशु मसीहेरे बारे मां खुशखेबरी शुरुआत आए, जैन परमेशेरू महु आए। 2 (बड़े पेड़ले) यशायाह नेबे अपनि किताबी मां लिखोरू थियुं कि, (परमेशेरे अपने महु सेईं जोंव,) “शुन, अवं अपनो बिस्तार देनेबालो तीं केरां पेड़ले भेजेलो।” “तै तीं केरां पेड़लो गेइतां तेरे लेइ बत तियार केरेलो। (यानी, लोकां केरे दिह परमेशेरे लेइ तियार केरेलो)” 3 “तै बिस्तार देनेबालो सुनसान ठैरी मां लोकन, जैना तैस कां गाले, तैन हक देइतां ज़ोलो कि ‘तुसन कां प्रभु एजनेबालो आए, एल्हेरेलेइ तुस तैसेरेलेइ बत तियार केरा त कने तैसेरेलेइ सडकां सिद्धी केरा।’ (यानी, प्रभुएरे लेइ तुस अपने दिल साफ केरा)” 4 जेन्चरां लिखोरू थियुं, अक बिस्तार देनेबालो अव। तैस मैनेरू नवं यूहन्ना थियुं। लोक तैस जो बपतिस्मो देनेबालो भी ज़ोते थियो। तै यूहदिया इलाकेरे सुनसान ठैरी मां अव। तैड़ी तै लोकन परमेशेरी गल्लां शुनातो थियो कि, “तुस अपने पापन करां मनफिराथ, त कने बपतिस्मो नेथ, ताके परमेशर तुशे पाप माफ़ केरे।” 5 यूहदिया इलाकेरे बड़े लोक त यरूशलम नगरेरे रानेबालन मरां बड़े लोक यूहन्नारी गल्लां शुनरे लेइ सुनसान ठैरी मां तैस कां आए। तैन लोकेई अपने पाप मेन्तां यूहन्ना करां यरदन दरियाए मां बपतिस्मो नीयो। 6 यूहन्ना आम लिगडां लातो थियो जैना लिगडां ऊँटेरे बालन सेईं बनोरां थियां। तै अपनि कमरी पुड़ चमड़ेरू मज़ बंधतो थियो। तै तै टिट्टां त कने जंगलेरू माछी खातो थियो। 7 तै लोकन शुनातो थियो कि, “कोई अक, जै मीं केरां भी महान आए, मेरे बाद एजनेबालोए। अवं त तैसेरो गुलाम भौनेरे काबल भी नई कि लिकतां तैसेरे बूटेरे तसमे खोल्ली। 8 अवं त तुसन पत्नी सेईं बपतिस्मो देताई, पन तै तुसन पवित्र आत्मा सेईं बपतिस्मो देलो।” 9 तैल्ला पत्ती, तैन दिहाइन मां एक भोवं कि यीशु गलील इलाकेरे नासरत नगरेरां यूहन्ना कां अव। तैनी यूहन्ना करां यरदन दरियाए मां बपतिस्मो नीयो। 10 ज़ैखन यीशु बपतिस्मो नेइतां पैनी मरां बेइर अव, त तैनी अम्बर खुलतू त पवित्र आत्मा कबूतेरी शकली मां तैस पुड़ एतो लाव। 11 तैखन परमेशेरे स्वर्गोरां यीशु सेईं जोंव, “तू मेरू दलारू महु आस, अवं तीं पुड़ बडो खुश आई।” 12 तैल्ला पत्ती, अकदम पवित्र आत्मा यीशु सुनसान ठैरी जो भेजो। 13 सुनसान ठैरी मां 40 दिहाइन तगर शीताने यीशु अजमाव। त तैड़ी यीशु जंगली जानवरन साथी थियो। तैखन परमेशेरे स्वर्गदूत यीशु कां एइतां तैसेरी सेवा केरने लगगे। 14 किछ वक्तेरां बाद, यूहन्ना नबी कैद कियो जेव। तैल्ला बाद, यीशु गलील इलाके मां जेव। तैड़ी तै लोकन परमेशेरे राज़ेरे बारे मां खुशखेबरी शुनाने लगगे। 15 तैनी जोंव कि, “ठीक वक्त ओरोए त कने परमेशेरू राज़ नेडे ओरूए! एल्हेरेलेइ, तुस अपने पापन करां मनफिराथ ते इस खुशखेबरी पुड़ विश्वास केरा।” 16 एक्सां, ज़ैखन यीशु गलील नव्वेरे समुन्दरेरे बन्ने च़लोरो थियो, तैखन तैनी दूई मैनु शमौन त तैसेरो दूला अन्द्रियास लाए, जैना मेछली दलानेबाले थियो। तैना मेछली दलानेरे लेइ समुन्दरे मां ज़ाल छेड़ी राओरे थियो। 17 यीशुए तैन सेईं जोंव, “एज्जा मेरे चले बना। अवं तुसन शिखालेलो कि केन्चरां होरे मैनु मेरे चले बनानेन।” 18 अकदम तैना अपना जालां छेइतां यीशु पत्ती च़ले जे। 19 ज़ैखन तैना थोड़े ज़ेरे अगगर जे, त यीशुए याकूब त कने तैसेरो दूला यूहन्ना लाए। तैना दुइये जेव्दरां मट्टां थियां। तैना किशती मां जालां ठीक केरने लगगेरे थिए। 20 अकदम यीशुए तैना अपने चले बनानेरे लेइ कुजाए। तैना दुइये, अपने बाजी जब्दी किशती मां मज़दूरन सेईं साथी छेइतां, यीशु सेईं साथी च़ले जे। 21 तैल्ला पत्ती, यीशु त तैसेरे चले तैटां कफरनहूम नगरे मां जे। आरामेरे दिहाडे, अकदम यीशु तैन केरे प्रार्थना घरे मां जेव। तैड़ी तै परमेशेरी गल्लां तैन लोकन शुनाने लगगे। 22 तैना यीशुएरी शिक्षा शुन्तां हैरान भोए, किजोकि तैनी शास्त्री लोकां केरि ज़ेरि शिक्षा न दिती, पन तै अधिकारे सेईं शिक्षा देइ राओरो थियो। 23 ज़ैखन यीशु तैड़ी थियो, त तैन केरे प्रार्थना घरे मां अक मैनु थियो, ज़ैस पुड़ भूतेरो सायो थियो। 24 अचानक तैनी मैने चिन्दां मेरतां जोंव, “हे नासरत नगरेरो यीशु! तीं सेईं असन कुन कम? कुन तू असन नाश

केरनेरे लेइ ओरोस? अवं ज्ञानताई कि तू कौन आस, तू परमेशेरू पवित्र महु आस!” 25 पन यीशुए तैस भूते झिड़कतां जोंव, “चुप रा, एस मैनु मरां निस्सी गा!” 26 तैखन भूते तै मैनु इलेडेइतां त ज़ोरे सेईं चिन्दां मेरतां तैस मैनु मरां निस्सी जेव। 27 एन हेरतां सारे लोक बड़े हैरान भोए। तैना एप्पू मांमेइं गलबात केरतां एक्की होरि पुछने लगगे कि, “ए कुन गल आए! ए त अक नंवी शिक्षा आए ज़ैस मां अधिकार आए! तै त भूतन भी अधिकारे सेईं हुकम देते ते तैना भी तैसेरो हुकम मन्तन।” 28 अकदम यीशुएरे बारे मां ए गल गलील इलाकेरे आसेपासरे सेबमी ठैरन मां फैली जेई। 29 तैना अकदम प्रार्थना घरे मां निस्तां, याकूब त कने यूहन्ना सेईं साथी शमौन त अन्द्रियासेरे घरे जे। 30 शमौनेरी शिखी भुखारे थियो ते तै लेटेरी थी। अकदम तैनेई तैसारे बारे मां यीशु सेईं जोंव कि ऊ बिमार आए। 31 यीशुए तैस कां गेइतां तैसारे हथ दलेइतां खड़ी की। अकदम तैसारे भुखार ठीक भोव। ते तै तैन केरि सेवा केरने लगगी। 32 इलोझी ज़ैखन दिहाडो डुब्बो, त लोक सारे बिमार मैनु त कने जैन मैनु पुड़ भूतेरो सायो थियो तैना यीशु कां आन्ने लगगे, ताके तै तैनू बज्ज़ाए। 33 तैस नगरेरे बड़े लोक तैस घरेरे दारे पुड़ अकोट्टे भोए। 34 यीशुए बड़े मैनु बज्ज़ाए, जैना बड़े किसमां केरि बिमैरन सेईं दुखी थियो। त तैनी बड़े मैनु मरां भूतां केरो सायो कड्डो। पन यीशुए भूतन किछ जियो न दित्तू, किजोकि तैना यीशु पिशानतां थियां (कि एन परमेशेरू महु आए।) 35 एपी दिहाडी, झेज़्ज़ां-झेज़्ज़ां दिहाडो निस्ने केरां बड़े पेड़ले, यीशु उठतां बेइर एक्की सुनसान ठैरी मां जेव। तैड़ी तै प्रार्थना केरने लगगे। 36 पन थोड़े चिरेरां बाद, शमौन त तैसेरे साथी, यीशु तोपने जे। 37 ज़ैखन तैनू तै मैल्लो, त तैनेई यीशुए सेईं जोंव, “(वापस इलाव्वे मां एई,) सारे लोक तीं तोप्पी राओरेन!” 38 पन यीशुए तैन सेईं जोंव, “एज्जा, अस होरि केन्वी आसेपासरे इलोव्वन मां गाम, ताके अवं तैन लोकन भी परमेशेरी गल्लां शुनेई। किजोकि अवं एस्से कम्मरे लेइ दुनियाई मां ओरोई।” 39 तैल्हेरेलेइ यीशु गलील इलाकेरे सारे इलोव्वन मां गेइतां, तैन केरे प्रार्थना घरन मां लोकन परमेशेरी गल्लां शुनातो राव ते बड़े लोकन मरां भूतां केरो सायो कड्डतो राव। 40 तैल्ला पत्ती, एक्सां अक कोड़ी मैनु यीशु कां अव। तैनी मैने यीशुएरे सामने ज़ैन्धु केरे भारे बिश्तां तैस कां मिन्नत केरतां तैस सेईं जोंव, “अगर तू चास, त मीं बज़्ज़ेई सकतस। (महरबानी केरतां मीं बज़्ज़ा।)” 41 यीशुए तैस मैनु पुड़ तरस खाव। यीशुए अपनो हथ अग्रोवं कियो त तैस कोड़ी मैनु सेईं हथ लेइतां जोंव, “अवं चाताई, तू बज़्ज़ोस।” 42 अकदम तै कोड़ी बज़्ज़ोई जेव। 43 तैखन यीशुए तै मैनु समझेइतां लूशी भेजो। 44 त तैनी तैस सेईं जोंव, “हेर, एस गल्लेरे बारे मां केन्वी सेईं किछ न जोइयां। (तू यरूशलम नगरेरे मन्दरे मां गा), त कने अपने आपे याजके हिरा। तैल्ला पत्ती, तू अपने बेज़्ज़ोनेरे वजाई सेईं चढतल च़ाढ, जेसेरे बारे मां मूसा नेबे कानूने मां हुकम दित्तोरोए, ताके लोकन पतो च़ले कि तू बेज्ज़ोरोस।” 45 पन तै मैनु बेइर गेइतां एस गल्लारे बारे मां लोकन बडू शुनाने लगगे ते इड़ी तगर फैलाने लगगे कि यीशु फिरी बांदि नगरे मां न गेइ सको, पन बेइर सुनसान ठैरन मां राव ते च़ेरे पासां केरे लोक तैस कां एइते राए।

2 किछ दिहाइन बाद, यीशु फिरी कफरनहूम नगरे मां जेव। तेइरे मैनेई शुनू कि तै तैड़ी एक्की घरे मां आए। 2 अकदम बड़े मैनु तैस घरे मां अकोट्टे भोए। तैड़ी ठार न राई, इड़ी तगर कि दारे केरां बेइर भी ठार न थी। यीशु तैन लोकन परमेशेरी गल्लां शुनाने लगगे। 3 तैखन किछ मैनु एक्की अधरंगी मैनु छुइतां यीशु कां आए। च़ेरे मैनेई तै अधरंगी मैनु खट्टी पुड़ छुइतां आनोरो थियो। 4 मैनु केरि भीड़रे वजाई सेईं, तैना यीशुएरे नेडे न पुज्जी सके। एल्हेरेलेइ तैनेई तैस घरेरी छत ज़ैस मां यीशु थियो पुट्टी छुड़ी। तैल्ला बाद, तैनेई तै खट ओसाली ज़ैस पुड़ अधरंगी मैनु थियो। 5 यीशुए तैन केरो विश्वास हेरतां अधरंगी मैनु सेईं जोंव, “हे मट्टा, तेरे पाप माफ़ भोए।” 6 तैखन शास्त्री लोकन मरां किछ मैनु जैना तैड़ी थियो, अपने-अपने मने मां सोचने लगगे कि, 7 “ए मैनु एन्चरां किजो ज़ोते? ए त परमेशेरी तुहीन केरते। परमेशेरे अलावा कौन पाप माफ़ केरि सकते?” 8 अकदम यीशुए

जैनी छुट्टू कि तैना अपने-अपने मने मां कुन सोचने लगगोरिन। एल्हेरेलेइ तैनी तैन सेइं जोवं, “तुस अपने-अपने मने मां एन्चरां किजो सोचने लगगोरिथ? 9 एस अधरंगी मैन्हु सेइं कुन जौनु सुखू आए? एन जौनु कि ‘तेरे पाप माफ्र भोए,’ या एन जौनु कि ‘उठ, अपनि खट छुइतां च्रल फिर?’ 10 अवं किछ केरनेबालोई, जैस सेइं तुसेईं बुज्जनुए कि मैनेरे मट्टे (यानी मीं) धरती पुड लोकां केरे पाप माफ्र केरनेरो अधिकार आए!” फिरी तैनी तैस अधरंगी मैनेरे पासे मुइतां तैस सेइं जोवं, 11 “अवं तीं सेइं जोतई, उठ, अपनि खट छुइतां अपने घरजो गा!” 12 अकदम तै खडो उठो ते अपनि खट छुइतां सारे मैन्हु केरे सामने निस्तां च्रलो जेव। एस वजाईं सेइं सारे मैन्हु हैरान भोए, त परमेशरेरी बडयाईं केरतां जोने लगगे, “असेईं एरू जेरू कथी नईं लावरू!” 13 तैल्ला पत्ती, यीशु तैट्टां निस्तां फिरी गलील समुन्दरेरे बन्ने जेव। तैखन मैन्हु केरि सारी भीड तैस कां आई। तै तैन लोकन परमेशरेरी गल्लां केरि शिक्षा देने लगगे। 14 समुन्दरेरे बन्ने गाते-गाते, यीशुए लेवी नंवेरे मैन्हु लाव, जैन हलफईसेरू मट्टू थियूं। तै मैन्हु चुंगी नेनेरे दफरते मां कम केरतो थियो। तैखन यीशुए तैस सेइं जोवं, “मीं पत्ती एई, ते मेरो चेलो बन।” अकदम लेवी उठो त यीशु पत्ती च्रलो। 15 बादे मां, यीशु त तैसेरे चले लेवेरे घरे मां रोटी खाने बिशेशे। तैखन बडे चुंगी नेनेबाले त हारे पापी मैन्हु (लोक तैन केरे बारे मां सोचते थिये कि एना पापिना।) भी यीशु त तैसेरे चेलन सेइं साथी रोटी खाने बिशेशे, किजोकि एन केरे जेरे बडे लोक यीशु पत्ती च्रलते थिये। 16 जैखन किछ शास्त्री लोकेईं त कने फरीसी लोकेईं हेरू कि यीशु पापी मैन्हु त चुंगी नेनेबालन सेइं साथी रोटी खाने लगगोरिए, तैखन तैनेईं यीशुएरे चेलन सेइं जोवं, “तै चुंगी नेनेबालन त पैपन सेइं साथी किजो खाते पीते?” 17 यीशुए तैन केरि गल शुन्तां तैन मिसाल देइतां जुवाब दित्तो, “सझर लोकन डाक्टररी ज़रूरत न पे, पन बिमार मैन्हु ज़रूरत पेवे। तेन्चरां, अवं तैन मैन्हु केरे लेइ नईं ओरोईं जैना अपने आपे धर्मी समझतन, पन पापी मैन्हु कुजाने ओरोईं, ताके तैना अपने पापन केरां मन फिरान।” 18 यूहन्नारे चले त कने फरीसी लोक बरत रखते थिये, पन यीशुएरे चले बरत न थिये रखते। किछ लोकेईं यीशु कां एइतां तैस पुछ्छू, “यूहन्नारे चले ते फरीसी लोकां केरे चले बरत रखतन, पन तेरे चले बरत की न रखन?” 19 यीशुए तैननु जुवाब दित्तो, “इलाएरे दिहाड़े, जैखन लाडो जैनी सेइं साथी राते, कुन तैना बरत रेख्खी सकतन? (बिलकुल नईं) तैल्हेरेलेइ, जांतगर लाडो तैन सेइं साथी राते, तांतगर तैना बरत न रेख्खी सकन। (किजोकि तैना खुशी आन।) 20 मेरे चले भी तैन केरे जेरे आन, किजोकि अवं तैन सेइं साथी आई। पन तैना दिहाड़े एज्जले, जैखन लाडो तैन केरां अलग कियो गालो (यानी मारो गालो), तैस मौके तैना (अपने दुखेरे वजाईं सेइं) बरत रेख्खेले।” 21 “अवं तुसन अक होरि मिसाल देताई, नंवे लिगडेरी टलोईं पुराने लिगडे कोईं न लाए। अगर कोई एन्चरां केरे, त धोनेरे पत्ती नंवे लिगडेरी टलोईं पुराने लिगडे अपने पासे खिचवी छुट्टेली। त तैन पेइले केरां भी जादे छिन्दोल। 22 तेन्चरे कोईं भी पुरेनी मसकन मां नंवे दाछारो रस न रखे, किजोकि दाछारो रस अम्लो भोइतां फुलते बार मसकन छिन्दी छुट्टेलो। दाछारे रस त कने मसकां, एना दुइये बरबाद भोइ गाले। एल्हेरेलेइ नंवे दाछारे रस हमेशा नंवे मसकन मां रेख्खोरो लोडे, ताके मसकन न छिन्दे।” 23 एक्की आरामेरे दिहाड़े, यीशु त कने तैसेरे चले बत्ती मामेईं च्रलने लगगोरि थिये, जै गेवां केरे ऊडारन मामेईं थी। च्रलते-च्रलते तैसेरे चले गेवां केरे किछ शिल्लां टलोइतां खाने लगगे। 24 पन किछ फरीसी लोकेईं तैन हेरतां यीशु सेइं जोवं, “तक! एना आरामेरे दिहाड़े तैन कम किजो केरतन, जैन मूसेरे कानूनरे मुताबिक जेइज नईं?” 25 यीशुए तैन सेइं जोवं, “कुन तुसेईं परमेशरेरी किताबी मां एन कथी नईं पढेरूए कि (बडे पेइले) दाऊद राजे कुन कियूं, जैखन तैस त तैसेरे सैथन ढलुख लगगी त तैननु रोटीरी ज़रूरत थी? 26 तुसन पतोए कि दाऊद राजे परमेशरेरे घरे मां गेइतां, अबियातार नंवेरे महायाजक करां खाने जो रोटी मग्गी। दाऊदे तै रोटी खाइ, जै परमेशरे जो चढोरी थी। कानूनरे मुताबिक याजक केरे अलावा होरि केन्ची तैना रोटी खानेरी अज़ाज़त नईं थी। पन दाऊदे अपने सैथन भी रोटी दित्ती त तैनेईं भी तैना रोटी खेइ? (पन फिरी भी

परमेशरे दाऊदे पुड दोष न लाव।)” 27 तैखन यीशुए तैन फरीसी लोकन सेइं जोवं, “परमेशरे आरामेरी दिहाड़ी लोकन महत केरनेरे लेइ बनोरिए, न कि आरामेरे दिहाड़ेरे कानून मन्नेरे लेइ तैनी लोक रचे। 28 एल्हेरेलेइ, मैनेरू मट्टू यानी अवं आरामेरे दिहाड़ेरो भी प्रभु आई।”

3 तैल्ला पत्ती, यीशु एक्की प्रार्थना घरे मां जेव। तैडी अक मैन्हु थियो, जेसेरो हथ शुक्कोरे थियो। 2 तैडी किछ फरीसी लोक भी थिये, जैना यीशु पुड इलज़ाम लानो चाते थिये। एल्हेरेलेइ तैना यीशु ध्याने सेइं हेरने लगगोरि थिये कि आरामेरे दिहाड़े तैस मैन्हु बज्ज़ाते की नईं। 3 तैखन यीशुए शुक्कोरे हथेबाले मैन्हु सेइं जोवं, “मझाटे खडे भो।” (ते तै मैन्हु खडो भोव।) 4 त यीशुए तैन लोकन पुछ्छू, “आरामेरे दिहाड़े कुन केरनु जेइजे, मैनेरू भलू केरनु या बरू केरनु, मैनेरी जान बचानी या मारनी?” पन तैना चुप राए। 5 त तैनी सर्की सेइं तैन केरे चेरे पासन तक्कू, पन तैन केरे सखत दिलेरी वजाईं सेइं उदास भोव। तैखन तैनी तैस मैन्हु सेइं जोवं, “अपनो हथ अग्रोवं केर।” तैनी मैने अपनो हथ अग्रोवं कियो। त अकदम तैसेरो हथ बेज्ज़ोव। 6 तैखन फरीसी लोक प्रार्थना घरे मरां बेइर जे। अकदम तैना हेरोदेस राजेरे लोकन सेइं साथी यीशुएरे खलाफ साज़िश केरने लगगे कि यीशुएरो कोस तरीके सेइं कल्ल केरम। 7 तैल्ला पत्ती, यीशु अपने चेलन सेइं साथी गलील समुन्दरेरे पासे जेव। मैन्हु केरि बडी भीड तैस पत्ती च्रली। गलील त यहूदिया इलाकां केरे लोक तैस कां आए। 8 यरूशलम नगरेरे लोक, इदूमिया इलाकेरे लोक ते यरदन दरियारे पारिरे लोक त कने सूत त सैदारे आसेपासेरे लोक भी तैस कां ओरे थिये। तैना सब यीशु कां आए, किजोकि तैनेईं यीशुएरे सारे चमत्कारिरे कम्मां केरे बारे मां शुनोरू थियूं, जैना ते केरतो थियो। 9 यीशुए बडे लोक हथ लेइतां बज्ज़ावेरे थिये, एल्हेरेलेइ होरे बडे लोक जैना बडे बिमार थिये, तैना तैस सेइं हथ लानेरे लेइ तैस पुड बिछड़ी गाते थिये, ताके तैना भी बेज्ज़ोन। मैन्हु केरि भीड बडी जादे थी। एल्हेरेलेइ यीशुए अपने चेलन सेइं जोवं, “मेरे लेइ अक किशती तियार केरा, ताके एना लोक मीं ढलेन्ची न सकन।” 11 त जैन लोकन पुड भूतां केरो सायो थियो, तैना भी यीशु लेइतां तैसेरे पावन पुड बिछड़ी गाते थिए। तैना भी ज़ोरे-जोरे सेइं जोते थिए कि, “तू परमेशरेरू मट्टू आस।” 12 यीशुए तैन भूतन सखत हुकम दित्तो कि, “मेरे बारे मां लोकन न जोथ कि अवं कौन आई।” 13 तैल्ला पत्ती, यीशु एक्की पहाड़े पुड च़ढो। जैना मैन्हु तै अपने चले बनानो चातो थियो, तैना एप्पू कां कुजाए। तैना तैस कां आए। 14 यीशुए तैन मरां 12 मइद चुने, ते तैन प्रेरित नवं दित्तू कि तैना तैस सेइं साथी-साथी रान, ताके तै तैन लोकन खुशखबरी शुनाने भेजे। 15 यीशुए तैननु, लोकां केरि बिमैरी बज्ज़ाने त कने मैन्हु मरां भूतां केरो सायो कढनेरो अधिकार दित्तो। 16 तैना 12 मैन्हु केरां नंवां इना थियां: शमीन जेसेरू नवं यीशुए पतरस रखू, 17 याकूब त तैसेरो ढूला यूहन्ना, एना दुइये जेबेदेरां मट्टां थियां, त यीशुए एन दुइयां केरू नवं बुनअरगिस रखू, मतलब कि, गुडनरां मट्टां। 18 त अन्द्रियास, फिलिप्पुस, बरतुल्मै, मत्ती, थोमा, याकूब जैन हलफईसेरू मट्टू थियूं, त तदै, शमीन जै पेइले रोमी सरकारारे खलाफ यहूदी लोकां केरि आज़ेदेरे लेइ लडनेबालो थियो। 19 त कने यहूदा इस्करियोती जैनी बादे मां यीशु धोखे सेइं टलुवाव। 20 तैल्ला पत्ती यीशु कफरनहूम नगरेरे एक्की घरे मां जेव। फिरी मैन्हु केरि भीड तैस घरे मां अकोटी भोइ, कि यीशु त तैसेरे चेलन रोटी खानेरे लेइ भी मौको न मैल्लो। 21 जैखन यीशुएरे रिशतेदारेईं एन शुनु, त तैना तैस टलेइतां अपने घरे वापस आन्नेरे लेइ जे, किजोकि तैना ज़ोने लगगोरि थिये कि तैसेरो दिमाग ठीकाने नईं। 22 किछ शास्त्री लोक, जैना यरूशलम नगरेरां ओरे थिये, तैना लोकन सेइं जोईं राओरे थिये कि, “यीशु मां शैतान आए।” त एन भी जोईं राओरे थिये कि, “ते भूतां केरे प्रधानेरी शक्ति सेइं लोकन मरां भूतां केरो सायो कढते।” 23 एल्हेरेलेइ यीशुए तैना नेडे कुजाए ते तैन मिसाल देइतां जोने लगगे, “शैतान केन्चरां अपने भूतन लोकन मरां केडी सकते? 24 अगर एक्की राज़ेरे लोक अपने राज़ेरे खलाफ लडाईं केरन, त तैन राज़ बनोरू न

रेड सके। 25 अगर केन्ची टब्बरे लोक अपने टब्बरे खलाफ लडाई करन, त तैन टब्बर भी बनोफ रेड सके। 26 तेन्त्रे, शैतान भी अगर एप्पु अपने भूतां केरे खलाफ लडाई केरे, त तै केन्चरां बनोरो रेड सकते? तैसेरो त बिलकुल खातमां भोड गालो। 27 अवं होरि मिसाल देताई, कोई मैन्हु केन्ची ज़ोरबाले मैनेरे घरेरे मां गेइतां तैसेरो माल तांतगर लुट्टी न सके, जांतगर कि तै पेइले तैस ज़ोरबाले मैन्हु बंधी न छुट्टे। तैखन तै तैस ज़ोरबाले मैनेरो माल लुट्टी सकते। अवं भी शैतानेरे भूतां केरो सायो लोकन मरां केड्डी सकतां। (शैतान तैस ज़ोरबाले मैनेरो ज़ेरोए) 28 अवं तुसन सेइं सच ज़ोतई कि मैन्हु केरे सारे किसमां केरे पाप त कने परमेशरेरी तुहीन, ज़ै तैना केरतन, अगर तैना मन फिरान त परमेशर तैन माफ़ केरेलो। 29 पन ज़ै कोई पवित्र आत्मारी तुहीन केरे, त तैस कधी भी परमेशर माफ़ न केरेलो। पन तै मैन्हु हमेशारे पापेरो दोषी बेनि गालो।” (aiōn g165, aiōnios g166) 30 यीशुए एन्चरां ज़ोवं किजोकि तैना यीशुएरे बारे मां एन ज़ोते थिये कि तैस पुड भूतेरो सायो आए। 31 तैखन यीशुएरी अम्मा त कने तैसेरे ढला तैडी आए। तैना घरेरे बेइर खडे भोइतां तैस जो बिस्तार भेजो। 32 तैना घरेरे अन्तर न गेइ सके किजोकि मैन्हु केरि भीड यीशुएरे चेत्रे पासन बिशशोरी थी। एल्हेरेलेइ तैन लोकेई यीशु सेइं ज़ोवं, “तक, तेरी अम्मा त तेरे ढला बेइर खडे आन। तैना तीं सेइं मिलनू चातना।” 33 पन यीशुए तैनन जुवाव दित्तो, “अवं तुसन ज़ोताई मेरी अम्मा त कने मेरे ढला कौन आन!” 34 तैखन यीशुए तैन लोकां केरे पासे तेकतां ज़ोवं, ज़ैना तैसेरे चेत्रे पासन बिशशोरे थिये, “तक्का, मेरी अम्मा त कने मेरे ढला इना आन। 35 किजोकि ज़ै कोई परमेशरेरी मेज्जी पुड चलते, तैए मेरो ढला, मेरी बेइन ते मेरी अम्मा आए।”

4 तैल्ला पत्ती, यीशु फिरी गलील समुन्दरेरे बन्ने लोकन शिक्षा देने लगे। मैन्हु केरि एन्त्री भीड तैस कां अकोट्टी भोइ। यीशु समुन्दरेरे मां एक्की किशती मां चढ़ो ते बिशशी जेव, ताके ते सेबभी लोकन परमेशरेरी गल्लां केरि शिक्षा देइ सके। मैन्हु केरि सारी भीड तैसेरी गल्लां शुन्तां समुन्दरेरे बन्ने पुड खडी राई। 2 यीशुए तैनन बेडि गल्लां मिसालन मां ज़ोई। तैनी शिक्षा देइतां तैन लोकन सेइं ज़ोवं, 3 “ई कहानी शुना! एक्सां अक बीज बेनेबालो बीज बेने जो जेव। 4 बीज बेते बार किछ बीज बत्तेरे डलेखी बिछडू त चुडोल्लेई एइतां तैन बीज चुनू। 5 किछ बीज घोडनबाली ज़मीनी पुड बिछडू, ज़ेडी तैस डुग्धी मिन्ती न मेलनेरे वजाई सेइं तैन लूशी उगू त बूटो लगे। 6 पन ज़ैखन दिहाडो निस्सो, त तै निकडो बूटो फुककोई जेव। ते ज़ील न छडुनेरे वजाई सेइं शुक्की जेव। 7 होरु किछ बीज कंटां केरे झैल्लन मां बिछडू। ज़ैखन तैडी बूटो लगे, त कंटां केरे झैल्लेई बेडोइतां तै बूटो दबेइ छुट्टे, त तैनी बुटे फल न दित्तो। 8 पन किछ बीज रोडी ज़मीनी पुड बिछडू, त तैन उगू त बेडोवं त फलदार भोवं। तैन मरां केन्ची बीजे टलही गुणा फल दित्तो, त केन्ची बीजे शठ गुणा, त केन्चे शौव गुणा।” 9 ए मिसाल शुनानेरे बाद, यीशुए लोकन सेइं ज़ोवं, “जै कोई समझनू चाते, तै ध्याने सेइं शुने त समझे।” 10 तैल्ला पत्ती, ज़ैखन यीशु मैन्हु केरि भीडी करां अलग थियो, त तैखन तैसेरे सैथेई त कने तैसेरे 12 चेलेई यीशु तैस मिसालेरे बारे मां पुच्छू। 11 यीशुए तैन सेइं ज़ोवं, “अवं तुसन परमेशरेरे राज़ेरो भेद समझेईलो। पन होरि लोकां केरे लेइ मिसालन मां ज़ोवं गाते। 12 ताके ज़ेन्चरां परमेशरेरी किताबी मां लिखोरुए तेन्चरां भोए कि, “ज़ैन अवं केरतई, तैन तैना बार-बार हेरेले, पन तैना तैसेरो मतलब न बुझोले। ज़ैन अवं ज़ोतई, तैन तैना बार-बार शुनेले, पन मेरी गल न समझेले। एरू न भोए कि तैना अपने पापन करां मन फिरान त तैन केरे पाप माफ़ किये गान।” 13 तैल्ला पत्ती, यीशुए तैन सेइं ज़ोवं, “कुन तुसेई तै मिसाल न समझी? अगर तुस तैस मिसाली न समझथ, त फिरी होरि सब मिसालां केन्चरां समझेले? 14 अवं तुसन तै मिसाल समझताई। बीज बेनेबालो तै आए, ज़ै परमेशरेरी गल्लां लोकन शुनाते। 15 ज़ैना मैन्हु परमेशरेरी गल्लां शुन्तन, तैन मरां किछ लोक तैस बत्तेरे ज़ेरे आन, ज़ेडी बीज बिछडते। तैना त परमेशरेरी गल्लां शुन्तन, पन शैतान अकदम एइतां तैन मैन्हु केरे दिले मरां परमेशरेरी गल्लां केड्डी छुट्टे।

16 किछ होरे लोक, ज़ैना परमेशरेरी गल्लां शुन्तन, तैना तैस घोडनबैली ज़मीनेरे ज़ेरे आन। तैना परमेशरेरी गल्लां शुन्तन त खुशी सेइं तैन कबूल भी केरतन। 17 पन ज़ेन्चरां निकडो बूटो घोडनबैली ज़मीनी मां मिन्ती घट भोनेरे वजाई सेइं लूशी लगते, तेन्चरां एना मैन्हु भी भोतन। तैना मजबूत विश्वास न रखन। एल्हेरेलेइ तैना थोडे दिहाइन तगर विश्वास रखतन। पन ज़ैखन परमेशरेरी गल्लां केरे मुताबिक चलनेरे वजाई सेइं तैन पुड मुसीबतां एचन त कने ज़ैखन लोकन केरां सताए गातन, त तैखन तैना अकदम अपने विश्वास छेइतां ठोकर खातन। 18 होरे किछ लोक, ज़ैना परमेशरेरी गल्लां शुन्तन, तैना तैस कंटां केरे झैल्लां केरे ज़मीनेरे ज़ेरे आन। तैना परमेशरेरी गल्लां त शुन्तन, 19 पन तैना इस दुनियारी फिक्र केरतन, त कने दौलतरे वजाई सेइं थोखो खातन, त तैना बडे चीज़ां केरु लालच केरतन। एसेरे वजाई सेइं तैना परमेशरेरी गल्लां बिसरी छुडन त तैन गल्लन पुड न चलन। (aiōn g165) 20 पन किछ लोक, ज़ैना परमेशरेरी गल्लां शुन्तन त कने तैन पुड चलतन, तैना तैस रोडी ज़मीनेरे ज़ेरे आन। तैना परमेशरेरी गल्लां शुन्तन त कबूल भी केरतन त फल देतन, मतलब की तैना परमेशरेरी गल्लां केरे मुताबिक ज़िन्दगी जीतन। कोई टलही गुणा, कोई शठ गुणा त कोई शौव गुणा फल देतन।” 21 तैल्ला पत्ती, यीशुए मैन्हु केरि भीडी सेइं ज़ोवं, “कैरी बलतो दीयो एन्तां हेटी मां या खट्टी हठ न रखइ। पन केन्ची उम्मी तैरी पुड रखखो गाते। (ताके सारे घरे लौ भोए।) 22 कोई गल छुप्पोरी न राली, पन सैरी गल्लां बेंदी भोली, ते न कोई भेद छुप्पोरो रालो, पन सारो भेद बांदो भोलो। 23 ज़ै कोई समझनू चाते, तै ध्याने सेइं शुने त समझे।” 24 तैल्ला पत्ती, यीशुए मैन्हु केरि भीडी सेइं ज़ोवं, “होशियार राथ कि अवं तुसन कुन शिक्षा देइ राओरोई। मेरी शिक्षाई शुन्तां, ज़ेत्री तुस मेरी गल मन्नेले तेत्री परमेशर तुसन समझ देलो। हॉ, परमेशर तुशरी समझ होरि भी बधालो। 25 किजोकि ज़ैस कां परमेशरेरी मज्जी समझनेरी इच्छा आए, तैस परमेशर जादे समझ देलो। पन ज़ैस कां परमेशरेरी मज्जी समझनेरी इच्छा नई, तैस केरां, थोडी ज़ेरि समझ, ज़ै तैस कां आए, तै भी नी गाली।” 26 तैल्ला पत्ती, यीशुए मैन्हु केरि भीडी सेइं ज़ोवं, “परमेशरेरु राज़ एरू ज़ेरू आए, कि अक मैन्हु ज़मीनी पुड बीज बेते। 27 तै मैन्हु हर राती झुलते त दीसां बींजते। तैन बीज उगने लगोरुए त बडोने लगोरुए, पन तैस पतो न चले कि तैन केन्चरां भोते। 28 केन्चेरी महतरे बोर ज़मीनी एप्पु फल आन्चे। पेइले मुकेरे निस्तन, बादे मां शिल्लां निस्तन, तैल्ला पत्ती शिल्लन गलेव लगतन। 29 आखरी मां, ज़ैखन गलेव पेक्की गातन, तैखन अकदम तै मैन्हु कटाई केरनेरे लेइ मैन्हु भेजते, किजोकि कटाईरो वक्त ओरो भोते।” 30 तैल्ला पत्ती, यीशुए मैन्हु केरि भीडी सेइं ज़ोवं, “अस परमेशरेरु राज़ेरी मसाल कोस चीजी सेइं देइ सकतम? कोस मिसाली सेइं अस तैस समझेइ सकतम? 31 परमेशरेरु राज़ शरीएरे बीजेरू ज़ेरू आए (ज़ै शरीयो इसाएले मां भोते)। ज़ैखन तैन बीज ज़मीनी मां बेव गाते, तैन सारे बीजन केरां निकडू भोते। 32 पन ज़ैखन तैन बीज बेव गाते, तै उगतां सारे निक्के-निक्के बुटन केरां बड्डी भोते। तैसेरी एन्त्री बेड्डी डेलडी निस्चन, कि अम्बरेरां चुडोल्ली तैसेरी छावी मां अपने आले बनेइ सकतन।” 33 एन्चरां बेडि मिसालां ज़ोइतां, यीशु तैन लोकन परमेशरेरी गल्लां शुनातो थियो, ज़ेजू तैना शुनी सकते थियो। 34 तै हमेशा मिसाल देइतां परमेशरेरे राज़ेरे बारे मां तैन सेइं ज़ोतो थियो। पन ज़ैखन मैन्हु केरि भीडी मरां यीशु त तैसेरे चले अलग बिशते थियो, तैखन यीशु अपने चेलन सेइं सैरी मिसालां केरो मतलब समझोतो थियो। 35 तैस दिहाडेरे बादे मां, ज़ैखन डलोइ भोइ, यीशुए अपने चेलन सेइं ज़ोवं, “एज्जा, अस गलील समुन्दरेरे पार चलमा।” 36 तैल्हेरेलेइ मैन्हु केरि भीड छेइतां तैना तैस किशती मां चढ़े ज़ैस मां यीशु पेइलो थियो, त तैना तैट्ठां चले जे। होरि किछ किशती मां भी लोक तैन सेइं साथी जे। 37 ज़ैखन तैना समुन्दर पार केरने लगोरे थियो, तैखन अक बड्डी तूफान चलो, त छेल्ली एडी तगर पुज्जी कि किशती पैनी सेइं भेरोई जेई। 38 पन यीशु किशतेरी पेत्री पासे, शेराने पुड क्रोडी रेखतां झुल्लोरो थियो। तैखन तैसेरे चेलेई तै बींजोइतां तैस सेइं ज़ोवं, “हे गुरु, कुन तीं फिक्र नई, अस त मरने बालेम।” 39 तैखन यीशुए उठतां तूफान डांटो,

त समुन्दरे सेइं ज़ोवं, “शान्त रा, रुकी गा!” अकदम तूफान रुकी जेव त समुन्दर शान्त भोव। 40 तैखन यीशुए अपने चेलन सेइं ज़ोवं, “तुस किजो डरतथ? कुन तुसन हेजू भी मीं पुड़ विश्वास नई?” 41 पन तैना बड़े डेरि जे त एप्पू मामेइं जोने लगगे, “ए मैन्हु कौन आए कि तूफान त समुन्दर भी एसेरो हुकम मन्तन!”

5 यीशु त तैसेरे चले गलील समुन्दरे पार, गिरासेनी इलाके मां पुज्जे। 2 जैखन यीशु किशती पुड़ेरां ओस्सो, त तैखन अक मैन्हु, ज़ैस पुड़ भूतां केरो सायो थियो, कन्नन मामेइं यीशु कां मिलने अव। 3 तै मैन्हु कन्नस्ताने मां रातो थियो। (तै मैन्हु बड़ो खतरनाक थियो।) कोई तैस शंगली सेइं भी न बंधी सकतो थियो। 4 किजोकि (पेड़ले बड़े बार) लोकेइं तैसेरे हथ पाव शंगलन सेइं बंधारे थियो। पन हर बार तै हथ्यां केरि शंगलां टलोइतो थियो त पव्वां केरि शंगलां केरे टुकड़े-टुकड़े केरतो थियो। कोई तैस केबू न केरि सकतो थियो। 5 तै हमेशा रात-दिहाड़ी कन्नस्ताने मां त कने पहैइन पुड़मेइं हन्ठतो थियो त चिन्दां मारतो थियो, त अपने आपे घोड़न सेइं ज़ाखी केरतो थियो। 6 जैखन तैनी मैने यीशु दूरेरां लाव, त तै दौड़तां यीशु कां अव ते तैस कां मथ्यो टेको। 7 यीशुए भूते सेइं ज़ोवं, “हे भूता, एस मैन्हु मरां निस्सी गा!” तैनी भूते ज़ोरे सेइं चिन्दां मेरतां ज़ोवं, “हे यीशु, परमप्रधान परमेशेरेरा मट्टा, मीं तीं सेइं कुन कम? अव तीं परमेशेरी कसम देताई, मीं दुख न दे।” 9 एल्हेरेलेइं यीशुए तैस पुच्छू, “तेरू कुन नवं आए?” तैनी यीशु सेइं ज़ोवं, “मेरू नवं फौज आए, किजोकि अस बड़े आम।” 10 तैखन तैनी यीशु कां बड़ी मिन्नत की, “इस इलाके मरां असन बेइर न भेज।” 11 तैड़ी पहैड़ी पुड़ सूर्रां केरो अक बड़ो घान च़ेरी राहोरो थियो। 12 तैल्हेरेलेइं तन भूतेइं यीशु कां मिन्नत की, “महरबानी केरतां असन उन सूरन मां भेज्जी दे ताके अस उन मां गामा।” 13 तैखन यीशुए तैनन, सूरन मां गानेरी अज़ाज़त दिती, त तैना भूतां तैस मैन्हु मरां निस्तां सूरन मां जेआं। तैखन सूर्रां केरो घान, ज़ैस मां लगभग दूई हज़ार सूर थिये, टिब्ले पुड़ेरां बिछड़तां अकदम समुन्दरे मां डुबतां मेरि जे। 14 जैखन सूर्रां केरे च़ारनेबालेईं एन हेरू, त तैना डेरि जे। तैनेईं तैट्ठां नेशतां नगरी मां त कने आसेपासेरे इलॉव्वन मां ए खबर शुनाई। तैल्हेरेलेइं लोक एप्पू हेरनेरे लेइं तैड़ी आए। 15 जैखन नगरेरे लोक यीशु कां पुज्जे, त तैस मैन्हु, ज़ैस मां पेड़ले भूतां केरि फौजेरो सायो थियो, हुनी लिगडां लगगोरे त कने होशी मां लेइतां डेरि जे। 16 जैनेईं तैना गल्लां पेड़ले लेवरी थी, तैनेईं तैस मैनेरे बारे मां ज़ैस पुड़ भूतेरो सायो थियो त कने तैन सूर्रां केरे बारे मां पूरो हाल लोकन शुनाव। 17 तैना यीशु कां मिन्नत केरतां जोने लगगे कि, “इश्शे इलाके मरां च़ेलि गा!” 18 जैखन यीशु वापस गानेरे लेइं किशती मां च़ढ़ने लगगे, त तैनी मैने ज़ैस मां पेड़ले भूतां केरो सायो थियो, यीशु कां मिन्नत की कि, “मीं एप्पू सेइं साथी च़लने दे।” 19 पन यीशुए तै एप्पू सेइं साथी च़लने न दित्तो। पन तैनी तैस सेइं ज़ोवं, “अपने घरे जो गा त कने अपने लोकन सेइं ज़ो, कि प्रभु परमेशेरे तीं पुड़ दया केरतां तेरे लेइं केरू बडू कम कियोरूए।” 20 एल्हेरेलेइं तै मैन्हु गेइतां दिकापुलिस इलाके मां लोकन शुनाने लगगे कि यीशुए मेरे लेइं केरू बडू कम कियोरूए। सारे लोक ए गल शुन्तां हेरान भोइ जेव। 21 तैल्ला पती, यीशु फिरी किशती मां गलील समुन्दरेरे इन्ता पासे वापस अव, त मैन्हु केरि बड़ी भीड़ तैस कां अकोट्टी भोइ। यीशु समुन्दरेरे बन्ने पुड़ थियो। 22 तैखन यार्ईर नव्वेरो मैन्हु तैड़ी अव, ज़े यहूदी लोकां केरे प्रार्थना घरेरे प्रथान्न मरां अक थियो। जैखन तैनी यीशु लाव, त तैसेरे पावन पेव। 23 तैनी एन ज़ोइतां यीशुए सेइं बड़ी मिन्नत की, “मेरी निकड़ी कुई मरनेबाली आए। तू मीं सेइं साथी एइतां तैस पुड़ अपनो हथ रख, ताके तै बेज़्जोए ते ज़ींती राए।” 24 एल्हेरेलेइं यीशु तैस सेइं साथी तैसेरे घरे जेव। मैन्हु केरि अक बड़ी भीड़ यीशु पती च़ली, इड़ी तगर कि लोक यीशु पुड़ बिछड़ते थिये। 25 तैस भीड़ी मां अक कुआन्श भी थी, ज़ैस 12 साला केरि खून चलनेरी बिमारी थी। 26 तैसां बड़े बेइदन केरां बड़ो दुख झल्लो। बिमारी ठीक भोनेरे लेइं तैसां अपने सब पेंइसे खेर्ची दित्ते, पन तैस कोई फेइदो न भोव। पन तै होरि भी जादे बिमार भोइ जेई। 27 तै

यीशुए बारे मां शुन्तां अपने दिले मां ज़ोती थी, “अगर अव सिर्फ तैसेरे लिगड़े सेइं हथ लाएली, त अव बेज़्जोईं गाली।” एल्हेरेलेइं तै मैन्हु केरि भीड़ी मां यीशुए पजेवरां आई तै तैसेरे लिगड़े सेइं हथ लाव। 29 जैखन तैसां यीशुए लिगड़े सेइं हथ लाव, त अकदम तैसेरो खून चलनेरी बिमारी बेज़्जोईं। तैसां अपनी जानी मां बुज्जू कि अव तैस बिमारी केरां बेज़्जोरी आई। 30 यीशुए अकदम बुज्जू कि मीं मरां शक्ति निस्सोरीए। एल्हेरेलेइं तैनी मैन्हु केरि भीड़ी मां च़ेरे पासन मुइतां लोकन पुच्छू, “मेरे लिगड़े सेइं केनि हथ लाव?” 31 तैसेरे चेलेईं तैस सेइं ज़ोवं, “तू हेरतस कि मैन्हु केरि भीड़ तीं पुड़ बिछड़ने लगगोरी, फिर भी तू किजो पुछतस कि ‘केनि मीं सेइं हथ लाव?’” 32 पन यीशु तैस हेरनेरे लेइं, ज़ैनी एरू कियोरू थियू, च़ेरे पासन तकने लगगे। 33 तैखन तै कुआन्श डरती ते थर्कती थी, किजोकि तै ज़ानती थी कि तेसां मूसोरो कानून टलोइरोए। तै अगगर आई तै यीशुए पावन पुड़ बिछड़तां, तैस सेइं सैरी गल्लां सच-सच जोने लगगी। 34 पन यीशुए तैस सेइं ज़ोवं, “हे कुईए, तेरे विश्वासे, ज़ै तीं मीं पुड़ रख्खोरो, तैनी तू बज्ज़ाई। खुशी सेइं घरजो गा, ते हुनी तू एस बिमारी केरां बेच़ी जेई।” 35 ज़ताली यीशु ई गल मसां ज़ोई राओरो थियो, तैखन प्रार्थना घरेरे लीडरेरे घरेरां किछ मैनेईं एइतां तैस सेइं ज़ोवं, “तेरी कुई मेरि जोरीए, हुनी गुरू किजो तकलीफ़ देतस?” 36 पन यीशुए तैन केरि गल न शुन्तां प्रार्थना घरेरे लीडरे सेइं ज़ोवं, “न डर। सिर्फ मीं पुड़ विश्वास रखा।” 37 यीशु ते यार्ईर च़लने लगगे, पन यीशुए पतरस, याकूब ते तैसेरो ढ़ला यूहन्नारे अलावा, होरो कोई एप्पू सेइं साथी एजने न दित्तो। 38 प्रार्थना घरेरे लीडरेरे घरे मां पुज्जां यीशुए हल्लो मच़ोरो लाव ते कने लोक बड़े लेरां देते त शोग केरते लाए। 39 तैखन यीशुए घरे मां गेइतां तैन सेइं ज़ोवं, “तुस किजो रोलो मच़ातथ त लेरां देतथ? कुई मरीं नई, पन झुल्लोरीए।” 40 जैखन तैन लोकेईं एन शुनू, त तैना तैसेरो मज़ाक बनाने लगगे, किजोकि तैना ज़ानते थिये कि कुई मेरि जोरीए। तैखन यीशुए सारे मैन्हु तैट्ठां केइतां, सिर्फ कुईअरे हाज-बव त कने अपने टलाई च़ेलन सेइं साथी कमरेरे अन्तर जेव, ज़ेड़ी कुई पेत्री थी। 41 तैखन यीशुए कुईएरो हथ टलेइतां तैस सेइं अपनि भाषाईं मां ज़ोवं, “तलीता कूमी!” ज़ेसेरो मतलब कि, “हे निकड़ी कुईए, अव तीं सेइं ज़ोतई, खड़ी उठ!” 42 अकदम कुई उठतां च़लने फिरने लगगी, किजोकि तै कुई 12 सालां केरि थी। एन हेरतां तैना बड़े हेरान भोए। 43 पन यीशुए तैन हुकम देइतां ज़ोवं कि, “ए गल केन्ची सेइं न ज़ोइयथ। एस कुई किछ खाने जो देथ।”

6 तैल्ला पती, यीशु तैट्ठां निस्तां अपने नगर नासरते जो जेव। तैसेरे च़ेले तैस सेइं साथी च़ले। 2 आरामेरे दिहाड़े, यीशु तैन केरे प्रार्थना घरे मां गेइतां तैन लोकन परमेशेरी गल्लां केरि शिक्षा देने लगगे। तैसेरी शिक्षा शुन्तां बड़े लोक हेरान भोए ते एक्की होरि पुछने लगगे, “एनी मैने एना गल्लां कोइटां शिख्खी? एस एत्री अकल कोइटां आई? एस एत्रे चमत्कार केरनेरी शक्ति कोइटां मैल्ली! 3 ए त टलखान आए, ज़ैन मरियमारू मट्टू आए। ए त याकूब, योसेस, यहूदा, ते शमोनेरो ढ़ला आए! एसेरी बेइनां भी इश्शे इड़ी रेइचन!” एल्हेरेलेइं तैनेईं यीशुएरो इन्कार कियो। 4 तैखन यीशुए तैन लोकन अक कहावत ज़ोई, “नबी बेइरीए लोकन मां इज़्ज़ातदार भोलो, पन अपने नगरेरे लोकन केरां ते कने अपने रिश्तेदारन केरां त कने अपने घरेबालन मां बेइज़्ज़त भोलो।” 5 तैन लोकेईं यीशु पुड़ विश्वास न केरनेरे वजाई सेइं, तैनी तैस नगरी मां सिर्फ थोड़े ज़ेरे बिमार मैनु पुड़ हथ रेखतां तैना बज्ज़ाए, तैन केरे अलावा होरो कोई चमत्कार न केरि सको। 6 यीशु नासरत नगरेरे लोकां केरो अविश्वास हेरतां हेरान भोव। तैल्ला पती, तै अपने च़ेलन सेइं साथी च़ेरे पासन केरे इलॉव्वन मां परमेशेरी गल्लां केरि शिक्षा देतो राव। 7 तैल्ला पती, यीशुए अपने 12 च़ेले एप्पू कां कुजेइतां, तैन दूई-दूई केरतां भेजने लगगे। भेजने केरां पेड़ले, तैनी अपने च़ेलन, लोकन मरां भूतां केरो सायो कढनेरो अधिकार दित्तो। 8 ते तैनी तैन हुकम दित्तो, “बतां च़लते-च़लते सोटेरे अलावा होरू किछ न नेइयथ। न रोटी न झोलो त कने बेटवे मां पेंइसे भी न नेइयथ। 9 पन बूट लेइयथ, पन दूई-दूई कुरते न लेइयथ। 10 जैखन

तुस केन्ची इलोव्वं मां गाथ, अगर कोई अपने घरे बिश्नेरेलेइ तुसन कुजाए, त तैसेरे घरे मां बिश्थथ, जांतगर तैस इलोव्वंरान न निस्स्थथ। 11 अगर केन्ची इलोव्वेरे लोक तुसन कबूल न केरन त कने तुश्शी गल्लां न शनून, त तैट्ठां चलते-चलते तुस अपने पावां केरि धूड झेडी छेडुथ ताके तैन केरे खलाफ गवाही भोए। (अवं तुसन सेइं सच जोतई कि परमेशरेरे आदालतेर दिहाड़े बुरे लोकन सजा देलो, जैना सदोम त कने अमोरा नगरन मां रहते थिये। पन जैना लोक तुश्शी गल्लां न शुनेले, तैस नगरेरे लोकन परमेशर बडी जादे सजा देलो) 12 यीशुएरो हुकम शुन्नेरे बाद, तैनेई तैट्ठां निस्तां बडे नगरन मां गेइतां लोकन परमेशरेरी गल्लां शुनेई कि, “तुस अपने पापन करां मनफिराथा।” 13 ते तैनेई बडे लोकन मरां भूतां केरो सायो भी कडु, त कने बडे बिमार मैनन पुड तेले लेइतां बड़झाए। 14 हेरोदेस राजे भी यीशुएरे बारे मां शूनू, किजोकि यीशुएरु नवं मुशूर भोरू थियूं। तैनी यीशुएरे बारे मां जोवं कि, “शायद, यूहन्ना, जै बपतिस्मो देनेबालो थियो, मुसुदन मरां जीतो भोरोए। एल्हेरेलेइ, तै एना चमत्कार केरि सकते।” 15 होरेई मैनेई यीशुएरे बारे मां जोवं कि, “शायद, तै मैन्हु एलिव्याह नबी आए।” पन किछ होरेई मैनेई जोवं कि, “तै त पराने ज़मानेरे परमेशरेरी गल्लां जोनेबालां केरो जेरो अक नबी आए।” 16 पन हेरोदेस राजे लोकां केरि गल्लां शुन्तां जोवं कि, “तै मैन्हु त यूहन्ना आए, जेसेरी क्रोडी भी कट्टेरी थी। तै मुसुदन मरां जीतो भोरो आए।” 17 हेरोदेस राजे एन्चरां सोचू, किजोकि थोडे दिहाइना पेइले, तैनी एपू अपने सिपाही भेजतां यूहन्ना कैद केरतां छुट्टोरो थियो। तैनी अपने ढला फिलिप्पुसेरी लाडी हेरोदियासेरी वजाई सेइं एन्चरां कियोरू थियूं, जैस सेइं तैनी इला बनोरो थियो। 18 एल्हेरेलेइ, यूहन्ना हेरोदेस राजे सेइं बार-बार जोतो थियो कि, “तीं अपने ढलाएरी लाडी सेइं इला बनानो जेइज नई।” 19 तैल्हेरेलेइ हेरोदियास रानी यूहन्ना सेइं दुश्मनी रखती थी ते तैस कल्ल केरनो चाती थी। पन ते तेन्चरां न केरि सकती थी, 20 किजोकि हेरोदेस राजे पतो थियो कि यूहन्ना अक धर्मी ते पवित्र मैन्हु थियो। तैल्हेरेलेइ, हेरोदेस राजो तैसेरी बडी इज्जत केरतो थियो त कैदखाने मां हेरोदियास रैनी केरां बचेइतां रखतो थियो। त तै यूहन्नारी गल्लां शुन्तां बडो डरतो थियो, पन तैसेरी गल्लां खुशी सेइं शुन्तो भी थियो। 21 आखकार यूहन्ना मारनेरो ठीक मौको मैल्लो। हेरोदेस राजे अपने ज़रमेरी दिहाड़ी मां अक धाम रख्खी। तैस धामी मां तैनी अपने बडे खास अफसरन, त कने फोजी अफसरन, त कने गलील इलाकेरे बडे-बडे मैन्हु कुजाए। 22 तैखन हेरोदियास रैनेरी कुई तैस कमरे मां आई, जेडी तैना बिश्शोरे थिये। त तैसां तैडी नेचतां हेरोदेस राजो त कने तैसेरे मेहमान खुश किये। तैखन राजे कुईए सेइं जोवं, “जैन तू चास मीं केरां मग, अवं तीं देलो।” 23 त राजे तैस कुईए सेइं कसम भी खाइ कि, “जैन किछ तू मीं केरां मगेली, अवं तीं देलो, इडी तगर कि अवं अपनू अधु राज भी देलो।” 24 तैल्हेरेलेइ तैस कुइयां बेडर गेइतां, अपनि अम्मा पुच्छू, “अवं हेरोदेस राजे केरां कुन मेग्गी?” तैखन तैसेरी अम्मा जोवं, “यूहन्ना बपतिस्मो देनेबालेरी क्रोडी मग।” 25 अकदम ते कुई अन्तर राजे कां आई त तैस कां मिन्त की, “अवं चाताई कि, तू यूहन्ना बपतिस्मो देनेबालेरी क्रोडी केरतां एक्की थाले मां हुन्ना आन।” 26 तैसेरी गल शुन्तां राजो बडो दुखी भोव, पन अपनि कसमेरे वजाई सेइं त कने अपने मेहमानां केरे वजाई सेइं तैने इन्कार केरनो न चाव। 27 तैल्हेरेलेइ, तैनी अकदम एक्की सिपाही हुकम दित्तो कि, “यूहन्नारी क्रोडी केरतां आन।” 28 सिपाही कैदखाने मां गेइतां यूहन्नारी क्रोडी कट्टाई, त एक्की थाले मां रेखतां आनी त कुईए कां दित्ती। त कुइयां गेइतां अपनि अम्मा कां दित्ती। 29 ए गल शुन्तां यूहन्नारे चले तैडी आए, त तैसेरी लाश नेइतां कमी मां देब्वी छडी। 30 परमेशरेरी गल्लां लोकन शुनामेरे पत्ती, यीशुएरे प्रेरित तैस कां वापस आए, जैना तैनी भेजोरे थियो। जैन किछ तैनेई लोकन सेइं कियोरू ते शिक्षा दित्तोरी थी, तैन सारी गल्लां यीशु सेइं शुनाई। 31 बडे लोक यीशु त कने तैसेरे चलन कां एइते गाते थिये। एस वजाई सेइं, तैनन रोटी खानेरे लेइ भी मौको न थियो मैल्लोरो। तैल्हेरेलेइ यीशुए अपने चलन सेइं जोवं, “मीं सेइं साथी केन्ची अकेन्ती ठैरी एज्जा, त थोडो जेरो आराम केरा।” 32 एल्हेरेलेइ तैना किश्ती मां च़ेइतां, अकेन्ती ठैरी

च़ेले जे। 33 पन बडे लोकेई यीशु त तैसेरे चले गाते लेइतां पिशानी छुडे कि तैना कोरां च़लारेना। तैल्हेरेलेइ, सारे नगरेरे मैन्हु पैदल दौइतां तैन केरां पेइले तैडी पुस्तां अकोट्टे भोए। 34 ज़ैखन यीशु किश्ती पुइरां ओस्सो, त तैनी मैन्हु केरि अक बडी भीड लेइतां तैन पुइ तरस खाव, किजोकि तैना मैन्हु तैन भैडुं केरे जेरे थिये, जैन केरो कोई पुहाल न भोए। तैखन यीशु तैन लोकन परमेशरेरे राज़ेरे बारे मां बेइ गल्लां केरि शिक्षा देने लगो। 35 ज़ैखन दिहाडी डुबने लगोरी थी, त यीशुएरे चलेई तैस कां एइतां जोवं, “ई सुनसान ठार आए, ते च़िर भी बडू भोरू आए। 36 एन मैनन् भेज, ताके एना च़ेरे पासं केरे बेस्तन त कने इलोव्वन मां गेइतां अपने लेइ खाने जो रोटी घिन्ना।” 37 पन यीशुए तैनन् जुवाब दित्तो कि, “तुस्से एन खाने जो रोटी देथा।” पन तैनेई तैस सेइं जोवं, “कुन अस दूई शीव दिहाडी केरि कमाई सेइं रोटी घिन्तां एन मैनन खुवाम? एन न भोइ सके।” 38 एल्हेरेलेइ, यीशुए तैन सेइं जोवं, “तुसन कां केत्री रोटी आन? गेइतां हेरा।” पतो केरनेरे पत्ती, तैनेई यीशु सेइं जोवं कि, “पंच रोटी त कने दूई मेछली आन।” 39 तैखन यीशुए अपने चलन हुकम दित्तो कि, “सारे मैन्हु नीले घासे पुइ बिशाला।” 40 एल्हेरेलेइ तैना मैन्हु शीव-शीव त कने पज़ां-पज़ां केरि हुन्डी मां बिश्शी जे। 41 तैखन यीशुए अपने हथ्ये मां पंच रोटी ते दूई मेछली टुलेइ, त अम्बरेरे पासे तेकतां शुरु कियूं। तैल्ला पत्ती, यीशु तैना रोटी टुलोइतां चलन कां देते जेव कि लोकन खाने जो देन। तेन्चरां दूई मेछली भी तैन सारे लोकन बेटी दित्ती। 42 ते सारे मैन्हु खेइतां रेज्जी जे। 43 तैल्ला पत्ती, यीशुएरे चलेई बेञ्जोरी रोटी त कने मेछली केरे टुकडन सेइं 12 टोकरी भेरि। 44 जैनेई रोटी त मेछली खेइ, तैन मां 5000 मइड थिये। 45 तैल्ला पत्ती, यीशुए अपने चलन हुकम दित्तो कि, “तुस किश्ती मां च़ेइतां मीं केरां पेइले समुन्दरेरे उस पार बेतसैदा नगरे जो च़ली गाथ, जांतगर अवं एन लोकन न भेज्जी।” त तैना तैट्ठां जे। 46 लोकन भेजनेरे पत्ती, यीशु तैट्ठां निस्तां नेडे एक्की पहडी पुइ प्रार्थना केरनेरे लेइ जेव। 47 ज़ैखन इलोइ भोइ, त तै किश्ती, जैस मां यीशुएरे चले थिये, समुन्दरेरे मझाटे थी, त यीशु अकैल्लो ज़मीनी पुइ थियो। 48 तैनी हेरू कि तैसेरे चले किश्ती मां च़ेपू देइ-देइ परेशान भोने लगोरेन, किजोकि एगोवरां बडी तेज हवा च़लारी थी। लगभग झेइजेरे च़ेरे बजेई ज़ैखन हेजू आंधरू थियूं, यीशु समुन्दरेरे पैनी पुइ च़ेलतां अपने चलन कां अवं। तै तैन केरां अग्रोवं निरन्तू चातो थिये। 49 पन ज़ैखन तैनेई यीशु समुन्दरेरे पैनी पुइ चलतो लाव, त तैनेई सोचो कि तै भूत आए। तैल्हेरेलेइ, तैनेई चिन्डां मैरी, 50 किजोकि तैना सारे तैस हेरतां बडे डेर जोरे थिये। पन तैनी अकदम तैन सेइं गल्लां की ते जोवं, “हिम्मत रखा! अवं आई। डरा न।” 51 तैखन तै तैन केरि किश्ती मां च़ढो, त तूफान च़लनो बन्ध भोइ जेव। तैखन चले बडे हैरान भोए, 52 किजोकि तैनेई न थियूं समझोरू कि यीशु केन्चरां रोटी त कने मेछली बधोरी थी, पन तैन केरे मन बेसमझ भोरे थिये। 53 तैल्ला पत्ती, यीशु त तैसेरे चले गलील समुन्दर पार केरतां गन्नेसरत नंवेरे जगाई पुइ पुज्जे। तैडी तैनेई किनारे पुइ किश्ती बंधतां रख्खी। 54 ज़ैखन तैना किश्ती पुइरां ओस्से, त तैट्टेरे लोकेई यीशु पिशेनी छुडो। 55 एल्हेरेलेइ, तैनेई सारे इलाके मां गेइतां लोकन खबर शुनाई कि यीशु ओरोए। जेडी-जेडी लोकेई शूनू कि यीशु ओरोए, तैडी लोकेई बिमार मैन्हु खटी पुइ छुइतां यीशु कां आन्ने लग्गे, ताके तै तैनन बड़झाए। 56 जेडी कोन्ची इलोव्वन मां, नगरन या बेस्तन मां यीशु गातो थियो, तैडी लोक बिमार मैनन् बज़ारन मां यीशु कां एन्तां रखते थिये। तैना यीशु सेइं मिन्त केरते थिये कि, तैन सिर्फ तैसेरे लिगडे सेइं हुरने देन। जेजे बिमार मैन्हु यीशु सेइं हथ लाते थिये, तैना सारे बेज्जोते थिये।

7 एक्की दिहाड़े किछ फरीसी लोक त कने शास्त्री लोकन मरां किछ लोक, जैना यरूशलम नगरेरां ओरे थिये यीशुए कां अकोट्टे भोए। 2 ते तैनेई हेरू कि यीशुएरे किछ चले रीति रुवाजेरे खलाफ अधोए हथ्यन सेइं रोटी खेइ राओरेन। 3 किजोकि फरीसी लोक त कने सारे यहूदी लोक, जांतगर हथ न धोन तांतगर रोटी न खाते थिये। अपने बुजुर्गां केरि परमपरा च़लानेरे लेइ तैना एन्चरां केरते थिये। 4 ज़ैखन तैना बज़ारेरां घरे एइते थिये, जांतगर तैना

निहान न देन तांतगर रोटी न थिये खाते। होरे भी बडे रीति रुवाज थिये, जैना तैन केरे बुजुर्गन केरां ओरे थिये, जेन्चरां कटोरे, घडे, टलामेरां भांडां रुवाजरे मुताबिक धोना। 5 एल्हेरेलेइ फरीसी लोकेई त कने शास्त्री लोकेई यीशु पुच्छू, “तेरे चले इश्शे बुजुर्गां केरि परमपरा पुड़ की न चलन? पन तैना रुवाजरे खलाफ अधोए हथ्यन सेइं रोटी खातन!” 6 तैखन यीशुए तैन सेइं जोवं, “बडे पेइले यशायाह नेबे तुशशे जेरे पाखंडी केरे बारे मां ठीक भविष्यवाणी कियोरीए कि परमेशरे जोवं, ‘एना लोक ऐशी सेइं त मेरी बडी तारीफ़ करतन, पन एन केरे दिल मीं केरां बडे दूर आन। 7 एना बेफाइदी मेरी आराधना (पूजा) करतन, किजोकि एना त मैन्हु केरि बनोरी परमपरान, परमेशरे हुकमां केरे जेरे लोकन शिक्षा देतन।’” 8 तैखन यीशुए तैन सेइं जोवं, “तुस भी तैन लोकां केरे जेरे आथ, जैना परमेशरे हुकमन टेलतां मैन्हु केरि बनोरी परमपरान मन्तन, जेन्चरां घडे त कने कटोरे रुवाजरे मुताबिक धोने, त कने एसेरे जेरे होरे भी बडे रुवाज न मन्तथा।” 9 फिरी तैनी तैन सेइं जोवं, “तुस केत्रू गलत करतथ, कि अपने रीति-रुवाज मन्नेरे लेइ परमेशरे हुकम टलोइतथ। 10 किजोकि मूसा नेबे जोरूए कि, परमेशरे सारी मैन्न ई हुकम दित्तो कि, ‘तू अपने हाज बव्वेरी केरि इज्जत करे। त ज़ै कोई अपने हाज बव्वे जो बुरु ज़ोलो, तै ज़रूर मारो गालो।’ 11 पन तुस ज़ातथ कि अगर कोई मैन्हु अपने हाज बव्वे सेइं सिर्फ एन ज़ालो, त तैन बडू आप ए कि, ‘मीं करां जै किछ मद्दत तुसन मैल्ली सकती थी, तै पेडली बलिदान भोरीए, यानी परमेशरे जो चढताल चढावोरीए। एल्हेरेलेइ, अवं तुसन किछ न देइ सकी।’ 12 एरी शिक्षा देइतां तुस लोकन तैन केरे हाज बव्वां केरि किछ मद्दत केरने न देथ। 13 एन्चरां तुस अपनि परमपरा च़लानेरे लेइ, परमेशेरी गल्लां टेली छइतथ। एरी जेरि तुस होरि भी बेडि गलत परमपरा मन्ते ओरेथ।” 14 तैखन यीशुए फिरी सारे लोक एप्पू कां कुजेइतां तैन सेइं जोवं, “तुस सारे लोक, मेरी गल ध्याने सेइं शुना ते समझा। 15 एरी कोई चीज नई जै बेइदरां मैनेरे अन्तर गेइतां तैस जुट्टो केरे। पन जैना बुरी चीजां मैनेरे अन्त्रां, यानी तैसेरे दिले मरां बेइर निस्चन, तैनां तैस जुट्टो केरचन। 16 अगर कोई समझनो चाते, त तै ध्याने सेइं शुने।” 17 बादे मां, यीशु मैन्हु केरि भीडी मरां घरे जो जेव। तैखन तैसेरे चेलेई तैस मिसालारे मतलबेरे बारे मां तैस पुच्छू। 18 तैनी तैन सेइं जोवं, “होरी मैन्हु केरे जेरे कुन तुस भी न समझथ? कुन तुस न समझथ कि जै चीज बेइरां मैनेरे अन्तर गाचे, तै तैस जुट्टो न केरि सके? 19 किजोकि तै तैसेरे दिले मां नई, पन तैसेरे पेटे मां गाचे ते बादे मां पेटे मरां निस्सी गाचे।” 20 ज़ोइतां यीशुए समझावं कि खानेरी चीज कोई भी असन जुट्टो न केरे। 21 तैखन तैनी अपने चेलन सेइं जोवं, “जैन मैनेरे अन्त्रेरां निस्ते, तेन्ने परमेशेरी नज़री मां मैन्हु जुट्टो केरते, 21 किजोकि मैनेरे अन्त्रेरां, यानी मैनेरे दिले मरां बुरे खियाल, बचमाशी, चोरी, कल्ल केरनो, 22 अड्डाला देइने गलत कम केरनु, लालच, दुष्ट कम केरनु, बेइमानी, बदचलन, जलन, तुहीन, घमण्ड, ते बेवकूफी एचचन। 23 एना सैरी बुरी गल्लां मैनेरे अन्त्रेरां, यानी दिले मरां निस्तां मैन्हु जुट्टो केरचन।” 24 तैल्ला पत्ती, यीशु तैद्दां निस्तां सूर त सैदा नगरेरे आसेपासेरे इलाकेरे नेडे अव। ते तैडी ते एककी घरे मां जेव। ते ते चातो थियो कि कोई न जैनी सके कि अवं इडी आई। पन ते छेप्पी न सको। 25 तैडी अक कुआन्था थी, जेसेरी निकडी कुईए पुड़ भूतेरो सायो थियो। तै यीशुए बारे मां शुन्तां अकदम तैडी आई ते तैसेरे पावन पुड़ पेई। 26 त तै कुआन्था गैर कौमरी थी ते सुरूफिनिकी इलाकेरी थी। तैसां यीशु सेइं मिन्त की कि, “मेरी कुईए पुड़ेरां भूतेरो सायो केडी देथा।” 27 पन यीशुए तैस सेइं जोवं, “पेइले बचन रजने दे, किजोकि बच्चां केरि रोटी नेइतां कुतरन जो देनी ठीक नई।” 28 तैसां जुवाब दित्तो, “सच्चे, प्रभु! पन कुतरां भी मेजे हेठोरां बच्चां केरि रोहन मरां बिछड़ेरे टुकडे खातन।” 29 तैखन यीशुए तैस सेइं जोवं, “मीं पुड़ तीं एत्रो विश्वास रखवोरोए, एल्हेरेलेइ तू आरामे सेइं घरे जो गा। तेरी कुईए मरां भूतेरो सायो निस्सी जोरोए।” 30 तैसां कुआन्थां तैद्दां अपने घरे वापस एइतां हेरू कि कुई खटी पुड़ आरामे सेइं झुल्लोरी थी, त भूतेरो सायो तैस मरां निस्सी जोरो थियो। 31 यीशु फिरी अपने चेलन सेइं साथी सूर त सैदारे नगरेरे इलाकन मरां निस्तां, दिकापुलिस इलाके मांमेइं

भोइतां गलील समुन्दरेरे नेडे पुज्जो। 32 तैडी किछ लोकेई अक टोवो मैन्हु, जै खेखे भी थियो, यीशु कां एतां तैस सेइं मिन्त की कि, “तू अपने हथ एस पुड़ रख कि ए मैन्हु बेज्जोए।” 33 यीशुए मैन्हु केरि भीडी मरां तै मैन्हु अलग नीयो। तैखन तैनी अपनि एंगलोई तैस मैनेरे कन मां छेड्डी, त अपनि एंगलोई सेइं थुक तैस मैनेरी जिभ्भी सेइं लावं। 34 तैल्ला पत्ती, यीशु अम्बरेरे पासे तेकतां ओशा छुट्टो, त तैस मैन्हु सेइं अपनि (इब्रानी) भाषाई मां जोवं, “इप्फत्तह!” जेसेरो मतलब “खुल्ली गा!” 35 अकदम ते रोडेचारे शुन्ने लगे ते तैसेरी जिभ्भी भी ठीक भोइ जेई, ते ते साफ-साफ गल्लां केरने लगे। 36 तैखन यीशुए तैन मैन्न हुकम दित्तो कि, “ए गल केन्नी सेइं न जोइयथ।” पन जेत्रू जादे यीशुए तैन हुकम दित्तोरो थियो, तेत्रू जादे तैना होरि लोकन ए गल शुनाने लगे। 37 यीशुए चमकारेरां कम्मां केरे जवाइ सेइं, तैना बडे हैरान भोइतां ज़ोने लगे, “कमाल आए! यीशुए जैन किछ भी कियूं सब किछ रोडू कियोरूए! तै टोवन शुन्नेरी ते लट्टन गल्लां केरनेरी शक्ति देते।”

8 तैन दिहाइन मां एरू भोव कि, मैन्हु केरि बडी भोइ यीशु कां फिरी अकोटी भोइ। तैन कां किछ खाने जो न थियूं। तैखन यीशुए अपने चले एप्पू कां कुजेइतां तैन सेइं जोवं, 2 “मीं एन मैन्हु केरि भीडी पुड़ तरस एइते, किजोकि एना टलेइ दिहाइयां केरे देते मीं सेइं साथी आन, ते एन कां खाने जो किछ नई राओरू। 3 अगर अवं एन दलुखोरे घरे जो भेज्जी, त चलते-चलते बत्ती मां थेकतां रेइ गानेन, किजोकि एन मरां कोई-कोई दूरेरां भी आन।” 4 तैसेरे चेलेई तैस जुवाब दित्तो, “इडी सुनसान ठेरी एन मैन्न जो एत्री रोटी कोट्टां आम कि एन मैन्हु रेजतां खान?” 5 तैखन यीशुए तैन पुच्छू, “तुसन कां केत्री रोटी आन?” तैनेई जुवाब दित्तो, “सत रोटी आन।” 6 तैखन यीशुए मैन्हु केरि भीडरे पासे मुइतां तैन जो हुकम दित्तो कि, “जमीनी पुड़ बिशशी गाथा।” तैखन तैनी तैन सत रोटी टलेइतां परमेशेरू शुक्र केरतां टलोडी, ते अपने चेलन कां देते जेव कि तैना लोकन खाने जो देन। ते चेलेई मैन्न रोटी दित्तो। 7 तैन कां थोडी ज़ेरि निककी मेछली भी थी। यीशुए मेछली केरे लेइ भी परमेशेरू शुक्र केरतां अपने चेलन सेइं जोवं, “इना भी लोकन खाने जो देथा।” तेन्चरां तैसेरे चेलेई कियूं। 8 तैना सारे मैन्हु रोटी खेइतां रेज्जी जे। तैल्ला पत्ती, यीशुएरे चेलेई मेछली त कने रोटी केरे बच्चोरे टुकडन मरां सत टोकरे भेरतां सल्ले। 9 तैडी लगभग 4000 मडद थिये। लोकन रोटी खुवानेरे पत्ती यीशुए मैन्हु भेज्जी दित्तो। 10 तैखन तै अकदम अपने चेलन सेइं साथी किशती मां च़ढतां दलमनूना इलाके जो च़लो जेव। 11 फिरी किछ फरीसी लोक यीशु कां एइतां तैस सेइं बेंस केरने लगे। तैना तैस अजमानेरे लेइ तैस पुछने लगे, “असन अम्बरेरां कोई निशान हिरा।” 12 जैखन यीशुए एन शुन्नु, त तैनी अक बड्डो ओशा छेइतां जोवं, “इस जमानेरे लोक मीं केरां किजो निशान मगतन! अवं तुसन सेइं सच ज़ोतई कि इस जमानेरे लोकन, यानी तुसन अवं कोई भी निशान न हिरैई।” 13 तैल्ला पत्ती, यीशु तैन लोकन छेइतां, फिरी किशती मां च़ढते ते गलील समुन्दरेरे पार च़लो जेव। 14 जैखन यीशुएरे चले किशती मां च़ढे, त तैना एप्पू सेइं साथी रोटी नेनी बिसरी जे। किशती मां तैन कां अक्के रोटी थी, 15 जैखन तैना समुन्दरे पार केरि राओरे थिये, त यीशुए तैन समझावं कि, “खबरदार! फरीसी लोकां केरे खमीरेरे बारे मां ते कने हेरोदेस राज़ेरे खमीरेरे बारे मां होशियार रेइयथा।” 16 चले यीशुएरी गल गलत सेमझां एप्पू मांमेइं गलबात केरने लगे कि, “असन कां त रोटी नई, एल्हेरेलेइ यीशुए एन्चरां जोवं।” 17 तैखन यीशुए तैन केरि गल ज़ेन्तां, तैन सेइं जोवं, “तुस एप्पू मांमेइं एन्चरां किजो सोची राओरेथ कि असन कां रोटी नई? कुन तुस हेज्जू भी मेरी गल न समझी ते कने न बुझी? कुन तुशशे मन बेसमझ भोइ जोरेन? 18 कुन तुसन एछ्छी भोइतां भी न लेइहोए? ते कन भोइतां भी न शुनोए? कुन तुसन याद नई? 19 ज़ताली 5000 मैन्हु केरे लेइ पंच रोटी टलोइतां दित्तोरी थी, त तुसेईं बादे मां बच्चोरी रोटी केरे केत्रे टोकरे भेरतां सल्लोरे थिये?” तैनेई तैस जुवाब दित्तो, “बारहे टोकरे।” 20 तैखन तैनी तैन पुच्छू, “ज़ताली मीं 4000 मैन्हु केरे लेइ सत रोटी टलोइतां दित्तोरी थी, त तुसेईं रोटी केरे केत्रे टोकरे भेरतां

सल्लोरे थियेये?" तेनेई तैस जुवाब दित्तो, "सत टोकरे।" 21 तैखन तैनी तैन पुच्छू, "कुन तुसन हेजू भी समझ न आई?" 22 तैल्ला पत्ती, यीशु त तैसेरे चले बैतसैदा नगरे मां आए। लोकेई अक कानो मैन्हु यीशु कां आनो ते तैस कां मिन्नत की कि, "एस मैन्हु सेई हथ लाथ ताके ए बेफ़्ज़ोए।" 23 तैखन यीशुए तैस काने मैनेरो हथ टलेइतां डल्लोव्वे केरां बेदर नीयो। तैखन तैनी तैस काने मैनेरी एछ्छन पुड़ थुकतां, तैस पुड़ हथ रखे, ते तैस पुच्छू, "कुन तू किछ लातस?" 24 तैखन तैनी मैने उबरे तेकतां ज़ोवं, "हाँ, अवं मैन्नू हेरी सकतई, तैना मीं च़लते बुटां केरे ज़ेरे लेइहोतन।" 25 तैखन यीशुए दुइयोवं हटे तैसेरी एछ्छन पुड़ हथ रखे। ते कानो ध्याने सेई लाने लगे। तैसेरी एछ्छी ठीक भोइ जेई, त ते सब किछ साफ-साफ हेरने लगे। 26 तैल्ला पत्ती, यीशुए ते मैन्हु एन जोइतां घरे जो भेजो, "तू इस डल्लोव्वे मां पाव भी न रेखां (ते कने ई गल केन्ची सेई न ज़ोइयां।)" 27 तैल्ला पत्ती, यीशु ते तैसेरे चले बैतसैदा नगरे मरां निस्तां कैसरिया-फिलिप्पी नव्वेरे नगरेरे डल्लोव्वन मां च़ेलि जे। बत्तां च़लते-च़लते यीशुए अपने चेलन पुच्छू, "ज़ैखन लोक मेरे बारे मां गल्लां केरतन, त तैना मेरे बारे मां कुन ज़ोतन कि अवं कौन आई?" 28 तैसेरे चलेई जुवाब दित्तो, "किछ ज़ोतन कि तू यूहन्ना आस, ज़े बपतिस्मो देनेबालो थियो, पन किछ हेरे मैन्हु ज़ोतन कि तू एलियाहा आस, ज़े नबी थियो, पन किछ होरे मैन्हु एन भी ज़ोतन कि तू परमेशेरी गल्लां जोनेबालन मरां अक मैन्हु आस।" 29 तैखन यीशुए अपने चेलन पुच्छू, "पन तुस मेरे बारे मां कुन सोचतथ कि अवं कौन आई?" पतरसे जुवाब दित्तो, "तू मसीह आस।" 30 त यीशुए तैननू समझावं कि, "मेरे बारे मां ई गल केन्ची सेई न ज़ोइयथ।" 31 तैखन यीशु अपने चेलन शिक्षा देनो लगे कि, "मैनेरे मट्टेरे लेइ, यानी मेरे लेइ एन ज़रूरी आए कि मीं बड़े दुख झल्लनेन। यहूदी लोकां केरे बुजुर्गन, प्रधान याजकन, त कने शास्त्री लोकन केरां अवं निकम्मो समझो गानोई त मारो गानोई। पन टलेइ दिहाइना पत्ती अवं फिरी ज़ीतो भोनोई।" 32 यीशुए एना गल्लां तैन सेई साफ-साफ ज़ोई। तैखन पतरस तैस अलग नेइतां डांटेने लगे, "मसीह न मरे।" 33 पन यीशुए मुइतां अपने बाकी चेलनां केरे पासे तक्कू, ते पतरसे सेई झिडकेइतां ज़ोवं, "हे शैतान, मीं केरां दूर भो! (मतलब एन्चरां न सोच! शैतान तीं केरां एन्चरां ज़ुवाते) मीं केरां दूर भोइ गा। तू परमेशेरी गल्लन पुड़ नई, पन मैन्हु केरि गल्लन पुड़ मन लातस।" 34 तैखन यीशुए अपने चले ते कने मैन्हु केरि भीड़ एप्पू कां कुजेइतां सेबनन सेई ज़ोवं, "तुस अगर मेरे चेलो बन्नू चातथ, त तुस अपने आपेरो इन्कार केरा त कने तुस अपनू कूस छुइतां मीं पत्ती च़ला। 35 किजोकि ज़े कोई अपनि जिन्दगी बचानी च़ल, त तै हमेशारी जिन्दगी गुवालो। पन ज़े कोई मेरे वजाई सेई त कने मेरे बारे मां खुशखबरी होरि लोकन शुनानेरी वजाई सेई अपनि जिन्दगी गुवाते, यानी बलिदान केरते, त तै तैस बचालो, यानी हमेशारी जिन्दगी हासिल केरेलो। 36 मैन्हु अगर सारी दुनियाई हासिल केरे त अपनि हमेशारी जिन्दगी गुवाए, त तैस फिरी कुन फैइदो भोलो? 37 मैन्हु अगर अपनि हमेशारी जिन्दगी गुवालो, त गुवानेरे पत्ती ते कुन देइतां तैस वापस धिन्नी सकते? 38 अज़ेरे ज़मानेरे लोक परमेशेरे केरां दूरन त कने पापी आन। एस ज़माने मां, अगर कोई मैन्हु मीं केरां त कने मेरी गल्लन केरां शरमाते, त मैनेरू मट्टू भी, यानी अवं भी तैस केरां शरमालो। ज़ेइस अवं अपने बाजी केरि महिमा सेई साथी त कने पवित्र स्वर्गदूतन सेई साथी वापस एज्जलो, त तेइस अवं तैस केरां भी शरमालो।"

9 तैखन यीशुए तैन सेई ज़ोवं, "अवं तुसन सेई सच ज़ोतई कि ज़ैना इडी खड़े आन, तैन मरां किछ मैन्हु एरे आन कि ज़ांतगर तैना परमेशेरे राज़ेरी शक्ति न हेरेले, तांतगर तैना न मरेले।" 2 शेइ दिहाइना बाद, यीशु अपने चेले पतरस, याकूब त कने यूहन्ना सेई साथी एक्की पहाड़े पुड़ च़ढो, जेडी कोई भी न थियो। तैडी तैन केरे सामने यीशुएरी शकल बेदलोई जेई। 3 तैसेरां लिगइं हियेव्वेरां ज़ेरां बड़ां चमकने लगगां कि एत्रे छित्तां भुआं कि धरती पुड़ कोई भी लिगइं धोनेबालो एरां ज़ेरां छित्तां न केरि सके। 4 तैखन तैडी मूसा नबी त कने एलियाहा भी यीशु सेई साथी लेइहोए। ते तैना यीशु

सेई गल्लां केरने लगगे। 5 ज़ैखन पतरसे एन हेरू, त तैनी यीशु सेई ज़ोवं, "हे गुरू, इश्शू इडी रानू रोडू आए! एन्हेरेलेइ, अस टलाई डेरे बनाम, अक तेरे लेइ, अक मूसेरे लेइ, त कने अक एलियाहाहेरे लेइ।" 6 पतरसे एन्चरां एन्हेरेलेइ ज़ोवं किजोकि तैस पतो न थियो कि कुन ज़ोई, किजोकि ते त कने होरे दूई चले भी बड़े डेरि ज़ोरे थियो। 7 तैखन तैडी तैन पुड़ बिदलार आई ते तैस बिदलारी मरां परमेशेरी आवाज़ आई, "एन मेरू टलारू मट्टू आए। ध्याने सेई एसेरी गल शुना!" 8 अकदम, ज़ैखन यीशुएरे चलेई च़ेरे पासन तक्कू, त यीशुएरे अलावा तैडी तैन कोई भी न लेइहोव। 9 पहाड़े पुड़ेरां ओस्ते-ओस्ते यीशुए अपने चेलन हुक्म दित्तो कि, "ज़ांतगर मैनेरू मट्टू, यानी अवं, मेरतां ज़ीतो न भोई, तांतगर ज़ैन किछ तुसेई पहाड़े पुड़ लावरूप, तेन केन्ची सेई न ज़ोइयथ।" 10 तेनेई तैन केन्ची सेई न ज़ोवं, ते तैना एप्पू मांमेइ गलबात केरने लगगे कि, "मेरतां ज़ीतो भोनेरो कुन मतलब भोइ सकते।" 11 तैखन तेनेई यीशुए पुच्छू, "शास्त्री लोक किजो ज़ोतन कि मसीहेरे एजनेरां पेइले एलियाहा नेबेरू दुनियाई मां एजनु ज़रूरी आए?" 12 यीशुए तैन जुवाब दित्तो, "ते तै सच़्ची गल आए कि मसीहेरे एजने केरां पेइले एलियाहा एजतां सैरी गल्लां ठीक केरनन। पन परमेशेरी किताबी मां मैनेरे मट्टेरे बारे मां, यानी मेरे बारे मां एन किजो लिखोरूप कि, 'मीं बड़े दुख झल्लनेन त लोक मीं निकम्मो समझोले।" 13 पन अवं तुसन सेई ज़ोतई कि 'एलियाहा' त पेइले ओरोए, (यूहन्ना, एलियाहाहेरे जगाई अब) त जेन्चरां तैसेरे बारे मां परमेशेरी किताबी मां लिखोरू थियूं, तेन्चरां तेनेई तैस सेई कियूं, यानी जेन्चरां तैना चाते थिये, तेन्चरां तेनेई तैस सेई बुरू कियूं।" 14 तैल्ला पत्ती, यीशु त तैसेरे टलाई चले पहाड़े पुड़ेरां ओस्तां, होरि चेलन कां पुज्जे, ज़ैना बुन थियो। तैडी एजतां यीशुए तैन चेलन केरे च़ेरे पासन मैन्हु केरि बड़ी भीड़ लाई। शास्त्री तैन चेलन सेई बेंस केरि राओरे थियो। 15 यीशु लेइतां सारे लोक बड़े हेरान भोए। तैना तैसेरे पासे दौइतां आए ते तैस जो नमस्कार कियूं। 16 तैखन यीशुए तैन पुच्छू, "मेरे चेलन सेई कुन बेंस केरि राओरथ?" 17 मैन्हु केरि भीड़ी मरां एक्की मैने यीशु जुवाब दित्तो, "हे उस्ताद, मीं अपनू मट्टू तीं कां आनेरू थियूं, ताके तैन ठीक भोए। किजोकि तैस पुड़ भूतेरो सायो आए, ते तैस गल केरने न दे। 18 कोन्ची भी ठैरी तैन भूत मेरे मट्टे टलाते, ते ज़मीनी पुड़ बिछोइते। तैखन तैसेरे ऐशी मरां शैफ़्क एच्वे ते तैन दंत कटते ते ठठमुकर भोइ गाते। मीं तेरे चेलन सेई ज़ोरू थियूं कि, 'मेरे मट्टे पुड़ेरां भूतेरो सायो केडी देथ।' पन तैना केडी न सके।" 19 एन गल्लां शुन्तां यीशुए तैन जुवाब दित्तो, "हे गैर विश्वासी मैना! अवं केइस तगर तुसन सेई साथी रालो? त केइस तगर अवं तुरशो अविश्वास झैल्ललो? तैस मट्टे मीं कां आनां!" 20 तैखन तेनेई तैन मट्टू यीशु कां आनू। ज़ैखन तैनी भूते यीशु लाव, त तैनी अकदम तैन मट्टू मरोडू, ते मट्टू तल्ले बिछुडू। ते तैसेरी ऐशी मरां शैफ़्क निस्ने लगगी त तैन डलेडने लग्गू। 21 यीशुए तैसेरे बाजी पुच्छू, "एसेरी ए हालत केइसेरी देंती आए?" तैसेरे बाजे ज़ोवं, "बचपनेरी देंती। 22 एस मारनेरे लेइ एन भूत बड़े बार कधी अग्गी मां ते कधी पैनी मां बिछोइतू राते, पन अगर तू किछ केरि सकतस, त असन पुड़ तरस खेइतां इश्शी महद केर!" 23 यीशुए तैस मट्टेरे बाजी सेई ज़ोवं, "तू ए को गल केरतस! अगर तू विश्वास केरस, त एन भोइ सकते। किजोकि मीं पुड़ विश्वास केरनेबालां केरे लेइ सब किछ भोइ सकते।" 24 तैस मट्टेरे बाजे अकदम ज़ोरे सेई लेरां देइतां ज़ोवं, "हे प्रभु, अवं विश्वास केरतई, मेरी महद केर कि अवं शक न केरि।" 25 ज़ैखन यीशुए हेरू कि बड़े लोक दौइतां अकोडे भोने लग्गोरेन, त तैनी भूत एन ज़ोइतां डांटू, "हे भूता, ज़े एस मट्टे टोचू त लटू बनातस। अवं तीं हुक्म देताई, एस मट्टे मरां निस्सी गा, ते एसमां फिरी कधी भी न एज्जां।" 26 तैखन तैनी भूते चिन्डां मारी त तैन मट्टू मरोडू, फिरी तैन तैस मट्टे मरां निस्सी जेव। त मट्टू मरू ज़ेरू भोइ ज़ोवं, इडी तगर कि बड़े लोक ज़ोने लगगे कि मट्टू मेरि ज़ोवं। 27 पन यीशुए मट्टेरो हथ टलेइतां खडू कियूं। ते मट्टू ठीक भोइतां खडू भोवं। 28 तैल्ला पत्ती, यीशु ते तैसेरे चले घरे जो जे। ज़ैखन तै अकैल्लो थियो तैखन तैसेरे चलेई तैस पुच्छू, "अस तैस मट्टे मरां भूतेरो सायो की न केडी सके?" 29 यीशुए तैन सेई ज़ोवं, "बगैर प्रार्थनारे (त कने बगैर बरत रखनेरे) अलावा,

होरि केन्ची तरीके सेई, तुस एरे ज़ेरे भूतेरो सायो न केड्डी सकतथ।” 30 तैल्ला पत्ती, यीशु त तैसेरे चले तैट्ठां निस्तां गलील इलाके मामेईं चेलि राओरे थियो। यीशु न चातो थियो कि कोई तैसेरे बारे मां ज्ञाने कि तै तैडी ओरोए, 31 किजोकि तैखन तै अपने चेलन शिक्षा देतो ते तैन सेईं ज़ोतो थियो कि, “मेरे दुश्मनेईं मैनेरु मट्टू, यानी अवं कैद केरनोईं। त तैनेईं अवं मारनोईं, पन मारनेरां दलेइयोंव दिहाडे अवं मुडुदन मरां फिरी जीतो भोनोईं।” 32 पन यीशुएरी ए गल चेलां केरि समझी मां न आई, ते तैना एस गल्लारो मतलब पुछ्ने केरां भी डरते थियो। 33 तैल्ला पत्ती, यीशु ते तैसेरे चले कफरनहूम नगरे मां आए। तैना तैडी एककी घरे मां जे। तैखन यीशुए अपने चेलन पुछ्छू, “बत्तां चलते-चलते तुस एण्पू मामेईं कोस गल्लारे बारे मां बेंस केरि राओरे थियो?” 34 तैना सब शरमेइतां चुप राए, किजोकि तैनेईं बत्तां एण्पू मामेईं एसेरे बारे मां बेंस कियोरी थी कि असन मां बड्डो मैन्हु कौन आए। 35 तैखन यीशुए तल्ले बिश्तां अपने 12 चले कुजाए ते तैन सेईं ज़ोव, “अगर कोई परमेशेरी नज़री मां बड्डो बन्नु चाते, त तै सेबन केरां निकडो बने, ते कने सेबन्नी मैन्हु केरो सेवक बने।” 36 तैखन यीशुए अक निकडो बच्चो हथ्यन मां दलेइतां, तैन केरे मझाटे खडो कियो। तैनी तै बच्चो अपने कुम्मे मां रेखतां अपने चेलन सेईं ज़ोव, 37 “जैना लोक मीं सेईं प्यार केरनेरे वजाईं सेईं एरे ज़ेरे बच्चन मां अक भी कबूल केरतन, तैना मीं कबूल केरतन। जैना मीं कबूल केरतन, तैना सिर्फ मीं नईं, पन तैना परमेशेरे भी कबूल केरतन, जैनी अवं इडी भेजोरोईं।” 38 तैखन यूहन्ने यीशु सेईं ज़ोव, “हे गुरु, असेईं अक मैन्हु लाव, जै तेरु नवं घिन्तां लोकन मरां भूतेरो सायो केड्डी राओरो थियो। एल्हेरेलेइ, असेईं तै मैन्हु ठाको, किजोकि तै असन सेईं साथी तीं पत्ती नईं चले।” 39 पन यीशुए जुवाब दित्तो, “तैस न ठाका, किजोकि अगर कोई मेरे नवं घिन्तां चमत्कारों कम्मां केरे, त तै मेरे बारे मां लूथी बुरी गल्लां न जोए। 40 किजोकि जैना इश्शे खलाफ कम न केरन, तैना इश्शे पासेन। 41 अगर कोई मेरे नवं सेईं तुश्शी मद्दत केरे, अक गिलास पानी भी तुसन पियाए, कि मसीहेरे आय, त अवं तुसन सेईं सच ज़ोतां कि तै मैन्हु परमेशेरे केरां अपनो फल ज़रूर हासिल केरेलो। 42 “जै कोई इन निकडे बच्चन मरां जैना मीं पुड विश्वास केरतन, केन्ची भी पाप करवाए, त तैस मैनेरे लेइ एन रोडू आए कि दलाटेरो अक बड्डो दलेइटोल तैसेरे गल्ले सेईं बेंधतां समुन्द्रे मां शारो गाए। 43 अगर तेरो हथ तीं पाप केरनेरे लेइ ठोकर खुवाए, त तैस केटी छड। किजोकि तेरे लेइ दूईं हथ भोंते सांते सज़ा मैलनेरे लेइ नरकेरी अग्गी मां गाने केरां एन रोडू आए, कि तू डोण्डो भोइतां हमेशारी ज़िन्दगी मां दाखल भोस। किजोकि नरकेरी अग कधी भी न हिश्शे। (Geenna g1067) 44 तैडी तैन केरे कीडे, जैना तैन खातन न मरन ते कने अग भी न हिश्शे। 45 त अगर तेरो पाव तीं पाप केरनेरे लेइ ठोकर खुवाए, त तैस केटी छड। किजोकि तेरे लेइ दूईं पाव भोंते सांते सज़ा मैलनेरे लेइ नरकेरी अग्गी मां गाने केरां एन रोडू आए, कि तू टोंटो भोइतां हमेशारी ज़िन्दगी मां दाखल भोस। किजोकि नरकेरी अग कधी भी न हिश्शे। (Geenna g1067) 46 तैडी तैन केरे कीडे, यानी जैना तैन खातन न मरन त अग भी न हिश्शे। 47 अगर तेरी अछ तीं पाप केरनेरे लेइ ठोकर खुवाए, त तैस केड्डी छड। किजोकि तेरे लेइ दूईं एछ्छी भोंते सांते नरकेरी अग्गी मां छुडे गाने केरां एन रोडू आए, कि एककी अछ्छी सेईं तू परमेशेरे राज़्जे मां दाखल भोस। (Geenna g1067) 48 नरके मां तैन केरे कीडे, जैना तैन खातन न मरन त अग भी न हिश्शे। 49 जेन्चरां हर बलिदाने मां लून छडन ज़रूरी आए, तेन्चरां परमेशर हर एककी मैनेरी अज़मैश घिन्तलो, जै बडी दुखे वाली भोनी आए, जेन्चरां कि अग्गी मामेईं निसनए। 50 लून त रोडू आए, पन अगर लूनेरो स्वाद चेलि गाए, त फिरी दुबारां केन्चेरे तैसेरो स्वाद वापस आनेले? तेन्चरां तुस भी एण्पू मां लून रखा, यानी परमेशेरो हुक्म मन्ना, त एण्पू मामेईं मेल मिलापे सेईं राथ।”

10 तैल्ला पत्ती, यीशु त तैसेरे चले तैट्ठां उठतां यहूदिया इलाके मां आए, त फिरी यरदन दरियारे उस पार चले जे। तैडी मैन्हु केरि भीड फिरी तैस कां अकोट्टी भोइ। त तै अपने रीतेरे मुताबिक तैन फिरी शिक्षा देने लगे।

2 तैखन फरीसी लोकेईं यीशु कां एइतां तैस अज़मानेरे लेइ तैस पुछ्छू, “कुन एन जेइज़ आए कि मडद अपनि कुआन्शी फारख्ती दे?” 3 पन यीशुए तैनन पुछ्छू, “बडे पेइले मूसा नेबे तुसन कुन केरनेरो हुक्म दित्तोरो थियो?” 4 तैखन तैनेईं यीशुए जुवाब दित्तो, “मूसे मडदे अजाज़त दित्तोरीए कि तै लिखतां फारख्ती दे।” 5 तैखन यीशुए तैनन जुवाब दित्तो, “तुश्शे सखत दिलेरी वजाईं सेईं, मूसे तुश्शे लेइ ए हुक्म दित्तोरो थियो। 6 पन दुनियारी शुरुआती मां, जैखन परमेशेरे मैन्हु केरि रचना की, तैखन तैनी तैना मडद ते कुआन्श बनोरेन। 7 एल्हेरेलेइ, इलाएरे पत्ती मडद अपने हाज-बच्चे केरां अल्ला भोइतां अपनि कुआन्शी सेईं साथी रालो, 8 ते तैना दुइये अक्के जान भोले।” तैल्ला पत्ती यीशुए ज़ोव, “एल्हेरेलेइ तैना हुनी परमेशेरी नज़री मां दूईं नईं, पन तैना अक्के आन। 9 एल्हेरेलेइ जैना परमेशेरे ज़ोडोरेन, तैनन कोई मैन्हु अलग न केरे!” 10 बादे मां, जैखन यीशु ते तैसेरे चले घरे मां थियो, तैखन तैसेरे चलेईं फारख्ती देनेरे बारे मां तैस फिरी पुछ्छू। 11 यीशुए तैन सेईं ज़ोव, “जै कोई अपनि कुआन्शी फारख्ती देइतां होरो इला बनाए, त तै तैस पेइली कुआन्शारे खलाफ बदमाशी केरते। 12 त अगर कुआन्श अपने मडदे छेइतां होरो इला बनाए, त तै अपने पेइले मडदेरे खलाफ बदमाशी केरेचे।” 13 तैल्ला पत्ती, किछ लोक अपन निक्के बच्चन यीशु कां आन्ने लगेते ताके तै तैन पुड हथ रेखतां आशिवां दे, पन तैसेरे चलेईं तैना लोको डटोए। 14 यीशुए एन हेरतां सेरकोइतां अपने चेलन सेईं ज़ोव, “निक्के बच्चन मीं कां एजने देथ, तैनन न ठाका, किजोकि परमेशेरेरु राज़्जे एरे ज़ेरे लोकां केरे लेइ आए। 15 अवं तुसन सेईं सच ज़ोतईं कि जै कोई परमेशेरेरे राज़्जे निकडे बच्चेरु जेरु कबूल न केरे, त तै परमेशेरेरे राज़्जे मां कधी भी दाखल न भोइ सके।” 16 तैखन यीशुए तैना बच्चे कुम्मे मां रेखां, तैन पुड हथ रेखतां तैनन आशिवां दित्तो। 17 तैल्ला पत्ती, जैखन यीशु त तैसेरे चले घेरों बेइर निस्तां बत्तां चेलि राओरे थियो, ते अक मैन्हु यीशु कां दोइतो अवं। तैनी तैस कां मथ्थो टेकतां तैस पुछ्छू, “हे रोडू गुरु, हमेशारी ज़िन्दगी हासिल केरनेरे लेइ अवं कुन केरि?” (aiōnios g166) 18 पन यीशुए तैस पुछ्छू, “किजो तू मींजो रोडू ज़ोतस? परमेशेरेरे अलावा होरो कोई भी रोडो नईं। 19 तू त परमेशेरेरे हुक्मन ज्ञानतस, यानी ‘खून न केरा, बदमाशी न केरा, चोरी न केरा, झूठी गवाही न देथ, धोखो न देथ, अपने हाज-बच्चां केरि इज़्जत केरा।” 20 पन तैनी मैने यीशु जुवाब दित्तो, “हे गुरु, एना सब हुक्म अवं बचपनेरो मन्तो ओरोईं।” 21 तैखन यीशुए तैस तेकतां तैस सेईं प्यार कियो, त तैस सेईं ज़ोव, “तीं मां एककी गल्लारी कर्मी आए। गा, जैन किछ तीं कां आए तैन बेइतां गरीब मैन्न दे, तैखन तीं स्वर्ग मां खज़ानो मैलेलो। तैल्ला पत्ती, एइतां मेरो चेलो बना, त अपनू क्रूस छुइतां मीं पत्ती चला।” 22 यीशुएरी ए गल शुन्तां तैस मैनेरु तुत्तर टलक्कु, त तै बडो दुखी भोइतां चलो जेव, किजोकि तै बडो अमीर थियो त तै अपनो धन छडने न चातो थियो। 23 तैखन यीशुए जेरे पासन अपने चेलन तेकतां तैन सेईं ज़ोव, “अमीर मैन्हु केरु परमेशेरेरे राज़्जे मां दाखल भोनू बडू मुश्किल आए।” 24 यीशुएरे चले तैसेरी गल्लां शुन्तां हैरान भोए। पन यीशुए फिरी तैन सेईं ज़ोव, “हे मट्टाव, जैना धने पुड भरोसो रखतन, तैन केरे लेइ परमेशेरेरे राज़्जे मां दाखल भोनू बडू मुश्किल आए! 25 परमेशेरेरे राज़्जे मां अमीर मैनेरु दाखल भोने केरां ऊंटेरु सांभनेरे पाए मरां निसनू सुखू आए!” 26 तैखन तैना बडे हैरान भोइतां एण्पू मामेईं जोने लगे, “अगर अमीर मैनेरे लेइ मुक्ति हासिल केरनि नमुमकिन आए, त फिरी केसेरी मुक्ति भोइ सकचे?” 27 यीशुए तैन केरे पासे तेकतां ज़ोव, “मैन्हु अपने आपे न बचेइ सकन, यानी मुक्ति हासिल न केरि सकन, पन परमेशर एन केरि सकते, किजोकि परमेशर सब किछ केरि सकते।” 28 तैखन पतरस यीशु सेईं जोने लगे, “तू अक, अस त सब किछ छेइतां तीं पत्ती चलोरेम! असन कुन इनाम मैलेलू?” 29 यीशुए अपने चेलन सेईं ज़ोव, “अवं तुसन सेईं सच ज़ोतईं कि, जैनेईं मेरे लेइ त कने मेरे बारे मां खुशखबरी होरे लोकन शुनानेरे लेइ अपने घर या दूला या बेडन या हाज या बव या बच्चे या ऊडारां शारोन, 30 तैनन इस दुनियां मां शौव गुणा मैलेलू। तैना घरन, दूलान, बेडनन, हेईयन, बच्चन त कने ऊडारां हासिल केरेले। लोक भी

तैनून सताले, पन एजनेबाली दुनियाई मां परमेशर तैनून हमेशारी जिन्दगी देलो। (aiōn g165, aiōnios g166) 31 पन बडे मैनुहु जैना हुन्ना पेड़ले आन, तेना बादे मां पजोवं भोनेन। त जैना हुन्ना पत्रावं आन, तेना बादे मां पेड़ले भोनेन।” 32 तैल्ला पत्ती, यीशु त तैसेरे चले ते किछ लोक यरुशलेम नगरे जो चलते-चलते, तेना हेजू बत्तां थिये। यीशु तैन केरे अग्री-अग्री पासे चेलि राओरो थियो। ते तैसेरे चले हैरान भोए त होरे लोक डरते-डरते तैस पत्ती चली राओरे थियो। तैखन यीशु अपने 12 चेलन बत्ती मरां अलग नेइतां फिरी तैन सेइं तेना गल्लां जौने लगे, जैना तैस सेइं भोनेबेली थी। 33 तैनी जौवं, “शुना, अस सारे यरुशलेम नगरे जो गेइ राओरेम। तैडी मैनेरू मट्टू (यानी अब) प्रधान याजकन त कने शास्त्री लोकन केरां कैद कियो गानोई, त तेना मीं मारनेरो हुकम देले त गैर यहूदी लोकां केरे हवाले केरले। 34 त होरि कौमां केरे लोक मेरो मज़ाक बनाले, त मीं पुइ थुकेले, त मीं कोडे मारेले, त तेना मीं मैरी छेडेले, पन दलेइ दिहाइना पत्ती अवं मुइदन मरां फिरी जीतां भोली।” 35 तैखन याकूब त यहून्ना, जैना जब्दी नंवेरे मैनेरां मट्टां थियां, यीशुएरे नेडे एइतां तैस सेइं जौने लगे, “हे गुरू, अस चातम कि जैन किछ अस तीं केरां मगम, तैन तू असन देइयथा।” 36 यीशुए तैन पुच्छू, “तुसन कुन लोइते, जैन अवं तुसन देइ?” 37 तैनेई तैस सेइं जौवं, “असन एन दे कि जैखन तू महिमा सेइं साथी राज केरेलो, तैखन तीं सेइं साथी राज केरनेरे लेइ असन मरां अक तेरे देइने पासे त होरो तेरे बाएं पासे राजगद्दी पुइ बिशेश।” 38 पन यीशुए तैन सेइं जौवं, “तुस न जानथ कि तुस कुन मगने लगगोरेथ! जेन्चरे दुख अवं झलने बालोई, कुन तुस झेल्ली सकतथ? जेन्चरे अवं मारनोई कुन तुस भी मारे गानेरे लेइ तियायथ?” 39 तैनेई तैस जुवाब दितो, “हाँ, अस एन केरि सकतम।” एल्लेरेलेइ, यीशुए तैन सेइं जौवं, “सच्चे, जेन्चरे अवं दुख झलने बालोई, तेन्चरे तुस झललेले? जेन्चरे अवं मारनोई तेन्चरे तुस मारे गाले। 40 पन तै ठार जैन केरे लेइ पेड़ले तियारी कियोरीए, तैन छेडतां होरे केन्ची अपने देइने पासे त कने अपने बाएं पासे राजगद्दी पुइ बिशालनू मेरू कम नई।” 41 एन शुन्तां यीशुएरे बाकी दश चले याकूब त कने यहून्ना सेइं नराज भोइ जे। 42 तैखन यीशुए अपने सारे चले नेडे कुजेइतां, तैन सेइं जौवं, “तुसन पतोए कि जैना होरि कौमां केरे लोकां केरे राज केरनेबाले समझे गातन, तेना अपने लोकन पुइ राज केरतन। तैन मरां जैना बडे अफसर आन, तेना अपने लोकन पुइ हकोमत चलातन। 43 पन तुसन मां एरी जेरी गल न लोडे, पन तै जोई तुसन मां बड्हा बन्नु चाए, त तै निकडो बेनतां तुशो सेवक बने। 44 त जै कोई तुसन मां प्रधान मैनुहु बन्नु चाए, त तै सारे मैनुह केरो सेवक बने। 45 किजोकि मैनेरू मट्टू, यानी अवं एस दुनियाई मां एल्लेरेलेइ नई ओरो कि कोई मेरी सेवा केरे, पन एल्लेरेलेइ ओरोई कि अवं होरि लोकां केरि सेवा केरि त कने बडे लोकां केरे लेइ अपनि जान बलिदान केरि, ताके तैन अपने पापां केरे सज़ाई केरां छुटकारो मैल्ले।” 46 तैल्ला पत्ती, यीशु त तैसेरे चले यरीहो नगरे मां पुज्जे। बादे मां, जैखन तेना मैनुहु केरि बडी भीडी सेइं साथी यरीहो नगरी मरां निस्सी राओरे थिये, त तैखन बरतिमाई नंवेरो कानो भिखारी सड़केरे डुलेखी बिशतां भीख मेगगी राओरो थियो। तैसेरे बाजी केरू नंख तिमार्इ थियू। 47 जैखन तैनी शुनू कि नासरत नगरेरो यीशु इलमेई निस्सी राओरोए, त तै भिखारी ज़ोरे सेइं जौने लगे, “हे यीशु, दाऊद राजेरा मट्टा! मीं पुइ दया केर!” 48 त बडे लोकेई तै डांटो कि, “चुप रा।” पन तै पेड़ले केरां जादे चिन्डां मारने लगे, “हे दाऊद राजेरा मट्टा, मीं पुइ दया केर!” 49 तैखन यीशुए रुकतां लोकन सेइं जौवं, “तुस तेस इरां कुजाथा।” लोकेई तै कानो कुजेइतां तैस सेइं जौवं, “हिम्मत रखी उठो। यीशु तीं एप्पू कां कुजाने लगगेरेन।” 50 तै अपनि चादर शैरतां लूशी उठो, ते यीशु कां अवं। 51 तैखन यीशुए तैस पुच्छू, “तीं कुन लोइते कि अवं तेरे लेइ केरि?” काने मैने जुवाब दितो, “हे गुरू, अवं लानू चाताई।” 52 तैखन यीशुए तैस सेइं जौवं, “तू गा। तीं मीं पुइ विश्वास कियू एल्लेरेलेइ अवं तीं बड़्झाताई।” अकदम तै लाने लगे त कने यीशु पत्ती चलो।

11 जैखन यीशु त तैसेरे चले यरुशलेम नगरेरे नेडे आए, त तैखन जैतून नंवेरे पहाड़ेरे नेडे, बैतफगे त कने बैतनिय्याह ड्लोव्वन कां पुज्जे। तैखन यीशुए अपने चेलन मरां दुइयन सेइं एन जोइतां पेड़ले भेजे कि, 2 “अपने सामनेबाले ड्लोव्वे मां गाथा। तैडी पुज्जेते तुसन अक गधैरो बच्चो बंधोरो मैलेलो, जैस पुइ कधी कोई नई चढोरो। तैस खोलतां इडी मीं कां आनां। 3 अगर तुसन कोई पुच्छे, ‘किजो एन केरने लगगोरेथ?’ त तैस सेइं जोइयथ, ‘प्रभुए एसेरी ज़रूरत आए।’ त तै अकदम गधैरे बच्चे तुसन सेइं साथी इडी भेजेलो।” 4 तेना दूई चले तैस ड्लोव्वे मां जे। तैडी गधैरो बच्चो एक्के धरेरे दारे बेइर बंधोरो लाव, त तेना तैस खोलने लगगे। 5 जैना तैडी खडे थिये, तैन मरां किछ मैनेई तैन पुच्छू, “एन कुन केरने लगगोरेथ, गधैरे बच्चे किजो खोलने लगगोरेथ?” 6 जेन्चरां यीशुए अपने चेलन सेइं ज़ोरू थियू, तेन्चरां तैनेई तैन मैनुह सेइं जौवं। तैखन तैन मैनेई चले तैट्टां गाने दिते। 7 यीशुएरे चलेई बच्चो यीशु कां एन्तां यीशुए तैस पुइ बिशालनेरे लेइ, तैस पुइ अपने लिगडां छुटो। त यीशु तैस पुइ बिशेश (त तेना यरुशलेम नगरेरे पासे जो चलने लगे)। 8 तैखन बडे लोकेई (तैसेरी इज्जत केरनेरे लेई) अपना लिगडां बत्ती मां बिछां त कने किछ मैनेई पटलनबाली डैलडी एन्तां बत्ती मां बिछेई। 9 जैना यीशुएरे अग्री-अग्री त कने पत्ती-पत्ती चलने लागगी थिये, तेना खुशी सेइं ज़ोरे सेइं जौने लगे, “होशाना! (परमेशरी तारीफ़ भोए) परमेशर तैस बरकत दे, जै प्रभु-परमेशररे अधिकारे सेइं साथी एज्जी राओरोए!” 10 “परमेशर तीं आशिर्वाद दे, जैखन तू इशेशे पड़दादे दाऊदेरू राजेरू जेरू राज केरे! परमेशरी होशाना (तारीफ़) भोए, जै उच्चे स्वर्ग मां आए!” 11 तैल्ला पत्ती, तैन लोकन सेइं साथी, यीशु यरुशलेम नगरी मां पुज्जां मन्दरे मां जेव। यीशु मन्दरे मां चेत्रे पासन तक्कू कि जैन तैडी भोइ राओरू थियू। तै अपने 12 चेलन सेइं साथी नगरे मरां निस्तां, राती बिशनेरे लेइ बैतनिय्याह ड्लोव्वे जो वापस चलो जेव, किजोकि ड्लोइ भोइ जोरी थी। 12 त एग्री दिहाडी, जैखन यीशु त तैसेरे चले बैतनिय्याह ड्लोव्वेरां निस्तां यरुशलेम नगरे जो वापस एज्जी राओरे थिये, तैखन यीशुए ड्लुख लगगी। 13 तै दूरेरां फ्रेगोरो अक नीलो बुट लेइतां तैसेरे नेडे जेव कि खाने जो शायद तैस मां किछ मैल्ले। पन, जैखन तै बुटे कां जेव, त तैडी पटलां केरे अलावा तैस किछ न मैल्लू, किजोकि तै फल्लेरो मौसम न थियो। 14 तैखन यीशुए तैस बुटे फिटकार देइतां तैस सेइं जौवं, “हुन्नेरे पत्ती, तीं मां कोई फल कधी न लगगलो!” त तैसेरे चले एन शुनी राओरे थियो। (aiōn g165) 15 तैल्ला पत्ती, तेना फिरी यरुशलेम नगरे मां पुज्जे, त यीशु मन्दरेरे अंगने मां जेव। तैडी लोक जानवरां केरू त कने मन्दरे मां च़ाढनेरू सामान धिन्नेरू त कने बेचनेरो कारोबार केरि राओरे थियो। यीशु तैनून बेइर कढने लगे, ते तैनी तैडी पेंडसे बदलनेबालन केरे मेज़न त कने कबूतर बेचनेबालन केरि कुर्सी उलटेइ दित्ती। 16 त मन्दरेरी ठैरी मां केन्ची बेचनेरे लेइ कोई चीज एन्तां चलने न दित्ती। 17 तैखन यीशुए तैन लोकन शिक्षा देइतां जौवं, “परमेशरी कित्ताबी मां एस मन्दरेरे बारे मां एन लिखोरूए कि परमेशरे जौवं, मेरू मन्दर सैरी कौमां केरे लोकां केरे लेइ प्रार्थनारू घर भोलू! पन तुस लोकेई इन मन्दर डैकू केरो अड्डो बनोरोए।” 18 एन शुन्तां प्रधान याजक त कने शास्त्री लोक यीशु कल्ल केरनेरो मौको तोपने लगगे। पन तेना यीशु केरां डरते थिये, किजोकि सारे लोक तैसेरी शिक्षाई शुन्तां हैरान भोते थिये। 19 जैखन ड्लोइ भोइ, त यीशु त तैसेरे चले (रात गुजारनेरे लेइ) नगरेरां बेइर चेलि जे। 20 एग्री दिहाडी, झेइज्जां यीशु त तैसेरे चले तैट्टां यरुशलेम नगरे जो चले त तैनेई तै फ्रेगोरो बुट लाव, जैस यीशुए पेड़ले फिटकार दित्तोरो थियो। तै बुट ज़ीलन तगर शुक्की जोरो थियो। 21 पतरसे तै गल याद आई कि यीशुए एस बुटे फिटकार दित्तोरो थियो, त तैनी यीशु सेइं जौवं, “हे गुरू, तक! ए फ्रेगोरो बुट जैस तीं फिटकार दित्तोरो थियो, शुक्की जोरोए! (एन केन्चरां भोवं) 22 यीशुए अपने चेलन जुवाब दित्तो, “तुस परमेशरे पुइ विश्वास रखा। 23 अवं तुसन सेइं सच ज़ोताई कि जै कोई एस पहाड़े सेइं ज़ोए, ‘तू उखडतां समुन्द्रे मां बिछडी गा,’ त एन्चरां जोइतां अपने दिले मां शक न केरे, पन विश्वास केरे कि ‘जैन अवं ज़ोतई तैन भोइ गालू,’ त तैसेरेलेइ तैने भोलू। 24 एल्लेरेलेइ

अवं तुसन सेइं जोतईं कि, जैखन तुस प्रार्थना केरतां परमेशरे केरां जैन भी मगले, त विश्वास केरा कि तुसन तैन जरूर मैल्लो गालू, तैखन परमेशरे केरां तैन तुसन दित्तू गालू। 25 ते जैखन कधी तुस खडे भोइतां परमेशरे कां प्रार्थना केरतथ, त अगर तुसन केन्ची सेइं गिलो भोए, त पेइले तुस तैस माफ़ केरा, ताके तुशे शो स्वर्गो ब्राजी भी तुशे पाप माफ़ केरे। 26 अगर तुस होरि लोकन माफ़ न केरतथ, त तुशे शो ब्राजी परमेशर भी, जै स्वर्गं मां आए, तुशे पाप माफ़ न केरेलो। 27 तैल्ला पत्ती, यीशु त तैसेरे चले फिरी यरूशलेम नगरे मां आए। जैखन यीशु मन्दरेरें अंगने मांमेइं हंठने लगगोरो थियो, त तैखन प्रधान याजक त कने शास्त्री त कने यहूदी लोकां केरे बुजुर्ग तैस कां आए, त तैस सवाल पुछने लागे, 28 “तू एन कम्मां कोस अधिकारे सेइं केरतस, त कने एन कम्मां केरनेरो तीं केनि अधिकार दित्तोरोए?” 29 पन यीशुए तैन सेइं जोवं, “अवं भी तुसन अक सवाल पुछतई। मीं तैसेरो जुवाब देथ, तैखन अवं भी तुसन जोलो कि अवं एन कम्मां कोस अधिकारे सेइं केरतई। 30 मीं जुवाब देथ। यूहन्ना जै बपतिस्मो देनेबालो थियो, तैस बपतिस्मो देनेरो अधिकार कोइं मैल्लो, परमेशरेरी तरफां मैल्लो या मैन्हु केरि तरफां?” 31 तैखन तैना एप्पू मांमेइं गलबात केरने लागे कि, “अगर अस ज़ोम कि, ‘परमेशरेरी तरफां मैल्लो,’ त एनी पुछनू कि, ‘फिरी तुसेईं तैसेरो विश्वास की न कियो?’ 32 पन अस एन भी नईं जोईं सकम कि, ‘यूहन्ना अधिकार, मैन्हु केरि तरफां मैल्लो,’ किजोकि असन लोकां केरो डर आए कि तैना असन पुड क्रोध केरले, किजोकि सारे लोक समझते थिये कि सच्चे यूहन्ना नबी आए।” 33 एल्हेरेलेइ तैनेईं यीशु एन जुवाब दित्तो कि, “असन नईं पतो।” यीशुए तैन सेइं जोवं, “अवं भी तुसन सेइं न जोईं कि अवं एन कम्मां कोस अधिकारे सेइं केरतई।”

12 तैल्ला पत्ती, यीशु यहूदी लोकां केरे लीडरन सेइं मिसालन मां गल्लां केरने लागे, “एक्सां, एककी मैने दाछरी बाग लाईं, ते बागारे जेरे पासन बाइ दित्तो, त दाछारो रस कढनेरे लेइ कुण्ड बनावं, ते तैनी तैस बागारी रखवाली केरनेरे लेइ अक उच्चो कूडी बनाईं। तैल्ला पत्ती, तै मैन्हु तैस बागारो ठेको किछ ज़मीनदारन देइतां होरि मुल्खे जो चलो जेव। 2 जैखन फल्लेरो मौसम अवं, त तैनी ज़मीनदारन कां अक नौकर भेजो कि ज़मीनदारन केरां दाछारे बागारे फल्लां केरो अपनो हिस्सो आने। 3 पन जैखन तै नौकर बागी मां पुज्जो, त तैन किसानेईं तै दलेइतां मड्डो त खाली हथ्येइं वापस भेजो। 4 जैखन बागारे मालिके शूनू कि तैनेईं एन कुन कियूं, त तैनी होरो अक नौकर फिरी भेजो। पन तैनेईं तैसेरो भी दोग बन्तो ते तैसेरी बेजती केरतां भेजो दित्तो। 5 फिरी तैनी मालिके होरो अक नौकर तैन कां भेजो। तैनेईं तै भी मैरी छट्टो। तैखन तैनी होरे जादे नौकर भेजो। तैन मरां तैनेईं किछ मड्डे, ते किछ मारे। 6 तैस मालिके कां अक्के रेवरो थियो, जैन तैसेरू दलारू मड्डू थियूं। आखरी मां, तैनी तै भी तैन कां एन सोचतां भेजू कि तैना मेरे मड्डूरी इज्जत केरले। 7 पन जैखन मालिकेरू मड्डू तैन कां अवं, त तैन किसानेईं एप्पू मांमेइं जोवं, ‘ए त एस बागारो वारिस आए। एज्जा, अस एस भी मैरी छट्टम, तैखन एसेरी जेइदात इश्शी भोनी।’ 8 एल्हेरेलेइ, तैनेईं तै दलेइतां मैरी छट्टो, ते बागारे बेडर शरी छट्टो। 9 तैखन यीशुए तैन मैन्न पुछ्छू, “हुनी बागारो मालिक तैन ज़मीनदारन सेइं कुन केरेलो? अवं जोतईं कि तैनी कुन केरनू? ते इइतां तैन किसानां केरो नाश केरेलो, ते बागारो ठेको होरि केन्ची ज़मीनदारन देलो!” 10 “कुन तुसेईं पवित्रशास्त्रे मां मसीहरे बारे मां ई गल नईं पढेरो? तैस मां लिखोरूए कि, ‘जै घोइ राज-मिस्त्रेईं निकम्मो ठहरेवरो थियो, तै मकानेरो खास घोइ बेनि जेव। 11 एन प्रभु परमेशरेरी तरफां एन्चरां भोव, ते कने इश्शी नज़री मां ए हैरान भोनेरी गल आए।” 12 जैखन यहूदी लोकां केरे लीडरेईं एन शूनू, त तैनेईं सेमझी छट्टू कि यीशुए ई मिसाल इश्शे खलाफ़ जोरीए। एल्हेरेलेइ, तैना सेरकोए। त तैनेईं यीशु कैंद केरनू चाव। पन तैना लोकन केरां डरे, एल्हेरेलेइ तैस छेइतां ज़ेलि जे। 13 तैल्ला पत्ती, यहूदी लोकां केरे लीडरेईं यीशु कां किछ फरीसी लोक त कने हेरोदेस राजेरे लोक भेजे, ताके तैना यीशुए अपनि गल्लन मां फसान। 14 तैनेईं यीशु कां

एइतां तैस सेइं जोवं, “हे गुरु, अस ज़ानतम कि तू सच्चो आस, त केन्चेरी परवाह न केरस, किजोकि तू सारे मैन्न बराबर समझतस, त तू परमेशरेरी गल्लां लोकन सच्चईं सेइं शुनातस। एल्हेरेलेइ असन जो, कुन रोम-मुल्खेरे महाराजे जो चुंगी देनी जेइज आए कि नईं? 15 अस देम या न देम?” यीशुए तैन केरू पाखंड जेनतां तैन सेइं जोवं, “मीं किजो अज़मातथ? अक सिक्को (दीनार) मीं कां आनां कि अवं तैस हेरी।” 16 तैनेईं आनो, तैखन यीशुए तैन पुछ्छू, “इस सिक्के पुड केसेरी शकल त केसेरू नवं आए?” तैनेईं जुवाब दित्तो, “महाराजेरू आए।” 17 यीशुए तैन सेइं जोवं, “जैन महाराजेरू आए तैन बड्डे राजे देथ, ते जैन परमेशरेरू आए तैन परमेशरे देथ।” जैखन फरीसी लोकेईं ते कने हेरोदेस राजेरे लोकेईं एन शूनू, त तैखन तैना बडे हैरान भोए। 18 तैल्ला पत्ती, सदूकी लोक यीशु कां आए। तैना जोतन मुड्डे ज़ीते न भोना। त तैनेईं यीशु पुछ्छू, 19 “हे गुरु, बडे पेइले मूसे असन जो कानूने मां लिखोरू थियूं कि अगर कोई मैन्हु बेओलाद मेरि गाए त तैसेरी कुआन्श रेइ गाए, त तैसेरो दूला तैसेरी लैडी सेइं इला बनाए, त अपने दूलाएरे लेइ ओलाद पैदा केरे, ताके तैसेरी खानदानी राए। 20 सत दूला थिये। पेइलो दूला इला बनेइतां बेओलाद मेरि जेव। 21 तैखन दुइयों दूलाए तैस कुआन्शी सेइं इला बनाए। तै भी बेओलाद मेरि जेव। तेन्चरां दलेइयों दूलाए भी कियूं। 22 त तैन दूलाएई तैस कुआन्शी सेइं एक्केरे पत्ती एकके इला कियो, पन ओलाद न भोइ। सेरेन पत्ती तै कुआन्श भी मेरि जेई। 23 एल्हेरेलेइ, परमेशर लोक मुड्डन मरां ज़ीते केरनेरे पत्ती, यानी जैखन लोक ज़ीते भोले, त तैखन तै कुआन्श तैन सत्तन मरां केसेरी लाडी भोली? किजोकि तै इडी धेरीती पुड सत्तां केरि लाडी भोरी थी।” 24 यीशुए तैन सेइं जोवं, “तुश्शी सोच केन्ची गलत आए! कुन तुसन पतो किजो? किजोकि तुस पवित्रशास्त्रे मां लिखोरी गल्लन त कने परमेशरेरी शक्ति न ज़ानतथ! 25 तुसेईं जै कहानीं जोईं, तैस मां तै कुआन्श तैन सत्तन मरां केन्चेरी लाडी नईं भोनी, किजोकि जैखन लोक मुड्डन मरां ज़ीते भोले, त तैखन कोई केन्ची सेइं इला न बनलो, पन तैना स्वर्गं मां परमेशरेरे स्वर्गदूतां केरे जेरे भोले, जैना इला न बनान। 26 मुड्डां केरे ज़ीतो भोनेरे बारे मां, कुन तुसेईं मूसेरी किताबी मां एन नईं पढोरू जैखन मूसे बलतू झैल्ल लाव, तैखन (यानी अब्राहम, इसहाक त याकूब मरनेरे बडे सालना पत्ती) परमेशरे मूसा सेइं जोवं, ‘अवं अब्राहमेरो परमेशर, ते इसहाकेरो परमेशर, ते याकूबेरो परमेशर आई?’ 27 परमेशर मुड्डां केरो परमेशर नईं, पन ज़ीतां केरो परमेशर आए, एल्हेरेलेइ तुश्शी सोच बिलकुल गलत आए।” 28 तैखन शास्त्री लोकन मरां एककी मैने एजतां यीशु ते सदूकी लोकां केरि गलबात शुनी। तैस पतो चलो कि यीशुए तैननू ठीक जुवाब दित्तो, ते तैनी यीशु कां पइतां तैस पुछ्छू, “परमेशरेरे सारे हुक्मन मरां बड्डो खास हुक्म को आए?” 29 यीशुए तैस जुवाब दित्तो, “सारे हुक्मन मरां बड्डो खास हुक्म ई आए, जेन्चरां परमेशरेरी किताबी मां लिखोरूए कि, ‘हे इसाएलेरे लोकव शुना, प्रभु इश्शो परमेशर, अक्के प्रभु आए, 30 एल्हेरेलेइ प्रभु अपने परमेशरे सेइं तुस अपने सारे दिले सेइं, त अपनि सैरी जानी सेइं, त अपनि सैरी अक्ली सेइं, त अपनि सैरी ताकती सेइं प्यार केरा।’ ए बड्डो खास हुक्म आए। 31 तैसेरो जेरो दुइयों बड्डो खास हुक्म ई भी आए कि, ‘तू अपने पेडोसन सेइं अपने बराबर प्यार केर।’ एन दुई हुक्मन केरां होरो कोई भी बड्डो हुक्म नईं।” 32 तैखन शास्त्री मैन्हु यीशु सेइं जोवं, “हे गुरु, तीं बड्डू ठीक जोवं! त तीं सच जोवं कि परमेशर अक्के आए, ते तैसेरे अलावा होरो कोई नईं। 33 त असेईं परमेशरे सेइं अपने सारे दिले सेइं, ते अपनि सैरी जानी सेइं, ते अपनि सैरी अक्ली सेइं, त अपनि सैरी ताकती सेइं प्यार कियोरो लोइ। ते कने असेईं अपने पेडोसन सेइं अपने बराबर प्यार कियोरो लोइ। जानवरां केरू बलिदान केरनू या होरि चीजां केरि चढ़तल चाइने करां भी बेधतां, एना दुइये हुक्मन मन्ने परमेशरेरे लेइ बडे खास आन!” 34 जैखन यीशुए हेरू कि तैनी अक्ली सेइं जुवाब दित्तो, त तैनी तैस सेइं जोवं, “तू परमेशरेरे राजे मां दाखल भोने करां दूर नईं।” ते तैल्ला पत्ती, केन्ची यीशु किछ पुछ्छेरी हिम्मत न भोइ। 35 मन्दरे मां शिक्षा देते बार यीशुए लोकन अक सवाल पुछ्छो, “शास्त्री किजो जोतन कि जै मसीह आए, ते दाऊद-

राजेरी औलादी मरां भोलो? 36 बडे पेडले दाऊद राजे एण्णु पवित्र आत्मा रे शक्ति सेई एन्चरां जोरु थियूं कि, प्रभु परमेशरे मेरे प्रभु मसीहे सेई ज़ोवं, 'तू मेरे देइने पासे बिश, ज़ांगर कि अवं तेरे दुश्मन बिलकुल न हारेई।' 37 दाऊद राजे त एण्णु मसीहेरे बारे मां एन ज़ोवं कि 'तै मेरो प्रभु आए,' फिरी मसीह तैसेरू मडू केन्चरां भोइ सकते?' त मैन्हु केरि भीड यीशुएरी गल्लां खुशी सेई शुन्ती थी। 38 यीशुए शिक्षा देते बार लोकन सेई ज़ोवं, "शास्त्री लोकन करां खबरदार राथ, जैना लम्मे-लम्मे चोले लेइतां हन्ठू चातन, ताके लोक समझन कि तैना बडे धर्मी आन, त तैना चातन कि बज़ारन मां लोक असन बडी इज़्ज़ती सेई नमस्कार केरन। 39 त कने प्रार्थना घरन मां बडे खास मैन्हु केरे लेइ रख्खोरी कुसीं पुइ बिशनू चातन, त धामन मां भी गेइतां बडे खास मैन्हु केरे लेइ रख्खोरी कुसीं पुइ बिशनू चातन। 40 तैना विधवां केरे घरन लुटनन त कने हारि मैन्न हिरानेरे लेइ लेम्मी-लेम्मी प्रार्थना केरतन, ताके लोक समझन कि तैना बडे धर्मी आन। परमेशर तैनन बडी जादे सज़ा देलो।" 41 लोकन शिक्षा देनेरे पत्ती, यीशु मन्दरेरे दान-पेट्टेरे सामने बिशतां एन तकने लगगोरे थियो कि, लोक दान-पेट्टी मां केन्चरां पेंडसे छड़तन। बडे मैनेई, जैना अमीर थिये, तैडी एइतां तैस मां बडे पेंडसे छड़ने लगगोरे थिये। 42 तैखन एक गरीब विधवां एइतां दूई सिक्के छड़े, जैना केरि कीमत बडी घट थी। 43 ज़ैखन यीशुए तैने हेरू, तैनी अपने चेरे एण्णु कां कुजेइतां तैन सेई ज़ोवं, "अवं तुसन सेई सच ज़ोतई कि मन्दरेरे दान-पेट्टी मां पेंडसे छड़नेबालन मरां, एस गरीब विधवां तैन सारे मैन्न करां जादे छड़ेरेन। 44 किजोकि तैन सैरेई अपने जादे पेंडसन मरां थोडे ज़ेरे छड़े, पन ए विधवा त बडी गरीबी आए, फिरी भी तैसां सब किछ ज़ैन तैस कां थियूं छेड्डी दित्तू, यानी अपनि ज़रूरतेरे लेइ रख्खोरे पेंडसे भी छेड्डी दिते।"

13 ज़ैखन यीशु त तैसेरे चले मन्दरे मरां निस्सी राओरे थिये, तैखन तैसेरे चेलन मरां एक्के तैस सेई ज़ोवं, "हे गुरु, इडी हेर! केत्रे बड्डे-बड्डे घोड़न सेई बनोरी दिवारो कने केत्रू रोडे भवन आए।!" 2 यीशुए तैन सेई ज़ोवं, "हुन्ना त तुस एना बड्डे-बड्डे घोड़न सेई बनोरे भवनन लातथ, पन एक्की दिहाडे इडी घोडे पुइ घोइ भी न रालो, यानी सब नाश भोइ गालू!" 3 तैल्ला पत्ती, यीशु ज़ैतन नच्वेरे पहैडी पुइ च़दता पार मन्दरेरे सामने बिशशो। तैखन पतरस, याकूब, यूहन्ना ते अन्द्रियास यीशु कां अलग गेइतां तैस केरां पुछने लागे, 4 "असन ज़ो कि एना गल्लां केइस भोनिन? तैन दिहाडी केरो कुन निशान आए, ज़ैखन एना सब गल्लां पूरी भोनिन?" 5 तैखन यीशु तैन सेई जोने लागो, "खबरदार राथ कि कोई तुसन धोखो न दे। 6 किजोकि बडे मैन्हु मेरे नच्वे सेई एइतां जोले कि, 'अवं मसीह आई।' ते तैना बडे मैन्हु धोखो देले। 7 ज़ैखन तुस लड़ाई ते कने लड़ाइयां केरि अफवाह शुनेले, त तुस घबरेइयथ न, किजोकि लड़ाइयां केरू भोनु ज़रूरी आए, पन एस दुनियारो अन्त अकदम न भोलो। 8 किजोकि एक्की ज़ातारे लोक हारि कौमरे लोकां केरे खलाफ लड़ाई केरले, त अक मुलख हारि मुलखेरे खलाफ लड़ाई केरलो। हर ठैरी भुंजल एज्जले, त काल पेलो। एन सब त सिर्फ मुसीबतां केरि शुरुआत आए। 9 "पन तुस अपने बारे मां खबरदार राथ, किजोकि लोक तुसन सभां केरे हवाले केरले, प्रार्थना घरन मां नेइतां मड्डले, त तुस मेरे वजाई सेई गवर्नरन ते कने राज़न कां खडे थिये गाले, ताके तुस तैन केरे सामने मेरे गवाह भोथ। 10 पन इस युगोरो अन्त भोनेरे पेडले एरू भोनु ज़रूरी आए कि परमेशरेरे राज़ेरे बारे मां खुशखबरी सैरी कौमां केरे लोकन शुनेई गए।" 11 ज़ैखन लोक तुसन नेइतां आदालतां केरे हवाले केरले, त पेडले फिक्क न केरथ त न सोचथ कि अस कुन ज़ोमेले, पन ज़ैन किछ परमेशर तुसन तैस घडी ज़ोनेरे लेइ ज़ोवं गालू, तैने जोइयथ। किजोकि जोनेबाले तुस नई, पन पवित्र आत्मा तुशे ज़िरिये जोलो। 12 ढ़ला (ज़ै मीं पुइ विश्वास न केरे, तै) अपने ढ़लाए मरानेरे लेई हवाले केरलो। त बाजी भी अपने मट्टे तेन्चरां हवाले केरलो, ते बच्चे अपने हाज-बच्चेरे खलाफ भोइतां तैनन मैरी छड़ेले। 13 मीं पुइ विश्वास केरनेरे वजाई सेई सारे लोक तुसन सेई नफरत केरले, पन ज़ै मरने तगर विश्वासे मां बनोरो रालो, तैस परमेशर मुक्ति देलो। 14 तैल्ला

पत्ती, यीशुए तैन सेई ज़ोवं, "बडी बुरी गंदी चीज़, ज़ै नाश केरचे, एजनेबाली आए। ते भिट्टी चीज़ तैस जगाई पुइ खडी भोली, ज़ेडी तैसाकू खडू भोनु जेइज़ नई। बडे पेडले दानिय्येल नेबे तैस चीजेरे बारे मां ज़ोरु थियूं। (जै कोई एन पढे, तै ए गल समझे।) ज़ैखन तुस ते चीज़ी तैडी खडी लाएले, त तैखन जैना लोक यहूदिया इलाके मां रातन, तैना बचनेरे लेइ पहाड़न पुइ नेशशी गान। 15 ते अगर कोई मैन्हु अपने घरेरे छते पुइ भोलो, त तै अकदम तैइतां नेशशी गाए, ते अपने घरेरां किछ नेने अन्तर न गाए (ताके वक्त बरबाद न भोए)। 16 ते अगर कोई मैन्हु ऊडारे मां कम केरि राओरो भोलो, त तै भी अकदम तैइतां नेशशी गाए। तै अपना लिगाइं भी नेनेरे लेइ पत्रोवं न एज्जे। 17 तैन दिहाड़न मां जैना दोर्जाती त दुद्ध पियाती कुआन्थां भोली, तैन केरे लेइ अफसोस! (किजोकि तैन केरे लेइ बडी मुश्किल भोली।) 18 ते तुस प्रार्थना केरा कि एन हिंयूतडेरे दिहाड़न मां न भोए। 19 किजोकि तैन दिहाड़न मां लोकन बडी मुसीबत भोली, कि दुनितयारी शुरुआती केरां देती ज़ैन परमेशरे बनोरीए, अज़ तगर एरी मुसीबत नई ओरी। ते एरी ज़ेरी मुसीबत फिरी कधी न भोली।" 20 "अगर प्रभु परमेशर तैन मुसीबतेरी दिहाड़न न घटाए, त कोई मैन्हु भी न बचलो। पन परमेशर अपने चुनोरे लोकां केरे वजाई सेई तैन दिहाड़न घटालो। 21 तैस मुसीबतेरे दिहाड़न मां, अगर कोई तुसन सेई जोए कि, 'तक्का, मसीह इडी आए।' या 'तक्का, उडी आए।' त विश्वास न केरथ। 22 किजोकि झूठे मसीह ते कने झूठे नबी एज्जले। तैना लोकन धोखो देनेरे लेइ निशान ते कने चमत्कारेरां कम्मां हिराले, कि अगर भोइ सके, त तैना परमेशरेरे चुनोरे लोकन भी धोखो देले। 23 एल्हेरेलेइ, तुस होशियार राथ! हेरा, मीं तुसन सैरी गल्लां भोनेरे पेडले ही ज़ोरिन।" 24 तैल्ला पत्ती, यीशुए तैन सेई ज़ोवं, "तैन दिहाड़न मां, तैस मुसीबतेरे वक्तेरे पत्ती, 'दिहाड़ो कालो भोइ गालो, त चाँदनी लौ न देली, 25 त अम्बरेरां तारे बिछड़ने लगगेले, त अम्बरेरी सैरी शक्ति हिल्लेली।" 26 "तैखन लोक मैनेरे मट्टे (यानी मीं) बडी शक्ति त कने बडी महिमा सेई साथी धेरती पुइ जो बिदलारी मां एजते हेरेले। 27 तैखन अवं अपने स्वर्गदूतन सारी दुनियाई मां भेजतां धेरतारे हर पासेरां अपने चुनोरे लोकन अकोट्टे केरेलो।" 28 तैल्ला पत्ती, यीशुए तैन सेई ज़ोवं, "फ्रेगरे बुटेरे मिसाले केरां अक सबक शिख्खा! ज़ैखन तैसेरी डैलडी नरम भोइतां, त नचवां पटलां निस्ने लगतन, त तुस बुज्झी छड़तथ कि गेमैरो मौसम एजनेबालो आए। 29 एसेरो जेरो, ज़ैखन तुस एना गल्लां, जैना मीं जोई, भोते हेरेले, त तुस बुज्झी छड़्हा कि मैनेरू मडू, यानी अवं बडे नेडे पुज्जोरोई। 30 अवं तुसन सेई सच ज़ोतई कि ज़ांतगर एना सैरी गल्लां न भोली, तांतगर एना लोक, जैना हुना ज़ीतेन, तैना न मरेले। 31 अम्बर त कने धरती टेली गाली, पन मेरी गल्लां कधी न टेलेली।" 32 तैल्ला पत्ती, यीशुए तैन सेई ज़ोवं, "मेरे वापस एजनेरे दिहाड़ेरे बारे मां, या तैस वक्तेरे बारे मां कोई भी न ज़ाने कि तै कताली भोलो, स्वर्गेरे स्वर्गदूते भी न ज़ानन त परमेशरेरू मट्टे यानी अवं भी न ज़ैनी, पन सिर्फ मेरो बाजी परमेशर ज़ानते। 33 एल्हेरेलेइ, मेरे वापस एजनेरे लेइ हमेशा तियार राथ, ते प्रार्थना केरते राथ, किजोकि तुस न ज़ानथ कि तै वक्त कताली एज्जलो। 34 मैनेरे मट्टेरू, यानी मेरू वापस एजनु तैस मैनेरू ज़ेरू आए, ज़ै अपनू घर छेइतां होरे मुलखे जो गाते। गाने केरां पेडले, तै अपने नौकरन कुजेइतां अपने घरेरी रखवाली केरनेरो अधिकार देते, ते हर एक्की अपनू-अपनू कम देते, त दारे पुइ रखवाली केरनेरे लेइ संत्री बाँडो रानेरो हुक्म भी देते, किजोकि तै कधी भी वापस एज्जी सकते।" 35 "एसेरे ज़ेरे, तुस भी हमेशा मेरे वापस एजनेरे लेइ तियार राथ, किजोकि तुस न ज़ानथ कि घरेरो मालिक यानी अवं कताली वापस एज्जेलो। शायद इलोइती या एध्डी राती या कुकड़ेरे बांग देनेरे मौके या झेइज़्जां। 36 एल्हेरेलेइ तियार राथ! एरू न भोए कि अवं अचानक एइतां लेई कि तुस तियार नई। 37 ज़ैन अवं तुसन सेई ज़ोतई, तैने सारे मैन्न सेई भी ज़ोतई कि, 'हमेशा तियार राथ!'"

14 फ़सहेरू तिहार त कने अखमीरी रोट्टारू तिहार दूई दिहाड़न पत्ती एजनेबालां थियां। प्रधान याजक त कने शास्त्री मौको तोपने लगगेरे

थिये कि अस यीशु केन्द्रां चुपचारे दलाम ते तैस मैरी छड्डाम। 2 पन तैनेई एप्पू मांमेई ज़ोवं कि, “अस तिहारे दिहाड़न मां यीशुए कैद न केरम, किजोकि तैन दिहाड़न मां बड़े लोक चेत्रे पासन भोतन, ते एरू न भोए कि यीशुएर कैद भोनेरे वजाई सेई लोकन मां दंगोफसाद भोइ गाए।” 3 यीशु बैतनिय्याह इलोव्वे मां शमौन नव्वेरे मैनेरे घरे मां थियो, ज़ैस पेइले कोडेरो रोग थियो। ज़ैखन यीशु तैडी रोटी खेइ राओरो थियो, त तैखन अक कुआन्श संगमरमेर सेई बनोरे भांटे मां इत्र एन्तां यीशु कां आई, ज़ै बड़ो कीमती थियो त कने ज़ैस जो जटामासी जोतन। तैसां तै इत्र बोलत दलोइतां खोल्ली ते यीशुएरी इज़्जत केरनेरे लेइ तैसेरे दोगे पुइ इत्र उलटव। 4 पन किछ मैन्हु, जैना तैडी खडे थिये, तैस कुआन्शी हेरतां अपने दिले मां सेरकोइतां एप्पू मांमेई जोने लग्गे, “ए कुआन्श किजो एस बडी कीमतारो इत्र जाया केरवे? 5 ए इत्र त एक्की सालेरी मज़दूरेर पेंडसन केरां भी जादे भाए मां बेचतां, ते तैना पेंडसे गरीब मैन्हु देइ सकती थी।” ते तैना सेरकोइतां तैस सेई डांटने लग्गे। 6 पन यीशुए तैन सेई ज़ोवं, “एस छेड़ी देथ! एस किजो तंग केरतथ? एसां त मीं सेई भलाई कियोरीए। 7 गरीब मैन्हु त हमेशा तुसन सेई साथी रातन। ज़ैखन भी तुस चाथ, तैखन तैन सेई भलाई केरि सकतथ, पन अव तुसन सेई साथी हमेशा न राली। 8 जैन किछ ए कुआन्श केरि सकती थी, तैन एसां कियूं। एसां मेरी जानी पुइ खुशबूदार तेल लेइतां मेरे मरनेरां पेइली मेरी जान दबनेरे लेई तियार कियोरीए। 9 अव तुसन सेई सत्र ज़ोतई कि सैरी दुनियाई मां ज़ेडी कोन्ची मेरे बारे मां खुशखबरी लोकन शुनाई गाली, तैडी जैन कम एसां मीं सेई कियोरूए तैन भी एसेरी यादी मां ज़ोवं गालु।” 10 तैल्ला पत्ती, यहूदा इस्करियोती, ज़ै 12 चेलन मरां अक थियो, प्रधान याजकन कां जेव कि तै यीशु दलुवानेरे लेइ तैन केरि मदत केरे। 11 एन शुन्तां तैना बड़े खुश भोए, ते तैसेरे मदते लेइ तैनेई चँदेरे रुपेइये देनेरो वादो कियो। एल्हेरेलेइ, तै ठीक मोके बलगने लग्गे कि यीशु केन्द्रां सेई दलुवाए। 12 अखमीरी रोट्टारे तिहारेरी पेइली दिहाड़ी, ज़ैखन लोक फ़सहेरे तिहारेरे गबडे बलिदान केरते थिये, तैखन यीशुएरे चेलेई तैस पुच्छ, “तू कोइ चातस कि अस गोइतां तेरे लेइ फ़सह तिहारेरी रोटी तियार केरम?” 13 तैखन यीशुए अपने दुई चले एन ज़ोइतां भेजे, “यरूशलेम नगरे मां गाथ, ते अक मैन्हु तुसन पेनेरो घडो छुवोरो मैलेलो, तैस पत्ती-पत्ती गेइयथ। 14 ते तै ज़ैस घरे मां गालो, तैस घरेरे मालिके सेई तुस एन ज़ोइयथ कि, इश्शे गुरे जोवरूप कि, ‘मेरे लेइ तियार कियोरो मेहमान कमरो कोइ आए, जेडी अक अपने चेलन सेई साथी फ़सह तिहारेरी रोटी खेइ?’ 15 तैखन घरेरो मालिक तुसन दुइयोवं छती पुइ, तियार कियोरो, अक बड्डो कमरो हिरालो। तैडी इश्शे लेइ रोटी तियार केरथ।” 16 ते चेले तैट्टां निस्तां नगरे मां आए, त जेन्चरां यीशुए तैन सेई ज़ोरू थियूं, तेन्चरां तैनेई लावं। ते तैनेई फ़सह तिहारेरी रोटी तियार की। 17 ज़ैखन इलोइ भोइ, त यीशु अपने 12 चेलन सेई साथी मेहमान कमरे मां अव। 18 ज़ैखन तैना बिश्तां रोटी खेइ राओरे थिये, त यीशुए तैन सेई ज़ोवं, “अव तुसन सेई सत्र ज़ोतई कि तुसन मरां अक, ज़ै मीं सेई साथी रोटी खेइ राओरोए, मीं थोखे सेई दलुवालो।” 19 एन शुन्तां तैना सारे चले उदास भोए, ते तैना अक-अक केरतां यीशु सेई पुछने लग्गे, “कुन अव आई? कुन अव आई?” 20 यीशुए तैन सेई ज़ोवं, “तै तुसन बारहन मरां अक आए, ज़ै मीं सेई साथी बिश्तां इश्शी एक्की थैली मां रोटी खेइ राओरोए। 21 जेन्चरां मैनेरू मट्टू यानी मेरे बारे मां परमेशेरी किताबी मां लिखोरूए, तेन्चरां अव मारो गानोई। अफ़सोस! (किजोकि तैस मैन्हु बडी सज़ा मैल्लनीए एजने बालीए) जेसेरे वजाई सेई मैनेरू मट्टू यानी अव दलुवाव गानोई! अगर तै मैन्हु ज़ामोरो न भोथो, त तैसेरे लेई तैन भेलू थियूं।” 22 ज़ैखन यीशु त तैसेरे चले फ़सहेरी रोटी खेइ राओरे थिये, यीशुए अक रोटी दलेइतां परमेशेरेरू शुक्र केरतां दलोडी। तैल्ला पत्ती, तैनी ते अपने चेलन दित्ती, ते तैन सेई ज़ोवं, “दलाथ ते खाथ। ई मेरो जिसम आए।” 23 फिरी यीशुए दाछारे रस्सेरो कटोरो दलेइतां परमेशेरेरू शुक्र कियूं। तैल्ला पत्ती, तैनी तै अपने चेलन दित्तो, ते तैनेई सैरेई पियो। 24 तैखन तैनी तैन सेई ज़ोवं, “ए दाछारे रस मेरो खून आए, ज़ै परमेशर त कने लोकां केरे मज़ाटे नव्वो करार बनाते, ज़ै

बड़े लोकां केरे मैफारे लेइ बगाव गालो। 25 अव तुसन सेई सत्र ज़ोतई कि अव दाछारो रस तैस दिहाड़ी तगर फिरी कधी न पीलो, ज़ांतगर परमेशेरेरू राज़े मां अव नव्वो दाछारे रस पीं। 26 तैल्ला पत्ती, यीशु त कने तैसेरे चले परमेशेरेरू भजन ज़ोइतां, यरूशलेम नगरेरे बेइर ज़ैतून नव्वेरे पहेडी पुइ चले जे।” 27 तैखन यीशुए अपने चेलन सेई ज़ोवं, “तुस सारे मीं छेइतां नश्शेले, किजोकि परमेशेरेरी किताबी मां लिखोरू कि, ‘अव पुहाले मैरेलो ते तैसेरी भेइंइरां उरां नेश्शी गाली।’ 28 पन अव मेरतां मुइदन मरां फिरी ज़ीतो भोनेई। तैल्ला पत्ती, अव तुसन केरां पेइले गलील इलाके जो गालो त तैडी तुस मीं लाएले।” 29 तैखन पतरसे यीशु सेई ज़ोवं, “अगर सारे तीं छेइतां नश्शेले त नश्शन, पन अव कथे न नेश्शेलो।” 30 यीशुए पतरसे सेई ज़ोवं, “अव तीं सेई सत्र ज़ोतई कि अज़्जेरी राती कुकडेरे दुई बार बांग देने केरां पेइले, तू दलाई बार मेरो इन्कार केरेलो कि तू मीं न ज़ानस।” 31 पन पतरसे मना ज़ोरे सेई यीशु सेई ज़ोने लग्गे, “अगर मीं तीं सेई साथी मरनु भी पे, त फिरी भी अव तेरो इन्कार कधी न केरेलो।” एन्चरां होरि चेलेई भी ज़ोवं। 32 तैल्ला पत्ती, यीशु ते तैसेरे चले गतसमनी नव्वेरे एक्की बागी मां जे, ते तैडी यीशुए अपने किछ चेलन सेई ज़ोवं, “इडी बिश्शारे राथ, ज़ां तगर अव प्रार्थना न केरि।” 33 फिरी यीशुए बटे परशेन ते याकब ते यूहन्ना एप्पू सेई साथी बागी मां अगगर निये, ते तैडी तै बड़े परशान भोने ते कने घबराने लग्गे। 34 ते तैखन यीशुए तैन सेई ज़ोवं, “मेरो दिल बड्डो उदास आए, इडी तगर कि अव मरनेबालोई। तुस इडी बलगा, ते बींझे राथ।” 35 फिरी तै बागी मां थोडो ज़ेरे अगगर गोइतां, तल्ले मां ज़ैन्हु केरे भारे बिश्तां प्रार्थना केरने लग्गे कि अगर भोइ सके त ए दुखेरी घडी मीं पुइरां टेली गाए। 36 ते तैनी प्रार्थनाई मां एन ज़ोवं, “बैपू! हे मेरे बाजी, तुसन केरां सब किछ भोइ सकते। एस दुखेरो कटोरो मीं केरां दूर केरा। फिरी भी ज़ैन अव चाताई तैन नई, पन ज़ैन तुस चातथ तैने भोए।” 37 फिरी तै अपने दलाई चेलन कां वापस अव, त तैना झुल्लोरे मैल्ले, ते तैनी तैना बींझाए, त तैनी शमौन-पतरसे सेई ज़ोवं, “हे शमौन, कुन तू झुल्लोरोस? कुन तू अक घडी भी बींझो न रेइ सकस?” 38 तैखन यीशुए तैन सैरेन सेई ज़ोवं, “बींझे ते प्रार्थना केरते राथ ताके तुस अज़मैइशी मां न पेथ। तुस त अज़मैइश रोकनी चातथ, पन तुसन कां रोकनेरी ताकत नई।” 39 ते यीशु फिरी अपने चेलन केरां थोड़े दूर चलो जेव, त ज़ैना गल्लां तैनी पेइले ज़ोइतां प्रार्थना कियोरी थी, तैनां गल्लां दुबारां ज़ोइतां प्रार्थना की। 40 ते फिरी वापस एइतां हेरु कि तैना चले झुल्लोरेन, किजोकि तैन एनी निडली थी, कि तैन केरे एछड़ी भी न थी लोरी खुलने। ज़ैखन यीशुए तैना बींझाए, त तैना शरमाने लग्गे कि यीशुए कुन जुवाव देम! 41 फिरी दलेइयोवं बार गेइतां यीशुए प्रार्थना की ते वापस एइतां फिरी तैन सेई ज़ोवं, “कुन तुस हेजू झुल्लोरेथ! बड्डू आए! हुनी घडी एज्जी जोरी! हेरा, मैनेरू मट्टू (यानी अव) पापी मैन्हु केरे हथ्यन मां दलुवेइयोव गानोई। 42 उठा, चलमा हेरा! मीं दलुवानेबालो नेडे पुज्जी जोरो!” 43 यीशु एन्ने ज़ोई राओरो थियो कि अकदम यहूदा ज़ै 12 चेलन मरां अक थियो, एप्पू सेई साथी मैन्हु केरि अक बड्डो भीड़ एन्तां तैडी पुज्जी जेव, ज़ैन कां तलवारां ते डंडे थिये। तैना प्रधान याजक ते शास्त्री लोक ते कने यहूदी लोकां केरे बुजुर्गां केरि तरफां यीशु कैद केरनेरे लेइ भेजोरे थियो। 44 यीशुएरो दलुवानेबालो यहूदा तैडी पुज्जे केरां पेइले, तैन मैन्हु जो निशान दित्तोरो थियो कि ज़ैस अव फुम्मडी देलो तैए यीशु आए, तैस दलेइतां ध्याने सेई नेइयथ। 45 ज़ैखन यहूदा ते मैन्हु केरि भीड़ बागी मां आई, त तैनी अकदम यीशु सेई ज़ोवं, “हे रब्बी (गुरु)” ते तैस फुम्मडी दित्ती। 46 तैखन तैनेई यीशु दलेइतां कैद कियो। 47 यीशुएरे चेलन मरां, ज़ैना तैसेरे नेडे खडे थिये, एक्के अपनि तलवारे सेई महायाजकेरे एक्की नौकरे पुइ चलाई त तैसेरो अक कन केटी छड्डो। 48 यीशुए तैन मैन्हु सेई ज़ोवं, “कुन तुस मीं डैकु समझतां दलानेरे लेइ तलवारां ते डंडे घिन्तां ओरथ? 49 अव त हर दिहाड़ी मन्दरे मां तुसन सेई साथी रेइतां परमेशेरेरे बारे मां लोकन शिक्षा देतो थियो, पन तैखन तुसेई अव न दलाव। पन एन एल्हेरेलेइ भोने लागेरू कि पवित्रशास्त्रे मां मेरे बारे मां ज़ैना गल्लां लिखोरिन तैना पूरी भोन।” 50 तैखन यीशुएरे सारे चले

तैस छेड़तां नेश्शी जे। 51 ते अक जवान जैनी अपनि नग्गी जानी पुड़ अक लिगड़ पलेट्टेरु थियूं, यीशु पत्ती चलो। ते भीड़ी मरां किछ मैनेई तै ट्लाव। 52 पन तै तैन केरे हथ्थन मां अपनु लिगड़ छेड़तां नग्गो नेश्शी जेव। 53 तैल्ला पत्ती, मैन्हु केरि भीड़ां यीशु महायाजकेरे घरे मां नीयो। ते सारे प्रधान याजक ते कने बुजुर्ग त कने शास्त्री यीशुएरु इमतहान नेनेरे लेड़ महायाजके सेइं साथी तैड़ी अकोट्टे भोए। 54 यीशु त कने मैन्हु केरि भीड़ी केरा दूर-दूर रेड़तां पतरस तैन पत्ती-पत्ती महायाजकेरे महलरे अंगने तगर पुज्जी जेव। ते तैड़ी तै महायाजकेरे पैरदारे सेइं साथी बिशतां अग तपने लगी। 55 मेहलरे अन्तर, प्रधान याजक त कने सारी महासभा यीशुएरे खलाफ गवाही तोपनेरी कोशिश केरि राओरे थिये, ताके तैना तैस मैरी सकन, पन तैनन् किछ न मैल्लू। 56 किजोकि बडे मैन्हु यीशु पुड़ झूठी गवाही देने लगगोरे थिये, पन तैन केरि गवाही अक्कां जेरि न थी। 57 आखरी मां किछ मैनेई उठतां तैसेरे खलाफ ई झूठी गवाही दिती कि, 58 “असेई एस केरां एन ज़ोते शुनेरु कि, ‘अवं मैन्हु केरु बनोरु एस मन्दरे बिछोड़तां टलेइ दिहाइन मां होरु मन्दर बनारो, जैन मैन्हु केरु बनोरु न भोलू।” 59 एन एन ज़ोइतां भी तैन केरि गवाही अक्कां जेरि न निस्सी। 60 तैखन महायाजके आदालतेरे मझाटे खडे भोइतां यीशु पुच्छू, “एना लोक तेरे खलाफ गवाही देतन, कुन तू कोई जुवाब नई देस?” 61 पन यीशु चुप राव, ते किछ जुवाब न दितो। तैखन महायाजके तैस फिरि पुच्छू, “कुन तू परमेशेरु मसीह आस?” 62 यीशुए ज़ोवं, “हाँ, अवं ते आई। ते ज़ेन्चरां परमेशेरु कीताबी मां लिखोरु कि ‘तुस सारे लोक, मैनेरु मट्टु (यानी मीं) सर्वशक्तिमान परमेशेरु देइने पासे बिशशोरे त अम्बरे मरां बिंदलारे सेइं साथी धरती पुड़ एजते हेरेले।” 63 तैखन महायाजके सेरकोइतां, अपना चोगो छिन्दतां आदालतेरे मैनु सेइं ज़ोवं, “हुनी असन होरि केन्चेरी गवाहेरी ज़रूरत नई। 64 तुसेई एप्पू परमेशेरु तूहीन शुनी। ते तुस एसेरो कुन फैसलो केरतथ?” तैखन तैनेई सारे मैनेई ज़ोवं कि, “ए मैन्हु दोषी आए किजोकि एनी परमेशेरु तूहीन की, एल्हेरेलेइ, एस मातरी सज़ा दे।” 65 तैखन तैन मरां किछ मैन्हु, तैसेरी बेज़ती केरनेरे लेड़, तैस पुड़ थुकने लगगे। ते किछ मैन्हु तैसेरी एछ्छी लिगड़े सेइं डेकतां तैस मुक्केई बाने लगगे ते तैस सेइं ज़ोने लगगे, “भविष्यिवाणी केर कि केनि तीं बाई।” ते नौकरेई भी तैस टलेइतां थप्पड़ बाए। 66 ज़ैखन पतरस, महायाजकेरे महलरे अंगने मां थियो, त महायाजकेरे नौकरेनन मरां अक कुआन्श तैड़ी आई। 67 तैसां पतरस अग तपतो लाव। ते तै कुआन्श पतरस केरतां तैस सेइं ज़ोने लगगी, “तू भी एन्स नासरत नगरेरो यीशु सेइं साथी थियो।” 68 पन पतरसे यीशुएरो इन्कार कियो ते ज़ोवं, “अवं न जैनी ते न सेमझी कि तू कुन लगोरिस ज़ोने।” फिरि तै तैडूं बेडर डेवदी मां जेव। तैखन कुकड़े बांग दिती। 69 ज़ैखन तैसां नौकरेनां फिरि पतरस लव, त तै तैन सेइं, जैना नेड़े खड़े थिये, ज़ोने लगगी, “ए मैन्हु तैसेरे चलन मरां अक आए।” 70 पन पतरसे फिरि यीशुएरो इन्कार कियो। थोड़े चिरे बाद, जैना पतरसेरे नेड़े खड़े थिये, तैनेई तैस सेइं ज़ोवं, “पक्कां तू भी तैसेरे चलन मरां अक आस, किजोकि तू गलील इलाकेरो मैन्हु भी आस।” 71 तैखन पतरस कसम केरतां ज़ोने लगी, “मीं फिटकार लगगे, अगर अवं झूठ ज़ोई कि अवं एस मैन्हु ज़ानतो भोई, ज़ेसेरे बारे मां तुस गल्लां केरने लगगोरेथ।” 72 तैखन अकदम दुइयोवं बार कुकड़े बांग दिती। ज़ै गल यीशुए पतरसे सेइं पेइली ज़ोरी थी, तै गल तैस याद आई कि, “कुकड़ेरे दूई बार बांग देने केरां पेइले तू टलाई बार मेरो इन्कार केरेलो कि तू मीं न ज़ानस।” तैखन तैनी बड़ी लेरां दिती, किजोकि तैनी यीशुएरो इन्कार केरनेरे वजाई सेइं बड़ो दुखी भोव।

15 झेज़्ज़ भोते, अकदम प्रधान याजकेई, ते यहूदी लोकां केरे बुजुर्गेई, ते कने शास्त्री लोकेई ते कने सारे महासभारे मैनेई यीशुएरे खलाफ सलाह केरतां ते बन्धाव ते तैट्ठां नेइतां रोमी गवर्नर पिलातुसेरे हवाले कियो। 2 पिलातुसे यीशु पुच्छू, “कुन तू यहूदी लोकां केरो राज़ो आस?” यीशुए तैस जुवाब दितो, “तू एप्पू ज़ोई राओरोस।” 3 तैखन प्रधान याजक तैस पुड़ बेड़ि गल्लां केरो झूठो इलज़ाम लेड़ राओरे थिये। पन यीशुए किछ न ज़ोवं। 4

पिलातुसे तैस फिरि पुच्छू, “तू किछ भी जुवाब की न देस? हेर, एना लोक तीं पुड़ केत्री गल्लां केरो इलज़ाम लेड़ राओरेन।” 5 हालंकि यीशुएरी किछ भी गलती न थी, तैनी किछ जुवाब न दितो, इड़ी तगर कि पिलातुस बड़ो हैरान भोव। 6 हर साल फ़रसह तिहारेरे वक्ते पुड़ यहूदी लोकां केरे लेड़ केन्ची एक्की कैदी, ज़ैस तैना लोक चाते थिये तैस पिलातुस छेड़ी देतो थियो। 7 तैन दिहाइन बरअब्बा नंवेरो अक मैन्हु किछ दंगोफसाद केरनेबालन सेइं साथी कैदखाने मां थियो, ज़ैनेई दंगोफसाद मां कल्ल कियोरो थियो। 8 तैखन मैन्हु केरि भीड़ पिलातुसे कां गेइतां मिन्नत केरने लगगी कि, “जैन तू इश्शे लेड़ हर साल केरतो ओरोस तैने केर।” 9 पन पिलातुसे तैनन् पुच्छू, “तुस कुन चातथ कि अवं तुश्शे लेड़ यहूदी केरे राज़े यानी तुश्शे राज़े छेड़ी देई?” 10 पिलातुसे लोकन एन्चरां पुच्छू, किजोकि तै ज़ानतो थियो कि प्रधान याजक यीशु पुड़ ज़लतन तांए तैनेई तै ट्त्वोरोए। 11 पन प्रधान याजकेई लोक बमकाए, ताके पिलातुस तैन केरे लेड़ यीशुएरे बदले बरअब्बा छेड़ी दे। 12 एन शुन्तां पिलातुसे लोकन फिरि पुच्छू, “अगर अवं बरबबे छेड़ी देई, त ज़ैस तुस यहूदी लोकां केरो राज़ो ज़ोतथ, तैसेरु अवं कुन केरि?” 13 तैना पिलातुसे सेइं फिरि शोर केरतां ज़ोने लगगे कि, “एस कूसे पुड़ चाइ।” 14 पिलातुसे तैनन् पुच्छू, “किजो ए कूसे पुड़ चाइना, एनी कुन बुवाई कियोरीए?” पन तैना लोक पेइले केरां जादे शोर केरने लगगे कि, “एस कूसे पुड़ चाइ।” 15 तैखन पिलातुसे लोक खुश केरनेरे इरादे सेइं, बरअब्बा तैन केरे लेड़ छेड़ी दितो, ते यीशु कोड़े लुवेइतां सिपेही केरे हवाले कियो कि तैना यीशु कूसे पुड़ चाइना। 16 तैखन सिपाही यीशुए पिलातुसेरे महलरे अंगने मां नेड़ जे, ज़ैस जो प्रीटोरियम ज़ोतन। ते तैनेई सारी रोमी पलटन कुजेइतां आनी। 17 तैखन तैनेई यीशुएरो मज़ाक बनानेरे लेड़ तैसेरां लिगड़ां खोल्लां, ते तैस लाल रंगेरो चोलो लुवाव ते कने कंटां केरु ताज बनेइतां तैसेरे दोगे पुड़ रख्खू। 18 ते एन ज़ोने लगगे कि, “हे यहूदी केरा राज़ा, नमस्कार!” 19 तैना यीशुएरे दोगे पुड़ अक्केरे पत्ती अक केरतां सोटी सेइं बाने लगगे, ते तैसेरी बेज़ती केरनेरे लेड़ तैस पुड़ थुकने लगगे, ते मज़ाक बनानेरे लेड़ तैसेरे अगगर ज़ैन्थु केरे भारे बिशतां तैस नमस्कार केरते राए। 20 तैसेरो मज़ाक बनानेरे पत्ती, तैनेई तैस पुड़ेरां लाल रंगेरो चोगो खोलतां तैसेरां लिगड़ां लुवां। तैखन तैना यीशु कूसे पुड़ चाइनेरे लेड़ यरूशलेमेरे नगरे केरां बेडर नीयो। 21 ज़ताली तैना तैट्ठां ज़ेलि राओरे थिये, त तैखन शमीन नंवेरो मैन्हु ड़लोव्वेरां तैलमेइं एज्जी राओरो थियो। ते मैन्हु कुरेनी ओहरे केरनेरे आनो थियो ते तै सिकन्दर ते कने रूफ़ुसेरो बाजी थियो। तैखन सिपाहईं शमीन मजबूर कियो कि तै यीशुएरे लेड़ तैसेरी कूसे छुड़तां चले। 22 ते तैनेई यीशु गुलगूतान नंवेरी ठैरी पुड़ आनो, ज़ेसेरो मतलब “खोपडारी ठार” आए। 23 फिरि किछ लोकेई मुर्द नंवेरी दवाई, दाछारे रस्से मां मिलेइतां यीशु पीने जो दिती, पन तैनी तैसेरो इन्कार केरतां न पी। 24 तैखन तैनेई यीशु कूसे पुड़ चाइो ते तैसेरां लिगड़ां केरे लेड़ पेरची छेड़ी कि तैसेरां लिगड़ां कंस मैलतन। तैल्ला पत्ती, तैनेई तैसेरां लिगड़ां बेन्टी छुड़ो। 25 ज़ैखन तैनेई तै कूसे पुड़ चाइो, तैखन झेज़्ज़ेरे नौ बज़्ज़ोरे थिये। 26 ते एक्की फेटी पुड़ तैसेरी सज़ारी वजा लिखतां तैसेरे क्रोड़ी केरां बां लेड़ छुड़ो। तैस मां लिखोरु थियूं कि, “ए यहूदी लोकां केरो राज़ो आए।” 27 सिपाहईं यीशु सेइं साथी होरे दूई डैकू भी, अक तैसेरे देइने पासे ते अक तैसेरे बाए पासे अलग-अलग कूसन पुड़ चाइे। 28 तैखन परमेशेरु कीताबी मां लिखोरी गल पूरी भोइ। तैस मां मसीहरे बारे मां एरु लिखोरु थियूं कि, “ते पापी मैन्हु केरे साथी गनो गालो।” 29 तैखन बत्तां च़लनेबालन मरां किछ मैन्हु अपनि क्रोड़ी हिलेइ-हिलेइतां ते कने एन ज़ोइतां तैसेरी तूहीन केरते थिये कि, “वाह! वाह! मन्दर बिछोड़नेबालो, त कने टलेइ दिहाइन मां बनानेबाली। 30 अगर तू शक्तिशाली आस त कूसे पुड़ेरां ओस्तां अपने आपे बचा।” 31 एन्चरां प्रधान याजक भी शास्त्री लोकन सेइं साथी तैसेरो मज़ाक बनेड़ राओरे थिये, त तैना एप्पू मांमेइं ज़ोते थिये कि, “एनी होरे मैन्हु त बचाए, पन अपने आपे बचेइ न सको। 32 ए ज़ोरो थियो कि ‘अवं इस्राएल लोकां केरो राज़ो आई, यानी मसीह आई,’ अगर ए गल सज़ आए त हुन्ना कूसे पुड़ेरां ओस्से, ताके अस हेरतां विश्वास केरम कि ए इश्शो

राजो आए।” त दूई डैकू, जैना तैस सेई साथी क्रूसे पुड़ चाढोरे थिये, तैनेई भी तैसेरी बेजती की। 33 दीसारे बारे बजेई सारे मुल्ले मां आंधरू भोवं, ते टलेइ बजान तगर रावं। 34 टलेइ बजेई यीशुए बड़ी ज़ोरे सेई अपनि बोली मां ज़ोवं कि, “इलोई, इलोई, लमा शबक्तनी!” जेसेरू मतलब, “हे मेरे परमेशर, हे मेरे परमेशर, तीं किजो अवं छेड़ी दितो!” 35 तैखन जैना तैडी नेड़े खडे थिये, तैन मरां किछ मैनेई एन शुन्तां गलत सेमझतां एप्पू मांमेई ज़ोवं, “हेरा, ए मैन्हु एलिय्याहे जो मद्दत केरनेरे लेइ कुजेई राओरोए।” 36 तैखन तैन मरां एककी मैने दौइतां स्पन्जे (जे पेनेरी ज़ेरि चीज चूसी सकचे) खट्टे दाछारे रस्से मां डुबेइतां डांगी पुड़ रेखतां यीशु जो चुसावं त ज़ोवं, “बलगा, हेरम, एलिय्याह एस क्रूसे पुडेरं उसालने एजते कि नई।” 37 तैखन यीशुए बड़े ज़ोरे सेई आवाज देइतां प्राण दिते। 38 ते तैखन मोट्टो पर्दां, जै मन्दरे मां लोरो थियो, बां देता बुन तगर फेटतां दूई टुकड़े भोइ जे। 39 ज़ैखन फौजी-अफसर, जै यीशुएरे सामने खडो थियो, यीशु एन्चरां ज़ोरे सेई आवाज देइतां प्राण देतो लाव, तैखन तैनी ज़ोवं, “सच्छे, ए मैन्हु परमेशेरू मट्ट थियूं।” 40 किछ कुआन्शां भी टूरेरां एन हेरी राओरी थी। तैन मां मगदलीन नगरेरी मरियम, निकडो याकूब ते योसेसेरी अम्मा मरियम, त कने सलोमी भी थी। 41 ज़ैखन यीशु गलील इलाके मां थियो, त तैखन एना कुआन्शां तैस पत्ती-पत्ती चेलती थी त तैसेरी सेवा केरती थी। त तैडी होरि भी बड़ी कुआन्शां थी, जैना तैस सेई साथी गलील इलाके मरां यरूशलम नगरे मां ओरी थी। 42 ज़ैखन इलोइ भोइ, ते एल्हेरेलेइ कि ते तिहारेरी दिहाड़ी थी, यानी आरामेरे दिहाड़ेरे पेइली दिहाड़ी ज़ैखन लोक आरामेरी दिहाड़ेरे लेइ तियार भोते थिये, त तैखन 43 अरिमतियाह नगरेरो रानेबालो यूसुफ नंवेरो मैन्हु तैडी अव, जै यहूदी लोकां केरे बट्टे आदालतेरे खास मैनन मरां अक थियो। तै एप्पू भी परमेशेरे राजे बलगने लोरो थियो। तै मैन्हु हिम्मत केरतां गवर्नर पिलातुसे कां जेव ते यीशुएरी लाश मग्गी, ताके ते तैस दबनेरे लेइ ने। 44 तैखन पिलातुस हेरान भोव कि केन्चरां ते एत्री लूशी मेरि जेव। त तैनी फौजी-अफसर कुजेइतां पुच्छू, “कुन तै मेरि जोरोए?” 45 ज़ैखन तैनी फौजी-अफसरे केरां हाल ज़ानो कि यीशु सच्छे मेरि जेव, त तैनी यूसुफे लाश नेनेरी अज़ाज़त दित्ती। 46 तैखन यूसुफे अक कीमती लिगड़ घिन्नु ते यीशुएरी लाश क्रूसे पुडेरं ओसैलतां यहूदी लोकां केरि रसमेरे मुताबिक तैस लिगड़े मां पलेटतां एककी कब्री मां छेड़ी, जै पहेड़ी पुड़ एककी घोड़े मां घडोरी थी। त तैस कब्रेरे बेइर दारे पुड़ अक बट्टो घोड़ घिसेइतां छट्टो। 47 मगदलीन इलव्हेरी मरियम, ते योसेसेरी अम्मा मरियम, एना दुइये हेरी राओरी थी कि यीशुएरी लाश कोइ रेखत।

16 होरसां इलोइ, ज़ैखन आरामेरी दिहाड़ी खतम भोरी थी, त तैखन मगदलीन इलव्हेरी मरियम, त कने याकूबेरी अम्मा मरियम, त कने सलोमी, एन सेबेई रोडी मुशकी बालो तेल आनो, ताके यहूदी लोकां केरि रसमेरे मुताबिक यीशुएरी लाशी पुड़ तेल लान। 2 हफतेरे पेइले दिहाड़े झेज्जां-झेज्जां, ज़ैखन मसां दिहाड़ी निरसी राओरो थियो, त तैना कब्री कां जेई जैस मां यीशुएरी लाश रेखोरि थी। 3 तैखन तैना एप्पू मांमेई ज़ोती थी, “इश्शे लेइ कब्रेरे दारे पुडेरं घोड़ कौन गिसालो?” 4 किजोकि ते घोड़ बडो बट्टो थियो। पन तैडी पुजनेरे बाद, तैनेई कब्रेरे पासे उब्री तक्कू त हेरू कि घोड़ पेइलो कब्रेरे दारे पुडेरं गिस्सोरो थियो। 5 तैनेई कब्रेरे अन्तर गेइतां अक जवान लाव ते तैना बेइ हेरान भोइ जेई। तैस छित्तां लिगड़ां लेग्गोरां थियां, ते तैडी तैन केरे सिध्थे पासे बिशशोरो थियो। 6 तैनी जवाने तैन सेई ज़ोवं, “डरान, अवं ज़ानताई कि तुस नासरत नगरेरे यीशु तोप्पी राओरिथ, जै क्रूसे पुड़ चाढोरो थियो। तै मुडदन मरां ज़ोतो भोरोए। तै इडी नई। हेरा, ई तैए ठार आए, जेडी तैसेरी लाश रेखोरी थी। 7 पन तुस गेइतां तैसेरे चेलन सेई त कने पतरसे सेई भी ज़ोइयथ कि यीशु तुसन करां पेइलो गलील इलाके जो गालो। जेन्चरां तैनी पेइलू तुसन सेई ज़ोरू थियूं, तेन्चरां तुस तैस तैडी लाले।” 8 तैना कुआन्शां कब्री मरां बेइर निस्तां तैडुं नेश्शी जेई, किजोकि तैनन थर्क लगोरी त घेबोरी थी। बत्तां तैनेई केन्ची सेई किछ न ज़ोवं, किजोकि तैना

उेरी थी। 9 (note: The most reliable and earliest manuscripts do not include Mark 16:9-20.) हफतेरे पेइले दिहाड़े झेज्जां भोते, यीशु मुडदन मरां ज़ोतो भोइतां पेइले मगदलीन नगरेरी मरियमी लेइहोव, जैस मरां तैनी पेइलां सत भूतां केरो सायो कट्टोरो थियो। 10 मरियमां यीशु लानेरे पत्ती, गेइतां तैसेरे चेलन खबर दित्ती, जैना यीशुएरे लेइ शोग केरने लगोरे ते कने लेरां देने लगोरे थियो। 11 पन ज़ैखन तैनेई तैसारी गल शूनी कि यीशु फिरी ज़ोतो भोरोए ते तैसां लेवरोए, त तैनेई तैसारी गल्ली पुड़ याकीन न कियूं। 12 तैल्ला पत्ती, यीशु अपने चेलन मरां दूई चेलन होरि रूपे मां लेइहोव, ज़ैखन तैना (यरूशलम) नगरेरां अपने इलोव्वे जो चलोरे थियो। 13 तैखन तैनेई भी नगरे वापस एजतां यीशुएरे होरे चेलन खबर दित्ती, पन तैनेई तैन केरि गल्लारो भी विश्वास न कियो। 14 तैल्ला पत्ती, यीशु अपने 11 चेलन भी लेइहोव, ज़ैखन तैना रोटी खेइ राओरे थियो। त तैन केरे अविश्वास त कने सखत दिलेरे वजाई सेई यीशुए तैना डांटे, किजोकि तैनेई तैन केरो विश्वास न कियो, जैनेई यीशु ज़ोतो भोनेरे पत्ती तै लेवरो थियो। 15 यीशुए अपने चेलन ज़ोवं, “तुस सैरी दुनियाई मां गेइतां सारे लोकन मेरे बारे मां खुशखबरी शुनाथ। 16 जै कोई मां पुड़ विश्वास केरे ते बपतिस्मो ने, तैस पापां केरि सज़ाई करां मुक्ति मैलेली। पन जै कोई विश्वास न केरे, तैस अपने पापां केरि सज़ा मैलेली। 17 जैना मां पुड़ विश्वास केरतन, तैना एरां चमत्कारेरां कम्मां (निशाना) केरले कि तैना मेरे नंवे सेई लोकन मरां भूतां केरो सायो कढेले, ते नंवी-नंवी बोली केरले। 18 ते अगर तैना जेहरीले सप्पन टलाले त कने जेहरीली चीज भी पीले, तांभी तैनन किछ नुकसान न भोलो। ते ज़ैखन तैना बिमारन पुड़ हथ रेखेले, ते तैना बेइज्जोइ गाले।” 19 यीशु अपने चेलन सेई गल्लां केरनेरां पत्ती, परमेशेरे तै स्वर्गं जो नीयो। ते यीशु परमेशेरेरे देइने पासे राजगेडी पुड़ बिश्शी जेव। 20 ते यीशुएरे चेलेई बेइर हर जगाई गेइतां लोकन खुशखबरी शुनाने लगो। ते प्रभु तैन सेई साथी कम केरतो राव। तैना चमत्कारेरां कम्मां (निशानन) केरे ज़िरिये, जैना साथी-साथी भोतां थियां, प्रभु साबत केरतो राव कि तैन केरि गल्लां सच आन। आमीन।

लूका

1 जनाब थियुफिलस, बडे लोकेई तैना गल्लां हेरी जैना प्रभु-यीशुए कियोरी थी, जैखन तै असन सेइं साथी थियो, जेइसेरां तैनी अपनू सेवारू कम शुरू कियोरू थियूं। तैन मैनेई होरि मैनु यीशुएरे बारे मां शिक्षा देइतां परमेशेरी सेवा की। बडे मैनेई तैन केरि गल्लां शुन्तां यीशुएरे बारे मां इशो लेइ इतिहासेरी किताब लिखी। 3 मीं एपू तैन सैरी गल्लां केरि बडे रोइजारे छानबीन की। एल्हेरेलेइ, मीं एन रोइ लगू, कि अवं भी तुशे लेइ तैन गल्लां केरे बारे मां ठीक डगे सेइं इतिहासेरी किताब लिखी। 4 अवं चाताई कि तीं पतो लग्गे कि यीशुएरे बारे मां तैना गल्लां सच्चरी आन, जैन केरे बारे मां तुसन शिक्षा मैल्लोरी थी। 5 यहूदिया इलाके मां, जैखन हेरोदेस राजा राज केरतो थियो, त तैखन जकर्याह नंवेरो अक यहूदी याजक थियो। तै मैनु याजकां केरे टोली मां अबिय्याह नंवेरो टोली मरां थियो। तैसेरी कुआन्शा नवं एलीशिबा थियूं। एलीशिबा हारूनेर खानदेनी मरां थी, (हारून इस्राएल लोकां केरो पेइलो याजक थियो)। 6 तैना दुइये प्रभु-परमेशेरी नजरी मां धर्मी थियां ते कने परमेशेरे सारे कानून ते सारे हुकमन पुइ बेइलजाम चलनेबालां थियां। 7 पन तैन केरि कोई औलाद न थी, किजोकि एलीशिबा बाँझ थी, ते तैना दुइये बुढ़ां थियां। 8 एक्की फेरे, जकयहिरी टोली यरूशलेम नगरेरे मन्दरे मां सेवारू कम केरि राओरे थी, तैखन तै प्रभु परमेशेरी हजुरी मां अपनू याजकेरू कम लोगोरो थियो केरने। 9 याजकां केरे रीतेर मुताबिक तैनेई परची छेइतां जकय्याह चुनो कि तै प्रभु-परमेशेरे मन्दरे मां गेइतां गुगल बाले। 10 जैखन तै गुगल बालन लोरो थियो, त तैखन मैनु केरि सारी भीइ मन्दरेरे बेइर प्रार्थना केरि राओरी थी। 11 तैखन अचानक प्रभु-परमेशेरो अक स्वर्गदूत गुगल बालनेरी ठारारे देइने पासे खडे भोइतां जकय्याह लेइहोव। 12 जैखन जकय्याह स्वर्गदूत लाव, त तै घेमरोव ते बडो डेरि जेव। 13 पन स्वर्गदूते तैस सेइं जोवं, “हे जकय्याह, न डर! जैखन तीं प्रार्थना की, त परमेशेरे तेरी प्रार्थना शुनी। एल्हेरेलेइ, तेरी कुआन्शा एलीशिबाई मट्टू भोनूए, ते तू तैसेरू नवं यहून्ना रेख्खा। 14 तैसेरे जर्म भोने सेइं तू बडो खुश भोलो। त बडे लोक भी खुश भोले। 15 तै प्रभु-परमेशेरी नजरी मां महान भोलो, ते तैनी कोन्ची भी किसमेरी नशे बाले चीज त कने शराब कधे न लोडे पियोरी, ते तै अपनि अम्पारे पेटे मां भोते वक्तेरां परमेशेरी पवित्र आत्मारी शक्ति सेइं भरपूर भोलो। 16 तै इस्राएली लोकन मरां बडे लोक परमेशेरे पासे जै तैन केरो प्रभु परमेशेरे वापस तैस कां आनेलो, जैना अपने पापां केरि वजाई सेइं परमेशेरे करां दूर भोरे थियो। 17 ते तै एरो मैनु भोलो जैस पुइ एलिय्याहरी आत्मा ते कने शक्ति भोली। तै परमेशेरी बत तियार केरेलो, तैस अग्री-अग्री चलेलो ताके हाज बच्चां केरो दिल औलादरे पासे ते परमेशर न मन्नेबाले लोकन धर्मी लोकां केरे बत्तां केरे पासे बदलेलो, ताके जैखन प्रभु एज्जे त लोक तियार भोन।” 18 जकय्याह स्वर्गदूते पुच्छू, “अवं केन्चरे मेन्नी एन असन सेइं भोनूए, अवं त बुढोई ते मेरी कुआन्शा भी बुढी भोरोए।” 19 स्वर्गदूते जुवाब दित्तो, “अवं जिब्राईल आई अवं परमेशेरे कां खडो भोताई, अवं एल्हेरेलेइ भेजोरोई, कि अवं तीं सेइं गल केरि ते तीं ए खुशखबरी शुनेई। 20 ते हेर ज्ञां तगर एना गल्लां पूरी न भोन तेरी जवान बंद भोली, ते तू गल न केरि सकेलो किजोकि तीं मेरी गल्लां केरू याकीन नई कियोरू जैना अपने वक्ते पुइ पूरी भोनिना।” 21 ते जैखन जकय्याह ते स्वर्गदूत मन्दरे मां गल्लां लोरे थिये केरने त लोक मन्दरेरे बेइर अंगने मां जकय्याह बलगने लोरे थिये, तैना बडे हैरान भोइजेइ कि जकय्याह मन्दरे मां एत्रू चिरि किजो लाव। 22 जैखन ते बेइर निस्सो, त तै कुजी न बटो ते तैन लोकेई बुझी छडू, कि एनी मन्दरे मां किछ दर्शन लाहेरूए किजोकि तै इशारो केरतो थियो, पन कुजी न थियो बटतो। 23 जेइस यरूशलेम नगरेरे मन्दरे मां जकय्याह एक्की हफतेरे याजकेरी सेवारू कम पूरू भोवं, त तै अपने घरे जो चलो जेव। 24 किछ वक्तेरां बाद तैसेरी कुआन्शा एलीशिबा दोर्जीतीए भोइ, ते तै पंच महीन तगर बेइर लोकन मां न जेई। तैसां जोवं, 25 “प्रभुए मीं पुइ दया केरतां केरू महान

कम कियूं, ते अवं दोर्जीती भोइ, ते जैस गल्लरे वाजाई सेइं लोक मीं घटिया समझते थिये, तै गल दूर की।” 26 एलीशिबारे दोर्जीती भोनेरे शेइयोंव महीने जिब्राईल स्वर्गदूत परमेशेरी तरफां गलील इलाकेरे नासरत नगरे मां, 27 एक्की अडलैई कुइये कां भेजो। तैसारी कुइमाइ दाऊदरे खानदाने मरां एक्की मडदे सेइं भोरी थी जेसेरू नवं यूसुफ थियूं, ते तैस कुइयरू नवं मरियम थियूं। 28 स्वर्गदूते तैस कां एइतां जोवं, “आनन्द ते जीत तेरी भोए, तीं पुइ परमेशेरी बडी दया भोरोए, प्रभु तीं सेइं साथियो!” 29 मरियम स्वर्गदूतेरी गल शुन्तां परेशान भोइतां सोचने लगी एन केरहु नमस्कारे? 30 स्वर्गदूते तैस सेइं जोवं “हे मरियम, डर न, किजोकि परमेशेरो तीं पुइ बडो अनुग्रह भोरोए। 31 तू दोर्जीती भोली तीं अक मट्टू भोलू, ते तू तैसेरू नवं यीशु रेखां। 32 तैन महान भोलू ते तैस जो परमप्रधान परमेशेरेरू मट्टू जोले, ते परमेशर तैस तैसेरे पूर्वज दाऊद राजेरू जेरो राजा बनालो। 33 ते तै याकूबेरे खानदाने पुइ हमेशा राज केरेलो, ते तैसेरू राज कधे खतम न भोलू।” (aiōn g165) 34 मरियमा स्वर्गदूते पुच्छू, “एन केन्चरे भोइ सक्ते? अवं त अडलाई आई।” 35 स्वर्गदूते जुवाब दित्तो, “पवित्र आत्मा तीं पुइ उतरलेलो, ते परमप्रधान परमेशेरी शक्ति तीं पुइ सैयो केरेली एल्हेरेलेइ तै बच्चो जै जर्मएलो ते पवित्र भोलो तैस जो परमेशेरेरू मट्टू जोले। 36 ते हेर तेरी रिशतेदार एलीशिबाई भी बुडे बारे मट्टू भोने बालूए तैस जो लोक बाँझ जोते थिये, तैस दोर्जीती शा महीने भोरेन। 37 किजोकि परमेशेरे लेइ किछ भी नमुमकिन नई।” 38 मरियमा स्वर्गदूते जुवाब दित्तो, “अवं परमेशेरी सेवा केरती जैन तीं जोरूए तैन भोए।” तैखन स्वर्गदूत तैस करां चलो जेव। 39 किछ दिहाइन पती मरियम तियार भोइतां यहूदियारे इलाकेरे एक्की पहाड़ी नगरे मां जेई। 40 ते जकय्याहरे घरे मां गेइतां एलीशिबा जो नमस्कार कियूं। 41 जैखन एलीशिबा मरियमारू नमस्कार शुनू त बच्चो तैसारे पेटे मां उछड़ने लगो ते एलीशिबा पवित्र आत्माई सेइं भोरोई जेई। 42 ते बडे जेरे सेइं जोने लगी, “तू कुआन्शन मां धन आस ते जै बच्चो तीं जानोए तै भी धने! 43 ते मेरे लेइ बडी इज्जतरती गल आए कि, मेरे प्रभुएरी अम्मा मीं कां आई! 44 किजोकि हेर जेरे तेरे नमस्कारेरी आवाज मीं शुनी त बच्चे खुशी सेइं मेरे पेटे मां छालां लगे मारने। 45 तू धन आस तीं तैन गल्लन पुइ विश्वास कियो जैना प्रभुए तीं सेइं जोई कि, तैना पूरी भोली।” 46 ते मरियमा जोवं, “अवं प्रभुएरी तारीफ केरती। 47 ते मेरी आत्मा मेरे मुक्ति देनेबाले परमेशेरे सेइं खुशी भोइ। 48 किजोकि तैनी अपनि सेवा केरने बैलरी गिरोरी हालती पुइ नजर की, अजैरां देइतां हर जमानेरे लोक मीं जो नन जोले। 49 किजोकि परमेशेरे मेरे लेइ बडां-बडां कम्मां कियोरन ते तैसेरू नवं पवित्र भोए। 50 तैसेरी दया तैस करां डरने बालन पुइ पीडी-पीडी तगर राचे। 51 तैनी अपने शक्ति सेइं बड्डां-बड्डां कम्मां कियोरन तैनी घमण्डी तितर-बितर कियो। 52 तैनी राजे राज केरने करां रोके, ते तैनी नम्र लोकन आदर दित्ती। 53 तैनी नियन्ने रोडी-रोडी चीजेइ सेइं रजाने ते धन दौलती बाले खाली हथेइ भेजे। 54 तैनी अपने वादे जैना तैनी इशे दादन-पडदादन सेइं कियोरे थिये याद किये, तैनी अपनि सेवा केरनेबाले इस्राएली लोकां केरि मदत की, 55 तैनी हमेशेरे लेइ अब्राहमे पुइ ते तैसेरी औलादी पुइ दया केरने याद रख्खी।” (aiōn g165) 56 मरियम कोई टलाई महीन तगर एलीशिबा सेइं साथी राई ते फिरी अपने घरजो आई। 57 एलीशिबारे गल्हे बिशनेरो वक्त एज्जी अव ते तैस मट्टू भोवं। 58 तैसारे आसेपासेरे रिशतेदारें एन शुनू कि परमेशेरे तैस पुइ बडी दया कियोरिये ते तैस सेइं साथी खुशी मनाई। 59 अठोंव दिहाइ तैना मट्टेरो खतनो केरने आए, ते तैना तैसेरू नवं तैसेरे बाजी केरे नव्वे पुइ जकय्याह रखनू चाते थिये। 60 पन तैसारी अम्मा ज़ोने लगी, “नई एसेरू नवं यहून्ना भोलू!” 61 किछ तैस जो ज़ोने लगे, “तुशेरी खानदेनी मां कोई भी एस नव्वेरो नई।” 62 तैखन तैन लोकेई जकय्याहरे पासे इशारे सेइं पुच्छू कि तू मट्टेरू नवं कुन रखनू चातस? 63 ते तैनी पटारी मगी ते तैस पुइ लिखू, “एसेरू नवं यहून्ना आए,” ते सब लोक हैरान रेइजे। 64 तैखने तैसेरी जिभ खुल्ली ते जकय्याह गल्लां लगे केरने ते परमेशेरी तारीफ केरने लगे। 65 ते आसे-पासेरे लोक एस तमाशे हेरतां हैरान रेइजे, ते यहूदियारे इलाकेरे

एक्की पहाडी नगर मां एस गल्लरी चरचा भोने लगी। 66 ते शुन्ने बाले अपने-अपने मन्न मां सोचते थिये, “एन मट्टू बडू भोइतां केरहु भोनुए?” किजोकि परमेशररी शक्ति अज्जेरी देतीं एस सेइं साथीए? 67 तेखन तेसेरो बाजी जकयाह पवित्र आत्माई सेइं भेरोवं ते भविष्यवाणी करने लगी। 68 “प्रभु इसाएलेरो परमेशर धन भोए, किजोकि तैनी एइतां अपने लोकन मुक्ति दितोरिये। 69 ते तैसेरे दास दाऊदरे घराने मरां इशशे लेइ अक मुक्ति देनेबालो भेजोरोए। 70 (बडे पेइले जेन्चरे पवित्र नेबी केरे जिरिये जोरू थियूं, जैन शुरू करां देंते ओरूए।) (aiōn g165) 71 असां अपने दुश्मन करां ते बैर रखने बालन करां मुक्ति हासिल केरम। 72 ते तै इशशे दादे पड़दादन पुड़ दया केरे ते अपनो पवित्र करार याद केर। 73 तै करार जै तीं इशशे पूर्वज अब्राहमे सेइं कियोरो थियो। 74 कि तै असन हिम्मत देलो, कि असां अपने दुश्मन करां बगैर केन्ची भी डरे सेइं बेची सखम। 75 ते अपनि जिनंदगी तैस सौफम ते सारी जिनंदगी पवित्रेइ ते धार्मिकता जीम। 76 ते हे बच्चां तू नबी भोलो किजोकि तू परमेशररे अग्नी-अग्नी चेलतां लोकन तियार केरेलो कि परमेशर एजनीए। 77 तै अपने लोकन तैन केरे पाप माफ़ केरनेरे जिरिये मुक्ते बारे मां ज्ञान देलो। 78 ते इशशे परमेशररी दया एरी भोली जेन्चरे दिहाडो लौ देते तेन्चरे मसीह स्वर्गनां एज्जेलो। 79 ताके तैन केरे लेइ जैना पापे मां जीतन ते हमेशारे मीतरे खतरे मां रातन लौ दे, ते ते असन बत हिराए ताके अस सुखे सेइं जिनंदगी जीम।” 80 तैन मट्टू यानी यूहन्ना बेडोतो जेव ते आत्माई मां बद्धतो जेव ते इसाएलेरे लोकन प्रचार केरने तगर सुनसान ठैरन मां राव।

2 तैन दिहैइन मां रोम मुलखेरे महाराजे औगुस्तुसे एलान कियूं कि, दुनियारे सारे मैन्हु केरि गिनती की गाए। 2 ए पेइली मैन्हु केरि गिनती थी, जै सीरिया इलाकेरे गर्वनर क्विरिनियुसेरे वक्ते मां भोइ। 3 ते सारे लोक, मैन्हु केरि गिनतरे लेइ नव लिखाने अपने-अपने पूर्वजां केरे नगर जो चले जे। 4 यूसुफ भी गलील इलाकेरे नगर नासरतरे मरां यहूदिया इलाके मां दाऊदरे नगर बैतलहम मांजो चलो, किजोकि तै दाऊद राजेरे खानदाने मरां थियो। 5 ताके तैडी मरियमी सेइं साथी जैस सेइं तैसेरी कुडमाइ भोरी थी ते तै दोर्जीती थी नव लिखाए। 6 तैन केरे तैडी रेइतां तैसेरे गल्हे बिशनेरो वक्त अव। 7 ते तैस पेइलू मट्टू भोवं ते तैसां तैन फैल्हडी मां पलेटतां खुरली मां रखवू किजोकि तैन धर्मशाली मां कोन्च ठार न थी मैल्लोरी। 8 किछ पुहाल राती एक्की इलबडे मां गब्बा केरो पैरहो केरते थिये। 9 ते परमेशररो स्वर्गदूत तैन कां बांदो भोव ते परमेशररी महिमारी लौ तैन केरे च्चेरे पासन बलने लगी ते तैना बडे डेरि जे। 10 तैखन स्वर्गदूते तैन जो जेव, “डरा नन्ना, किजोकि अवं तुसन अक बडी खुशखबरी शूनाने ओरोई, जै खुशी सैरी लोकां केरे लेइ भोली। 11 अज बैतलहमे मां जैन दाऊद राजेरू नगर थियूं, तुशे लेइ अक मुक्ति देनेबालो जरमोरोए यानी यीशु मसीह प्रभु। 12 तैसेरो तुशे लेइ ए निशान भोलो कि तुसन अक मट्टू फैल्हडी मां पलैट्रेरू गाल्हे बेइर खुरली मां मैल्लो।” 13 ते अकदम तैस स्वर्गदूते सेइं होरे भी स्वर्गदूत बांदे भोए ते तैना परमेशररी तारीफ़ केरने लगे ते एन ज़ोने लगे, 14 “स्वर्ग मां परमेशररी महिमा भोए, ते ज़मीनी पुड़ तैन मैनु शान्ति मैल्ले, जैन पुड़ परमेशर खुशी।” 15 ज़ैखन स्वर्गदूत पुहालां केरे सामने वापस स्वर्ग मांजो चले जे। पुहाल एप्पू मांमेइं ज़ोने लगे, “एज्जा अस बैतलहम नगरे मां गाम ज़ै बिस्तार प्रभुए असन दितोरोए तैस हेरम।” 16 एल्हेरेलेइ तैना लुशी तैटां चले जे ते तैडी पुजे ते सच्चे तैडी मरियम, यूसुफ ते निकडो बच्चां फैल्हडी मां पलेट्टोरो गोरू केरि गाल्हेरे बेइर खुरली मां मैल्लो। 17 ते पुहाल एन हेरतां ज़ै गल तैन एस बच्चेरे बारे मां ज़ोरी थी सेबन सेइं ज़ोने लगे। 18 पुहालां केरि गल्लां शुन्तां सारे लोक हेरान रेइजे। 19 पन मरियम सैरी गल्लां अपने दिले मां रेखतां सोचने लगी। 20 ते पुहालन जेन्चरे तैनी स्वर्गदूते जोरू थियूं, तैनेई अपनि एछेइ तैन सब किछ लेइतां परमेशररी तारीफ़ केरते वापस घरजो चले जे। 21 अठोवं दिहाडे जेइस तैसेरो खतनो केरनेरो वक्त अव त तैसेरू नवं यीशु रखवू। एन तैन नवं आए, जैन स्वर्गदूते मरियमारे दोर्जीतीए भोने करां पेइले रखखे थियूं। 22 ज़ैखन मूसेरे कानूनेरे मुताबिक तैसेरे शुच्चे भोनेरे

दिहाडे पूरे भोए, त यूसुफे ते मरियमा यीशु यरूशलेम नगरे मांजो नीयो ताके तैस प्रभुए कां अर्पण केरन। 23 जेन्चरे प्रभुएरे कानूने मां लिखोरूए, “सारां पेइलां मट्टां परमेशररे लेइ पवित्र भोलां।” 24 जेन्चरे प्रभुएरे कानूने मां लिखोरूए कि, “अक जोडी गुधू केरि या कबूतरेरे दूई बच्चे बलिदानेरे लेइ आन।” 25 तैस वक्ते यरूशलेम नगरे मां अक मैन्हु थियो, तैसेरू नवं शमौन थियूं, तै बडो धर्मी ते भक्त मैन्हु थियो, तै मसीह बलनगे लोरो थियो, कि तै एज्जेलो ते इसाएली लोकन शान्ति देलो, ते तैस पुड़ पवित्र आत्मा थियो। 26 पवित्र आत्मा तैस पुड़ बांदू कियूं, कि ज़ां तगर तू प्रभुएरे मसीह न लाएलो तांतगर न मरेलो। 27 तैस दिहाडे शमौन पवित्र आत्मा चलाव, तै आत्मिक शक्ति सेइं मन्दरे मां अव तेखन यीशु भी तैसेरे अम्मा बाजेई अन्तर आनोरो थियो, कि तैसेरेलेइ मूसेरे कानूनेरे मुताबिक कमांम। 28 त शमौने बच्चो कुम्मे मां दलातो ते परमेशररी तारीफ़ केरने लगी। 29 “हे प्रभु तीं जै अपनो वादो कियोरोए अपने दासे आनन्दे सेइं मरने दे। 30 किजोकि मीं अपने एछेइ सेइं मुक्ति देनेबालो लाव, जै तीं सैरी लोकां केरे लेइ भेजोरोए। 31 जै तीं सैरी कौमां केरे सामने तियार कियोरोए। 32 ते, परमेशर गैर कौमन पुड़ बांदो केरनेरे लेइ लौ आए, ते इसाएली लोकां केरे लेइ अक बडी महिमा भोए।” 33 यीशुएरे अम्मा बाजी शमौनेरी एना गल्लां शुन्तां हरक्के-बक्के भोए। 34 तैखन शमौने तैन बरकत दित्ती, ते तैसेरी अम्मा मरियम सेइं जेव, “हेरा, इन मट्टू एल्हेरेलेइ ठहरावरो, कि इसाएले मां बडे लोकां केरे लेइ नाश भोनेरी तै मुक्ति मैलनेरी वजा भोए, तै परमेशररी तरफां अक निशान आए पन बडे लोक तैसेरे खलाफ भोले। 35 ताके बडे दिलां केरे खियाल खुल्ली गान ते तीं बडो दुःख भोनेए जेन्चरे तलवार कटतीए।” 36 तैडी अक कुआन्श थी जै नबिन थी, तैसेरू नवं हन्नाह थियूं, अशरेरे खानदाने मरां अक मैन्हु जेसेरू नवं फनूएल थियूं, हन्नाह तैसेरी कुई थी ते बडी बुडी थी ते अपने डूलाहरां बाद सत साल अपने मुन्शे सेइं साथी रहोरी थी। 37 तै विधवा थी तैसारी उमर चूरासी साल थी ते मन्दरे मरां न थी गाती ते रात दिहैडी प्रार्थना ते कने बरतां रखती ते परमेशररी आराधना केरती रहती थी। 38 तैखन तै भी तैडी एइतां परमेशररू शुक्र केरने लगी ते बच्चेरे बारे मां तैन सेबन सेइं गल्लां लाई केरने, जैना बलनगे लोरे थिये कि परमेशररे यरूशलेम नगरेरे लोकन छुटानेरे लेइ मसीह भेजनीए। 39 ज़ैखन मरियम ते यूसुफे मूसेरे कानूनेरे मुताबिक यीशुएरो खतनो कियो, त तैना गलील इलाके मरां अपने नगर नासरते मांजो जे। 40 तैन मट्टू बडोतू जेवं ते अकलमन्द भोतू जेवं किजोकि परमेशररो तैस पुड़ बडो अनुग्रह थियो। 41 यीशुएरे अम्मा बाजी हर साल फ्रसह तिहारेरी दिहाडी बनाने यरूशलेम नगरे मां गाते थिये। 42 ज़ैखन यीशु 12 सालां केरो भोव त तैना रीतरे मुताबिक यरूशलेम नगरे मां जे। 43 ज़ैखन तिहार बीतू त यीशुएरे अम्मा बाजी वापस घरजो आए त यीशु यरूशलेम नगरे मां रेइ जेव ते तैसेरे अम्मा बाजी कोई पतो न थियो। 44 तैनेई बुझू कि यीशु होरि मैनु सेइं साथी अग्रोवं जोरोए, तैना अपने रिशतेदारन ते ज्ञान पिशानी बालन मां तोपने लगे। 45 ज़ैखन तैन यीशु न मैल्लो त तैना वापस तोपते-तोपते यरूशलेम नगरे मां पुजे। 46 दूलेइयोवं दिहाडे तैन यीशु मन्दरेरे अंगने मां बुजुर्ग लोकन सेइं गलबात केरतो ते तैन सेइं सवाल जुवाब केरतो मैल्लो। 47 जैना लोक तैसेरी गल्लां शुन्ने लोरे थिये तैना यीशुएरी गल्लां शुन्तां हेरान रेइजे। 48 ज़ैखन तैसेरे हाज बच्चेई यीशु लाव त तैना हेरान रेइजे ते ज़ोने लगे, “मट्टां तीं असन सेइं एन कुन कमाव? तेरे हाज बव तीं तोपते-तोपते परेशान भोइ जे।” 49 यीशु तैन सेइं ज़ोवं तुस मीं किजो तोपने लगगोरो थिये? “तुसन पतो नई कि मीं अपने बाजेरे घरे मां रानू ज़रूरी थियूं?” 50 पन तैन तैना गल्लां केरि समझ न आई कि, एन केरो कुन मतलब आए। 51 तैखन तै अपने अम्मा बाजी सेइं साथी नासरत नगरे मां अव ते अपने अम्मा बाजी कां राव ते मरियमा एना सैरी गल्लां अपने दिले मां रेख्खी। 52 यीशु अक्ली मां भी ते कदे मां भी बेडोतो जेव ते परमेशररी ते इन्सानेरी कृपाई मां बद्धतो जेव।

3 तिबिरियुस महाराजरे हुकुमतरे परनोहूँ साले मां ज़ेइस पुन्तियुस पिलातुस यहूदिया इलाकेरो गवर्नर थियो, ते गलीलेरे इलाके मां हेरोदेस गवर्नर थियो, तेसेरो दूला फिलिप्पुस इतूर्या ते त्रखोनीतिस इलाकां केरो गवर्नर थियो, लिसानियास, अबिलेन इलाकेरो गवर्नर थियो। 2 तैस वक्के हन्ना ते कैफा महायाजक थिये, तेइस परमेशरे जकर्याहरे मट्टे यूहन्ना सेइं गल्लां की। जैन सुनसान ठैरी मां रातू थियूं। 3 ते यूहन्ना यरदन दरियारे आसेपासेरे इलाकन मां गेइतां ई प्रचार केरने लगे, कि अपने पापन करां मनफिराथ, ते बपतिस्मो नेथ ताके परमेशर तुशशे पाप माफ़ केरे। 4 जेन्चरे यशायाह नेबेरी किताबी मां लिखोरूप, “सुनसान ठैरी मां फुकारने बालेरी आवाज़ एइचे कि, “प्रभुएरी बत बनाथ ते तेसेरी बत्तां पैठ्ठी केरा।” 5 “डुघथी ठारां सेरी भेरोई गैनिन, हर अक पहाइ ते चोइद बछोइनोए ते ज़ैना ट्वाढी बचन तैना सिधी केरनिन ज़ैना उन्डी उबरिन तैना पैठ्ठी केरनिन। 6 ते सब लोक तैस हेरेले, जै परमेशरे तैन मुक्ति देने भेजोरोए।” 7 ते यूहन्ना तैन लोकन सेइं ज़ोवं, ज़ैना जथन मां तैस करां बपतिस्मो नेने ओरे थिये, “तुस ज़ेहरीले सप्पेरे ज़ेरे बुरे साथ! तुसन केनि ज़ोवं कि, एजनेबाले परमेशरेरे कोपे करां नशशा? 8 बरसा, सजाई करां बचनेरे लेइ तैना कम्मां केरा, ज़ैने सेइं पतो लगे तुसेईं सत्रे पापन करां मन फिरावरोए। ते अपने अपने मने मां एन न ज़ोथि कि, अब्राहम जेन्चरे इशशो बाजीए, किजोकि कि अन्-तुसन सेइं जोताई कि परमेशर इन घोड़न मरां अब्राहमेरे लेइ औलाद पैदा केरि सकते। 9 ते हुन्ना त बुट्टां केरे ज़ीलन पुइ परमेशरेरो मैक्कु रब्बोरोए, एल्हेरेलेइ जै कोई तैस बुट्टेरो ज़ेरो भोते, जै रोडो फल न दे, तै कटनोए ते अग्गी मां छडनोए।” 10 लोकेई तैस पुच्छ, “फिरी असां परमेशरेरी सजाई करां केन्चरे बचम?” 11 यूहन्ना तैन सेइं ज़ोवं, “ज़ैस कां दूई कुरतेन त अक कुरतो तैस देथ ज़ैस कां अक भी नई ते ज़ैस कां रोटी आए त तै भी रोटी बंटे ज़ैने कां नई।” 12 ते थडत नेनेबाले भी बपतिस्मो नेने ओरे थिये तैनेई तैस पुच्छ, “हे गुरु जी असां कुन केरम?” 13 तैनी तैन सेइं ज़ोवं, “ज़ैने तुशशे लेइ सरकारी कानूनेरे हिसाबे सेइं रब्बोरूप तैस करां जादे थडत न नेइयथा।” 14 ते तैखन होरि सिपाहीएइं भी तैस पुच्छ, “असां कुन केरम?” यूहन्ना तैन सेइं ज़ोवं, “केन्ची पुइ जुलम केरतां बेहक न नेइयथ, ते न केन्ची पुइ झूठो दोष लेइयथ, पन अपनि तनखुवाही पुइ गुजारो केरथा।” 15 तैखन लोक इंतज़ारे मां थिये कि, मसीह जल्दी एजनाए, ते सब लोक अपने दिले मां यूहन्नारे बारे मां सोचते थिये कि जै ओरोए तै मसीह आए या नई? 16 ते यूहन्ना तैन जुवाबे मां तैन सेइं ज़ोवं, “अव त तुसन पैनी सेइं बपतिस्मो देताई पन जै मां करां महाने ते एजनेबालो आए। अव तेसेरो गुलाम बेनतां तैसेरी जुट्टी केरे तसमे भी खोलनेरे काबल नई। ते तुसन पवित्र आत्माई ते अग्गी सेइं बपतिस्मो देलो। 17 तैसेरू छज्ज तैसेरे हथ्ये मां आए ते तै खलाइ रोइचारे साफ केरेलो, ते गेहुं अपने कोठारे मां रखेलो पन झाड़ी तैस अग्गी मां फुकेलो जै कथी हिशनेरी न भोली।” 18 बरसा तै बडे रोइचारे लोकन समझेइतां परमेशरेरी खुशखबरी शुनातो राव। 19 हेरोदेस च़ेवरोवं मुलखे पुइ राज़ केरतो थियो। यूहन्ना तै झिडकावरो थियो, कि हेरोदेस अपने दूला फिलिप्पुसेरी कुआन्था हेरोदियास जै थी तैस सेइं इला कियोरो थियो, ते होरां भी बडां बुरां कम्मां कियोरां थियां। 20 हेरोदेस एन सेबन करां जादे बुरु कम कियूं कि यूहन्ना कैद केरतां छुट्टो। 21 ज़ैखन सब लोक बपतिस्मो नेने लोरे थिये त यीशुए भी बपतिस्मो नीयो, ते ज़ैखन तै प्रार्थना लोरो थियो केरने, त एरू भोवं कि स्वर्ग खुल्ली जेवं। 22 ते पवित्र आत्मा कबूतरेरी शकली मां यीशु पुइ उत्रो ते अम्बरे मरां ई आवाज़ आई, “तू मेरू ट्वाला मट्टू आस, अव तीं पुइ बडो खुश आई।” 23 ज़ैखन यीशुए अपने सेवार्क कम शुरु कियूं त तैसेरी उमर 30 साल थी (जेन्चरे समझू गातू थियूं) एन यूसुफेरू मट्टूए, ते तैन एलेरू 24 एली मत्तातेरू ते तैन लेवेरू ते तैन मलकेरो ते तैन यन्नेरो ते तैन यूसुफेरू मट्टू थियूं, 25 ते तैन मत्तियाहेरू ते तैन आमोसोरो ते तैन नहूमेरू ते तैन असल्याहेरू ते तैन नग्गीएरू मट्टू थियूं। 26 ते तैन मत्तातेरो ते तै मत्तियाहेरू ते तैन शिमीएरू ते तैन योसेखेरू ते तैन योदाहेरू मट्टू थियूं। 27 ते तैन यूहन्नारू ते तैन रेसारू ते तै जरुब्बाबेलेरू ते तैन शालातियेलेरू ते तैन नेरेरू मट्टू थियूं। 28 ते तैन मलकीएरू ते तैन

अदीयेरू ते तैन कोसामेरू ते तैन एल्मदामेरू ते तैन एरूरू मट्टू थियूं। 29 ते तैन येशूएरू ते तैन एलीएजेरू ते तैन योरीमेरू ते तैन मत्तातेरू ते तैन लेवेरू मट्टू थियूं। 30 ते तैन शमोनेरू ते तैन यहूदेरू ते तैन यूसुफेरो ते तैन योननेरू ते तैन एलयाकीमेरू मट्टू थियूं। 31 ते तैन मलेआहेरू ते तैन मिन्नाहेरो ते तैन मत्ततेरो ते तैन नातातेरो ते तैन दाउदेरू मट्टू थियूं। 32 ते तैन यिशैएरो ते तैन ओबेदेरो ते तैन बोआजेरो ते तैन सलमोनेरो ते तैन नहशोनेरू मट्टू थियूं। 33 ते तैन अम्मीनादाबेरू ते तैन अरनेरू ते तै हेस्रोनेरू ते तैन पेरेसेरू ते तैन यहूदेरू मट्टू थियूं। 34 ते तैन याकूबेरू ते तैन इसहाकेरो ते तैन अब्राहमेरू ते तैन तेरहेरो ते तैन नाहोरेरू मट्टू थियूं। 35 ते तैन सस्मरोरो ते तैन रऊएरो ते तैन पेलेगेरो ते तैन एबेरेरू ते तैन शिलहेरू मट्टू थियूं। 36 ते तैन केनानेरू ते तैन अरफक्षदेरो ते तैन शेमरो ते तैन नूहेरो ते तैन लेमेकेरू मट्टू थियूं। 37 ते तैन मथूशिलहेरू ते तैन हनोकेरो ते तैन थिरिदेरू ते तैन महललेलेरू ते तैन केनानेरू मट्टू थियूं। 38 ते तैन एनोशेरू ते तैन शेतेरू ते तैन आदमेरो ते तैन परमेशरेरू मट्टू थियूं।

4 फिरी यीशु पवित्र आत्मा सेइं भरपूर भोइतां यरदन दरियाए मरां वापस अव त 40 दिहाइ पवित्र आत्मार च़लाने सेइं सुनसान ठैरी जो च़लो जेव। 2 तैन 40 दिहाइन मां शैतान तैस अज़मातो राव, तैन दिहेइन मां तैनी किछ न खाव पीवं ते ज़ैखन तैना दिहाइ पूरे भोए त तैस दल्लुख लगगी। 3 शैताने तैस जो ज़ोवं, “अगर तू परमेशरेरू मट्टू आस त इन घोड़न जो ज़ो कि एना रोटी बना।” 4 यीशु तैस जुवाब दितो, “पवित्रशास्त्रे मां लिखोरूप, “मैन्हु सिर्फ़ रोटेइं सेइं जीतो न राए।” 5 फिरी शैताने यीशु एककी उच्चे पहाइ पुइ घिन्तां जेव ते तैट्टां एककी पले मां तैस तैडी दुनियारां सारां राज़ां हिरां। 6 ते तैनी यीशु सेइं ज़ोवं, “एन सब किछ मेरे अधिकारे मां आए, ते एसेरी सारी धन दौलत अव तीं देलो एन मेरे स्युदें। अव ज़ैस चाताई तैस देइ सकताई। 7 बस अगर तू मीं कां मथ्यो टेकस त एन सब किछ तेरू भोलू।” 8 यीशुए तैस जुवाब दितो, “पवित्रशास्त्रे मां लिखोरूप, “तू सिर्फ़ अपने प्रभु परमेशरे कां मथ्यो टेकतां ते सिर्फ़ तैसेरी भक्ति केरा।” 9 ते तैनी यीशु यरूशलेम नगरेरे मन्दरेरी उच्ची छम्पी पुइ नेइतां खडो कियो ते तैस सेइं ज़ोवं, “अगर तू परमेशरेरू मट्टू आस त अपनो आप इट्टां उन्ढो बछोड। 10 किजोकि पवित्रशास्त्रे मां लिखोरूप, “ते तेरे लेइ अपने स्वर्गदूतन ज़ोलो ते तैना तेरी हफाज़त केरेले।” 11 ते “तैना तीं अपने हथ्यन पुइ छूले ताके एरू न भोए कि तेरे पावन घोड़न सेइं ठोकर लगगे।” 12 यीशु तैस जुवाब दितो, “पवित्रशास्त्रे मां इन भी लिखोरूप तू अपने प्रभु परमेशरेरी अज़मैइश न केरा।” 13 ज़ैखन शैताने तैसेरी बडे तरीकेई अज़मैइश की, त किछ च़िरेरां बाद तैस करां च़लो जेव। 14 फिरी यीशु पवित्र आत्मार शक्ति सेइं भरपूर भोइतां गलील इलाके मां वापस अव, ते सारे इलाके मां तैसेरी मुशूरी भोइजेइ। 15 यीशु तैन केरे प्रार्थना घरन मां शिक्षा देतो राव, ते सब लोक तैसेरी तारीफ़ केरते थिये। 16 फिरी तै नासरत नगर मां वापस अव ज़ैडी ते पलोरो थियो। अपने रीतरे मुताबिक आरामेरे दिहाइ ते प्रार्थना घरे मां जेव ते वचन पढ़नेरे लेइ खडो भोव। 17 ते तैस यशायाह नेबेरी किताब दित्ती ते तैनी खोलतां तैन वचन कट्टू ज़ैडी लिखेरू थियूं कि, 18 “प्रभुएरी आत्मा मीं पुडे, एल्हेरेलेइ कि तैनी गरीबन खुशखबरी शुनानेरे लेइ मेरू अभिषेक कियोरूप, तैनी अव भेजोरोई कि कैदन हथरां छेड़ी (जैना शैतानेरे कब्जे मां आन) ते काना केरि एछ्छन ठीक भोनेरी खबर शुनेई, ते ज़ैने पुइ जुलम भोते तैन लोकन आज़ाद केरि। 19 ते तैस वक्केरू एलान केरि ज़ेइस परमेशर लोकन पुइ दया केरेलो।” 20 फिरी तैनी तै किताब बंद केरतां सेवके कां वापस देइतां बिशशी जेव। जेत्रे प्रार्थना घरे मां थिये सब तैसेरां तकते थिये। 21 ते तै तैन सेइं ज़ोने लगे, “अज़ पवित्रशास्त्रे तैन वचन तुशशे सामने पूरू भोवं।” 22 ते सब तैसेरी तारीफ़ केरने लगे, ते तैसेरी गल्लन पुइ बडो अनुग्रह थियो, ज़ैना गल्लां तैसेरे ऐशेरां निसती थी, ते लोक हैरान भोइतां ज़ोने लगे, “कुन एन यूसुफेरू मट्टू नई?” 23 यीशु तैन सेइं ज़ोने लगे, “ए कहावत तुस मीं पुइ जुसर ज़ोले, कि हे बेईद जी अपनो आप त ठीक केर, ज़ैने किछ असेई अकरनहूम नगर मां केरतू शुनेरूप, तैन इडी अपने नगरे मां

भी करे।” 24 ते तैनी इन भी ज़ोवं, “अवं तुसन सेइं सच्च जोताई, कि कोई नबी अपने मुखे मां कबूल न कियो गए। 25 अवं तुसन सेइं सच्च जोताई कि एलिव्याह नेबेरे वक्ते मां जैखन साडे द्लाई साल अम्बर बंद भोवं (यानी झड़ी न भोइ) ते इड़ी तगर कि सैरी मुखे मां बड़ो काल पेई जेव ते तैस वक्ते बेडि विधवा कुआन्थां इसाएले मुखे मां थी। 26 पन एलिव्याह नबी, तैन मरां केन्ची कां नई पन सैदा नगरेरे नेडे सारफत नगर मां एककी विधवा कां भेजो, जै यहूदी न थी। 27 ते एलीशा नेबेरे ज़माने मां इसाएलेरे मुखे मां बडे कोढ़ी थिये पन तैन मरां कोई भी कोढ़े करां साफ न थियो भोरो, पन सिर्फ अक सीरियारो रानेबालो नामान कोढ़े करां साफ भोरो थियो, जै गैर कोमी मरां थियो।” 28 जेरे लोक प्रार्थना घरे मां थिये एना गल्लां शुन्तां सरकी सेइं लाल-लाल भोइ जे। 29 ते खडे उट्टां तैस नगर करां बेडर निस्से ते तै तैस पहाडरी च़ौटी पुइ घिन्तां जे जैस पुइ तैन केरु नगर आबाद थियूं, ताके तैस तैदां उन्डे बछोइतां मारन। 30 पन यीशु तैन मरां निस्तां च़लो जेव। 31 फिरी तै गलील इलाकेरे कफरनहूम नगरे मांजो जेव। ते आरामेरे दिहाडे तैन शिक्षा देने लगगोरो थियो। 32 ते लोक तैसैरी शिक्षा शुन्तां हैरान रहते थिये किजोक तैसेरी शिक्षा बडे अधिकारे सेइं थी। 33 प्रार्थना घरे मां अक मैनुथ थियो, जैस पुइ भूतेरो सायो थियो। तै बडे ज़ोरे सेइं चिन्डां मारने लगे। 34 “हे नासत नगरेरे यीशु! असन तीं सेइं कुन कम? कुन तू असन नाश केरनेरे लेइ ओरोस? अवं ज़ानताई कि तू कौन आस, तू परमेशेरेरु पवित्र मट्टु आस!” 35 यीशुए तैस झिड़क देइतां ज़ोवं, “चुप रा, एस मैनुथ मरां निस्सी गा!” तैखन भूते ते मैनुथ ज़मीनी पुइ शैरी दित्तो, ते तैस मरां निस्सी जेव। 36 एन हेरतां सारे लोक बडे हैरान भोए ते एप्पु मांमेइं ज़ोने लगे, “ए कुन गल आए! तै अधिकारे ते शक्ति सेइं भूतन हुक्म देते ते तैना तैस मरां निस्सी गातन।” 37 ते सारे मुखेरे मां च़ेरे पासन तैसेरी खबर फैली जेई। 38 फिरी तै प्रार्थना घरे मरां उट्टां शमौनेरे घरे जेव ते शमौनेरी शिखी बड़ी भुखार थियो, ते लोकेई तैसारे बारे मां यीशु सेइं ज़ोवं। 39 तै खडो भोइतां तैसारे पासे फिरो ते बिमारी झिड़की, ते तैसारो सारो भुखार उतरी जेव ते तै खडी भोइ, ते तैन केरि सेवा केरने लगी। 40 ज़ैखन दिहाडी लाई दुबने त लोकेई तैना सब लोक ज़ैन मां किसमां-किसमां केरि बिमैरी थी तैस कां आने, ते यीशुए तैन पुइ हथ रेखतां तैना सब बज़्झाए। 41 भूतां भी चिन्डां मारतां थियां, ते ज़ोतां थियां, “तू परमेशेरेरु मट्टुस!” ते बडे लोकन मरां भूतां केरो सेयो निस्सी जेव, ते तै तैन झिड़कथि थियो, ते तैन गल भी न थियो देतो केरने, किजोक तैना भूतां ज़ानतां थियां कि ए मसीह आए। 42 ज़ैखन झ़ेझ़ भोइ त यीशु उट्टां बेडर एककी सुनसान ठैरी मां जेव, ते पतोरां सारे लोक तैस तोपते-तोपते तैस कां पुजे ते रोक्ने लगे कि तू असन करां न गा। 43 पन यीशुए तैन सेइं ज़ोवं, “मीं होरि नगरन मां भी परमेशेरेरे राज़ेरी खुशखबरी शुनानी ज़रूरीए किजोक अवं एल्हेरेलेइ भेजोरोई।” 44 ते तै यहूदिया इलाकेरे प्रार्थना घरन मां प्रचार केरतो राव।

5 एककी दिहाडे यीशु गन्नेसरतेरे समन्देरे बन्ने पुइ खेडोरो थियो, ते बडे लोक तैस कां करां परमेशेरेरु वचन शुन्नेरे लेइ ते उन्डे बिछड़ी गाते थियो। 2 तैनी दूई किशती बन्ने लेगोरी लेई, ते मेछली दलानेबाले किशती इलेखी छेडतां अपना ज़ालां धोने लगगोरो थियो। 3 यीशु एककी किशती मां च़ढो ते किशतरे मालिके शमौने सेइं ज़ोने लगे, तुस किशती इट्टां बन्ने पुडेरां नेइतां थोड़ी दूर लाथ। फिरी यीशु किशती मां बिश्तां तैन लोकन उपदेश देने लगे। 4 ज़ैखन तैनी लोकन शिक्षा दित्ती त तै शमौने सेइं ज़ोने लगे, “तुस किशती दुगुथी ठैरी च़लाथ ते मेछली दलानेरे लेइ ज़ाल छडा।” 5 शमौने जुवाब दित्तो, “हे गुरु, असेईं सैरी राती तरले कियोरेन ते अक मछली भी नई दलेइयोरी, पन असां तेरे ज़ोने सेइं ज़ाल छडतम।” 6 आखकार पतरस ते तैसेरे सैथेईं ज़ालां छैडी दित्तां ते एजी मेछली लेगि, कि ज़ालां छिन्डोइतां मेछली बेडरोवं निस्सन लेगि। 7 तैखन तैनेईं अपने सैथन जो ज़ैना होरि किशती पुइ थिए, इशारो कियो कि एज्जा इश्शी मद्दत केरा, ते तैना भी आए ते किशती मेछलेईं सेइं एजी भेरोई जेई कि किशती दुबने लगी। 8 शमौने पतरस एन हेरतां

यीशुएरे पावन पुइ पेइतां ज़ोने लगे, “हे प्रभु, अवं पापी मैनुथ आई तू मीं करां दूर भो!” 9 गल ए थी कि ते तै तेसेरे साथी एजी मेछली लेइतां हैरान भोइ ज़ोरे थियो। 10 तेरहो हाल जेदेरेरे मट्टु केरो यानी याकूब त कने यूहन्नारो भी थियो, ज़ैना शमौने सेइं साथी थिये, यीशुए शमौने सेइं ज़ोवं, “डर नन्ना अज़्जेरे बाद तू मेछली दलाने बालो नई, बल्के मैनुथ अकोडे केरतां मेरे चले बनानेबालो भोलो।” 11 तैनेईं किशती इलेखी एन्तां लेई, ते अपनु सब किछ छेडतां यीशु पत्ती च़ले जे। 12 ज़ैखन यीशु एककी नगर मां थियो, ते एरु भोवं कि तैडी अक मैनुथ थियो, जेसेरे सैरी जानी कोढ़ थियूं, तैनी यीशु लाव, ते तै जैन्थु केरे भारे बिश्तां तैस कां मिन्त केरतां ज़ोने लगे, “हे प्रभु तू चास त मेरु कोढ़ बज़्झेई सकतस।” 13 यीशुए अपने हथ तैस पुइ रख्खो ते ज़ोवं, “अवं चाताई, तू बज़्झोस।” ते तैखने तेसेरु कोढ़ साफ भोइ जेवं। 14 तैखन यीशुए तैस मैनुथ हुक्म दित्तो, “हेर, एसेरे बारे मां केन्ची सेइं किछ न ज़ोइयां। बल्के अपने आपे याजके हिरा। तैल्ला पत्ती, तू अपने बेज़्झोनेरे वजाई सेइं च़दतल च़ाद, जेसेरे बारे मां मूसा नेबे कानूने मां हुक्म दित्तोरोए। ताके लोकन पतो च़ले कि तू बेज़्झोरोस।” 15 पन यीशुएरे बारे मां सेबभन पतो लगे ते लोक दूरां देते एजने लगे ताके यीशुएरी गल्लां शुन्कने अपनि बिमैरन करां बेज़्झोना। 16 पन यीशु जादे केरतां सुनसान ठैरी च़लो गातो थियो, ते प्राम्गो केरतो रातो थियो। 17 एककी दिहेडी एरु भोवं कि यीशु शिक्षा देने लाग्गोरो थियो, ते तैखन किछ फरीसी ते शास्त्री लोक ज़ोते थिये, तैना गलील इलाके ते यहूदियारे सैरी इलाकन मरां यरूशलम नगरे मां ओरे थिये; ते परमेशेरेरी शक्ति यीशु सेइं साथी थी, ते बिमार बेज़्झोइतां गाते थियो। 18 किछ मैनेईं अक अधरंगी मैनुथ खट्टी पुइ छुइतां आनोरोए थियो, ते तैना कोशिश लगे केरने कि एस अन्तर नेइतां यीशु कां पुजाम। 19 पन अन्तर एजी तंगी थी कि तैना अन्तर न गेइ सके फिरी तैनेईं तैस घरेरी छत पुट्टी ज़ैस घरे मां यीशु थियो, ते खट्टां सने ते अधरंगी मैनुथ अन्तर यीशुएरे तुतरे अग ओसालो। 20 यीशु तैन केरो विश्वास हेरतां ज़ोवं, “हे दोस्त तेरे पाप माफ़ भोए।” 21 शास्त्री ते फरीसी लोक सोचने लगे, “ए कौन मैनुथ आए, ज़ै परमेशेरेरी तुहीन केरते, परमेशेरेरे अलावा कौन पाप माफ़ केरि सकते?” 22 यीशुए तैन केरि गल्लां बुझी ते तैन जुवाब दित्तो, “तुस अपने-अपने मने मां एन्चरां किजो सोचने लगगेरेथ? 23 कुन ज़ोनु सुखतुए, ‘तेरे पाप माफ़ भोए,’ या एन ज़ोनु ‘उठ, ते च़ल फिर?’ 24 पन तुसन पतो लगे, मैनेरे मट्टु ज़मीनी पुइ पाप माफ़ केरनेरो अधिकारे,” फिरी यीशुए तैस बिमारो ज़ो ज़ोवं, “अपनि खट सल्ल ते घरजो च़लो गा।” 25 ते अधरंगी बिमार मैनुथ सेबभी केरे सामने ते खडे उठो ते ज़ैस खट्टी पुइ ते झुलतो थियो, अपने दोग्गे पुइ छुइतां परमेशेरेरी बडयाई केरतो-केरतो घरजो च़लो जेव। 26 तैना सारे लोक हैरान राए ते परमेशेरेरी तारीफ़ केरने लगे ते कने ज़ोने लगे, “ए त असेईं अज़ नर्वीं गल लाई।” 27 एना गल्लां बीतनेरां बाद यीशु तैदां निस्सो, ते एककी चुंगी घिन्ने बाले कां च़ले जेव, तैसेरु नवं लेवी थियूं। ते तै चुंगी नेनेबाले दफ़तरे मां बिश्शोरो लाव, ते यीशुए तैस जो ज़ोवं, “तू मीं पत्ती च़ल ते मेरो चेलो बन।” 28 ते तैखने यीशु पत्ती च़लो जेव। 29 ते फिरी लेवी यीशुएरे लेइ अपने घरे अक बड़ी धाम दित्ती। ते तैडी चुंगी नेनेबाले ते होरे भी बडे लोक थिये ज़ैना तैस सेइं साथी रोटी खाने बिश्शो। 30 फरीसी लोक ते शास्त्री यीशुएरे चेलन सेइं ज़ोने लगे, “तुस चुंगी नेनेबालन ते पापी लोकन सेइं साथी किजो खातथ पीतथ?” 31 यीशुए तैन सेइं ज़ोवं, “बिमारन डाक्टरेरी ज़रूरत भोचे, न कि सझर लोकन। 32 अवं धर्मी लोकन नई, पन पापी लोकन कुजाने ओरोई कि, तैना अपने पापन करां मन फिरान।” 33 तैना लोक यीशु सेइं ज़ोने लगे, “यूहन्नारे चले त बरत रखतन ते प्रार्थना भी केरतन ते एन्चरे फरीसी लोक भी केरतन, पन तेरे चले त खानत पीतन?” 34 यीशुए तैननु जुवाब दित्तो, “इलाएरे दिहाडे, कुन लाडो साथी भोते सांते जन बरत रेखी सकतथ? 35 पन तैना दिहाडे एज्जले, ज़ैखन लाडो तैन केरां अलग कियो गालो (यानी मारो गालो)। तैन दिहैडन मां तैना (अपने दुखेरे वजाई सेइं) बरत रखेले।” 36 फिरी यीशु तैन अक होरि मसाल दित्ती, “पुराने लिगडे पुइ नव्वे लिगडेरी टलोई कोई न लाए, नता ते टलोई तैस मरां होरु भी छिदेली, ते कने पुराने सेइं ते मिले भी

नन्ना। 37 नन्वो दाछारो रस पुरैनी मसकी मां कोई न छुट्टे, नन्ना त नन्वे दाछारो रस सेईं मसक भी फेटी गाने, ते दाछारो रस भी डुल्ली गाते, ते तै मसक भी बरबाद भोचे। 38 किजोकि नन्वो दाछारो रस नन्वीं मसकन मां भरोरो लोइते। 39 कोई मैन्हु पुरानो दाछारो रस पीतां नन्वों न पीनो चाए, किजोकि तै जोते कि पुरानो दाछारो रस जादे रोइए।”

6 एक्की फेरे यीशु त तैसेरे चले आरामेरे दिहाड़े ऊडारन मांमेईं एक्की बत्तां चलोरे थिये, ते तैसेरे चले शिल्लां हथेईं सेईं प्रोइतां खाने लग्गे। 2 एन लेइतां किछ फरीसी लोकेईं तैन सेईं जोवं, “तुस एन कम किजो लोरेथ केरने, जैन आरामेरे दिहाड़े केरनू जेइज नईं?” 3 यीशु एन जुवाब दितो, “कुन तुमेईं पवित्रशास्त्रे मां कथे नईं पढ़ेरू कि जेइस इश्शो पूवज दाऊद राजो त तैसेरे साथीं हलुखोरे थिये त तैनेईं कुन कियेरू थियूं? 4 तैनेईं केन्चरे परमेशरेरे घरे मां गेइतां चैद्वीरी रोटी खोरी थी, ते अपने सैथन भी दितोरी थी। तैना रोटी खैनी सिर्फ याजकां केरे लेइ जेइज थी।” 5 फिरी तैने तैन सेईं जोवं, “मैनेरू मट्टू, यानी अवं आरामेरे दिहाड़ेरो भी प्रभु आईं।” 6 एक्की बार यीशु प्रार्थना घरे मां गेइतां उपदेश शुनेईं राहोरो थियो, ते तेइस भी आरामेरी दिहाड़ी थी तैड़ी अक मैन्हु थियो, जेसेरो देइनो हथ शुक्कोरो थियो। 7 शास्त्री त फरीसी लोक यीशुएरी ताके मां थिये कि अगर यीशु आरामेरे दिहाड़े केन्ची बइजालो त असन इलजाम लानेरो मौको मैलनोए। 8 पन यीशु तैन केरे बारे मां सेमझी जेव, यीशुए तैस शुक्कोरे हथेबाले मैन्हु सेईं जोवं, “मझाटे खडे भो।” ते खडो भोव। 9 तैखन यीशु तैन सेईं जोवं, “अवं तुसन पुछतां कि आरामेरे दिहाड़े भलाई केरनि रोइए या बुराई केरनि रोइए, मैनेरी जान बघानी या मारनी?” 10 ते तैनी चेत्रे पासना तैन केरां तककू ते तैस मैन्हु जो जोवं, “अपनो हथ हिरा।” तैनी मैने अपनो हथ अग्रोवं कियो। त अकदम तैसेरो हथ बेज्जोव। 11 पन याजकन त फरीसन बड़ी सरक अई तैना एप्पू मांमेईं बेंस केरने लग्गे, कि असां यीशुए सेईं कुन केरम? 12 तेइस एरू भोवं कि यीशु प्रार्थना केरनेरे लेइ एक्की पहाड़े पुइ चढो, ते सैरी राती परमेशरे कां प्रार्थना केरतो राव। 13 जैखन ट्लेकडोने लगू त तैनी अपने चले एप्पू कां कुजाए ते तैन मरां 12 प्रेरित चुने। 14 अक शमौन जैस जो पतरस भी जोते थिये तैसेरो दूला अन्टियास, याकूब, यूहन्ना, फिलिप्पुस, बरतुलमै, 15 मत्ती, थोमा, हलफरुई मट्टू याकूब, ते शमौन जैस जो जेलोतेस जोतन। 16 ते याकूबेरू मट्टू यहूदा ते यहूदा इस्करियोती जै तैसेरो ट्लुवांने बालो बनो। 17 तैखन यीशु तैन सेईं साथी चौरस ठैरी मां खडो भोव, ते तैसेरे चले भी तैड़ी अकोट्टे भोए ते सारे यहूदिया ते यरूशलेम नगरन त कने सूर ते सैदारे आसेपासरे लोक समुन्दरेरे बन्नेरे बडे लोक जैना तैड़ी थिये। 18 एन लोक यीशु करां ज्ञान शुन्ने ते अपनि-अपनि बिमैरी तैस कां बइजाने ओरे थिये, ते जैन लोकन पुइ भूतां केरे सैये सेईं दुखे मां थिये तैना भी बेइजोइ जे। 19 सब लोक तैस सेईं हथ लानेरी कोशिश केरते थिये किजोकि तैस मां शक्ति थी जैस सेईं तैना बेइजोते थिये। 20 तैखन यीशु अपने चेलां केरे तकने लगो ते जोने लगो, “परमेशर तुसन बरकत देलो जैना नमरथ, किजोकि स्वर्गरू राज तुशु आए। 21 परमेशर तुसन बरकत देलो जैना हलुखोरेथ, किजोकि तुस रजनेथ, परमेशर तुसन बरकत देलो जैना अज रोतथ, किजोकि तुसेईं हसनए।” 22 “परमेशर तुसन बरकत देलो, जैखन मैनेरे मट्टू, यानी मेरे चेलो भोनेरे वाजाई सेईं लोक तुशुशी तुहीन केरन, ते तुसन भाईचारे करां कनारे छुडेले, ते तुसन बेइजत केरेले, ते तुशुशु नवं केटी छुडेले।” 23 “तैस दिहाड़े खुशी भोइतां उछुइथ, किजोकि हेरा तुशुशे लेइ स्वर्ग मां बडू इनामे। तैन केरे दादे-पडदादे नेबन सेईं भी एरो जेरो बताव केरते थिये।” 24 “पन अफ्रसोस! तुसन पुइ जैना दौलतमन्दथ, किजोकि तुसन सब किछ मैलेरूए। 25 अफ्रसोस! तुसन पुइ, जैन तुस चाते थिये, तुसन तैन मैल्लू, किजोकि तुस शोग केरेले ते लेरां देले। 26 पन अफ्रसोस! तुसन पुइ जैखन लोक तुसन जो भलू जौन, किजोकि तुशुशे दादे-पडदादे भी झूठे नेबन सेईं एरो बताव कियोरो थियो।” 27 “अवं तुसन शुन्नेबालन सेईं जोताई कि अपने दुश्मन

सेईं प्यार केरा। जैना तुसन सेईं बैर रखतन तैन केरू भलू केरा। 28 जैना तुसन जो बुरू जोतन तुस तैन केरे लेइ बरकत मग्गा, जैन तुसन बेइजत केरन तुस तैन केरे लेइ प्रार्थना केरा। 29 अगर कोई तुशुशे एक्की खैखोड़ी पुइ थप्पड बाहे त होरो पासो भी तैसेरे पासे रखा, ते अगर कोई तुशुशु कांटे नेते त कमीज भी तैस देथ। 30 जै कोई तीं करां किछ मग्गे त तैस देथ अगर कोई तेरो सबाब नेते ते तैस करां वापस न मग्गा। 31 ते जेन्चरे तुस चातथ कि लोक तुसन सेईं केरन तेन्चरे तुस भी तैन सेईं तेरहु केरा। 32 अगर तुस तेन्ने सेईं प्यार केरथ जैना तुसन सेईं प्यार केरतन त तुशुशु कुन एवसाने? किजोकि पापी लोक भी अपने प्यार केरनेबालन सेईं प्यार केरतन। 33 अगर तुस तैन केरू भलू केरतथ जैना तुशुशु भलू केरतन त तुशुशु कुन एवसाने? किजोकि पापी लोक भी अपने प्यार केरनेबालन सेईं प्यार केरतन। 34 अगर तुस तेन्ने ओधार देतथ जैन करां तुसन वापस भी मैलनेरी उमीदे, त परमेशर तुशुशी बइयाई किजो केरे? किजोकि बुरे लोक भी अपने प्यार केरनेबालन पेंडसे देतन ताके तैन करां वापस मैलन। 35 पन तुस अपने दुश्मन सेईं प्यार केरा ते तैन केरू भलू केरा, ओधार देइयथ पन तैन करां वापस मैलनेरी उमीद न रेखथ, एल्हेरो स्वर्ग मां तुशुशे लेइ अक बडो फले, किजोकि तुस परमप्रधान परमेशरेरे बच्चे भोले, किजोकि तै परमेशर न मन्ने बालन पुइ ते जालमन पुइ भी दया केरते। 36 जेरो दया दिल् तुशुशो बाजी तेरेहे दया दिल् तुस भी भोथा।” 37 “दोष न लाथ, तुसन पुइ भी दोष न लव गालो, निन्दा न केरा, तुशुशी भी निन्दा न की गाली, तुस होरन माफ केरेले त तुसन भी माफ कियूं गालू। 38 तुस होरि किछ देले त तुसन भी किछ दितू गालू तुशुशु बरकतरू भांड जेन्चरे अन्नेरी हाटी हिलेइतां देतां तैन भी तेन्चरे जैस हैटी सेईं तुस होरि केरे लेइ मिनतथ तैरसे सेईं तुशुशे लेइ भी मिनेले।” 39 यीशुए तैन अक मिसाल शुनाई, “कुन कानो होरि काने बत हेरेईं सकते? तैना त दुइये गढे मां बिछुडेले? 40 चेलो अपने गुरू करां बड्डी न भोए पन हर एक्की गल्ली मां जैखन सब शिखेलो त अपने गुरेरो जेरो भोलो। 41 तू अपने दूलाएरी एछछी मां कूडो किजो तकतस, पन तेरी एछछी मां त नग आए, ते तैसेरो तू खियाल भी न केरस? 42 तू अपने दूलाए केन्चरे जोई सकतस कि, ‘तेरी एछछी मरां कूडो केडी?’ हे पाखंडी पेइले अपनि एछछी मरां नग कढ फिरी अपने दूलाएरी एछछी मरां कूडो केडी सकतस।” 43 “किजोकि केन्ची भी रोडे बुटे बुरो फल न लग्गे ते न केन्ची बुरे बुटे रोडो फल लग्गे। 44 हर बुट अपने फले सेईं पिशेनोते। किजोकि न झालसे सेईं फेगू लगान ते न झालन सेईं दाछ लगे। 45 रोडो मैन्हु अपने दिलेरो बुटे खजाने मरां रोडी चीजां कढते ते बुरो मैन्हु अपने दिलेरे बुरे खजाने मरां बुरी चीजां कढते किजोकि जैन दिले मां भरेरू भोते तेन्ने जबानी पुइ एइते।” 46 “जैखन तुस मेरे जोने पुइ अमल न केरथ त मीजो, हे प्रभु, हे प्रभु, किजो जोतथ? 47 जै मीं कां एइते ते मेरी गल्लां शुन्तां तैन पुइ अमल केरते त अवं तुसन सेईं जोताई कि तै केसेरो जेरो भोलो? 48 तै तैस मैनेरो जेरोए जैनी अपनू घर डुग्घी खाइ केइतां पेक्की ठैरी घर बनावं जैखन हडाई आई त तैस घरे किछ न भोवं, किजोकि तैसेरी मुनीयाद पेक्की ठैरी थी। 49 पन जै मेरी गल्लां शुन्तां तैन पुइ अमल न केरे त तै तैस मैनेरो जेरोए, जैनी अपनू घर रेती पुइ बनाव ते जैखन हडाई अई त तैन घर डुल्ली जेवं ते तब्बा भोइ जेवं।”

7 जैखन तैनी लोकन एपनी सब गल्लां शुनेईं छैडी, त तै कफरनहूम नगर मां अवं। 2 तैड़ी केन्ची सुबेदारोरे अक टलारो सेवक बिमार थियो ते मरने बालो थियो। 3 तैनी यीशुएरी मुशुरी शुन्तां यहूदी केरे किछ बुजुर्ग तैस कां मिनत केरनेरे लेइ भेजे, कि तै एइतां मेरो सेवक बइज्जाए। 4 तैना यीशु कां आए ते तैस कां मिनत केरने लगे, “तै इस काबले, कि तू तैसेरेलेइ इन केरस। 5 किजोकि ते इश्शी कोमी सेईं बड़ी हमदरदी रखते, ते इश्शु प्रार्थना घर तेन्नी बनेवरए।” 6 यीशु तैन सेईं साथी-साथी चलो जेव, पन जैखन तैस घरे नेडे पुजो त सूबेदारो होरि दोस्तन सेईं समाद भेजो कि, “प्रभु तकलीफ न केर, किजोकि अवं एस काबल नईं कि तू मेरे घरे मां एज्जी सखत। 7 एस्से वजाई सेईं अवं भी अपनो आप तीं कां एजनेरे काबल न सेमझी बल्के अपनि

जबानी सेइं जोस त मेरो नौकर बेज्झोइ सकते। 8 तै मैनुहु ज़ोने लगेो कि अवं भी केन्चेर अधिकरे मां कम केरताई, ते सिपाही मेरे अधीन आन, ते ज़ैखन एक्की जो ज़ोतां कि 'गा,' त तै गाते, ते होरि जो ज़ोतां एई, त तै 'एइते,' ते अपने सेवक जो ज़ोताई, 'इन कम केर,' त तै केरते।" 9 यीशु एन शुन्तां हैरान रेइ जेव, ते पत्रावं लोकां केरे पासे लगेो तकने ज़ैना तैस पचपती ओरे थिये तैन जो ज़ोने लगेो, "कि अवं तुसन सेइं सच ज़ोताई कि मीं इस्राएल मुलखे मां इस गैर यहूदी मैनेरो ज़ेरो मैनुहु नई लोवरो ज़ै मीं पुइ एत्रो विश्वास केरे।" 10 ते ज़ैना लोक यीशु कां भेजोरे थिये वापस ज़ैखन घरे आए त तै सेवक बेज्झोरो लव। 11 थोडे च़िरैरां पत्ती एरू भोवं कि यीशु नाईन नव्वेरे नगर मां च़ले लगेो जेव, ते तैसेरे च़ेले ते होरे भी बडे लोक तैन सेइं साथी थिये। 12 ज़ैखन तैना नगरेरे फाटक पुइ नेडे पुजे, त हेरतन, कि अक मुइदो बेडर जो च़लेवरोए, ते तैन अपनि अम्मारू अक्के मट्टू थियूं, ते नगरेरे बडे लोक तैस विधवा कुआन्शी सेइं साथी थिये। 13 एन लेइतां प्रभुए बडो तरस अव, ते तैस जो ज़ोवं, "लेरां न दे।" 14 फिरी यीशु नेडे एइतां शिडी सेइं हथ लाव, ते छूनेबाले रुके, ते यीशुए ज़ोवं, "ए जवान, अवं तीं सेइं ज़ोतां, खडो उठ!" 15 तैखन मुइदो उठो, ते गल्लां लोक केरने, ते यीशुए तै तैसेरी अम्मा सांफतां छडू। 16 इन हेरतां सब लोक डेरि जे, ते परमेशरेरी तारीफ़ केरने सेगे, "अक महान नबी अंस मां ओरोए, ते परमेशरे अपने लोकन पुइ अपनि सिधी नज़र रखोरीए। 17 एरुसे गल्लरी वजाई सेइं ए खबर यहूदियारे ते आसेपासरे सेबमी मुलखन मां फैली जेई।" 18 ते यूहन्ना तैसेरे च़ेलेई एन सैरी गल्लां केरि खबर दिती। 19 तैखन यूहन्ना एन शुन्तां दूई च़ेले कुजेइतां यीशु कां पुच्छने भेजे कि, "एजनेबालो तू आस, या असां होरि बलगम?" 20 तैनेई यीशु कां एइतां पुच्छू, "असां यूहन्ना बपतिस्मो देनेबाले तीं कां पुच्छने भेजोरेम, कि एजनेबालो तू आस, या असां होरि बलगम?" 21 तैखन यीशुए बडे लोक बिमरन ते तकलीफ, ते भूतन करां छुटाए, ते बडे काने लोकन एछ़न लौ दिती। 22 यीशु तैन ज़ोवं, "ज़ैन किछ तुसेईं लाहेरूए ते शुनेरूए गेइतां यूहन्ना सेइं ज़ोथ, कि काने लातन, ते टोंटे चलतन, ते कोडी केरू कोइ साफ भोते, ते टोंऊने शुन्तन, ते मुइदे ज़ीते भोतन, ते गरीबन खुशखबरी शुनाई गाचे। 23 परमेशर तैस बरकत देते, ज़ै मीं पुइ शक न केरे।" 24 ज़ैखन यूहन्नारे बिस्तार देनेबाले लोक वापस च़ले जे, त यीशु यूहन्नारे बारे मां गवाही देने लगेो, "तुस जंगले मां कुन हेरने जोरे थिये? कुन हवाई सेइं हिलते निरेठरे डाल? 25 त फिरी तुस होरू कुन हेरने जोरे थिये? कुन रोइां लागोरां लिगइन बालो मैनुहु? हेरा, ज़ैना मां लिगइां लाने बाले मैनुहु, ते ज़ैना एश केरनेबाले लोक भोतन। तैना राज महलन मां रातन, 26 त फिरी तुस होरू कुन हेरने जोरे थिये? कुन कोई नबी? हाँ, अवं तुसन सेइं ज़ोताई, नेबी करां बड्डे। 27 ए तैए, ज़ेसेरे बारे मां लिखेरूए, 'हेर, अवं अपनो बिस्तार देनेबालो तीं अग्री-अग्री भेजताई, ज़ै तेरी बत अग्रोवं तियार केरेलो।" 28 यीशुए ज़ोवं, "अवं तुसन सेइं सच ज़ोताई, कि ज़ै कुआन्शन करां ज़रमोरोए, तैन मां यूहन्ना बपतिस्मो देनेबाले करां बड्डो कोई नई। पन ज़ै परमेशरेरे राज़े मां निकडोए, तै यूहन्ना करां बड्डोए।" 29 ज़ैखन तैन लोकेई एन गल्लां शुनी त धइत नेनेबालेई भी यूहन्ना बपतिस्मो देनेबाले करां बपतिस्मो नेइतां परमेशर धर्मी मन्तो। 30 पन फरीसी लोकेई ते शास्त्री लोकेई तैस करां बपतिस्मो न नेइतां परमेशरेरी मर्ज़ी अपने बारे मां टाली। 31 "बरसा, अवं इस ज़मानेरे लोकां केरि मिसाल केस सेइं देई, तैना केसेरे ज़ेरेन? 32 तैना तैन मट्टां केरे ज़ेरेन ज़ैना बज़ारे मां बिशोरां एक्की होरि जो हक देइतां ज़ोतन, 'असेईं तुशे लेइ बेंशोई बज़ाइ, ते तुस न नच़्चे, असेईं शोग मनाव, पन तुसेईं लेरां न दिती!" 33 किजोकि यूहन्ना बपतिस्मो देनेबालो न रोटी खांतां अव, न शराब पीतां अव, ते तुस ज़ोतथ, कि एस पुइ भूतेरो सैयो आए। 34 मैनेरू मट्टू खातू पीतू अव, ते तुस ज़ोतथ, 'हेरा, ते पेटू ते शराबी मैनुहु, कने धइत नेनेबाले ते पापी लोकां केरो दोस्त।" 35 पन अक्ल अपने सेबमी मट्टन करां जादे सच़री साबत भोइ।" 36 फिरी केन्चे फरीसे यीशु कां मिनत की, कि मीं सेइं साथी रोटी खा, बरसा, तै तैस सेइं साथी तैसेरे घरे जेव, ते तैस सेइं साथी रोटी खांने लगेो। 37 त हेरा, अक बदचलन कुआन्श ज़ै तैस नगरेरी थी

एन बुइतां कि यीशु फरीसेरे घरे रोटी खांने बिशोरोए, संगमरमरेरे एक्की भांडे मां इत्र आनो। 38 ते यीशुए पावन कां नेडे लेरां देती खडी भोइ, ते तैसेरे पाव एंखेई सेइं सेले ते अपने दोगरेरे बालेई सेइं पोंछने लगी ते तैसेरे पावन फुम्मडी देने लगी कने पावन पुइ इत्र लाव। 39 ज़ैनी फरीसे यीशु कुजोरो थियो, तैनी एन लाव, त ज़ोने लगेो, "अगर ए मैनुहु नबी भोथो त बुइथो कि ज़ै कुआन्श तैस कांए तै कौने ते ए केरि कुआन्श? किजोकि ए बदचलने।" 40 यीशु तैसेरे इन खियाल ज़ैनां तैस सेइं ज़ोवं, "हे शमौन, मीं तीं सेइं किछ ज़ोनूए।" फरीसे ज़ोवं, "हे गुरू ज़ो।" 41 यीशुए तैस सेइं मिसाल देइतां ज़ोवं "केन्ची शोहूकारेरो केन्ची दूई ज़न्न कां कर्ज़ां थियो, एक्की कां 500 दीनार, ते होरि कां 50 दीनार थिये। 42 ज़ैखन तैन कां देने जो किछ न राऊं, त तैनी शोहूकरे दुइने कर्ज़ां माफ़ कमाव। बरसा, कौन तैन मरां जादे शोहूकरे सेइं प्यार केरेलो?" 43 शमौने जुवाब दिती, "मेरे समझी सेइं त ज़ेसेरो जादे कर्ज़ां माफ़ कियो।" यीशुए ज़ोवं, "तीं ठीक फैसलो कियो।" 44 यीशु तैस कुआन्शरे पासे तेकतां शमौने ज़ोवं, "कुन तू इस कुआन्शरां तकतस? अवं तेरे घरे अव, तीं मीं (रीतेरे मुताबिक) पव धोने जो पानी न दित्तू, पन इसां मेरे पाव एंखेई सेइं पव धोए ते अपने दोगरेरे बालेई सेइं पोंछे।" 45 तीं मीं (रीतेरे मुताबिक) फुम्मडी न दिती, पन एसां ज़ैखनेरो अवं इडी ओरोई मेरे पचन फुमडी देनी न डेइई। 46 तीं मेरे दोगे पुइ तेल न मल्लो, पन एसां मेरे पावन पुइ इत्र मल्लो। 47 "एल्लेरेलेइ अवं तीं सेइं ज़ोताई कि, एसांरे जादे पाप ज़ैना एसां कियोरे थिये, माफ़ भोए, किजोकि एसां जादे प्यार कियो, पन ज़ेसेरे थोडे पाप माफ़ भोतन तै थोडो प्यार केरेते।" 48 यीशुए तैस कुआन्शी जो ज़ोवं, "गा तेरे पाप माफ़ भोए।" 49 एस गल्लरी पुइ ज़ैना तैस सेइं साथी रोटी खांने बिशोरे थिये, अपने-अपने मने मां सोचने लगे, "ए कौने ज़ै पाप भी माफ़ केरते, पाप त सिर्फ़ परमेशर माफ़ केरते?" 50 पन यीशुए तैस कुआन्शी सेइं ज़ोवं, "परमेशरे तू एल्लेरेलेइ बचाई कि तीं मीं पुइ विश्वास कियो, हुनी तू खुशी सेइं गा।"

8 थोडे च़िरैरां बाद एरू भोवं यीशु अपने तैन 12 च़ेलेन सेइं साथी नगर-नगर ते इल्ववं-इल्ववं हंठतो ते प्रचार केरतो राव, ते परमेशरेरे राज़ेरी खुशखबरी शुनातो राव। 2 किछ कुआन्शां भी तैन सेइं साथी थी, ज़ैन मरां भूतां केरो सैयो कढोरो थियो। ते ज़ैन केरि बिमैरी दूर भोरी थी, तैना केरां नव्वां इना आन, मरियम ज़ै मगदलीन इल्व्वेरी राने बाली थी, ज़ैस पुइां सत भूतां केरो सैयो कढोरो थियो, 3 हेरोदेस राज़ेरे भण्डारी खोज़ेरी कुआन्श योअन्ना ते सूसन्नाह ते होरि भी काई कुआन्शां थी ज़ैना अपनि जेइदात देइतां यीशु ते तैसेरे च़ेलां केरि सेवा केरती थी। 4 फिरी ज़ैखन बडे लोक तैस कां अकोट्टे भोए, ज़ैस मां नगरां-नगरां केरे लोक तैस कां एइते थिये। यीशुए तैन मिसाल देइतां ज़ोवं। 5 "एक्सां अक बीज बेनेबालो बीज बेने जो जेव। बीज बेते बार किछ बीज बत्तेरे इलेखी बिछडू ते अम्बरेरे चुडोल्लेई एइतां तैन बीज चुनु। 6 ते किछ बीज घोइनबाली ज़मीनी पुइ बिछडू, ते लगगू पन जल्दी शुक्की जेव, एल्लेरेलेइ कि तैस पानी न मैल्लू। 7 किछ बीज कंटां केरे झैल्लन मां बिछडू। ज़ैखन तैडी बूटो लगेो, त कंटां केरे झैल्लेई भी बेडोइतां तै बूटो दबेइ छड्डे। 8 ते किछ बीज रोटी ज़मीनी मां बिछडू, ते लगू ते शोव गुणा फल लगेो," एन शुनेइतां तैनी तैन सेइं उच्चि आवाज़ी मां ज़ोवं, "ज़ै कोई समझनू चाते, तै ध्याने सेइं शुने ते समझे।" 9 तेसेरे च़ेलेई तैस पुच्छू, "एस मिसालरो कुन मतलबे?" 10 यीशुए तैन ज़ोवं, "तुसन परमेशरेरे राज़ेरे भेदां केरि समझ दितीरोए, पन अवं होरि लोकन मिसाल देइतां ज़ोताई, 'तैन तैना बार-बार शुनेले, पन मेरी गल न समझेले।" 11 "एस मिसालरो ई मतलबे, कि बीज परमेशरेरू वचने। 12 ज़ैना मैनुहु परमेशरेरी गल्लां शुन्तन, तैन मरां किछ लोक तैस बत्तेरे ज़ेरे आन, ज़ैडी बीज बिछडते। तैना त परमेशरेरी गल्लां शुन्तन, पन शैतान अकदम एइतां तैन मैनुहु केरे दिले मरां तैन वचन धिनी गाते, कि एरू न भोए कि तैना विश्वास केरन ते तैन मुक्ति मैल्ले। 13 ते घोइनबाले ज़मीनी मां बेवरू बीज तैन, ज़ैना वचन शुन्तां खुशी सेइं मन्तन पन ज़ील न छडने सेइं तैना थोडे च़िरे तगर विश्वास रखतन ते अज़मैइशरे मौके

मुड़ी गातन। 14 ते जैन झल्लन मां बीज झूडू तैना इना आन, जैना वचन शुन्तन, पन अग्रोवं चेलतां फिक्र ते दीलत ते जिनदगरो एशो-अशरती मां फेसी गातन ते तैन केरो फल न पक्के। 15 पन रोड़ी ज़मीनी पुडेरूप बीज तैन्न, जैना वचन शुन्तन ते अमल भी केरतन, ते रोड़ेचारे दिले मां बसातन ते सबरी सेइं फल भी लगते। 16 “कोई दीयो बैलतां केन्ची भांडे हैठ ओडकतां न रखे, ते न खट्टी हैठ रखे बल्के उच्ची ठैरी रखतन ताके दीयो अन्तर एजने बालन ला दे। 17 किजोकि कोई एरी चीज छपोरी नई, ज़े बांदी नई भोनी, ते कोई भेद छपोतो न रालो, पन सारो भेद बांदो भोलो। 18 बस्सा हुशार राथ, कि तुस केन्चरे शुन्तथ? ज़ैस कां परमेशरेरी मज़ीं समझनेरी इच्छा आए, तैस परमेशर जादे समझ देलो। पन ज़ैस कां परमेशरेरी मज़ीं समझनेरी इच्छा नई, तैस केरां थोड़ी ज़ेरि समझ, ज़े तैस कां आए, ते भी नी गाली।” 19 फिरी तैसेरी अम्मा ते तैसेरे ढला तैस कां आए, पन हछे मैन्हु केरि वजाई सेइं तैस कां न पुज़ी सके। 20 ते यीशुए पतो दित्तो, “तेरी अम्मा ते तेरे ढला बेइर खडे आन ते तैना तीं सेइं गल केरनि चातन।” 21 यीशुए तैनु जुवाब दित्तो, “मेरी अम्मा ते मेरे ढला इना आन जैना परमेशरेरु वचन शुन्तन ते तैस पुड अमल भी केरतन।” 22 फिरी एककी दिहाड़े एरू भोवं, कि यीशुए अपने चेलन सेइं ज़ोवं, “एज्जा, समुन्दरे पार गाम ते तैना किशती मां च़ेढतां समुन्दरे पार च़ले जे।” 23 पन ज़ैखन किशती च़लोरी थी, त यीशुए झुली जेव ते समुन्दरे पुड बडो तूफान अव, ते किशती पैनी सेइं भरोने लगगी, ते तैनु खतरो भोइ जेव। 24 च़ेलेईं ते बींझैइतां तैस सेइं ज़ोवं, “हे गुरु, असां मेरि गातम यीशु खडे उठो ते हवाई जो ते पैनी जो ज़ोवं, रुकी गाथ ते तूफान रुकी जेव।” 25 यीशुए अपने चेलन सेइं ज़ोवं, “तुशो विश्वास कोरां जेव?” तैना डेरि जे ते हैरान भोइतां एप्पू मांमेइं ज़ोने लगे, “ए कौने! ए हवाई त पैनी भी हुक्म देते ते तैना एसेरो हुक्म मन्तन।” 26 फिरी तैना गिरासेनी इलाके मां पुजे, ज़े गलील समुन्द्रे सामने पारे। 27 ज़ैखन ते बन्ने पुड ओस्सो, त तैस नगरेरो अक मैन्हु मैल्लो ज़ैस पुड भूतां केरो सायो थियो, ते तै बडे दिहाड़े केरो देंतो न लिगइं लातो ते न घरे रातो थियो, बल्के कन्न मां रातो थियो। 28 तैनी मैने यीशु लाव ते चिन्डां लगे मारने, ते तैसेरे सामने झुकतां ज़ोरे सेइं ज़ोने लगे, “हे यीशु परमप्रधान परमेशेरा मइं! तीं मां सेइं कुन कम्मे? अव तीं कां मिनत केरताईं मां दुख न थियो।” 29 किजोकि यीशु तैस भूते तैस मैन्हु मरां निसनेरो हुक्म देने लोरो थियो, एल्हेरेलेइं ते बडे बुरे तरीके सेइं ट़लेइं रखोरो थियो, ते लोक तैस कैबू केरनेरे लेइ अग्री भी रसन ते शंगलन सेइं बेंधतां रखते थिये, ते ते तैनी भी ट़लोइतो थियो, ते भूत तैस मैन्हु जंगले मां नेतू थियू। 30 यीशुए तैस पुच्छू, “तेरु कुन नव आए?” तैनी ज़ोवं “मेरु नंव फौज आए,” किजोकि तैस मां बडां भूतां थियां। 31 ते तैनेईं तैस कां मिन्त की, “असन अथाह कुण्डे मां गानेरो हुक्म न दे।” (Abyssos g12) 32 तैडी पहैडी पुड अक सूरं केरो बडो घान थियो, ते तैनेईं तैस कां मिनत की, “असन एन मां गाने दे ते यीशुए गाने दित्तां।” 33 ते तैना भूतां तैस मैन्हु मरां निस्तां तैन सूरन मां च़ेलि जेआं, ते सूरं केरो सारो घान उत्रेई उन्डे छालां मैरतां समुन्दरे मां डुबतां मेरि जेव। 34 सूरं केरे च़ारनेबाले एन हेरतां नेशशी जे, ते नगर मां ते इल्लोव्वन मां एस गल्लरी खबर शुनाई। 35 लोक ते तमाशो हेरने आए, ते यीशु कां ज़ैस मैन्हु मरां भूतां केरि फौजरो सैयो निसोरो थियो, तैनी लिगइं लां ते होशी मां एइतां यीशु कां बिशथोरो लाव ते डेरि जे। 36 ज़ैनेईं तैना गल्लां पेइले लेवरी थी, तैनेईं ज़ोवं, इस मैन्हु पुड भूतां केरो सैयो थियो ते ए केन्चरे बेइंझोव। 37 ते गिरासेनियों इलाके मां च़ेरे पासां केरे लोक यीशु कां मिनत केरने लगगे, कि इट्ठां च़लो गा, किजोकि तैना बडे डरं थिये, ते यीशु किशती मां बिस्तां वापस च़लो जेव। 38 पन ज़ैस मैन्हु मरां भूतां निसोरां थियां ते यीशु कां मिनत केरतां ज़ोने लगे, मां एप्पू सेइं साथी रख पन यीशुए ते भेजो ते ज़ोवं। 39 “अपने घरे च़लो गा ते लोकन सेइं ज़ो, कि प्रभु परमेशरे तीं पुड दया केरतां तेरे लेइ केन्नु बडू कम कियोरूप। तैखन ते च़लो जेव ते सारे नगर मां एस गल्लारो प्रचार केरने लगगे, कि यीशुए मेरे लेइ केन्नु बडू कम कियोरूप।” 40 ज़ैखन यीशु वापस एज्जी राहोरो थियो, ते लोक बडे खुशी सेइं तैस सेइं मिले, किजोकि तैना सब तैस बलगत थिये।

41 ते हेरा याईर नव्वेरो अक मैन्हु ज़े प्रार्थना घरेरो अक प्रधान थियो, यीशु कां अव ते तैसेरे पावन पुड पेइतां मिनत केरने लगगे, “तू मेरे घरे च़ला।” 42 किजोकि तैसेरी अक्के कुई ज़े 12 सालां केरि थी, ते मरनेबाली थी। ते ज़ैखन यीशु च़लोरो थियो, त लोक तैस उन्डे बिछड़ते थिये। 43 ते अक कुआन्श भी थी, ज़ैस 12 सालां केरि खून च़लनेरी बिमारी थी। ते तैसां अपनो सारो ज़िन्दगरो पेंडसो हकीमन कां अल्लाजोरे लेइ खर्च कियोरो थियो, ते तै केन्चरे हथ्ये ठीक न भोइ। 44 ते कुआन्श यीशु पतोरं एइतां तैसेरे चोगे सेइं हुरी, त अकदम तैसेरी खून च़लनेरी बिमारी बेइंझोई। 45 यीशुए ज़ोवं, “मेरे लिगइं सेइं केनि हथ लाव?” ज़ैखन सब लोक इन्कार केरने लगगे, त पतरसे ते तैसेरे सैथेईं ज़ोवं, “ए गुरु, लोक तीं ढलाच़ने ते तीं उन्डे बिछड़ने लोरेन।” 46 पन यीशु ज़ोवं, “केन्चे मीं सेइं हथ लोरोए किजोकि मीं पतो लगगे कि मीं मरां शक्ति निसोरिए।” 47 तैखन तैस कुआन्शां हेरु, कि अवं छेप्पी न बेदि, त ते डरती-डरती सामने अई ते यीशुए पावन पुड बिछड़तां सैरी लोकां केरे सामने ज़ोने लगी, मीं तीं सेइं हथ लोरोए, ते ज़ेरो मीं हथ लोरोए अवं अकदम बेइंझोरी। 48 यीशुए तैस कुआन्शी ज़ोवं, “हे कुईए, तेरे विश्वासे तू बइंझाई ते खुशी सेइं च़ली गा।” 49 यीशु एन हेजु ज़ोतो थियो, त प्रार्थना घरेरे प्रथानेरे तैटां केन्चे मैने एइतां ज़ोवं, “तेरी कुई मेरि जेवरिए, हुनी गुरु तकलीफ न दे।” 50 पन यीशु एन शुन्तां जुवाब दित्तो, “न डरा। सिर्फ मीं पुड विश्वास रख कुई बेंडी गानीए।” 51 ज़ैखन ते तैस घरे मां जेव, त तैनी पतरस यूहन्ना ते याकूब ते कुइयरे हाज बव्वेरे अलावा होरो कोई अन्तर एजने न दित्तो। 52 सब लोक तैस कुइयरे लेइ लेरां देंते थिये, पन यीशुए ज़ोवं, “लेरां न देथ, ए कुई मूओरी नई बल्के झुलोरोए।” 53 लोक एन शुन्तां हसने लगे, किजोकि तैना ज़ानते थिये कुई मेरि जेवरिए। 54 पन यीशुए तैस कुइयरो हथ ट़लाव ते ज़ोवं, “कुइयरे खडी उठ।” 55 ते तैसारे प्राण वापस आए ते तै लूशी खडी भोइ, ते यीशुए तैन ज़ोवं, एस कुइयरे किछ खाने जो देथ। 56 तैस कुइयरे हाज बव हैरान रेइजे, पन तैनी तैन सेइं समझैइतां ज़ोवं, ज़ैन किछ इडी भोवं एन केन्ची सेइं न ज़ोइयथ।

9 यीशुए अपने 12 च़ेले एप्पू कां कुजाए ते तैन शक्ति ते अधिकार दित्तो कि सैरी भूतन कढन ते बिमेरी दूर केरन। 2 ते यीशुए तैना परमेशरेरे राज़ेरो प्रचार केरनेरे लेइ ते बिमार बइंझानेरे लेइ भेजे। 3 तैनी तैन सेइं ज़ोवं, “बत्तां जो किछ न नेइयथ, न सोटी न झोलो न रोटी न पेंडसे ते न दुइयोवं लिगइं। 4 ज़ैस घरे मां गाथ त तैडी बिशरी रेइयथ ज़ां तगर तुस तैस नगरे मरां न गाथ। 5 ते ज़ैस नगरेरे लोक तुसन कबूल न केरन त तैस नगर मरां गांते बार अपने पांवां केरि धूड ठुडकथ, ताके तैन पुड गवाही भोए।” 6 बस्सा, तैना च़ले जे, ते इलोव्वे-इलोव्वे गेइतां परमेशेरी खुशखबरी शुनाते, ते लोकन बिमेरन करां बइंझाते च़ले जे। 7 मुलखेरो च़ेवरोवं हिस्से पुड हेरोदेस राज़ो राज़ केरतो थियो, तै एन सब शुन्तां डेरि जेव। किजोकि किछ ज़ोते थिये यूहन्ना मुइदन मरां ज़ींतो भोरोए। 8 ते किछ ज़ोते थिये एलिय्याह लेइहोरोए, ते किछ ज़ोते थिये नेबन मरां कोई ज़ींतो भोरोए। 9 पन हेरोदेसे ज़ोवं, “यूहन्नारी क्रोडी त मीं कट्टेरी थी, पन ए कौन आए, जेसेरे बारे मां एरी जेरि गल्लां शुन्ना मां एजने लोरेन?” ते हेरोदेस यीशु हेरनेरी इच्छा की। 10 फिरी प्रेरितेईं वापस एइतां ज़ैन किछ कियेरु थियू, यीशु सेइं शुनाव, ते यीशु तैन अलग नेइतां बैतसेदा नव्वेरे नगर मां च़लो जेव। 11 ते बडे लोक तैस पत्ती च़ले, ते यीशु बडे खुशी सेइं तैन सेइं मिलो। ते तैन सेइं परमेशरेरे राज़ेरी गल्लां केरने लगगे, ते ज़ैना बिमार ठीक भोनु चाते थिये, तैनी तैना बइंझाए। 12 ज़ैखन दिहाडी डुबने लगी त तैन 12 च़ेलेईं यीशु सेइं ज़ोवं, “एन लोकन भेजे छड एना कोस्कोई इल्लोव्वन मां गेइतां बिशन ते रोटारो इंतज़ाम केरन। किजोकि असां गैर आबाद ठैरी आम।” 13 तैनी तैन सेइं ज़ोवं, “तुस्से एन किछ खाने जो देथ।” तैनेईं ज़ोवं, “असन कां पंच रोटी ते दईं मेछलीन करां जादे किछ भी नई, पन असां गेइतां एन जेईं रोटी मुल्ले धिन्तां आनतम, त इन भोइ बटते।” 14 (किजोकि तैन लगभग 5000 मइद थिये।) यीशुए अपने चेलन सेइं ज़ोवं, “एन लोकन 50-50 मैन्हु केरि हुन्डी मां बिशाला।”

15 ते चेलेई तैन्ने कियूं ते तैना तेन्चेर बिशाले। 16 तैखन तैनी तैना पंच रोटी ते दूई मछली नी, ते अम्बेरां तेकतां शुक्र कियूं, फिरी तैनी तैना रोटी दलोडी ते चेलन कां दिती, कि तैन बिशालोरे लोकन खाने जो देन। 17 सारे मैन्हु खेडतां रेज्जी जो। तैल्ला पत्ती, यीशुएरे चेलेई बचारे टुकडन सेई 12 टोकरी भेरि। 18 एककी बार यीशु अकेल्लो प्रार्थना करेने लोरे थियो, ते चले भी तैस सेई थियो। यीशुए तैन पुच्छू, “कि लोक मीजो कुन ज़ोतन?” 19 चेलेई जुवाब दित्तो, “किछ ज़ोतन यूहन्ना बपतिस्मो देनेबालो, ते किछ ज़ोतन एलिय्याह, ते किछ ज़ोतन नेबन मरां कोई अक ज़ीतो भोरोए।” 20 तैखन यीशुए चेलन पुच्छू, “पन तुस मेरे बारे मां कुन सोचतथ कि अवं कौन आई?” पतरसे जुवाब दित्तो, “तू परमेशेरसो मसीह आस।” 21 तैखन तैनी तैन खबरदार केरतां ज़ोवं, “कि ए गल केन्ची सेई न जोइयथा।” 22 यीशुए ज़ोवं, “मैनेरे मट्टेरे लेइ ज़रूरी आप, कि तै बडो दुःख झैल्ले, यहूदी लोकां केरे बुजुगन, प्रधान याजकन, ते शास्त्री तैस घटिया सेमझतां मारेले, ते तै टलेइयोवं दिहाइ फिरी ज़ीतो भोलो।” 23 फिरी यीशुए तैन सेबन्न ज़ोवं, “अगर कोई मीं पत्ती एज्जो चाप, त अपने आपोरे इन्कार केरे, ते रोज अपनू क्रूस छूए ते मीं पत्ती चले। 24 किजोकि ज़ै कोई अपनि जान बचानी चाते तै तैस गुवालो, पन ज़ै मेरे लेइ अपनि जान गुवालो त तै तैस बचालो। 25 मैन्हु अगर सारी दुनिया हासिल केरे, ते अपनि जानरो नुकसान केरे, या अपनो आप गुवाए, त तैस कुन फेइदो? 26 किजोकि अगर कोई मैन्हु मीं करां त कने मेरी गल्लन करां शरमाते, त मैनेरू मट्टू यानी अवं भी तैस केरां शरमालो। ज़ेइस अवं अपने बाजी केरि महिमा सेई साथी त कने पवित्र स्वर्गदूतन सेई साथी वापस एज्जलो, त तेइस अवं तैस केरां भी शरमालो।” 27 “अवं तुसन सेई सच ज़ोतई कि ज़ैना इडी खडे आन, तैन मरां किछ मैन्हु एरे आन कि ज़ांतगर तैना परमेशेररे राज़्जेरी शक्ति न हेरेले, तांतगर तैना न मरेलो।” 28 एन गल्लां केरे लगभग अठ दिहाइना बाद पतरस, ते यूहन्ना ते याकूब साथी नेडतां एककी पहाडे पुइ प्रार्थना करेने चले जो। 29 ते ज़ैखन यीशु प्रार्थना लोरो थियो केरने, त तैसेरी शकल बेदलोई जेई, ते तैसेरां लिगड्वां लोआं ज़ेरां चमकने लगो। 30 ते हेरा, मूसा, ते एलिय्याह, इन्ना दूई मडद तैस सेई गल्लां करेने लगो। 31 इन्ना महिमा सेई साथी लेइहोए, ते तैसेरे मरनेरी गलबात करेने लोरे थियो, ज़ैन किछ यरूशलेम नगरे मां भोनेबालू थियूं। 32 पन पतरस ते तैसेरे सैथी केरि एछछी निडली सेई गिरकी भोरी थी, ज़ैखन तैना बींझे, त तैनेई तैसेरी महिमा ते तैना दूई मडद भी लाए, ज़ैना तैस सेई साथी खडे थियो। 33 ज़ैखन तैना तैस करं चले, त पतरसे यीशु सेई ज़ोवं, “हे गुरु, इश्शू इडी रान रोडोए, कि असां ट्लाई डेरे बनाम, अक तेरे लेइ, ते अक मूसेरे लेइ, ते एलिय्याहरे लेइ।” तैस पतो न थियो, कि तै कुन लोरोए ज़ोने। 34 ते इन जोई राओरो थियो, तैन पुइ बिदलार घिरी जेई, ते ज़ैखन तैन केरे चेरे पासन बिदलारी घिरी त तैना डेरि जे। 35 तैखन तैस बिदलारी मरां अक आवाज़ अई, “एन मेरू टलारू मट्टू आप। ध्याने सेई एसेरी गल शुना।” 36 ते तैस आवाज़ी सेई साथी तैनेई यीशु अकेल्लो लाव, ते तैना चुप राए ते ज़ैन किछ लाहेरू थियूं, तैन केन्ची सेई न ज़ोवं। 37 होरसां एरू भोवं कि ज़ैखन तैना पहाडे पुडेरां उन्दे ओरे थियो, त बडे मैन्हु केरि भीड तैन कां आई। 38 ते हेरा, एककी मैने तैन लोकन मरां बडे ज़ोरे सेई हक देइतां ज़ोवं, “ए गुरु अवं तीं कां ज़ोवले हथ केरतां कि मेरे मट्टे पुइ दया केर; तैन मेरू अक्के मट्टूए। 39 ते हेर, अक भूत तैस अपने कब्जे मां केरते, ते तैन अकदम चिन्डी मारते, ते कम्बने लगते, ते तैसेरे ऐशोरां शैमफ निसचे, ते भूत तैस बडे बुरे तरीके सेई ज़ख्मी केरतां शारते। 40 ते मीं तेरे चेलन कां बिनती कियोरी थी, कि तैस कडन, पन तैना न केडी सके।” 41 यीशुए जुवाब दित्तो, “हे विश्वास न केरने बालाव ते ढीठ लोकव, अवं केइस तगर तुसन सेई साथी रेइलो ते तुशरी झैल्लेलो? अपने मट्टे इडी आना।” 42 ते मसां ओरो थियो, त भूते तैन मट्टू मुरोइतां शारू, पन यीशुए भूत झिडकतां कट्टू, ते तैन मट्टू बज्जेइतां तैसेरे बाजेरे हवाले कियूं। 43 ते सब लोक परमेशेररी बेडि कुदरती हेरतां हैरान रेइजे, ते ज़ैखन सब लोक तैन कम्मां ज़ैन यीशु केरतो थियो हैरान रहते थियो। त तैनी अपने चेलन सेई ज़ोवं। 44 “मेरी इन गल्लां रोडेचारे शुना किजोकि मैनेरू मट्टू

मैन्हु केरे हवाले भोने बालूए।” 45 पन यीशुएरी ए गल चेलां केरि समझी मां न आई, किजोकि तैन करां ए गल छपोरी थी। कि तैन न समझन, ते चले एस बारे मां यीशु पुच्छने करां डरते भी थियो। 46 फिरी चेलन एप्पू मांमेइ बडी बेंस भोइ, कि असन मां बड्डो कौन आए? 47 यीशु तैन केरि दिलेरी गल्लां बुझतां निकडो बच्चो आनो ते तै एप्पू कां खडू कियूं। 48 ते अपने चेलन सेई ज़ोवं, “ज़ै इस बच्चे मेरे नंवे सेई कबूल केरते, तै मीं कबूल केरते, ते ज़ै मीं कबूल केरते, तै मेरे भेजने बाले कबूल केरते। किजोकि ज़ै तुसन मां निकडे करां निकडोए तै सेबन्न करां बड्डोए।” 49 तैखन यूहन्ना यीशु सेई ज़ोवं, “ए गुरु, असेई अक मैन्हु तेरे नंवे सेई भूतां केरो सैयो कडतो लाव, ते असेई तैस ठाकू किजोकि तै असन सेई साथी मिलतां तीं पत्ती न चले।” 50 पन यीशुए जुवाब दित्तो, “तैस न ठाका, किजोकि ज़ै तुशे खलाफ नई तै तुशे पासे।” 51 ज़ैखन यीशुएरे उबरे नेनेरे दिहाडे पूरे भोने पुइ थी त तैनी पक्के चारे यरूशलेम नगरेरे पासे गानेरो खियाल कियो। 52 ते एप्पू करां अग्री-अग्री किछ बिस्तार देनेबाले लोक भेजे। ते लोक सामरी लोकां केरे एककी डलोव्वं मां जे ताके यीशुएरे एजनेरी ठार तियारी केरन। 53 पन लोकेई तै एजने न दित्तो, किजोकि तै यरूशलेम नगरे जो चलोरो थियो। 54 एन हेरतां तैसेरे चले याकूब ते यूहन्ना ज़ोने लगे, “हे प्रभु, कुन तू चातस, कि अस हुकम देम, अम्बेरां अग बखेनतां एन लोकन भस्म केर?” 55 पन तैनी बेदलोइतां तक्कू, ते तैना झिडके (ते ज़ोवं, “तुस न जानथ कि तुस कौस आत्पारे आथ। 56 किजोकि मैनेरू मट्टू लोकां केरे प्राणन नाश केरने लेइ नई बल्के बचाने ओरोए) तैखन तैना होरि डलोव्वेरे पासे चले जे। 57 ज़ैखन तैना बत्तां चलोरे थियो, ते केन्चे तैस सेई ज़ोवं, “तू ज़ैडी-ज़ैडी भी गालो, अवं तीं पत्ती चलेलो।” 58 यीशुए तैस सेई ज़ोवं, “लौई केरि कूडां ते अम्बेरेरे चुडोल्लू केरे आले भोतन, पन मैनेरे मट्टे यानी मीं कां कोई ठार नई ज़ैडी अवं झुल्ली सेक्वी।” 59 फिरी यीशुए एककी होरि जो ज़ोवं, “मीं पत्ती चले,” पन तैनी मैने ज़ोवं, “हे प्रभु मीं घरे गानेरी अज़ाज़त दे, मेरे बाजेरे मरनेरां बाद अवं तैस देबतां एज्जेलो ते फिरी तीं पत्ती चलेलो।” 60 यीशुए तैस जो ज़ोवं, “ज़ैना लोक आत्मिक तरीके सेई मरने तैन अपने मैन्हु मरने बलगने दे, पन तू गा ते परमेशेररे राज़्जेरे बारे मां लोकन मां प्रचार केर।” 61 एकके होरे भी ज़ोवं, “ए प्रभु अवं तीं पत्ती चलेलो, पन पेइले मीं भेज कि अवं अपने घरेबालन जोई।” 62 यीशुए तैस सेई ज़ोवं, “ज़ै कोई हल्ली पुइ हथ रेखतां पत्रोवं फिरतां तकते, ते परमेशेररे राज़्जेरे काबल नई।”

10 ते इन गल्लां केरे बाद प्रभुए 70 होरे चले ठहराए, कि तै ज़ैस-जैस नगर ते ठैरी तैनी एप्पू गानेरे बारे मां सोचोरू थियूं, तैडी दूई-दूई मैन्हु एप्पू अग्री भेजे। 2 ते तैनी तैन सेई ज़ोवं, “पकोरी फसलरे ज़ेरे बडे लोक तियार आन ज़ैना परमेशेररे वचने पुइ विश्वास केरनू चातन, पन कम केरनेबाले थोडे आन ज़ैना तैन परमेशेररे राज़्जेरे बारे मां ज़ोने। एल्लेरेलेइ तुस फसलरे मालिके कां प्रार्थना केरा कि तै जादे कम केरनेबाले भेजे, कि तैना लोकन परमेशेररे राज़्जेरे बारे मां ज़ोने।” 3 गाथ, अवं तुसन भैड्वां केरे ज़ेरे गिदन मां भेजताई। 4 एप्पू सेई साथी न बटेवे, न झोलो, न बूट नेइयथ, ते न बत्तां केन्ची जो नमस्कार जोइयथ। 5 ज़ेसेरे घरे मां गाथ त पेइले ज़ोथ कि, “इस घरे मां शान्ति भोए।” 6 अगर तैडी एरे लोक ज़ैना परमेशेररी शान्ति चातन तैडी रहते भोलो, त तुशरी शान्ति तैस पुइ राली, नई त तुशरी शान्ति तुसन पुइ एज्जेली। 7 तैस्से घरे मां गाथ, ते ज़ैन किछ तैन करां मैल्ले, तैन्ने खाथ-पीथ किजोकि मज्जदू अपनि मज्जदूराओ हकदार भोते, घरे-घरे न गोइयथ। 8 ते ज़ैस नगर मां गाथ, ते तैट्टेरे लोक तुसन अपने घरे मां नेन, त ज़ैन किछ तुशे सामने रखवू गाए तेन्ने खाथ। 9 तैट्टेरे बिमारन बज्जाथ, ते तैन सेई ज़ोथ, “परमेशेररू राज़ नेडे ओरूए।” 10 पन ज़ैस नगर मां गाथ, ते तैट्टेरे लोक तुसन कबूल न केरन, त तैट्टेरे बज्जारन मां गोइतां ज़ोथ। 11 “कि तुशे नगरेरी धूड भी इश्शे पावन सेई ज़ै लागोरीए अस तुशे सामने उडकतम ते फिरी भी बुझा कि परमेशेररू राज़ तुशे नेडे पुजेरूए।” 12 अवं तुसन सेई सच ज़ोताई, तैस दिहाडे तैस नगरेरी हालत सदोम नगरेरी हालत

झुल्लनेरे काबल भोली। 13 “हे खुराजीन! तीं पुड अफ्रसोस! हे बैतसैदा तीं पुड अफ्रसोस! कि एना चमत्कार मीं तुसन इडी हिराए अगर मीं एना कम्मां सूर ते सैदा मां हरेबरां भोथां, त तैन लोकेईं केडसरे देते टाट पलेटतां ते दोगे पुड मांजन छेडतां पापन करां मनफिरावरो भोथां। 14 पन फिरी भी इन्साफेरे दिहाडे तुशगो हाल सूर ते सैदारे हाले करां जादे बुरो भोली। 15 ते हे कफरनहूम नगरेरे लोकव, कुन तुस सोचतथ कि स्वर्गं मां तुशशी आदर भोनीए! इ तुस त नरके गाले ज़ैडी पैपी लोकन सज़ा मैलेली! (Hadēs 986) 16 ज़ै तुशशी शुन्ते, ते मेरी शुन्ते ज़ै तुसन घटिया समझते ते मीं घटिया समझते, ते ज़ै मीं घटिया समझते ते मेरे भेजने बाले घटिया समझते।” 17 तैना सतर चले खुशी सेइं वापस आए, ते जोने लगे, “हे प्रभु तेरे नव्वे सेइं भूतां भी इशगो हुक्म मन्तन।” 18 तैनी तैन सेइं ज़ोव, “मीं शैतान एन्चरे बिछनतो लाव जेन्चरे च़क अम्बरेरां पेचे। 19 हेरा, मीं तुसन सपन ते बिचन इल्लेनरो, ते दुश्मनेरी (शैतानेरी) सैरी शक्ति पुड अधिकारे दितोरोए, ते केन्ची चीज़ां सेइं तुसन नुकसान न भोली। 20 फिरी भी तुस इस गल्ली सेइं खुशी न भोइयथ कि भूतां तुशगो हुक्म मेनचन, पन इस गल्ली सेइं खुश भोइयथ कि तुशशी सव स्वर्गं मां लिखोरूए।” 21 तैखन यीशु पवित्र आत्मा सेइं मयन भोव, ते जोने लगे, “हे बाजी, स्वर्गं त धेरतेरे प्रभु, अवं तेरू शुक्र केरताई, कि तीं इना गल्लां, अक्लमन्द ते समझदान करन कां छुपेइतां रेखडी, ते बचन पुड बेदी की, हाँ, हे बाजी, किजोकि तेरी खुशी एस्से मां थी। 22 सैरी चीज़ां मेरे बाजेरी तरफां मेरे सुपुद कियोरिन, कोई होरो मट्टे न ज़ाने, सिर्फ बाजी ज़ानते; कोई बाजी न ज़ाने सिर्फ मट्टे ज़ानते, या तै मैन्हु बाजी ज़ानते ज़ैस पुड मट्टे बांदो केरने चाए।” 23 तैखन तैनी अपने चेलां केरे पासे फिरो अकेल्ले मां ज़ोव, “धन आन तैना एछडी ज़ैना एना गल्लां हेरचन ज़ैना गल्लां तुस लातथ, 24 किजोकि अवं तुसन सेइं ज़ोतां, कि बडे नेबन ते राजां केरे खुवेइश थी, कि एना गल्लां हेरन, ज़ैना तुसेईं लेईं, पन न लेईं सके, ते एना गल्लां शुन्न ज़ैना तुस शुन्तथ पन न शुनी बेटी।” 25 एक्सां यीशु लोकन शिक्षा देने लोरो थियो, ते हेरा, अक शास्त्री खडो भोव, ते इन ज़ोइतां तैस अज़माने लगे, “ए गुरु, हमेशारी जिन्दगी हासिल केरनेरे लेइ अवं कुन केरि?” (aiōnios g166) 26 तैनी तैस जुवाब दितो, “भूसरे कानूने मां कुन लिखोरूए? तू केन्चरे समझतस?” 27 तैनी जुवाब दितो, “तू प्रभु अपने परमेशरे सेइं अपने सारे दिले, सैरी जानी की, ते अपनि सैरी ताकती सेइं ते अपनि सैरी अक्ल सेइं प्यार रख, ते अपने पडोसी सेइं अपने बराबर प्यार केर।” 28 तैनी तैस सेइं ज़ोव, “तीं ठीक जुवाब दितो एन्ने केर, फिरी तीं हमेशारी जिन्दगी मैलेली।” 29 पन तैनी अपने आप धर्मां ठहरानेरे लेइ यीशु पुच्छू, “फिरि मेरो पडोसी कौने?” 30 यीशुए तैस मिसाल देइतां जुवाब दितो, “अक मैन्हु यरुशलम नगरेरां यरीहो नगरे जो च़ल्लोरो थियो, ते तै डैकेइं तैस पुड हमलो कियो, ते ज़ैन किछ तैस कां थियुं नेव। ते तैसेरां लिगडां खोल्लां, ते मारो कुट्टो ते ज़ख्मी केरतां अधमरो बनेइतां तैडी ज़ेरे छडतां च़ले जे। 31 ते एरू भोव कि, अक याजक तैस बत्तां च़ल्लोरो थियो, तैनी तै लव ते थरकतो तैसेरी मद्दत केरने बगैर ड़लखमेइं निस्सो। 32 एन्चरे अक मन्दरे मां कम केरनेबालो लेवी भी निस्सो, ते तैस लेइतां तै भी ड़लखमेइं निस्सो। 33 फिरी अक सामरी मुसाफर भी तैस बत्तां निस्सो, ते तैस लेइतां तैस बडो तरस अव। 34 ते तै तैस कां जेव, ते तैसेरे ज़खमन तेल मल्लो ते दाछोरो रस लाव, ते तैसेरे ज़खमन पट्टी बंधी ते अपने गधे पुड च़ेइतां एक्की धर्मशाला मां तैसेरी सेवा की। 35 होरसां तैनी दूई दीनार केइतां धर्मशाले मालिके कां दिते, ते ज़ोव, ‘एसेरी हेरगेश करां अगर जादे लगले ते अवं वैपसी पुड देलो।’ 36 तेरे समझीं मां एन ट्लेइन मरां कौन तैसेरो पडोसीए ज़ै डैकेइं ट़लातोरो थियो?” 37 तैनी जुवाब दितो, “ज़ैनी तैस पुड दया की।” यीशुए तैस सेइं ज़ोव, “गा, तू भी एरू केर।” 38 फिरी ज़ैखन यीशु त कने तैसेरे चले गेइ रावरे थियो, त तैना एक्की ड़लव्वे मां जे, ते मार्था नव्वेरी एक्की कुआन्शां यीशु अपने घरे नीयो। 39 ते मरियम नव्वेरी तैसेरी अक बेडन थी, तै यीशुएरे पावन कां बिशतां तैसेरी गल्लां शुनती थी। 40 पन मार्था किछ खास चीज़ बनेइ रावरी थी, ते यीशु कां आई ते जोने लगी, “हे

प्रभु तुसन ज़रां भी खियाल नई कि, मेरी बेइनां अवं कम केरनेरे लेइ अवं अकेल्ली छडोरी? ते एस ज़ोथ, तै मेरी मद्दत केरे।” 41 प्रभुए तैस जुवाब दितो, “मार्था, हे मार्था, तू बेइ गल्लां केरे फ़िक् केरतिस, 42 पन अक गल ज़रूरीए, मरियमा ते रोडी हिस्सो चुनोरोए, ज़ै तैस करां कोई न नेइ सके।”

11 फिरी यीशु एक्की ठैरी प्रार्थना लोरे थियो केरने। ते ज़ैखन तैनी प्रार्थना की, ते तैसेरे चलन मरां एक्के ज़ोव, “हे प्रभु, जेन्चरे यूहन्ना अपने चलन प्रार्थना केरनि शिखालोरिये तेन्चरे तू भी असन शिखाल।” 2 यीशुए तैन सेइं ज़ोव, “ज़ैखन तुस प्रार्थना केरथ, त एन ज़ोइयथ, ‘हे बाजी, लोक तेरी आदर केरन किजोकि तू पवित्र परमेशर आसा। ते तेरू राज एज्जे।’ 3 ‘इशशी रोजेरी रोटी असन दे। 4 इशशे पाप माफ़ केर, किजोकि अस भी ज़ैना इशशे खलाफ बुराई केरतन, तैन माफ़ केरतम। अज़मैइशेरे ज़िरिये असन पाप केरने न दे।” 5 फिरी यीशुए तैन सेइं ज़ोव, “फ़र्ज केरा तुसन मरां केन्चरो अक दोस्त एध्डी राती अपने दोस्ते ज़ोए, ‘तू मीं ट़लाई रोटी दे। 6 किजोकि मेरो अक दोस्त बडे दूरां हठतो मेरे कां ओरोए, ते मेरे कां रोटी नई, कि अवं तैस रोटी देइ सेखी।’ 7 ते तै तैसेरो दोस्त अत्रां जुवाब दे, मीं दुःख ने दे, हुनी त दार बदे, मीं कां मेरे बच्चे झुल्लोरन, ते अवं तीं रोटी न देइ सेखी। 8 अवं तुसन सेइं ज़ोताई कि, अगर तै तैसेरो दोस्ते ते तैस रोटी न दे, त तैसेरो दोस्तेरे बार-बार मिनत केरने सेइं ज़रूर तैस रोटी देलो ते ज़ेरी रोटी केरि तैस ज़रूरत भोली देलो। 9 ते अवं तुसन सेइं ज़ोताई, मग्गा त तुसन दित्च गालू। ते तोप्पा, त तुसन मैल्ली गालू। ते दार गुडकाथ, त तुशशे लेइ खोल्लू गालू। 10 किजोकि ज़ै कोई मगते तै हासिल केरते, ते ज़ै कोई तोपते तैस मैल्ली गाले, ते ज़ै कोई दार गुडकाते त तैसेरेलेइ खोल्लू गाले। 11 तुसन मरां कौन जेरो बाजी परो भोए, कि ज़ैखन तैसरू मट्टे रोटी मग्गे त तैस घोइ दे? या मछली मग्गे, ते तै सप दे? 12 या ठूल मग्गे त तैस बिच्छू दे? 13 ते तुस बुरे भोनेरे बाचजूद भी अपने मट्टुन रोडी चीज़ां देनी ज़ानतथ त तुशशो स्वर्गो बाजी तैन, ज़ैना तैस करां मगतन पवित्र आत्मा किना देलो।” 14 फिरी तैनी एक्की लट्टे मरां भूतेरो सैयो कडो, ज़ैखन भूतेरो सैयो निस्सो, त तै लट्टो गल्लां लगे केरने, ते लोक हैरान रेइजे। 15 पन तैन मरां किछ मैनेई ज़ोव, “ए त भूतां केरे गुरू शैतानेरे मद्दती सेइं भूतां कडते।” 16 ते किछेई अज़मानेरे लेइ तैस करां कोई अक अम्बरेरो निशान मग्गे। 17 पन यीशुए तैन केरे मन्नां केरे खियाल ज़ेनतां तैन सेइं ज़ोव, “ज़ैस-ज़ैस राज्जे मां फूट पेचे, तैन राज बनोरू न राए, ते ज़ैस खानदाने मां फूट पेचे, तैन भी बनोरू न राए। 18 अगर शैतान अपनि खलाफत एप्पू केरे, त फिरी तैसेरू राज केन्चरे रेइ सकते? फिरी तुस केन्चरे ज़ोतथ कि अवं शैतानेरे मद्दती सेइं भूतां कडताई। 19 अगर अवं शैतानेरी मद्दती सेइं भूतां कडताई त तुशशी औलाद कसेरे मद्दती सेइं कडती? तैना तुशशो फैसलो केरनेबाले हाकिम भोले। 20 पन अगर अवं परमेशरेरे शक्ति सेइं भूतां कडताई त परमेशरेरू राज तुशशे नेडे पुजोरूए। 21 ज़ैखन कोई ज़ोरेबाले मैन्हु अपने घरेरो पैरहो केरते, त तैसेरू सब किछ बंचेरू रहते। 22 पन ज़ैखन तैस करां कोई निगर मैन्हु तैस पुड हमलो केरते त तैस अपने कब्जे मां केरतां तैसेरे सारे हाथियार धिनी गाले ज़ैस पुड तैसेरो भरोसो थियो, ते तैसेरी सारी जेइदाद लुटी गाले। 23 ज़ै मीं सेइं साथी नई तै मेरे मुखालफे, ते ज़ै मीं सेइं साथी अकोट्टु न केरे ते तै खिलारते। 24 “ज़ैखन केन्ची मैन्हु मरां भूत निसते त तैन शुक्करोरो ठैरन मां आराम तोपते ते ज़ैखन तैस तै आराम न मैल्ले त ज़ोते कि अवं वापस तैस्से घरे मां गालो ज़ैइतां अवं निसोरोई। 25 ते तैखन तैन भूत वापस एइतां तैन घर साफ सुथरू रोडू लाते। 26 तैखन ते एप्पू सेइं साथी सत होरां भूतां साथी धिन्तां तैस मां अन्तर गेइतां बिश्शानन, ते तैस मैनेरो हाल पेइले हाले करां जादे बुरो भोते।” 27 ज़ैखन यीशु इना गल्लां जोने लगगोरो थियो, त भीडी मरां अक कुआन्शा जोरे सेइं जोने लगी, “धने ते कुआन्शा ज़ैसां तीं ज़र्म दित्च ते तू पालो।” 28 पन यीशुए ज़ोव, “हाँ, पन धन आन तैना लोक ज़ैना परमेशरेरू वचन शुन्तन ते तैस पुड अमल केरतन।” 29 ज़ैखन हछे लोक भोने लगे त यीशु ज़ोव, “इस ज़मानेरे लोक बुरेन, तैना निशान तोपतन, पन

योनेरे निशानेरे अलावा एन होरो कोई निशान न दित्तो गालो। 30 किजोकि जेन्चरे योना नबी नीनेवेरे लोकन जो निशान बनो तेन्चरे मैनेरु मट्टू भी इस ज़मानेरे लोकां केरे लेइ निशान बनेलू। 31 पन दक्षिणेरी रानी आदालतरे दिहाडे इस ज़मानेरे लोकन दोषी बनली, किजोकि तै बड़े दूरेरां सुलैमानेरे ज़ानेरे बारे मां श्रुतां ओरी थी। ते इडी हेरा सुलैमाने कंरां भी बड्डोए। 32 नीनवेरे लोक आदालतरे दिहाडे इस ज़मानेरे लोकन सेइं साथी खडे भोइतां मुर्जम बनाले। किजोकि तैनेई योनेरे प्रचारे सेइं पापन कंरां मनफिरावरो थियो, पन इडी हेरा ते आए, ज़ै योना कंरां भी बड्डोए। 33 “कोई मैन्हु दीयो बैलतां भांडे हैठ या ओडकतां न छुडे, बल्के उच्च्यी ठैरी रखतन ताके अन्तर एजने बालन लौ भोए। 34 अछु जानेरे लेइ दीयेरी ज़ेरि आए, अगर तेरी अछु रोडीए, त तेरी जानी मां भी लोए, ते अगर तेरी अछुडे बुरीए त तेरी जान भी आंधरी। 35 एल्हेरेलेइ खबरगर रेइयां, कोस्कोई एरु न भोए कि ज़ै लौ तीं मां आए तै आंधरु न भोए। 36 अगर तेरी जानी मां लोए, त तैसेरो कोई भी हिस्सो आंधरो न भोए, त सब एरु भोलू, ज़ैखन दीयो चमकतां लौ देते।” 37 ज़ैखन ते एना गल्लां ज़ोने लोरो थियो, त केन्चे फरीसे यीशु कां मिनत की, कि मीं सेइं साथी रोटी खा, ते यीशु तैसेरे घरे जेव ते तैसेरे कां गेइतां रोटी खाने बिशेशो। 38 फरीसी लोक एन हेरतां हेरान भोव, कि ए बगैर हथ-पाव धोने रोटी खाने बिशेशी जेव। 39 पन प्रभुए फरीसी सेइं ज़ोव, “हे फरीसाव तुस कटोरो, ते थाली बेइरमेई त बडी साफ केरतथ, पन तुशो अन्तर जुलम ते लालच भेरतां। 40 हे बेअक्वाव, ज़ैनी बेरीयोवं हिस्सो बनावरोए, तैनी आंत्लेइयों हिस्सो नई बनेरो? 41 बरसा एन्जी चीज़ दान केरा, त हेरा, सब किछ तुशो लेइ साफ भोइ गालू। 42 पन हे फरीसाव, तुस पण्ड अफ्रसोस! तुस पुतनेरो ते ज़ीरो ते कने सेबज़ारो दशोवं हिस्सो देतथ, पन तुस इन्साफ केरने कंरां त परमेशरेरे प्यारे कंरां दूर रातथ, लोइतु थियूं कि दशोवं हेसे सेइं साथी इन भी केरेथे। 43 हे फरीसाव, तुस पण्ड अफ्रसोस! तुस लोक चातथ कि प्रार्थना घरन मां तुस एप्री कुर्सन पुइ बिशालन ते बज़ारन मां लोक तुस कां झुकतां नमस्कार केरन। 44 पन हे फरीसाव तुस पण्ड अफ्रसोस! तुस तैन छेपोरी कंरां केरे ज़ेरेथ, ज़ैन पुइ लोक चलतन, पन तैन पतो न भोए।” 45 तैखन शास्त्री मंरां एक्के तैस जुवाब दित्तो, “हे गुरू एना गल्लां जोइतां तू इश्री तुहीन लोरोस केरने।” 46 यीशुए ज़ोव, “हे शास्त्री लोकव, तुस पण्ड अफ्रसोस! तुस मैनु पुइ त एत्रो भारो लदतथ ज़ै छूने असुखतो भोते ते पन एप्यू अपने कानने मन्नेरी कोशिश भी न केरन। 47 तुस पण्ड अफ्रसोस! तुस नेबी केरि कंरां बनतथ ते तुशो दादे-पड़दादेई तैना मारोरे थियो। 48 बरसा, तुस शहातथ कि तुस अपने दादे-पड़दादां केरे कम्मां केरि पूरी तैइद केरतथ, किजोकि तैनेई त नबी कल्ल कमाए ते तुस तैन नेबी केरि कंरां बनातथ। 49 एल्हेरेलेइ प्रभु परमेशरेरी अक्लां ज़ोव, नबी त प्रेरित तैन कां भेजनेन तैना तैन मंरां किछ कल्ल केरेले ते किछन सताले। 50 बरसा ई कौम सारे नेबी केरे खूनेरे ज़ै दुनियारे शुरु कंरां देंतो बगेवरोए जिमेवार भोली। 51 हाबिलेरे खूने कंरां देंतो ते जकर्याहरे कल्ले तगर ज़ै तुसेई मन्दरेरे ते बलिदान केरनेरे ठारारे मझाटे मन्दरेरे अंगने मां कल्ल कियोरो थियो। अवं जोताई कि ए कौम तैन केरे खूनेरी जिमेवार भोली। 52 पन हे फरीसाव तुस पण्ड अफ्रसोस! तुसेई शास्त्री लोकेई चाबी त अपने कळ्जे मां रख्खी, पन तुस एप्यू भी दाखल न भोए ते ज़ैना दाखल भोनु चाते थियो तैना भी रोके।” 53 ज़ैखन यीशु तैइं निरसी जेव त शास्त्री ते फरीसी लोकेई तै घेरो ते सरकरे मारे चेरे पासना बडे असुखते सवाल पुछ्छने लगे। 54 ताके यीशुएरे ज़ेबा एरी गल निरसे ज़ैस सेइं लोक तैस पुइ गलती लांन।

12 एत्रे मां हज़ारेई मैन्हु अकडो भोइ जे, ते एक्की होरि उन्डे खिरकते थियो ते यीशुए सेबन कंरां पेइले अपने चलन खडे भोइतां ज़ोव, “फरीसी लोकां केरे पाखडेरे खमीरे यानी तैन केरे रीति रूवाजन कंरां हुशार रेइयथ। 2 कोई चीज़ ओडकोरी नई ज़ै बांदी न भोए, ते न कोई चीज़ छपोरीए ज़ै ज़ानी न गाए। 3 एल्हेरेलेइ ज़ैना गल्लां तुसेई आंधरे मां ज़ोरिन तैना गल्लां लोई मां शुनोनिन, ते ज़ैना गल्लां तुसेई अन्तर ज़ोरिन तैन केरु एलान लाए

पुइ भोनूए। 4 “दोस्तव अवं तुसन सेइं सच ज़ोताई कि तैन कंरां न डेरथ ज़ैना जानी नुकसान पुजातन तैसेरे बाद तेना किछ न केरि बटन। 5 पन अवं तुसन सेइं सच ज़ोताई कि केस कंरां डरू लोडते, ज़ैस जानी मारनेरे बाद तैसेरी आत्माई नरके मां छुडनेरो अधिकारे, हॉ अवं तुसन सेइं सच ज़ोताई कि तैस कंरां डरा। (Geenna g1067) 6 कुन दूई पेंडसन मां पंच चडोली न बिकन? पन परमेशर तैन मंरां केन्ची भी न बिसरे। 7 बल्के तुशो दोगेरे सारे बाल गनोरेन डरा नन्ना तुस त काई चुडोलन कंरां भी जादे कीमती आथ। 8 “अवं तुसन ज़ोताई कि ज़ै कोई मैन्हु केरे सामने मेरो इकरार केरेलो, त अवं मैनेरु मट्टू भी परमेशरेरे स्वर्गदूतां केरे सामने इकरार केरेलो 9 पन ज़ै मैन्हु केरे सामने मेरो इन्कार केरेलो त तैसेरो इन्कार परमेशरेरे स्वर्गदूतां केरे सामने कियो गालो। 10 “ज़ैना लोक मैनेरे मट्टेरे खलाफ किछ ज़ोले ते तैस माफ केरेलो पन ज़ै पवित्र आत्मारी तुहीन केरेलो तैस माफ न केरेलो। 11 “ज़ैखन तैना तुसन प्रार्थना घरन मां ते बडे-बडे ते अधिकरन कां नेले त फिक्र न केरथ कि अस कुन ज़ोम ते केन्चेरे जुवाब देम। 12 किजोकि पवित्र आत्मा तुसन तैस वक्ते ज़ोले कि तुसेई कुन ज़ोनूए।” 13 फिरी भीडी मंरां केन्चे एक्के यीशु सेइं ज़ोव, “हे गुरू जी मेरे हुलाए जो ज़ो, कि इशेश बाजी केरि जेइदाती मंरां मेरो हिस्सो मेरे हवाल केरे।” 14 यीशुए तैस जुवाब दित्तो, “अवं केनि तुशो हाकिम या बटने बालो बनेवरोई?” 15 ते यीशुए तैन सेइं ज़ोव, “हर किसमेरे लालचे कंरां दूर भोइयथ ते न केन्चेरी जेइदाद केन्चेरी जानी कंरां जादे भोए।” 16 तैखन यीशुए तैन अक मिसाल शुनाई, “केन्ची अमीरिरे ज़मीनी मां बडी फसल बनी। 17 तै अपने दिले मां सोचतां ज़ोने लगे, कि अवं कुन केरि, मीं कां ठारे नई कि ज़ैडी अवं अन्न रेख्खी सेखी? 18 तैखन तैनी ज़ोव कि, ‘अवं अक कम केरताई, अपने पुराने कोठार पुटतां हारे बड्डे कोठार बनेइ ते अपनू सारु अन्न तैस मां रखेलो। 19 फिरी मीं अपने आपे सेइं ज़ोनूए कि, मीं कां त बडे सालन तार अन्न जम्हां भोरूए, मेरी जान आरामे सेइं खा ते एश के।’ 20 पन परमेशरे तैस मैन्हु जो ज़ोव, ‘हे बेवकूफ अजे राती तू मरेलो, ते ज़ैन किछ तीं अपने लेइ जम्हां केरतां रखेए तैन केसेरु भोलू?’ 21 एल्हेरेलेइ ज़ै अपने लेइ दौलत जम्हां केरते, पन परमेशरेरी नज़री मां तै अमीर न भोए एसेरो भी एरो हाल भोनोए।” 22 तैखन यीशुए अपने चलन सेइं ज़ोव, एल्हेरेलेइ तुस न अपने जिन्दगरी ज़रूरते लेइ फिक्र केरा, कि तुस कुन खाले, ते न अपने जानारी कि कुन लामेले। 23 किजोकि प्राण रोटी कंरां ते जान लिगडे कंरां बेधतां भोते। 24 कांवां कंरां तक्का, तैना न बेन ते न कटन ते न तैन कां गुदाम या कोठार भोन, तांभी परमेशर तैन खाने जो देते ते तुस त चुडोलन कंरां भी जादे कीमती आथ। 25 तुसन मां एरो कौन आए, ज़ै फिक्र केरतां अपनि उमर अक घडी भी बधैई सकते? 26 बरसा, ज़ैखन तुस ए अक निकडी ज़ेरी गल भी न केरि बटथ, त बाकी बेडी चीज़ां केरि फिक्र किजो केरतथ? 27 सोसनेरे फूडू केरे तक्का कि तैना केन्चेरे बेडोतन? तैना न मेहनत केरन ते न कत्तन, फिरी भी अवं तुसन सेइं ज़ोताई कि राज़ो सुलैमाने भी अपने सारे धन दौलतरे बावजूद भी तैन केरां ज़ेरां लिगडा न लां। 28 बरसा ज़ैखन परमेशरे मैइदानेरो घास, ज़ै अज़ आए ते कालां लोवनें मां फुकनोए, एरी खूबसूरती देते, ते हे घट विश्वासे बाले लोकव, कुन ते तुसन लिगड न देलो? 29 ते एस फिक्रे मां न रेइयथ, कुन खामेले, या कुन पीमेले, या कुन लामेले, ते न शक केरथ। 30 किजोकि दुनियारी सैरी कौमां एस्से फिक्रे मां लेगोरी रेइचन, पन तुशो बाजी ज़ानते, कि तुसन कोनां-कोनां चीज़ां केरि ज़रूरत आए। 31 पेइले परमेशरेरे राज़ेरे तलाश केरा, फिरी तुसन एना सैरी चीज़ां मैल्ली गेली। 32 “तुस भेइं केरे निकडे केन्चेरे ज़ेरेथ, तुस कोन्ची गल्लेरे लेइ न डरा, किजोकि तुशेश बाजेरी खुशी एस्से मां आए, कि ते तुसन राज़ दे। 33 अपनू घरबार बेचतां धर्मरथ देथ, ते एप्यू जो अक बेटुवो बनाथ, ज़ै पुरानो न भोए, स्वर्ग मां दौलत जम्हां केरा ज़ै कथे न मुक्के, ज़ैडी न चोर पुजे ते न कीडो खाए। 34 किजोकि ज़ैडी तेरी दौलत भोली, तैडी तेरो दिल भी लग्गेलो। 35 “सेवा केरनेरे लेइ रोडेचारे कमर बेंदतां तियार भोथ, ते तुशो दीये सैरी राती बलते रान। 36 तुस मेरे एजनेरे लेइ एन्चेरे तियार राथ, ज़ेन्चेरे

मैन्हु केरे अपने मालिके, जै इलाएरे धामी मरां वापस एजने बलगतन, कि जैखन तै एज्जे ते दार गुडकान त अस दार खोल्लम। 37 तैना नौकर धन आन जैना अपने मालिकेरे वापस एजने पुड बीङ्गो मेलतन, अवं तुसन सेई सच ज़ोताई, कि तै एप्पू तैन रोडेचारे नौकरन लिगडां लेडतां तियार लाएलो, ते मालिक तैन सेई खुश भोइतां एप्पू सेई साथी रोटी खाने बिशालेलो ते तैन केरि सेवा केरेलो। 38 अगर मालिक एध्ठी राती या झेड्रेरेपार एडतां अपने नौकरन बीङ्गो लाए त तैन नौकरां केरे लेड केत्री रोटी गल्ले। 39 पन याद रखा, अगर घरेरे मालिके, चोर एजनेरो पतो भोए त तै बीङ्गो राथो ते अपने घरे चोरी न देखो भोने। 40 बस्सा, तुस भी मेरे वापस एजनेरे लेड तियार राथ, मैनेरू मट्टू यानी अवं तैस वक्ते एज्जेलो जेइस तुसन खियाल भी न भोलो। 41 पतरसे पुच्छू, “हे प्रभु जै मिसाल तीं शुनाई ते सिर्फ इश्शे लेइए या सेब्भी केरे लेइए?” 42 प्रभुए ज़ोवं, “कौने ईमानदार अक्लमन्द नौकर जेसेरो मालिक तैस अपने नौकरन पुड मुन्शी रखे ताके तैन केरि खुराक ठीक मौके पुड रोडेचारे बंटतो राए? 43 तै नौकर धने कि जेसेरो मालिक एज्जे ते मालिक तैस रोडेचारे कम केरतू लाए। 44 अवं तुसन सेई सच ज़ोताई कि तै अपने सारे घरबारेरी हेरगेशरो अधिकार तैसेरे सुपुदं केरेलो। 45 पन अगर तै नौकर अपने दिले मां जोए कि मेरे मालिके एजने हेज्जु बूळ चिरे ते होरि नौकरन ते नौकरेनन मार धाड़ केरनि शुरु केरे ते खेड पीतां नशे मां मसत भोइ गाए। 46 ते तैस नौकरेरो मालिक केन्ची एरे दिहाड़े एज्जे जेइस तैस नौकरे एजनेरो पतो न भोए ते तै मालिक एज्जी गाए त तैस नौकरेरे टुकड़े-टुकड़े केरतां ते तैसेरी हालत बेइमाना केरि ज़ेरि भोली। 47 हर तै नौकर ज़ै ज़ानते कि तैसेरे मालिकेरी कुन मर्ज़ी आए, कि तै कुन केरे, मगर तै अपने आपे कम केरनेरे लेइ तियार न केरे ते अपने मालिकेरी मर्ज़ी पूरी न केरे तैस पक्की मार बज़नीए। 48 पन अगर कोई नौकरे ज़ैस नई पतो कि मेरे मालिकेरी कुन मर्ज़ी, कि अवं कुन केरि, ते तेन केरे ज़ैस सेई तैस सज़ा मैल्ले, त तैस घट सज़ा मैलेली।” 49 यीशुए ज़ोवं, “अवं धरती पुड अग लाने ओरोई ते अगर अग लगगोरी भोथी त रोडू थियूं। 50 पन मीं बड़े जल्दी दुःख झैल्लनोए, ते अवं बडो परेशानई ज़ां तगर दुख न झैल्ली। 51 कुन तुस एन सोचतथ कि अवं धरती पुड मेल कराने लेइ ओरोई? नई! अवं तुसन सेई ज़ोताई, कि अलग केरने ओरोई। 52 अज़्जेरे बाद अगर एक्की घरे मां पंच मैन्हु भोले त तैना एप्पू मांमेई बंटोले, द्लाई ज़ैना मीं पुड विश्वास न केरन तैना दुइयां केरे खलाफ भोले, ते दूई, द्लेइयां केरे खलाफ भोले। 53 बाजी मट्टेरे खलाफ भोलो ते मट्टू बाजेरे खलाफ भोल्, हैई कुइयरे खलाफ ते कुई हैइयरे खलाफ ते शिख नुशारे ते नुश शिखारे खलाफ भोनीए।” 54 फिरी यीशुए बड़े मैनन मां ज़ोवं, “कि जैखन तुस बिदलार डुबते पासेरां च़लती लातथ त तुस ज़ोतथ कि झ़डी एजने बालीए ते तैन्ने भोते। 55 ते दक्षिणेरे पासेरां हवा च़ली त तुस ज़ोतथ गर्मी भोरीए ते तैन्ने भोते। 56 हे पाखंडी लोकव, तुस धरती ते अम्बरेरो हाल हेरतां मौसमेरो अंदाज़ो केरनो ज़ानतथ, पन इन न ज़ैनी बटथ कि, परमेशर कुन चाते? 57 “तुस एप्पू फैसलो केरा कि, तुश्शे लेइ कुन रोडूए। 58 जैखन तू लीडरे सेई साथी हाकिमे कां गाथ त बते मां तैस सेई फैसलो की न केरस, एरू न भोए तै तीं हाकिमे कां ने ते हाकिम सिपाहीएरे हवाले केरे, ते तू कैद भोइ गास। 59 अवं तुसन सेई ज़ोताई कि ज़ां तगर तू पाई-पाई न देले त तांतगर तैट्ठां छुट्टी न सकेलो।”

13 तैस मौके किछ लोक तैडी आए, तैना यीशु सेई तैन गलील इलाकेरे लोकां केरे बारे मां ज़ोने लग्गे, ज़ैन केरो खून, रोमेरे गवर्नर पिलातुसे मन्दरे मां जानवरां केरे बलिदाने सेई साथी मलेवरो थियो। 2 यीशुए तैन जुवाब दित्तो, “कुन तुस एन समझतथ कि तैन गलीलेरे लोकां केरो एत्रो बुरो हाल एल्हेरेलेड भोवं, कि तैना बाकी गलीलेरे लोकन करां जादे पापी थिये? 3 अवं तुसन सेई ज़ोताई कि, अगर तुस भी पापन करां मन न फिराले त सब एन्चरे नाश भोनेथ। 4 या कुन तैना अठारे ज़न्हे ज़ैन उन्डो शीलोहेरो गुम्मत बिछड़ोरो थियो, ते तैना सब तैस हैठ मेरि जे, ते तैना यरूशलेम नगरेरे होरि लोकन करां पापी थिये? 5 अवं तुसन सेई सच ज़ोताई, कि नई बल्के अगर

तुस भी पापन करां मन न फिराले त तुस सब एन्चरे नाश भोइ गानेथ।” 6 तैसरां बाद यीशुए तैन अक मिसाल देइतां ज़ोवं, “केन्चे मैने अपनि बागी मां अक फ्रेगोरो बुट लोरो थियो, ते तैस बुटे पुड हर साल फल तोपने अवं पन तैस फल न मैल्लो। 7 तैखन तैनी बागबाने सेई ज़ोवं, ‘हेर अवं द्लाई सालां केरो देंतो इस फ्रेगोरे बुटे पुड फल लोरोई तोपने, पन अज़ तगर एस पुड फल न मैल्लो एस केट्टी छड एनी किजो रोडी ठार च़िकतां रखोरीए?’ 8 पन तैनी तैस जुवाब देइतां ज़ोवं, मीं निदतां एसेरे चेन्ने पासन खाद छडनिये। 9 अगर फिरी भी फल न लगो त फिरी केट्टी देनोए।” 10 एक्की आरामेरे दिहाड़े यीशु प्रार्थना घरे मां शिक्षा देने लोरो थियो। 11 हेरा, तैडी अक कुआन्श थी ज़ैस अठारे सालां केरि देंती भूतेरे सैइयरे वजाई सेई कुबडी भोरी थी। तै सिधी न थी भोइ बटती। 12 यीशुए तै कुबडी कुआन्श लाई त एप्पू कां कुजाई ते ज़ोवं, “हे कुआन्श, तू अपनि तकलीफि करां छुटी जेई।” 13 ते यीशुए तैस कुआन्शी पुड हथ रखे ते तै लूशी बेज़्जोइ ते परमेशेरी तारीफ़ केरने लगी। 14 पन प्रार्थना घरेरो प्रधान यीशु पुड नराज़ भोव कि, एनी ए कुआन्श, आरामेरे दिहाड़े किजो बज़्जाई ते ज़ोने लगो, “हफते मां शा दिहाड़े कम काज़ केरनेरे लेइ आन, ते तैन्ने मां कोई बज़्जावरो भी लोडवे, ते आरामेरी दिहैडी न।” 15 प्रभु यीशुए तैस जुवाब दित्तो, “ए पाखंडी लोकव कुन तुस आरामेरी दिहाड़ी अपने दांत या गथे खोलतां तैन पानि पियाने न नेथ? 16 त कुन एन रोडू न भोवं कि ज़ै कुआन्श बेज़्जोइ ते अब्राहमेरे खानदाने मरां ए, ज़ै अठारे सालां केरि देंती शैताने गुलैमी मां रखोरि थी त आरामेरे दिहाड़े ए कुआन्श छुटानी न थी?” 17 ज़ैखन यीशुए एना गल्लां ज़ोई त तैसेरे खलाफ ज़ोने बाले सेब्भी केरि बेइजती भोइ, ते सारे लोक यीशुए ज़ैना महिमारां कम्मां अपने हथेई कियोरां थियां खुशी मनाने लग्गे। 18 तैखन यीशु तैन सेई ज़ोने लग्गे, “परमेशेरू राज़ कौस चीज़री ज़ेरूए अवं केस सेई ज़ोई? 19 तन शीरोएरे बीजेरू ज़ेरू आए, ज़ैन एक्की मैने एन्तां अपनि बागी मां बेवं, पन ज़ैखन तैन बीज़ बेव गाते, तै उतां सारे निक्के-निक्के बट्टन केरां बड्डो भोते। ते अम्बरेरां चुडोल्लू भी तैस पुड बिशने लग्गां।” 20 यीशुए फिरी ज़ोवं, “अवं परमेशेरेरे राज़ेरी मसाल केस सेई देई? 21 तैन खमीरेरू ज़ेरूए, ज़ैन केन्ची कुआन्शां आनू, ते हळे अट्टे मां मलाव ते सारू अट्टू खमीर बेनि ज़ोवं।” 22 यीशु अपने चेलन सेई साथी यरूशलम नगरे मांमेई गाते बार नगरन मां ते इल्लोव्वन मां शिक्षा देंतो च़ललोरो थियो। 23 केन्चे यीशु पुच्छू, “हे प्रभु कुन थोड़े ज़ेरे लोक हमेशारी सज़ाई करां बचेले?” यीशु तैन सेई ज़ोवं। 24 “परमेशेरेरे राज़े मां सुन्कड़े दारेरां बत्तां गानेरी कोशिश केरा, किजोकि अवं तुसन सेई ज़ोताई कि बड़े लोक अन्तर गानेरी कोशिश केरेले पन न गेड सकेले। 25 ज़ैखन घरेरो मालिक एक्की बार दार बंद केरि छडते, त तुस बेइर खड खडे दार गुडकाते, ते बिनती केरते राथ कि, ‘हे प्रभु इश्शे लेइ दार खोल्ल,’ ते तै तुसन जुवाब देते कि अवं तुसन न ज़ैनी तुस कौन आथ ते कोट्ठां ओरेथ? 26 तैखन तुस ज़ोले कि, ‘असेई तीं सेई साथी खोरी पियोरी नई, ते तीं इश्शे अंगने मां असन शिक्षा नई दित्तोरी।’ 27 पन ते तुसन सेई ज़ोलो, ‘अवं तुसन न ज़ैनी तुस कौन आथ, ते कोट्ठां ओरेथ हे बेइमानव मीं करां दूर भोथा।’ 28 ज़ैखन तुस अब्राहम, इसहाक ते याकूब ते सब नेबन परमेशेरेरे राज़े मां सामने लाएले ते अपनो आप बेइरोवं कढते लाएले, त लेरां देते ते दंत च़ापते राले। 29 लोक पूबेरां ते पछमेरां ते उत्तर ते दक्षिणेरे देंते यानी दुनियारे सारे लोकन मरां लोक परमेशेरेरे राज़ेरी धामी मां एडते लाएले। 30 ते हेरा किछ एरेन कि ज़ैना पेडले आन, तैना पत्रोवं भोनेन ते ज़ैना पत्रोवं आन, तैना पेडले भोनेन।” 31 तैखन किछ फरीसी लोक यीशु कां आए ते ज़ोने लग्गे, “इटां निस ते च़लो गा, किजोकि हेरोदेस तीं मारने चाते।” 32 पन यीशुए तैन ज़ोवं, तैस मैन्हु सेई ज़ै लोई अरो जेरो आए, गेइतां तैस सेई ज़ोथ कि, “अवं अज़ ते कालां भूतां केरो सैयो कढने ते बिमानव बज़्जानेरू कम केरने लोरोई ते एन कम द्लेइ दिहाइन मां मीं पूरू केरनूए। 33 बस्सा मीं अज़ ते कालां ते द्लेईडी मीं सफर केरनूए, किजोकि नबी सिर्फ यरूशलम नगरे मां मारे गाले। 34 “हे यरूशलमे नगरेरे लोकव, हे यरूशलमे नगरेरे लोकव, तुसेई केन्ने नबी कल्ल किये, ज़ैना बड़े पेडले तुसन कां आए, ते

जैना तुसन कां भेजे तैन घोडेई बेई, मीं केही फेरेंई सोचू कि तेरे बचन अकॉठे केरि जेन्चरे कुकडी अपने बचन अपने फंगन हेठ रखचे, पन तुस राजी न भोए। 35 हेरा तुशू घर तुशे लेइ छडू गाते, ते अवं तुसन सेईं जोताई कि तुस मीं केन्वी तरीके भी न लेईं सकेलें, जांतगर तुसन एन ज़ोनेरो मौको न एज्जलो, धने तै ज़ै प्रभुएरे नव्वे सेईं एइते।”

14 यीशु फिरी आरामेरे दिहाडे एक्की फरीसेरे घरे रोटी खाने जेव त बडे फरीसी लोक ध्याने सेईं लोरे थियो तकने, ताके तैसेरी कोई गलती दलान। 2 तैडी अक बिमार मैनु थियो जेसेरी जंघां पैखडी शोजती थी ते पस-पाक चलती थी, तै तैडी बिशोरो थियो। 3 यीशुए शास्त्री ते फरीसी लोकन पुच्छू, “कि आरामेरे दिहाडे कानूनेरे मुताबिक कोई बज्जानो जेइजे की नई?” 4 तेना घुप राए, तैखन यीशुए तैस बिमारे पुइ अपनो हथ रखखो ते तै बज्जाव, ते घुर भाए भेजो। 5 ते फरीसन सेईं ज़ोवं, “तुसन मरां एरो कौने, जेसेरू मट्टु या दांत खड्डे मां खिरके ते आरामेरी दिहाडी भोए, ते तैस तैडू बेइर न कडै?” 6 ते तैन लोकेई यीशुएरी गल्लां केरो जुवाब न देइ बटो। 7 ज़ैखन यीशुए हेरू कि, जैना लोक धाम ज़ोइतां रोटी खाने कुजोरेन केन्चरे खास लोकां केरि ठार चुनतन, तैनी तैन अक मिसाल दिती। 8 “ज़ैखन तुसन कोई इलाएरी धामी मां कुजाए। ज़ै तैनेई खास मैनु केरे लेइ ठार रखखोरी भोए, तुस तैडी न बिशथ, भोइ सकते कि होरो कोई तुसन करां जादे खास मैनु कुजेवरो भोए। 9 ते तुसन दुइये ज़न्न कुजाने बालो तुसन कां एइतां जोए, ए ठार होरि केरे लेइए ते तुसन शरमेइतां खडे उठनू पे, ते सेभन करां पत्र बिशनु पे। 10 ज़ैखन भी कोई तुसन धाम ज़ोइतां कुजाए त सेभन करां पत्र बिशशा, ताके ज़ैखन तेरो कुजाने बालो एज्जे ते जोए, ‘दोस्त, अगर एइतां खास ठैरी बिश,’ त तैन लोकां केरे सामने तेरी केत्री बड्याई भोनीए। 11 किजोकि ज़ै कोई अपनो आप बड्डो बनालो त तै निकडो बनाव गालो ते ज़ै कोई अपनो आप निकडो बनालो त तै बड्डो बनाव गालो।” 12 फिरी यीशुए, तैस फरीसी मैनु सेईं ज़ैनी तै कुजोरो थियो ज़ोवं, “ज़ैखन तुस दिसेरी या रातरी धामी मां मैन्न कुजाथ, त अपने दोस्तन या दलान रिशतेदारन या अपने अमीर पडोसन न कुजेइयथा। किजोकि तैना भी तीं कुजेइतां तेरू एवसान मुकेइ छडेले। 13 बल्के ज़ैखन तुस धाम देथ त टॉटे, कानो, गरीब गुरबे, परदेशी कुजेइयथ। 14 ते परमेशर तुसन बरकत देलो, किजोकि तैन कां किछ भी नई ज़ैस सेईं तेना तुशू एवसान मुकेइ बटन, ते तेरे एस एवसानेरो फल धेर्मा लोकन जींते भोने सेईं साथी फैसलेरी दिहैडी मैलेलो।” 15 दलाहनू मरां एक्के एन गल्लां शुन्तां यीशु सेईं ज़ोवं, “परमेशरेरे राज्जैरी धामी मां खाने बालो धन भोली।” 16 यीशुए तैस जुवाब दिती, “केन्चे मैने अक बडी धाम दिती ते बडे लोक कुजाए। 17 ज़ैखन रोटी खानेरो वक्त अव त तैनी अपनो नौकर भेजो कि तैन लोकन ज़ैन जो इलाएरी धाम बनोरी थी, ‘एज्जा, रोटी बनोरोए।’ 18 पन धामी बालेई सेभेईं मिलतां एतराज कियो ते पेइले मैने ज़ोवं, ‘मीं उडार घिन्नेरू आए, मीं तैस हेरने गानूए ते अवं तीं कां मिनत केरतां कि मीं राने दे।’ 19 त होरो ज़ोने लगे, ‘मीं पंच हल्लां दांत घिन्नेरेन ते अवं तैन लाने परखने चलोरोई। अवं तीं कां मिनत केरतां कि मीं राने दे।’ 20 अक होरो मैनु लोको ज़ोने, ‘मीं इला बनावरोए, एल्हेरेई अवं न एज्जी बेटि।’ 21 तैखन नौकरे वापस एइतां एन सैरी गल्लां अपने मालिके शुनेई, त मालिके बडी सरक अई, तैनी अपने नौकरे जो ज़ोवं, ‘इस नगर मां गा ते लेंगे लुथे, गरीब गुरबे नगरे, निघन्ने भक्ते, टॉटे, कानो इरां कुजा।’ 22 नौकरे ज़ोवं, ‘हे मालिक ज़ैन तीं ज़ोवं, मीं तैन्ने कमाव, पन फिरी भी ठार खाली आए।’ 23 मालिके नौकरे सेईं ज़ोवं, ‘बत्तारे आसे पासे उडारन मांमेइं गा ते लोक मजबूर केरतां आन, ताके मेरू घर भरतां भोए। 24 किजोकि अवं तीं सेईं ज़ोताई कि ज़ैन लोक पेइले कुजेवरे थियो, यानी खास ठैरारे लेइ कुजेवरे थियो, तैन मरां कोई भी मेरी धामी मां रोटी न खेइ सकेलो।” 25 बडे लोक यीशु पत्ती चलोरे थियो, यीशुए पत्रोवं तक्कू ते ज़ोवं। 26 “अगर कोई मीं कां एज्जे, ते अपने अम्मा बाजी, कुआन्था, बचन, दलान ते बेइन्न ते अपने जानी करां जादे प्यार मीं सेईं न केरे त तै मेरो चेलो न भोइ सके। 27

ते ज़ै कोई मेरो चेलो भोनेरी वजाई सेईं दुःख झैल्लनेरे लेइ त कने मरनेरे लेइ तियार नई, त तै मेरो चेलो न भोइसखे। 28 तुसन मरां एरो कोई भोए, ज़ै गुम्मत बनानू चाए, ते पेइले बिश्तां हिसाब न केरे, कि पूरो केरनेरे लेइ मीं कां खर्चो आए कि नई। 29 कथे एरू न भोए कि खाइ कन्नेरे बाद तैस बनेइ न सके ते तकने बाले हसते रान। 30 ‘ते ज़ोन एनी मैने बनानू त शुरु कियू, पन बनेइ न बटो।’ 31 या फर्ज केरा कि कोई राज़ो होरि राज़े सेईं लडाई केरनेरे लेइ सोची राहोरो भोए त कुन पेइले एन न सोचे कि 10000 फौजी जवानन सेईं अवं 20000 फौजी जवानन सेईं तैसेरो मुकाबलो केरि सकतां कि नई? 32 अगर तै मुकाबलो न केरि सखे त तैस फौजी सेईं ज़ै दूरे, मैनु भेजतां तैस सेईं सल्लारी मिनत केरेलो। 33 एन्चरे अगर ज़ै कोई तुसन मरां अपनू सब किछ न छडे त मेरो चेलो न भोइसखे। 34 “लून रोडी चीजे, पन अगर लूनरो लूनार मुकी गाए त तैन कोस सेईं लून बनाव गालू? 35 लोक तैस बेइरोवं शेरी देले, ज़ै कोई समझनू चाते, तै ध्याने सेईं शुने ते समझी।”

15 बडे लोक धइत घिन्ने बाले ते पापी लोक यीशु कां एइतां तैसेरी गल्लां शुन्ने लोरे थियो। 2 फरीसी ते शास्त्री लोक शिकयत केरतां ज़ोने लगे, “कि ए मैनु पापी लोकन सेईं तालमेल रखते, ते तैन सेईं साथी खाते पीते।” 3 यीशुए तैन अक मिसाल देइतां ज़ोवं। 4 “तुसन मां एरो कोई आए ज़ैस कां 100 भेइतां भोन ते तैन मरां अक हेरोए ते 99 भेइतां तैडी ज़ेरे जंगले मां छेइतां तोपने न गाए, ज़ां तगर तेस मैल्लोरी नई? 5 ते ज़ैखन ते तैस मैल्ले त खुशी सेईं कथे पुइ छुइतां आने। 6 ते अपने घरे एइतां अपने दोस्तन ते भियालन कुजेइतां जोए कि, ‘अज़ मीं सेईं साथी खुशी मनाथ, किजोकि अज़ मेरी हेरोरि भेइ मैलोरीए।’ 7 अवं तुसन सेईं ज़ोताई कि, एन्चरे 99 धर्मी ज़ैनेई पेइले अपने पापन करां मनफिरावरो तैन करां जादे ज़ैखन अक पापी, पापन करां मन फिराते स्वर्ग मां बडी खुशी बनाई गाचे। 8 “कुन एरी भी कोई कुआन्था भोली ज़ैस कां चेंदरे दश सिके भोन ते अक हेरोए ते तै दीयो बैलतां धरे अन्तर धूनी न दे, ते ज़ां तगर मैल्ले न तांतगर तोपती न गाए? 9 ते तोपनेरे बाद अपने पडोसन ते अपनि सेहेलन कुजेइतां एन न जोए कि, ‘एज्जा मीं सेईं साथी खुशी मनाथ किजोकि अज़ मेरो हेरोरो सिको मैलोरोए।’ 10 बरसा, अवं तुसन सेईं ज़ोताई कि एक्की पैपेरे, पापन करां मन फिराने सेईं परमेशरेरे स्वर्गदूतां केरे सामने बडी खुशी मनाई गाचे।” 11 यीशु फिरी होरि मिसाल दिती, “केन्वी मैनेरां दुई मट्टां थियां। 12 तैन मरां निकडे मट्टे अपने बव्वे सेईं ज़ोवं, ‘हे बाजी जेइदाती मां ज़ै मेरो हिस्सो बनते तै मीं दे।’ तैनी दुइने हिस्सो बेटतां दिती। 13 थोडे दिहैइना पत्ती निकडे मट्टे अपनू सब किछ जेइदात होरि मुलखे जो नी, ते बुरे कम्मन मां लुटाई। 14 ज़ैखन तैनी सब किछ मुकेइ छडू त तैस मुलखे मां बडो काल पेव, ते तैस कां खाने जो किछ न राऊं। 15 तैखन ते तैस मुलखेरे एक्की रानेबाले कां कम तोपने पुजो। तैनी तै अपने उडारन मां सूर चारनेरे कम्मे लाव। 16 तैडी तै बडो दलुखोरो थियो, तै तैन खाने मां राजी थियो ज़ैन सूर खाते थियो, किजोकि तैस केन्चे किछ खाने जो न दित्तू। 17 तैखन तैस समझ आई ते ज़ोने लगे, ‘भेरे बाजी केरे मजदूर रेजतां रोटी खातन, पन अवं इडी फाके लोरोई मरने। 18 मीं खडे उठतां अपने बाजी कां गानूए ते तैस सेईं ज़ोनुए हे बाजी अवं परमेशरेरी नज़री मां तुशशी नज़री मां पापी आई। 19 हुनी अवं एस काबल त नई, कि तुशू मट्टू भोइ, पन मीं भी अपने मजदूर मां रखा।” 20 “बरसा, तैनी तै मुलख शारी ते वापस अपने बाजी कां चलो, ते हेजू तै बडे दूरे थियो, ते तैसेरे बाजे तै लाव ते तैसेरे बाजी तैस पुइ बडो तरस अव, ते तै दौवइतो अपने मट्टे कां जेव, ते तैन गले लाव ते बडो खुशी भोव। 21 मट्टे अपने बाजी सेईं ज़ोवं, ‘ए बाजी अवं परमेशरेरी नज़री मां ते तुशशी नज़री मां पापी आई। हुनी अवं एस काबल त नई कि, अपने आपे जो तुशू मट्टू ज़ोई।’ 22 पन बाजे अपने नौकरन सेईं ज़ोवं, ‘लूथ केरा ते सेभन करां पेइले रोडां लिगडां एस मट्टे लुवाथ, ते एसरे हथ्थे आवठी ते पावन बूट लुवाथ। 23 ते अक जानवर मारो ते बडी धाम बनेइतां बडी खुशी मनाई। 24 किजोकि मेरू मट्टू ज़ैन जेन्चरे मेरि जोरू थियू, अज़ जींत्तू भोरूए, हेरोरू थियो, ते मैलोरूए।’

बस्सा तैना खुशी मनाने लगे।” 25 “तैइस बडू मट्टू जैन ऊडारे मां कम केरतां घरजो ओरू थियूं जैखन ते धरे नेडे पुजो त तैनी गीतां केरि त नघनेरी शौर शुनी। 26 तैनी अक नौकर कुजाव ते तैस पुच्छू, “ए शौर कीजेई लोरी भोने?” 27 नौकर तैस सेइं ज़ोवं, “तेरो निकडो ढूला वापस घरे ओरोए ते तेरे बाजे अक जानवर मैरतां धाम बनोरीए, किजोकि तै ठीक ठाक घरे पुजोरोए।” 28 पन तैस मैनेरू बडू मट्टू नाराज भोवं ते अन्तर घरे मां भी न लगे एजने, पन तैसेरो बाजी बेइर अव, ते तैस मिठांनेरी कोशिश की, कि घरे अन्तर एज्जे। 29 बडे मट्टे अपने बाजी सेइं ज़ोवं, “हेरा अव केत्रे सालां केरि देती तुशशी सेवा केरने लोरोई, ते कधे तुशशो हुक्म नई मोडोरो ते तुसेईं कधे कोई छेडू नई दित्तोरोए कि अव भी अपने दोस्तन सेइं खुशी मनेई।” 30 पन जैखन तुशशू निकडू मट्टू अपनू सब किछ लुटेइतां वापस अव, त तैसेरेलेइ जानवर मारो ते अक बडी धाम बनाई।” 31 तैसेरो बाजी ज़ोने लगे, “मेरा मट्टां तू त मीं कां आस ते ज़ैन किछ मीं कांए तैन सब तेरूए। 32 पन असेईं खुशी मनानी ज़रूरी थी किजोकि तेरो ए निकडो ढूला ज़ै जेन्घरे मेरि जोरो थियो, अज ज़ांतां भोरोए, हेरोरो थियो ते अज मैलोरोए।”

16 फिरी यीशुए अपने चलन अक होरि मिसाल दिती कि, “केन्ची अमीरो अक मुन्शी थियो, लोकेई तैसेरी शकैइत तैसेरे मालिके सेइं लाई कि, ए तेरो माल बरबाद केरने लोरोए। 2 मालिके तै कुजाव ते ज़ोवं, ‘एन कुने ज़ैन अव तेरे बारे मां शुन्ने लोरोई?’ सारो हिसाब-किताबे मां अज़रो बाद तू मेरो मुन्शी नई रालो।’ 3 मुन्शे अपने दिले मां सोचू मेरो मालिक मेरे कम्मे करां मीं कढने लोरोए, मीं मजदूरी भी न केरोए ते शमरिमेरे भीख भी न मैगोए। 4 ‘अवं ज़ानताई कि, मीं कुन केरनूए इट्टां कढनेरे बाद मीं लोक खुशी सेइं अपने घरे मां कबूल केरतन।’ 5 बस्सा तैनी अपने मालिकेरो अक कर्जदार तोपते, पेडले एककी पुच्छू तीं कां मेरे मालिकेरे केत्रे रुपेइयेन? 6 तैनी जुवाब दित्तो, ज़ैतनेरे तेलेरे 100 पीपां केरि कीमते, तैनी ज़ोवं इना रां तेरां काकलां, ते बिश्तां 50 पीपे बना। 7 फिरी तैनी मुन्शे होरि सेइं ज़ोवं, ‘तीं कां केत्रो कर्जोए?’ तैनी ज़ोवं, ‘गेहु केरि 100 बोरी;’ तैनी ज़ोवं, ‘यां काकलां ते बिश्तां 80 लिखी।’ 8 मालिके तैस बेईमान मुन्शेरी तारीफ़ की, एह्हेरेलेइ कि तैनी बेडि च़लैकी सेइं कम कियेरू थियूं। किजोकि इस दुनियारे लोक अपने लोकन सेइं सौदो केरनो परमेशरेरे लोकन करां बडे हुशारी सेइं केरतन। (aiōn g165) 9 अवं तुसन सेइं ज़ोताई कि दौलत खर्च केरतां इस दुनियारे लोकन दोस्त बनाथ, तुसन मरनेरां बाद हमेशा घर मैलनू। (aiōnios g166) 10 ज़ै थोडे ज़ेरे मां इमानदेरी सेइं रहते ते हछे मां भी ईमानदार रहते। ज़ै थोडे करां थोडे मां भी बेइमाने ते हछे मां भी बेइमाने। 11 बस्सा अगर तुस बेइमानेरे धन दौलती मां ईमानदार न भोए, त अपनि सच्ची दौलत ज़ै स्वर्ग मां आए, कौन तुशशे हवाले केरेलो? 12 अगर तुसेईं होरि केरे माले मां ईमानदार न भोए, त ज़ै तुशशो अपनो माले कौन तुसन देलो? 13 कोई नौकर दूई मालिकां केरि सेवा एककी वक्ते मां न केरि सके। न त एककी सेइं दुश्मनी केरेलो ते होरि सेइं प्यार केरेलो, या एककेरो बेनातां रालो त होरि न सुखालो। तुस परमेशरेरी ते दौलतरी, दुइयां केरि सेवा न केरि सकतथा।” 14 तैखन फरीसी लोक ज़ैना दौलतरे लालची थिये, एन गल्लां शुन्तां यीशुएरी हासी बनापने लगे। 15 यीशु तैन जो ज़ोवं, “तुस तैना आथ ज़ेना लोकन मां अपने अक बडो धर्मा हिरातन। पन परमेशर तुशशे दिलेरी हालत ज़ानते किजोकि ज़ै चीज़ लोकां केरे लेइ बडी बड्डीए ते तै परमेशरेरी नज़री मां भिट्टी आए।” 16 “मुसेरे कानून ते नेबी केरि गल्लां यूहन्ना बपतिस्मो देनेबाले तगर रेइ, ते फिरी परमेशरेरे राज़ेरी खुशखबरी शुनाने लगे ते हर कोई तैस मां दाखल भोनेरी बडी कोशिश केरने लगेरेन। 17 पन धरती अम्बर टेली गालू पन परमेशरेरे कानूने मरां अक बिंदी भी न मिटेली। 18 ज़ै कोई अपनि कुआन्थ शेरतां होरि सेइं इला बनाते ते तैस सेइं बदमाशी केरते ते ज़ै शोरीरी कुआन्थी सेइं इला बनाते ते भी बदमाशी केरते।” 19 “अक मैन्हु बडो अमीर थियो, ते तै बैनी लिंगड़ां लातो थियो, ते बड़ां माघो लिंगड़ां लातो थियो। ते रोज़ एश अशरती मां मसत रातो थियो। 20 अक बडो गरीब मैन्हु ज़ेसेरू नवं लाज़र

थियूं, तैसेरे दारे कां एन्तां रखोरो थियो, तैसेरी सारी जान खेराडेइं सेइं भेरतां थी। 21 तै चातो थियो, कि अमीर मैनेरे टुकैइ सेइं अपनू पेट भेरि, पन तैडी कुतरां एइतां थियां ते तैना तैसरां खेरडां भी चटतां थियां। 22 फिरी एरू भोवं कि तै गरीब लाज़र मेरि जेव स्वर्गतेई तै छुट्टां अब्राहमे कां पुजव, ते अमीर मैन्हु भी मेरि जेव ते तै देब्वी छुट्टो। 23 जैखन तैनी पातालेरे दुखे मां अपनि एछ्छी घैडी? त दूरेरां तैनी अब्राहम ते तैस कां नेडे लाज़र लाव। (Madēs g86) 24 तै चिन्दां मैरतां ज़ोने लगे, ‘ए बाजी अब्राहम मीं पुड दया केर, एस लाज़रे भेज ते ए अपनि अंगलौई पैनी सेइं सेलतां मेरे ज़िभी पुड लाए, किजोकि अव अगगी मां तडफने लोरोई।’ 25 पन अब्राहमे ज़ोवं, ‘मट्टां याद केर तीं त अपनि जवनें मां सब रोडी चीज़ां मैल्ली ते इस लाज़रे सिर्फ बुरी चीज़ां मैल्ली, पन ए हुन्ना इडी आरामे मांए ते तू तकलीफी मां आस। 26 ते एन गल्लां केरे अलावा इश्ते ते तुशशे मझाटे अक बड्डी खाईए, ताके ज़ै कोई पार गानू चाए न गेइ सखे ते ज़ै वार एजनु चाए न एज्जी सखे।’ 27 तैनी मैने ज़ोवं, ‘ए बाजी अब्राहम, अव ज़ोवले हथ केरतां ज़ोताई कि, तू लाज़रे दुनियाई मां मेरे बाजी केरे घरे भेज। 28 तैडी मेरे पंच ढूला एजन ते तै तैन हदायत दे कि, एरू न भोए ते तैना भी इस अगगी मां एजन। 29 पन अब्राहमे तैस ज़ोवं, ‘तैन केरि हदायतरे लेइ तैन कां मुसेरो कानूने ते नेबी केरि किताबां त आन तैना तेन शुनन ते मननू।’ 30 तैनी मैने ज़ोवं, ‘नई ए बाजी अब्राहम अगर कोई मुडदन मरां ज़ांतां भोइतां गाए त तैना ज़रू पापन करां मन फिराले।’ 31 पन अब्राहम तैस सेइं ज़ोवं, ‘अगर तैना मुसेरी ते नेबी केरि न शुनी ते अगर कोई मुडदन मरां ज़ांतां भोइतां गाए त तैना तैसेरू भी याकीन न केरेले।’”

17 फिरी तैनी अपने चलन सेइं ज़ोवं, “एन न भोइसखे कि लोकन ठोकर न लगे, पन अफ़सोस तैस मैन्हु पुड ज़ै होरि केरे लेइ ठोकर बनते। 2 तैसेरेलेइ त एन्ने रोडू थियूं, कि ढूलातेरो ढूलेइटोल तैसेरे गल्ले उन्डो छेडतां ते समुन्द्रे मां शेरतां छुडो गाथो, ताके तै होरि जो ज़ैना विश्वासे मां कमज़ोरन ठोकर न बने। 3 बस्सा हुशार राथ तुस कुन केरतथ, अगर तुशशो विश्वासी ढूला पाप केरते त तैस समझाथ ते अगर तै पापन करां मन फिराए त तैस माफ़ केरा। 4 अगर तै एककी दिहेडी मां तेरो सत्ते बार तेरो पाप केरे त अगर तै सत्ते फेरेई तीं कां एइतां माफ़ी मग्गे त तू सत्ते फेरेई तैस माफ़ केरा।” 5 प्रेरितेई प्रभु सेइं ज़ोवं, “हे प्रभु, इश्शी मद्दत केर कि अस होरे भी मज़बूती सेइं विश्वास केरमा।” 6 प्रभु यीशुए ज़ोवं, “अगर तुशशो विश्वास सिवलरे गलेवे बराबर भी भोलो त तुस इस तूतेरे बुटे जो ज़ोई सकतथ इट्टां उखड ते समुन्द्रे मां लग त तै तुशशो हुक्म मनेलो। 7 “तुसन मां एरो कौन आए, ज़ेसेरो नौकर ऊडारां बेंतो भोए या गोरू च़ारतो भोए ते ज़ैखन तै ऊडारे मरां घरे एज्जे त तैसेरो मालिक तैस ज़ोए कि, ‘लूशी बिश्श ते रोटी खा।’ 8 या एन न ज़ोए कि मेरी रोटी तियार केरथ ते ज़ां तगर अव खेड पीं नन्ना ते ज़ां तगर अव रेज़्जी नन्ना तू मेरी सेवा केरतो राए, तैल्ला पत्ती तू भी खा? 9 कुन तै एल्हेरेलेइ नौकरेरू अहसान केरेलो कि, तीं तैन कियूं ज़ैन तीं केरनेरे लेइ ज़ोवरू थियूं? 10 एन्घरे ज़ैखन तुस एन सब केरेले ज़ैस केरनेरो तुसन हुक्म दित्तोरो थियो, त ज़ोथ कि, ‘असां निकम्मे नौकर आम? असेईं तैन्ने कियूं ज़ैन केरनू चाते थियो।’ 11 एककी फेरे यीशु त कने तैसेरे चले यरूशलेम नगरेरे पासे च़लारे थियो। तैना सामरिया ते गलीले इलाके मामेईं च़लारे थियो। 12 ज़ैखन तैना एककी इलव्वं मां पुजने बाले थिये त तैडी दश कोढी मैल्ले ज़ैना दूर खेडोरे थिये। 13 तैनेई बडे ज़ोरे सेइं ज़ोवं, “हे यीशु, हे प्रभु, असन पुड दया केर।” 14 यीशुए तैन लेइतां ज़ोवं, “यरूशलेम नगरेरे मन्दरे मां गाथ ते अपनो आप याजकन हिराथ, ते सच्चे एरू भोवं कि गाते बार बत्तां तैन केरू कोढ साफ़ भोइ जेवं।” 15 पन तैन मरां अक कोढी अपनू कोढ हेरतां कि, तैसेरू कोढ साफ़ भोरोए खुशी भोइतां बडे ज़ोरे सेइं परमेशरेरी तारीफ़ केरतो वापस यीशु कां अव 16 ते यीशुएरे पावन पुड दोग्ग रेखतां शुक्र लगे केरने। ए मैन्हु सामरी थियो। 17 यीशुए तैस पुच्छू, “कुन तैन दश कोढी केरू कोढ साफ़ नई भोवरू? फिरी तैना कोरां जे? 18 कुन एस गैर यहुदी मैनेरे अलावा तैन होरन एत्री हिम्मत न अई, कि गेइतां परमेशरेरी महिमा केरमा?” 19

तैखन यीशुए तैस ज़ोव, “खडो उठ ते चलो गा तीं मीं पुड़ विश्वास कियो तांए तू बेज़्जोरोस।” 20 फरीसी लोक यीशु पुच्छने लगे, “कि परमेशेरू राज़ केइस एजूनू? यीशुए तैन जुवाब दितो कि परमेशेरू राज़ एरू नई कि कोई तैस लेई बटे। 21 ते ज़ोन कि हेरा इडी या उडीए एन्चरे नई बल्के परमेशेरू राज़ तुशे मझाटे।” 22 यीशुए अपने चलन सेइं ज़ोव, “तै दिहाडी भी एजनीए कि, ज़ेइस तुस परमेशेरी दिहेइडन मरां अक दिहाडी हेरनेरी इच्छा रखले, ज़ेइस मैनेरू मट्टे यानी अवं वापस एजोनोई, पन तुस न लेई बटेले। 23 लोक तुसन सेइं ज़ोले कि, ‘हेरा, मसीह इडीए,’ या ‘उडीए या हेरा तै इडीए!’ पन तुस तेरां न गेइयथ ते न तैन पत्ती न चेलथ। 24 किजोकि ज़ेन्चरे बिजली अम्बरे मरां चेमकतां एक्की पासोरां होरि पासो चली गाचे, तेन्चरे मैनेरू मट्टे यानी अवं तैस दिहेडी बांदो भोलो। 25 पन ज़रूरीए कि ते पेइले दुःख झैल्ले ते इस ज़मानेरे लोक तैस घटिया समझन। 26 ते जेरू इशे पूर्वज नूहरे ज़माने मां भोरू थियू, तेरहु मैनेरे मट्टेरे ज़माने मां भी भोलू। 27 तेइस भी लोक खाते पीते थिये ते इला भोते रहते थिये। ते ज़ां तगर नूह किशती मां न थियो जोरो तांतगर सब किछ भोतू राव। ते फिरी तूफान अव ते सब किछ खतम भोइ जेवं। 28 ते जेरू इशे पूर्वज लूतेरे ज़माने मां भोरू थियू, कि लोक खाते पीते थिये बुपार केरते, बागां लाते ते घरां बनाने मां मघन थिये। 29 पन ज़ैस दिहेडी लूब सदोम नगरे मरां बेइर निस्सो त पत्रोवं अम्बरेरां गंधकेरी अग बैखतां सब किछ खतम केरि छूड़। 30 ते मैनेरे मट्टे यानी मेरू वापस एजनु भी अचानक भोलू। 31 “तैस दिहेडी ज़ै लाए पुड़ भोलो त तैसेरो माल सबाब अगर घरे मां भोलो त तैस नेने तै अन्तर न एज्जे, ते ज़ै ऊडारे मां भोलो तै भी वापस न गाए। 32 लूतेरी कुआन्शी सेइं कुन भोवं याद रख्खा। 33 ज़ै अपनि जान बचानेरी कोशिश केरेलो तै तैस गुवालो, ते ज़ै तैस गुवालो तै तैस बचालो। 34 अवं तुसन सेइं ज़ोताई कि तैस राती दूई मैनु एक्की खट्टी पुड़ झुल्लोरे भोलो, ते अक नीयो गालो, ते दुइयोवं तैडी रालो। 35 दूई कुआन्शां हिट्लाट पडती भोली त अक नेनीए ते अक तैडी छडनिये। 36 दूई मैनु ऊडारे मां भोलो त अक नेनोए ते अक तैडी छडनोए।” 37 एन शुन्तां तैनेई यीशुए पुच्छू, “हे प्रभु असन सेइं ज़ो, एन कोइ भोलू?” यीशुए तैन ज़ोव, “ज़ैडी ज़िग भोते तैडी इल्लां जम्हां भोइचन।”

18 यीशु अपने चलन अक मिसाल देइतां ज़ोव, कि हिम्मत हारनेरे बैगर प्रार्थना केरती रावरी लोडे। 2 “एक्की नगर मां अक हाकिम रातो थियो। तैन परमेशेरे करां डरतो थियो, ते न कोन्ची मैनेरी परवाह केरतो थियो। 3 तैस नगर मां अक विधवा कुआन्श रहती थी ज़ै तैस हाकिमे कां एडती रहती थी, ते तैस कां मिनत केरती रहती थी कि, मेरो इन्साफ केरतां मीं मेरे दुश्मने करां छुटा। 4 पेइले त तैनी एत्रो खियाल न कियो पन ज़ैखन ए हिसाब च़लतो राव, त तैनी अपने मने मां ज़ोव, ‘अवं न परमेशेरे करां डेरि ते न मैनेरी परवाह केरि। 5 पन ए विधवा कुआन्श मीं परेशान केरती राचे, एल्हेरेलेइ अवं एसारो इन्साफ केरेलो, नई त एसां अवं बडो ज़लील केरनोई।” 6 तैखन प्रभु यीशुए ज़ोव, “शुना ए बेईमान हाकिम कुन लोरोए ज़ोने। 7 बस कुन परमेशर अपने चुनोरे लोकां केरो फैसलो केरने मां चिर लालो, ज़ैना रात दिहेडी फरयाद केरते रातन? 8 अवं ज़ोताई, कि ते तैन केरो फैसलो केरेलो ते लूशी केरेलो। पन फिरी भी ज़ेइस मैनेरू मट्टे यानी अवं एज्जोले त कुन लोक मीं पुड़ हेजु तगर विश्वास केरते भोलो?” 9 यीशुए किछ एरे लोकन अक मिसाल दित्ती कि, ज़ैन अपनो आपो बडो धर्मी समझते थिये ते होरन किछ न थिये बुझते। 10 “दूई मैनु प्रार्थना केरने मन्दरे मां जे अक फरीसी मैनु थियो, ते होरो धडत (टैकस) घिन्ने बालो थियो। 11 फरीसी मैनु खडो भोइतां प्रार्थना केरने ते अपने बारे मां सोचने लगे, कि हे परमेशर अवं तेरू शुक्र केरताई, अवं होरि मैनु केरो ज़ेरो नई ज़ैना डैकू, अधर्मी, बदमाशी केरनेबाले, ते इस धडत नेने बालेरो ज़ेरोई नई, 12 अवं हफते मां दूई बार बरत रखताई, ते अपनि कैमईयोरो दशोवं हिस्सो तींजो देताई। 13 “पन ते धडत नेनेबालो ज़ै दूर खडखडो थियो, तैनी एत्रू भी न केरि बट, कि अम्बरेरे पासो तक्के बल्के छाती पिट्टां ज़ोने लगे, ‘हे परमेशर

मीं पैपी पुड़ दया केरतां माफ़ केर।” 14 अवं तुसन सेइं सच ज़ोताई, ए धडन नेनेबाले मैनु तैस फरीसी मैनु करां धर्मी निस्तां अपने घरजो जेव। किजोकि ज़ै कोई अपनो आप बडो बनालो ते निकडो बनाव गालो ते ज़ै अपनो आप निकडो बनालो ते बडो बनाव गालो।” 15 फिरी किछ लोक निक्के बचचन यीशु कां आन्ने लगे ताके यीशु तैन पुड़ हथ रेखतां बरकत दे। चेलेई तैन लाव त तैन धमकाए ते ठाकू। 16 पन यीशुए बच्चे एप्पू कां कुजाए ते चलन सेइं ज़ोव, “बचचन मीं कां एजने देथ एन न ठाका, किजोकि परमेशेरू राज़ एरां जेरां केरूए। 17 अवं तुसन सेइं सच ज़ोताई, ज़ै कोई परमेशेरे राज़ मां गानेरे लेइ अपनो आप निक्के बचचन बराबर न बनाए, तांतगर परमेशेरे राज़े मां दाखल न भोइसखे।” 18 केन्ची यहूदी मैने यीशुए पुच्छू, “हे रोडे गुरू हमेशारी जिन्दगी हासिल केरनेरे लेइ अवं कुन केरि?” (aiōnios g166) 19 यीशु जुवाब दित्तो, “तू मींजो रोडू किजो ज़ोतस? परमेशेरे अलावा होरो कोई भी रोडो नई। 20 तू त परमेशेरे हुकमन ज़ानतस, यानी ‘खून न केरा, बदमाशी न केरा, चोरी न केरा, झूठी गवाही न देथ, धोखो न देथ, अपने हाज-बच्चां केरि इज़्जत केरा।” 21 तैनी मैने ज़ोव, “एना सब हुकम अवं बचपनेरो मन्तो ओरोई।” 22 ज़ैखन यीशुए एन शुन्तां ज़ोव, “तीं मां एक्की गल्लोरी कमी आए, तू ज़ैन किछ तीं कां एण, तेन बेचतां गरीब मैनेन दे, तैखन तीं स्वर्ग मां खज़ानो मैलेलो। ते एडतां मीं पत्ती चली।” 23 ए गल शुन्तां तै बडो उदास भोइ जेव किजोकि ते बडो अमीर थियो। 24 यीशुए तैस हेरतां ज़ोव, “अमीरां केरू परमेशेरे राज़े मां दाखल भोनू केरू आसुखतुए। 25 परमेशेरे राज़े मां अमीर मैनेरू दाखल भोने केरां ऊँटेरू सांधनेरे पाए मरां निस्सू सुखू आए।” 26 ज़ैनेई ए गल शुनी त तैना पुच्छने लगे, “फिरी कसेरी मुक्ति भोइ सख्खे।” 27 यीशुए जुवाब दित्तो, “मैनन करां त एन न भोइ सके पन परमेशेरे करां सब किछ भोइ बटते।” 28 पतरसे यीशु सेइं ज़ोव, “हेर असां त सब किछ छेडतां तीं पत्ती च़लारेमा।” 29 यीशु तैन सेइं ज़ोव, “अवं तुसन सच ज़ोताई, कि एरो कोई नई ज़ैनी परमेशेरे राज़ेरे लेइ अपनू घर या कुआन्श ते हाज या बव, दूला या बच्चे शारोरे भोन। 30 तैस इस दुनियाई मां बडू जादे, ते एजने बैली दुनियाई मां हमेशारी जिन्दगी मैलनीए।” (aiōn g165, aiōnios g166) 31 यीशुए अपने 12 चेले एप्पू सेइं साथी निये ते तैन ज़ोने लगे, हेरा, “अस यरूशलम नगरे जो च़लारेम ते नेबेई ज़ैन किछ मैनेरे मट्टेरे बारे मां लिखोरूए तैन पूरू भोलू। 32 तै गैर कोमां केरे हथ्ये देनोए, ते तैना तैसेरो मज़ाक बनाले ते तैस बे इज़्जत केरेले ते तैसेरे तुतरे पुड़ शुक्नूए। 33 तेस कोडे मारले ते तैस मैरी छड़ेले ते तै टलेइयोवं दिहाडे फिरी ज़ीतो भोलो।” 34 तैनेई ए गल न सेमझी बटी ते यीशुएरी एस गल्लोरो मतबब तैन करां छप्पोरो राव। 35 ते एरू भोवं कि ज़ैखन तेना यरीहो नगरेरे नेडे पुज्जे त अक कानो मैनु बत्तारे इलेखी बिशोरो भीख मगतो थियो। 36 ज़ैखन तैनी हछे मैनु केरि छैइ शुनी त तै पुच्छने लगे, “ए कोलहेरी शीर लोरी भोने?” 37 लोकेई तैस ज़ोव, “यीशु नासरी कोस्कोई च़लरोए।” 38 ते चिन्डां मैरतां ज़ोने लगे, “हे यीशु नासरी दाऊदरा मट्टां मीं पुड़ दया केर।” 39 यीशुए सेइं साथी च़लने बाले लोक तैस काने मैनु झिड़कने ते ज़ोने लगगे, चुप रा, पन तै मना जादे ज़ोरे-ज़ोरे चिन्डां मैरतां ज़ोने लगे, “हे यीशु नासरी दाऊदरे मट्टा मीं पुड़ दया केर।” 40 यीशु खेडोव ते हुकम दित्तो, एस मीं कां आनां ज़ैखन तै तैस कां अव त यीशुए तैस पुच्छू। 41 ज़ो, “अवं तेरे लेइ कुन केरि?” तैनी काने मैने ज़ोव, “हे प्रभु अवं चाताई कि अपनि एछछेई सेइं लेई बेटी।” 42 यीशुए तैस सेइं ज़ोव, “बेज्जोई गा तेरे विश्वासे तू बज़्जावरिस।” 43 तै तैखने बेज्जोव ते लहने लगे ते परमेशेरी तारीफ़ केरतो यीशु पत्ती च़लो जेव। एन हेरतां सब लोक परमेशेरी तारीफ़ केरने लगे।

19 यीशु यरीहो नगरे मामेइं निस्तां च़लारे थियो। 2 तैडी अक मैनु थियो, ज़ेसेरू नवं जक्कई थियू, तै धडत घिन्ने बालां केरो अफसर थियो, तै बडो अमीर थियो। 3 तैस यीशु हेरनेरो चाड थियो, पन तैसेरू कद छोटू थियू, तांए तै हछे मैनेन मरां लेई न थियो बटतो। 4 एल्हेरेलेइ तै देवइतां अगर जेव ते फ़ेगरे बुटे उबरो गुस्सा किजोकि ज़ैखन यीशु एज्जे त तैस रोडेज़ारे लेई

सके। 5 जैखन यीशु तैस ठैरी पुजो त तैनी उबरू तेकतां ज़ोवं, “जक्कई लूशी उन्दो ओस, किजोकि अज मीं तेरे घरे ट्लाहन चारै ई एजनूए।” 6 जक्कई तैखने उन्दो ओस्सो ते यीशु बेड़ि खुशी सेईं अपने घरे नीयो। 7 एन हेरतां सब लोक शकैइत केरतां जोने लाए, “कि यीशु त एक्की पैपी मैनेरो मेहमान बनोरोए।” 8 जक्कई रोटी खांते बारे खडो भोइतां प्रभु सेईं जोने लगे, “हे प्रभु यीशु तक अवं अपने अध्थी जेइदात कंगालन देताई, अगर केन्चेरु किछ खोरू भोलू त तैस चेत्रे हिस्से वापस देइलो।” 9 तैखन यीशुए तैस सेईं ज़ोवं, “अज इस घरे मां मुक्ति ओरिए, एल्हेरेलेइ इन भी पूर्वज अब्राहमेरू अक मट्टूए। 10 किजोकि मैनेरू मट्टू यानी अवं होरि लोकन हमेशारी सज़ाईं करां मुक्ति देने एवरोई।” 11 जैखन लोक यीशुएरी गल्लां शुन्ने लग्गोरो थिये त तैनी तैन अक मिसाल देइतां ज़ोवं, किजोकि तैना यरूशलेम नगरेने नेडे पुजोरे थिये ते लोकां केरो खियाल थियो परमेशरेरू राज लूशी एजनु आए। 12 तैनी तैन ज़ोवं, “अक बडो अमीर मैनुहो होरि मुलखे मां चलो, ताके तैस मुलखेरो मेंत्रेरो ओदो घिन्तां वापस एज्जे। 13 तैनी अपने सेवादारन मरां दश ज़न्हे कुजाए, ते तैन दश मोहरां देइतां ज़ोवं, ‘मेरे वापस एजने तगर इस पेंडसे सेईं कारोबार केरथा।’ 14 पन तैस ठैरी लोक तैस सेईं नफरत केरते थिये, तैनेई किछ लोक भेजतां तैस जो बिस्तार भेजो, कि अस न चाम ए मैनुह कण्ड राज केरो।” 15 “जैखन ते हुकुमतरो ओदो हासिल केरतां वापस अवं त तैनी अपने सेवादारो जो समाद भेजो। जैना तैनी कारोबारेने लेइ पेंडसे दित्तोरे थिये ताके सेन्भी केरो पतो केरे कि केनि केरू कियेरू आए। 16 पेइले मैने एइतां ज़ोवं, ‘हे मालिक मीं तेरी दश अश्रेफेइं सेईं दश होरि कमैई।’ 17 तैनी तैस सेईं ज़ोवं, ‘तीं दश अश्रेफेइं सेईं इमानदेरी सेईं कम कियूं गा तीं दश नगरन पुइ अधिकार दित्तो गाते।’ 18 दुइयोवं मैने एइतां ज़ोवं, ‘हे मालिक मीं तेरी पंच अश्रेफेइं सेईं पंच होरि कमैई।’ 19 तैनी तैस सेईं भी ज़ोवं, ‘तीं भी पंच नगरन पुइ अधिकार दित्तो गाते।’ 20 तैखन एक्की मैने एइतां ज़ोवं, ‘हे मालिक इना रेइ तेरी अश्रेफो मीं एन रूमाले मां बंधतां रखोरि थी।’ 21 किजोकि तू सखत मैनुस ते अवं तीं कारां डरतो थियो। किजोकि तू ते चीज ज़ै तीं न भोए रखोरि तू तैस भी नेतस ते ज़ैन न भोए बेवरू तू तैन भी लुनतस। 22 तैनी तैस सेईं ज़ोवं, ‘हे दुष्ट नौकरा अवं तेरी गालेईं सेईं तीए मुर्ज़न बनताईं। ज़द तीं पतो थियो, कि अवं बडो सखत मैनुह आई, ते ज़ै चीज मीं नईं रखोरि अवं तैस भी सलहतां ते ज़ैन नईं बेवरू अवं तैन भी लुनतां।’ 23 फिरी तीं मेरे रुपैइये केन्ची का किजो नईं रखोरि ताके अवं वापस एइतां तैस करां सूते समेत उसुल केरथो?’ 24 तैखन तैनी तैन सेईं ज़ोवं, ‘जैन तैडी खडखडे थिये एस करां एन अश्रेफो एन्तां उस देथ जैस कां दश अश्रेफीन।’ 25 तैना जोने लगे हे मालिक एस कां पेइली दश अश्रेफीन! 26 तैनी तैन जुवाब दित्तो, अवं तुसन सेईं ज़ोताई कि, ‘जैस कां परमेशरेरी मर्ज़ी समझनेरी खुवाइश आए, तैस परमेशर जादे समझ देलो। पन जैस कां परमेशरेरी मर्ज़ी समझनेरी खुवाइश नईं, तैस केरां, थोड़ी ज़ेरि समझ ज़ै तैस कां आए, ते भी नी गाली।’ 27 पन मेरे इन दुश्मन ज़ैन मीं न थिये सुखाते कि, ए असन पुइ राज केरे एन इरां आनां ते मेरे सामने एन मेरी छड्ढा।’ 28 एना गल्लां जोइतां यीशु अपने चेलन सेईं साथी अग्रोवं जेव कि यरूशलेम नगरे मां गाए। 29 ज़ैखन तैना ज़ैतनेरे पहाडे बैतफगे ते बैतनिय्याह मां पुजे त यीशुए दुईं चले एन ज़ोइतां अग्रोवं भेजे। 30 “तुस सामने उस ड्लव्वे मां गाथ ते तैडी तुसन अक गधेरो बच्चो बन्धोरो मैलनोए। जैस पुइ अज तगर कोई नईं चढोरो तैस खोलतां इडी मीं कां आनां। 31 ते अगर तुसन कोई पुच्छे, कि तुस एस किजो लोरेथ खोलने त तुस जोइयथ, कि प्रभुए एसेरी ज़रूत आए।” 32 अग्रोवं गानेबाले चलेईं तैने कियूं ज़ैन यीशुए ज़ोरु थिये। 33 जैखन तैना गधेरो बच्चे खोलने लग्गोरो थिये त तैसेरो मालिक तैन पुच्छने लगे, “तुस एस बच्चे किजो लोरेथ खोलने?” 34 तैनेईं जुवाब दित्तो, “प्रभुए एसेरी ज़रूते।” 35 तैनेईं ते बच्चो खोलतां यीशु कां आनां, ते यीशुए तैस पुइ अपना लिगडां छेइतां तैस पुइ चेटतां चलो जेव। 36 जैखन तैना चलोरे थिये त लोकेईं अपना लिगडां बत्ती मां बिछां। 37 जैखन तैना यरूशलेम नगरे नेडे पुजे त ज़ैदां बत ज़ैतून पहाडे पुइरां उन्डी गातीए तैडी

सारे चलेईं एना चमत्कार हेरतां ते खुशी भोइतां परमेशरेरी तारीफ़ केने लगे कि, 38 “धने ते राजो ज़ै परमेशरे नव्वे सेईं एइते। ते स्वर्ग मां महिमा ते अम्बरे मां शान्ति भोए।” 39 तैन मैनुन मां किछ फरोसी लोक भी थियो। तैना यीशु सेईं जोने लगे, “हे गुरु अपने चेलन ज़ो कि चुप केरन।” 40 यीशुए तैन जुवाब दित्तो, “अवं तुसन ज़ोताई, अगर एना लोक चुप केरन त इना घोइ ज़ोरे सेईं परमेशरेरी तारीफ़ केरेले।” 41 यरूशलेम नगरे मां पुजतां यीशु यरूशलेम नगरेरो हाल हेरतां तैस लेरां छुटी। 42 ते जोने लगे, “अगर तुस सिर्फ़ इस दिहैइरे बारे मां ज़ानते भोथे, ज़ै तुसन शन्तरे पासे नेती। पन ई गल हुना तुशे एछ्छन करां छपोरीए। 43 तीं तैना दिहाडे हेरने पेनेन जेइस तेरे दुश्मन तेरे चेत्रे पासन मोरचो बंधतां ते तीं घेरो देले, ते हर पासेरां तीं पुइ हमलो केरेले। 44 तुशे दुश्मन तुसन नाश केरेले, ते सैरी लोकन मारेले, ते तीं पुइ घोडे पुइ घोइ बाकी न रालो। किजोकि जेइस परमेशर तुसन बचानेरे लेइ ओरो थियो तुसेईं न पिशानो।” 45 तैखन ते मन्दरे मां जेव ते तैडी तैन बुपारी ते गाक बेइरोवं कढने शुरू किये। 46 तैनी तैन सेईं ज़ोवं, “पवित्रशास्त्रे मां लिखोरूए ‘मेरू मन्दर प्रार्थनारू घर भोलू,’ पन तुसेईं त डैकू केरो अट्टो बनेइतां रखोरिओ।” 47 ते ते तैस पवित्र दहैडी मन्दरे मां शिक्षा देतो थियो, पन प्रधान याजक ते शास्त्री लोकेईं यीशु मारनेरी कोशिश मां लग्गोरो थिये। 48 पन एन एन केरनेरो मौको न थियो मैलतो, किजोकि सारे लोक यीशुएरी गल्लां शुन्नेरे लेइ चेत्रे पासन बिशोरे रहते थियो।

20 एक्की दिहाडे ज़ैखन यीशु मन्दरे मां शिक्षा लोरो थियो देने, ते तैन खुशखबरी लोरो थियो शुनाने त प्रधान याजक ते शास्त्री ते यहूदी बुजुर्ग यीशु कां पुजे। 2 ते तैना जोने लगे, “तू एन सैरी गल्लां कसरे अधिकारे सेईं केरतस या तीं ए अधिकारे केनि दित्तोरोए?” 3 यीशु तैन जुवाब दित्तो, “अवं भी तुसन अक गल पुछतई, मीं ज़ोथ। 4 यूहन्नारो बपतिस्मो स्वर्गेर तरफां थियो या मैनुह केरे तरफां थियो?” 5 तैना एप्यू मांमेइ बंस केरने लगे, “कि अगर अस जोम, ‘स्वर्गेर तरफां थियो,’ त ते पुछेलो कि, ‘फिरी तुसेईं याकीन की नईं कियेरू?’ 6 पन अगर अस जोम कि, ‘मैनुह केरे तरफां थियो,’ त लोकेईं असन घोडेईं देनिन, किजोकि तैना यूहन्ना नबी मन्ते थियो।” 7 एल्हेरेलेइ तैनेईं जुवाब दित्तो, “कि अस न ज़ानम कि केसेरी तरफां थियो।” 8 यीशु तैन सेईं ज़ोवं, “त अवं भी तुसन सेईं न ज़ोई कि एना कम्मां कसरे अधिकारे सेईं केरताई।” 9 फिरी यीशु तैन लोकन अक मिसाल देइतां जोने लगे, “एक्की मैने दाछरी बाग लाई ते ते ठेकेदारन ठेके पुइ देइतां एप्यू खरे चिरे कोस्कोईं दूर मुलखे चलो जेव। 10 जेइस दाछ पकनेरो मौसम अवं त तैनी अपनो हिस्सो नेनेरे लेइ अक नौकर बागी मां भेजो। पन तैनेईं ते खूब कुटो ते खाली वापस भेजो। 11 ते फिरी तैनी अक होरो नौकर भेजो, पन तैनेईं तैसेरी भी बेइजती की, ते ते भी झुस कुट केरतां खाली वापस भेजो। 12 फिरी तैनी अक टलेइयोवं होरो नौकर भेजो, पन तैनेईं तैसेरी भी बेइजती की ते ज़ख्मी केरतां कढो। 13 तैखन बागारे मालिके ज़ोवं, ‘अवं अपनू ट्लारू मट्टू भेजताई शैइद तैना तैसेरो लिहाज केरेले।’ 14 पन ज़ैखन ठेकेदारं तै लाव त एप्यू मांमेइ मुशोरो केरने लगे, ए मालिके, एज्जा एस्से मारम ताके जेइदात इशकी भोइ गाए। 15 तैनेईं तैन मट्टू बागी मरां बेइर शरी छड्डू, ते मारू तुस सोचा कि फिरी बागारे मालिके तैन सेईं कुन केरेलो। 16 तैं मालिक एइतां तैन मेरी छडेलो ते बाग होरि केरे हवाले केरेलो।” तैनेईं एन शुन्तां ज़ोवं, “परमेशर न केरे एरू न भोए।” 17 तैनी तैन केरे पासे तेकतां ज़ोवं, “फिरी इन कुने ज़ैन पवित्रशास्त्रे मां लिखोरूए कि, ‘जै घोइ मिस्त्रेईं रद्दी कियो, तैए घोइ कूनेरो घोइ भोलो।’ 18 ज़ै मैनुह इस घोडे पुइ बिछडेलो त तैसेरे दुक्डे-दुक्डे भोइ गाले, ते ज़ैस उन्दो ए घोइ बिछडेलो तैस ए पितां छडेलो।” 19 शास्त्री लोकेईं ते प्रधान याजकेईं यीशु ट्लानेरी कोशिश की। किजोकि तैना बुडी जोरे थिये, कि तैनी ए मिसाल एन केरे बारे मां शुनेवरी थी, पन तैना लोकन करां डरते थिये। 20 तैना लोक यीशुए ट्लानेरो मौको तोपने लोरे थिये, तैनेईं विशवैसी केरे रूपे मां जासूस भेजे ताके तैसेरी कोई गल टलेइ सखन ते फिरी राजेरे अधिकारे मां देइ देन। 21 तैनेईं यीशु पुच्छू, “हे गुरु

अस ज्ञानतम कि तू सच्चो आस ते सच्चरी शिक्षा देतस, ते केन्चरी तरफदारी न केरस बल्के सच्चरे सेई परमेशरेरी बत्तरी शिक्षा देतस। 22 कुन असन महाराजे जो धडत देनी जेडुजे कि नेई?" 23 यीशुए तैन केरि चलाकी बुझतां तैन जो ज़ोवं। 24 "मीं अक दीनार हिराथ ते एस पुड केसरी शकल ते केसेरू नंवे?" तैनेई ज़ोवं, "महाराजेरी।" 25 यीशु तैन सेई ज़ोवं, "जैन महाराजेरू तैन महाराजे जो देथ, ते जैन परमेशरेरू ए, तैन परमेशरे जो देथ।" 26 ते तैना लोकां केरे सामने तैसेरी कोई गल न टलेइ सखे बल्के तैसेरे जुवाबे सेई तैना हेरान भोइतां चुप रेइजे। 27 फिरी सद्की जैन ज़ोते थिये कि मुवोरे ज़ीते न भोन ते फिरी किछ यीशु कां एइतां पुछ्णे लगे। 28 "हे गुरु असन जो मूसेरो हुकमे कि अगर केन्चरो ढूला अपनि कुआन्शारे भीते संते ओईट्ल मेरि गाए त तैसेरो ढूला तैस कुआन्शी सेई इला बनाए, ताके तै अपने ढूलाएरे लेइ औलाद पैदा केरे। 29 सत ढूला थिये पेइले इला बनाव ते ओईट्ले मेरि जेव। 30 फिरी होरे तैस सेई इला बनाव। 31 फिरी तैल्ला पत्ती टलेइयोवं तै कुआन्श रख्खी फिरी एन्चरे सेई सतेई जनेई इला बनाव, पन सब बेओलाद मेरि जे। 32 ते आखकार ते कुआन्श भी मेरि जेई। 33 ते ज़ीते भोने पुड तै केसरी कुआन्श भोली? किजोकि ते सत्ते ढूलां केरि कुआन्श बनोरी थी।" 34 यीशुए तैन सेई ज़ोवं, "इस दुनियारे लोकन मां त इला बनानेरो दस्तूरे (aiōn g165) 35 पन जैना लोक एजने बैली दुनियारे काबल भोले, ते जैना मुइदन मरां ज़ीते भोले तैना इला न बनाले। (aiōn g165) 36 तैना मरेले भी नन्ना एल्हेरेलेइ की तैना स्वर्गदूतां केरे जेरे भोले ते तैन जो ज़ीते भोनेरां ते परमेशरेरां मट्टां ज़ोले। 37 ते ज़ैडी तगर मुइदां केरो ज़ीते भोनेरी गल्ले, जेन्चरे मूसा नेबेरे ज़लते ड्रैल्लोवेरे बारे मां, तेन्चरे इशारो कियो किजोकि तै परमेशर अब्राहमेरो परमेशर, इसहाकेरो परमेशर ते याकूबेरो परमेशर ज़ोइतां फुकारतो थियो। 38 पन परमेशर मुइदां केरो नई बल्के ज़ीतां केरो परमेशरे। किजोकि तैसेरे नेडे सब ज़ीतेन।" 39 शास्त्री लोकन मरां किछेई जुवाब दित्तो, "हे गुरु तीं त बडू रोडू ज़ोवं।" 40 फिरी तैन मरां केन्ची हिम्मत न अई, कि एस होरू किछ पुछ्ण। 41 फिरी यीशुए तैन सेई ज़ोवं, "फिरि मसीह जो दाऊदेरू मट्टू केन्चरे सेई ज़ोतन? 42 किजोकि दाऊद त एप्पू भजना केरे किताबी मां ज़ोते, परमेशरे मेरे प्रभु सेई ज़ोवं, मेरे देइने पासे बिश। 43 कि ज़ां तगर अवं तेरे दुश्मन तेरे पावन हैठ न बिशेली। 44 दाऊद त तैस जो प्रभु ज़ोते, फिरी तैन तैसेरू मट्टू केन्चरे भोवो?" 45 ज़ैखन सब लोक शुनी राहोरे थिये ते यीशुए अपने चेलन सेई ज़ोवं। 46 "शास्त्री लोकन मरां हुशार रेइयथ तैना लम्मे-लम्मे कुरते लाने पसंद केरतन, ते होरू एन चातन कि लोक बज़ारन मां तैन जो नमस्कार ज़ोन, ते तैना प्रार्थना घरे मां उच्ची कुर्सी तोपतन ते धामन मां बडे खास बनू चातन। 47 तैना विधवां कुआन्शां केरां घरां लुटतन ते लोकन हिरानेरे लेइ बडी लम्मी प्रार्थना केरतन। तैन हछ्छी सज़ा मैलनीए।"

21 यीशु अमीर लोकां केरे पासे तकने लगे, ज़ैना-ज़ैना दान-पेट्टी मां दान लोरे थिये छुडने। 2 तैनी अक बडी गरीब विधवा कुआन्श लाई ज़ैसां दूई पेंइसे यानी अक धेलो चाढो। 3 तैखन यीशुए ज़ोवं, "अवं तुसन सेई सग्र ज़ोताई कि दान-पेट्टी मां दान देने बाहन मरां सेबहन करां जादे इस विधवा कुआन्शां दान दित्तू। 4 किजोकि तैनेई त अपनि दौलती मरां सिर्फ धगसेरे पेंइसे परमेशरे घरे मां दित्तोरेन पन इस कुआन्शां अपनि गरीब हालती सेई जैन किछ एसारे पल्ले थियुं सब किछ देइ छुडू।" 5 किछ लोक मन्दरे बारे मां ज़ोने लोरे थिये, कि बडे माघे घोडेई सेई ते दान कियोरी चीज़न सेई बनोरूए, त यीशुए ज़ोवं। 6 "तैना दिहाड़े एजने बालेन कि इन चीज़ां ज़ैना तुस इडी लहने लोरेथ इडी घोडे पुड घोड नई रानो जे बछोडे न गालो।" 7 तैनेई यीशुए पुछ्ण, "हे गुरु जी एन गल्लां केइस भोनिन? ते तैन केरो दुनियाई मां एजनेरो कुन निशान भोनीए।" 8 यीशुए तैन ज़ोवं, "खबरदार टेपलोईयथ नन्ना, किजोकि काई लोक मेरे नंवे सेई एजनेन ते तैनेई ज़ोनूए कि अवं मसीह आई, ते मौको भी नेडे पुजोरोए तुस तैन पत्ती न गेइयथ। 9 ते ज़ैखन तुस लडेइयरी त उलझनरी अफुवां शुनेले त डेरथ नन्ना, किजोकि एन गल्लां केरू पेइले भोनु ज़रूरीए, पन तेइसे खातमां नई भोनी।" 10 तैखन

यीशुए ज़ोवं, "किजोकि कौमी पुड कौम, ते राज्जे पुड राज़ चढहाई केरेलू। 11 ठारी-ठारी बडे-बडे भुंजल एजनेन ते काल पेनोए ते बिमारी फैलनिंए ते बुरी-बुरी गल्लां भोनिन ते अम्बरे मां आजीब निशान लेइहोनेन। 12 एन सब गल्लां भोने करां पेइले तुशे दुश्मन तुसन सिर्फ मेरे नव्वेरे वजाई सेई ढपेले ते तुसन सताले ते प्रार्थना घरेरी आदालती मां हाज़र केरेले ते कैद केरेले ते गवर्नरन ते कने राज़न कां पैश केरेले। 13 तैखन तुसन मेरी गवाही देनेरो रोडो मौको मैलेलो। 14 पन तुसन कोई ज़रूरत नई, कि पेइले फिक्क केरने लगथ कि अस कुन ज़ोमेले। 15 किजोकि अवं तुसन एरी ज़बान ते अक्ल देइलो, कि कोई भी मुखालफ तुशे सामने खड़ी न भोइ सकेलो ते न लोक तुशे खलाफ किछ ज़ोई सकेलो। 16 ते तुशे हाज बव ते ढूला ते रिशतेदार ते दोस्त तुसन सेई बैर केरेले ते तुसन मरां किछन मारेले भी। 17 ते मेरे नव्वेरे वजाई सेई सारे लोक तुसन सेई नफरत केरेले। 18 पन तुशे दोग्गोरो कोई बाल बांको न भोलो। 19 सब किछ झेलतां तुस अपनि जान बचेइ साखेलो।" 20 "जेइस तुस यरूशलेम नगर चेन्ने पासन फौवजेई सेई घेरेरू लाले, त बुझथ कि एस नाश भोनेरे दिहाड़े नेडे ओरेन। 21 तैस मौके ज़ैन यहूदिया मां भोले तैना पहाड़े पुड जो नेश्शी गान ते जैना यरूशलेम नगर मां भोले त तैन बेइरोवं निसन ते जोना इल्लोव्वन मां भोले त तैना नगर मांजो न गान। 22 किजोकि एन बदलेरे दिहाड़े भोले, एन मां तैन सग किछ ज़ैन पेइलू पवित्रशास्त्रे मां लिखोरूए तैन पूरू भोनूए। 23 तैन दिहाइन मां ज़ैना दोज्जाती त दुद्ध पिपाती कुआन्श भोली, तैन केरे लेइ अफ्रसोस! किजोकि धेरती पुड बडी मूसीबत एजनीए ते एस कौमी पुड बडी आफत एजनीए। 24 तैना सब तलवारी सेई मारे गाले ते गुलाम बेनतां सेबभी कौमन मां पुजोले ते गैर कौमां केरो मौको पूरो भोने तगर यरूशलेम नगर गैर कौमेई सेई पस्त भोतो रालू। 25 "दिहाड़े चेंदनीरे ते तारन मां निशान बांदि भोनेन ते धेरती पुड कौमन बडी तकलीफ पुजनिंए, किजोकि समुन्दरी लैहरां केरि शौरी सेई तैना डेरि गानेन। 26 डरें मारे एजने बैली मूसीबतरे इतज़ार केरते-केरते तैन केरे होश उडी गानेन, किजोकि अम्बरेरी सैरी शक्ति हिल्लेली। 27 तैखन लोक मैनेरू मट्टू बेइ शक्ति ते महिमा सेई बिदलारी मां एइतू लाले। 28 ज़ैखन एन गल्लां भोनी शुरू भोली त सिधे खडे भोइतां उबरू तेकथ, किजोकि तुशे छुटकारो भोने बालोए।" 29 फिरी यीशुए तैन अक मिसाल देइतां ज़ोवं, "तुस फ्रेगरे बुट ते होरि बुटन भी हेरतथ। 30 ज़ेरि तैस गुडी लेगनी शुरू भोइयन? त तुस हेरतां बुझतथ कि नेला ओरोए। 31 एसेरो जेरो, ज़ैखन तुस एन गल्लां, ज़ैना मीं ज़ोई, भोते हेरेले, त तुस बुझ्णी छुड्वा कि परमेशरेरू राज़ नेडे ओरूए। 32 अवं तुसन सेई सग्र ज़ोताई, कि ज़ां तगर एन गल्लां पूरी न भोन, एस कौमरो खातमां न भोलो। 33 धरती अम्बर टेली गालू पन मेरी गल्लां कथे न टेलेली। 34 "बस्सा खबरदार भोथ कोस्कोई एरू न भोए कि तुशे दिल नशे मां मसत भोइतां इस ज़िन्दगरे फिक्के सेई कमज़ोर भोए, ते तैस दिहाड़े तुशे लेइ अक मूसीबत बने। 35 किजोकि ते इस सैरी धेरती पुड जेन्ने लोकन तैन सेबहन पुड एन्चरे एजनीए। 36 बस्सा, हर वक्त तियार राथ ते प्रार्थना केरते राथ, ताके तुस एन गल्लन करां ज़ैना भोने बैलिन बेंचतां राथ, ते मैनेरे मट्टू कां खडे भोनेरे काबल भोथ।" 37 यीशु रोज़ मन्दरे मां शिक्षा देतो थियो, ते राती ज़ैतन पहाड़े पुड रातो थियो। 38 झेइतां सारे लोक यीशुएरी गल्लां शुन्नेरे लेइ मन्दरे मां तैस कां एइते थिये।

22 अखमीरी तिहाड़ी ज़ैस जो फ़सह ज़ोतन नेडे ओरी थी। 2 प्रधान याजक ते शास्त्री मौको तोपने लोरे थिये कि यीशु केन्चरे मारम। किजोकि तैना लोकन करां डरते थिये। 3 ते शैतान यहूदा मां बेस्सी जेव तैस जो इस्करियोती भी ज़ोते थिये, ते तै यीशुएरे 12 चेलन मां गनो गातो थियो। 4 दे तै प्रधान याजकन ते प्रार्थना घरेरे किछ खास पुछ्णे गन्ने लोकन कां जेव ते तैन सेई मुशोरो केरने लगे कि केन्चरे सेई यीशु तैन केरे हवाले केरी बटते। 5 तैना बडे खुशी भोए ते तैस पेंइसे देनेरो वादो कियो। 6 तैनी तैन केरि गल मन्नी ते मौको तोपने लगे, कि यीशु केन्चरे सेई तैन केरे हवाले केरे ते केन्ची पतो न लगे। 7 अखमीरी रोटरू तिहार नेडे ओरू थियू,

जैस फ्रसह तिहारे मां गबड़ेरु बलिदान देनू जरूरी थियूं। 8 यीशुए पतरस ते यूहन्ना एन जोइतां भेजे, “फिकि गाथ ते इश्शे लेइ फ्रसह तिहारेरी रोटी तियार केरा।” 9 चेलेई पुच्छू, “कि तू कोडि चातस कि अस तीजो फ्रसह तिहारेरी रोटी तियार केरम?” 10 यीशुए तैन जुवाब दित्तो, “नगर मां गाते तुसन अक मैहू मैलनोए जै पैनेरो घडो घिन्तां चलोरो भोनोए, तैस पत्ती गेइयथ ते जैस घरे मां तै गालो तुस भी गेइयथ। 11 तैसेरे मालिके सेइं जोइयथ कि गुरे जोरूए कि द्लाहना केरि ठार कोडि आए, जैडी अवं अपने चलन सेइं साथी फ्रसह तिहारेरी रोटी खेइ सेखी? 12 तै तुसन दोपरे नेइतां अक बड्डो कमरो हिरालो जै खूब रोइवारे सजैवरो भोनोए तैडी इश्शे लेइ तियारी केरथ।” 13 तेनेई तैडी गेइतां सब किछ तेरहु लाव जेरू तैनी ज़ोरू थियूं, ते तैडी फ्रसह तिहारेरी रोटी तियार की। 14 जैखन रोटी खानेरो मौको अव त यीशु अपने प्रेरितन सेइं साथी बिश्शारे थिये। 15 ते यीशुए तैन सेइं ज़ोवं, “मेरी ए बडी इच्छा थी, कि अपनो दुःख झल्लने (मरने) करां पेइले एक्की बार फ्रसह तिहारेरी रोटी तुसन सेइं साथी खेइ। 16 किजोकि अवं तुसन सेइं जोताई, कि अजेरां पत्ती तांतगर न किछ खेइ सेखी, जां तगर परमेशरेरे राज़ेरू कम पूरू न भोए।” 17 फिरी यीशुए दाखे रसेरो कटोरो द्लातो ते परमेशरेरु शुरु केरतां चलन दिताते ते ज़ोवं, “यांथ ते एप्पू मांमेइं बंटा। 18 किजोकि अवं तुसन सेइं जोताई कि अजेरां पत्ती दाखारो ए रस फिरी तांतगर न पीलो जां तगर परमेशरेरु राज न एज्जे।” 19 फिरी यीशुए रोटी द्लाती ते परमेशरेरु शुरु केरतां दलोडी ते तैसेरे दुकड़े बनेइतां अपने चलन एन जोइतां दित्ती, “कि ई मेरी जाने जै तुशे लेइ अवं देताई ते तुस भी मेरी यादगैरी मां एन्ने केरते रेइयथ।” 20 एन्चरे रोटी खानेरे बाद तैनी कटोरो द्लातो ते चलन कां दित्तो ते ज़ोवं, “कि ई कटोरो मेरो तैस खूनेरो नंव्यो करारे जै तुशे लेइ दित्तोरोए। 21 पन हेरा मीं दलुवाने बालो मीं सेइं साथी खाने लोरोए। 22 किजोकि मैनेरू मट्टू त हुनी चलोरोस जेन्चरे कि तैसेरेलेइ पेइले एन पक्कू भोरूए पन तैस मैहू पुइ अफ्रसोस जेसेरे हथेई तै गिरफ्तार भोए।” 23 एन शुन्तां तैना एप्पू मांमेइं पुच्छने लगे, “असन मां एरो जेरो कौने जै एन कम केरेलो?” 24 तेन एस गल्ली पुइ एप्पू मांमेइं बेंस भोइ कि असन मां बड्डो कौने? 25 यीशु तैन सेइं ज़ोवं, “गैर कौमन पुइ तैन केरे राजे राज केरतन, ते जैन केरो तैन पुइ अधिकारे भोते तैन जो भलाई केरनेबाले ज़ोतन। 26 पन तुसन मां एरू लोइे भोवरू, तुसन मां जै बड्डोए तै निकड़ेरे बराबर बने ते जै खास आए तै सेवकेरे बराबर बने। 27 किजोकि बड्डो कौने? जै तैस कां साथी बिशोरोए या ते जै तैसेरो चेलोए? कुन तै तैस कां नई बिशोरो? पन आवं त तुसन मां अक सेवकेरे बराबर आई। 28 पन तुस तैना आथ जैना मेरी अज़मैइशरे मौके बराबर मीं सेइं साथी रातथ। 29 जेन्चरे बाजी मीं अक राज दित्तोरूए अवं भी तुसन अक राज देताई। 30 ताके तुस मेरे राज़े मां मीं सेइं साथी बिश्तां खाथ पीथ, बल्के बडे-बडे शाही तखतन पुइ बिश्तां इसाएलेरे 12 गोत्रां केरो इन्साफ केरेले।” 31 “शमौन, शमौन, खबरदार रा, शेताने परमेशरे करां अजाज़त मगोरीए कि तुसन सेबहन परखे, कि रोडे बुरे करां अलग केरे जेन्चरे ज़मीनदार गेहुन करां झाझ अलग केरते। 32 पन मीं तेरे लेइ प्रार्थना की, कि तू मीं पुइ विश्वास केरनो न शारस, जैखन तू मन फिरास त अपने विश्वासी दलान मज़बूत केरां।” 33 पतरसे यीशु सेइं ज़ोवं, “हे परमेशर तीं सेइं अवं कैद भोने बल्के मरनेरे लेइ भी तियार आई।” 34 पन यीशुए ज़ोवं, “हे पतरस अवं तीं सेइं जोताई कि अज़ कुकड़े बांग देने करां पेइले तू मेरो द्लाई बार इन्कार केरेलो कि अवं एस न जैनी।” 35 यीशुए तैन सेइं ज़ोवं, “कि जेइस मीं तुस खुशखबरी शुनाने, बगैर बेटवे, बूटां ते झोलेरे बगैर भेजोरे थिये त तुस केन्ची चीज़ारे घटी भोइ?” तैनेई ज़ोवं, “केन्ची चीज़री नई।” 36 यीशु तैन सेइं ज़ोवं, “पन हुनी जैस कां बेवो भोए ते साथी रखे ते एन्चरे झोलो भी ते जैस कां तलवार न भोए तै अपनू कोट बेघतां भी तलवार घिन्ने। 37 अवं तुसन सेइं जोताई कि ई गल्ले जै पवित्रशास्त्रे मां लिखोरीए, कि तै पूरी भोए। तै बुरे लोकन सेइं साथी गनो जेव। एल्हेरेलेइ मेरे बारे मां लिखोरी गल्लां पूरी भोने लोरिन।” 38 तैनेई ज़ोवं, “हे प्रभु हेर इडी दूई तलवारन।” तैनी तैन सेइं ज़ोवं “बेडि आन।” 39 फिरी तै बेइर निस्सो ते

जेन्चरे तैसेरो दस्तूर थियो, तै ज़ैतून पहाड़े पुइ जो चलो जेव ते तैसेरे चेले भी तैस सेइं साथी चले जे। 40 तैस ठैरी पुजतां तैनी तैन सेइं ज़ोवं, “प्रार्थना केरा ताके तुस अज़मैइशी मां न पेथ।” 41 यीशुए तैन करां थोडे ज़ेरे अगार गेइतां ज़ैधू केरे भारे बिश्तां प्रार्थना केरने लगे। 42 “हे बाजी अगार तेरी मर्जी भोए त ई दुखेरो कटोरो मीं करां दूर केर, पन फिरी भी मेरी मर्जी पूरी न भोए बल्के तेरी मर्जी पूरी भोए।” 43 तैखन तैनी अम्बरेरां अक स्वर्गदूत लाव जै तैस शक्ति देतो थियो। 44 ते तै परेशान भोइतां होरि जादे दिले सेइं प्रार्थना केरने लगे ते तैसेरो पिस्सीनो बुझा कि खूनेरे बडे-बडे तेप्पु तल्ले झड़ते थिये। 45 प्रार्थना केरनेरे बाद यीशु अपने चलन कां वापस अव ते तैना गम्मेरे मारे झुलोरे मैल्ले। 46 यीशुए तैन सेइं ज़ोवं, “तुस किजो झुल्लोरेथ उठा ते प्रार्थना केरा ताके अज़मैइशी मां न राथ।” 47 हेजू यीशुए गल ज़ोने लोरो थियो, त मैहू केरो अक जथो तैडी पुजो ते बारहन मरां अक जेसेरू नवं यहूदा थियूं, तैन सेइं अग्री-अग्री थियो, ते तै यीशु फुम्मडी देने अगार अव। 48 पन यीशुए तैस सेइं ज़ोवं, “यहूदा कुन तू एक्की फुम्मडी सेइं मीं मैनेरे मट्टे दलुवातस?” 49 जैखन यीशुएरे सैथेई एन सब हेरू त तैनेई ज़ोवं, “हे प्रभु कुन अस तलवार चलामा?” 50 ते तैन मरां एक्के महायाजकेरे नौकरे पुइ तलवारां चलाई ते तैसेरो तैनी कन्न उड़ाव। 51 पन यीशुए जुवाब दित्तो, “बस्सा बडू भोइ जेवं।” ते यीशुए तैसेरो कन्न तेरने हथ लेइतां बझाव। 52 तैखन यीशुए प्रधान याजकन ते मन्दरेरे सिपाही ते बुजुर्ग जैन तैस गिरफ्तार केरने ओरे थिये तैन जो ज़ोवं, “तुस कुन तलवारां ते डंडे घिन्तां मीं डैकू बुझतां दलाने ओरेथ? 53 जेइस अवं तुसन सेइं साथी मन्दरे मां भोतो थियो, त तुसेई मीं सेइं हथ न लाव, पन ई त तुशे आंधरेरे मौकेरो अधिकारे।” 54 जैखन तेनेई यीशु द्लातो तैस तैट्ठां नेइतां महायाजकेरे घरे नीयो, पतरस भी पत्तपति बल्हे-बल्हे तैरां जेव। 55 तैनेई अंगने मां अग बालोरी थी ते सब बिश्तां अग अपने लोरे थिये ते पतरस भी तैन मां थियो। 56 ते अक कुआन्था अग्री कां बिशोरी तकने लोरी थी ते पतरसेरां तेकतां ज़ोने लगी, “कि ई मैहू भी तैस सेइं साथी थियो।” 57 पन पतरसे इन्कार केरतां ज़ोवं, “हे कुआन्था अवं एस न जैनी ए कौने।” 58 थोडी सैइत्रां पत्ती होरे एक्के पतरसेरां तेकतां ज़ोवं, “तू भी तैना केरो साथिस।” पन पतरसे ज़ोवं, “नई अवं नई।” 59 कोई एक्की घंटेरे बाद केन्चे होरे बडे याकीने सेइं ज़ोवं, “ई मैहू पक्को तैस सेइं साथी थियो, किजोकि ए भी गलीली आए।” 60 पन पतरसे इन्कार केरतां ज़ोवं, “अवं एस न जैनी तू कुन ज़ोतस?” हेजू पतरसे ए गल ज़ोने लोरो थियो, त कुकड़े बांग दित्ती। 61 ते प्रभुए फिरतां पतरसेरे पासे तककू ते पतरसे परमेशरेरी तै गल याद आई, जै तैनी पतरसे सेइं ज़ोरी थी, “कि अज़ कुकड़े बांग देने करां पेइले तू मेरो द्लाई बार इन्कार केरेलो।” 62 ते पतरस बेइर गेइतां ज़ोरे-ज़ोरे लेरां देने लगे। 63 जैने मैनेई यीशु अपने कब्जे मां कियोरो थियो, तैना तैसेरी हासी बनाते थिये ते कने तैस बाते थिये। 64 तैना यीशुएरी एछछन पुइ पटी बेन्धतां बाते थिये ते पुछते थिये, “भविविधवाणी केर ते जो केनि बाहोरिए?” 65 ते तैनेई एन्चरे होरि भी बेडि गल्लां जोई ते तैसेरी तुहीन की। 66 झोझां बुजुर्ग लोक ते प्रधान याजक ते शास्त्री लोकेई यीशु अपने महासभाई मां आनो, 67 ते ज़ोने लगे, “अगर तू मसीह आस त जो।” यीशुए तैन सेइं ज़ोवं, “अगर अवं तुसन ज़ोई भी त तुस मेरू याकीन न केरेले। 68 ते अगार अवं तुसन पुछी त तुस जुवावे न देले। 69 पन अजेरां बाद मैनेरू मट्टू परमेशरेरे देइने पासे बिशोरू लाएले।” 70 एस गल्ली पुइ तैना सब ज़ोने लगे, “तू परमेशरेरू मट्टू आस?” यीशुए जुवाब दित्तो, “तुस एप्पू मींजो ज़ोतथ कि तू आस?” 71 तैनेई ज़ोवं, “हुनी असन होरि शाहादातां केरि कुन जरूरीए? किजोकि असेई एसेरी ज़बान शुनेरूए।”

23 तैखन तैना सब तैट्ठां उठे ते यीशुए पिलातुसे कां घिन्तां जे। 2 ते तैस जो एन जोइतां ए इलज़ाम लाने लगे, “कि ए इश्शे लोकन भडकाते ते महाराजे जो थडत देनेरे लेइ ठाकते, ते अपने आपे जो मसीह राजो ज़ोते।” 3 तैखन पिलातुसे यीशुए पुच्छू, “तू यहूदी केरो राजोस?” यीशु तैस जुवाब दित्तो, “तू एप्पू ज़ोतस।” 4 पिलातुसे प्रधान याजकन ते लोकन सेइं ज़ोवं,

“कि अव एस मैन्हु मां कोई कसूर न लेई।” 5 पन तैना बड़े घमण्डे सेईं ज़ोने लगे, “ए यहूदियारे इलाके करं गलील इलाके तगर बल्के इडी तगर लोकन अपनि शिक्षाई सेईं भड़काते।” 6 ज़ैखन पिलातुसे एन शुनू त तैनी पुच्छू, “कुन ए मैन्हु भी गलील इलाकेरो आए।” 7 ते ज़ेरो तैस पत्तो लगे, कि ए हेरोदेसेरे इलाकेरो रानेबालोए, त पिलातुसे तै हेरोदेस कांजो भेजो। किजोकि तैस वक्ते मां तै एप्पू भी यरूशलेम नगरे मां थियो। 8 ज़ैखन हेरोदेसे यीशु लाव त बडो खुशी भोव। किजोकि तैस चरोकनी देंती यीशु हेरनेरी इच्छा थी। तैनी तैसेरे बारे मां बेडि गल्लां शुनोरी थी, ते तैस बडी उमीद थी, कि यीशुएरो कोई चमत्कार हेरे। 9 तैनी यीशुए बडू किछ पुच्छू, पन यीशुए तैस कोई ज़ुबाब न दित्तो। 10 पन याजक ते प्रधान याजक ते कने शास्त्री लोक बडे ज़ोरे शोरे सेईं यीशु पुड़ इलज़ाम लाने लगे। 11 तैखन हेरोदेस भी अपने सैथन सेईं मिलतां यीशुएरी तुहनी की, ते तैसेरी हासी बनाई फिरी तैस अक चमकतो कुरतो लुवेइतां पिलातुसे कां वापस भेजो। 12 पेइले पिलातुस ते हेरोदेस दुश्मन थिये, तैस दिहाड़े तैना दोस्त बेनि जे। 13 तैखन पिलातुसे प्रधान याजक ते सरदार ते होरे लोक अकोट्टे कियो। 14 “ते पिलातुसे तैस सेईं ज़ोवं तुसेईं ए मैन्हु मीं कां एन ज़ोतो आनोरोए कि, ए लोकन भड़कावे ते मिमी एसेरी पुछ गन की, पन ज़ैस जुमैरी दोष तुस एस पुड़ लातथ, अव एल्हेरो एसमां कोई कसूर न लेई। 15 ते न हेरोदेस ज़ैनी ए असन कां भेजोरोए तैस भी कोई दोष न मैल्लो, ते असन कां एरू कोई सबूत बरॉमद न भोवं, ज़ैस सेईं ए कल्ल कियो गए। 16 तैल्हेरेलेइ अव एस कोडेईं बाएतां छैडी देताई।” 17 पिलातुस यहूदी केरे फ़सह तिहाररे मौके पुड़ अक कैदी हथरां छुटतो थियो। 18 तैना सारे लोक चिन्डां लगे मारने, “कि एस मैन्हु सज़ा देथ ते बरअब्बा इशशे लेइ हथरां छुट्टा।” 19 बरअब्बा नगर मां गड़बडी केरनेरे ते कतलेरे बारे मां पाबंद भोरो थियो। 20 पिलातुसे यीशु हथरां छुटनेरे इरादे सेईं लोकन दुबारू पुच्छू। 21 पन तैना लोक मना चिन्डां लगे मारने, “कि तू एस क्रूसे पुड़ च़ाढ एस क्रूस पुड़ च़ाढ।” 22 तैखन पिलातुसे तैन टलेइयोवं फेरे फिरी ज़ोवं, “किजो आख एनी कुन जुर्म कियोरोए? हेरा एसमां एरू कोई सबूत बरॉमद न भोवं, कि ए मौतरे सज़ारो हकदार भोए, तैल्हेरेलेइ अव एस कुटेइतां छैडी देताई।” 23 पन तैना चिन्डां मैरी-मैरी ज़ोने लगे, ए क्रूसे पुड़ च़ाढोरो लोइते, ते तैन केरि चिन्डां मारनेरी उमीद पूरी भोइ। 24 बरस्सा, पिलातुसे ज़ोवं कि तैन केरे मेरज़ेरे मुताबिक कियूँ गए। 25 ते ज़ै मैन्हु हुकुमतेरे खलाफ ते खूनेरे जुर्म मां कैद थियो, ते ज़ैस हथरां छुटनेरे लेइ तैनेईं दरखुवास कियोरी थी, ते हथरां छुट्टो पन यीशु तैन केरि मेरज़ी सेईं सिपाही केरे हवाले कियो। 26 ज़ैखन तैना यीशु नेइतां च़लारे थियो, ते तैनेईं शमोन कुरेनी ज़ै एक्की इलोवंरां ओरो थियो, ट़लातां ते क्रूस तैस कां छूने जो दित्तू, कि तू ई क्रूसे छुइतां यीशु पत्ती च़ला। 27 ते बडे लोक तैस पत्ती च़लारे थिये ते किछ कुआन्शां भी थी ज़ैना यीशुएरे लेइ शोग बनैती थी। 28 यीशुए तैन केरे पासे मुइतां ज़ोवं, “हे यरूशलेम नगरेरी कुइयाव मेरे लेइ लेरां न देथ, बल्के अपने बच्चां केरे लेइ लेरां देथ। 29 किजोकि तैना मुशकिल दिहाड़े एजने बालेन ज़ैखन लोक एन जोले कि, ‘धन आन तैना कुआन्शां ज़ैना बेओलादन ते बच्चे न पाले।’” 30 “तैस वक्ते लोक पहाडन सेईं ज़ोले, ‘असन उन्डे बिछड़ा ते उच्ची ठारन जो ज़ोले, कि असन छुपाथा।’ 31 किजोकि ज़ैखन तैनेईं सबज़ बुट्टे सेईं एन केरू, त शुक्कोरे बुट्टे सेईं कुन न केरेले?” 32 ते सिपाहेईं दूई होरे मुर्जम भी यीशु सेईं साथी च़लवरे थिये ताके तैन भी मारन। 33 ज़ैखन तैना तैस ठैरी पुजे ज़ैस जो “खोपडी” ज़ोतन त तैडी यीशु क्रूसे पुड़ च़ाढो, ते तैना दूई मुर्जमन भी एक्की यीशुएरे देइने पासे ते होरि बांए पासे क्रूसे पुड़ च़ाढे। 34 यीशु ज़ोवं, “हे बाजी एन माफ़ करां एन न ज़ाननू कि एन कुन लोरेम केरने।” ते तैनेईं तैसेरे लिगडां केरे लेइ पेरची छेइतां शर्त रखवू ते एप्पू मांमेईं बंटां। 35 लोक खडखडे एन सब किछ हेरने लोरे थिये ते सरदार ज़ोरे-जोरे सेईं ज़ोते थिये, “एनी होरे त बचाए ते अगर ए मसीहे ते परमेशेरो चुनोरे त अपने आपे किजो न बचाए।” 36 सिपाही भी तैस कां एइतां तैसेरी हासी बनाने लगे (किजोकि तै अपनो आप राज़ो बनातो थियो), ते घटया दाहरो रस पीनेरे

लेइ तैस देने लगे। 37 “ते ज़ोते थिये तू अगर यहूदी केरो राज़ोस त अपनो आप बचा।” 38 ते तैस क्रूसे पुड़ यानी यीशुएरे दोगे करं बहा अक पखडी लिखतां लेवरी थी, ते तैस पुड़ एन लिखे थियूँ, “ए यहूदी केरो राज आए।” 39 तैन दूई डैकू ज़ैना मारे जे तैन मरां एक्के यीशु जो तुहनी केरतां ज़ोवं, “अगर तू मसीह आस त एप्पू भी बंच ते असन भी बचा।” 40 पन होरे दुइयोवं डैके तैस जो झिइकतां ज़ोवं, “तीं परमेशेरो भी डर नई? ज़ै सज़ा तैस मैलने लावरी तीं भी त तैए सज़ा मैलने लोरीए। 41 असन त इन्साफेरे मुताबिक अपने बुरे कम्मां केरि सज़ा मैलने लोरी पन एनी त कोई गलत कम नई कियेरू।” 42 तैखन तैनी ज़ोवं, “हे यीशु ज़ैखन तू अपने राज़े मां एज्जेलो त मीं भी याद केरां।” 43 यीशुए तैस जो ज़ोवं, “अवं तीं सेईं सच ज़ोताई कि तू अजे मीं सेईं साथी स्वर्ग मां भोलो।” 44 दीसारे 12 बजेईं सारे मुखे मां आंधरू भोवं, त टलेइ बज़न तगर रावं। 45 दिहाडो भी कालो भोव ते मन्देरो पड़दो बां देंता बुन तगर फेटतां दूई टुकडे भोइ जे। 46 यीशुए बडे ज़ोरे सेईं ज़ोवं, “हे बाजी अव अपनि आत्मा तेरे हथ्ये मां सोंफताई,” ते एन ज़ोइतां यीशुए प्राण दित्ते। 47 ज़ैखन रोमी सुबेदारे एन सब हेरू त परमेशेरी तारीफ़ केरते ज़ोवं, “ए मैन्हु सज़े धर्मा थियो।” 48 ते सारे लोक ज़ैना तैडी थिये ए अनर्थ हेरतां छाती पिट्टे च़ले जे। 49 पन यीशुएरे सारे दोस्त ते तैना कुआन्शां ज़ैना गलील इलाके मरां यीशुए पत्पती ओरी थी दूर ज़ेरे खेडोइतां, ज़ैन किछ भोइ रावरू थियूँ सब किछ हेरी रेवरी थी। 50 अक मैन्हु थियो, जेसेरू नवं यूसुफ थियूँ, तै यहूदी केरि आदालतरो अक मुलाज़म भी थियो, ते अक बडो नेक ते धर्मी मैन्हु थियो। 51 ते बेट्टी आदालत अफसरां केरे फैसलेरे हके मां न थियो। तै यहूदी केरे नगर अरिमतियाह रानेबालो थियो, ते परमेशेरे राज़ेरे तलाशी मां थियो। 52 तैनी पिलातुसे कां गेइतां यीशुएरी लाश मगी। 53 ते लाश क्रूसे पुडेरां ओसेलतां मलमलेरे कपडे मां पलेइतां ते एक्की कब्री मां रखवी, ज़ै एक्की शफ़डी मां बनेवरी थी, तैस कब्री मां पेइले कोई लाश न थी रखोरि। 54 ते तियेरी दिहाडी थी ज़ै आरामेरी दिहाडी शुरू भोने बाली थी। 55 ते तैना दूई कुआन्शां ज़ैना गलील इलाके मरां यीशुए पत्पती ओरी थी, यूसुफे पत्पती जेईं ते तैनेईं ते कब्र हेरी, कि यीशुएरी लाश एसमां केन्चरे सेईं रखोरि। 56 तैखन तैना अपने घरे वापस आए, ते खुशबूदार चीज़ां ते इत्र तियार कियो ते आरामेरे दिहाड़े मूसेरे कानूनेरे मुताबिक आराम कियो।

24 हफतेरी पेइले दिहैडी झेइयां किछ कुआन्शां खुशबूदार चीज़ां नेइतां जेईं, ज़ैना तैनेईं तियार कियोरी थी ते एन्तां कब्री कां पुजी। 2 पन तैनेईं ते घोइ कब्री करां बिछड़ोरो लाव। 3 ज़ैखन तैना अन्तर जेईं त तैन यीशुएरी लाश न मैल्ली। 4 तैखन तैना एन हेरतां परेशान भोइ त दूई मैन्हु ज़ैन छित्तां लिगडां लेगोरां थियां, तैन कुआन्शन कां एइतां खेडोए। 5 तैना कुआन्शां डेरि जेईं ते तैना ज़मीनेरे पासे तकने लगगी। तैन मैनेईं तैन जो ज़ोवं, “तुस ज़ीते, मुइदन मां किजो लोरिथ तोपने। 6 ते इडी नई बल्के ज़ीतो भोरुए तुसन याद नई कि जेइस तै गलीले मां थियो, त तैनी तुसन ज़ोरू थियूँ कि, 7 मैनेरू मट्टू यानी अव पापी लोकां केरे हथ्ये देनोए ते क्रूसे पुड़ च़ाढनेईं ते फिरी टलेइ दिहाडां बाद फिरी ज़ीतो भोनेई।” 8 तैखन तैना यीशुएरी गल्लां याद एईं। 9 तैखन तैना कब्री करां च़ेत्ति जेईं, त तैनेईं यीशुएरे 11 चेलन ते बाकी होरि चेलन भी एस गल्लरो पतो दित्तो। 10 जैनेईं प्रेरितन सेईं गल्लां की, मरियम मगदलीनी योअन्ना ते याकूबेरी अम्मा मरियम ते तैस सेईं साथी होरि भी काई कुआन्शां थी। 11 पन तैन, तैन केरि गल्लां कहानी लगगी, ते तैनेईं तैन केरू याकीन न कियूँ। 12 पन पतरस उठो ते तै कब्रेरे पासे दौवइतो तैस ठैरी कां जेव, ते तैडी तैनी लिक्तां अन्तर तक्कू ते सिर्फ़ कफन तैडी लाव, ते एस गल्ली पुड़ हेरान भोइतां तैतां च़लो जेव। 13 फिरी एरू भोवं कि तैन मरां दूई चेले तैस दिहैडी एक्की इलोव्वेरे पासे च़लारे थिये, तैस इलोव्वेरू नवं इम्माऊस थियूँ, तैन यरूशलेम नगरेरां 11 किलोमीटर दूर थियूँ। 14 तैना एप्पू मांमेईं एस्से बारे मां गल्लां केरते च़लारे थिये ज़ै बितना बीतोरी थी। 15 ज़ैखन तैना गल्लन मां मसत थिये, ते एप्पू मांमेईं

गलबात लोरे थिये केरने त यीशु एप्पू तैन कां नेडे एइतां तैन सेइं साथी-साथी चलने लगो। 16 पन तैनेई यीशु न पिशानो किजोकि परमेशरे तेना पिशान्ने करां रोकोरे थिये। 17 यीशुए तैन जो ज़ोवं, “तुस लोक एप्पू मामेई कुन गल्लां केरने लोरेथ?” तैना रुकी जे, ते तैन केरू तुतर उदास लेइहोने लगू। 18 तैखन तै ज़ेसेरू नवं किलयुपास थियू, तैस सेइं ज़ोने लगो, “यरूशलेम नगरे मां सिर्फ तू अक मैन्हु आस ज़ैस पतो नई कि, आखरी दिहाइन मां कुन-कुन भोने लोरूए।” 19 यीशुए ज़ोवं, “कुन लोरूए भोने?” तैनेई तैस सेइं ज़ोवं, “नासरत नगरेरो यीशु, ज़ै नबी थियो, तै परमेशररे ते मैन्हु केरे सामने कम्मन मां ते शिक्षा देने मां बेडि शक्ति बालो थियो। 20 तै प्रधान याजकेई ते हाकिमेई केन्चरे सेइं रोमी गवर्नर हवाले कियो ते तैस जो कतलेरे हुकम देइतां तै क्रूस पुड़ च़ाढ़ो। 21 पन असन त उमीद थी कि ए मैनुए, ज़ै इस्राएली लोकन रोमेरे राज़े करां आज़ाद केरेलो, एन गल्लन अज़ टलेइयोवं दिहाडीए। 22 हुन्ना असन मरां किछ कुआन्शां अज़ झेइं कब्री कां जोरी थी, तैन केरे ज़ोने सेइं असां हैरान भोए। 23 ज़ैखन तैन लाश न मैल्ली त तैना एन ज़ोती एई, असेई स्वर्गदूत लाए ते तैनेई ज़ोवं, कि यीशु ज़ीतो भोरोए। 24 तैखन किछ इशेशे साथी भी कब्री कां जे, ते ज़ेन्चरे कुआन्शोई ज़ोरू थियू, तेरहु लाव पन यीशु न लाव।” 25 यीशु तैन दूरई चेलन सेइं ज़ोवं, “हे बेअवल लोकव! तुशे लेइ पवित्रशास्त्र मां नेबी केरि ज़ोरी गल्लन पुड़ भी विश्वास केरनो केत्रो मुशकले। 26 कुन मसीहरे लेइ ज़रूरी न थियू, कि दुःख झल्लले ते फिरी अपनि महिमा मां दाखल भोए?” 27 यीशु अपने बारे मां तैना सैरी गल्लां समझेइ, ज़ैना पवित्रशास्त्रे मां मूसा करां देते सारे नेबेई ज़ोरिन। 28 एत्रे मां तैना तैस डुलव्वे नेडे पुजे ज़ेडी तैनेई गानू थियू, तैनेई बुझू कि यीशु अग्रोवं गानूए। 29 पन तैनेई एन ज़ोइतां मजबूर कियो, “कि असन कां बिश किजोकि दिहाडी डुबोरीए आंधरू भोने बालूए।” बस्सा तै बिशनेरे लेइ तैन सेइं साथी अन्तर च़लो जेव। 30 ज़ैखन तै तैन सेइं साथी रोटी खाने बिशशो त तैनी रोटी टूलाती ते बरकत देइतां टूलोडी ते तैन देने लगो। 31 तैखन तैन केरि एछछी खुल्ली ते तैनेई तै पिशानो, पन तै तैन करां आलोप भोइ जेव। 32 तैना एप्पू मामेई ज़ोने लगो, “ज़ैखन तै बत्तां असन सेइं साथी गल्लां लोरो थियो केरने, ते असन पवित्रशास्त्रेरो मतलब मसमझातो थियो, त असन केरी उमीद भोरी थी।” 33 तैना तैखने तेइं उठे ते यरूशलेम नगरे मां आए ज़ेडी तैना यारहे चले ते होरे तैन केरे साथी एक्की ठैरी मैल्ले। 34 तैना ज़ोने लोरे थिये, “कि प्रभु सच्चे ज़ीतो भोरोए ते शमीन पतरसे लाहोरोए।” 35 तैनेई बत्तरी सैरी गल्लां शुनेई ते फिरी केन्चरे असेई यीशु रोटी टूलोइते बार पिशानो। 36 तैना गल्लां केरने लोरे थिये त यीशु तैन केरे मझाटे खडो भोइतां ज़ोने लगो, “तुसन शान्ति मैल्ले।” 37 पन तैना एत्रे डेरि जे, कि तैना समझने लगे कि असां आत्मा लहने लोरेम। 38 यीशुए तैन सेइं ज़ोवं, “तुस किजो डरेंथ ते तुशे मने मां शक किजो भोतीए। 39 मेरे हथ पाव हेरा अवं तैए आई, मीं हथ लेइतां हेरा, किजोकि आत्माई हट्टी त कने मास न भोए जेरू तुस मीं मां लातथ।” 40 एन ज़ोनेरे पत्ती तैनी अपने हथ पाव हिराए। 41 पन खुशी सेइं तैन याकीन न भोवं, कि यीशु ज़ीतोए, ते तैना हैरान भोए, यीशुए तैन सेइं ज़ोवं, “तुसन कां खाने जो किछ आए?” 42 तैनेई तैस टूलाडोरी मेछलरो अक टुकडो दित्तो। 43 तैनी टूलाती ते तैन केरे सामने खाइ। 44 तैनी तैन सेइं ज़ोवं, “ज़ैखन अवं तुसन सेइं साथी थियो, त मीं तुसन एना गल्लां ज़ोरी थी, कि मूसरे कानूने मां ते नेबी केरि किताबन मां ते भजना केरि किताबी मां मेरे बारे मां ज़ैन किछ लिखोरूए तैन पूरू भोनु ज़रूरीए।” 45 तैखन तैनी तैन केरि मद्दत की, ताके पवित्रशास्त्रे सेमझी सखन। 46 ते तैन सेइं ज़ोवं, “एन पवित्रशास्त्र मां लिखोरूए कि मसीह दुःख झल्लेलो ते टलेइयोवं दिहाडे मुड़न मरां ज़ीतो भोलो। 47 ते तैसेरे नव्वे सेइं यरूशलेम नगरेरां शुरु केरतां सैरी कौमन मां पापन करां मनफिरानेरे मैफारो प्रचार कियो गालो। 48 किजोकि तुस एना सैरी गल्लां केरे गवाहथ। 49 हेरा, अवं एप्पू तुसन पवित्र आत्मा देइलो, ज़ेसेरो वादो बाजी परमेशरे कियोरोए। पन ज़ां तगर स्वर्गें शक्ति न मैल्ले तांतगर इस नगर मां राथ।” 50 फिरी यीशुए तैना नगरेरे बेइर बैतनिय्याह डूलोव्वेरे नेडे ने। ते अपनो हथ

खडो केरतां तैन बरकत दित्ती। 51 ज़ैखन तै तैन बरकत देने लोरो थियो, त तैन करां अलग भोइ जेव ते परमेशरे तै स्वर्गें जो नीयो। 52 चेलेई तैसेरी आराधना की ते फिरी खुशी सेइं यरूशलेम नगरे जो वापस च़ले जे। 53 ते तैना हर वक्त मन्दरे मां एइतां परमेशरेरी तारीफ़ केरते थिये।

यूहन्ना

1 (दुनियाये रचनेरे पेड़लो) शुरुआती मां वचन थियूं। तैन वचन परमेशरे सेइं साथी थियूं। तैन वचन परमेशर थियूं। 2 शुरुआती मां परमेशरे सेइं साथी तैन वचने थियूं। 3 सब किछ वचनेरे जिरिये बनाव जेव। त जैन किछ बनाव जेवं, तेस मरां कोई भी चीज तैसेरे बागेर न बनाई जेई। 4 तैस (वचने) मां जिन्दगी थी; ते ते जिन्दगी सारे मैनू लो देचे। 5 त ते लो आंधरे मां (हमेशा) चमकचे, त आंधरू लोई कधी कैबू न केरि सके। 6 परमेशरेरी तरफां अक मैनु भेजो जेव, जेसेरू नवं यूहन्ना थियूं। 7 ते तैस लोअरे बारे मां जोने ओरो थियो, ताके सब लोक तैसेरे जिरिये सेइं (तैस लोई पुड़) विश्वास केरन। 8 ते एप्पू लौ न थियो, पन लोअरे बारे मां लोकन गवाही देने ओरो थियो। 9 सच्च्यी लौ जै हर एककी मैनु (परमेशरेरे बारे मां ज्ञानेरी) लौ देचे, तै दुनियाई मां एजनेबाली थी। 10 तैन वचन दुनियाई मां (ओरू) थियूं, त दुनिया तैसेरे जिरिये बनाई जेई, पन दुनियाये लोकेई तैन न पिशानू (कि ते कौन आए)। 11 तै अपने लोकन कां अव, पन तैसेरे अपने लोकेई तै कबूल न कियो। 12 पन जेजे लोकेई तै कबूल कियो, तैनी तैनन परमेशरेरे बच्चे भोनेरू हक दित्तू; यानी सारे लोकन जैना तैसेरे नव्चे पुड़ विश्वास केरतन। 13 तैना न हाज-बव्चे सेइं, न मैनु केरे मेर्जी सेइं, न तैस मेनेरे मेर्जी सेइं जै बच्चे पैदा केरनेरी इच्छा रखते, बल्के परमेशरेरे मेर्जी सेइं पैदा भोनेर! 14 तैन वचन मैनु बेनतां किछ वक्त असन सेइं साथी रावं, ते (इस दुनियाई मां) डेरो कियो। तैनी असन पुड़ बडो अनुग्रह कियो ते परमेशरेरे बारे मां सारी सच्च्य़ाई हिराई। (जताली तै इडी थियो, तैखन) असेई तैसेरी महिमा लाई। (जेन्चरी की) तै अपने बाजी परमेशरे करं अव, त तैसेरी जेरी महिमा कौन्ची मां नई थी। 15 यूहन्ने तैसेरे बारे मां गवाही दिती, ते जेजे तैसेरे लोकन सेइं जेवं, “ई तै आए, जेसेरे बारे मां मीं जोरू थियूं, कि जै मेरे बाद एज्जी राओरोए, तै मीं करां बडो महान आए, किजोकि तै मीं करां पेड़लो थियो। 16 तैसेरी भरपूरी सेइं (यानी, तैसेरे सारे अनुग्रह ते सच्च्य़ाई सेइं) असन सेबन आशिवाद पत्ती आशिवाद मैल्लू। 17 मूसा नेबेरे जिरिये असन कानून मैल्लो, पन यीशु मसीहेरे जिरिये असन कां (परमेशरे करां) अनुग्रह ते सच्च्य़ाई पुज्जी। 18 परमेशर केन्चे कधी भी नई लावरो, पन तैसेरू अक्के मट्टू (यीशु) जैन बाजी परमेशरेरे कुम्मे मां आए, तैन्ने असन परमेशर हिराव।” 19 यूहन्ने यीशु मसीहेरे बारे मां ई गवाही दिती, (एक्सां) जैखन यहूदी लोकां केरे लोडैई यरूशलेम नगरेरां यूहन्ना कां किछ याजक त लेवी भेजे, त तैनेई तैस पुच्छू, “तू कौन आस?” 20 यूहन्ने तैन सेइं सच जेवं ते किछ भी छपानेरी कोशिश न की, त तैनी तैन सेइं जेवं, “अवं मसीह नई।” 21 तैखन तैनेई तैस पुच्छू, “फिरी तू कौन आस? कुन तू एलिय्याह नबी आस?” यूहन्ने तैनन जुवाब दित्तो, “अवं तै नई।” तैनेई फिरी पुच्छू, “कुन तू कोई नबी आस?” तैनी जुवाब दित्तो, “नई।” 22 तैखन तैनेई तैस पुच्छू, “फिरी तू कौन आस? (असन ज़ो) ताके अस तैनन जुवाब देम जैनेई अस भेजोरेम। तू अपने बारे मां कुन ज़ोतस?” 23 तैनी जुवाब दित्तो, “जेन्चेरे यशायाह नेबे (मेरे बारे मां) ज़ोरेए, तेन्चेरे अवं सुनसान ठेरी मां लोकन हक देइतां ज़ोताई कि, ‘तुसन कां प्रभु एजनेबालो आए, तैसेरेलेइ बत तियार केरा।’ (यानी, प्रभुएरे लेइ तुस अपने दिल साफ केरा)।” 24 फरीसी लोकां केरे तरफां किछ मैनु यूहन्ना कां भेजोरे थियो। 25 तैनेई यूहन्ना पुच्छू, “अगर तू न मसीह आस, न एलिय्याह, त न नबी, त फिरी (तीं कुन अधिकार आए) लोकन बपतिस्मो किजो देतस?” 26 यूहन्ने जुवाब दित्तो, “अवं त (लोकन) पैनी सेइं बपतिस्मो देताई, पन तुसन सेइं साथी रानेबालो अक एरो आए, जैस तुस हकीकि मां न पिशानथ। 27 ई तै आए, जै मेरे बाद एजनेबालो आए, तै मीं करां महान आए। अवं त तैसेरो गुलाम भोनेरे काबल भी नई कि तैसेरे बूटेरे तसमे खोल्ली।” 28 एना गल्लां, यरदन दरियारे पार बैतनिय्याह नगरे मां भोइ, जैडी यूहन्ना लोकन बपतिस्मो देतो थियो। 29 एग्री दिहाड़े यूहन्ने यीशु अपने पासे एइतो लाव, त तैनी यीशुएरे बारे मां लोकन सेइं जेवं, “तक्का, परमेशरे तरफां भेजोरू (बलिदानेरू) गबडू,

जैन सैरी दुनियाये लोकां केरे पाप नेते। 30 ई तै आए, जेसेरे बारे मां मीं जोरू थियूं कि, ‘अक मैनु मेरे बाद एजनेबालो आए, जै मीं करां बडो महान आए, किजोकि तै मीं करां पेड़लो थियो।’ 31 यूहन्ना तगर अवं त एप्पू भी तैस पिशानतो न थियो। पन एल्हेरेलेइ अवं (इडी) एजतां लोकन पैनी सेइं बपतिस्मो देताई, ताके तै मैनु इस्राएलेंरे लोकन मां बांदो भोए।” 32 तैखन यूहन्ने लोकां केरे सामने गवाही दिती, “मीं पवित्र आत्मा कबूतरेरे शकली मां अम्बरेरां एइतो लाव, ते तै तैस पुड़ बिश्शो। 33 अवं त एप्पू पिशानतो न थियो कि यीशु हकीकि मां कौन थियो, पन परमेशरे जैनी अवं लोकन पैनी सेइं बपतिस्मो देने भेजो, तैनी मीं सेइं जेवं, ‘जैस पुड़ तू पवित्र आत्मा एइतो त बिश्शो लालो, तैए लोकन पवित्र आत्मा सेइं बपतिस्मो देनेबालो आए।’ 34 तै मीं लाव, त अवं तुसन गवाही देताई, कि ए मैनु परमेशरेरू मट्टू आए।” 35 दुइयोवं दिहाड़े, फिरी यूहन्ना त तैसेरे चलन मरां दूई तैडी खई भोरे थिये, 36 त यीशु तैलमेई चलोरो थियो। जैखन यूहन्ने यीशु लाव, त तैनी यीशुएरे बारे मां अपने चलन सेइं जेवं, “तक्का, इन परमेशरे तरफां भेजोरू (बलिदानेरू) गबडू आए।” 37 जैखन यूहन्नेरू दुइये चलेई एन शुनू, त तैना यीशु पत्ती चले। 38 यीशुए बेदलोइतां तैना एइते लाए ते तैन पुच्छू, “तुस केस लगोरेथ तोपने?” तैनेई जेवं, “हे गुरु, तू कोइ रातस?” 39 तैनी तैन जेवं, “चला तुस एप्पू हेरेलो।” तैखन तैनेई गेइतां तैसेरे रानेरी ठार हेरी, ते तैस दिहाड़े तैना तैस साथी राए। ते कोई इलोली च्चेरे बजां केरो मौको थियो। 40 तैन दूई चलन मरां, जैना यूहन्नेरी गल्लां शुन्तां यीशु पत्ती चलोरे थिये, अक अन्द्रियास थियो, जै शमौन-पतरसरोे दूला थियो। 41 तैनी पेड़लू एन कम कियूं कि अपने दूला शमौन-पतरस तोपतां तैस सेइं जेवं, “असन मसीह मैलोरोए!” 42 तैखन अन्द्रियासे यीशु कां शमौन आनो। यीशुए तैसेरे पासे तक्कू ते जेवं, “तू यूहन्नेरू मट्टू शमौन आस। पन अज़ेरे बाद तेरू नवं केफा भोलू।” यूनानी भाषाई मां कैफारो मतलब “पतरस” आए। (एसेरो मतलब घोड़।) 43 होरसां दुइयोवं दिहाड़े यीशुए गलील इलाके मां गानू चाव। तैनी फिलिप्पुस लेइतां तैस सेइं जेवं, “मीं सेइं साथी चल (ते मेरो चेलो बन।)” (फिलिप्पुस यीशु सेइं साथी चलो।) 44 फिलिप्पुस बैतसैदा नगरे मां रातो थियो, जैडी अन्द्रियास त पतरस भी राते थिये। 45 तैल्ला पत्ती फिलिप्पुस गेइतां नतनएले सेइं मिलो त ज़ोने लगो, “असन मसीह मैलोरोए, जेसेरे बारे मां (बडे पेड़ले) मूसेरे कानून मां लिखोरोए त कने नेबेई भी अपनि किताबी मां लिखोरोए। ते यूसुफेरू मट्टू नासरत नगरे बालो यीशु आए, जै नासरत नगरेरो आए।” 46 नतनएले तैस सेइं जेवं, “कुन नासरते मरां कोई रोडी चीज निस्सी सकतीए?” फिलिप्पुसे जेवं, “एइतां एप्पू हेर।” (त नतनएल फिलिप्पुसे सेइं साथी चलो।) 47 यीशुए नतनएल अपने पासे एइतो लाव ते तैनी तैसेरे बारे मां एन जेवं, “ई असली इस्राएली मैनु आए, एसमां कोई पाखंड नई।” 48 नतनएले यीशु पुच्छू, “तू मीं केन्चेरे ज्ञानतस?” यीशुए तैस जुवाब दित्तो, “फिलिप्पुस तीं कुजाने करां पेड़ले जैखन तू फेगरे बुटे हेठ थियो, मीं तू तैडी लावरो थियो।” 49 तैखन नतनएले जेवं, “हे गुरु, (हुन्ना अवं ज्ञानतां कि) तू परमेशरेरू मट्टू आस! तू इस्राएल लोकां केरो राजा आस।” 50 यीशुए तैस जुवाब दित्तो, “कुन तू मीं पुड़ एल्हेरेलेइ विश्वास केरतस कि मीं तीं सेइं एन जेवं, कि मीं तू फेगरे बुटे हेठ लावरो थियो? तू इस करां भी बेडी-बेडी गल्लां लालो!” 51 फिरी तैल्ला पत्ती यीशुए जेवं, “अवं तुसन सेइं सच-सच ज़ोताई कि, तुस स्वर्ग खुल्लू त कने परमेशरेरे स्वर्गदूतन उबरे गाते त मेनेरे मट्टे पुड़, यानी मीं पुड़ उतरते लालो।”

2 तैल्ला पत्ती, दूलेइयोवं दिहाड़े गलील इलाकेरे काना नगरे मां केन्चेरो इला थियो। यीशुएरी अम्मा भी तैडी थी। 2 यीशु ते तैसेरे चलन भी धाम कियोरी थी। 3 जैखन दाखेरो रस मुक्को, त यीशुएरी अम्मा तैस सेइं लगी जोने, “एन कां दाखेरो रस मुकोरोए।” 4 यीशु लगी जोने, “अम्मा, मीं तीं सेइं कुन कम? हेजु मेरो वक्त नई ओरो।” 5 तैसेरे अम्मा नौकरन सेइं जेवं, “जैन किछ यीशु तुसन सेइं जेए, तैन्ने केरथ।” 6 तैडी नेडे घोड़ां केरे शा

(बहु) घड़े रखोरे थिये, जैन मां दूई-दूई द्लाई-द्लाई मन (पानी) लगतू थियूं। यहूदी लोक अपने रुवाजरे मुताबिक (अपने आपे त कने चीजन) धोनेरे लेइ एन घड़े (मां पानी भेता) इस्तेमाल केरते थिये। 7 यीशुए नौकरन सेइं जोंव, “घड़न मां पानी भरा।” तैनेई पूरे घड़े भरे। 8 तैखन यीशुए तैन सेइं जोंव, “हुन्ना, घड़े मरां किछ पानी केढतां धामारे प्रधाने कां (रखनेरे लेइ) देथा। तैनेई तैस कां नेव। 9 जैखन धामारे प्रधाने तैन पानी र्खखु, जैन दाछेरो रस बनोरू थियूं, तैन थियो ज्ञानतो कि एन कोइं ओरूए, पन नौकर ज्ञानते थिये, जैनेई तैन केढतां आनेरू थियूं। एल्हेरेलेइ धामारे प्रधाने लाडो कुजाव, ते तैस सेइं जोंव, 10 ‘हर कोई मैन्हु (आम तौर, धामी मां) पेइलो रोडो दाछारो रस देते, त जैखन लोक पीतां रज़्जतन, त बादे मां घट रोडो ज़ेरो दाछारो रस देते, पन तीं रोडो हेजू पत्रांव रखारो थियो।” 11 गलील इलाकेरे काना नगरे मां यीशुए पेइलो चमत्कार कियो। एन केरतां तैनी अपनि महिमा बांदि की, त तैसेरे चलेई तैस पुइ (होरो भी जादे) विश्वास कियो कि तै मसीह आए। 12 तैल्ला पती यीशु त तैरी अम्मा ते तैसेरे दूला ते कने तैसेरे चले कफरनहम नगरे मां जे, ते किछ दिहाइ तैड़ी राए। 13 जेइस यहूदी लोकां केरू फ़सह तिहार नेडे अव, त यीशु यरूशलेम नगरे जो चलो जेव। 14 त तैड़ी मन्दरेरे अंगे मां तैनी (बलिदानेरे लेइ) दांत, भैड्ठां त कबूतर बेचने बाले लाए त कने पेइसे बदलनबाले भी अपने मेज्जन पुइ विश्वासे लाए। 15 तैखन तैनी रेससरो अक कोडो बनेइतां, तैनन् सेभन त भैड्ठां त दांत मन्दरे मरां बेइर कढे, त बुपारी केरे पेंडेसे (इरां उरां) शारे, त तैन केरे मेज्ज उलटाए। 16 त कबूतर बेचनेबालन सेइं जोंव, “इना इड्ठां नेइ गाथा। मेरे बाजी केरे मन्दरे बुपारी लोकां केरू घर न बनाथा।” 17 जैखन तैसेरे चलेई एन शुनु, त तैनन् याद अव कि (परमेशेरी किताबी मां) लिखोरूए कि (मसीहे परमेशेरे सेइं जोंव) “तेरे घरेरे लेइ मेरी भक्ति, (हे परमेशर) मेरे अन्तर अगारी जेरि ज़लतीए।” 18 तैखन यहूदी लोकां केरे किछ लीडरेई तैस सेइं ज़ोने लगगे, “तू असन कोइं निशान (चमत्कार) हिरा कि मन्दरेरे अंगे मरां लोकन कढनेरे लेइ तीं कां परमेशेरे तरफां अधिकार आए?” 19 यीशुए तैन जुवाब दित्तो, “एस मन्दरे डोला, ते अवं टलेइ दिहैइन मां एस (दुबारो) बनेइलो।” 20 यहूदी लोकेई यीशु जुवाब दित्तो, “कुन इस मन्दरे बन्ने मां 46 साल लागरेन, कुन तू एस टलेइ दिहैइन मां (दुबारो) बनेइ सकतस?” 21 तैनेई गलत समझू यीशुए जैस मन्दरेरी गल कियोरी थी, ते तैसेरी अपनि जान थी। 22 एल्हेरेलेइ (बादे मां) जैखन यीशु (क़ूसे पुइ मरतो) मुइदन मरां ज़ीतो भोव, त तैखन तैसेरे चेलन याद अवं कि यीशुए (अपने मौत त कने ज़ीतो भोनेरे बारे मां) असन ई गल ज़ोरी थी। त (एसेरे वजाई सेइं) तैनेई पवित्रशास्त्रे मां लिखोरी गल्लन पुइ त कने यीशु मसीहेरी ज़ोरी गल्लन पुइ होरो भी जादे विश्वास कियो। 23 ज़ताली यीशु फ़सह तिहारेरे मौके यरूशलेम नगरे मां थियो, त बड़े लोकेई तैसेरे चमत्कार, जैना तैनी किये, लेइतां तैस पुइ विश्वास कियो। 24 पन फिरी भी यीशुए तैन पुइ अतबार न कियो, किजोकि तै सेबन्नी केरो इन्सानी सोच ज्ञानतो थियो। 25 तैस ए ज़रूरत न थी कि कोई मैन्हु तैस केन्ची होरि मैनेरे बारे मां ज़ोए, किजोकि तै (पेइले) मैन्हु केरि सोच ज्ञानतो थियो।

3 फरीसी लोकन मां अक मैन्हु थियो जेसेरू नवं नीकुदेमुस थियूं। ते यहूदी लोकां केरो अक लीडर थियो। 2 एककी राती ते यीशु कां एइतां ज़ोने लगगे, “हे गुरु, अस ज्ञानतम कि तू परमेशेरी तरफां गुरु भोइतां ओरोस; किजोकि जैना चमत्कार तू हेरातस, होरो कोइं न हेरेई सके, ज़ांतगर परमेशर तैस सेइं साथी न भोए।” 3 यीशुए जुवाब दित्तो, “अवं तुसन सेइं सच-सच ज़ोतां कि ज़ांतगर कोई मैन्हु दुबारो ज़र्म न घिन्ने, त तै परमेशेरू राज़ न लेई सके।” 4 नीकुदेमुस पुछ्छने लगगे, “जैखन मैन्हु बुडो भोते, त तै केन्चरे सेइं दुबारो पैदा भोइ सकते? कुन ते अम्पारे पेटे मां गेइतां दुबारो ज़ेर्मी सकते?” 5 यीशुए जुवाब दित्तो, “अवं तुसन सेइं सच-सच ज़ोताई कि ज़ांतगर कोई मैन्हु पैनी सेइं ते आत्माई सेइं पैदा न भोए, ते परमेशेरे राज़्जे मां दाखल न भोइ सके। 6 किजोकि हाज-बव अपने बच्चन सिर्फ़ एस जानेरी ज़िन्दगी देइ सकतन, पन सिर्फ़ (पवित्र) आत्मा लोकन आत्मिक ज़िन्दगी देइ सकते। 7

हेरान न भो कि मीं तीं सेइं कुन ज़ोंव कि, ‘तीं दुबारो ज़र्म घिन्नु ज़रूरीए।’ 8 हवा ज़ेरां चलनू चातीए तैरां चलचे, त तू तैसारी आवाज़ त शुनतस, पन एन न जानस कि ते कोइं एइचे त कोरां गाचे। तेन्चरे कोइं भी न हेरी सके त न समझी सके कि केन्चरां पवित्र आत्मा लोकन (नव्वीं) ज़िन्दगी देते।” 9 तैखन नीकुदेमुसे पुछ्छू, “एना गल्लां केन्चरे सेइं भोइ सेकतिन पवित्र आत्मा केन्चरां लोकन नव्वीं आत्मिक ज़िन्दगी देते?” 10 यीशुए तैस सेइं जोंव, “तू इसाएली लोकां केरो (अक खास) गुरु भोइतां भी कुन इना गल्लां न समझस? 11 अवं तीं सेइं सच-सच ज़ोताई, ज़ैन अस ज्ञानतम तैन्ने (लोकन) ज़ोतम, त ज़ैन असेईं लावरूए तैसेरे बारे मां (लोकन) गवाही देतम, पन फिर भी तुस लोक इश्शी गवाही न मन्थ। 12 मीं त तुसन सेइं धेतरा गल्लां केरे बारे मां गल की, त तुसेईं (मीं पुइ) विश्वास न कियूं, त अन्तर अवं स्वर्गेरी गल्लां ज़ोई त तुस केन्चरे विश्वास केरेले? 13 (स्वर्गेरी गल्लां ज़ानेरे लेइ कधी) कोई मैन्हु स्वर्गं मां नई जोरो, सिर्फ़ तैए ज़ै स्वर्गं ओरो, यानी अवं मैनेरू मट्टू ज़ैन स्वर्गं मां आई। 14 जेन्चरे मूसा सुनसाने मां (परमेशेरे लोकन बचानेरे लेइ पितल सेइं बनोरो) सप (खंभे पुइ) उच्चे पुइ चढ़ाव, तेन्चरे एन ज़रूरी आए कि (अवं) मैनेरू मट्टू भी उच्चे पुइ चढ़ाव गाए। 15 ताके ज़ै कोई तैस पुइ विश्वास केरे, तैस हमेशारी ज़िन्दगी मैल्ले।” (aiōnios g166) 16 “किजोकि परमेशेरे दुनियारे लोकन सेइं एत्रो प्यार कियो कि तैनी अपनू अक्के मट्टू दित्तू, ताके ज़ै कोई तैस पुइ विश्वास केरे, तै नाश न भोए, बल्के हमेशारी ज़िन्दगी हासिल केरे। (aiōnios g166) 17 किजोकि परमेशेरे अपनू मट्टू दुनियाई मां एल्हेरेलेइ नई भेजोरू कि तै दुनियारे लोकन (तैन केरे पापां केरि) सज़ा दे, बल्के एल्हेरेलेइ कि दुनियारे लोक तैसेरे ज़िरिये सेइं (पापां केरि सज़ाई करां) मुक्ति हासिल केरन। 18 ज़ै तैस पुइ विश्वास केरते, तैस सज़ा न मैल्ले। पन ज़ै मट्टे पुइ विश्वास न केरे, तै पेइलोए दोषी भोइ जोरोए, किजोकि तैनी परमेशेरे अकेल्ले मट्टेरे नव्वे पुइ विश्वास नई कियोरो। 19 परमेशर लोकन सज़ा देनेरी वजा ई आए कि ज़ैस जो लो ज़ोतन ते दुनियाई मां ओरिए, परमेशेरे अपनि लौ दुनियाई मां भेज़ी, पन लोक ते कने तैन केरां कम्मां बुरां थियां, एल्हेरेलेइ तैनेई तैस लोई करां जादे पापेरू आंधरू पसंद कियूं। 20 ज़ै कोई बरू कम केरते, तै लोई सेइं नफरत केरते त लोअरे नेडे न एज्जे, एरू न भोए कि तैसेरे कम्मन पुइ दोष लाव गाए। 21 पन हर कोई ज़ै परमेशेरी सच्चाई पुइ चलते, ते लोई कां एइते, ताके लोई सेइं बांदो भोए कि तैसेरे सब कम्मां परमेशेरी शक्ति सेइं साथी किये गातन।” 22 एना गल्लां केरे बाद यीशु ते तैसेरे चले यहूदिया इलाके मां आए, त तैड़ी रेइतां लोकन बपतिस्मो देने लगगे। 23 यूहन्ना भी शालेम नगरेरे नेडे ऐनन नव्वेरे ठेरी लोकन बपतिस्मो देतो थियो। किजोकि तैड़ी हच्छू पानी थियूं त लोक बपतिस्मो नेनेरे लेइ तैस कां एइते राते थियो। 24 किजोकि यूहन्ना हेजू कैदखाने मां न थियो छुडोरू। 25 एक्सां यूहन्नारे चेलां केरि केन्ची यहूदी मैन्हु सेइं (रुवाजरे मुताबिक) शुद्ध भोनेरे बारे मां बेंस भोइ। 26 एल्हेरेलेइ यूहन्नारे चले तैस कां एइतां ज़ोने लगगे, “हे गुरु, (तीं पतो आए) तै मैन्हु ज़ै यरदन दरियारे पार तीं सेइं साथी थियो त कने तीं तैसेरे बारे मां गवाही दित्तोरी थी, हेर, ते भी लोकन बपतिस्मो देते त सब लोक तैस कां गातन।” 27 यूहन्ना जुवाब दित्तो, “(ते रोडी गल आए, किजोकि) मैन्हु किछ न हासिल केरि सके, ज़ांतगर तैस स्वर्गं (यानी परमेशेरे करां) न मैल्ले। 28 तुस एणू मेरे गवाह आथ, कि मीं तुसन सेइं ज़ोरू थियूं कि अवं मसीह नई, पन अवं तैस करां पेइले (परमेशेरां तरफां) भेजोरूई। 29 जेसेरी महरनीए त तै महरावे, पन महरावेरो दोस्त ज़ै खडोए महरावेरी हर गल खुशी सेइं शुनतो रहते; हुनी मेरी ई खुशी पूरी भोइ। (कि सब लोक तैस कां गातन।) 30 एन ज़रूरीए कि तै बधे ते अवं घेटी।” 31 “(मसीह) ज़ै स्वर्गं एइते तै होरि सेभन करां महान भोते। त ज़ै मैन्हु धेरती पुडरां भोते, तै धेतराए त धेतरा गल्लां केरते। ज़ै स्वर्गं एइते तै सेभना उच्चो महान भोते। 32 तैनी (परमेशेरे तरफां) ज़ैन किछ लाव ते शुनेरू, तैसेरे बारे मां लोकन शुनाते, पन तैसेरी गवाही कोइं न शुने। 33 ज़ै कोई तैसेरी गवाही पुइ विश्वास केरते, तै तैसेरी तसदीक केरते कि परमेशर सच्चो आए। 34 किजोकि (मसीह) ज़ै

परमेशरे भेजोरोए, तै परमेशरेरी गल्लां जोते, किजोकि परमेशर तेस पवित्र आत्मा नैपतां न दे। 35 (परमेशर) बाजी मट्टे सेइं प्यार रखते, त तैनी सब किछ तैसेरे हावाले कियोरूप। 36 जै (परमेशररे) मट्टे पुड़ विश्वास केरते तेस हमेशारी जिन्दगी मैलचे, पन जै मट्टे पुड़ विश्वास न केरे तै जिन्दगी करां दूर रालो, ते तैस पुड़ परमेशररो क्रोध (हुन्ना करां लेइतां हमेशा) राते।” (aiōnios g166)

4 फिरी जैखन प्रभु पतो लगे कि फरीसी लोकेईं शुनोरूप, यीशु, यूहन्ना करां जादे चले बनाते ते बपतिस्मो देते। 2 (हालांकी सच्च एन थियू यीशु एप्पू नईं बल्के तैसेरे चले बपतिस्मो देते थियो), 3 तैखन तैना यहूदिया इलाके शैतां गलील इलाके जो चले जोते। 4 ते तैसेरु सामरिया इलाके मांमेइं भोइतां गानू ज़रूरी थियू। 5 एल्लेरेलेइ तै सामरिया इलाकेरे सूखार नगर मां अव, तै ठार तैस ज़मीनरे नेडे थी जै याकूबे अपने मट्टे यूसुफे दित्तोरी थी। 6 याकूबे जैन खुह बनोरु थियू तैन तैडी थियू, ते यीशु सफर केरतां थकोरो थियो, ते तैस खुहे पुड़ बिश्शो। तैखन दुपाहरां केरो मौको थियो। 7 एत्रे मां अक सामरी कुआन्शा तैडी पानी भरने आई। यीशुए तैस जो ज़ोव, “मीं पानी पीया।” 8 किजोकि तैसेरे चले रोटी आन्नेरे लेइ नगर मां जोरे थियो। 9 तेस सैमरी कुआन्शां तैस जो ज़ोव, “तू यहूदिस ते अव त सामरी, तू मीं पानी पीयानेरे लेइ किजो ज़ोतस?” किजोकि यहूदी सैमरन सेइं मिलनू जुलनु न थिये सुखाते। 10 यीशुए तैस ज़ुवाब दित्तो, “अगर तू ज़ानेथी कि परमेशर तीं कुन देनू चाते, त एन भी ज़ानेथी कि, तीं करां कौन पानी मगने लोरोए, त तू तैस करां मगथी, ते ते तीं जिन्दगरु पानी देथो।” 11 तैस कुआन्शां ज़ोव, “हे प्रभु, तीं कां पानी भरनेरे लेइ कोई भांड नईं, ते खुह बडू डुघू आए, ते तीं जिन्दगरु पानी कोटां मैल्लू? 12 कुन तू इश्शे पूर्वज याकूबे करां भी बड्डोस, जैनी एन खुह असन दित्तेरूप, ते तैनी एप्पू ते तैसेरी औलादां ते तैसेरे गोरु गब्बेईं भी एस्से मरां पिव?” 13 यीशुए तैस ज़ुवाब दित्तो, “जै कोई एस खुहे मरां पियेलो तैस फिर भी दलिश रानीए। 14 पन जै कोई तैन पानी पीते जैन अव देताई ते हमेशारे लेइ दलिशोरो न रालो, बल्के जैन पानी अव तैस देलो तैन तैस मां अक नाग बनेलो जै पानी देतो रालो, जैस सेइं तैस हमेशारी जिन्दगी मैलेली।” (aiōn g165, aiōnios g166) 15 तैस कुआन्शां यीशु जो ज़ोव, “हे प्रभु, मीं भी तैन पानी दे ताके मीं दलिश न लग्गे ते मीं बार-बार पानी भरने इस खुहे पुड़ न एजनु पे।” 16 यीशुए तैस जो ज़ोव, “गा, अपनो मुन्शा कुजा।” 17 तैसां कुआन्शां ज़ुवाब दित्तो, “मेरो कोई मुन्शा नईं।” यीशुए तैस जो ज़ोव, “तीं सच्च ज़ोव, कि मेरो कोई मुन्शा नईं।” 18 किजोकि तीं पंच मुन्शा बनोरने ते जैस सेइं साथी तू हुन्ना आस, ते तेरो मुन्शा नईं, तीं जैन किछ ज़ोव तैन सच्छे ज़ोरूप।” 19 तैस कुआन्शा ज़ोव, “हे प्रभु, मीं लग्गते तू कोई नबी आस। 20 इश्शे दादे-पड़दादेईं इस पहाड़े पुड़ आराधना की, पन तुस यहूदी लोक ज़ोतथ कि ज़ैडी आराधना कियोरी लोइचे, ते ठार सिर्फ यरूशलेम आए।” 21 यीशुए तैस कुआन्शी जो ज़ोव, “हे कुआन्शा, मेरी गल्लरो विश्वास केर, कि तै मौको भी एज्जी राहोरोए, कि तुस लोक बाजी केरि आराधना न त इस पहाड़े पुड़ केरेले ते न यरूशलेम मां केरेले। 22 तुस सामरी लोक जेसेरी आराधना केरतथ तैस न ज़ानथ, पन अस यहूदी लोक जेसेरी आराधना केरतम तैस ज़ानतम, किजोकि मुक्ति यहूदन मरां आए। 23 पन तै मौको एज्जी राहोरोए बल्के ओरोए, जैखन सच्छे भक्त बाजेरी आराधना आत्मा ते सच्छेईं सेइं केरेले, किजोकि बाजी एरे जेरे सच्छे भक्त तोपते। 24 परमेशर आत्मा आए, एल्लेरेलेइ तैसेरे भक्त तैसेरी आराधना आत्मा ते सच्छेईं सेइं केरना।” 25 कुआन्शां तैस सेइं ज़ोव, “अव ज़ानती कि मसीह, जैस जो ख्रिस्त ज़ोतन एजनेबालोए, जैखन ते एज्जेलो तै सब किछ समझालो।” 26 तैखन यीशुए ज़ोव, “अव जै तीं सेइं गल्लां लगोरोईं केरने तैए मसीह आई।” 27 एत्रे मां तैसेरे चले आए ते तैनेईं तै एक्की कुआन्शी सेइं गल्लां केरतो लेइतां हैरान राए, पन केन्चे तैस एन न पुच्छू, “तू कुन चातस?” या “एस कुआन्शी सेइं किजो गल्लां लगोरोस केरने?” 28 ते कुआन्शा पनेरो घडो तैडी छेइतां वापस नगर मां जेईं ते मैनु

सेइं जोने लगी। 29 “एज्जा, एक्की मैनु सेइं मिला तैनी मीं सेइं सब किछ ज़ोव जैन मीं अज़ तगर कियेरु थियू, कुन ए तै मसीह त नईं?” 30 तैना मैनु नगर मरां निस्तां यीशु हेरनेरे लेइ तैसेरे पासे चलने लगे। 31 यीशुएरे चले तैस कां मिनत केरने लग्गे, “हे गुरु, रोटी खा।” 32 पन यीशुए तैन सेइं ज़ोव, “मीं कां खानेरे लेइ अक एरी रोटी आए, पन तुसन तैसेरे बारे मां कोई पतो नईं।” 33 तैखन चले एप्पू मांमेइं जोने लगे, “कुन केन्चे पेइलू एस्सेरे लेइ किछ खाने जो आनोरूप?” 34 यीशुए तैन सेइं ज़ोव, “मेरी रोटी ईए कि, परमेशरेरी मर्ज़ी पूरी केरि जैनी अव भेजोरोईं ते तैन कम पूरू केरि जैन तैनी दित्तोरूप। 35 कुन तुस न ज़ोथ कि, फसल पकने हेजू चेत्रे महीन्ना बाकिन? अव तुसन जो ज़ोताई कि, अपनि एछ्छी घाड़ा! ते एवनबाले मैनुन हेरा, जैना पक्कोरे ऊडारां केरि फसलारे जेरे आन। 36 फसल कटने बालन कम केरतां मज़दूरी मैल्ली राओरीए, यानी तैना लोकन अकोट्टे केरि राओरेन जैना लोकन हमेशारी जिन्दगी हासिल केरेले, ताके जै बेते ते कटते साथी खुशी मनान। (aiōnios g166) 37 एल्लेरेलेइ अक कहावते कि बेनेबालो कोईए ते कटने बालो होरो कोईए, तैन सच्छे। 38 मीं तुस भेजे कि गाथ तैस फसली कट्टा जै तुसेईं नईं बेवरी, होरेईं मेहनती सेइं कम कियेते ते तुसन तैन केरि मेहनतरो फल मैल्लो।” 39 नगरेरे बडे लोकेईं तैस सैमरी कुआन्शी गल शुन्तां यीशु पुड़ विश्वास कियो, किजोकि तैसां तैन लोकन सेइं ज़ोव कि तैनी मीं सेइं सब किछ ज़ोव, जैन मीं कियेरु थियू। 40 जैस नगरेरे सामरी लोक यीशु कां ओरे थिये, मिनत केरतां जोने लग्गे, असन कां बिश फिरी तै दूईं दिहाडे तैडी राव। 41 होरे भी बडे लोक थिये जैनेईं तैसेरी गल्लां शुन्तां तैस पुड़ विश्वास कियो। 42 तैनेईं तैस कुआन्शी जो ज़ोव, “असेईं तेरी गल्लां शुन्तां विश्वास नईं कियोरो, बल्के असेईं अपने कन्ईं शुनेरूप ते असेईं एन हुनी बड्डू कि ए मैनु सच्छे दुनियाईं मुक्ति देनेबालोए।” 43 दूईं दिहेइना बाद यीशु फिरी गलीलेरे पासे चलो जेव। 44 ते यीशुए एप्पू ज़ोरु थियू, कि कोई नबी अपने मुलखे मां इज़्जतरे काबल न समझो गाए। 45 जैखन तै गलीले मां अव त गलीली लोक तैस सेइं खुशी सेइं मिले, एल्लेरेलेइ कि तैनेईं तैन सब किछ जैन तैनी फ्रसहरे मौके यरूशलम नगरे मां कियेरु थियू, तैनेईं अपनि एछ्छेईं सेइं लावरु थियू तैखन तैना एप्पू भी तैडी थिये। 46 दुइयोवं बार जैखन तै गलील इलाकेरे काना इलव्वे मां ओरो थियो ज़ैडी तैनी पानी दाख़ारो रस बनोरो थियू, तैडी अक बडो बडो राजेरो अफसर थियो तैसेरु मट्टू कफरनहूम नगर मां बिमार भोरु थियू। 47 ज़ेखन तैनी अफसर थिये शुनु कि यीशु यहूदिया इलाकेरां गलील इलाके मां ओरोए त ते यीशु कां पुजो ते मिनत केरतां जोने लग्गे मेरु मट्टू मरने बालूए तू चल ते तैस बड़्झा, किजोकि तैन मरने बालू थियू। 48 यीशुए तैस सेइं ज़ोव, “ज़ातगर तुस लोक निशान ते चमत्कार न लाएले कथे विश्वास न केरेले कि, अव मसीह आई।” 49 तैनी बड्डे अफसर ज़ोव, “प्रभु लूश केर एरु न भोए कि मेरु मट्टू मेरि गाए।” 50 यीशुए ज़ुवाब दित्तो, “चल तेरु मट्टू ज़ीतू भोनूए।” तैनी तैसेरी गल्लरो विश्वास कियो ते तैटां चलो जेव। 51 तै हेजू बत्तां थियो त तैसेरे नौकर तैस मैल्ले ते जोने लग्गे, “तेरु मट्टू ज़ीतूए।” 52 तैखन ते पुच्छने लग्गे, “मेरु मट्टू केखन जेरे बेइज़ोने लग्गोरु थियू?” ते तैनेईं ज़ोव, “तैसेरो भुखार हीज दीसां एक्की बजे उतरी जोरो थियो।” 53 तैखन तैसेरे बाजी याद अव कि, तैए मौको थियो, जैखन यीशुए ज़ोरु थियू, “गा तेरु मट्टू ज़ीतूए” तैखन तैनी भी ते तैसेरे पूरे टब्बरे यीशु पुड़ विश्वास कियो। 54 ई दुइयोवं चमत्कारेरो निशान थियो जै यीशुए यहूदिया इलाकेरां वापस एजनेरां बाद गलील इलाके मां कियोरो थियो।

5 एन गल्लन पत्ती यहूदी केरु अक तिहार भोव, ते यीशु यरूशलम नगरे जो जेव। 2 यरूशलम नगरे मां भैडू केरे दारे कां अक हावदे, जैस जो इब्रानी भाषाईं मां बैतहसदा ज़ोतन, तैसेरां पंच अंगना थियां। 3 एन मां बडे बिमार, काने, टॉटे, नीपाते (पानी हिलनेरे इंतज़ारे मां) भोते थिये। 4 (किजोकि वक्ते पुड़ परमेशरेरो स्वर्गदूत हावदे पुड़ एइतां पानी हिलातो थियो, ते पानी हिलनेरां पत्ती जै कोई पेइलो हवदे मां गातो थियो तै ठीक भोतो थियो, चाए तैसेरी कोई भी बिमारी किना भोए।) 5 तैडी अक मैनु थू जै

38 सालां केरो बिमार थू। 6 यीशुए तै तैडी बिशोरो लाव ते एन जेनतां कि ए बडी चरोकनो इस हालती मांए, ते तैस पुच्छू, “कुन तू ठीक भौनु चातस?” 7 तैने बिमारे जुवाब दित्तो, “हे प्रभु, मीं कां कोई मैनुह नई, कि ज़ताली पानी हिलावं गाए त मीं कोई हावदे मां गाने लेइ मेरी मदत केरे, मेरे पुजते-पुजते तांतगर होरो कोई गाते।” 8 यीशुए तैस सेइं ज़ोवं, “उठ अपनि खट सल्ल ते चल फिर।” 9 तै मैनुह तैखने ठीक भोव, ते अपनि खट छुइतां चलने फिरने लगे। 10 तै आरामेरी दिहाडी थी एल्हेरेलेइ यहूदी लीडर तैस सेइं ज़ै ठीक भोरो थियो, ज़ोने लगे, “अज़ त आरामेरी दिहाडी आए, तीं खट छूनी जेइज़ नई।” 11 तैने तैन जुवाब दित्तो, “जैने अव ठीक कियो, तैने मीं सेइं ज़ोवं, ‘अपनि खट छू ते चल फिर।’” 12 तैनेई तैस पुच्छू, “तै कौन मैनुए जैने तीं सेइं ज़ोवं, ‘खट छुइतां चल फिर?’” 13 ज़ै ठीक भोरो थियो तै न थियो ज़ानतो कि तै कौन आए, किजोकि तैस ठैरी भीड़ भोनेरे वजाई सेइं यीशु तैस ठैरारां होरि पासे चुपचारे चलो जोरो थियो। 14 एन गल्लन पत्ती यीशु तै मन्दरेरे अंगने मां मैल्लो, यीशुए तैस सेइं ज़ोवं, “तक, तू ठीक भोरोस, फिरी पाप न करां, एरू न भोए कि, एस करां बडी आफत एज्जे।” 15 तैने मैने यहूदी लीडरन सेइं ज़ोवं, कि ज़ैने अव ठीक कियोरोई तै यीशुए। 16 एल्हेरेलेइ यहूदी लीडर यीशु सताने लाए, किजोकि तै एरां ज़ेरां कम्मां आरामेरे दिहाडे केरतो थियो। 17 एस पुइ यीशुए तै सेइं ज़ोवं, “मेरो बाजी यानी परमेशार हमेशा कम केरते, तै मीं भी कम कियोरू लोडे।” 18 एस वजाई सेइं यहूदी लीडर मनां जादे तैस मारनेरी कोशिश केरने लाए, किजोकि तै न सिर्फ आरामेरे दिहाडेरो हुक्म न थियो टूलतो बल्के परमेशारे अपनो बाजी ज़ोतो थियो ते अपनो आप परमेशारे बराबर बनातो थियो। 19 यीशुए तैन सेइं ज़ोवं, “अवं तुसन सेइं सज़-सज़ ज़ोताई, मट्टु यानी अव एप्पू किछ न केरि बेटि, सिर्फ तैन ज़ैन बाजी परमेशारे करां केरतू लाताई, किजोकि ज़ैना-ज़ैना कम्मां बाजी करां केरतो लाते तैन मट्टु भी तैस्से तरीके सेइं केरते। 20 किजोकि बाजी, मट्टु सेइं प्यार केरते, ते ज़ैना-ज़ैना कम्मां तै एप्पू केरते, तैना सब मट्टु भी हिराते, ते तैन एस करां भी बड्डां कम्मां हिरालू, ताके तुस हैरान भोथ। 21 किजोकि ज़ेन्चरे बाजी मुड्डन ज़ीतो केरते, तेन्चरे मट्टु भी ज़ैस चाते तैस ज़ीतो केरते। 22 बाजी केन्चरी इन्साफ न केरे, पन तैन इन्साफ केरनेरू सारू कम मट्टु दित्तेरूए। 23 कि सब लोक ज़ेन्चरे बाजेरी आदर केरतन तेन्चरे मट्टेरी भी आदर केरन, ज़ै मट्टेरी आदर न केरे, तै बाजी केरि ज़ैने तैन भेजोकरू तैसेरी आदर न केरे। 24 अवं तुसन सेइं सज़ ज़ोताई ज़ै मरे वचन शुन्तां मेरे भेजने बाले पुइ विश्वास केरते, हमेशारी ज़िन्दगी तैसेरीए, ते तैस पुइ सज़ारो हुक्म न भोए, बल्के तै मौतारां पार भोइतां हमेशारे ज़िन्दगी मां दाखल भोते।” (aiōnios g166) 25 “अवं तुसन सेइं सज़-सज़ ज़ोताई, कि तै वक्त एजनेबालोए, बल्के हुन्नाए ज़ैस मां मुड्डे परमेशारे मट्टेरी यानी मेरी आवाज़ शुनेले, ते ज़ैना शुनेले तैना हमेशा जीएले। 26 किजोकि ज़ेन्चरे बाजी अपने आपे मां ज़िन्दगी रखते तेन्चरे तैने मट्टु भी ए अधिकार दित्तोरोए, कि अपने आपे मां ज़िन्दगी रखे एल्हेरेलेइ तैन मैनेरू मट्टुए। 27 बल्के बाजी परमेशारे तैस सेरी लोकां केरि आदालत केरनेरो भी अधिकार दित्तोरोए, एल्हेरेलेइ कि तैन यानी अवं मैनेरू मट्टु आई। 28 एसमां हैरान न भोथ, किजोकि तै वक्त एइते कि ज़ेरे कन्नन मां आन तैसेरी आवाज़ शुन्तां ज़ीते भोनेन। 29 ज़ैनेई भलाई कियोरीए हमेशारे ज़िन्दगरी लेइ ज़ीते भोनेन ज़ैनेई बुरी ज़िन्दगी ज़ीयोरीए तैना सज़ारी लेइ ज़ीते भोनेन।” 30 “अवं अपने आपे सेइं किछ न केरि बेटि, ज़ेन्चरे मेरो बाजी मीं ज़ोते तेन्चरे अवं लोकां केरि आदालत केरताई, ते मेरी आदालत सञ्चीए, किजोकि अवं अपने मेज्जां सेइं नई पन अपने भेजने बालेरी मज्जां सेइं चाताई। 31 अगर अवं अपनि गवाही एप्पू देई, त मेरी गवाही सञ्ची नई। 32 अक होरो आए, यानी मेरो बाजी ज़ै मेरी गवाही देते, ते अवं ज़ानताई ज़ै गवाही तै मेरे बारे मां देते तै सञ्चीए। 33 तुसेई मैनुह यूहन्ना कां मेरे बारे मां पुच्छने भेजे, ते तैनी सञ्चेरी गवाही दित्तोरीए। 34 पन अवं अपने लेइ मैनेरी गवाही न चैई, पन यूहन्ना ज़ै गवाही दित्ती तैसेरे बारे मां मीं एल्हेरेलेइ ज़ोवं ताके तुसन मुक्ति मैल्ले। 35 तै त बलतो ते चमकतो दीयेरो ज़ेरो थियो, पन तुसन थोडे चिरेरे

लेइ तैसेरी लोई मां खुश भौनु रोडू लग्गू। 36 पन मीं कां ज़ै गवाहीए तै यूहन्नारी गवाही करां भी बड्डीए। किजोकि ज़ैन कम बाजे मीं केरनेरे लेइ दित्तेरू मतलब इन्ने कम्मां जैना अवं केरताई, तैना मेरी गवाही देतन कि बाजे अवं भेजोरोई। 37 ते बाजी ज़ैने अवं भेजोरोई तैने मेरी गवाही दित्तोरीए, तुसेई न कथी तैसेरी आवाज़ शुनोरी, ते न तै आमने सामने लोरोए। 38 तुसेई तैसेरी शिक्षा अपने मने मां नई रख्खोरी, किजोकि तुसेई मीं पुइ विश्वास न कियो, कि अवं परमेशारे भेजोरोई। 39 तुस पवित्रशास्त्रे मां एन पढतथ, किजोकि तुस सोचतथ कि हमेशारी ज़िन्दगी तैस मां मैलतीए, तै ईए, ज़ै मेरे बारे मां गवाही देते। (aiōnios g166) 40 फिरी भी तुस हमेशारे ज़िन्दगी हासिल केरनेरे लेइ मीं कां न एजनु चाथ। 41 अवं मैनुह करां तारीफ न चैई। 42 पन अवं तुसन ज़ानताई तुशे दिले मां परमेशारे लेइ प्यार नई। 43 अवं अपने बाजेरे अधिकारे सेइं ओरोई, ते तुस मेरी गल न मन्थथ। अगर होरो कोई अपने अधिकारे सेइं एज्जे, त तैसेरी गल मन्नेले। 44 तुस मीं पुइ विश्वास न केरि बटथ, किजोकि तुस एक्की होरि करां तारीफ चातथ, ते तुस तै तारीफ न चाथ ज़ै सिर्फ परमेशारे तरफांए। 45 इन न समझा कि अवं बाजेरे सामने तुसन पुइ दोष लेइएलो, तुसन पुइ दोष लानेबालोए त मूसोए, ज़ैस पुइ तुसेईं भरोसो रख्खोरोए। 46 किजोकि अगर तुसेईं मूसोरो विश्वास कियोरो भोथो, त मेरो भी विश्वास केरथे, किजोकि तैने मेरे बारे मां लिखोरूए। 47 तुस त तैसेरे कानुनेरे गल्लन पुइ विश्वास न केरथ, ते फिरी तुस किजो मेरी गल्लन पुइ विश्वास केरेले?”

6 एन गल्लन पत्ती यीशु गलीलेरे समुन्दरेरे मतलब तिबिरियुसेरे समुन्दरेरे पार जेव। 2 ते अक बडी भीड़ तैस पत्ती चली, किजोकि ज़ैना चमत्कार ते बिमारन पुइ हीरतो थियो, ते तैना ठीक भोते थिए ते लोक एन हेरते थिए। 3 तैखना यीशु पहाडे पुइ च़ेढतां अपने चेलन साथी तैडी बिशो। 4 ते यहूदी केरे फ़सहेरू तिहार नेडू थियू। 5 ज़ैखन यीशुए अक बडी भीड़ अपने पासे इंडती लाई, त तैने फिलिप्पुसे सेइं ज़ोवं, “असां एना केरे लेइ रोटी कोइं घिन्म?” 6 पन तैनी तै गल तैस अज़मानेरे लेइ ज़ोई, किजोकि तै एप्पू ज़ानतो थियो कि तै कुन केरेलो। 7 फिलिप्पुसे तैस जुवाब दित्तो, “एन केरे लेइ 200 दीनारां केरि रोटी भी पूरी न भोली कि तैन थोड़ी-थोड़ी मैली गेली।” 8 तैसेरे चेलन मरां शमीन पतरसेरे ढूलाए अन्दियासे तैस सेइं ज़ोवं। 9 “इडी अक मट्टूए ज़ैस कां जोआं केरि पंच रोटिन, तै दूई मेछलीन, पन एत्रे लोकन जो कुन तैना पूरी भोनिन?” 10 यीशुए ज़ोवं, “लोकन बिशाला।” तैडी बडी घास थियो। तैखन लोक ज़ैना लगभग 5000 मड्ड बिशोरे थियो। 11 तैखन यीशुए रोटी टूलेइ ते शुक़ केरतां बिशने बलना दित्ती, ते तेन्चरे मेछलीन मरां भी ज़ेरी तैना चातो थियो बेन्टी। 12 ज़ैखन तैना खेइतां रज़्जे त तैनी अपने चेलन सेइं ज़ोवं, “बचोरे टुकडे अकोट्टे केरा, ताके किछ शारू न गाए।” 13 ते तैनेई अकोट्टे केरे, ते जोआं केरे पंच रोटी केरे टुकडन मरां ज़ैना खाने बालन करां बचोरे थिए 12 टोकरे थिए। 14 तैखन ते चमत्कार ज़ै तैनी कियोरो थियो लोक हेरतां ज़ोने लाए, “तै नबी ज़ै दुनियाई मां एजनेबालो थियो सञ्चे ईए।” 15 यीशुए एना ज़ेनतां कि एना मीं राज़ो बनानेरे लेइ टूलानो चातन, फिरी तै अकेल्लो पहाडे पुइ जेव। 16 ज़ैखन इलोइज़ भोइ, त तैसेरे चले समुन्दरेरे बन्ने जे। 17 ते किशती मां च़ेढतां समुन्दरेरे पार कफरनहम नगर जो चले, तैस वक्ते आंधरू भोरू थियू, ते यीशु हेजू तगर तैन कां न थियू ओरो। 18 ते बडी तेज़ हवा च़लोरी थी ते समुन्दरे मां छेल्ली उठने लेइ। 19 ज़ैखन ते लगभग टूलाई च़ेरे मील नेडे अव, त तैनेई यीशु समुन्दरे पुइ च़लतो लाव ते किशतरे नेडे इइतो लाव ते डरे। 20 पन यीशुए तैन सेइं ज़ोवं, “अवं आई डरा ना।” 21 ते तै तैस किशती मां च़डनेरे लेइ तियार भोव, ते तैखन किशती तैस ठैरी पुइ पुज्जी ज़ैडी तैना च़लोरे थियो। 22 दुइयोवं दिहाडे तैस मैनुह केरि भीड़ां ज़ै समुन्दरेरे पार खडी थी, इन हेरतां कि एक्की किशतरे अलावा होरि कोई न थी, यीशु अपने चेलन साथी तैस किशती पुइ न च़ढोरो थियो, पन सिर्फ तैसेरे चले थियो। 23 (तैखन होरि किशती तिबिरियुस नगरां तैस ठैरी ईई, ज़ैडी तैनेई प्रभुएरू शुक़ केरतां रोटी खोरी थी) 24 एल्हेरेलेइ

जैखन लोकेई हेरू कि इड़ी न यीशु ते न तैसेरे चले, ते तैना फिरी तैना निक्की-निक्की किश्तन पुड़ चेट्टां यीशु तोपते कफरनहूम नगर ए पुजे। 25 समुन्दरे पार जैखन तैना तैस मैल्ले त तैने जोंव, “हे गुरू, तू इड़ी कताली अव?” 26 यीशुए तैन जुवाब दित्तो, “अवं तुसन सेइं सच-सच ज़ोताई, तुस मीं एल्हेरेलेइ न तोपथ कि तुसेईं चमत्कार लाव, बल्के एल्हेरेलेइ कि रोटी खेइतां रज्जे। 27 नाश भोनेबेली रोट्टे लेइ मेहनत न केरा। पन तैस रोट्टे लेइ मेहनत केरा ज़े हमेशारी जिन्दगी देतीए, जै मैनेरू मट्टु यानी अवं तुसन देइलो, किजोकि बाजी परमेशरे मीं एन्चरां केरनेरो अधिकार दित्तोरोए।” (aiōnios g166) 28 तैनेई तैसे सेइं जोंव, “परमेशरेरू कम केरनेरे लेइ अस कुन केरम?” 29 यीशुए तैन जुवाब दित्तो, “परमेशर तुसन करां एन कम चाते कि तुस तैस पुड़ यानी मीं पुड़ विश्वास केरा जैनी अवं भेजोरोई।” 30 तैखन तैनेई तैस सेइं जोंव, “फिरि तू कुन निशान हीरातस कि अस तैस हेरतां तेरो विश्वास केरम? तू कौन जेरू कम हीरातस? 31 इशसे दादेई-पड़दादेई जंगले मां स्वर्गरी रोटी खेइ, जैस जो मन्नो ज़ोतन। जेन्चरे पवित्रशास्त्रे मां लिखोरूए, तैनी तैन खानेरे लेइ स्वर्गरां रोटी दित्ती।” 32 यीशुए तैन सेइं जोंव, “अवं तुसन सेइं सच-सच ज़ोताई कि मूसा तुसन ते रोटी स्वर्गरां न दित्ती, पन मेरो बाजी तुसन सच्चरी रोटी स्वर्गरां देतो। 33 किजोकि जै रोटी परमेशर देते, ते ते ईए जै स्वर्गरां एइतां दुनियारे लोकन जिन्दगी देतीए।” 34 तैखन तैनी तैसे सेइं जोंव, “हे प्रभु, ए रोटी असन स्वर्गरां देतो रा।” 35 यीशुए तैन सेइं जोंव, “जिन्दगी रोटी (जै जिन्दगी देनेबाली रोटी) अवं आई, जै मीं कां एजते तै कथी निअन्नो न भोलो, ते जै मीं पुड़ विश्वास केरेलो तै कथी ट्लिशोरो न भोलो। 36 पन मीं तुसन सेइं पेड़लू ज़ोरूए, कि तुसेईं अवं लोरोई फिरी भी मीं पुड़ विश्वास न केरथ। 37 जैन किछ बाजी मीं देते तैन सब किछ मीं कां एजनुए, ते जै कोई मीं कां एज्जेलो अवं तैस ज़रूर कबूल केरेलो। 38 किजोकि अवं अपनि मर्जी नई, बल्के परमेशरेरी मर्जी पूरी केरनेरे लेइ स्वर्गरां ओरोई जैनी अवं भेजोरोई। 39 ईए मेरे बाजेरी मर्जी आप जैनी अवं भेजोरोई कि जैन किछ तैनी मीं दित्तोरोए तैस मरां अवं किछ न हिरेई, पन आखरी दिहैडी फिरी तैस ज़ीतो केरेलो। 40 किजोकि मेरे बाजेरी मर्जी ईए कि जै कोई मट्टे हेरे ते तैस पुड़ विश्वास केरे, तैस हमेशारी जिन्दगी मैल्ले, ते अवं तैस आखरी दिहैडी फिरी ज़ीतो केरेलो।” (aiōnios g166) 41 एल्हेरेलेइ यहूदी लोक तैस पुड़ कुड़कुड़ाने लगते, किजोकि तैनी ज़ोरू थियू, “जै रोटी स्वर्गरां ओरिए ते अवं आई।” 42 ते तैनेई जोंव, “कुन एन यूसुफेरू मट्टु यीशु नई, जेसेरे अम्मा बाजी अस जानमम? त ते केन्चरे ज़ोते कि अवं स्वर्गरां ओरोई?” 43 यीशुए तैन जुवाब दित्तो, “एप्पू मांमेइं न कुड़कुड़ाथ। 44 कोई मीं कां न एज्जी बट्टे ज़ातगर बाजी, जैनी अवं भेजोरोई, तैस मीं कां न आने, ते अवं तैस आखरी दिहैडी फिरी ज़ीतो केरेलो। 45 नेबी केरे पवित्रशास्त्रे मां एन लिखोरूए, ‘तैना सब परमेशरे तरफां शिखोरे भोनेन।’ जैनी बाजी करां शुनोरूए त शिखोरोरुए ते मीं कां एइते। 46 एसेरो मतलब ई नई कि केन्चे बाजी लोरोए, पन जै परमेशरे तरफां यानी मीं बाजी लोरोए। 47 अवं तुसन सेइं सच-सच ज़ोताई जै कोई विश्वास केरते हमेशारी जिन्दगी तैसेरीए। (aiōnios g166) 48 जिन्दगी रोटी (जिन्दगी देनेबाली रोटी) अवं आई। 49 तुशसे दादे-पड़दादेई जंगले मां मन्नो खाऊ ते मरे। 50 ई ते स्वर्गरी रोटीए कि मैन्हु खान ते न मरन। 51 जिन्दगी रोटी जै स्वर्गरां ओरिए अवं आई। अगर कोई इस रोटी मरां खाए, त हमेशा ज़ीतो रालो, ते जैस रोटी सेइं दुनियारे लोकन हमेशारी जिन्दगी मैल्ले, तैने मेरू मासे।” (aiōn g165) 52 एस पुड़ यहूदी लोक एप्पू मांमेइं बेस केरने लाए, “ई मैन्हु असन अपनु मास केन्चरे खाने जो देइ बटते?” 53 यीशुए तैन सेइं जोंव, “अवं तुसन सेइं सच-सच ज़ोताई, कि ज़ातगर तुस मैनेरे मट्टेरू यानी मेरू मास न खाले, ते मेरो खून न पीले, तुसन हमेशारी जिन्दगी न मैलेली। 54 जै मेरू मास खाते ते मेरो खून पीते हमेशारी जिन्दगी तैसेरीए ते आखरी दिहैडी अवं फिरी तैस ज़ीतो केरेलो। (aiōnios g166) 55 किजोकि हकीकि मां मेरू मास खानेरी चीजे ते मेरो खून पीनेरी चीजे। 56 जै मेरू मास खाते ते खून पीते तै मीं मां बनोरो राते, ते अवं तैस मां। 57 जेन्चरे ज़ीते बाजी अवं भेजोरोई, ते अवं बाजी केरे

कारन ज़ोताई, तेन्चरे तै भी जै मीं खालो मेरे कारन ज़ीतो रालो। 58 जै रोटी स्वर्गरां ओरिए, तैस रोटी ज़ेरी नई जै तुशसे दादे-पड़दादेई खाइ ते बादे मां मरे, पन जै कोई ई रोटी खालो तै हमेशा ज़ीतो रालो।” (aiōn g165) 59 इना गल्लां तैनी कफरनहूम नगरेरे एक्की प्रार्थना घरे मां ज़ोई। 60 एल्हेरेलेइ तैसेरे चेलन मरां बड़ेई एन शुन्तां जोंव, “ए शिक्षा सकते, एस कौन मेन्नी बटते?” 61 यीशु अपने मने मां एना बुझतां कि मेरे चले एस गल्ली पुड़ एप्पू मांमेइं कुड़कुड़ाने लोरेन, तैन पुच्छू, “कुन इना गल्लां तुसन मीं पुड़ विश्वास केरने करां रोकतिन?” 62 अगर तुस मैनेरू मट्टु यानी अवं जैडी पेड़लो थियो उबरे (स्वर्ग) गातो लाएले, त कुन भोलू? 63 परमेशरेरी आत्मा त जिन्दगी देने बालीए, मैन्हु केरि ताकती सेइं किछ न केरोए, जैना गल्लां मीं तुसन सेइं ज़ोई तैना परमेशरेरी आत्मा तरफां आन ते तैना जिन्दगी भी आन। 64 पन तुसन मां किछ एरे आन जैना विश्वास न केरन। किजोकि यीशु पेड़लो ज़ानतो थियो कि जैना विश्वास न थी केरते तैना कौन आन, ते तैस कौन ट्लवालो। 65 ते तैनी जोंव, “एल्हेरेलेइ मीं तुसन सेइं ज़ोरू थियू, ज़ातगर बाजी केरे तरफां एन वरदान न मैल्ले तातगर कोई मीं कां न एज्जी बट्टे।” 66 एस पुड़ तैसेरे चेलन मरां बड़े उलटे फिरे, ते तैल्ला पत्ती तैस साथी न चले। 67 तैखन यीशुए 12 चेलन सेइं जोंव, “कुन तुस भी च़लू गानू चातथ?” 68 शमौन परमेशर तैस जुवाब दित्तो, “हे प्रभु अस केस कां गाम? हमेशारी जिन्दगी देने बैली गल्लां त तींए कां आन। (aiōnios g166) 69 ते असेईं तीं पुड़ विश्वास कियो ते ज़ानू कि तू परमेशरेरो पवित्र मैन्हु आस।” 70 यीशुए तैन जुवाब दित्तो, “कुन मीं तुस 12 न चुने। फिर भी तुसन मरां अक मैन्हु शैताने।” 71 तैने इन तैस शमौन इस्करियोतेरे मट्टे यहूदा इस्करियोतेरे बारे मां जोंव। हांलाकि ते तैन 12 चेलन मरां अक थियो, जै यीशु ट्लवाने बालो थियो।

7 एना गल्लन पत्ती यीशु गलील इलाके मां फिरतो राव, किजोकि यहूदी लीडर तैस मारनेरी कोशिश केरि राओरे थिये, एल्हेरेलेइ तै यहूदिया इलाके मां फिरनू न चातो थियो। 2 यहूदी केरू झोंफडी केरू तिहार (तेम्बु) नेडू थियू। 3 एल्हेरेलेइ तैसेरे ढ़लाएई तैस जोंव, “इड़ी न रा। यहूदिया इलाके मां गा जैडी तिहार मनाने लोरेन, कि जैना चमत्कार तू केरतस तैना तेरे तैना चले भी हेरन, जैना यहूदिया इलाके मां रातन। 4 किजोकि एरो कोई न भोलो कि जै मशूर भोनु चाए, ते छेपतां कम केरे। अगर तू कम केरतस, त अपनो आप हिरा।” 5 किजोकि तैसेरे ढ़ला भी तैसेरो विश्वास न थी केरते। 6 तैखन यीशुए तैन सेइं जोंव, “मेरो लेइ ठीक वक्त हेजू नई ओरो, पन तुस केन्ची वक्त मां भी गेइ सकतथ। 7 इस दुनियारे लोक तुसन सेइं बैर न केरि सकन, पन मीं सेइं बैर रखतन किजोकि अवं तेन केरे खलाफ इन ज़ोताई कि तैना बुरां कम्मां केरतन। 8 तुस तिहारे मां गाथ, मीं हुना एस तिहारे मां नई एजनु, किजोकि मेरो हेजू ठीक वक्त नई ओरो।” 9 ते तैने सेइं एना गल्लां केरतां गलीले मां राव। 10 पन जैखन तैसेरे ढ़ला तिहारे मां चले जे त तै बांदो न पन छेपतां जेव। 11 यहूदी लीडर तिहारे मां यीशु तोपने लाए। तैना लोकन पुछ्छी राओरे थिये, “तै मैन्हु कोइ आए?” 12 ते लोकन मां तैसेरे बारे मां बल्हे-बल्हे बेइ गल्लां भोइ, किछ ज़ोते थी, “तै रोडो मैनुए।” ते किछ ज़ोते थी, “नई ते मैन्नू गुमरा केरते।” 13 फिरी भी यहूदी लोकां केरे प्रधानां केरे डेरे सेइं केन्ची भी मैन्हु तैसेरे बारे मां खुलतां तैसेरे बारे मां गल केरनेरी हिम्मत न भोइ। 14 जैखन तिहारेरे अध्ये दिहाइ बीते, त यीशु मन्दरेरे अंगने मां गेइतां शिक्षा देने लगे। 15 तैखन यहूदी लीडरेई हेरान भोइतां जोंव, “एनी त पवित्रशास्त्रेरी शिक्षा केन्ची करां नई पढोरोए, फिरी एस केन्चरे एना गल्लां एई?” 16 यीशुए तैन जुवाब दित्तो, “मेरी शिक्षा मेरी अपनि नई, बल्के परमेशरे तरफां आए, जैने अवं भेजोरोई। 17 अगर कोई तैसेरी मेर्जी पुड़ चलनू चाए, त ते इस शिक्षारे बार मां ज़ानेलो कि ए परमेशरे तरफां ए अवं अपने तरफां ज़ोताई। 18 जै अपने तरफां किछ ज़ोते तै अपनि बड़याई चाते, पन जै अपने भेजने बालेरी बड़याई चाते तै ईमानदार आए, ते तैस मां कोई बेइमानी नई। 19 तुसन मूसे कानून दित्तो, पन तुसन मरां कोई भी तैस पुड़ न चले। पन तुस लोक मीं मारनेरी कोशिश

केरतथा।” 20 लोकेई जुवाब दित्तो, “तीं पुड़ भूतेरो सैयोए! कौन तीं मारनेरी कोशिश केरते?” 21 यीशुए जुवाब दित्तो, “मीं अक चमत्कार कियो, ते तुस हैरान भोए। 22 एल्हेरेलेइ मूसा तुसन खतनेरो हुक्म दित्तो (एना नई कि मूसरे तरफाए बल्के बाप दादां करां चलतो ओरोए) ते तुस आरामेरे दिहाड़े मैनेरो खतनो केरतथा। 23 एल्हेरेलेइ आरामेरे दिहाड़े मैनेरो खतनो कियो गाते ताके मूसरे कानुनेरो हुक्म न टले, त तुस मीं पुड़ किजो क्रोध केरतथा, कि मीं आरामेरे दिहाड़े अक मैन्हु रोड़ेचारे ठीक केरो। 24 तुतर हेरतां इन्साफ न केरा बल्के ठीक-ठीक आदालत केरा।” 25 तैखन किछ यरूशलेम नगरेरे रानेबाले एपू मांमेई एक्की हीरि पुच्छने लगे, “कुन ए तै नई, जैस मारनेरी कोशिश चलोरेए? 26 पन तक्का, तै त खुले आम गल्लां केरते, ते कोई एस किछ न जोए। कुन लीडरेई सच्चे, सच ज्ञानू कि ए मसीहे? 27 पन ए मैन्हु मसीहे केन्चरे भोइ सकते? एस त अस ज्ञानतम कि ए कोट्टां ओरोए, पन जेइस मसीह एज्जेलो त कोई न ज्ञानेलो कि तै कोट्टां एज्जेलो।” 28 तैखन यीशुए मन्दरे अंगने मां शिक्षा देते बारे जोरे सेईं जोवं, “तुस मीं ज्ञानतथ ते इन भी कि अवं कोट्टां ओरोई। अवं एपू नई ओरो, पन मेरो भेजने बालो सच्चोए, तैस तुस न ज्ञानाथा। 29 पन अवं तैस ज्ञानताई, किजोकि अवं तैसरे तरफां ओरोई, ते तैनी अवं भेजोरोई।” 30 एस पुड़ लीडरेई ते टलानांचा थाव, फिरी भी केन्चे तैस सेइ हथ न लव, किजोकि तैसरो मरनेरो वक्त हेजू न थियो ओरो। 31 फिरी भी भीडी मरां बड़े लोकेई तैस पुड़ विश्वास कियो, ते जोने लाए, “मसीह जैखन एज्जेलो ते एट्टां जादे चमत्कार हिरालो जैना एने हीराहे?” 32 फरीसी लोकेई, लोक तैसरे बारे मां बल्हे-बल्हे एना गल्लां केरते थुने, ते प्रधान याजकेई ते फरीसी लोकेई तैस टलानेरे लेइ मन्दरेरे पहरदार भेजे। 33 एस पुड़ यीशुए जोवं, “अवं थोड़े चिरे तगर हेजू तुसन साथी आई, फिरी अवं अपने भेजने बाले कां वापस गानोई। 34 तुस मीं तोप्पेले, पन अवं नई मैलनो, ते जैडी अवं आई, तैडी तुस न एज्जी बटथा।” 35 एस पुड़ यहूदी लीडर एपू मांमेई जोने लगे, “ए कोरां चलोरे, जेरां अस न गेइ बटम? कुन ए तैन कां गालो जैना यूनान नगरे मां तितर-बितर भोइतां रातन, ते यूनानेरे लोकन भी शिक्षा देलो?” 36 एस गल्लरो कुन मतलबे जै एनी जोई, कि तुस मीं तोप्पेले, पन अवं तुसन न मैलेलो, ते जैडी अवं आई तैडी तुस न एज्जी बटतथा? 37 तिहारेरे आखरी दिहाड़े, जै खास दिहाड़ी भोतीए, तेइस यीशु खडो भोइतां जोने लगे, “अगर कोई टलिशशोरो एपू त मीं कां एज्जे ते पीये। 38 जै मीं पुड़ विश्वास केरे, जेन्चरे पवित्रशास्त्रे मां लिखेरूए, तैसरे दिले मरां ते पनेरे दरिया निस्सेले जैना जिन्दगी देतन।” 39 यीशुए एना गल्लां पवित्र आत्माेरे बारे मां जोई, जै विश्वास केरेने बालन पुड़ एजनेबाली थी, किजोकि पवित्र आत्मा हेजू तगर न थी दित्तोरी, किजोकि यीशु हेजू तगर अपनि महिमा मां वापस न थियो जोरोए। 40 तैखन भीडी मरां किछेई एना गल्लां श्रुतां जोवं, “सच्चे ई तै नबी आए, जेसरे एजनेरी अस उमीदी मां आम।” 41 किछ लोकेई जोवं, “ई मसीहे,” पन किछेई जोवं, “कुन मसीह गलील इलाकेरां एजनेओ? 42 पवित्रशास्त्रे मां लिखेरू कि मसीह दाऊदेरे खानदाने ते बैतलहम इलव्वे मरां एज्जेलो, जैडी दाऊद राजो रातो थियो।” 43 यीशुएरे बारे मां लोकां केरो अलग-अलग खियाल थियो, एल्हेरेलेइ तैन एपू मांमेई अनबन भोइ। 44 किछ तैन मरां तैस टलाने चाते थिये, पन केन्चे तैस सेईं हथ न लव। 45 तैखन मन्दरेरे पहरदार, प्रधान याजकन ते फरीसन कां एइतां तैन सेईं जोवं, “तुसेई तै किजो न आनो?” 46 पहरदारोई जुवाब दित्तो, “केन्चे मैने कधी एबी रोडो गल्लां न कियोरी, जेरि गल्लां ए मैन्हु केरते।” 47 फरीसेई तैन जुवाब दित्तो, “कुन तुस मीं टेपलोरैथ? 48 कुन सरदारन ते फरीसन मरां केन्चे तैस पुड़ विश्वास कियोरोए? 49 पन एन लोक जैना मूसरे कानूने न ज्ञाननू तैन पुड़ परमेशेरो फिटकार भोते।” 50 नीकुदेमुसे जै पेइलो तैस कां राती ओरो थियो, ते तैना मरां अक थियो, तैनी जोवं, 51 “कुन इशे कानून केन्ची मैन्हु सजा देनेरी अजाजत देते, जांतगर तैसेरी गल श्रुतां इन न ज्ञानम कि तै कुन केरते?” 52 तैनेई तैस जुवाब दित्तो, “कुन तू भी गलील इलाकेरो

आस! पवित्रशास्त्रे मां तोप ते ज्ञान, कि गलीलेरां कोई नबी त नई निसने बालो!” 53 (तैखन सब अपने-अपने घरे चले जे)।

8 पन यीशु अपने चेलन सेईं साथी जैतून पहाड़े पुड़ जेव। 2 होरसां तै झेझां-झेझां मन्दरेरे अंगने मां जेव, बड़े लोक तैस कां आए ते तै बिश्तां तैन शिक्षा देने लगे। 3 तैखन शास्त्री ते फरीसी लोक एक्की कुआन्शी जै बदमैशी मां टलेइयोरी थी, ते मझाते खडी केरतां यीशु सेईं जोवं, 4 “हे गुरु, ई कुआन्श बदमैशी केरते वक्त टलोरीए। 5 मूसरे कानूने मां मूसा असन हुक्म दित्तोरोए कि एरी जेरि कुआन्शी घोड़ेई बैइतां मारा, ते तू एस कुआन्शरे बाल मां कुन जोतस, कि अस एएस कुन केरम?” 6 तैनेई यीशु परखनेरे लेइ ए गल जोई, ताके तैस पुड़ दोष लाने जो गल मैल्ले। पन यीशु उन्डे लिक्ततां एंगलोई सेईं ज़मीनी पुड़ लिखने लव। 7 जैखन तैना तैस पुछते राए, त तैनी उबरे तेकतां तैन सेईं जोवं, “तुसन मरां जैनी पाप न भोए कियोरोए, तैए पेइलो घोड़े बाए।” 8 ते फिरी उन्डे लिक्ततां एंगलोई सेईं ज़मीनी पुड़ लिखने लव। 9 पन तैना एना श्रुतां बडन करां निकडन तगर सारे एक्की पत्ती अक तैट्टां चले जे, ते यीशु अकैल्लो राव, ते तै कुआन्श मझाते खडी राई। 10 यीशुए उबरे तेकतां तैस पुच्छ, “हे कुआन्श, तैना कोरां जे? कुन केन्चे तीं पुड़ सजारा हुक्म न दित्तो?” 11 तैसां जोवं, “हे प्रभु केन्चे नई।” यीशुए जोवं, “अवं भी तीं सजारा हुक्म न देई। अपने घरे जो गा ते फिरी पत्ती पापेरी न जिन्दगी जीयां।” 12 यीशुए फिरी लोकन सेईं जोवं, “दुनियारी लौ अवं आई, जै मीं पत्ती एज्जेलो त तै आंधरे मां न चलेलो, पन तै लौ हासिल केरेलो जै जिन्दगरी देचे।” 13 फरीसी लोकेई तैस सेईं जोवं, “तू अपनि गवाही एपू देतस, तेरी गवाही सच्चोई नई।” 14 यीशुए तैन जुवाब दित्तो, “भला अवं अपनि गवाही एपू देताई फिरी भी मेरी गवाही सच्चोई, किजोकि अवं ज्ञानताई कि अवं कोट्टां ओरोई ते कोरां गाताई? पन तुस न ज्ञानाथ कि अवं कोट्टां ओरोई ते कोरां गाताई। 15 तुस इन्सानेरी सोचरे मुताबिक इन्साफ केरतथा, अवं केन्चेरी इन्साफ न केरि। 16 ते अगर अवं इन्साफ केरि भी त मेरो इन्साफ सच्चोए, किजोकि अवं अकैल्लो नई, पन अवं ते मेरो बाजीए, जैनी अवं भेजोरोई। 17 मूसरे कानूने मां भी लिखोरोए कि दूई जनां केरि गवाही मिलतां सच्चो भोतीए। 18 अक त अवं अपनि गवाही देताई, ते दुइयोवं गवाही मेरो बाजी देते जैनी अवं भेजोरोई।” 19 तैनेई तैस पुच्छ, “तेरो बाजी कोडि आए?” यीशुए जुवाब दित्तो, “न तुस मीं ज्ञानतथा न मेरे बाजी, अगर मीं ज्ञानते त मेरे बाजी भी ज्ञानते।” 20 एना गल्लां तैनी मन्दरेरे अंगने मां शिक्षा देते भण्डार घरे मां जोई, ते केन्चे तै न टलाव, किजोकि तैसरो वक्त हेजू न थियो ओरो। 21 यीशुए फिरी तैन सेईं जोवं, “अवं ज्ञानताई कि तुस मीं तोप्पेले ते पाप केरते-केरते मरेले, जैडी अवं गाताई तैडी तुस न एज्जी बटथा।” 22 एस पुड़ यहूदी लीडरेई जोवं, “कुन एने अपनो आप मारनोए, जैन जोते कि जैडी अवं गाताई तैडी तुस न एज्जी बटतथा?” 23 यीशुए तैन सेईं जोवं, “तुस इस दुनियाई मां ज़मरिथ, अवं स्वर्गरां ओरोई। तुस दुनियारेथ, अवं दुनियारो नई। 24 एल्हेरेलेइ मीं तुसन सेईं ज़ोरू थियू, कि तुस अपने पापन मां मरेले, किजोकि अगर तुस विश्वास न केरेले कि अवं तैए आई त अपने पापन मां मरेले।” 25 यहूदी लीडरेई तैस सेईं जोवं, “तू कौन आस?” यीशुए तैन सेईं जोवं, “जैन शुरु करां जोतो ओरोई, अवं तैए आई। 26 तुशे बारे मां मीं बड किछ जोनूए ते फेसलो केरनोए, पन मेरो भेजने बालो सच्चोए, ते जैन मीं तैस करां शुनोरूए तैन दुनियारे लोकन सेईं जोताई।” 27 तैनेई एन न समझू कि असन सेईं बाजी केरे बारे मां कुन जोने लोरोए। 28 तैखन यीशुए जोवं, “जैखन तुस मैनेरे मट्टे यानी मीं उच्चे पुड़ चाढेले, त ज्ञानेले कि अवं तैए आई, अवं अपने आपे सेईं किछ न केरि, जेन्चरे मेरो बाजी मीं शिखालते तेन्चरे तैना गल्लां केरताई। 29 मेरो भेजने बालो मीं साथीए, तैनी अवं अकैल्लो नई शारोरो किजोकि अवं हमेशा तैन कम केरताई जैस सेईं तै खुश भोते।” 30 बड़े लोकेई यीशुएरी तैना गल्लां श्रुन्ते वक्त जैना तै जोई राओरो थियो तैस पुड़ विश्वास कियो। 31 तैखन यीशुए तैन यहूदन सेईं जैनेई तैस पुड़ विश्वास

कियोरो थियो ज्ञोवं, “अगर तुस मेरे वचने मां बनेरे राले, त सच्चे मेरे चले भोले। 32 तुस सच्र ज्ञानेले ते सच्र तुसन आजाद केरेलू।” 33 तैनेई तैस जुवाब दित्तो, “अस त अब्राहमेरे औलादी मरां आम, ते कधी केन्चरे गुलाम नई भोरे, फिरी तू केन्चरे ज़ोतस कि तुस आजाद भोले?” 34 यीशुए तैन जुवाब दित्तो, “अवं तुसन सेइं सच्र-सच्र ज़ोताई कि ज़ै कोई पाप केरते तै पापेरो गुलामे। 35 गुलाम हमेशा घरे न रेइ सके, मट्टु हमेशा रहते। (aiōn 9165) 36 एल्हेरेलेइ अगर मट्टु तुसन आजाद केरे त सच्चे तुस आजाद भोले। 37 अवं ज्ञानताई कि तुसा अब्राहमेरे औलादी मरां आथ, फिरी भी मेरी शिक्षा तुस मन्थ, एल्हेरेलेइ तुस मीं मारने चातथ। 38 अवं तैन्ने ज़ोताई ज़ैन मीं लव, ज़ैखन अवं अपने बाजी सेइं साथी थियो, ते तुस तैन्ने केरतथ ज़ैन तुसेईं अपने बाजी केरां शुनोरू।” 39 तैनेई तैस जुवाब दित्तो, “इश्शो पूर्वज त अब्राहमे।” यीशुए तैन सेइं ज़ोवं, “अगर तुस अब्राहमेरे औलादी मरां भोथे त अब्राहमेरां ज़ेरां कम्मां केरेथ। 40 पन हुन्ना तुस मीं मारनो चातथ, किजोकि मीं तुसन तैना सच्ची गल्लां ज़ोई ज़ैना मीं परमेशेरे करां शुनी, एरू त अब्राहमे न थियूं कियोरू। 41 तुस अपने बाजेरां ज़ेरां कम्मां केरतथ।” तैनेई तैस सेइं ज़ोवं, “अस बदमेशी सेइं नई ज़मारे, इश्शो अक्के बाजीए, ते तै परमेशेरे।” 42 यीशुए तैन सेइं ज़ोवं, “अगर परमेशर तुश्शो बाजी भोथो, त तुस मीं सेइं प्यार केरेथ, किजोकि अवं परमेशेरे करां ओरोई, अवं अपने तरफां नई ओरो, बल्के तैनी भेजोरोई। 43 तुस मेरी गल्लां किजो न समझथ? एल्हेरेलेइ कि तुस मेरी शिक्षा मन्नी न चाथ। 44 तुस अपने बाजी शैतानेरेथ, ते तैसेरी मर्जी पूरी केरनि चातथ। तै त शुरु करां खुनी आए ते सच्चे पुड बनोरो न राव, किजोकि सच्र तैस मां अस्थी नई। ज़ैखन तै झूठ ज़ोते त अपने सुभावेरे मुताबिक ज़ोते, किजोकि तै झूठो बल्के झूठेरो बाजीए। 45 पन अवं सच्र ज़ोताई तांए तुस मेरो विश्वास न केरथ। 46 तुसन मां मीं कौन पापेरो दोष लाते? अगर अवं सच्र ज़ोताई त फिरी मेरो विश्वास की न केरथ? 47 ज़ै परमेशेरे तरफां भोते तै परमेशेरी गल्लां केरते, ते तुस एल्हेरेलेइ न शुनथ किजोकि तुस परमेशेरे तरफां नई।” 48 एना शुन्तां यहूदेई तैस सेइं ज़ोवं, “कुन अस ठीक न थिये ज़ोते, कि तू सामरी मैन्हु आस, ते तीं मां भूते!” 49 यीशुए जुवाब दित्तो, “मीं मां भूत नई, पन अवं अपने बाजेरी इज़्ज़त केरताई, ते तुस मेरी निरादर केरतथ। 50 पन अवं अपनि बडयाई न चैई, हाँ अक्के ज़ै चाते कि लोक मेरी बडयाई केरन, ते तै आदालत केरनेबालो भी आए। 51 अवं तुसन सेइं सच्र-सच्र ज़ोताई कि ज़ै कोई मैन्हु मेरे वचने पुड चले तै कथे न मरेलो।” (aiōn 9165) 52 यहूदेई तैस सेइं ज़ोवं, “हुनी त असेईं बुझ्, कि तीं मां भूते, अब्राहम ते नबी भी मरे, ते तू ज़ोतस, अगर कोई मेरे वचने पुड चले त ते कथी न मरेलो। (aiōn 9165) 53 इश्शो पूर्वज अब्राहम मरो, कुन तू तैस करां भी बड्डो आस? ते नबी भी मरे, तू अपने बारे मां कुन सोचतस कि तू कौन आस?” 54 यीशुए जुवाब दित्तो, “अगर अवं अपनि बडयाई केरि त मेरी बडयाई किछ भी नई। पन मेरी बडयाई केरनेबालो मेरो बाजीए, ज़ैस तुस ज़ोतथ कि तै तुश्शो परमेशेरे। 55 तुसेईं त तै न ज़ानो, पन अवं तैस ज्ञानताई, अगर अवं ज़ोई कि तैस न ज़ैनी, त तुश्शो ज़ेरो झूठो भोइ। पन अवं तैस ज्ञानताई ते तैसेरे वचने पुड चलताई। 56 तुश्शो पूर्वज अब्राहम मेरी दिहाड़ी हेरनेरे उमीदी पुड बडी खुश थियो, ते तैनी हेरी, ते खुश भोव।” 57 यहूदेई तैसे सेइं ज़ोवं, “हेजू तू 50 साला केरो भी नई भोरो फिरी भी तीं अब्राहम लोरोए?” 58 यीशुए तैन सेइं ज़ोवं, “अवं तुसन सेइं सच्र-सच्र ज़ोताई कि अब्राहम पैदा भोने करां पेड़लो, अवं आई।” 59 तैखन तैनेई तैस मारनेरे लेइ घोड सल्ले, पन यीशु छेपतां मन्दरे मरां निस्सी जेव।

9 फिरी यीशुए अपने चेलन सेइं साथी च़ल्लोरो थियो, ते तैनेई अक मैन्हु लाव, ज़ै ज़मनेरो कानो थियो। 2 तैसेरे चेलेई तैस पुच्छू, “हे गुरु, केने पाप कियो कि ए कानो ज़रमो, एने मैने या एसेरे अम्मा बाजे?” 3 यीशुए जुवाब दित्तो, “न एने पाप कियो, न एसेरे अम्मा-बाजेई, पन तै एल्हेरेलेइ कानो ज़रमो ताके परमेशेरे चमत्कार एसमां लेईहोन। 4 ज़ैने अवं भेजोरोई, असेईं तैसेरू कम लूशी केरनु ज़रूरीए, ज़ैन कम तैनी असन दित्तोरू, तै रात

एजने बालीए ज़ैस मां कोई भी कम न केरि सके। 5 ज़ांतागर अवं दुनियाई मां आई, अवं दुनियारी लौ आई।” 6 एन ज़ोइतां तैनी ज़मनी पुड शुक्, ते तैस थुके सेइं मित्ती सन्नी, ते तै मित्ती कानेरे एछ्छन पुड लाई। 7 ते तैस सेइं ज़ोवं, “गा शीलोह नंवेरे हावदे मां अपनु तुत्तर धो” (शीलोहेरे मतलब भेजरो) तैनी गेइतां धोवं, ते लांतो वापस अवं। 8 तैखन तैस मैनेरे पड़ोसेईं त ज़ैनेई तै भीख मगतो लावरो थियो, एक्की होरि सेइं ज़ोने लग्गे, “कुन ई तैए मैन्हु नई ज़ै पेड़लो बिश्तां भीख मगतो थियो?” 9 किछ मैन्हु ज़ोने लाए, “ई तैए, होरेई ज़ोवं, “नई तैसेरो ज़ेरो कोई होरो भोनीए,” तैनी ज़ोवं, “अवं तैए आई।” 10 तैखन तैना तैस पुच्छने लग्गे, “तेरी एछ्छन केन्चरां लौ आई?” 11 तैनी जुवाब दित्तो, “यीशु नंवेरे एक्की मैने मित्ती सन्नी, ते मेरी एछ्छन पुड लेइतां मीं सेइं ज़ोवं, गा शीलोह हावदे मां गेइतां अपनु तुत्तर धो, ते अवं जेव ते मीं तुत्तर धोवं, ते लांने लाव।” 12 तैनेई तैस पुच्छू, “तै मैन्हु कोडि आए?” तैनी ज़ोवं, “मीं नई पतो।” 13 लोकेई तै ज़ै पेड़लो कानो थियो फरीसी लोकन कां नेव। 14 ज़ैस दिहाड़े यीशुए मित्ती सैनतां तैसेरी एछ्छी लौ दित्तो थी, तै आरामेरी दिहाड़ी थी। 15 फिरी फरीसी लोकेई भी तैस पुच्छू, “तैसेरी एछ्छन लौ केन्चरे आई?” तैनी तैस सेइं ज़ोवं, “तैनी मेरी एछ्छन पुड मित्ती लाई, फिरी मीं तुत्तर धोवं, ते अवं हुनी लाताई।” 16 एस पुड किछ फरीसी लोके ज़ोने लगे, “ए मैन्हु परमेशेरे तरफां नई, किजोकि ए आरामेरी दिहाड़ी न मन्ने।” होरेई ज़ोवं, “एरो ज़ेरो पापी मैन्हु एरे चमत्कार केन्चरे हिरेई बटते?” ते तैन एप्पू मांमेइं अनबन भोइ। 17 तैनेई काने फिरी पुच्छू, “ज़ैने तेरी एछ्छी खोलोरेन, तू तैसेरे बारे मां कुन ज़ोतस?” तैनी ज़ोवं, “तै नबी आए।” 18 पन यहूदी लीडरन विश्वास न भोव, कि तै कानो थियो ते हुनी लाते, ज़ांतागर तैनेई, तैसेरे अम्मा-बाजी न कुजाए। 19 तैन पुच्छू, कुन एन तुश्शू मट्टूए, “ज़ैस तुस ज़ोतथ कि कानो ज़मरू थियू? फिरी हुना केन्चरां लाते?” 20 तैसेरे अम्मा बाजीए जुवाब दित्तो, “असां त ज्ञानतम कि एन इश्शू मट्टूए, ते कानो ज़मरू थियू। 21 पन अस इन न ज्ञानतम कि अज़ केन्चरे लाते, ते न इन ज्ञानतम कि केने एसेरी एछ्छन लौ दित्ती, एन हुनी बड्डूए एस पुछ्छा, ए अपने बारे मां एप्पू ज़ोलो।” 22 एना गल्लां तैसेरे अम्मा बाजे एल्हेरेलेइ ज़ोई तैना यहूदी लीडरन करां डरते थिये, किजोकि यहूदी लीडर सारे अक भोरे थी, कि अगर कोई जोए, कि ए मसीह त तै प्रार्थना घरे मरां कड्डो गाए। 23 एल्हेरेलेइ तैसेरे अम्मा बाजे ज़ोवं, “एन बड्डूए, एस्से पुछ्छा।” 24 तैखन तैस मैन्हु ज़ै कानो थियो, दुइयोवं बार कुजेतां ज़ोवं, “सच्र ज़ोइतां परमेशेरी बड्याई केर, अस ज्ञानतम तै मैन्हु पापीए।” 25 तैनी जुवाब दित्तो, “अवं न ज़ैनी कि ए पापी कि नई, अवं अक गल ज्ञानताई, कि अवं कानो थियो हुनी लाताई।” 26 तैनेई तैस पुच्छू, “तैने तीं सेइं कुन कियू? तैनी केन्चरे तेरी एछ्छन लौ दित्ती?” 27 तैनी तैन सेइं ज़ोवं, “मीं त तुसन सेइं ज़ोवरूए, ते तुसेईं न शुनु, हुनी दुइयोवं बार किजो शुनु चातथ? कुन तुस भी तैसेरे चले बन्ने चातथ?” 28 तैखन तैना तैस बुरु भलू ज़ोने लाए, “तूए तैसेरो चेलोस, अस त मूसेरे चेलेम।” 29 अस ज्ञानतम परमेशेरे मूसा सेइं गल्लां की, पन एस न ज्ञानम कि ए कोट्टां ओरोए। 30 तैनी तैन जुवाब दित्तो, “ए त बडी बड्डो गल्ले कि तुस न ज्ञानाथ कि ए कोट्टां ओरोए, फिरी भी तैनी मेरी एछ्छन लौ दित्ती। 31 अस ज्ञानतम की चरमेशर पापी केरि न शुने, पन कोई परमेशेरो भक्त भोए त तैसेरे मेर्जी पुड चलतो भोए, त परमेशर तै तैसेरी शुनते। 32 दुनिया रचनेरे वक्ते करां कथे शुन्ने मां नई ओरोए कि केन्चे ज़मनेरे कानेरी एछ्छन लौ दित्तोरी, (aiōn 9165) 33 अगर ए मैन्हु परमेशेरे तरफां न भोथो त किछ न केरि सकेथो।” 34 तैनेई तैस ज़ोवं, “तू त बिलकुल पापन मां ज़मरोरूस, तू असन सिखालतस?” ते तैनेई तै प्रार्थना घरे मरां बेइरोवं कड्डो। 35 यीशुए शुनु कि तै बेइरोवं कड्डोरोए, ते ज़ैखन तैसेरी तैस सेइं मुलाकात भोइ, त तैस सेइं ज़ोवं, “कुन तू मैनेरे मट्टे पुड विश्वास केरतस?” 36 तैनी तैस जुवाब दित्तो, “हे प्रभु, मीं सेइं जो कि तै कौने, ताके अवं तैस पुड विश्वास केरि?” 37 यीशुए तैस सेइं ज़ोवं, “अव्वे आई, तीं अवं पेड़लो लोरोई, ज़ै तीं सेइं गल्लां केरि राओरोए।” 38 तैनी ज़ोवं, “हे प्रभु, अवं तीं पुड विश्वास केरताई।” ते तैस कां मथ्यो टेको। 39

तैखन यीशुए जोवं, “अवं इस दुनियाई मां ई इन्साफ केरने ओरोई, जैना न लान तैना लान, ते जैना लातन तैना काने भोन।” 40 जैना फरीसी लोक तैस सेइं साथी थिये तैनेई जोवं, “कुन तू असन जो भी काने ज़ोतस?” 41 यीशुए तैन सेइं जोवं, “अगर तुस काने भोथे त पापी न भोथे, पन हुनी ज़ोतथ कि अस लातम, एल्हेरेलेइ तुशे पाप माफ़ न भोले।”

10 “अवं तुसन सेइं सच-सच जोताई, कि जै कोई दारेरे बत्तां बाड़े मां न जाए, पन होरि बत्तां गाते, तै चोर ते डैकूए। 2 पन भैड्डां केरो पुहाल दारेरे बत्तां गाते। 3 तैसेरेलेइ दरबान दार खोलते, ते भैड्डां तैसेरी गल पिशेनतिन, ते तै अपनि भैड्डन नंवे सेइं कुजाते ते बेइर नेते। 4 ते जैखन तै अपनि सैरी भैड्डां बेइर कढते, त तैन केरे अग्री-अग्री चलते, ते भैड्डां तैस पत्ती-पत्ती गैतिन, किजोकि तैना तैसेरी आवाज़ पिशेनचन। 5 तैना बखले पत्ती न गैली, पन तैस करां नशशेली, किजोकि तैना बखलेरी आवाज़ न पिशानन्।” 6 यीशुए तैन सेइं मिसाल देइतां जोवं, पन तैनेई न समझू कि एसेरी गल्लां केरो कुन मतलबे, जैना तै असन सेइं ज़ोते। 7 तैखन यीशुए तैन सेइं फिरी जोवं, “अवं तुसन सेइं सच-सच जोताई, भैड्डां केरू दार अवं आई। 8 जेत्रे मीं करां पेइले आए सब चोर ते डैकून, पन मेरी भैड्डेई तैन केरि न शुनी। 9 दार अवं आई, अगर कोई मेरे ज़िरिये अन्तर गालो, त परमेशर तैस मुक्ति देलो, ते तै अन्तर बेइर एइतो गालो ते खूरक पालो। 10 चोर होरि कोन्ची कम्मरे लेइ न एज्जे, बल्के चोरी केरने ते मारने ते नाश केरने एइते, अवं एल्हेरेलेइ ओरोई कि तैन भरपूर ज़िन्दगी ज़ीन। 11 रोडो पुहाल अवं आई, रोडो पुहाल भैड्डां केरे लेइ अपनि जान देते। 12 जैखन नौकर गिद एइतू लाते त ते भैड्डां शैरतां नेशी गालो। किजोकि तै तैन केरो न पुहाले न मालिके, ते गिद तैन पुइ हमलो केरतां तितर-बितर केरते। 13 तै एल्हेरेलेइ नशते कि तै नौकर आए, ते तैस भैड्डां केरि फिक्र नई। 14 रोडो पुहाल अवं आई, अवं अपनि भैड्डां पिशानताई, ते मेरी भैड्डां मीं पिशेनचन। 15 जेन्चरे बाजी मीं ज़ानाते, तेन्चरे अवं भी तैस ज़ानताई, ते अवं भैड्डां केरे लेइ अपनि जान देताई। 16 ते मेरी होरि भी भैड्डन, जैना इस बाड़े मां नई, मीं तैना भी ऐनिन ज़रूरिन, तैना मेरी आवाज़ पिशेनेली, फिरी अक्के डेरो ते अक्के पुहाल भोनोए। 17 अवं अपनि जान देताई, एल्हेरेलेइ बाजी मीं सेइं प्यार केरते, कि अवं फिरी ज़ीतो भोई। 18 कोई मेरी ज़िन्दगी मीं करां न थसोडे, बल्के अवं एपू देताई, मीं तैस देनेरू भी अधिकारे ते नेनेरो भी अधिकारे, ई हुक्म मीं मेरे बाजी करां मैलोरोए।” 19 एल्लां पत्ती, यहूदन मां फिरी अनबन भोइ। 20 तैन मरां बड़े ज़ोने लाए, “तैस मां भूते, ते ते पागले, तैसेरी किजो शुनातथ?” 21 होरे लोकेईं ज़ोवं, “एपना गल्लां एरे मैनेरी नई ज़ैस मां भूत भोए, कुन भूत कांनो केरि एछछी खोल्ली बटते?” 22 यरूशलेम नगरे मां तिहार भोवं, ते हीवतडेरो मौसम थियो। 23 यीशु सुलैमानेरे मन्दरेरे अंगने मां हंठने फिरने लगगोरो थियो। 24 तैखन यहूदेई ते घेरो ते पुच्छू, “तू केइस तगर इशे दिले डामाडोल केरतस? असन सेइं साफ-साफ ज़ो। कुन तू मसीह आस?” 25 यीशुए तैन जुवाब दितो, “मीं तुसन सेइं ज़ोवं पन तुस विश्वास न केरथ। जैना कम्मां अवं अपने बाजी केरे अधिकारे सेइं केरताई तैना मेरे गवाह आन। 26 पन तुस एल्हेरेलेइ विश्वास न केरथ कि मेरी भैड्डन मरां नई। 27 मेरी भैड्डां मेरी आवाज़ पिशेनचन, अवं तैन ज़ानतथ, ते तैना मीं पत्ती-पत्ती चेलचन। 28 ते अवं तैन हमेशारी ज़िन्दगी देताई, तैना कधी नाश न भोले, ते कोई तैन मेरे हथ्ये मरां न थसोडी सके। (aiōn g165, aiōnios g166) 29 मेरो बाजी, जैनी तैना मीं दितोरिन, सेभन करां महान आए, ते कोई तैन बाजी केरे हथ्ये मरां न नेइ बटे। 30 अवं त बाजी अक्के आम।” 31 दुबारां फिरी, यहूदेई तैस घोडेव देनेरे लेइ फिरी घोड़ सल्ले। 32 एस पुइ यीशुए तैन सेइं ज़ोवं, “मीं अपने बाजी केरे तरफां बड़ां रोडां कम्मां हिरां, तैन मरां कोस कम्मरे लेइ घोडेव देतथ?” 33 यहूदेई तैस जुवाब दितो, “रोडां कम्मां केरे लेइ अस तीं पुइ घोडेव नई केरने लेवेरे, पन परमेशरारी तुहीन केरनेरे लेइ, एल्हेरेलेइ कि मैन्हु भोइतां अपनो आप परमेशर बनातस।” 34 यीशुए तैन जुवाब दितो, “मूसरे कानूने मां पन लिखो कि परमेशरे अपने लोकां केरे

लीडरन सेइं ज़ोवं कि तैना ईश्वरन। 35 (तुसन पत्तोए पवित्रशास्त्रेरी गल कोई भी बेदली न बटे) अगर परमेशरे तैन लोकन जो ईश्वर ज़ोवं जैन कां परमेशरेरू वचन पुज्जू, 36 फिरी तुस किजो ज़ोतथ कि तू तुहीन केरतस, जैखन अवं जोताई कि अवं परमेशरेरू मटू आई? बाजी परमेशरे अवं पवित्र ठहरेइतां दुनियाई मां भेजो। 37 अगर अवं अपने बाजेरू कम न केरि, त मेरो विश्वास न केरा। 38 पन अगर अवं अपने बाजेरू कम केरताई, त चाए तुस मेरो विश्वास न भी केरा, पन तैन कम्मन पुइ विश्वास केरा। तैखन तुस बुज्जले ते समझेले कि बाजी मीं मां आए, ते अवं बाजी मां आई। 39 तैनेई फिरी तैस ट्लानेरी कोशिश की, पन तै तैन करां चलो जेव।” 40 फिरी यीशु यरदन दरियारे पार तैस ठेरी जेव, जैडी यूहन्ना पेइले बपतिस्मो देतो थियो, ते तैडी राव। 41 बड़े लोक तैस कां एइतां ज़ोते थिये, “यूहन्ना त कोई चमत्कारी निशान न हिराव, पन जैन किछ यूहन्ना एसेरे बारे मां ज़ोवं, तैन सब सच थियूं।” 42 ते तैडी बड़ेई यीशु पुइ विश्वास कियो।

11 मरियम ते तैसेरी बेइन माथरि इल्वेवं बैतनिय्याह मां लाज़र नव्वेरो अक मैन्हु थियो 2 ई तैए मरियम थी ज़ैसां बादे मां प्रभु पुइ इत्र छेइतां अपने बालन सेइं तैसेरे पाव पुंछेरे थी, एसेरो ढला लाज़र बिमार थियो। 3 तैखन तैसेरी बेइने यीशु कां अक बिस्तार भेजो, “हे प्रभु, जैस सेइं तू प्यार केरतस ते बिमारो।” 4 जैखन यीशुए एन शुनू त ज़ोवं, “ए बिमारी मरनेरे लेइ नई बल्के परमेशरारी महिमारे लेइ आए, ताके तैसेरे ज़िरिये परमेशरारे मट्टेरी महिमा भोए।” 5 यीशु मार्या ते तैसेरी बेइन मरियम ते लाज़रे सेइं प्यार केरतो थियूं। 6 जैखन यीशुए शुनू कि, लाज़र बिमार, पन फिर भी दूई दिहाड़े तैडी बिशशो जैडी तै थियो। 7 दूई दिहैइना बाद यीशुए अपने चेलन सेइं ज़ोवं, “एज्जा, अस फिरी यहूदिया इलाके मां गाम।” 8 चले ज़ोने लगे, “हे गुरू, थोडे चिर पेइले यहूदी लीडर तीं घोड़ेई बाते थिये, ते तू फिरी तैडी गानू चातस?” 9 यीशुए जुवाब दितो, “कुन दिहैडी मां 12 घंटे न भोन? ज़ै दीसां चलते तैस ठोकर न लगे, एल्हेरेलेइ कि तै दुनियारी लोई मां चेलि सकेतो। 10 पन अगर ते राती चलते त आंधरे मां तैस ठोकर लगवे, किजोकि तैस कां लो नई।” 11 तैनी एना गल्लां जोई, ते अपने चेलन सेइं ज़ोने लगो, “इशशो दोस्त लाज़र झुलोरोए पन अवं तैस बीइयाने चलोरोई।” 12 तैसेरे चले ज़ोने लगे, “हे प्रभु अगर तै झुलोरोए त तै बीइलेलो।” 13 यीशुए लाज़रे मरनेरे बारे मां ज़ोरू थियूं, पन तैसेरे चलेई बुझू कि तैसेरो मतलब निडलारे बारे मां झुलोरोए, पन अवं तैस बीइयाने चलोरोई। 14 तैखन यीशुए रोडेचारे ज़ोवं, “लाज़र मेरि जेवरोए। 15 अवं खुश आई कि तुशे लोइ फेइदोए, कि अवं तैडी न थियो जैस सेइं विश्वास केरथ। हुनी एज्जा अस तैडी गाम।” 16 तैखन थोमा जैस जो दिदुमुस ज़ोतन, होरि चेलन सेइं ज़ोने लगो, “एज्जा, अस भी तैस सेइं साथी मरनेरे लेइ गाम।” 17 जैखन यीशुए बैतनिय्याह इल्वेवं मां पुज्जो त तैस पतो लगे, कि लाज़र दब्बोरे चेरे दिहाड़े भोरेन 18 बैतनिय्याह यरूशलेम नगरेां कोई ट्लाइ किलोमीटर दूर थियूं। 19 बड़े यहूदी लोक मार्या ते मरियमी कां तैन केरे ढला लाज़रे मरनेरां पत्ती तैना तसल्ली देने ओरे थियो। 20 जैखन मार्या शुनू कि यीशु ओरोए ते तैस सेइं मिलनेरे लेइ बेइर निस्सी, पन मरियम बेइर न निस्सी। 21 मार्या यीशुए सेइं ज़ोने लगी, “हे प्रभु, अगर तू इडी भोथो त मेरो ढला न थियो मरनो। 22 पन अवं ज़ानती, हुनी जैन किछ तू परमेशरे करां मगेलो, ते परमेशर तीं देलो।” 23 यीशुए तैस ज़ोवं, “तेरो ढला ज़ीतो भोइ गानोए।” 24 मार्या तैस सेइं ज़ोवं, “अवं ज़ानती तै आदालतेरे दिहाड़े ज़ेइस सारे लोक ज़ीते भोनेन, तेइस तै भी ज़ीतो भोइ गानोए।” 25 यीशुए तैस ज़ोवं, “मैनन् मुइदन मरां ज़ीते केरनेबालो अवं आई। ज़ै मीं पुइ विश्वास केरते तै मरनेरां बाद भी ज़ीतो रालो। 26 ते ज़ै कोई ज़ीतोए, ते मीं पुइ विश्वास केरते, तै कधे न मरेलो, कुन तू इस पुइ विश्वास केरचस?” (aiōn g165) 27 मार्या जुवाब दितो, “हौं प्रभु, मेरो विश्वास तीं पुइ, कि तू परमेशररू मटू मसीह जैन दुनियाई मां एजनेबालू थियूं।” 28 जैखन तैसां ए गल ज़ोई त ते वापस चली जैई, ते अपनि बेइन मरियम कनारे कुजेइतां ज़ोने लगी, “गुरू जी ओरेन ते तीं कुजाने लगोरेन।”

29 तै एन शुन्तां लूशी उट्टतां यीशु सेइं मिलने चली आई। 30 यीशु हेजु इलव्वें मां न थियो पुजोरो, पन तै तैडी थियो ज़ेडी मार्था तैस सेइं मिलोरी थी। 31 तैखन तैना यहूदी लोक ज़ैना मरियमी तस्सली देने ओरे थियो मरियम लूशी खडी उट्टतां बेडर जेई, त तैना भी तैस पत्ती बेडर जे, कि भोड सकते ए लेरां देने कर्नी पुड चलोरीए। 32 जैखन मरियम तैस ठारी पुज्जी ज़ेडी यीशु थियो त तैस लेइतां तै तैसेरे पवन पुड बिछडी जेई ते ज़ोने लगी, “हे प्रभु अगर तू इडी भोथो त मेरो ढ़ला न थियो मरनो।” 33 जैखन यीशुए तै ते तैस सेइं साथी एजनेबाले यहूदी लोक लेरां देते लाए, तै आत्माई मां उदास भोइतां बडो दुःखी भोव। 34 ते पुच्छ, “तुसेईं लाज़र कोडि रखखोरोए?” तैना ज़ोने लगे, “हे प्रभु, असन सेइं साथी एइते एप्पु हेर।” 35 यीशु लेरां देने लगे। 36 तैखन यहूदी लोक ज़ोने लगे, “हेरा, ए लाज़रे सेइं केत्रो प्यार केरतो थियो।” 37 पन तैन मरां किछ ज़ोने लगे, “कुन ज़ैनी कानेरी एछछन लौ दिती, इन भी न केरि बट्ट, कि ए मैन्हु न मरेथो?” 38 यीशु दुखी दिले सेइं कर्नी कां अव, तै अक कुढ थी, ज़ैस पुड अक घोड छडोरो थियो। 39 यीशु ज़ोने लगे, “घोड खडो केरा।” मार्था ज़ै लाज़री बेडन थी तै ज़ोने लगी, “हे प्रभु एस मरां त मुशक लोरीए एजने, किजोकि एण चेत्रे दिहाड़े मरें भोरेन।” 40 यीशुए तैस सेइं ज़ोवं, किजोकि, “मीं तुसन न थियूं ज़ोरु कि अगर तेरो विश्वास भोलो, त तू परमेशरेंरी महिमा हेरेली।” 41 तैखन तैनेई तै घोड घिसाव, ते यीशुए उबरे तेकतां ज़ोने लगे, “हे बाजी, अवं तेरु शुक़ केरतां कि तीं मेरी शुनी। 42 अवं ज़ानतो थियो, कि तू मेरी प्रार्थना शुन्तस पन अवं एन लोकां केरे लेइ ज़ैना चेत्रे पासन खेडोरेन एन ज़ोरु थियूं कि एना भी विश्वास केरन, कि तीं अवं भेजोरोई।” 43 एन ज़ोनेरां पत्ती यीशुए ज़ोरे सेइं ज़ोवं, “लाज़र बेडर निस।” 44 ते तै मुओरो लाज़र बेडर निस्सो ज़ेसेरे हथ पाव कफने सेइं बंधोरे थिये ते दोगे अक कपडो बंधोरो थियो। यीशुए तैन सेइं ज़ोवं, “एस खोल्ला ते एस गाने देथ।” 45 बडे यहूदी लोक ज़ैना मरियम सेइं मिलने ओरे थियो। ते तैसेरां इन्ना कम्मां हेरतां तैस पुड विश्वास कियो। 46 पन तैन मरां किछेई फरीसन कां गेइतां सब शुनावं ज़ैना यीशुए कियेरु थियूं। 47 एस पुड प्रधान याजकन ते फरीसी लोक महासभारे लोक अकोट्टे किये ते ज़ोने लगे, “अस कुन केरम? ए मैन्हु त इडी बडे चमत्कार लोरोए केरने। 48 अगर अस एस हुन्ना न रोकमेले त सारे लोक तैस पुड विश्वास केरेले, कि ए मसीह आप, ते फिरी रोमेइं इडी एइतां इश्शे मन्दरे ते इश्शी कौमी दुइने नाश केरेले।” 49 तैखन तैन केरे टोली मरां अक ज़ेसेरु नवं कैफा थियूं, ज़ै तैस साल मन्दरेरो महायाजक थियो ज़ोने लगे, “तुस लोक किछ न ज़ानाथ, 50 तुसन इन न समझथ कि, तुश्शे लेइ रोडूए, इश्शे लोकां केरे लेइ अक मैन्हु मरे, न कि इश्शे सारे लोक।” 51 ए गल तैनी अपने आपे सेइं न थी ज़ोरी, पन तैस साल महायाजक भोइतां भविष्यद्वाणी, कि यीशु इस्सएलेरे सारे लोकां केरे लेइ अपनि जान देलो। 52 तै सिर्फ इस्सएलेरे लोकां केरे लेइ नई, पन एल्लेरेलेइ भी कि ज़ैना परमेशरे बच्चे तितर-बितर भोरेन तैन अकोट्टे केरतां अक बनाए। 53 बस्सा, यहूदी लीडरेईं तैस दिहाड़े बाद यीशु मारेरो इरादो कियो। 54 एल्लेरेलेइ यीशुए तैस वक्ते करां यहूदन मां बांदि मां न फिरो, पन जंगलेरे नेडे एप्रम नगरे मां जेव, ते अपने चेलन सेइं साथी तैडी राने लगे। 55 तेइस यहूदी केरु फ़सह तिहार नेडे अव, ते बडे लोक आसेपासेरे इलाकन मरां यरुशलेम नगरे मांजो चले जे, ताके अपनो आप शुद्ध केरन। 56 तैना यीशु तोपते थिये तेइस तैना मन्दरे मां अकोट्टे भोए, ते एक्की होरि सेइं ज़ोने लगे, “तुस कुन समझतथ? कोई पतोए कुन ते इडी फ़सह तिहारे मां एज्जेलो कि नई?” 57 ते प्रधान याजकेई ते फरीसी लोकेई हुक्म दित्तोरो थियो कि अगर केन्ची पतो लगे कि यीशु कोडि आए त ज़ोथ दे ताके असां तैस गिरफ्तार केरम।

12 फ़सह तिहारे करां शा दिहाड़े पेइले यीशु बैतनिय्याह इलव्वें मांजो चलो अव, ज़ैडी लाज़र रातो थियो, ज़ै यीशुए मुडइन मरां जींतो कियोरो थियो। 2 तैडी तैनेई यीशुएरी खारदारी केरनेरे लेइ धाम बनाई। ते मार्था सेवा लोरी थी केरने, लाज़र भी तैन मरां अक थियो ज़ैना यीशु सेइं

साथी रोटी खाने बिश्शारे थियो। 3 तैखन मरियमा जटामासी सेइं बनोरो अथो लीटर खुशबूदार इत्र ज़ै बडो कीमती थियो, यीशुएरे पावन मल्लो, ते अपने दोग्गेरे बालन सेइं पोंछने लगी, ते सारु घर रोडी मुशकी सेइं भरोई जेव। 4 पन तैसेरे चेलन मरां अक यहूदा इस्करियोती नव्वोरो अक चेलो, ज़ैनी यीशु टलुवेवरो थियो ज़ोने लगे, 5 “ई इत्र 300 दीनारन मां बेचतां गरीबन किजो न दित्तो?” 6 तैनी एना गल्लां एल्लेरेलेइ न थी ज़ोरी, कि तैस गरीबां केरो खियाल थियो, पन एल्लेरेलेइ ज़ोवं कि तै चोर थियो, तैस कां पेइंसां केरि झोली भोती थी, ते ज़ैन किछ तैस मां रखते थी तै कडतो थियो। 7 यीशुए ज़ोवं, “एस तंग न केरा, एसां वक्तेरे पेइले मेरी जान दबबेनेरी तियारी कियोरीए। 8 किजोकि गरीब लोक त तुसन सेइं साथी सदा रातन, पन अवं तुसन सेइं साथी सदा नई रानो।” 9 मैन्हु केरि बडी भीडी तैडी आई ज़ैखन तैनेई शुनु कि यीशु तैडी अव। तैना सिर्फ यीशु नई बल्के लाज़रे भी हेरने ओरे थिये, ज़ै तैनी मुडइन मरां जींतो कियोरो थियो। 10 तैखन प्रधान याजके लाज़र भी मारनेरी सलाह की। 11 किजोकि बडे लोक यहूदी लीडरन करां चले जे, ते तैनेई यीशु पुड विश्वास कियो। 12 होरसां मैन्हु केरि बडी भीड तिहारे मां आई। ज़ैखन तैनेई शुनु कि यीशु भी यरुशलेम नगरे मां एजनेबालोए, 13 त तैनेई खजोरां केरि डेलडी हथ्यन मां रेखतां नहरे देते तैस सेइं मिलनेरे लेइ निस्से ते ज़ोवं लगे, “होशाना (तारीक) धने इस्सएलेरो राजो, ज़ै प्रभुएरे नव्वे सेइं एइते।” 14 ज़ैखन यीशु अक गधरो बच्चो मैल्लो, ते तै तैस पुड बिश्तां यरुशलेम नगरे मांजो अव, ज़ेन्चरे पवित्रशास्त्रे मां लिखोरुए तेन्चरे एन भोवं, 15 “हे सियोनेरी कुई (यरुशलमेरे लोक), तू न डर, हेर, तेरो राजो एज्जी राओरोए, ते तै गधरे बच्चे पुड चेटतां एज्जी राओरोए।” 16 पेइलू त यीशुएरे चेलेई किछ न समझू, पन ज़ैखन यीशुएरी महिमा बांदि भोड, तैनेई तैना सैरी गल्लां याद की, एन सब गल्लां तैसेरे बारे मां लिखोरी थी, ते लोकेई एरो ज़ेरो सलूख कियोरो थियो। 17 तैखन भीडरे लोकेई ज़ैना तैस सेइं थी, ई गवाही दिती, कि तैनी लाज़र कर्नी मरां कुजाव, ते मुडन मरां जींतो कियो। 18 एल्लेरेलेइ लोक तैस सेइं मिलनेरे लेइ आए, किजोकि तैनेई शुनोरु थियूं, तैनी ई चमत्कार कियोरे। 19 फरीसी लोक एन हेरतां एक्की होरि सेइं ज़ोने लगे, “सोचा, तुस लोक किछ नई केरि लोरे बटने, हेरा सारी दुनिया एस पत्ती चली।” 20 ज़ैना लोक फ़सह तिहारे मां यरुशलेम नगरे मां आराधना केरने ओरे थिये, तैन मां किछ यूनानी थियो। 21 तैना फिलिप्पुसे कां जे ज़ै गलीलेरे नगर बैतसेदा मां रातो थियो, तै ज़ोवले हथ केरतां ज़ोने लगे, “जनाब अस यीशु सेइं मिलनू चातमा।” 22 फिलिप्पुसे अन्दियासे सेइं ज़ोवं, ते अन्दियास फिलिप्पुसे सेइं साथी जेव ते यीशु सेइं ज़ोवं। 23 यीशुए तैन जुवाब दित्तो, “कि मैनेरे मट्टेरी यानी मेरी महिमा बांदि भोनेरो वक्त ओरोए। 24 अवं तुसन सेइं सच-सच ज़ोताई, कि जांतगर गेहुं केरो ग्लेव मिती मां न मरें, तै अक्के रहते, पन ज़ैखन मरते त बडो फल आनते, (तेन्चरे मीं सेइं साथी भोनुए)। 25 ज़ै अपनि जान टलारी रखते ते अपनि जान गुवाते, पन ज़ै अपनि जानी सेइं बैर रखते ते अक हमेशारी जिन्दगी बचालो। (aiōnios gl166) 26 ज़ै कोई मेरी सेवा केरनि चाते त तैसेरेलेइ ज़रूरीए ते मेरो चेलो बने, ताके ज़ैडी अवं आई तैडी मेरो सेवक भी भोए, ज़ै मेरी सेवा केरते मेरो परमेशर तैस इज़्जत देलो।” 27 “हुना मेरो दिल बडो उदास भोरोए। एल्लेरेलेइ अवं कुन ज़ोई? ‘हे बाजी इस दुखेरी घेडी करां मीं बचा, पन अवं इस दुनियाई मां एल्लेरेलेइ ओरोई कि दुःख झेल्ली। 28 हे बाजी तू केत्रो महिमा बालोस इन बांदू केर।” तैखन स्वर्गरां अक आवाज़ आई, “मीं तेरी केत्री महिमा बांदि कियोरीए ते फिरी भी केरेलो। 29 तैखन तैडी ज़ैना मैन्हु खडे भोइतां शुनी रावरे थिये, तैनेई ज़ोवं, गुडने लोरुए,” ते होरेई ज़ोवं, “केन्चे स्वर्गदूते तैस सेइं गल की।” 30 यीशुए ज़ोवं, “ई आवाज़ मेरे फेइदेरे लेइ नई बल्के तुश्शे लेइ आए। 31 इस वक्त परमेशर दुनियारे लोकां केरो इन्साफ केरेलो, ते अवं इस शैतानेरी शक्ति नाश केरेलो ज़ै इस दुनियाई पुड राज़ केरते। 32 ते ज़ैखन अवं ज़मीनी पुडां उच्चे च़ाढो गालो, तैखन अवं सैरी लोकन एप्पु कांजो आनेलो।” 33 एन ज़ोइतां तैनी साफ च़ारे बांदू कियूं ते तै केन्चरां मरने बालो। 34 एस पुड लोकेई ज़ोवं,

“असेई मूसरे कानूने मां ई गल शुनोरीए, कि मसीह हमेशा रानोए, फिरी तू केन्चरे जोतस कि मैनेर मट्टे उच्छे पुड़ चढनू ज़रूरीए? एन मैनेरे मट्टे कौने?” (aiōn g165) 35 यीशुए तैन सेईं जोवं, “लौ तुसन कां थोड़े चिरे तगरे आए, जां तगर लौ तुसन साथीए, तांतगर चलते राध, एरू न भोए आंधरू तुसन घेरे, जै आंधरे मां चलते तैन न ज्ञाने तै कोरां चलरोए। 36 जांतगर लौ तुसन सेईं साथीए, त लोईं पुड़ विश्वास केरा ताके तुस लोअरे बच्चे बनथ।” इना गल्लां जोइतां यीशु छेप्पी जेव। 37 तैनी तैन केरे सामने बड़े चमत्कार हिराए, फिरी भी तैनेईं विश्वास न कियो। 38 ताके यशायाह नेबरू जोरू वचन पूरू भोए, “हे प्रभु, केन्चे इश्शे खुशखेबरी पुड़ विश्वास न कियो, ते बड़े लोकेईं परमेशरेरी शक्ति हेरतां भी कबूल न की।” 39 एल्हेरेलेइ तैना विश्वास न केरि सके यशायाह एक्की होरि ठैरी जोते: 40 “तैनी तैन केरि एछछी केनि की, ते मन सखत कियोरोए, एरू न भोए कि तैना एछछन सेईं लान ते मने सेईं बुझन, ते माफ़ी मगन ते अवं तैन बज्जेईं।” 41 यशायाह नबी एल्हेरेलेइ जोतो थियो, कि तैनी यीशुएरी एजनेबाली महिमा लवरी थी, ते तैसेरे बारे मां गल भी की। 42 फिरी भी लीडरन मरां बड़ेईं यीशु पुड़ विश्वास कियो, पन फरीसी लोकां केरे वजाईं सेईं बांदे मां न थिये मन्ते, एरू न भोए कि असन प्रार्थना घरे मरां कढन। 43 किजोकि मैन्हु केरि बड़याईं तैन परमेशरेरी बड़याईं करां जादे रोडी लगती थी। 44 तैखन यीशुएरी सेईं जोवं, “जै कोई मीं पुड़ विश्वास केरते तै मीं पुड़ नईं पन मेरे भेजने बाले परमेशरे पुड़ विश्वास केरते। 45 ते जै मीं हेरते तै मेरे भेजने बाले हेरते। 46 अवं दुनियाईं मां अक लौ बेनतां ओरोईं, ताके जै मीं पुड़ विश्वास केरे तै आंधरे मां न रालो। 47 अगर कोई मेरी गल्लां शुन्तां तैन पुड़ अमल केरे, त अवं तैस दोष न लेइलो, अवं दुनियारे लोकन पुड़ दोष लाने नईं पन मुक्ति देने ओरोईं। 48 जै मेरो इन्कार केरते ते मेरी गल्लां कबूल न केरे, तैस पुड़ दोष लानेबालो अक्के, मतलब जैन वचन मीं जोरूए, तैन आखरी दिहाड़े तैस दोषी ठैरालू। 49 किजोकि मीं अपने अधिकारे सेईं किछ नईं जोरू, पन बाजी जैने अवं भेजोरोईं तैनी मीं हुकम दितोरोए, कि कुन-कुन जोईं ते कुन-कुन शुनेईं? 50 ते अवं ज्ञानताईं कि तैसेरो हुकम मन्ने सेईं हमेशारी जिन्दगीए मैलतीए, एल्हेरेलेइ अवं तुसन सेईं तैन्ने जोताईं जैन ज्ञानेरो हुकम मेरे बाजे मीं दितोरोए।” (aiōnios g166)

13 फ़रसह तिहारेरे पेइले दिहाड़े यीशुए जैनीं छुड़, कि मेरो दुनियाईं मरां बाजी कां वापस गानेरो वक्त ओरोए। तै अपने लोकन सेईं जैना दुनियाईं मां थिये जेरो प्यार केरतो थियो, तेरहो प्यार आखरी तगर केरतो राव। 2 शैताने शमोनेरे मट्टे यहूदा इस्करियोतेरे दिले मां पेइले यीशु टलुवानेरो खियाल छुडोरो थियो। यीशु त कने तैसेरे चले इलाईं खानेरो लोरे थियो। 3 यीशु पतो थियो कि बाजे सेरी चीजां तैसेरे हथ्ये मां दितोरिन, ते कने तै परमेशरेरी तरफां ओरोए ते परमेशरे कांजो वापस चलरोए। 4 एल्हेरेलेइ तै रोटी छेडतां खडो उठो ते अपनू कोट खोल्लू, ते अक तोलियो अपने लखे सेईं पलैतो। 5 तैखन तैनी अक भांड टलावं ते तैस मां पानी छाडु ते अपने चेलां केरे पाव धोइतां लखे बन्धारे तोलिये सेईं पोछे। 6 जैखन तै शमोन पतरस कां अवं त पतरसे जोवं, “हे प्रभु, कुन तू मेरे पाव धोने लोरस?” 7 यीशुए जुवाब दितो, “जैन अवं केरने लोरोईं तू हुना न बुझस, पन पीतू तू बुझोले।” 8 पतरसे तैस सेईं जोवं, “तू मेरे पाव कधे न धोईं सकस!” यीशुए तैस सेईं जोवं, “अगर अवं तेरे पव न धोईं, त तू मेरो चेला नईं।” (aiōn g165) 9 शमोन पतरस यीशु सेईं ज्ञाने लगे, “जैनीं निहावरूप, तैस पावां केरे अलावा होरू धोनेरू किछ ज़रूरत नईं। ते बिलकुल शुद्धे, ते तुस शुद्धथ, पन सारे नईं।” 11 तै त टलुवांने बाले ज्ञानतो थियो एल्हेरेलेइ तैनी जोवं, “तुस सब शुद्ध नईं।” 12 जैखन यीशुए सेब्भी केरे पाव धोए त अपनू कोट लेइतां अपनि ठैरी बिश्शो तैखन तैनी तैन पुच्छू, “कुन तुस समझतथ कि मीं तुसन सेईं कुन कियू? 13 तुस मींजो गुरु, ते प्रभु जोतथ, तुशू जौन ठीके, किजोकि अवं आईं। 14 अगर मीं तुशू गुरु त कने प्रभु भोइतां तुशू पाव धोए, त तुशू भी फज्ज कि एक्की होरेरे पाव धोथ। 15 किजोकि मीं तुसन अक नमूने

हिराव, कि जेन्चरे मीं पाव धोए तुस भी एरू केरथ। 16 अवं तुसन सेईं सच-सच जोताईं, कि नौकर अपने मालिके करां बड्डो न भोए, ते न भेजोरो भेजने बाले करां। 17 तुस त एना गल्लां ज्ञानतथ, ते अगर तैन पुड़ अमल केरतथ त तुस धन आथ। 18 अवं तुसन सेब्भी केरे बारे मां न जोईं, जैना मीं चुनोरेन अवं तैन ज्ञानताईं, पन इन एल्हेरेलेइ आए, कि पवित्रशास्त्रेए एन वचन पूरू भोए, जैने मेरी रोटी खाइ, तैए मेरे खलाफ भोव। 19 अवं तैन भोने करां पेइले तुसन जोताईं कि जैखन भोए त विश्वास केरथ कि अवं तैए आईं। 20 अवं तुसन सेईं सच-सच जोताईं कि, जै मेरे भेजोरे कबूल केरते तै मीं कबूल केरते, ते जै मीं कबूल केरते तै मेरे भेजनेबाले बाले कबूल केरते।” 21 एना गल्लां जोइतां यीशु आत्माईं मां उदास भोइतां बड्डो दुःखी भोव, ते अपने चेलन सेईं ज्ञाने लगे, “अवं तुसन सेईं सच-सच जोतां, कि तुसन मरां एक्के अवं टलुवानोईं।” 22 चले एक्की होरेरे पासे तकने लगे, किजोकि तैन पतो न थियो कि ए केसरे बारे मां ज्ञाने लोरोए। 23 तैसेरे चेलन मरां अक चेलो जैस सेईं यीशु प्यार केरतो थियो, यीशुएरे नेडे बिशोरो थियो। 24 तैखन शमोन पतरसे तैसेरे पासे इशारे सेईं पुच्छू, “जो कसरे बारे मां ज्ञाने लोरोए?” 25 तैखन तेन्चरे यीशुएरे छैतरे पासे लिकतां पुच्छू, “हे प्रभु, तै कौने?” 26 यीशुए जुवाब दितो, “जैस अवं ई रोडोरो टुकडो डोबतां देइलो तैए।” ते यीशुए टुकडो डोबतां शमोनेरे मट्टे यहूदा इस्करियोती दितो। 27 ते टुकडो नेनेरे पती तै शैतानेरे बस्से मां भोइ जेव, तैखन यीशुए तैस जोवं, “तीं जैन किछ केरनूए, लूशी केरा।” 28 पन होरि केन्ची ए पतो न लगे कि ए गल यीशुए केसरे बारे मां की। 29 यहूदा कां पेइसां केरी थेलडी भोती थी, ते किछेईं समझू, कि यीशु तैस सेईं जोते, कि जैन किछ असन तिहारेरे लेइ लोइते तैन घिन्ने, या गरीबन किछ दे। 30 तैखन यहूदा टुकडो खेइतां बेइर चल्लो जेव, तै रातरो वक्त थियो। 31 जैखन तै बेइर जेव त यीशु ज्ञाने लगे, “हुनी मैनेरे मट्टे यानी मेरी महिमा भोइ, ते मेरे ज़िरेरे परमेशरेरी महिमा भोइ, 32 ते परमेशर भी मीं एप्यू महिमा बालो केरेलो, बल्के जल्दी केरेलो। 33 हे मेरे दोस्तव, अवं किछ चिरेरे लेइ हेजू तुसन सेईं साथी आईं, फिरी तुस मीं तोप्येले, ते जेन्चरे मीं यहूदन भी जोवं, जैडी अवं गाताईं तैडी तुस न एज्जी बटथ, तेन्चरे अवं तुसन सेईं भी जोताईं। 34 अवं तुसन अक नव्वो हुकम देताईं कि, एक्की होरि सेईं प्यार केरा, जेन्चरे मीं तुसन सेईं प्यार कियो तुस भी एक्के होरि सेईं प्यार केरा। 35 अगर तुस एक्के होरि सेईं प्यार केरेले त सेब्भी लोकन पतो लग्येले, कि तुस मेरे चेलेथ।” 36 शमोन पतरसे तैस पुच्छू, “हे प्रभु तू कोरां चल्लोरोस?” यीशुए जुवाब दितो, “जेरां अवं चल्लोरोईं तू हुना मीं सेईं साथी न एज्जी सकस, पन बांदे मां एज्जी सकतस।” 37 पतरसे जोवं, “हे प्रभु अवं हुना तीं सेईं साथी किना एज्जी सेखी? अवं त तेरे लेइ अपनि जान भी देनेरे लेइ तियार आईं।” 38 यीशुए जुवाब दितो, “कुन तू मेरे लेइ अपनि जान देलो, अवं तीं सेईं सच-सच जोताईं कि कुकड बांग देने करां पेइले तू मेरो टलेइ बार इन्कार केरेलो।”

14 “तुशूओ दिल उदास न भोए, तुस परमेशरे पुड़ विश्वास केरतथ, मीं पुड़ भी विश्वास केरा। 2 मेरे बाजोरे घरे मां बड़े कमरेन, अगर न भोथी त अवं तुसन सेईं जोथो, किजोकि अवं तुशू लेइ ठार तियार केरने चल्लोरोईं। 3 अगर गेइतां तुशू लेइ ठार तियार केरि त वापस एइतां तुसन एप्यू सेईं साथी नेलो, ताके जैडी अवं भोलो तुस भी तैडी भोथ। 4 ते जेरां अवं चल्लोरोईं तुस तैठैरी बत ज्ञानतथ।” 5 थोमा तैस जोवं, “हे प्रभु, असन नईं पतो तू कोरां चल्लोरोस, ते फिरी बत केन्चरे ज्ञानम?” 6 यीशुए तैस सेईं जोवं, “बत, सज़्जी ते हमेशारी जिन्दगी अवं आईं, कोई मेरे ज़िरेरे बैगर बाजी कां न एज्जी सके। 7 अगर तुसेईं अवं पिशानोरो भोथो त मेरे बाजी भी पिशानेथे, पन हुनी तुस तैस ज्ञानतथ ते कने लाव भी।” 8 फिलिप्पुसे तैस सेईं जोवं, “हे प्रभु असन बाजी हिरा, तैन्ने इश्शे लेइ बडू आए।” 9 यीशुए तैस सेईं जोवं, “फिलिप्पुस, एत्रे चिरे अवं तुसन सेईं साथी राव कुन तू मीं न ज्ञानस जैनीं अवं लाव तैनी बाजी भी लाव तू किजो जोतस असन बाजी हिरा? 10 कुन तू विश्वास न केरस, कि अवं बाजी मां आईं ते बाजी मीं मां आए? अवं

जैना गल्लां तुसन सेइं जोताई तैना गल्लां अवं अधिकारे सेइं न जोई, बल्के बाजी मीं मां रेइतां अपनू कम करेते। 11 मेरो विश्वास केरा, कि अवं बाजी मां आई ते बाजी मीं मां आए, नई त जैना कम्मां केरताई तैन हेरतां मीं पुइ विश्वास केरा।” 12 अवं तुसन सेइं सत्र-सत्र जोताई, “कि जै मीं पुइ विश्वास केरते, एना कम्मां जैना अवं केरताई तै भी केरेलो, बल्के मीं करां भी बडां कम्मां केरेलो, किजोकि अवं बाजी कां च़लरोई। 13 जैन किछ तुस मेरे नंवे सेइं मगले अवं तुसन देलो कि बाजी केरि महिमा मट्टेरे वजाई सेइं बांदी भोए। 14 अगर तुस मेरू नंवे सेइं किछ भी मगले त अवं तैन केरेलो।” 15 “अगर तुस मीं सेइं प्यार केरतथ त मेरे हुकमन मननेले। 16 ते अवं बाजी कां प्रार्थना केरेलो ते तै तुसन अक महदतगार देलो कि हमेशा तुसन सेइं साथी रालो। (aiōn q165) 17 मतलब ते आत्मा जै परमेशेरे बरे मां सत्र बांदू केरेली, जै दुनिया कबूल न केरि सके, किजोकि न तैस लेइहोए न ज़ाने, तुस तैस ज़ातथ किजोकि तै तुसन साथी रहती, ते तै तुसन मां भोली। 18 अवं तुसन अकैल्लो न शेरलो बल्के अवं तुसन कां एज्जेलो। 19 ई दुनिया किछ च़िरेरां बाद मीं न लाएली, पन तुस मीं लांते राले, किजोकि अवं ज़ांतोई ते तुस भी जींते राले। 20 ज़ैखन अवं जींते भोलो तेइस तुसन पतो लगलेलो, कि अवं अपने बाजी मां आई ते तुस मीं मां आथ ते अवं तुसन मां आई। 21 जैस कां मेरे हुकम आन ते तैन मनने, त तैप मीं सेइं प्यार केरते ते मेरो बाजी तैस सेइं प्यार केरेलो, ते अवं तैस सेइं प्यार केरेलो, ते अपनो आप तैस पुइ बांदो केरेलो।” 22 तैखन यहूदा (तै यहूदा इस्करियोती न थियो बल्के होरो चेलो थियो) तैस सेइं जोवं, “हे प्रभु कुन भोव कि तू अपनो आप असन पुइ बांदो केरनो चातस ते दुनियारे लोकन पुइ नई?” 23 यीशुए जुवाब दित्तो, अगर कोई मीं सेइं प्यार केरते त तै मेरी शिक्षाई मनने, ते मेरो बाजी भी तैस सेइं प्यार केरेलो, ते अस तैस कां एजमेले ते तैस सेइं साथी रामेले। 24 जै मीं सेइं प्यार न केरे, तै मेरे शिक्षाई न मनने, जै शिक्षा तुस शुन्ने लोरथ, मेरी नई पन मेरे बाजी केरि जैने अवं भेजोरोई। 25 “एना सैरी गल्लां मीं तुसन साथी रेइतां जोई। 26 पन तै महदतगार यानी पवित्र आत्मा जैस बाजी मेरे ठैरी भेजेलो, तुसन सैरी गल्लां शिखालेले, ते हर गल जै मीं तुसन सेइं ज़ोरी याद करालो।” 27 अवं तुसन शान्ति देइतां जै मीं कां आए, जेन्चरे दुनिया देचे तेन्चरे नई, तुशशो दिल उदास न भोए ते न डेरथ। 28 तुसेईं शुन्, मीं तुसन सेइं जोवं, अवं गाताई तुसन कां फिरी एज्जेलो अगर तुस मीं सेइं प्यार केरते भोते त खुशी भोने थिये, कि अवं बाजी कां च़लरोई किजोकि बाजी मीं करां बड्डोए। 29 मीं सैरी गल्लां पेइले तुसन जोरिन कि ज़ैखन तैना पूरी भोन त तुस विश्वास केरेले। 30 हुनी अवं तुसन सेइं जादे गल्लां न केरेलो, किजोकि शैतान एइते, जै इस दुनियाई पुइ राज केरनेवालोए। मीं पुइ तैसेरो किछ अधिकार नई। 31 जेन्चरे बाजीए मीं हुकम दित्तो, अवं तेन्चरे केरताई। पन एन एल्हेरेलेइ भोते कि दुनिया ज़ाने, कि अवं बाजी सेइं प्यार केरताई। ते उठा इट्टां च़लम।

15 यीशुए जोवं “अवं दाछारू सत्रू बड़ह अवं आई, ते मेरो बाजी बागबाने। 2 जै डालडी मीं मां आए, ते तैस फल न लगे, तै कट्टी गानीए, ते जैस फल लगते तैस छांटे कि जादे फल लगे। 3 तुस तैस शिक्षाई सेइं जै मीं तुसन दित्तोरीए शुद्ध आथ। 4 तुस मीं मां बनोरे राथ, ते अवं तुसन मां, जेन्चरे डालडी अगर बड़हे सेइं बनोरी न राए, त अपने आप सेइं तैस फल न लगे। तेन्चरे तुसन भी अगर मीं मां बनोरे न राले त तुस फलदार न भोइ सकेले। 5 अवं दाछारू बड़ह आई, तुस डेलडी आथ, जै मीं मां बनोरो रहते तैस खूब फल लगते, किजोकि मीं करां अलग भोइतां तुस किछ न केरि सखत। 6 अगर कोई मीं मां बनोरो न राए, त तैस डेलडारो ज़ेरोए जैस केटां शारतन, ते शुक्की गाचे, ते लोक घेरतां अगगी मां फुकी छडन। 7 अगर तुस मीं मां बनोरे रातथ ते मेरी गल्लां तुसन मां बेनोरी रैतिन त जैन चाहेले ते मगले तुसन दित्तू गालू। 8 मेरे बाजेरो महिमा एसमां आए कि तुस हछो फल आना, फिरी तुस मेरे चले भोले। 9 जेन्चरे बाजे मीं सेइं प्यार कियो, तेन्चरे मीं भी तुसन सेइं प्यार कियो। मेरे प्यारे मां बनोरे राथ।

10 अगर तुस मेरे हुकमन मननेले, त मेरे प्यारे मां बनोरे राले, जेन्चरे मीं अपने बाजेरे हुकम मनने, ते तैसेरे प्यारे मां बनोरो राव। 11 मीं एना गल्लां एल्हेरेलेइ तुसन जोरिन, कि मेरी खुशी तुसन मां बनोरी राए।” 12 “मेरो हुकमे ई आए जेन्चरे मीं तुसन सेइं प्यार कियो, तुस भी एककी होरि सेइं प्यार केरा 13 एस करां जादे प्यार केन्चे नई कियोरो, कि कोई अपने दोस्तां केरे लेइ अपनि जान दे। 14 जै हुकम अवं देताई, अगर तुस तैस मनन्थ, त मेरे दोस्त आथ। 15 अज़ेरे बाद अवं तुसन जो नौकर न जोइलो, किजोकि नौकर न ज़ाने कि तैसेरो मालिक कुन केरते। मीं तुसन जो दोस्त जोरूए, किजोकि जैन किछ मीं बाजी करां शुनोरूए तुसन भी शुनावरू आए। 16 तुसेईं अवं नई चुनोरो पन मीं तुस चुनोरेथ ते ठहरावरे भी आथ, ताके तुस गेइतां फल आनथ, ते तुशशो फल बनोरो राए, कि तुस मेरे नंवे सेइं बाजी करां जैन किछ मगथ, ते तुसन देलो किजो तुस मेरे चलेथ। 17 अवं इन गल्लां केरो हुकम एल्हेरेलेइ देताई, कि तुस एककी होरि सेइं प्यार केरा।” 18 “अगर दुनियारे लोक तुसन सेइं दुश्मनी रखतन, त याद रखा कि तैनेई पेइले मीं सेइं दुश्मनी रखोरी। 19 अगर तुस दुनियारे भोथे, त दुनिया अपने लोकन सेइं प्यार केरती, पन हुनी तुस दुनियारे लोक नई किजोकि मीं तुस दुनियाई मरां चुनोरेथ तांए दुनियारे लोक तुसन सेइं दुश्मनी रखतन। 20 ते गल जै मीं तुसन सेइं ज़ोरी थी याद रख्खा, नौकर अपने मालिके करां बड्डो न भोए, अगर दुनियां अवं सतेवरोइं त तैना तुसन भी सताले, अगर तैनेई मेरी गल्लो पुइ अमल कियूं त तुशशी गल्लो पुइ भी अमल केरेले। 21 पन तैना लोक तुसन सेइं एरो ज़ेरो बर्ताव केरेले, किजोकि तुस मेरे चलेथ। तैना मेरे भेजने बाले परमेशेरे न जानन्। 22 अगर मीं एइतां तैन सेइं गल्लां न भोथी कियोरी त तैना पापी न थिये भोने, पन हुनी तैन केरे पापेरो तैन कां कोई बहानो नई। 23 जै मीं सेइं दुश्मनी रखते, ते तै मेरे बाजी सेइं भी दुश्मनी रखते। 24 अगर मीं तैन केरे सामने तैना चमत्कार न भोथे कियोरे, जैना कधी होरे केन्चे नई कियोरे त तैना पापी न थिये भोने, पन हुनी तैनेई सब किछ लाव, ते मीं भी ते बाजी सेइं दुश्मनी रख्खी। 25 पन एन एल्हेरेलेइ भोवं कि तैन केरे कानूने मां लिखोरी तै गल पूरी भोए, तैनेई मीं सेइं खामखा दुश्मनी रख्खी। 26 पन ज़ैखन तै महदतगार एज्जेलो जैस अवं अपने बाजेरे तरफां भेजेलो, मतलब सत्रेरी आत्मा, जै बाजी केरि तरफां एइतीए, तै मेरी गवाही देली। 27 ते तुस भी गवाह आथ किजोकि तुस मीं शुरू करां मीं सेइं साथी थियो।”

16 “मीं तुसन एना सैरी गल्लां एल्हेरेलेइ जोई कि तुशशो विश्वास न दूट्टे। 2 तैनेई तुस प्रार्थना घरन मरां कदनेथ, खास केरतां एरो ज़ेरो वक्त एज्जी राहोरोए, जै तुसन मारेलो ते इन समझेलो कि तै परमेशेरी सेवा केरने लोरोए। 3 तैन एन सब एल्हेरेलेइ केरेले कि न तैनेई कधी मेरो बाजी ज़ानो ते न कधी अवं। 4 पन मीं एना सैरी गल्लां एल्हेरेलेइ तुसन सेइं जोई, कि ज़ैखन तैना पूरी भोनेरो वक्त एज्जेलो, त तुसन याद एज्जे, कि मीं तुसन एन पेइलू जोरू थियूं, जेइस तुस मेरे चले बनोरे थियो। मीं एना गल्लां केरे बारे मां पेइलू एल्हेरेलेइ न ज़ोवं, कि अवं एप्यू तुसन सेइं साथी थियो।” 5 “पन हुन्ना अवं अपने भेजने बाले कां च़लरोई, पन तुसेईं केन्चे भी न पुच्छ कि तू कोरां च़लरोस? 6 पन मीं तुसन सेइं जोई छडेरूए एल्हेरेलेइ तुशशो मन उदास आए। 7 फिरी भी अवं तुसन सेइं सत्र जोताई कि मेरू इट्टां गानू तुशशे लेइ फेइदोए, अगर अवं न गेइलो त तै महदतगार तुसन कां नई एज्जनी, पन अवं च़लो जेव त तैस अवं तुसन कां भेजी देलो। 8 ते ज़ैखन तै एज्जेलो त दुनियाई पाप ते धार्मिकता ते इन्साफेरे बारे मां सब किछ बांदू केरेलो। 9 पापेरे बारे मां एल्हेरेलेइ कि दुनियां मीं पुइ विश्वास न कियो, 10 धार्मिकतारे बारे मां एल्हेरेलेइ कि अवं वापस बाजी कां च़लरोई ते तुसेईं अवं फिरी नई लहनी, 11 इन्साफेरे बारे मां एल्हेरेलेइ कि, शैतान जै दुनियाई पुइ राज केरनेवालो मुर्झा बनोरोए।” 12 “अवं तुसन सेइं होरू भी बडू किछ जोनू चाताई, पन हुन्ना तुसेईं तैने ड़ौली नई इटनू। 13 पन ज़ैखन ते मतलब सत्रेरी आत्मा एज्जेली त ते सत्रेरी बत हिशाली, किजोकि तै अपने तरफां न ज़ोली, पन ज़ैखन किछ परमेशेरे करां शुनेली तैने ज़ोली, ते एज्जे बैली गल्लां

जोली। 14 ते मेरी महिमा केरेली किजोकि तै मेरी गल्लां जोली, किजोकि तै मेरी गल्लन मरां तुसन सेईं जोली। 15 जैन किछ बाजी केरूप, तैन सब मेरूप, एल्हेरेलेइ मीं जोवं, कि तै मेरी गल्लन मरां शुनालो। 16 “थोड़े चिरेरां पत्ती तुसेईं अवं फिरी नईं लहनों, ते तैसेरे थोड़े चिरेरां पत्ती तुसेईं अवं फिरी लानोईं।” 17 तैखन तैसेरे किछ चलेईं एप्पु मांमेईं जोवं, इन कुने, “ए कुन जोते, थोड़े चिरेरां पत्ती तुस मीं न लाएले, ते फिरी थोड़े चिरेरां पत्ती तुस मीं लाएले? कि अवं बाजी कां गाताईं?” 18 तैखन तैनेईं जोवं, “थोड़े जेरे चिरेरां बाद, एन जै ए जोते, कुन आए? अस न ज्ञानम कि कुन?” 19 यीशुए एन जैनतां, कि एना मीं पुछनू चातन, “कुन तुस मेरी इस गल्लरे बारे मां एप्पु मांमेईं गलबात केरने लोरेथ, कि एस गल्लारो कुन मतलबे, थोड़े चिरेरां पत्ती मीं न लाएले, ते फिरी थोड़े चिरेरां पत्ती लाएले? 20 अवं तुसन सेईं सच्च-सच्च जोताईं, कि तुस लेरां देले ते शोग बनाले, पन दुनियारे लोक खुशी भोले, पन जैखन तुस मीं दुबारां लाएले त तुशु दुःख, खुशी मां बेदलोईं गानोए। 21 जैखन कुआन्श जातीए त तैस बडी तकलीफ भोतीए, किजोकि तैसेरे दुःखेरी घडी नेडे पुजोरीए, पन जैखन बच्चो जर्मते त एस खुशी मां कि दुनियाईं मां अक मैनु पैदा भोएए अपनि तकलीफ बिस्सरी गावु। 22 ते तुसन भी हुन्ना तेही तकलीफे, पन अवं तुसन सेईं फिरी मिलेलो, ते फिरी तुशु मने मां खुशी भोली, ते खुशी तुसन करां कोई न नेही सकेलो। 23 तैस वक्ते तुस मीं कोई किछ न पुछेलो, अवं तुसन सेईं सच्च-सच्च जोताईं, तुस मेरे नव्वे सेईं बाजी करां जैन किछ मगथ, ते तुसन देलो किजो तुस मेरे चलेथ। 24 तुसेईं मेरु नवं घिन्तां हुना तगर बाजी करां किछ नईं मगेरु, मगले त तुसन मैल्ली गालू, ते तुशुशी खुशी पूरी भोली।” 25 “अवं तुसन एना गल्लां मिसाल देइतां जोताईं, पन तै वक्त ओरोए कि अवं कहैन्ना मां फिरी न जोइलो, पन रोडे चारे बाजरे बारे मां तुसन सेईं गल्लां केरेलो। 26 तैस वक्ते तुस मेरु नवं घिन्तां प्रार्थना केरेले, अवं इन न जोईं, कि तुशुसे लेइ बाजी सेईं बिनती केरि। 27 किजोकि बाजी परमेशर तुसन सेईं एप्पु प्यार केरते, एल्हेरेलेइ कि तुसेईं मीं सेईं प्यार कियो, ते तुसेईं विश्वास कियोरोए कि अवं परमेशररी तरफां ओरोईं। 28 अवं बाजी करां दुनियाईं मां ओरोईं, हुनी दुनियाईं मरां भोइतां वापस बाजी कां चलोरोईं।” 29 तैसेरे चलेईं जोवं, “हुन्ना तू साफ-साफ गल लोरस केरने, ते कोई मिसाल देइतां न जोस। 30 हुन्ना असेईं बुझू कि तीं सब किछ पत्तोए, ते जरूरत नईं कि कोई तीं पुछे, असां विश्वास केरतम कि तू परमेशर करां ओरोस।” 31 यीशुए तैन सेईं जोवं, “हुनी तुस विश्वास केरतथ! 32 हेरा, तै वक्त एणजी राओरोए बल्के पुजोरोए, कि तुस सब नेशतां अपने-अपने बत्तां गानेथ, ते अवं अकैल्लो शारनोईं पन फिरी भी अवं अकैल्लो नईं, किजोकि मेरो बाजी मीं सेईं साथीए। 33 मीं तुसन एना गल्लां एल्हेरेलेइ जोईं, ताके तुसन शान्ति मैल्ले, किजो तुस मेरे चलेथ, तुस दुनियाईं मां मुसीबत त उठाताथ, पन हिम्मत रखा, मीं शैताने पुड़ जीत हासिल कियोरीए, जै इस दुनियाईं पुड़ राज केरते।”

17 जैखन यीशुए अपने चलन सेईं एना सब गल्लां जोईं, त तैनी उबरू स्वर्गनां तेकतां जोवं, “हे बाजी हुन्ना तै वक्त ओरोए कि तू अपने मट्टेरी महिमा केर, कि मट्टू भी तेरी महिमा केरे। 2 किजोकि तीं तैस सेख्भी मैन्न पुड़ अधिकार दित्तोरोए, जैना तीं तैस दित्तोरेन हमेशारी जिन्दगी दे। (aiōnios g166) 3 ते हमेशारी जिन्दगी तै आए, कि तैना सिर्फ तीं एक्की सच्चरे परमेशरे ज्ञानन ते यीशु मसीहे भी ज्ञानन जै तीं भेजोरोए। (aiōnios g166) 4 मीं तैन कम जैन तीं मीं दित्तेरु थियू मुकेइतां धेरतली पुड़ तेरी महिमा की। 5 ते हुनी हे बाजी मीं एप्पु सेईं साथी मेरी तै महिमा केर जै दुनियारे पेइली मेरी तीं साथी थी।” 6 “मीं तेरु नवं तैन कां बांदू कियू, जैना तीं दुनियाईं मरां चुनतां मीं दित्तोरेन तैना तेरे थिये, पन तीं मींजो दित्तोरेन ते तैनेईं तेरे बचने पुड़ अमल भी कियोरूप। 7 हुनी तैना ज्ञानतन, कि जैन किछ तीं मीं दित्तेरु तैन सब तेरी तरफांए। 8 एल्हेरेलेइ मीं तैना गल्लां जैना तीं मीं दित्तोरी थी, मीं तैन पुजेईं ते तैनेईं तैन पुड़ विश्वास कियो, ते सच्च पिशानू, कि अवं तेरी तरफां ओरोईं, ते ई भी विश्वास कियो कि तीं अवं भेजोरोईं। 9 अवं

तैन केरे लेइ प्रार्थना केरताईं, दुनियारे लोकां केरे लेइ न केरि, पन तैन केरे लेइ जैना तीं मीं दित्तोरेन, किजोकि तैना सब तेरे आन। 10 ते जैन किछ मेरु आए, तैन सब किछ तेरूप, ते जैन तेरु तैन मेरूप, ते इन सेईं मेरी महिमा बांदी भोईं। 11 मीं हुनी इस दुनियाईं मां नईं रानू, पन तैना हेजू इस दुनियाईं मां आन, ते अवं तीं कां एजताईं, हे पवित्र बाजी, अपने तैस नव्वे सेईं जैन तीं मीं दित्तोरूप, तैन केरि हफाजत केर, कि तैना असन बराबर भोन। 12 जैखन अवं तैन सेईं साथी थियो, मीं तेरे तैस नव्वे सेईं, जैन तीं मीं दित्तोरूप, तैन केरि हफाजत की, मीं तैन केरि देख भाल की, नाश भोनेबाले मैनेरे अलावा कोई नाश न भोव, एल्हेरेलेइ पवित्रशास्त्रेरी गल पूरी भोइ। 13 पन हुन्ना अवं तीं कां एजताईं, ते इना गल्लां अवं दुनिया मां जोताईं, कि तैना मेरी खुशी एप्पु मां पूरी केरन। 14 मीं तैन तेरु वचन तैन कां पुजेवरूप, ते दुनियारे लोकेईं तैन सेईं दुश्मनी रख्बी, किजोकि जेन्चरे अवं दुनियारो नईं, तैना भी नईं। 15 मेरी प्रार्थना ई नईं कि तू तैन दुनियाईं मरां ने, पन तू तैन शैताने करां बचेइतां रख। 16 जेन्चरे अवं दुनियारो नईं तैन भी इस दुनियारे नईं। 17 तेरु वचन सच्चरे। सच्चरे जिरिये सेईं तैन पवित्र केर। 18 जेन्चरे तीं अवं दुनियाईं मां भेजोरोईं तेन्चरे मीं भी तैना दुनियाईं मां भेजोरेन। 19 अवं अपनो आप तैन केरे लेइ पवित्र केरताईं, ताके तैना भी सच्चरे जिरिये सेईं पवित्र भोए। 20 “मेरी प्रार्थना सिर्फ चले केरे लेइ नईं, पन तैन केरे लेइ भी जैना तैन वचनेरे जिरिये मीं पुड़ विश्वास केरेले। 21 कि तैना सब अक भोन, जेन्चरे तू बाजी मीं मां आस, ते अवं तीं मां आई तेन्चरे तैना असन मां भोन, एल्हेरेलेइ दुनियारे लोक विश्वास केरन, कि तींए अवं भेजोरोईं। 22 ते तै महिमा जै तीं मीं दित्तोरीए, कि जेन्चरे अस अक आम तैन भी अक भोन। 23 अवं तैन मां भोइलो, ते तू मीं मां भोलो, ताके तैन पूरो अकीजो भोए, ते दुनिया ज्ञाने कि तीं अवं भेजोरोईं। जेन्चरे तीं मीं सेईं प्यार कियो, तेन्चरे तीं तैन सेईं भी प्यार कियो। 24 हे बाजी अवं चाताईं कि जैना तीं मीं दित्तोरेन, जोई अवं आई तैडी तैना भी मीं सेईं साथी भोन, कि तैना भी मेरी महिमा हेरन, जै तीं मीं दित्तोरीए। दुनियारे रचने करां भी पेइले तीं, मीं सेईं प्यार कियोरोए। 25 हे धर्मी बाजी, दुनियां तू न पिशानो, पन मीं तू पिशानो, ते तैन चलेईं भी अवं पिशानो कि तीं अवं भेजोरोईं। 26 मीं तैन पुड़ बांदू कियू, कि तू कौन आस, ते बांदू केरतो रालो, जैस प्यारे सेईं तीं मीं प्यार कियो, तै तैन मां भोए, ते अवं तैन मां बनोरो रेईं।”

18 यीशुए ए प्रार्थना केरतां झाड़ी, त अपने चलन सेईं साथी किद्रोन वेदरे पार जेव। तैडी अक बाग थी तै ते तैसेरे चले तैडी जे। 2 तैस टलुवाने बालो यहूदा तैस ठारारो बाकम थियो, किजोकि यीशु अपने चलन सेईं साथी तैडी केही फेरेईं जोरो थियो। 3 तैखन यहूदे, रोमी सिपाही ते किछ प्रधान याजक ते फरीसी केरे तरफां भेजोरे लोकन सेईं साथी एन्तां दीये ते मिसालां ते हथियार घिन्तां तैडी पुजाए। 4 तैखन यीशु सब गल्लां जैना तैस सेईं भोनेबैली थी, बुझतां तैन सेईं जोने लगे, “तुस केस लोरेथ तोपने?” 5 तैनेईं तैस जुवाब दित्तो, “यीशु नासरी।” यीशुए तैन सेईं जोवं, “अवं तैए आईं।” तैस टलुवाने बालो यहूदा भी तैन सेईं साथी खडखडो थियो। 6 जैखन यीशुए जोवं, “अवं तैए आईं,” तैना पत्रोवं जमीनी पुड़ झडे। 7 एल्हेरेलेइ तैनी फिरी पुछू, “तुस केस लोरेथ तोपने?” तैनेईं जुवाब दित्तो, “यीशु नासरी।” 8 यीशुए जुवाब दित्तो, “मीं त जोवं कि अवं तैए आईं, अगर तुस मीं तोप्यतथ, त एन लोकन गाने देथ।” 9 एन एल्हेरेलेइ भोवं, कि तैन वचन पूरु भोए, “जैना तीं मीं दित्ते, तैन मरां मीं अक भी न हिरव।” 10 शमीन पतरसे कां अक तलवार थी, तैनी तलवार केडतां महायाजकेरे नौकरे बाई ते तैसेरो देइने कन्न केटव। तैस नौकरे नवं मलखुस थियू। 11 तैखन यीशुए पतरसे जोवं, “अपनि तलवार मियाने मां रख, कुन अवं तै दुखेरो कटोरो न पीं जै मेरे बाजे मीं पीनेरे लेइ दितोए?” 12 तैखन रोमी फौवजी ते तैन केरे सूबेदार ते यहूदी केरे लीडेईं यीशु टलाव ते बंधे। 13 ते पेइलो हुन्ना कां नीयो किजोकि ते केफारो शरहो थियो जै तैस सालेरो महायाजक थियो। 14 ई तैए कैफाए जैनी यहूदन सलाह दित्तोरी थी, कि इश्शे लोकां केरे लेइ

एक्की मैनेरु मरनु रौडू आए। 15 शमीन पतरस ते अक होरो चेलो यीशु पत्ती जे। ते चेलो महायाजकेरो बाकम थियो, ते यीशु सेइं साथी महायाजकेरे अंगने मां जेव। 16 पन पतरस बेइर दारे पुड़ खडो थियो, ते होरो चेलो जे महायाजकेरो बाकम थियो वापस अव, ते तैस नौकरैनी सेइं जे दारे पुड़ थी गल केरतां पतरस अन्तर नीयो। 17 तैस नौकरेनां जे दारे पुड़ थी पतरसे पुच्छू, “कुन तू भी तैसेरे चेलन मरां आस?” पतरस ज़ोवं, “नई अवं नई।” 18 ठंडारे वजाई सेइं नौकरेई ते मन्दरेरे पहरदारैई अग बालोरी थी, ते पतरस भी तैन सेइं साथी अग लोरो थियो तपने। 19 तैखन महायाजक यीशुएरे चेलतां त कने तेसेरी शिक्षारे बारे मां पुच्छने लमो। 20 यीशुए जुवाब दित्तो, “मीं त सेबमी केरे सामने सेरी गल्लां कियोरिन, मीं त रोज तुशे प्रार्थना धरन ते मन्दरे मां, ते ज़ेडी यहूदी अकोट्टे भोतन तैडी शिक्षा दित्ती, ते छेपतां किछ भी न ज़ोवं। 21 तू मीं ए सवाल किजो पुच्छस? शुन्नेबालन पुच्छू, कि मीं तैन सेइं कुन ज़ोवरूप? हेर तैन पतोए, कि मीं कुन ज़ोवरूप।” 22 ज़ैखन तैनी ज़ोवं, त मन्दरेरे पहरदारन मरां अक ज़े तैडी खडो थियो, तैनी यीशुए थप्पड़ बैइतां ज़ोवं, “कुन तू महायाजक एन्चरे जुवाब देतस?” 23 यीशुए तैस जुवाब दित्तो, “अगर मीं किछ बुरु ज़ोरुए त साबत केर, पन अगर रौडू ज़ोरुए त थप्पड़ किजो बातस?” 24 तैसेरां बाद हन्ना यीशुएरे हेजू बन्धोरो थियो तेचरे महायाजक केफा कां भेजो। 25 शमीन पतरस खडखडो अग लोरो थियो तपने। तैखन केन्चे तैस पुच्छू, “कुन तू भी तैसेरे चेलन मरां आस?” पतरस इन्कार केरतां ज़ोवं, “नई अवं नई।” 26 महायाजकेरे नौकरन मरां अक ज़े तैसेरो रिशतेदार थियो, जेसेरो कन्न पतरसे तलवारी सेइं कटोरो थियो, ज़ोने लमो, “कुन मीं तू बागी मां यीशु साथी नई लाहोरो?” 27 पतरसे फिरी इन्कार कियो, ते तैखन कुकडे भी बांग दित्ती। 28 तैनेई यीशु झेइं कांफा करां रोमी गवर्नर पिलातुसेरे महले मां नीयो, पन तैना एप्पू अन्तर न जे, ताके भिटे न भोन, ते फ्रसह तिहारेरी रोटी खेइ बटन। 29 तैखन पिलातुस तैन कां बेइर अव ते ज़ोने लमो, “तुस इस मैनु पुड़ कुन इलज़ाम लातथ?” 30 तैनेई तैस जुवाब दित्तो, “ए मैनु मुर्जम न भोथो त असेई ए तीं कां न थियो आन्तो।” 31 पिलातुसे तैन सेइं ज़ोने लमो, “तुस एस नेथ ते अपने कानूनेरे हिसाबे सेइं फैसलो केरा।” यहूदी लीडर ज़ोने लमो, “असन त केन्ची भी मारनेरी अज़ाज़त नई।” 32 एन एल्हरेलेइ भोवं कि ज़ैन गल्लां यीशुए ज़ोरी थी, कि ते केरही मीतां मरेलो पूरी भोन। 33 तैखन पिलातुस फिरी महले मां जेव ते तैनी यीशु कुजेइतां तैस पुच्छू, “कुन तू यहूदी केरो राजोस?” 34 यीशुए जुवाब दित्तो, “तू ए गल अफनि भोती ज़ोने लोरोस कि होरेई मेरे बारे मां तीं सेइं जेवरीए?” 35 पिलातुसे जुवाब दित्तो, “कुन अवं यहूदी आई? तेरी कौमरे ते प्रधान याजकेई तू मेरे हवाले कियोरोस, तू ज़ो तीं कुन कियोरुए?” 36 यीशुए जुवाब दित्तो, “मेरु राज इस दुनियारु नई, अगर दुनियारु भोथू त मेरे चले जंग केरेथे, ते मीं यहूदी लोकां केरे प्रधानां केरे हथ्थे द्लेयोने न देथे, पन हुन्ना मेरु राज इट्टेक नई।” 37 पिलातुसे ज़ोवं, “त कुन तू राजोस?” यीशुए जुवाब दित्तो, “तू ज़ोतस कि, अवं राजोई, अवं एल्हरेलेइ ज़रमोरोई, ते एल्हरेलेइ दुनियाई मां ओरोई कि सच्चेरे बारे मां शिक्षा देई। जैना सच्चे मन्तन तैना मेरी गल शुन्तन।” 38 पिलातुसे पुच्छू, “सच कुने?” एन ज़ोइतां तै यहूदी लीडरन कां जेव ते ज़ोने लमो, “अवं त एस मैनु मुर्जम न सेमझी।” 39 पन तुशे रीतेरे मुताबिक अवं फ्रसह तिहारेरे मौके पुड़ अक कैदी हथरां छडताई। कुन तुस चातथ कि अवं तुशे लेइ यहूदी केरे राजे हथरां छेडी? 40 तैना फिरी ज़ोरे-ज़ोरे सेइं ज़ोने लमो, ए नन्ना इश्शे लेइ बरअब्बा हथरां छड। बरअब्बा अक डैकू थियो।

19 पिलातुसे सिपेहिन हुम्म दित्तो, कि यीशु नेइतां कोडे बान। 2 ते सिपाहीयेइं कंटां केरु ताज बनेइतां यीशुएरे दोग्गे पुड़ रख्खू, ते तैस बैजनी रंगरां लिगड़ा लुवां। 3 ते तैन केरे सामने तैन कां एइतां ज़ोने लमो, “हे यहूदी केरे राजा, नमस्कार!” ते तैस थप्पड़ बाहे। 4 तैखन पिलातुसे फिरी बेइर गेइतां लोकन सेइं ज़ोवं, हेरा, “अवं तैस तुसन कां फिरी बेइर आनताई, तुसन पतो लगे कि मीं एसमां कोई जुरम न लेइहोव।” 5 ज़ैखन यीशु कंटां

केरु ताज दोग्गे पुड़ रेखतां ते बैजनी लिगड़ां लेइतां बेइर आनो त पिलातुसे तैन सेइं ज़ोवं, “हेरा ई मैनु।” 6 ज़ैखन प्रधान याजक ते मन्दरेरे पहरदारैई यीशु लाव त ज़ोरे-ज़ोरे चिन्डां मेरतां ज़ोने लमो, “एस क्रूसे पुड़ चाढ़ा, एस क्रूसे पुड़ चाढ़ा!” पिलातुसे तैन सेइं ज़ोवं, “तुस एस नेथ ते क्रूसे पुड़ चाढ़ा, किजोकि अवं एसमां कोई दोष न लेहीं।” 7 यहूदी लीडर ज़ोने लमो, “इश्शो भी कानूने, ते तैसेरे कानूनेरे मुताबिक ए मीतेरे सज़ारे काबले। किजोकि ए अपने आपे जो परमेशेरु मट्टू ज़ोते।” 8 ज़ैखन पिलातुसे एन शुनू त तै मन्ना डरो। 9 ते फिरी अपने महले मां जेव ते यीशु सेइं फिरी ज़ोवं, “तू कोइतां ओरोस?” पन यीशुए तैस किछ जुवाब न दित्तो। 10 पिलातुसे तैस सेइं ज़ोवं, “तू मीं सेइं गल कि न केरस? कुन तीं पतो नई कि मीं अधिकार कि अवं तीं हथरां छेडी या क्रूसे पुड़ चैदेई।” 11 यीशुए जुवाब दित्तो, “अगर ए अधिकार तीं परमेशारे करां न भोथो मैलोरो त तेरो कोई अधिकार मीं पुड़ न थियो भोनो, पन ज़ैनी अवं तेरे हवाले कियोरोई ते हछे पापेरो हकदार भोरोए।” 12 तैसेरां बाद पिलातुसे यीशु हथरां छडनो चाव, पन यहूदी लोक चिन्डां मेरतां ज़ोने लमो, “अगर तू एस मैनु हथरां छडेलो त तू महाराजोरे पासे नई, ज़े कोई अपनो आप राजो बनाते ते महाराजोरे खलाफ भोते।” 13 ज़ैखन पिलातुसे पन शुनू त तैनी यीशु बेइर कुजेइतां अपने आदालतरे तखते पुड़ बिश्शो ज़ैस जो इब्रानी भाषाई मां, गब्बता, ज़ोतन। 14 ते फ्रसह तिहारेरी तियेरीरि दिहाडी थी ते दुपाहरां केरे करीब थियो, तैखन पिलातुसे यहूदी लोकन जो ज़ोवं, “हेरा, इ तुशो राजो!” 15 पन तैना ज़ोरे-ज़ोरे सेइं ज़ोने लमो, “एस इइतां दूर ने! इइतां दूर ने! ते एस क्रूसे पुड़ चाढ़ा!” पिलातुसे ज़ोवं, “कुन अवं तैस ज़े तुशो राजो क्रूसे पुड़ चैदी?” प्रधान याजकेई ज़ोवं, “महाराजोरे अलावा इश्शो कोई राजो नई।” 16 एसेरां बाद पिलातुसे यीशु तैन केरे हवाले कियो, ताके तैना तैस क्रूसे पुड़ चाढ़न। 17 यीशु अपनू क्रूस छुइतां खोपडी जो चलो ज़ैस जो इब्रानी मां गुलगुता ज़ोतन। 18 तैडी तैनेई यीशु ते तैस सेइं साथी दूई डैकू भी क्रूसे पुड़ चाढ़ो, अक तैसेरे देइने पासे होरो बांए पासे ते यीशु मज़ाटे। 19 पिलातुसे एक्की पेखडी पुड़ तैसेरो दोष लिखतां क्रूसे पुड़ लाई तैस पुड़ लिखोरु थियू, “यीशु नासरी यहूदी केरो राजो।” 20 काई यहूदेई तैन पढू, किजोकि ज़ैस जगाई यीशु क्रूसे पुड़ चढोरो थियो ते जगा यरूशलेम नगरेरे नेडे थी, ते पेखडी पुड़ इब्रानी, लातीनी ते यूनानी भाषाई मां लिखोरु थियू। 21 यहूदी केरे प्रधान याजकेई पिलातुसे कां दरखुवास की, “यहूदी केरो राजो न लिखा पन एन लिखा कि ए ज़ोते, ‘अवं यहूदी केरो राजोई।’” 22 पिलातुसे जुवाब दित्तो, “मीं ज़ैन लिखी छाडू, तैन लिखू।” 23 ज़ैखन स्पेहियेई यीशु क्रूसे पुड़ चाढ़ो ते तैनेई यीशुएरे लिगड़ा बंटां ते तैन केरे च़ेरे हिस्से किये, ताके सेबनन अक-अक हिस्सो मैल्ले सिर्फ तैसेरु कोट बाकी राऊं, ज़ैन बा ते बुना तगर अक्के थियू। 24 तैना एप्पू मांमेइं ज़ोने लमो, “एसेरे टोटे केरनेरे बजाए शर्त रखम जेसेरे नंचे पुड़ परची निसेली लिगड़ां तैस भोलां।” एन एल्हरेलेइ भोवं कि ज़ैन पवित्रशास्त्रे मां लिखोरु थियू तैन पूरू भोए कि, “तैनेई मेरां लिगड़ां बंटां ते मेरे कोट्टेरे लेइ शर्त रख्खू ते सिपेहीयेइं एन कियू।” 25 यीशुएरे क्रूसे कां तैसेरी अम्मा ते तैसेरी अम्मारी बेडन मरियम ज़े क्लोपासेरी कुआन्था थी, मरियम मगदलीनी खडखडी थी। 26 यीशुए अपनि अम्मा ते अक अपनो चेलो ज़ैस सेइं ते प्यार केरतो थियो, तैस कां नेडे खडखडो लाव त तैनी अपने अम्मा सेइं ज़ोवं, “हे कुआन्था, हेर, तेरु मट्टुए।” 27 ते चले जो ज़ोवं, “अजेरां बाद, ई तेरी अम्मा आए, तैनी चले तैखने तै अपने घरे नेइ।” 28 ज़ैखन यीशुए ज़ानू कि हुनी सैरी गल्लां पूरी भोइजेइ, एल्हरेलेइ जेन्चरे पवित्रशास्त्रे मां लिखोरु थियू तैन पूरू भोवं त तैनी ज़ोवं, “मीं द्लिश लग्गोरीए।” 29 तैडी अक भांडं सिरके सेइं भेरतां रखोरु थियू, केन्चे जूफेरी डालडी तैस मां डोबतां यीशुएरे ऐशो सेइं हुराई। 30 ज़ैखन यीशुए चख्खू त तैनी ज़ोवं, “पूरू भोवं” ते क्रोडी दलोइतां अपने प्राण दिते। 31 ते एल्हरेलेइ कि ते तियेरीरि दिहाडी थी, होरसां आरामेरी दिहाडी ते कने फ्रसह तिहार थियू। ई यहूदी केरे लेइ खास दिहाडी थी, यहूदी न थिये चाते कि आरामेरे दिहाडे लाशां क्रूसन पुड़ टंगोरी रान, एल्हरेलेइ तैनेई पिलातुसे कां गेइतां ज़ोवं, कि मुर्जमां केरि ज़न्थां

टलोइतां तैन केरि लाशां उन्डी उसालाम। 32 सिपाही आप तैनेई पेइले मैनेरी जन्घां टलोइ, फिरी होरेरी भी, जैना यीशु सेइं साथी क्रूसे पुइ च़ाढ़ोरे थिये। 33 पन ज़ैखन यीशुएरी बारी अई त तैनेई हेरू कि ते पेइले मेरि जेवरोए, ते तैनेई तैसेरी जन्घां न टलोइ। 34 पन सिपेहिन मरां एक्के अपनि बलम एन्तां यीशुएरे देल्लोडी मां बाई ते तैखने खून त पानी बगने लगू। 35 जैनी मैने एन हेरू, तैनी गवाही दित्ती, ते तैसेरी गवाही सख्खीए, ते तै ज्ञानते, कि सच ज़ोते कि तुस भी विश्वास केरा। 36 एना सैरी गल्लां एल्हेरेलेइ भोइ कि पवित्रशास्त्रे मां लिखोरू पूरू भोए, “तैसेरी कोई हडी न टलोइ गाए।” 37 पवित्रशास्त्रेरे एककी होरि वचने मां लिखोरूए, “तैस जैनेई बलमी सेइं बाई तैना तैस हेरेले।” 38 एना गल्लां केरे पत्ती अक मैन्हु यूसुफ नंवेरो ज़े अरिमतियाह इल्लोव्वेरो रानेबालो थियो, पिलातुसे कां बिनती केरने लगे, कि यीशुएरी लाश दे, ए मैन्हु यहूदी लोकां केरे प्रधानां केरे डरे सेइं छेपतां यीशुएरो चेलो थियूं, ते पिलातुसे तैस अज़ाज़त दित्ती, ते तैनी यीशुएरी लाश नेही। 39 नीकुदेमुस भी अव, जैनी एककी बार राती यीशु सेइं मुलाकात कियोरी थी, तैनी गन्धरस ते एलवा आनोरे थिये, एन तेत्ती किल्लो थियूं। 40 तैखन तैनेई यीशुएरी लाश नेइतां यहूदी केरे दबनेरे रसमेरे मुताबिक तैस खुशबूदार चीज़ां लेइतां कफने मां पलेटतां रख्खी। 41 जैडी यीशु क्रूसे पुइ च़ाढ़ोरो थियो तैडी बागी मां अक नंवी कन्न थी, ज़ैस मां पेइली कोई लाश न थी। 42 ते ए यहूदी केरि आरामेरी तियेरारी दिहाडी थी ते कन्न भी नेडे थी तैनेई यीशुएरी लाश तैडी रख्खी।

20 हफतेरी पेइली दिहैडी झेइंगां हेजू आंधरू थियूं मगदलीन इल्लोव्वेरी मरियम कन्नरी पुइ आई, तैसां हेरू कि कन्नरी करां घोइ भी खडो कियोरोए। 2 ते दौवइती शमोन पतरस ते होरि चेली कां पुज्जी ज़ै यीशु सेइं प्यार केरतो थियो, ज़ोने लगू, “तैनेई प्रभुएरी लाश कन्नां मरां केदतां नीयोरो, ते असन नई पतो ते कोइ रख्खोरोए।” 3 एना शुक्तां पतरस त अक हारो चेलो कन्नरे पासे च़ले। 4 ते दुइये साथी-साथी दौवइतां च़लोरे थिये, पन तै होरो दुइयोवं चेलो पतरस करां अग्रोवं निस्सी जेव, ते तैस करां पेइलो कन्नरी पुइ पुज्जो। 5 तैनी लिकतां तक्कू ते कफन लाव ते अन्तर न जेव। 6 तैखन शमोन पतरस भी पत्ती-पत्ती तैडी पुज्जो ते सिधो कन्नरी मां जेव तैनी हेरू कि तैडी लिगइं थियां। 7 ते कफनेरो तै रुमाल भी ज़ै यीशुएरे दोगे सेइं पलेटोरो थियो, लिगइन मां नई पन अलग ठेरी थियो। 8 तैखन ते होरो चेलो भी ज़ै कन्नरी पुइ पेइलो पुज्जोरो थियूं अन्तर जेव तैस भी लेइतां याकीन भोवं। 9 किजोकि तैनेई पवित्रशास्त्रेरी ए गल न थी समझोरी जेसेरे बारे मां यीशुएरू मुइदन मरां ज़ींतू भोनु ज़रूरी थियूं। 10 तैखन एना चेले वापस घरजो च़ले जे। 11 पन मरियम कन्नरी करां बेइर लेरां देंती थी। लेरां देंती-देंती तैसां लिकतां कन्नरी मांजो तक्कू। 12 त तैडी तैसां दुई स्वर्गदूत लाए ज़ैन छित्तां लिगइं लमगोरां थियां, ज़ैडी यीशुएरी लाश रखोरि थी तैडी अक शरेइंते ते होरो परेइंते बिशशोरे लाए। 13 तैनेई तैस पुच्छू, “हे कुआन्थे तू किजो लोरिस लेरां देने?” मरियमा ज़ोवं, “तैनेई मेरे प्रभुएरी लाश नेवरीए ते पतो नई कोइ रख्खोरोए।” 14 एना ज़ोते ते पत्रोवं बेदलोई त तैडी यीशु खडखडो लाव, पन तैस पिशान न आई कि ए यीशुए। 15 यीशुए ज़ोवं, “हे कुआन्थे तू किजो लेरां देने लोरिस? तू केस तोपने लोरिस?” तैसां समझू कि कोई बागबाने, तैसां ज़ोवं, “हे जनाब अगर तीं तै नीयोरोए त ज़ो कि तीं कोइ रख्खोरोए ते अवं तैस नेइ।” 16 यीशुए तैस सेइं ज़ोवं, “मरियम!” तैसां तैसेरे पासे फिरतां इब्रानी मां ज़ोवं, “रब्बूनी।” जेसेरो मतलब हे गुरू। 17 यीशुए ज़ोवं, “मीं सेइं न हुरा किजोकि अवं बाजी कां बाह हेजू नई जोरो, पन मेरे ढलान गेइतां ज़ो कि अवं अपने बाजी ते तुशे बाजी ते अपने परमेशर ते तुशे परमेशरे कां बा च़लोरोई।” 18 मरियम मगदलीनी तैडू च़ली जेईं ते चेलन कां गेइतां तैन पतो दित्ती, “मीं प्रभु लाहोरोए ते तैनी मीं सेइं एना गल्लां की।” 19 तैसेरे दिहैडी ज़े हफतेरी पेइली दिहाडी थी इलोइरे मौके सारे चेले एककी ठेरी थिये, ते यहूदी लोकां केरे प्रधानां केरे डरे सेइं दार बन्द केरतां बिशशोरे थिये, तैखन यीशु अव ते मइटाटे खडो भोइतां ज़ोने लगे, “तुसन शान्ति

मैलती करे।” 20 एन ज़ोइतां तैनी अपने हथ ते अपनि देल्लोडी तैन हिराई, चेले तैस हेरतां खुशी भोए। 21 यीशुए फिरी ज़ोवं, “तुसन शान्ति मैलती राए, जेन्चरे बाजी अवं भेजोरोई, तेन्चरे अवं भी तुसन भी इस दुनियाई मां भेजताई।” 22 एन ज़ोइतां तैनी तैन जो फुक दित्ती ते ज़ोवं, “पवित्र आत्मा नेथ। 23 ज़ैन केरे पाप तुस माफ़ केरेले त तैन केरे पाप माफ़ भोले, ज़ैन केरे तुस रखले तैना राले।” 24 पन बादे मां 12 चेलन मरां अक मैन्हु मतलब थोमा ज़ैस दिदुमुस ज़ोतन, ज़ैखन यीशु अव त तैस साथी न थियो। 25 ज़ैखन होरि चेले तैस सेइं ज़ोवं, “कि असेईं प्रभु लाव,” तैखन तैनेई ज़ोवं, “ज़ां तगर अवं तैसेरे हथ्थन मां कीलां करां गतन मां एंगलोई न छेइ, तांतगर विश्वास न केरि।” 26 अठ दिहैइना बाद यीशुएरे चेले एककी बार फिरी तैस्से ठेरी बिशशोरे थिये, ते थोमा भी तैडी थियो ते दार भी बंद थियूं, ते यीशु एइतां तैन मइटाटे खडो भोव, ते तैन जो ज़ोने लगे, “तुसन शान्ति मैल्ले।” 27 फिरी तैनी थोमा जो ज़ोवं, “अपनि अंगलोई आन ते मेरो हथ हेर ते अपने हथ्थे सेइं मेरी दल्लोडी हेर, शक न केर बल्के मीं पुइ विश्वास केरि।” 28 थोमा तैस जो ज़ोवं, “हे मेरे प्रभु हे मेरे परमेशर!” 29 यीशुए तैस जो ज़ोवं, “तीं लेइतां तीं मीं पुइ विश्वास कियो, धन तैना ज़ैना बगेर लाहने मीं पुइ विश्वास केरन।” 30 यीशुए अपने चेलां केरे सामने होरे भी बंद चमकार कियोरे थिये, ज़ैना इस किताबी मां नई लिखोरे। 31 पन ज़ैना लिखोरन, एल्हेरेलेइ लिखोरेन, कि तुस विश्वास केरथ, कि यीशु परमेशररू मट्टू, मसीहे आए, ते विश्वास केरतां तैसेरे नंवे सेइं हमेशारी जिन्दगी हासिल केरथ।

21 बादे मां यीशुए एप्पू एककी फेरे फिरी अपने चेलन पुइ तिबिरियुस समुन्द्रेो बन्ने एन्चरे बांदो भोव। 2 शमोन पतरस, थोमा ज़ैस जो दिदुमुस ज़ोतन, नतनएल ज़े गलीलेरे काना नगर मां रातो थियूं, ते जेब्देरू मट्टू ते होरे चेले भी तैडी थियो। 3 शमोन पतरसे तैन सेइं ज़ोवं, “अवं मेछलीं दलाने गाताई।” तैनेई ज़ोवं, “अस भी तीं साथी च़लतमा।” तैना तैडू निस्से ते किशती मां च़ेइतां जे, पन तैस राती तैन किछ न मैल्लू। 4 झेइंगां सुबेलो यीशु बन्ने पुइ एइतां खडो भोव, पन चेलेई न पिशानो कि ए यीशुए। 5 तैखन यीशुए तैन ज़ोवं, “हे बच्चव, कुन तुसन कां किछ खाने जो आए?” तैनेई जुवाब दित्ती, “नई।” 6 यीशुए ज़ोवं, “ज़ाल किशतरे देइने पासे छडथ त तुसन किछ मेछली मैलनिन।” तैनेई ज़ाल छाडु ते मेछली एत्री ज़ाले मां लेगि कि ज़ाल खिचोने न लगू। 7 तैखन यीशु ज़ैस चेले सेइं प्यार केरतो थियो तैनी पतरस सेइं ज़ोवं, “ए त प्रभुए।” ज़ेरू शमोन पतरसे शुन्नु कि प्रभुए, तैनी अपनो चोगो, ज़े कम केरनेरे लेइ खोल्लोरो थियो लाव ते पैनी मांजो छाल मारी। 8 होरे चेले ज़ैना किशती मां थिये ज़ाल ज़ैना मेछलेई सेइं भेरतां थियूं तैनेई खिचतां आनु, किजोकि तैना 100 मीटर दूर थिये। 9 ज़ैखन तैना बन्ने पुइ ओस्से, त तैनेई मूरन पुइ मेछली रेखोरिन ते इलेखी रोटी भी लेई। 10 यीशुए तैन सेइं ज़ोवं, “ज़ैना मेछली तुसेईं दलेतोरिन तैन मरां किछ इरां आनां।” 11 शमोन पतरस किशती मां च़ढो ते ज़ाल इलेखी पुइ खिचतां आनु ज़ैस मां 153 मेछली लेगोरी थी, ते फिरी भी ज़ाल नई छींदोरू। 12 यीशुए तैन सेइं ज़ोवं, “एज्जा केलोव खाथ।” पन चेलन मरां केन्नी हिम्मत न अई कि पुछन, “कि तू कौन आस?” तैना ज्ञानते थिये कि ए प्रभुए। 13 यीशुए रोटी दलाती ते तैना भी दित्ती ते मेछली भी दित्ती। 14 यीशु मुइदन मरां ज़ीतो भोनेरां पत्ती दलेइयोवं फेरे अपने चेलन पुइ बांदो भोइ जेव। 15 ज़ैखन तैनेई केलोव खाव, त यीशुए शमोन पतरसे सेइं ज़ोवं, “शमोन,” यहून्नेरे मट्टा, “कुन तू होरि चेलन करां जादे मीं सेइं प्यार केरतस?” तैनी ज़ोवं, “हाँ प्रभु तू त मीं ज्ञानतस कि अवं तीं सेइं प्यार केरताई।” यीशुए ज़ोवं, “मेरां गबइं च़ार।” 16 यीशुए फिरी तैन सेइं ज़ोवं, “शमोन, यहून्नेरे मट्टा, कुन तू मीं सेइं प्यार केरतस?” तैनी ज़ोवं, “हाँ प्रभु, अवं तीं सेइं प्यार केरताई।” यीशुए तैस सेइं ज़ोवं, “मेरी भैडू सम्भाल।” 17 तैनी दलेइयोवं फेरे फिरी पुच्छू, “शमोन यहून्नेरे मट्टा, कुन तू मीं सेइं प्यार केरतस?” पतरस दुःखी भोइतां ज़ोवं, “प्रभु तू एप्पू सैरी गल्लां ज्ञानतस, तू ज्ञानतस, कि अवं तीं सेइं प्यार केरताई,” यीशुए ज़ोवं, “मेरी भैडू च़ार।” 18 अवं तीं सेइं सच ज़ोताई,

जैखन तू नौजवान थियो त अपनू मज़ एप्पू बंधतो थियो, ते जैड़ी चातो थियो, एप्पू गातो थियो, पन जैखन तू बुढो भोलो, त अपने हथ अग्रोवं केरेलो, ते होरो तेरू मज़ बंधेलो जैड़ी तू न चालो तैड़ी तीं नेले। 19 यीशुए ए गल जोइतां इशारो कियो कि पतरस कोस मौतां मेरतां परमेशेरी महिमा बांदी केरेलो। तैखन यीशुए जोवं, “मीं पत्ती च़ल!” 20 पतरसे फिरतां तक्कू, कि यीशु सेइं प्यार केरनेबालो चेलो तैस पत्ती च़लोरोए थियो, ए तै चेलो थियो जैनी रोटी खाते यीशुएरे पासे लिकतां पुछेरू थियूं, “हे प्रभु तै कौने, जै तीं टलुवालो?” 21 पतरसे तैसेरे पासे तेकतां यीशुए पुछेरू, “हे प्रभु एस चले सेइं कुन भोलू।” 22 यीशुए जुवाब दित्तो, अगर अवं चैई कि, “अगर मेरे वापस एजने तगर ज़ीतो राव त एसमां तीं कुन? तू मीं पत्ती च़ल।” 23 एन्चरे ढलान मां ए गल सेभीए फैली जेई, कि ए चेलो न मरेलो, पन यीशुए एन न थियूं ज़ोरू, कि तै न मरेलो अगर अवं चैई कि, “अगर मेरे वापस एजने तगर ज़ीतो राव, त एसमां तीं कुन?” 24 ई तै चेलोए, जै इना गल्लां केरि गवाही देते, ते जैनी एना गल्लां लिखोरिन, असां ज़ानतम कि तैसेरी गवाही सचवीए। 25 यीशुए होरां भी बड़ां कम्मां कियोरां थियां, अगर सेबभी केरे बारे मां लिखनू भोए त अवं समझताई, कि तैना किताबां अज़ भोथी त तैन केरे लेइ इस दुनियाई मां ठार न थी भोनी।

प्रेरितों के काम

1 जनाब थियुफिलुस, मीं अपनि पेड़ली किताब मां तैना सैरी गल्लां लिखोरिन, जैना यीशु शुरू मां केरतो ते शिखालतो राव, 2 तैस दिहैडी तगर जेइस तै स्वर्ग मांजो नीयो जेव। तैस करां पेड़ले तैनी अपने चुनोरे प्रेरितन पवित्र आत्मार शक्तेर जिरिये सेइं किछ हुकम भी दित्तोरे थी। 3 यीशुए दुःख झूलनेरां ते मौतरे बाद तैनी अपने ज़ीते भोनेरां काई पक्कां सबूतां तैन हिरां, ते 40 दिहाइन तगर तैन लेइहोतो राव, ते परमेशररे रज़्जेरे गल्लां शुनातो राव। 4 एककी फेरे ज़ैखन यीशुए अपने चेलन सेइं साथी थियो तैनी तैन ठाकू, “कि तुस यरूशलेम नगर मरां बेइर न गेइयथ ते मेरे बाजी परमेशररो तै वादो पुरो भोनेरो इंतज़ार केरथ, जेसेरे बारे मां तुसेईं मीं करां शुनोरो भी आए। 5 किजोकि यहून्ना त लोकन पैनी सेइं बपतिस्मो दित्तो, पन तुसन थोड़े दिहैइना पती पवित्र आत्मा सेइं बपतिस्मो दित्तो गालो (यानी परमेशर पवित्र आत्मा भेजेलो ज़ै तुसन सेइं साथी रालो)। 6 ज़ताली प्रेरित दुबारा यीशु सेइं मिले, त तेनेईं तैस पुच्छू, “हे प्रभु, कुन तू इस वक्ते फिरी इस्राएले तैसेरु राज देने बालोस?” 7 तैनी तैन सेइं ज़ोवं, “तैस वक्तेरो या जेइस तैना गल्लां भोली, तैन केरे बारे मां तुसन ज़ान्नेरी कोई ज़रूरत नई, जैना बाजी परमेशर अपने अधिकार मां रेखोरिन। 8 पन पवित्र आत्मा ज़ैखन तुसन पुड़ उतरेली त तुसन शक्ति मैलेली, ते तुस यरूशलेम नगर ते सारे यहूदिया ते सामरिया इलाकन मां बल्के धेरतारे हर पासे मेरे गवाह भोले।” 9 एना गल्लां ज़ोनेरां पती यीशु तैन केरे सामने हेरते-हेरते परमेशर तै स्वर्ग जो नीयो, ते बिदलारां ते तैन केरे एछ्छन करां छुपाव। 10 ज़ैखन तैना यीशुए अम्बरे मांजो गांतो तकने लोरे थियो, त अचानक, दूई मड़द ज़ैन छित्तां लिगडां लगगोरां थियां तैन कां एइतां खडे भोए। 11 ते ज़ोने लगे, “हे गलीली मड़दाव तुस खड़खड़े अम्बरेरे पासे कुन तकने लोरेथ? एहे यीशु जेन्चरे तुशे सामने परमेशर, स्वर्ग मांजो नीयो, जेन्चरे तुसेईं स्वर्ग मांजो गांतो लाहोरोए तेन्चरे फिरी एइतो लाएले।” 12 ज़ैखन चले ज़ैतन पहाड़े पुडेरं ज़ैन यरूशलेम नगरेरे नेड़े एककी किलोमीटर दूरे, यरूशलेम नगर मांजो वापस आए। 13 नगरे मां एइतां तैना तैस कमेरे मां जे ज़ैडी तैना रहते थियो, तै कमेरो दुइयोवं छते थियो। तैना प्रेरित इना थियो, पतरस, यहून्ना, याकूब, अन्ड्रियास, फिलिप्पुस थोमा, बरतुल्मे, मत्ती ते हलफईरू मडू याकूब ते शमीन जेलोतेस ते याकूबेरू मडू यहूदा रहते थियो। 14 एना सब मड़द ते किछ होरि कुआन्शां ज़ैनेईं यीशुएरी मद्दत कियोरी थी, ते यीशुएरी अम्मा मरियम ते यीशुएरे दलान सेइं साथी अक मन भोइतां लगातार प्रार्थनाईं मां लगगोरे थियो। 15 ते तैन्ने दिहाइन मां पतरस तैन दूलां केरि टोली मां ज़ैन केरि तैधात कोई 120 थियो, पतरस खडो भोइतां ज़ोने लगे। 16 “हे मेरे दूलाव, पवित्रशास्त्रेरी तै गल ज़ै पवित्र आत्मा दाऊद राज़ेरी जिरिये पेड़ले ज़ोरी थी, पुरी भोनी ज़रूरी थी, तै गल यहूदारे बारे मां ज़ोरी थी, ज़ैनी यीशुएरे दलुवाने बालां केरि मद्दत कियोरी थी। 17 ते असन सेइं साथी सेवा करेनेबालो थियो, ते असन साथी तै गनो गातो थियो। 18 तैनी नीच कम्पैरे लेइ यीशु दलुवाव, ते फिरी तैनी तैना पेइंसे यहूदी लीडरन वापस दित्ते, ते तैनेईं तैन पेइंसां केरू अक ऊडार घिन्नु, ज़ैडी ते दोगेरे भारे खिरकोरो थियो, ते तैसेरू पेट फेटतां तैसेरी एंटलोडी बेइर निस्सी।” 19 यरूशलेम नगरेरे सारे लोकन ए पतो लगगोरो थियो, तैनेईं अपने भाषाईं मां तैस उडारेरू नवं हकलदमा रखवू, जेसेरो मतलब, “खूनेरू ऊडार।” 20 किजोकि दाऊदे भजना केरि किताबी मां लिखोरूए कि, “तैसेरू घर उड़ड़े, ते तैस मां कोई बसने बालो न भोए, ते इन भी लिखोरूए, तैसेरी पदवी कोई होरो ने।” 21 एल्लेरेलेइ एन ज़रूरीए कि अक एरो मैन्हु चुनो गाए, ज़ै प्रभु यीशुएरे सारे कम्मां केरे गवाह भोए, यानी यीशुएरो यहून्ना करां बपतिस्मो नेने करां लेइतां असन करां यीशुएरे स्वर्ग गाने तगर 22 तैन मरां अक मैन्हु चुनो गाए, ज़ै असन सेइं साथी यीशुएरे ज़ीते भोनेरो गवाह भोए। 23 तैखन तैनेईं दुइये ज़ने नामजद कियो, अक यूसुफ ज़ैस जो बरसबवास ज़ोते थियो, जेसेरो खताब यूस्तुस

थियो, ते दुइयोवं मत्तियाह थियो। 24 ते एन जोइतां प्रार्थना की, “हे प्रभु, तू सेबभी केरे दिले ज़ानतस ते असन पुड़ बांदू केर, कि इन दुईन मां तीं कौन ज़ेरो चुनोरोए। 25 कि ते इस सेवकाई ते प्रेरिताइयोरो पद ने, ज़ै यहूदा शैरतां अपने ठेरी जेवरोए।” 26 तैनेईं तैसेरे बारे मां शर्त रखे थियू, ज़ैन मत्तियाह नवं पुड़ निस्सू, एल्लेरेलेइ तै 12 प्रेरितन सेइं साथी गनो जेव।

2 जेइस यहूदी केरे पिन्तेकुस्त तिहारेरी दिहाडी अई, त तैना सब एककी ठेरी अकोट्टे थियो। 2 अचानक अम्बरेरां आवाज़ आई, जेन्चरे बडो बात चलने लोरो थियो, ते तैस सेइं सारू घर घुमने लगू ज़ैडी तैना बिशोरे थियो। 3 ते तैनेईं अगारी लप्यरी ज़ेरि जिंभां लेई, ज़ैना अलग-अलग भोइतां तैन सेबभन पुड़ एइतां टिकी। 4 ते तैना सब पवित्र आत्माई सेइं भरपूर भोए, ते आत्मार वरदाने सेइं तैना अलग-अलग भाषा करेने लगे। 5 तैस वक्ते मां, बड़े यहूदी भक्त ज़ैना तिहारे मां दुनियारी सैरी मुलखन मरां ओरे थियो, तैना यरूशलेम नगरे मां राने लोरे थियो। 6 ज़ैखन तैनेईं ए बातेरी ज़ेरि आवाज़ शुनी त बडे लोक जम्हां भोए, ते सब लोक बडे हैरान रेइजे, किजोकि हर कोई चेलन अपने-अपने भाषाईं मां गल्लां केरते शुन्ने लोरे थियो। 7 ते सब बडे हैरान भोइतां ज़ोने लगे, हेरा, “कुन एना ज़ोनेबाले सारे गलील इलाकेरे रानेबाले नई? 8 फिरी एन कुन भोइ रावरूए कि, असन मरां हर कोई अपनि-अपनि भाषा शुन्ने लोरोए। 9 असन मरां किछ इन इलाकन मरां आन, पारथी, मेदी, एलामी ते मेसोपोटामिया, यहूदिया, कप्पूदकिया, पुन्तुस ते आसिया, 10 फ्रूगिया, पंफूलिया, मिस्र मुलख, ते लीबिया मुलखे ज़े कुरेन नगरेरे नेड़े, इन सब मुलखां केरे रानेबाले ते रोमी मुसाफर, 11 कुन यहूदी, ते कुन यहूदी पंथ धारण करेनेबाले, क्रेती ते अरब मुलखेरे लोक भी आन, पन अस अपनि-अपनि भाषाईं मां तैन करां परमेशररां बड्डां-बड्डां कम्मां केरि चर्चा शुन्ने लोरेम।” 12 तैना सब बडे हैरान भोइ जे ते घबरेइतां एककी होरि पुच्छने लगे, “कि एन कुन भोइ रावरूए?” 13 पन किछ तैन केरि हासी बनेइतां ज़ोने लगे, “कि एनेईं सज़री शराप पियोरोए।” 14 तैखन पतरस 11 प्रेरितन सेइं साथी खडो भोव, ते बडे ज़ोरे सेइं ज़ोने लगे, “हे लोकव हे यहूदियारे रानेबालव ते हे यरूशलेम नगरेरे राने बालाव, मेरी गल ध्याने सेइं शुना, अवं तुसन ज़ोताई इडी एन कुन भोने लोरूए। 15 ज़ैन तुस बुझने लोरेथ तैन नई, एना मैन्हु नशो मां नई, किजोकि हुन्ना त झेइरेरे नौ बज़ोरेन, 16 बल्के ए तै गल्ले, ज़ै परमेशर योएल नेबेरे ज़िरिये ज़ोरी थी, 17 परमेशर ज़ोते कि, आखरी दिहैइन मां एरू भोलू, अवं अपनि आत्मा सेबभी लोकन देइलो, ते तुशशां मड्डां कुइयां भविष्यवाणी केरेलां, ते तुशशे नौजावन दर्शन हेरेले, ते बुडे सुपना हेरेले। 18 बल्के अवं तैन दिहैइन मां अपने सेवादर मड़दने ते सेवादर कुआन्शां पुड़ अपनि आत्मा उतरेलो, ते तैना भविष्यवाणी केरेले। 19 अवं अम्बरे मां आजीब-आजीब कम्मां ते ज़मीनी पुड़ निशान, यानी अग, खून ते कालो तूएरी बिदलार हिरियेले। 20 प्रभुएरी दिहाडी एजने करां पेड़ले, दिहाडो आंधरो भोइ गानोए। 21 ते ज़ै कोई परमेशररू नवं घिन्नेलो तैस मुक्ति मैलेली।” 22 “हे इस्राएल्लेरे लोकव, इना गल्लां शुना, यीशु नासत नगरेरो अक मैन्हु थियो, ज़ै परमेशर तुशशे लेइ भेजेरो थियो, ते एस गल्लारी तसदीकी तैसेरे खास चमत्कारां केरे सबूतेईं सेइं भोचे, ज़ैना परमेशर तैसेरे जिरिये सेइं इशशे सामने हिरां, जेन्चरे कि तुस एप्पू भी ज़ानतथा। 23 ज़ैखन ते परमेशररे इंतज़ामेरे पूरे मौके पुड़ ज़ानेरे हिसाबे सेइं दलुवाव, ते तुसेईं तै अर्धमीं लोकां केरे हथ्ये कूसे पुड़ टंगेइतां माराव। 24 पन परमेशर ते मौतरे सकंजे मरां छुटेइतां ज़ीतो कियो, किजोकि एन भोइ न थियू सकतू, कि तै मौतरे कब्जे मां राए। 25 किजोकि दाऊद मसीहेरे बारे मां एन ज़ोते, हेरा, प्रभु हर वक्त मेरे सामने, अवं तैन लोकन करां न डरेलो ज़ैना मेरो नुकसान चातन। 26 तांए मेरो दिल बडी खुश भोव, ते अवं खुशी सेइं ज़ोइलो, बल्के मेरी जान उमीदी सेइं जीएली। 27 किजोकि तू मेरे प्राणन पाताले मां राने न देलो, ते न अपने पवित्र मैन्हु शङ्गे देलो! (Habd 8:6) 28 तीं मीं ज़िन्दगरी बत हेरेवरिए, तू अपने हज़ूरी सेइं मीं भरपूर केरेलो।” 29 “हे मेरे दूलाव, अवं कौमारे बुजुर्ग

दाऊदरे बारे मां तुसन सेईं साफ-साफ ज़ोईं सकताईं, कि ते मेरि भी जेव, ते दब्बो भी ते तैसेरी कब्र अज़ तमार इश्शे सामने मौजूद। 30 ते नबी थियो, ते ते ज्ञानतो थियो, कि परमेशरे तेस सेईं वादो कियोरो थियो, 'अव तेरी खानदनी मरां अक मैनु तैसेरे तखते पुड़ बिशेलेलो।' 31 तैनी पेड़ले भोनेबेली गल्लां ते मसीहरे मुडदन मरां जीतो भोनेरे बारे मां बियांन कियेरु थियू, कि न ते पाताले मां राने देलो, ते न अपने पवित्र मैनु शड़ने देलो! (Hades g86) 32 "एहे यीशु परमेशरे जीतो कियो जेसेरे अस सब गवाह आम। 33 ते हुना तै स्वर्गं मां खास ठैरी यानी परमेशररे देइने पासे आए। ते तैने बाजी परमेशरे करां पवित्र आत्मा हासिल की, जेसेरो तैने वादो कियोरो थियो, यीशुए असन पवित्र आत्मा भरपूरी सेईं दित्तोरीए, जैन तुस लातथ ते शुन्तथ। 34 किजोकि दाऊद त एप्पू स्वर्गं मां नईं जोरो, पन फिर भी तै एप्पू ज़ोते, प्रभु परमेशरे मेरे प्रभु सेईं ज़ोव, मीं सेईं साथी राज़ केर। 35 जांतराव अव तेरे दुश्मन तेरे अधीन न केरि। 36 एल्हेरेलेइ, इस्राएलेरे सारे लोकन पतो लगगे, कि परमेशरे, यीशु ज़ै तुसेईं कूसे पुड़ चाढो ते प्रभु भी कियो ते मसीह भी कियो।" 37 एना गल्लां शुन्तां तैन बड़ो एसास भोव कि तैना पापिन, तैखन तैनेईं पतरसे ते होरि प्रेरितन सेईं ज़ोव, "हे ढूलाव अस कुन केरम?" 38 पतरसे तैन सेईं ज़ोव, "पापन करां मनफिराथ ते तुसन मारफे सारे यीशु मसीहरे नब्बे सेईं बपतिस्मो घिन्ना, त न परमेशर तुसन माफ़ केरेलो ते पवित्र आत्मा तुसन इनामे मां मैलेली। 39 एल्हेरेलेइ कि ए वादो तुसन त तुशुथी ओलादी सेईं आए ते तैन सेबभन सेईं जैना दूर-दूर रातन, ते जैन इश्शो प्रभु परमेशरे एप्पू कां कुजाते।" 40 पतरसे होरि भी बेडि गल्लां केरि गवाही दित्ती, ते तैन बार-बार ज़ोव, कि अपनो आप एस ठैरी कौमी करां बचाथ। 41 ते तैनेईं तैसेरी गल्लां कबूल की, तैनी तैन बपतिस्मो दित्तो, तैस दिहेड़ी लगभग कोई 3000 मैनु तैन मां शामिल भोए। 42 एना लोक प्रेरितन करां शिक्षा हासिल केरते थिये, ते संगती रखते थिये, ते साथी रोटी खाते थिये, ते प्रभु भोज मनाते थिये ते प्रार्थना केरने मां मघन रहते थिये। 43 प्रेरितां केरे ज़िरिये सेईं बड़े चमत्कार ते निशान भोते थिये, ते यरूशलेमेरे सारे लोक डेरि जे। 44 यीशु मसीह पुड़ विश्वास केरनेवाले सारे अकोट्टे रहते थिये, ते सैरी चीज़न मां एक्की होरि बराबर हिस्सेदार रखते थिये। 45 ते तैना अपनि जेइदात ते माल सबाब बेचतां एक्की होरी ज़रूरते मुताबिक रकम बंटतां सेबभी केरि ज़रूरत पूरी केरते थिये। 46 तैना रोज़ अक मन भोइतां मन्दरे मां अकोट्टे भोते थिये, ते घरन मां साथी रोटी खाते थिये ते प्रभु भोज मनाते थिये, ते अकोट्टे भोइतां खुशी सेईं खाते थिये। 47 तैना परमेशररी तारीफ़ केरते थिये, तैना सैरी केरि नज़री मां रोड़े थिये। जैन पापन करां मुक्ति मैलती थी, परमेशर तैन लोकन तैन केरि टोली मां शामिल केरतो थियो।

3 एक्की दिहाड़े पतरस ते यूहन्ना प्रार्थना केरने दीसेरे ट्लेइ बजेईं मन्दरे मांजो च़लोरे थिये। 2 ते मैनेईं अक जर्मनरो टोटो छुइतां आनोरोए थियो, ते तैस मन्दररे दारे पुड़ छडते थिये, जैस दारेरु नव "रोडू" थियू, ताके अन्तर गाने बालन करां भीख मग्गे। 3 ज़ैखन तैनी पतरस ते यूहन्ना मन्दरे मांजो गांते लाए त तैन करां भीख मगने लगगे। 4 पतरस ते यूहन्ना तैसेरे पासे खेडोइतां ज़ोने लगगे, "इश्शो पासे तक।" 5 ते तैस उमीद भोइजेइ कि एन करां किछ मैलेलू, तै तैन केरे पासे तकने लगगे। 6 पतरसे ज़ोव, "सोन्नु चाँदी त असन कां अस्थी नईं, पन जैन मीं कां आए तैन अव तं देताईं, तू यीशु मसीह नैसरेरे नब्बे सेईं खडो उठ ते च़ल फिर।" 7 पतरसे ज़ेरो तैसेरो देइनो हथ ट्लेइतां खडो कियो, त तैसरे पावन मां ते गुडन मां ताकत आईं। 8 ते तै तैखने खडो भोव, ते च़लने फिरने लगगे, ते फिरी छालां मारतो ते परमेशररी तारीफ़ केरतो तैन सेईं साथी मन्दररे अंगने मां च़लो जेव। 9 ते सेबभी लोकेईं तै च़लतो फिरतो ते परमेशररी तारीफ़ केरतो लाव। 10 ते पिशानो ई त तैए, ज़ै मन्दररे रोड़े दारे पुड़ बिश्तां भीख मगतो थियो, ते ज़ै चमत्कार एन लोकां केरे सामने भोव, त तैना लोक बड़े हैरान राए। 11 ज़ैखन तै मैनु पतरस ते यूहन्ना ट्लेइतां खडखडो थियो, त सब लोक जैना तैड़ी खडखडे थिये, बड़े हैरान भोइतां सुलेमानी अंगने मां देवइतां तैन कां आए। 12 पतरसे एन हेरु

त ते लोकन कां एन्चरे खडो भोव, ते ज़ोने लगगे, "हे इस्राएली लोकव तुस एस गल्ली पुड़ किजो हैरान भोथ, ते असन एन्चरे किजो तकने लोरेथ, असेईं अपने शक्ति या भक्ति सेईं ए टोटो मैनु च़लने फिरनेरे काबल नईं बनेवरोए। 13 अब्राहम ते इसहाक ते याकूबेरे परमेशरे ते इश्शे पूर्वजां केरे परमेशर अपने दासे यीशु महिमा दित्ती, पन तुसेईं तै यूहदी लीडन कां दित्तो कि तैना तैस मारन। पिलातुसे ते हथरां छडनेरो इरादो कियो, पन तुसेईं यीशुएरो इन्कार कियो। 14 तुसेईं यीशु अक एरो पवित्र ते धर्मी मैनु रद कियो, ते पिलातुसे कां दरखुवास की, कि तै तुशे लेइ अक कातली हथरां छड़े। 15 तुसेईं त ज़िन्दगी देनेबालो मारो, पन अस गवाह आम, कि परमेशरे तै मुडदन मरां जीतो कियो। 16 तैसेरे नब्बेरी शक्ति एस टोटो, ज़ै तुशे सामने ते जैस तुस जानतथ शिफा दित्तोरिये ते ए मैनु यीशुएरे नब्बे सेईं ते यीशु पुड़ विश्वास केरने सेईं बिलकुल ठीक भोव, ते ए एप्पू तुशे सामने। 17 "हे मेरे ढूलाव अव ज्ञानताईं कि जैन किछ तुसेईं ते तुशे लीडरेईं यीशु सेईं कियू, तैन तुसेईं अनजान भोइतां कियू। किजोकि तुसन न थियो पतो कि तै मसीह आए। 18 पन परमेशरे एना सैरी गल्लां जैना तैनी अपने नेबी केरे ज़िरिये ज़ोरी थी, कि मसीह दुःख ऊठालो ते मरेलो ते तैनी तैना एन्चरे पूरी की। 19 बस्सा पापन करां मनफिराथ ते परमेशररे पासे फिरा ते ते तुशे पाप माफ़ केरेलो, ते परमेशररी तरफां तुशे लेइ परमेशरे तरफां रोड़े दिहाड़े एज्जले। 20 ते तै मसीह यानी यीशु ज़ै तैनी ठहरावरो आए, तुशे लेइ भेजे। 21 पन जांतराव तैना सैरी चीज़ां बहाल न केरे, जैन केरे बारे मां परमेशरे बड़े पेड़ले अपने पवित्र नेबी केरि ज़बानी ज़ोरूए, तांतराव यीशुएरु स्वर्गं मां रानू ज़रूरीए। (aiōn g165) 22 जेन्चरे मूसा एस बारे मां ज़ोरू थियू, प्रभु परमेशर तुशे ढूलान मरां तुशे लेइ मेरो ज़ेरो अक नबी भेजेलो, जैन किछ तै तुसन सेईं ज़ोए, तुस तैसेरी गल शुन्तथ। 23 पन ज़ै तैस नेबेरी गल न शुनेलो, तै लोकन मरां नाश कियो गालो। 24 ते शमूएल परमेशररी गल्लां ज़ोनेबाले करां देइतां पेड़ले तमाम नेबेईं इन दिहाड़ां केरे बारे मां शुनावरू। 25 तुस नेबी केरि खानदनी ते ज़ै करार परमेशरे इश्शे पूर्वजन सेईं कियोरो थियो, तैस मां तुस सब शामलथ, परमेशरे अब्राहमे सेईं ज़ोरू थियू, कि तेरे मट्टेरे ज़िरिये सेईं दुनियारी तमाम कौमन बरकत मैलेली। 26 परमेशरे अपनो सेवक मुडदन मरां जीतो कियो ते पेड़लो तुसन कां भेजे, ताके तुसन तै बरकत दे, कि तुसन मरां हर कोई पापेरी ज़िन्दगी शैरतां परमेशररे पासे फिरे।"

4 हेजु पतरस ते यूहन्ना लोकन सेईं गल्लां केरते थिये, त किछ याजक ते मन्दररे परेहदार ते किछ सदूकी लोक तैड़ी पुजे। 2 तैना बड़े सेरकोए, कि पतरस ते यूहन्ना लोकन एरी शिक्षा देते कि परमेशरे मरं लोकन जीतो केरेलो, जेन्चरे तैनी यीशु मुडदन मरां जीतो कियोरोए। 3 तैनेईं तैना दुइयोव दिहेड़ी तगर गिरपतार रखवे, किजोकि ते इलोइजोरो मौको थियो। 4 पन केही लोकेईं वचन शुन्तां यीशु पुड़ विश्वास कियो, ते तैन केरि तैथात 5000 मडद भोइ। 5 होरसां एरू भोव कि तैन केरे लीडर ते बुजुर्ग ते शास्त्री यरूशलेम नगरे मां जम्हां भोए। 6 हन्ना महायाजक तैड़ी थियो, ते कैफा ते यूहन्ना महायाजक ते सिकन्दर ते खानदनेरे होरे लोक भी तैड़ी थिये। 7 तैनेईं पतरस ते यूहन्ना मड्गाटे खडे किये ते तैन पुच्छू, "तुसेईं केसेरे शक्ति या केसेरे अधिकारे सेईं एन कक कियोरूए?" 8 तैखन पतरस पवित्र आत्माईं सेईं भरपूर भोइतां तैन एन्चरे सेईं ज़ोने लगगे, "हे कौभरे लीडराव ते बुजुर्ग। 9 अगर अज़ असन एल्हेरेलेइ पूछ लाख की गातीए, कि असां एक्की रोड़े कम्मरो जुवाब देम, जैन असेईं एक्की टोटो मैनेरे लेइ कमाव ते तैस शिफा दित्ती। 10 ते तुसन ते सारे इस्राएलिन ए पतो लगगे, कि ए मैनु यीशु मसीह नैसरेरे नब्बेरी शक्ति सेईं बेज़ोइतां तुशे सामने खडोए, ज़ै यीशु तुसेईं कूसे पुड़ च़ाढोरो थियो, पन परमेशरे तै मुडदन मरां जीतो कियोरोए। 11 ए तैए घोड़े, ज़ै तुसेईं मिस्त्रेईं रदी कियोरो थियो, पन तैए घोड़ कूनेरो खास घोड़ भोइ जेव। 12 ते पापां केरि माफ़ी केन्नी होरेरे ज़िरिये सेईं नईं, किजोकि अम्बरेरां बुन मैनन मां कोई होरू दुइयोव नव नईं दित्तेर, जेसेरे ज़िरिये सेईं मुक्ति मैले, सिर्फ यीशुएरे नब्बे सेईं मुक्ति आए।" 13 ज़ैखन तैनेईं पतरस ते

यूहन्नारी दिलेरी हेरी, त तैखन तैन पतो लगी, कि एना त अनपड़ ते मामुली मैन्हु आन ते तैना बडे हैरान भोए, तैखन तेनेई बुझू कि एना लोक यीशु सेई साथी राहारेन। 14 तेनेई पतरस ते यूहन्नारे खलाफ किछ न जोई बटु, एल्हेरेलेइ कि जै मैन्हु बेइजोरो थियो, तै मैन्हु तैन सेई साथी खइखइ थियो। 15 तैखन तेनेई पतरस ते यूहन्ना महासभा करां बेइर नेनेरे लेइ जोवं, ते एप्पू मांमेई मुशरो करेने लगे। 16 “असां एन लोकन सेई कुन केरम? यरुशलेम नगरेरे सब लोक जानतन कि एन लोकेई अक बडो चमत्कार कियोरोए, जेसेरो अस इन्कार न केरि बटम। 17 पन एल्हेरेलेइ अस एन न चाम कि ए गल लोकन मां जादे मुशर न भोए, रौडू त एन्ने कि अस एन धमकेइतां ज़ोम कि अज़ेरे बाद एन नवं घिन्तां केन्चीं सेई गल न केरन।” 18 तैखन तेनेई पतरस ते यूहन्ना अन्तर कुजेइतां हदैयत दिती, “यीशुएरु नवं घिन्तां केन्चीं सेई गल न केरथ, ते न शिक्षा देइयथा।” 19 पन पतरस ते यूहन्ना तैन जुवाब दित्तो, “तुस एप्पू ए फेसलो केरा, कि कुन ए गल परमेशेरी नज़री मां ठीके, फिरी अस तुशरी गल मननम कि परमेशेरी? 20 किजोकि एन नई कि जैन किछ असेई शूनू ते लाहू, ते तैसेरे बारे मां ज़ोतमा।” 21 तैखन तेनेई पतरस ते यूहन्ना धमकेइतां हथरां छडे, द्रासले मां तैना फेसलो न केरि सके, कि एन सज़ा त देम पन केन्चरे देय, किजोकि तैमा एणक चमत्कार हेरतां परमेशेरी महिमा केरते थियो। 22 किजोकि ज़ैस मैन्हु पुइ शिफ़ा देनेरो चमत्कार हिरावरो थियो, ते 40 सालन करां जादे उमरारो थियो। 23 पतरस ते यूहन्ना तैइ छुटनेरां बाद अपने लोकन कां चले जे, ते जैन किछ प्रधान याजक ते बुजुर्गेई तैन ज़ोरू थियू, तैन सेई शूनावं। 24 ज़ैखन तेनेई एना गल्लां शुनी त अक भोइतां बडे ज़ोरे सेई परमेशेरे कां प्रार्थना केरने लगे, तीं धरती त कने अम्बर ते समुन्द्रे ते जैन किछ एसमां आए बनोरूए। 25 तीं पवित्र आत्मा रे ज़िरिये सेई अपने सेवक इश्शे पूर्वज दाऊदेरी ज़िरिये ज़ोरू थियू, “कि कोमेई किजो हेल्लो मचाव? ते मुलखां-मुलखां केरे लोक किजो बेफेइदे खियाल केरतन? 26 ज़मीनरे राजे, प्रभु ते तैसेरे मसीहरे खलाफ खडे भोए ते हाकिम साथी खडे भोए।” 27 “एन सच्चे कि हेरोदेस पुनित्युस ते पिलातुस भी गैर यहूदी ते सब इस्राएली लोकन सेई साथी तेरे पवित्र सेवक यीशुएरे खलाफ नगर-नगरे मां खडे भोए, जै तीं मसीह ठहरावरो थियो। 28 तैना एल्हेरेलेइ अकोट्टे भोरे थिये कि जैन किछ तू अपनि कुदरतारो इरादेरे मुताबिक पेइले तैनी ठहरावरू थियू, तैस पुइ अमल केरम। 29 हुनी हे प्रभु, तैन केरि धेमकी शुन, ते अपने दासन इन वरदान दे, कि तेरू बच्चन बेइडि दिलेरी सेई लोकन शुनेई बटम। 30 अपनो हथ अग्रवं रख, ते अपने पवित्र सेवक यीशुएरे न्वंचे सेई शिफ़ा दे, ते चमत्कार ते निशान हिरा।” 31 ते ज़ैखन तेनेई प्रार्थना की, त ज़ैस ठेरी तैना अकोट्टे जम्हां थिये, त ते ठार हिल्ली, ते तैना सब पवित्र आत्माई सेई भरोए, ते परमेशेरे बच्चन बेइडि दिलेरी सेई शूनाने लगे। 32 विश्वास केरनेबालां केरि मण्डली अक मन ते अक जान थी, कोई भी एरो न थियो जै अपनो माल अपनो समझतो भोए, बल्के होरन भी सैरी चीज़न मां शामल रखते थिये। 33 ते प्रेरित बेइडि शेक्ति सेई प्रभु यीशुएरे मुड्डन मरां ज़ीते भोनेरी गवाही देते थिये, ते तैन पुइ परमेशेरो बडो अनुग्रह थियो। 34 तैन मरां कोई भी गरीब न थियो, किजोकि ज़मीना केरे त घरां केरे मालिक तैन बेचतां तैन केरि कीमत प्रेरितन कां आनते थियो। 35 ते तैना तै रकम प्रेरितन देते थिये, ते हर केन्ची तैसैरी ज़ुररतारे मुताबिक बेटतां देते थिये। 36 यूसुफ न्वंचेरो अक लेवी थियो, जै साइप्रसेरो रानेबालो थियो, ते प्रेरितेई तैसेरू नवं बरनबास रखेरू थियू, (जेसेरो मतलबे शैतनरू मड्डू। 37 तैनी अपनू ऊडार बेचू, ते कीमत एन्तां प्रेरितन दिती।

5 हनन्याह नव्वेरो अक मैन्हु थियो, ते तैसैरी कुआन्शरू नवं सफीरा थियू ते तेनेई अपनि जेईदातरो किछ हिस्सो बेची छड्डो। 2 ते कीमती मरां किछ पेंडसे एप्पू कां रखे, जेसेरो तैसैरी कुआन्शी भी पतो थियो, ते बाकी हॉरे पेंडसे एन्तां प्रेरितन दित्ते। 3 पन पतरस तैस सेई ज़ोवं, “हे हनन्याह! शैताने तेरे मने मां ए गल केन्चरे छडी, कि तू पवित्र आत्माई सेई झूठ ज़ोस, ते ज़मीनारे पेंडसन मरां किछ रेख्खी छडस? 4 कुन बेचने करां पेइले ज़मीन

तेरी न थी, पन बेचनेरां बाद कुन पेंडसो तेरो न भोव? तीं अपने मने मां किजो सोचू? तीं मैन्हु सेई नई बल्के परमेशेरे सेई झूठ ज़ोरूए।” 5 हनन्याह एन शुनते खिरकी जेव, ते तैसेरे प्राण निस्से, ते जैन लोकेई एन शूनू त तैना बडे डेरि जे। 6 तैखन किछ नौजवान आए ते तेनेई तैसैरी लाश कफने मां पलेटतां ते बेइरोवं नेइतां देवतां छडी। 7 टलेइ घैन्टना पत्ती तैसैरी कुआन्श आई, ते तैस एस बारे मां कोई पतो न थियो। 8 पतरस तैस पुच्छू, “मीं ज़ो, कुन तुसेई दुइयेई ज़मीन एत्रे मां बेचोरी थी?” तैसां ज़ोवं, “हाँ कुल कीमत एत्री मैल्लोरी थी।” 9 पतरस तैस सेई ज़ोवं, “प्रभुएरी आत्मा अज़मानेरे लेइ तुस केन्चरे सेई राजी भोए, ते जैन लोकेई तेरो मुन्श दबोरोए, तैन केरे पाव हेर दारे पुइ आन, ते तैना तीं भी बेइरोवं घिनी गाले।” 10 तै कुआन्श तैखने तल्ले बिछड़ी, ते तैसारे भी प्राण निस्से, ते ज़ैखन नौजवान अन्तर आए त तै कुआन्श मरीं लेइतां तै भी छुटतां तैसारे मुन्शे इलाखोरां देवतां छडी। 11 सैरी यरुशलमेरी कलीसिया ते एन गल्लां केरे शुन्ने बाले बडे डेरि जे। 12 प्रेरितां केरे ज़िरिये बडे चमत्कार ते निशान बांटे भोए, ते सारे विश्वासी अक भोइतां सुलैमानी अंगने मां जम्हां भोते थिये। 13 हालांकी हॉरे लोक तैन केरि बडी इज़्जत केरते थिये, पन केन्ची हिम्मतन न आई कि तैन मां शामिल भोन। 14 बडे मड्डेई ते कुआन्शेई विश्वास कियो ते तैन लोकां केरि मेनडली मां शामिल भोए, ते परमेशरू मने बालां केरि तैथात बद्धती चली। 15 जैन प्रेरितेई कियू तैसेरो नितीजो ई भोव, कि लोक बिमारन खट्टन पुइ ते पिट्टी पुइ छुइतां सडकी मां रखते थिये, कि पतरस ज़ैखन तैस बत्तां एज्जे त तैसेरी छाव त तैन पुइ पे। 16 यरुशलम नगरेरे च़ेरे पासना डुलोवां केरे बडे लोक बिमारन ते जैन पुइ भूतां केरो सैयो, एप्पू सेई साथी आनते थिये, ते तैना सब बेइजोते थिये। 17 तैखन महायाजक ते तैसेरे साथी ज़ैना सदूकी केरे फिरके मरां थिये, तैन बडी जलन भोने लगी ते तैना प्रेरितां केरे खलाफ खडे भोए। 18 ते तेनेई प्रेरित ट्लुवेइतां केद मां छेड़ी दित्ते। 19 पन प्रभुएरो राती स्वर्गदूत केदखाने मां दार खोलतां प्रेरितन कां जेव, ते तैना बेइर केदतां तैन सेई ज़ोने लगे। 20 “गाथ ते मन्दरेरे अंगने मां खडे भोइतां हमेशारे ज़िन्दगरे बारे मां लोकन बिस्तार देथ।” 21 तैना एन शुन्तां झेइलां मन्दरेरे अंगने मां पुजे ते जेन्चरे तैन स्वर्गदूते हुक्म दित्तोरो थियो, तेन्चरे लोकन शिक्षा देने लगे, ते ज़ैखन इस्राएली महायाजक ते तैसेरे साथी तैडी आए, त तेनेई महासभा ते सब यहूदी केरे सारे बुजुर्ग कुजाए, ते तेनेई यीशुएरे प्रेरित केदखाने मरां कुजाए। 22 ज़ैखन मन्दरेरे परहेदार केदखाने मां पुजे तैन प्रेरित तैडी न मैल्ले, ते वापस एइतां तैन खबर दित्ती। 23 “असेई केदखानो रोडेघारे बंद कियोरी थियो, ते परहेदार भी असन दारे मां खडखडे मैल्ले, पन ज़ैखन असेई केदखानो खोल्लो त अन्तर कोई न मैल्लो।” 24 एना गल्लां शुन्तां मन्दरेरे परहेदारां केरो प्रधान, प्रधान याजक ते सारे लोक हैरान रेइजे, ते तैन केरि फिक्री मां पे कि हुनी कुन भोनुए! 25 तैखन केन्चे एइतां ज़ोवं, “तैना मैन्हु ज़ैना तुसेई केदे मां छुडारे थिये, तैना मन्दरे मां खडे भोइतां शिक्षा देने लगारेन।” 26 तैखन मन्दरेरे परहेदारां केरे प्रधान अपने सिपाही साथी घिन्तां जे, ते प्रेरित कुजेइतां आने पन ज़बरदस्ती नई, किजोकि तैना लोकन करां डरते थिये, कि एरू न भोए एना असन घोडेई बान। 27 तेनेई प्रेरित एन्तां महासभा मां पैश किये, ते महायाजके तैन पुच्छू। 28 “असेई तुसन ठाकेरू थियू, कि यीशुएरू नवं घिन्तां शिक्षा न देइयथ? फिरी भी हेरा, तुसेई सारे यरुशलम नगरे मां अपनि शिक्षा फैलाई, ते तैस मैनेरो खुनेरो दोष असन पुइ लानो चातथा।” 29 पतरस ते होरि प्रेरितेई जुवाब दित्तो, “असन मैन्हु केरो हुक्म मन्नेरे बजाहे परमेशेरो हुक्म मन्नो जादे ज़रूरीए। 30 इश्शे दादे-पड़दादा केरे परमेशेरे ए यीशु मुड्डन मरां ज़ीतो कियो, जै तुसेई कूसे पुइ च़ेइतां मारो। 31 तैए परमेशेरे, प्रभु ते मुक्ति देनेबालो बनेइतां अपने देइने पासे बिशालो, ताके ते इस्राएलिन मन फिराने ते पापां केरि मैफारो मौको दे। 32 असां एन गल्लां केरे गवाह आम, ते पवित्र आत्मा भी, जै परमेशेरे तैनी अपनो हुक्म मन्ने बालन दित्तोरीए।” 33 ज़ैखन तेनेई एन शूनू त फुकोई जे, ते तैन केरि मर्ज़ी लगी ज़ोने कि एन मैरी छडम। 34 पन अक फरीसी मैन्हु जेसेरू नवं गमलीएल थियू, ते ज़ै शास्त्री भी थियो, ते ज़ै सेब्भी लोकन मां

इज़्ज़तदार थियो, तैनी महासभा मां खडे भोइतां हुकम दित्तो कि एना मैनु थोडे चिरे बेडर भेजा। 35 तै एन ज़ोने लगी, “हे इस्राएली लोकव तुस ज़ेन किछ एन मैनन् सेई केरनु चातथ तैन रोडेचारे सोचा। 36 किजोकि थोडे चिरे पेडले थियुदास इन जोइतां खडो भोरो थियो, ते ज़ोतो थियो, अवं भी किछ आई, ते लगभग 400 मैनु तैस सेई मिले, पन तै मारो जेव, ते तैसेरे मन्नेबाले सारे तितर-बितर भोइ जे, ते तैन केरो नामो निशान मिटी जेव। 37 तैसेरां पत्ती मैनु केरे गिनतरे वक्ते गलील इलाकेरो यहूदा निसोरो थियो, ते तैनी काई लोक अपने पासे खिचोरे थिये, तै भी मारो जेव, ते तैसेरे जेत्रे साथी थिये, सब तितर-बितर भोइ जे। 38 हुनी अवं तुसन एन्ने ज़ोताई कि एन मैनन् करां दूर भोथ, ते एन गाने देथ, किजोकि अगर एना चमत्कार, मैनु केरि तरफां भोले त एप्पु खतम भोइ गानेन। 39 पन अगर एना कम्मां परमेशरेरी तरफां भोलां, त तुस एन मैनु केरु किछ न बिगैडी सकत, ते तुस परमेशरेरे खलाफ लडनेबाले भोले, तैनेई तैसेरी सल्लाह मन्नी।” 40 ते प्रेरित अन्तर कुजेइतां तैन डंडेइं बावैहीतां तैन ज़ोवं, कि अजेरां बाद यीशुएरे नंवे सेई कोई गल न केरथ, ते तैना हथरां छडे। 41 प्रेरित महासभा मरां चले जे, तैना एस गल्ली पुड खुशी थिये, कि असां यीशुएरे नंवे सेई बेइजत भोनेरे काबल त भोए। 42 तैनेई शिक्षा देनी बंद न की, बल्के रोज़ मन्दरे मां गेइतां ते घर-घर गेइतां लगातार खुशखबरी शुनाते राए कि यीशु ही मसीह आए।

6 ई गल तेइसेरीए जेइस चले केरि गिनती बधने लगीरी थी, यूनानी भाषा ज़ोनेबालो यहूदी चलेई इब्रानी भाषा ज़ोनेबाले यहूदी चेलां केरि शकैइत केरने लगे, कि हर दिहैइरे सेवाई मां विधवां केरि खबर न की गाए। 2 एन शुन्तां 12 प्रेरितेई सारे यरुशलमेरे सारे विश्वासी लोक (चले) अकोट्टे किये, ते ज़ोवं, “इश्शे लेइ एन मुनासब नगई कि अस परमेशरेरी वचनेरु प्रचार केरनो छेइतां खाने पीनेरी सेवाई मां लग्यम 3 एल्हेरेलेइ हे मेरे दूलाव, अपने लोकन मरां सत भलमानस मैनु चुना, जैना पवित्र आत्माई सेई भरपूर ते अक्लामन्द भोन, ताके आस तैन एस कम्मेरी जिमेबारी सॉफम।” 4 पन अस त प्रार्थना केरने ते बच्चन शुनामेरी ते शिक्षा देनेरी सेवाई मां लगगोरो रानेन। 5 ए गल सारे लोकन पसंद आई, ते तैनेई अक स्तिफनुस जै विश्वास ते पवित्र आत्माई सेई भरपूर थियो चुनो, ते हारे जैना चुने तैन केरां नवां इना आन, फिलिप्पुस प्रुखुरुस, नीकानोर, तीमोन, परमिनास ते नीकुलाउस जै अन्ताकिया नगरेरो रानेबालो थियो, ते यहूदी फिरके मां ओरो थियो। 6 ते तैना प्रेरितन कां हाज़र किये, ते तैन केरे लेइ तैनेई प्रार्थना की, ते तैन पुड हथ रखे। 7 एन्चरे सेई परमेशरेरु बच्चन पैलतु जेवं, ते यरुशलम नगरे मां चेलां केरि गिनती बढ़ती जेई, ते याजकां केरि अक टोली विश्वास मां आई ते मसीही भोइजेइ। 8 स्तिफनुस अनुग्रह ते शेक्ति सेई भरपूर भोइतां लोकन चमत्कार ते निशान हिरातो थियो। 9 आज़ाद भोरे यहूदी लोकां केरु अक प्रार्थना घर थियूं, कुरेनी ते सिकन्दरिया ते किलिकियारे ते आसियारे किछ लोकन मरां किछ स्तिफनुसे सेई बंस केरने लगे। 10 तैना तैन गल्लां केरो जुवाब न देइ बटे, जैना पवित्र आत्मा तैस ज़ोनेरी समझ दित्ती। 11 तैखन तैनेई किछ लोक शिखाले, कि तुस झूठ ज़ोवयथ कि, “असेई स्तिफनुस मूसरे ते कने परमेशरेरे खलाफ तुहीन केरते शुनोरोए।” 12 तैखन तैनेई किछ लोक, बुजुर्ग ते शास्त्री स्तिफनुसेरां खलाफ बमकाए ते तै दलेइतां महासभा मां पैश कियो। 13 तैनेई बडे झूठे गवाह पैश किये, “ते तैनेई गवाही दित्ती कि ए मैनु पवित्र ठारारे ते मूसरेर कानुनेरे खलाफ तुहीन केरने करां बाज़ न एज्जे। 14 ते असेई एस मैनु करां एन भी ज़ोतु शुनु, कि यीशु नासरी इस मन्दरे डोलेलो, ते तैना रसमां जैना मूसा नेबे दित्तोरिन बदलेलो।” 15 तैखन लोक जैना महासभा मां बिश्शारे थी, तैसेरे पासे तक्क कि तैसेरु तुतर स्वर्गदूतरे जेरु लेइहीतु थियूं।

7 तैखन महायाजके स्तिफनुसे सवाल पुछो, “कुन एना इलज़ाम सच्चरे आन?” 2 तैनी ज़ोवं, “हे दूलाव ते मेरे बुजुर्गाव, मेरी गल शुना, इश्शो पूर्वज अब्राहमे हारान नगरे मां बसने करां पेडलो मेसोपोटामिया इलाके मां थियो, ते महिमा बाले परमेशरे तैस दर्शन दित्तू 3 ते परमेशरे तैस सेई ज़ोवं,

अपनो देश त अपने रिशतेदारन शैरतां तैस मुलखे मां गा, जै अवं तीं हरेइलो। 4 तांए तै कसिदी केरे मुलखे शैरतां हाराने मां बसोरो थियो, तैसेरे बाजेरे मरनेरां पत्ती परमेशरे ते तैस मुलखे मां आनो जैस मां अज़ तुस बसोरेथ। 5 पन परमेशरे तैस इडी किछ भी जेइदात न दित्ती, बल्के पाव रखने जो भी ज़मीन न दित्ती, पन वादो ज़रूर कियो कि ई ज़मीन अवं तीं ते तेरी औलादी कब्जे मां देलो हालांकी तेइस अब्राहमे कोई औलाद न थी। 6 परमेशरे इन भी ज़ोवं, तेरी औलाद एककी बखले देशे मां परदेशी भोली, तैना तैन गुलाम बनाले, ते 400 सालन तगर तैन दुख देले। 7 फिरी परमेशरे ज़ोवं, जै कोम तैन गुलाम बनाली तैन अवं सज़ा देइलो, ते तैसेरां बाद तैना तैस मुलखे मरां निस्सतां इडी एज्जले ते मेरी आराधना केरेले। 8 ते परमेशरे अब्राहमे सेई कार कियो ते तैस सेई ज़ोवं, कि निशानेरे रूपे मां सेबमी धरानेरे नर मैनु केरो खतनो केर। ज़ैखन इसहाक ज़रमो ते अठे दिहैडी केरो भोव, त अब्राहमे तैसेरो खतनो कियो, ते एन्चरे इसहाके अपने मट्टे याकूबेरो खतनो कियो, ते याकूबेरे अपने 12 मट्टां केरो खतनो कियो। 9 याकूबेरे मट्टेई जलनी सेई अपनो दूला यूसुफ मिस्र मुलखे जो गाने बालन जो बेचो, ते तैनेई यूसुफ मिस्रे मां नेइतां गुलाम बनाव तैन परमेशर यूसुफे सेई साथी थियो। 10 परमेशरे तै सैरी मुसीबतन करां छुटेइतां, ते तैस बडी अक्ल दित्ती, ते मिस्रेरे फिरौन राजेरे सामने बडी काबलीत दित्ती, ते फिरौन राजे, यूसुफ मिस्र मुलखेरो ते अपने महलेरो गवर्नर बनावं। 11 जैस वक्ते यूसुफ थियो त मिस्र मुलख ते कनानारे सारे मुलखे मां काल पेव, ते बडी मुसीबत आई, ते इश्शे दादे-पडदादन खाने जो अन न मैल्लू। 12 जैखन याकूबे शुनु कि मिस्रे मां अन्न आए, त तैनी इश्शे पूर्वज मिस्र मुलखे मां पेडली बार भेजे, तैना यूसुफ सेई मिले ते अन आनु पन तैनेई तैन पिशानो। 13 जैखन तैना दुइयोवं फेरे मिस्र मुलखे मां अन्न आन्ने जे, त यूसुफे अपनो आप तैन पिशानाव, ते फिरौने भी यूसुफेरी कौमरो पतो लगी कि ए इब्रानी आए। 14 तैसेरां बाद यूसुफे अपनो बाजी याकूब ते तैसेरे 75 मैनु केरु टब्बर मिस्र मुलखां मांजो एजनेरो बिस्तार भेजो। 15 किछ वक्तेरां बाद याकूब मिस्र मुलखे मां जेव, ते तै त इश्शे दादे-पडदादे तैडी मेरि जे। 16 तैन केरि लाशां तैट्ठां इश्शे मुलख कनाने मां वापस एन्ही, ते तैनेई याकूब, तैस ठैरी दफन कियो, जै ठार अब्राहमे चाँदी देइतां घिन्नीरी थी, ते याकूबेरां मट्टां शकेम नगरेरे तैस ठैरी दफन कियां, जै याकूबे हामोरेरी औलादी करां घिन्नीरी थी।” 17 “परमेशरे अब्राहमे सेई अक वादो कियोरो थियो, तैस वादोरो पूरो भोनेरो मौको अवं त मिस्रे मां इश्शे लोकां केरि गिनती भी बडी बेडी जेई। 18 तैस मौके अक हारो राजो मिस्र देशे मां राज केरने लगे, जै यूसुफे न थियो ज़ानतो। 19 तैनी इश्शे कौमी सेई एरी चलाकी कि ते इश्शे दादन-पडदादन सेई एरी बदसलूकी की, तैना एने मजबूर कियो कि तैना अपने ज़र्मते बच्चे बेइरोवं शारन ताके तैना मेरि गान। 20 तैन्ने दिहैइन मां मूसा पैदा भोव, तै परमेशरेरी नज़री मां बडो रोडो थियो, ते तै दलाई महीन तगर अपने बाजेरे घरे मां छेपतां पलतो राव। 21 पन जैखन जादे चिरे तगर छुपेई न बटे, तै दरियाए मां शारो त फिरौनेरे कुइयां तै नेव ते अपने मट्टेरो जेरो पालो। 22 मूसा नबी मिस्री केरि सैरी शिक्षारो ते तैन केरि सैरी गल्लां केरि वाकफित भोइजेइ, ते गलबाती ते कम्मे मां मजबूत थियो।” 23 “जैखन मूसा नबी 40 सालां केरो भोव, त तैसेरे मने मां ए गल आई, कि अवं अपने इस्राएली दूलां केरो हाल पतो केरि। 24 मूसा एककी इस्राएली मैनु पुड जुलम भोतो लाहू त तैनी तै बघाव, ते तै ज़ालम मिस्री मैरतां जैस पुड जुलम भोरो थियो बदलो घिंनो। 25 तैनी सोचू, कि तैसेरे दूलां समझेले, कि परमेशरे तैसेरे ज़िरिये सेई तैन मिस्री केरि गुलामी करां तैन मुक्ति देलो, पन तैनेई न समझू। 26 मूसा होरसां दूई इस्राएली एप्पु मांमेई लडते लाए, ते तैन समझानेरी कोशिश की, ते मूसा तैन ज़ोवं, हे जवानव तुस त एप्पु मांमेई दूला भोतथ, ते तुस किजो एककी होरि पुड जुलम केरतथ? 27 पन जै मैनु अपने पडोसी पुड जुलम केरने लोरो थियो, त तैनी मैने मूसा जो धमकेइतां ज़ोवं, तू केनि असन पुड हुकुमत केरनेबालो या हाकिम बनेवरोस? 28 जेन्चरे तीं तै मिस्रेरो रानेबालो हीज मारोरो थियो, तेन्चरे तू अज़ मी मारने चातस? 29 ए गल शुनते मूसा तैट्ठां नश्शो, ते मिद्यान मुलखे मां परदेशी भोइतां राने

लगा, ते तैड़ी तैसैरां दूई मट्टां पैदा भुआं। 30 40 साल मिधान मुलखे मां रानेरे बाद तैस सौने पहाड़े सुनसान ठारी मां एककी झल्लेरी अग्गी स्वर्गदूत लाव, ते परमेशरे स्वर्गदूतेरें जिरिये तैस सेइं गल की। 31 मूसा झल्लेरी अग्गी लेइतां कि झल फुकुने नई लोरू त तै हैरान रेइ जेव, ते जैखन ते हेरनेरे लेइ नेइ जेव त तैनी प्रभुपरी आवाज शुनी। 32 “अवं तेरे दादे-पड़दादां केरो यानी अब्राहम, इसहाक ते याकूबेरो परमेशर आई,” तैखन मूसा डेरतां कम्बने लागो, इन तगर कि तैस हेरनेरी हिम्मत न भोइ। 33 तैखन प्रभुए तैस जो जेवं, अपने पांवां केरी जुटी खोल्ल, किजोकि जैस ठेरी तू खड़ोस तै पवित्र ठारे। 34 मीं मिस्र मुलखे मां अपने लोकां केरि बुरी हालत हेरी, मीं तैन केरू कर लानू ते लेरां शुनोरिन, एल्हेरेलेइ अवं तैन छुटानेरे लेइ उन्डो ओरोई, हुनी एई अवं तीं फिरी वापस मिस्र मुलखे जो भेजताई। 35 “एहे तै मूसो आप जेसेरो इस्त्राएली लोकेई पेडलो इन्कार कियोरो थियो, कि तू केनि असन पुइ हुकुमत केरनेबालो या हाकिम बनेवरोस, ते एहे तै मूसा परमेशरे अपने स्वर्गदूतेरें जिरिये सेइं जै तैनी बलते झैल्लोए मां लाहोरो थियो, ते छुटानेबालो बनेइतां भेजो। 36 एनी मैने मिस्र मुलखे ते लाल समुन्द्रे मां 40 सालन तगर सुनसान ठेरी मां चमत्कार ते निशान हिराए। 37 एनी मूसा इस्त्राएली लोकन सेइं ज़ोरू थियू, परमेशर तुशे ढलान मरां तुशे लेइ अक मूसो जेरो नबी खड़ो केरेलो। 38 एहे मूसा, इश्शे दादा पड़दादां केरो नबी राव जैखन तैन सुनसान ठारी मां अकोट्टे भोरोए, परमेशरे एककी स्वर्गदूत सौने पहाड़े पुइ मूसे कानून दित्तो ते तैनी इश्शे दादे पड़दादन तैन कानून दित्तो, मूसे जिन्दगी देनेबाले वचन मैल्ले, तैनी तैना असन तगर पुज्जाए। 39 पन इश्शे दादे-पड़दादेई तैसेरो हुक्म न मननो चाव, बल्के इकरार कियो, ते तैना मिस्र मुलखेरे जो वापस गानू चाते थियो। 40 तैनेई मूसेरे ढलाए हारूने सेइं जेवं, तू इश्शे लेइ अक देबतो बना, जै असन अग्गी-अग्गी मिस्र मुलखे जो चले, किजोकि अस न ज्ञानम कि मूसा जैनी असां मिस्र मुलखे मरां केढतां आनोरम, तैस कुन भोवं? 41 तैस वक्ते तैनेई बछड़ेरी अक मूरत बनाई, ते तैस कां बलिदान चाढू, ते अपने हथ्यां केरे बनेवरी मूरती कां बड़ी खुशी मनाने लाए। 42 एल्हेरेलेइ परमेशरे तैन करां अपनू तुतर फिराव, ते तैना दिहाड़ेरी ते चँदनरे ते अम्बरेरे तारां केरि ईश्वरेरे रूपे मां तैन केरि आराधना केरनेरे लेइ शारे, जेन्चरे नेबी केरि किताबी मां लिखोरूप, हे इस्त्राएली लोकव, कुन तुस 40 सालन तगर सुनसान ठेरी मां जानवरतां केरू बलिदान ते होरू बलिदान मेरे लेइ केरते राए? 43 बल्के तुसेई एप्पू सेइं साथी मोलेक देबतेरी मूरती ते रिफान देबतेरे तारे छुइतां चलते थिये, एना तैना मूरतिन जैन कां तुस मथ्यो टेकते थिये, एल्हेरेलेइ अवं तुसन बाबेले करां भी दूर बसेइलो।” 44 “सुनसान ठारी मां इश्शे दादन पड़दादन कां गवाहोरो तेम्बु थियो, परमेशरे तै ठहराव ते तैनी मूसा सेइं जेवं, जेन्चरे तीं लोरूप तैसेरे मुताबिक बना। 45 बड़े सालना बाद तैए तेम्बु इश्शे दादे-पड़दादेई यहोशू सेइं साथी इडी आनो, जैस वक्ते तैनेई गैर कौमन पुइ अधिकार हासिल कियो, जैना परमेशरे इश्शे दादे-पड़दादां केरे सामने कढे, ते तै तेम्बु दाऊद राजेरे वक्ते तगर राव। 46 दाऊदे पुइ परमेशरे अनुग्रह कियो, ते तैनी मिनत की, कि अवं याकूबेरे परमेशरेरे लेइ अक घर बनेइ। 47 पन तैसेरे मट्टे सुलैमाने तैसेरेलेइ मन्दर बनाव। 48 पन परमप्रधान परमेशर हथ्यां केरे बनेवरे मन्दरन मां न राए, जेन्चरे यशायाह नेबेरे किताबी मां लिखोरूप, 49 प्रभु जोते, स्वर्ग मेरो तखते, ते ज़मीन मेरे पांवां केरि चौकीए, तुस फिरी मेरे लेइ केरू जेरू मन्दर बनाले? ते मेरे आराम केरनेरी ठार केरही जेरी भोली? 50 कुन मीं एप्पू सैरी चीजां नई बनेवरी? 51 “हे ढीठ लोकव, तुस तैसेरी शुनी ते मन्नी न चाथ, तुस पवित्र आत्मारी हमेशा खलाफत केरतथ। जेन्चरे तुशे दादे-पड़दादे केरते थिये, तुस भी तेन्चरे केरतथ। 52 नेबन मरां को तुशे दादे-पड़दादेई नई स्तेवरो? जैनेई तैस एजनेबाले मसीहरे बारे मां जेवं जै धर्मा आप, ते जैखन मसीह अव ते तुसेईं धोखे सेइं ते ट्लुवेइतां मारो। 53 तुसन स्वर्गदूतन करां मूसेरे कानून त मैल्लो, पन तैस पुइ अमल न कियू।” 54 जैखन तैनेई एना गल्लां शुनी त यहूदी लीडर फुकोई जे, ते स्तिफनुसे जो दंत लगे चापने। 55 पन तैनी पवित्र आत्माई सेइं भेरोइतां अम्बरेरे पासे तक्कू, ते तैनी परमेशरेरी महिमा ते यीशु परमेशरेरे देइने पासे खड़खड़ो लाव।

56 तैनी जेवं, “हेरा, अवं स्वर्ग खुल्लू लाताई, ते मैनेरे मट्टे परमेशरेरे देइने पासे खड़खड़ो लाताई।” 57 एन शुन्तां तैना ज़ेरे सेइं चिन्डां मारने लगे, ते अक भोइतां सेम्बेई तैस पुइ हमलो कियो। 58 ते ते दीलतां यरूशलम नगर करां बेइर नीयो ते तैस जो घोड़ेई बाने लगे ते तै मारो, तैखन तैस पुइ दोष लाने बालेई अपने चोगे खोलतां शाऊल नच्वेरे एककी मैन्हु कां रेखतां छुडे। 59 ते जैखन तैना स्तिफनुसे जो घोड़ेई बाने लगोरो थिये, ते ते स्तिफनुस इन जोइतां प्रार्थना केरने लगे, “हे प्रभु यीशु, मेरी आत्मा कबूल केर। 60 फिरी तैनी जैँधू केरे भारे बिशतां ज़ेरे सेइं जेवं, ‘हे प्रभु एन इस पापेरो दोषी न बनेइयां।’” एन ज़ोनेरां पत्ती तैनी प्राण दित्ते।

8 शाऊल तैसेरी मौती सेइं राजी थियो। तैस्से दिहाड़े यरूशलम नगरेरे कलीसियाई पुइ जुलम भोने लाव ते प्रेरितां केरे अलावा सारे लोक यहूदिया ते सामरियारे इलाकन मांजो तितर-बितर भोए। 2 किछ परमेशरेरे भक्त मैनेई स्तिफनुस नेइतां देबतां छुड्डो, ते तैसेरे मरने पुइ बड़ो शोग कियो। 3 पन शाऊल कलीसियाई सताने लोरो थियो, ते तै घर-घर गातो थियो, ते विश्वासी मड़दन ते कुआन्शन बेइरोवं घसीटतो थियो, ते कैद केरतां छुडतो थियो। 4 पन जैना विश्वासी तितर-बितर भोते थिये तैना खुशखबरी शुनाते चले। 5 ते फिलिप्पुस सामरियारे एककी नगर मां गेइतां मसीहोरे प्रचार केरने लगे। 6 जैना गल्लां तैन लोकेई फिलिप्पुसेरी करां शुनी, ते जैना निशान तै हिरातो थियो, तैन हेरी-हेरी, तैनेई अक भोइतां मन लाव। 7 जैखन फिलिप्पुसे हुक्म दित्तो, त बड़े लोकन मरां भूतां चिन्डां मैरतां निस्सी जेआं, ते बड़े लोक अधरंगी ते टोंटे बेइज्जोइ जे। 8 ते तैन केरे वजाई सेइं नगरेरे बड़े लोक खुश भोइजेइ। 9 शमौन नच्वेरे एककी मैने सामरियारे नगर मां सारे लोक अपने जैदेई सेइं हैरान कियोरे थिये, ते अपने आपे बड्डो खास मैन्हु बनातो थियो। 10 निक्के बडे सब तैसेरे पासे भोइतां ज़ोने लगे, “ए मैन्हु परमेशरेरी तै शक्ति जैस जो महान ज़ोतान।” 11 तैनी अपने जैदू सेइं बड़े चिरेरां देते सब हैरान कियोरे थिये, एल्हेरेलेइ तैना लोक तैसेरी बड़ी इज्जत केरते थिये। 12 पन जैखन फिलिप्पुसे परमेशरेरे राज़ेरे ते यीशु मसीहोरी खुशखबरी प्रचार की त लोकेई विश्वास कियो, ते मड़देइं कुआन्शेई बपतिस्मो नेव। 13 तैखन शमौने भी फिलिप्पुसेरे प्रचारे पुइ विश्वास कियो, ते बपतिस्मो नेइतां फिलिप्पुसे सेइं साथी राने लगे ते तै बड़े चमत्कार ते निशान हेरतां हैरान रेइ जेव। 14 जैखन यरूशलम नगरे मां प्रेरितेईं शुनू कि सामरियारे लोकेई परमेशरेरू बचचन कबूल कियोरूप ते तैनेई पतरस त यहून्ना तैन कां भेजे। 15 जैखन तैना तैड़ी पुजे त तैनेई तैन लोकां केरे लेइ प्रार्थना की, कि एन पुइ पवित्र आत्मा उतरे। 16 एल्हेरेलेइ कि तैन पुइ पवित्र आत्मा हेजून न थी उतरोरी, तैनेई सिर्फ प्रभु यीशु मसीहोरे नच्वे सेइं बपतिस्मो निहीयोरो थियो। 17 तैखन यहून्ना ते पतरसे तैन पुइ हथ रेखतां प्रार्थना की, ते तैन भी पवित्र आत्मा उतरी। 18 जैखन शमौने हेरू कि प्रेरितां केरे हथ रखने सेइं पवित्र आत्मा उतरते, त शमौने पेंइसे एन्तां प्रेरितन कां पैश कियो। 19 ते शमौन ज़ोने लगे, “मीं भी शक्ति देथ, कि अवं भी जैस पुइ हथ रेख्खी त तैस पुइ पवित्र आत्मा उतरे।” 20 पतरसे तैस सेइं जेवं, “तेरे पेंइसे तीं सेइं साथी गर्क भोन, किजोकि तू पेंइसन सेइं परमेशरेरू दान धिन्नु खातस। 21 एन सेवाई मां तेरो कोई भी हिस्सो नई किजोकि तेरो मन परमेशरे कां साफ नई। 22 तू अपनि इस बुरेई कर्क मनफिरा, ते प्रभु कां प्रार्थना केर, शैइद प्रभु तेरी इस बुरे खियाले माफ़ केरे। 23 मनफिरा अवं हेरताई कि तू बड़े जलनी ते पापेरी गुलेमी मां आस।” 24 तैखन शमौने जुवाब दित्तो, “मेरे लेइ प्रभु कां प्रार्थना केरा, कि जैन किछ तुसेईं ज़ोरूप, तैन मीं पुइ न एज्जे।” 25 ते पतरस ते यहून्ना गवाही देइतां ते प्रभु यीशुएरू वचन शुनेइतां यरूशलम नगरे मां वापस आए, ते एइते बारे सामरी लोकां केरे बड़े इलाँव्वन मां खुशखबरी शुनाई। 26 फिरी एरू भोवं कि परमेशरे एककी स्वर्गदूतेरें फिलिप्पुसे सेइं जेवं, “उठ ते दक्षिणेरे बतां गा, जै यरूशलम नगरेरां गाजा नगरे जो गातीए। ई रेगिस्तानी बत आए।” 27 तै उठो ते चलो जेव, ते बत्ती मां तैस अक कूश मुलखेरो खोजो मैल्लो, जै कूशी केरि रानी कन्दाकारो खज़ानची थियो, ते आराधना केरने यरूशलम नगरे मां ओरो

थियो। 28 तै अपने रथे पुड चेट्ढतां अपने मुखखे जो वापस ओरो थियो, ते यशयाहा नेबेरी किताब ज़ोरे-ज़ोरे सेइं पढ़ने लगगोरो थियो। 29 पवित्र आत्मा फिलिप्पुस सेइं ज़ोव, “नेडे गइतां रथे सेइं साथी चला।” 30 फिलिप्पुस देवइतां रथे कां नेडे पुजो, त तैस करां यशयाहा नेबेरी किताब पढ़ती शुनी, ते तैस पुच्छू, “तू जैन पढ़ने लोरोस कुन तैन समझतस?” 31 तैनी ज़ोव, “जां तगर कोई मीं न समझाए त अव केन्चरे सेमझी?” ते तैनी फिलिप्पुस कां मिनत की, कि एई रथे पुड बिश। 32 पवित्रशास्त्रे मरां जैन तै पढ़ने लगगोरो थियो, त तैन इन थियूं, “तैनेई तै भेडारो जेरो मारने जो नीयो, जेन्चरे गबडू अपनि उन्ना बरथाने बालां केरे सामने चुप राते, तेन्चरे तैनी भी अपनू आशी न खोल्लू।” 33 तै घटया समझो जेव ते तैस कोई इन्साफ न मैल्लो, ते कोई भी तैसेरे वंशरे बारे मां न जोई सके, किजोकि धरती पुड तैसेरे वंश भोने करां तैस मारतन। 34 खोजे फिलिप्पुस पुच्छू, “अवं तीं कां मिनत केरतां, मीं सेइं जो कि ए नबी कसेरे बारे मां ज़ोते, अपने या होरि केन्चरे बारे मां ज़ोते?” 35 तैखन फिलिप्पुस ज़ोनू शुरू कियूं, तैनी पवित्रशास्त्रे करां शुरू केरतां यीशुएरो खुशखबरी शुनाई। खोजे तैना गल्लां शुनी ते विश्वास कियो। 36 बत्तां च़लते-च़लते तैना एककी तालाबे कां पुजे, तैखन खोजे ज़ोव, “इडी तालाब आए, हुनी मीं बपतिस्मो नेने करां कौन रोकी सकते?” 37 फिलिप्पुस ज़ोव, “अगर तू पूरे दिले सेइं विश्वास केरतस त बपतिस्मो नेही सकतस,” तैनी जुवाब दितो, “अवं विश्वास केरताई कि यीशु ही परमेशेरू मट्टए।” 38 फिरो तैनी रथ रोकनेरे लेइ हुकम दितो, ते खोजे ते फिलिप्पुस दुइये तालाबे मां जे, ते फिलिप्पुस तैस बपतिस्मो दितो। 39 ज़ैखन तैना पैनी मरां बेडर निस्से त प्रभुएरी पवित्र आत्मा फिलिप्पुस तैट्ठां नेव, ते खोजे तै फिरी न लाव, परमेशेर तै बचाव ते तै बड़ी खुशी सेइं वापस अपने मुखखे जो जेव। 40 ते फिलिप्पुस अशदोदे मांमेई निसतो च़लतो सारे इल्लोव्वन मां खुशखबरी शुनातो कैसरिया मां पुजो।

9 शाऊल प्रभुएरे चेलन धमकाने ते मारने मां मघन थियो, ते तै महायाजके कां जेव। 2 ते तैस करां दमिश्क नगरेरे प्रार्थना घरां केरे लेइ चिट्ठी मेग्गी, कि चाए कोई मड़द भोए या कुआन्श जे यीशु पत्ती च़लने बालो भोए, तैस टलेइतां यरूशलेम नगरे मां आने। 3 ज़ैखन ते च़लतो-च़लतो दमिश्क नगरेरे नेडे पुजो, त अचानक अम्बेरां लौ आई ते तैसेरे च़ेरे पासन चमकने लग्गी। 4 ते शाऊल ज़मीनी पुड खिरको, ते तैस प्रभुएरी आवाज़ आई, “हे शाऊल, हे शाऊल तू मीं किजो स्तातस?” 5 शाऊले एन पुच्छू, “हे प्रभु, तू कौन आस?” तैनी ज़ोव, “अवं यीशु आई, ज़ैस तू सतातस। 6 हुनी उठ ते नगरे मां गा, तैडी तीं सेइं ज़ोव गालू, कि तीं कुन केरनूए।” 7 ज़ैना लोक तैस सेइं साथी थिये, तैना चुपचाप रेइजे, तैन आवाज़ त शुनीतो थी, पन लेइहोतू किछ भी न थियूं। 8 तैखन शाऊल ज़मीनी पुडां खड़े उठो, त तैनी अपनि एछछी घैडी त तैस किछ भी न लगू लेइहोने, ते तै तैसेरे सैथेई हथेरां टलेइतां दमिश्क नगरे मां पुजाव। 9 ते तैनी टलाई दिहाइन तगर न लेई बटु, ते न तैनी किछ खाव ते पिव। 10 दमिश्क नगरे मां यीशुएरो अक चेलो रातो थियो, प्रभु यीशुए तैस दर्शन देइतां ज़ोव, “हे हनन्याहा!” तैनी ज़ोव, “हॉ प्रभु जो।” 11 तैखन प्रभुए तैस जो ज़ोव, “उस गेली मां गा ज़ैस जो ‘सिडी’ ज़ोतन, ते यहूदारे घरे गा तैडी शाऊल नव्वेरो अक मैनुए, जै तरसुस नगरेरो रानेबालोए, तू तैसेरे बारे मां पुछां, किजोकि हेरा ते प्रार्थना केरने लोरोए। 12 तैनी हनन्याह नव्वेरो अक मैनुए अन्तर एइतो लाव, ते एण्णू पुड थ थ रखतो लाहोरोए कि तै अपनि एछछेई सेइं फिरी लाए।” 13 हनन्याहे जुवाब दितो, “हे प्रभु, मीं एस मैनेरे बारे मां लोकन करां बेडि गल्लां केरती शुनोरिन, ते एन भी कि एनी तेरे लोकन सेइं यरूशलेम नगरे मां कुन-कुन बुरू कियोरूए। 14 एस प्रधान याजकन करां अधिकार मैलोरोए, कि इडी भी ज़ैना लोक तीं पुड विश्वास केरतन, तैन गिरफ्तार केरतां यरूशलेम नगरे जो ने।” 15 पन प्रभुए तैस सेइं ज़ोव, “तू गा किजोकि मीं ते मैनु चुनोरोए, कि ते गैर कौमन, राजन, ते इझाएलेरे लोकन मेरे बारे मां प्रचार केरे, ते ते मीं चुनोरोए कि ते मेरी सेवा केरे। 16 ते अवं तैस ज़ोइलो, लोकन मेरे बारे मां ज़ोनेरे वजाई तैस केके-केके

दु-खू झूलनो पेनोए।” 17 तैखन हनन्याह तैस घरे मां जेव, ज़ैडी शाऊल थियो, ते तैस पुड हथे रखतां ज़ोव, “हे ढला शाऊल, प्रभु, मतलब यीशु, ज़ैस बत्तां तू ओरोस ते तीं लेइहोरो थियो, तैनी अवं भेजोरोई, कि तू फिरी लास ते पवित्र आत्माई सेइं भरोस।” 18 ते तैखन तैसेरे एछछन मरां जेरां शेकडां झडां ते तै लहने लगो, ते खड़े उठतां बपतिस्मो नीयो। 19 ते किछ रोटी खेइतां तैस हिम्मत आई, ते किछ दिहाड़े तै चेलन सेइं साथी दमिश्क नगरे मां राव। 20 तैसेरां बाद अकदम तै दमिश्क नगरेरे प्रार्थना घरन मां प्रचार केरने लगो, कि यीशु परमेशेरू मट्टए। 21 सब शुन्ने बाले हेरान भोइतां ज़ोने लगो, “कुन ई तैए मैनु नई, जै यरूशलेम नगरे मां ज़ैना यीशु मसीह पुड विश्वास केरते थिये मारतो थियो? ते इडी भी एल्हेरेलेइ ओरो थियो, कि एन लोकन टलेइतां प्रधान याजकां केरे हवाले केरे?” 22 पन एसेरां बाद शाऊल होरो भी शेक्ति सेइं प्रचार केरतो राव, ते एस गल्लरू सबूत देइ-देइ कि यीशु ही मसीहे, दमिश्क नगरेरे रानेबालां यहूदी केरू आशी बंद केरतो राव। 23 ज़ैखन शाऊले दमिश्के मां बड़ो वक्त बीतो त यहूदेई मिलतां तैस मारनेरो मुशोरो कियो। 24 पन शाऊले एस गल्लरो पतो लगो, तैना त तैस मारनेरे लेइ रात दिहेई दारन पुड रहते थिये। 25 पन राती तैसेरे चेलेई तै टोकरे मां रखखो, ते नगरेरे दुवारी पुडां रस्से सेइं टोकरी मां ओसेलतां मिन पुजाव। 26 ज़ैखन शाऊल यरूशलेम नगरे मां पुजो त तैनी चेलन सेइं बुलनोरो इंतज़ाम कियो, पन सब तैस करां डरते थी कि तै भी चेलोए। 27 पन बरनबासे शाऊल एण्णू सेइं साथी प्रेरितन कां आनो ते तैन ज़ोव, कि केन्चरे दमिश्क नगरेरे बत्तां च़लते-च़लते एस प्रभु यीशु लेइहोरोए, ते प्रभुए एस सेइं गल्लां कियोरिन, ते एनी केत्रे दिलेरी सेइं दमिश्क नगरे मां यीशुएरे नव्वेरो प्रचार कियोरोए। 28 प्रेरितेई बरनबासेरी गल्लां केरो विश्वास कियो, ते शाऊल तैन सेइं साथी राव, ते यरूशलेम नगरे मां गातो राव। 29 ते यूनानी भाषा केरनेबाले यहूदन सेइं भी गलबात केरतो थियो, दिलेर भोइतां प्रभुएरो प्रचार केरतो थियो, पन तैना तैस मारनेरी कौशिश मां रहते थी। 30 एल्हेरेलेइ विश्वासी ढूलाएई तै कैसरिया नगरे मांजो नीयो, ते तैट्ठां तरसुसे नगरे जो भेजो। 31 त सारे यहूदिया इलाके मां ते गलील इलाके ते सामरिया इलाकेरी कलीसियान मां चैन भोव, ते तरक्की भोती जेई, ते तै प्रभुएरे डरे मां ते पवित्र आत्माे शैन्ति मां च़लती ते बड़े लोकेई यीशु मसीह पुड विश्वास कियो। 32 फिरी एरू भोवं कि पतरस सारे इलाके मां हंठतो फिरो, ते तैन पवित्र लोकन साथी भी पुजो, जैना लुद्दा नगरे मां रहते थियो। 33 त तैस तैडी ऐनियान नव्वेरो अक मैनुए मैल्लो, तैस अधरंग थियो, ते अठ सालां केरो दंतो खट्टी पुड राहोरो थियो। 34 पतरसे तैस जो ज़ोव, “हे ऐनियान! यीशु मसीह तीं बड़ाते, उठ अपनू बछान खडू केर,” तैखने ते बेइजोइतां खडो भोव। 35 तैखन लुद्दा नगरेरे ते शारोनेरे राने बालेई एन हेरतां प्रभु यीशु पुड विश्वास कियो। 36 याफा नगरे मां अक कुआन्श थी, जेसारा नवं तबीता थियूं (यूनानी भाषाई तैसेरू दोरकास थियूं, जेसेरो मतलब हिरीनी) ते विश्वासी थी, ते रोडां-रोडां कम्मां केरती ते गरीबां केरि मद्दत केरती थी। 37 तैने दिहाइन मां ज़ेइस पतरस लुद्दा मां थियो, तै बिमार भोइतां मेरि जेई, ते तैसारी लाश नेइतां दोपरेरे कमरे मां रखोरि थी। 38 लुद्दा याफारे नेडे थियूं, ते ज़ैखन चेलेई शुनू कि पतरस लुद्दा मां आए, त दूई मैनु भेजतां मिनत की, “कि असन कां एजने मां ठढ न ला।” 39 तैखन पतरस तैन सेइं साथी च़लो जेव, ते ज़ैखन तैडी पुजो त तै बा तैस कमरे मां नीयो, सैरी विधवां कुआन्शां लेरां देती थी, ते तैस इलखमेइं खेडि थी, ते तैना लिंगडां ज़ैना दोरकास सियोरां थियां हिराने लेगि। 40 पतरसे तैना सब बेइरोवं कठे, ते एण्णू ज़ैथू केरे भारे प्रार्थना केरने लगो, फिरी तैनी लाशारे पासे तुत्तर फरेइतां ज़ोव, “हे तबीता, उठ।” तैखन तैसां अपनि एछछी खोल्लो, ते पतरसे तेकतां खडी भोइ। 41 पतरसे हथेरां टलेइतां खडी की, ते विश्वासी ते विधवां कुआन्शां कुजेइतां जींती ते होशी मां तैन केरे सुपुर्द की। 42 एस गल्लरी खबर सारे याफा नगरे मां फैली जेई, ते बड़े लोकेई प्रभु यीशु पुड विश्वास कियो। 43 पतरस किछ च़िरे तगर याफा नगरे मां शमौन नव्वेरो एककी मैनेरे कां राव, जै चमड़ेरू कम केरतो थियो।

10 कैसरिया नगरे मां अक मैनु थियो, तैसेरु नवं कुरनेलियुस थियुं, ते तै अक इतालियानी फौवजरो सूबेदार थियो। 2 कुरनेलियुस त तैसेरे घरे सारे लोक परमेशरे करां डरने बाले थियो, कुरनेलियुस यहूदी लोकन बडू दान देतो थियो, ते परमेशरे कां लगातार प्रार्थना केरतो रातो थियो। 3 एक्की दिहाड़े कुरनेलियुस दीसां अक रोडे चारे दर्शन हेरु, परमेशरेरो अक स्वर्गदूत तैस कां अव, ते जोने लागो, “हे कुरनेलियुस।” 4 तैनी तै रोडे-चारे लाव ते डेरतां जोवं, “हे मालिक कुने?” तैनी तैस सेइं जोवं, “तेरी प्रार्थना ते तेरु दान यादगैरियर लेइ परमेशरे कां पुजेरु आए। 5 हुनी तू मैनु याफा नगरे मां भेजतां तैस मैनु जेसेरु नवं शमीन पतरसे अपने घरे कुजा। 6 तै शमीनेरे घरे बिशोरो थियो, जै चमडेरु कम करेनेबालो थियो, जेसेरु घर समुद्रे बन्ने।” 7 जैखन स्वर्गदूत एना गल्लां केरतां चलो जेव, त कुरनेलियुस अपने दूई सेवकन ते अपने सिपेहिन मरां अक भक्त सिपाही कुजाव। 8 ते तैन सारो बिस्तार जोइतां याफा नगरे जो भेजे, कि पतरसे कुजान। 9 होरसां जैखन तैना भेजोरे लोक चलते-चलते नगर नेडे पुजे। ते दुपारहरां केरो वक्त थियो, तैस वक्त पतरस बा छती पुड प्रार्थना करेने लावरो थियो। 10 तैस दल्लुख लगगी ते तै किछ खानु चातो थियो, पन जैखन मैनु रोटी बनाने लगे त तैस बेहोशी जेरि भोजेइ। 11 ते तैनी हेरु कि अम्बर खुल्लूए, ते अक चादर लाईं जै चेत्रे कूना टेंगोरी अम्बरेरे पासेरां उन्डी जमीनेरे पासे ओरी। 12 जैसां मां जमीनेरे सारे जानवर ते पेटेरे भारे चलने बाले जन्तू ते अम्बरेरां चुडोलू तैस चादरी मां थियां। 13 तैखन अक आवाज आई, “हे पतरस, उठ ते मार ते खा।” 14 पन पतरसे जुवाब दित्तो, “नईं प्रभु, कथे नईं, किजोकि मीं अज तगर कोई अपवित्र ते भिट्टी चीज नईं खोरी।” 15 फिरी दुइयोवं बार तैनी आवाज शुनी, “जैन किछ परमेशरे शुद्ध कियोरुए, तू तैस जो भिटू न जो।” 16 टलेइ बार ए आवाज आई, ते फिरी तै चादर अम्बरेरे पासे चली जेईं। 17 पतरस दिले मां सोचने लगगोरो थियो, कि एस दर्शनेरो कुन मतलब भोज सकते, जैन अज मीं लाव, एत्रे मां कुरनेलियुसेरे भेजोरे मैनु शमीनेरु घर तोपते-तोपते दारे मां पुजे। 18 तैनेईं हक देइतां पुच्छ, “शमीन जैस जो पतरस जोतन इडी तुशे कां आए?” 19 हेजु पतरस दर्शनेरे बारे मां सोचने लगगोरो थियो, त पवित्र आत्मा तैस जो जोवं, “शमीन, हेर टलेईं मैनु तीं पच्छने लागेरेन। 20 खडो उठ ते बुन गा, तैन सेइं साथी गाने करां न डेरां, किजोकि तैना मीं भेजोरेन।” 21 पतरस बुन अव, ते तैन मैनु सेइं जोने लागे, “जैस मैनु तुस तोपने लगगेथ ते अव आई, ते तुस किजो ओरैथ?” 22 तैनेईं जुवाब दित्तो, “असां कुरनेलियुस सूबेदार जै धर्मी ते परमेशरे करां डरने बालोए, ते सारे यहूदी तैसरी तारीफ़ केरतन, एक्के पवित्र स्वर्गदूत तैस जो जोरुए, तू शमीन पतरसे अपने घरे कुजेइतां तैसरी गल्लां शुन।” 23 तैखन पतरसे तैना अन्तर कुजाए, ते तैन केरि खातरदारी की। होरसां पतरस तैन सेइं साथी चलो जेव, ते याफा नगरेरे काईं दलान मरां किछ तैस सेइं साथी चले जे। 24 एग्री दिहाड़े तैना कैसरिया नगरे मां पुजे, कुरनेलियुस अपने रिशतेदारन ते अपने दोस्तन अकोट्टे केरतां तैन बलगने लाव। 25 पतरस जैखन कुरनेलियुसेरे घरे पुजे, त कुरनेलियुसे तैसरी बडी आदर खातरी सेइं इज्जत की, ते क्रोडी पव्वन कां रेखतां तैस कां मथ्यो टेको। 26 पन पतरसे ते खडो कियो ते जोवं, “खडो भो किजोकि अवं भी त अक मैनु आई।” 27 फिरी ते कुरनेलियुसे सेइं गल्लां केरतो अन्तर जेव, तैडी बडे लोक अकोट्टे बिशोरे लेइतां, 28 तैस सेइं जोवं, “तुसन पत्तोए इशे यहूदी केरे लेइ गैर कौमी सेइं मिलनु जुलनु कानुनेरे खलाफे, पन परमेशरे मीं सेइं जोरुए कि अवं केन्ची मैनु जो अपवित्र या भिट्टो जोई। 29 एल्हेरेलेइ तुसेईं अवं कुजाव त अवं चुपचारे चलो आए। हुनी अवं तुसन पुछताईं कि तुसेईं अवं किजो कुजेवरोई?” 30 कुरनेलियुसे जोवं, “अवं चेत्रे दिहाइना पेइले अपने घरे मां इस मौके कोई टलेइ बजेईं प्रार्थना लोरो थियो केरने, त अचानक अक मैनु चमकतां लिमांडां लगगोरो मेरे तुत्तरे अगर खडो भोव। 31 ते जोने लागो, हे कुरनेलियुस, तेरी प्रार्थना परमेशरे शुनोरीए ते तेरु दान भी कबूल कियोरुए। 32 एल्हेरेलेइ कोन्ची याफा नगरे मां भेजतां शमीन जैस जो पतरस जोतन, कुजा। ते शमीनेरे कांए जै चमडेरु कम करेनेबालो, ते समुद्रे बन्ने रहते। (जैखन तै एज्जेलो त तै परमेशरे बारे

मां जोलो) 33 तैखन मीं मैनु भेजे, ते तीं बडू रोडू कियुं कि तू अव। हुनी अस परमेशरेरे सामनेम, ताके जैन किछ परमेशरे ज़ोरु तैन शुनम।” 34 तैखन पतरस जोने लागो, हुनी मीं याकीन भोव, कि परमेशर केन्चोरे तरफदार नईं। 35 बल्के हर कौमी मरां जै परमेशरे करां डरते ते रोडां कम्मां केरते परमेशर तैस कबूल केरते। 36 इस्राएली लोकां केरे लेइ परमेशरेरे भेजोरे सन्देशेरे बारे मां तुसन पतो आए। परमेशरे यीशु मसीहेरे जिरिये सेइं जै सेन्भी केरो प्रभुए शैनतरी खुशखबरी शुनाई। 37 यहून्नेरे बपतिस्मेरो प्रचार केरने करां लेइतां गलील इलाके करां शुरू भोजतां सारे यहूदिया इलाके मां कुन-कुन भोवं, तुस भी जानतथा। 38 केन्चरे प्रभु यीशु नासरी पवित्र आत्माई सेइं ते शक्ति सेइं अभिषेक कियुं, ते तै लोकां केरु भलू केरतो राव, तैनी सब जैना शैतानेरे जाले मां फासोरे थिये, तैना छुटाए, किजोकि परमेशर तैस सेइं साथी थियो। 39 तैनी जैन किछ यहूदी केरे मुलखे मां ते यरुशलम नगरे मां कमाव, असां तैसेरे गवाह आम, ते तैए यहूदी लीडेईं यरुशलमे मां कूसे पुड टेंगेइतां माराव। 40 परमेशरे तैए टलेइयोवं दिहाड़े फिरी ज़ीतो केरतां हिराव। 41 तै सैरी लोकेई नईं बल्के गवाहेईं लाव, जैना परमेशरे पेइले चुनतां रखोरे थिये, यानी असां जैनेईं तैसेरे मुड्डन मरां जीते भोनेरां बाद तैस सेइं साथी रोटी खोरीए। 42 ते तैनी असन हुक्म दित्तो कि लोकन मां प्रचार केरम ते गवाही देम, कि ईं तैए जै परमेशरे जीते ते फटरां केरो हाकिम भोए। 43 सारे नबी तैसेरे बारे मां गवाही देतन, कि जै कोई तैस पुड विश्वास केरेलो त तैस तैसेरे नंवे सेइं पापां केरि माफ़ी मैले। 44 पतरस हेजु एन ज़ोतो थियो, त पवित्र आत्मा तैन पुड उतरी, जैना बचन शुन्ने लोरे थिये। 45 ते जेत्रे यहूदी विश्वासी पतरसे सेइं साथी ओरे थी, तैना सब हैरान भोए कि गैर कौमन पुड भी पवित्र आत्मा उतररोरीए। 46 किजोकि तैनेईं तैना किसमे-किसमेरी भाषां केरते, ते परमेशरेरी तारीफ़ केरते शुनोरी थिये, तैखन पतरसे जोवं। 47 “जेन्चरे परमेशरे असन पवित्र आत्मा दित्तोरीए तेन्चरे तैन भी दित्तोरीए, कुन कोई एन मैनु पनेरो बपतिस्मो नेने करां रोकी सकते?” 48 एल्हेरेलेइ पतरसे हुक्म दित्तो, कि एन लोकन यीशु मसीहेरे नंवे सेइं बपतिस्मो देथ, तैखन तैनेईं पतरसे कां मिनत की, कि किछ दिहाड़े असन कां हेजु बिश।

11 यहूदिया मां रानेबाले प्रेरितेईं ते विश्वासी दूलाएई ए खबर शुनी, कि गैर यहूदेईं भी परमेशरेरु बचन कबूल कियुं। 2 ते जैखन पतरस वापस यरुशलम नगरे मां अव, त यहूदी विश्वासी लोक तैस सेइं बेंस केरने लागे। 3 “तू गैर कौमां केरे घरे जेव, ते तैन सेइं साथी बिश्तां रोटी भी खाइ।” 4 पतरसे तैन सेइं सारो बिस्तार पत्रां देतो ते आखरी तगर एन्चरे शुनाव, कि कुरनिनुसेरे घरे कुन भोवं। 5 “अवं याफा नगर मां प्रार्थना केरने मां मघन थियो, त मीं किछ बेहोशी जेरि भोजेइ, ते मीं अक दर्शन लाव, ते अक चादर जेरि चेत्रे कूना टेंगोइतां अम्बरेरे पासेरां उन्डी एइतां मीं तगर पुजी। 6 अवं तैस मां तकने लागो त कुन हेरताईं कि, तैस मां जमीनेरे सारे चेत्रे जंघेइ चलने बाले जानवर ते पेटेरे भारे चलने बाले जीप ते अम्बरे मां उडरने बालां चुडोलू थियां। 7 तैखन मींजै अक आवाज आई, जै जोने लागी, ‘हे पतरस खडो उठ ते इन मार ते खा।’ 8 मीं जुवाब दित्तो, प्रभु नईं, किजोकि मीं अज तगर कोई भी अपवित्र या भिट्टी चीज नईं खोरी। 9 एउसेरे जुवाबे मां अम्बरेरां होरि आवाज आई, ‘जैन किछ परमेशरे पवित्र बनेवरीए, तू तैस जो भिटू न जो।’ 10 ए आवाज टलेइ बार आई, ते फिरी तै चादर अम्बरेरे पासे खिचोइतां चली जेईं। 11 ठीक तैस्से मौके टलेईं मैनु जैना कैसरिया नगरे मरां कुरनुलियुसे मीं कां भेजोरे थिये, तैस घरे कां सामने खडे भोए, जैडी अवं थियो। 12 तैखन पवित्र आत्मा मीं सेइं जोवं, बेधड़क चारे एन सेइं साथी गा, एना 6 दूला भी मीं सेइं साथी आए, ते असां तैस मैनेरे घरे जे। 13 तैनी असन सेइं जोवं, कि केन्चरे सेइं तैनी अक स्वर्गदूत घरे लाव ते जोने लागो, याफा मां केन्ची मैनु भेजतां शमीन जैस जो पतरस जोतन, तैस अपने घरे कुजा। 14 तै एइतां तीं अक एरो बिस्तार देलो, जेसेरे जोने सेइं तेरी खानदानेरे सारे मैनु परमेशर मुक्ति देलो। 15 जैखन मीं तैडी गेइतां तैन सेइं गल्लां शुरू की, त पवित्र आत्मा तैन पुड उतरी, जेन्चरे पेइले असन पुड उतररोरी थी। 16

तैखन मीं प्रभुएरू तैन वचन याद आऊं, जैन तैने जोवरो थियूं, कि यूहन्ना त पैनी सेइं बपतिस्मो दित्तो, पन तुसन पवित्र आत्माई सेइं बपतिस्मो मैलेलो। 17 बस्सा अगर परमेशरे तैन भी तेए तोफो दित्तो, जै असन प्रभु यीशु मसीह पुड़ विश्वास केरने सेइं मैल्लो, त अवं कौन भोताई कि परमेशरे रोकौ?" 18 जैखन यहूदी विश्वासी लोकेई एन शुनू त चुप रेइजे, "ते परमेशरेरी तारीफ़ केरने लगे, तां त सच्चे कि परमेशरे गैर कौमन भी पापन करां मन फिरेइतां यीशु पुड़ विश्वास केरतां हमेशारी जिन्दगी हासिल केरनेरो तोफो दित्तोरोए।" 19 त तैना लोक जैना तैस दुखेरे मारे जै स्तिफनुसेरे मौतरे वक्ते शुरू भोरो थियो, तितर-बितर भोइजेइ, ते च़लते-च़लते फीनीके इलाके ते साइप्रस ते अन्ताकिया नगरे तगर पुजे, पन तैना यहूदी केरे अलावा होरन परमेशरेरू वचन न थिये शुनाते। 20 पन तैन मरां किछ साइप्रसेरे रानेबाले ते किछ कुरेनेरे रानेबाले थिये, जैना अन्ताकिया नगरे मां एइतां यूनानी लोकन भी प्रभु यीशु मसीहेरी खुशखबरी शुनाने लगे। 21 ते प्रभुएरी शक्ति तैन पुड़ थी, ते बड़े गैर कौमरे लोकेई तैन केरे सनदेपु शे पुड़ विश्वास कियो, ते प्रभु यीशु पुड़ भरोसो केरनो शुरू कियो। 22 तैखन तैन केरि खबर यरूशलेम नगरेरे कलीसियारे लोकन तगर पुजी, ते तैनेई बरनबास अन्ताकिया नगरे जो भेजोरे। 23 ते तैई पुजतां, ते परमेशरेरो अनुग्रह हेरतां बड़ो खुशी भोव, ते तैन ए गल जोई कि अपने तने मने सेइं प्रभु सेइं लिपटारे रान। 24 बरनबास अक रोडो मैन्हु थियो, तै पवित्र आत्माई ते विश्वासे सेइं भरपूर थियो, ते बड़े लोक प्रभु मां आए। 25 तैखन बरनबास अन्ताकिया नगर शैरतां शाऊले तोपने तरसुस नगरे जो च़लो जेव। 26 तैनी शाऊल तोप्तां अन्ताकिया नगरे मां आनो, तैडी तैना एककी साले तगर दुइये जन्हे कलीसियाई मां लोकन प्रभु यीशुएरी शिक्षा देते राए, ते लोक चलन जो सेबन करां पेइले अन्ताकिया नगरे मां मसीही ज़ोने लगे। 27 तैने दिहाइन मां किछ विश्वासी जैना नबी थिये, यरूशलेम नगरेरां अन्ताकिया नगरे मां आए। 28 तैन मरां अक नबी जेसेरू नवं अगबुस थियूं खड़े भोइतां ते पवित्र आत्मारे ज़ोने सेइं एन ज़ोने लगे, कि सैरी दुनियाई मां अक बड़ो काल पेनोए। ए काल क्लीदियुस हाकिमेरे वक्ते पेव। 29 तैल्हेरेलेइ चेलेई फैसलो कियो कि, असन मरां हर कोई अपनि-अपनि हैसयतरे मुताबिक किछ दान देथ, ताके यहूदिया इलाके मां रानेबाले मसीही ढ़लां केरि मद्दत भोइसखे। 30 बस्सा तैनेई किछ रकम अकोट्टी की ते बरनबास ते शाऊलेरे हथ्ये यरूशलेम नगरेरे बुजुर्गन कांजो भेज्जि।

12 तैस्से वक्ते मां हेरोदेस राज़ो कलीसियारे किछ मैन्न दुःख देनेरे लेइ तैना ट्लाने शुरू कीए। 2 ते यूहन्ना प्रेरितेरो ढ़ला याकूब तलवारी सेइं मराव। 3 जैखन तैनी हेरू कि यहूदन ए गल बड़ी खुशी अई, त तैन दिहाइन मां पतरस भी ट्लाव। तैना दिहैडी अखमीरी रोट्टरी तिहारेरी थी। 4 ते तैस ट्लानेरां बाद हेरोदेस तै कैदखाने मां छुट्टो, ते तैसेरी निगरेनारे लेइ च़ेरे टोली बनाई, हर टोली च़ेन्न-च़ेन्न सिपाही केरि थी, हेरोदेसेरो खियाल थियो कि फ़सल तिहारेरे बाद तै कैदे मरां केइतां लोकां केरे सामने पैश केरे। 5 कैदखाने मां पतरस बड़े दिहाइन तगर परहे मां थियो, पन सारी कलीसिया तैसेरेलेइ परमेशरे कां प्रार्थना केरने लगोरी थी। 6 हेरोदेसे, पतरस लोकां केरे सामने आने करां पेइले अक रात जैखन पतरस ढूई परहेदारां केरे मज़ाटे बंधोरो झूलोरो थियो, ते सिपाही कैदखानेरे डेवडी पुड़ पैरहो देंते थियो। 7 त अचानक परमेशरेरो स्वर्गदूत कैदखाने मां अवं, ते सारो कैदखानो टलकड़ो भोइ जेव, स्वर्गदूते पतरसे खिती देइतां बींझाव ते ज़ोवं, "उठ, ते लूश केर।" ते शंगलां पतरसेरे हथ्यन सैहीयेरां खुल्ली जेई। 8 स्वर्गदूते पतरसे सेइं ज़ोवं, "अपनू मज़ बन्ध ते बूट ला।" पतरसे तैने कियूं, ते फिरी ज़ोवं, "अपनो चोगो ला ते मीं पत्पती एई।" 9 पतरस स्वर्गदूत पत्पती कैदखाने मरां बेइर अवं, पन तैस ए पतो न थियो, कि स्वर्गदूते जैन केरने लगोरोए एन सच्चे या कोई दर्शन हेरने लगोरोइ। 10 ते दुइयोवं परहेदारे करां बेइर निस्तां अवं, ते लोहरे फाटके कां पुज्जो, जै नगरेरे पासे खुलतो थियो, तै फाटक तैन केरे लेइ अपने आप खुल्लो, ते तैना तैइं निस्तां दूर पुजे, स्वर्गदूत पतरसे तैडी

पुजेइतां गैइब भोइ जेव। 11 तैखन पतरस होशी मां अवं, ते ज़ोने लगे, "हुनी मीं पूरू याकीन भोवं, कि परमेशरे अपनो स्वर्गदूत भेजतां अवं हेरोदेसेरे हथ्ये मरां छुटाव, ते यहूदी लीडरेई जैन सोचेरू थियूं, तैन बन्ने न दित्तू।" 12 जैखन तै एस बारे मां सोचने लगगोरो थियो, त मरियमेरे घरे पुज्जो, जै यूहन्ना जैस जो मरकुस ज़ोते थिये तैसेरी अम्मा थी। तैडी बड़े विश्वासी लोक अकोट्टे भोइतां प्रार्थना केरने लगगोरो थियो। 13 पतरसे बेइरू दार गुडकावं त अक नौकरानी जेसारू नवं रुदे थियूं, तै दार खोलने आई। 14 तैसां पतरसेरी गल शुनी ते तैसां गल पिशानी ते बगेर दार खोलनेरां दौवइती खुशी भोइतां आई, ते ज़ोने लगी, पतरस बेइर दारे मां ओरोए। 15 तैना मैन्हु ज़ोने लगे, "तू कुन पागल भोरिस।" पन जैखन तैसां रोडेच़ारे ज़ोवं, कि तै पतरसे, त तैना ज़ोने लगे "पतरस त नई पन पतरसेरो स्वर्गदूत भोलो।" 16 ते पतरस बेइर दार गुडकातो राव, ते ज़ैखन तैनेई दार खोल्लू त पतरस लेइतां हैरान रेइजे। 17 पतरसे तैन जो हथ्ये सेइं इशारो कियो, कि चुप राथ, ते फिरी अन्तर एइतां सारो बिस्तार शुनाव, कि अवं केन्चरे परमेशरे कैदखाने मरां बेइर कढो, ते फिरी ज़ोवं, "याकूबे त तैसेरे होरि मसीह ढ़लान भी पतो देइयथा।" ते एप्पू केन्ची होरि जगाई जो च़लो जेव। 18 जैखन झेइं भोइ त सिपेहिन एप्पू मांमेइं खलबली मेन्नि जेई, कि पतरस कोरां जेव। 19 जैखन हेरोदेसे तैसे तोपनेरो हुक्म दित्तो त तैनी सिपेही केरू बियान थिन्नां पत्ती तैन जो कतलेरो हुक्म दित्तो, ते पतरस यहूदिया इलाके मरां कैसरिया नगरे जो च़लो जेव, ते किछ च़िरे तगर तैडी राने लाव। 20 हेरोदेस सूर ते सैदारे नगरेरे लोकन पुड़ बड़ो नाराज़ थियो, तैखन तैना लोक मिलतां तैस कां आए, ते बलास्तुसे जै राज़ेरो खास मैन्हु थियो, मनेइतां मेल केरनो चाव, किजोकि राज़ो एरे मुलखेरां तैन केरे मुलखे खर्चो मैलतो थियो। 21 तैखन तैनी अक दिहाडी ठुवहलाई ते हेरोदेस राज़ो अपना राज़ेरां लिगाइं लेइतां आदालतरे तखते पुड़ बिश्तां लोकन सेइं ज़ोने लगे। 22 तैनेई जैखन शुनू त ज़ोने लगे, "ए मैन्हु केरि आवाज़ नई बल्के परमेशरेरी आवाज़।" 23 किजोकि हेरोदेसे परमेशरेरी तारीफ़ न की, तैल्हेरेलेइ तैस परमेशरे स्वर्गदूतेरी एरी मार पेई कि तैसेरी सैरी जानी कोडे लगे, ते तै मेरि जेव। 24 पन परमेशरेरू बच्चन अग्रोवं बद्धू जेवं, ते विश्वासी लोकां केरि गिनती बद्धती जेई। 25 जैखन बरनबास ते शाऊल अपनि सेवा जै तैन केरे सुपुर्द कियोरी थी, तैनेई पूरी की त अन्ताकिया नगरेरां यरूशलेम नगरे जो वापस आए, ते यूहन्ना जैस जो मरकुस ज़ोते थिये, एप्पू सेइं साथी आनो।

13 अन्ताकिया नगरेरे कलीसियाई मां काई नबी ते गुरू थिये, मतलब बरनबास, शामीन जैस जो नीगर भी ज़ोतन, लूकियुस कुरेनी, ते मनाहेम जै मुलखेरे च़ेवरोवं हिसे पुड़ हाकिम थियो जै हेरोदेसेरो दुइ ढ़ला थियो, ते शाऊल थियो। 2 जैखन तैना बरत रेखतां प्रभुएरी आराधना केरने लगगोरो थिये, त पवित्र आत्मा तैन सेइं ज़ोवं, "जैस सेवारे लेइ बरनबास ते शाऊल मीं कुजोरेन, तैसेरेलेइ तैन अलग केरा।" 3 तैखन तैनेई बरत रेखतां प्रार्थना की, ते तैन पुड़ हथ रेखतां तैना परमेशरेरे कम्मेरे लेइ भेजे। 4 शाऊल ते बरनबास पवित्र आत्मारी तरफ़ां भेजोरे सिलूकिया नगरे जो जे, ते तैइं तैना जिहाजे पुड़ च़ेइतां साइप्रस टैपू जो च़ले। 5 जैखन तैना सलमीसे मां पुजे, त तैडी तैना यहूदी केरे प्रार्थना घरे मां परमेशरेरू वचन शुनाव, ते यूहन्ना मरकुस भी तैन केरि मद्दत केरनेरे लेइ तैडी थियो। 6 जैखन तैनेई सारे जज़ीरे ते नगरन-नगरन मां हंतु फिर्, त तैना पाफुसे नगरे मां पुजे, त तैन केरि मुलाकात एककी डैइंनोडे यहूदी ते झूठे नेबी सेइं भोइ, जेसेरू नवं बार-यीशु थियूं। 7 ते टैट्टेरे हाकिम सिरिगियुस, पौलुस सेइं साथी थियो, जै अक अक्लमन्द मैन्हु थियो, ते तैनी बरनबास ते शाऊल कुजाए ते परमेशरेरू वचन शुनू चाऊ। 8 पन एलीमास डैइंनोडे (किजोकि तैसेरे नंवेरो मतलब डैइंनोडे ए) तैन केरि खलाफत केरने लगे, तैन हाकिम यीशु पुड़ विश्वास केरने करां रोकनो चाव। 9 तैखन शाऊल जेसेरू नवं पौलुस भी आए, पवित्र आत्माई सेइं भेरोइतां ध्यान सेइं एलीमास डैइंनोडेरे पासे तकने लगे, ते तैस सेइं ज़ोवं, 10 "हे शैतानेरे कोआ, तू हर किसमेरी पाखंडे सेइं ते च़लैकी

सेईं भरतस, ते नेकारो दुश्मन, कुन तू परमेशेरी बत बगाडने करां बाज़ न एजस? 11 हुनी प्रभु तेरे खलाफे, तू कानो भोइगानोस, ते किछ ङिरे तगर तू दिहाडो न लाएलो।" तैखने तैस आधरू लेइयोने लगू, ते ते इरां-उरां तोपने लागो, ताके कोई तैस हथेरां टलेइतां चलाए। 12 तैखन हाकिमे एन हेरतां, ते प्रभुएरी शिक्षा श्रुतां हैरान राव, ते प्रभु यीशु पुड़ विश्वास कमाव। 13 पौलुस ते तैसेरो साथी पाफुस नगरेरां जिहाजे मां पंफूलिया इलाकेरे पिरगा नगरे मां आए, ते यूहन्ना तैन शैरतां वापस यरूशलेम नगरे जो चलो जेव। 14 ते तैना पिरगा नगरेरां निस्तां पिसिदिया इलाकेरे अन्ताकिया नगरे मां पुजे जै गलतिया इलाके मां आए। ते आरामेरे दिहाडे प्रार्थना घरे मां गेइतां बिशेशी जे। 15 मूसेरो कानून ते नेबी केरि किताबी मां पढनेरे बाद टेट्टेरे प्रार्थना घरेरे प्रधाने तैन ज़ोवं, "आगर मैन्हु केरि भलेइयरे लेइ तुस भी किछ ज़ोनू चातथ त ज़ोथ।" 16 तैखन पौलुस खडो उठो ते हथ्ये सेईं इशारो केरो कि चुप रान ते ज़ोने लगे, "हे इस्राएली लोकव ते परमेशेरो डर मन्नेबाले गैर कौमां केरे लोकव मेरी गल शुना। 17 इन इस्राएली लोकां केरे परमेशेरे इशेशे दादे-पडदादे चुने, ज़ैखन तैना मिस्र मुलखे मां परदेशी भोइतां रहते थिये, तैन परमेशेरे तरक्की दिती, ते बडे शक्ति सेईं तैटां कढे। 18 ते तै सुनसान ठैरी मां लगभग 40 सालन तगर तैन केरे झिल्लतो राव, तैन बार-बार हुकम टलोइते राए। 19 कानून मुलखे मां परमेशेरे सत कौमां नाश केरतां तैन केरि ज़मीन अपने इस्राएली लोकन विरासती मां दिती। 20 एना गल्लां पूरी भोने लगभग 450 साल लगे, तैसेरां बाद परमेशेरे तैन केरे लेइ शमूएल नेबेरे वक्ते तगर हाकिम रखे। 21 ज़ैखन हेजू शमूएल तैन केरो हाकिम थियो त तैन लोकेईं राज़ो बनानेरे लेइ दरखुवास की, ते परमेशेरे बिन्यामीनेरे गोत्रे मरां कीशेरू मट्टू शाऊल राज़ो बनाव ते तैनी 40 साल यरूशलेम नगरे मां राज़ कियूं। 22 फिरी तैनी शाऊल हटेइतां दाऊद तैसेरी ठैरी तैन केरो राज़ो बनाव, ज़ेसेरे बारे मां तैनी गवाही दिती, मां विशेरू मट्टू दाऊद मेरे मनेरे मुताबिक मैलोरूपे, तैस पुड़ अवं खुश आई, ते तैए मेरी मर्ज़ी पूरी केरेलो। 23 परमेशेरे अपने वादेरे मुताबिक तैसेरे वंशेरे मरां पापन करां मुक्ति देनेरे लेइ इस्राएले कां यीशु मसीह भेजो। 24 ज़ेसेरे एजने करां पेइले यूहन्ना इस्राएलेरे सारे लोकन प्रचार कियो, कि पापन करां मनफिराथ ते बपतिस्मो नेथ।" 25 ज़ैखन यूहन्नारू कम पूरू भोनेबालू थियूं, त तैनी ज़ोवं, "तुस मां कुन समझतथ? 'अवं मसीह नई!' बल्के हेरा, ते मेरे बाद एजनेबालोए, किजोकि अवं त एन काबल नई कि तैसेरे बूटां केरे तसमे भी खोल्लेसी सखी।" 26 "हे मेरे दूलाव, तुस ज़ैना अब्राहमेरे ओलादारे लोकव, ते परमेशेरो डर मन्नेबाले गैर कौमां केरे लोकव, इस मुक्तरो बिस्तार तुसन कां भेजेरोए। 27 यरूशलेम नगरेरे रानेबाले लोकेईं ते तैन केरे प्रधानेईं यीशु मसीह न पिशानो, ते न नेबी केरि गल्लां सेमझी, ज़ैना हर आरामेरे दिहाडे पेइतां शुनेईं गैती थी। 28 हालांकी तैन मौतरी सज़ारे काबल सबूत न मैल्लू, पन फिरी भी तैनेईं पिलातुस गवनेर कां दरखुवास की, कि ए मारो गाए। 29 ते तैनेईं सब किछ ज़ैन तैसेरे बारे मां पवित्रशास्त्रे मां लिखोरू थियूं, पूरू कियूं, त ते कूसे पुड़ कील देइतां मारो, ते ओसैलतां एक्की कन्नरी मां छुटो। 30 पन परमेशेरे ते मुडदन मरां भी ज़ीतो कियो। 31 ते ज़ैना लोक गलील इलाके मरां तैस सेईं साथी यरूशलेम नगरे मां ओरे थिये, तैन चलन काई दिहाडन तगर यीशु लेइयोतो राव, ते हुनी तैना लोक ज़ैनेईं ते लाहोरोए गवाही देतन। 32 असां तुसन खुशखबरी शुनातम, कि ज़ै वादो परमेशेरे इशेशे दादे-पडदादन सेईं कियोरो थियो। 33 कि परमेशेरे यीशु मसीह मुडदन मरां ज़ीतो केरतां ते वादो पूरू कियो, ते भजना केरि किताबी मां परमेशर मसीहेरे बारे मां ज़ोते, तू मेरू मट्टुस ते अवं तेरो बाजी नोवे। 34 एन सच्छे, कि परमेशेरे तै मुडदन मरां भी ज़ीतो कियो, ताके तै न शडे, परमेशेरे बचने मां एन्ने बियांन कियोरूपे, अवं तीं पवित्र ते सच्छी बरकत देलो, ज़ैन केरो वादो परमेशेरे दाऊदे सेईं कियोरो थियो। 35 ते होरि भजने मां दाऊद ज़ोते, तू अपने पवित्र मैन्हु शडने न देलो। 36 किजोकि दाऊद त अपने वक्ते मां परमेशेरी मर्ज़ी पूरी केरनेरां पत्ती मेरि जेव, ते अपने दादन-पडदादन सेईं साथी दफन भोव, ते तैसेरी जान शैडी जेई। 37 पन ज़ै (यीशु मसीह) परमेशेरे मुडदन मरां ज़ीतो कियो, त तैसेरे शडनेरी नौबत न

आई। 38 "एल्हेरेलेइ, हे दूलाव, बुझा कि यीशुएरे ज़िरिये सेईं तुसन पापां केरि मैफारी खबर शुनाई गाचे। 39 तुस मूसे नेबेरे कानूने मुताबिक धर्मी न थी भोने, पन ज़ै कोई यीशु पुड़ विश्वास केरे ते धर्मी भोए। 40 "एल्हेरेलेइ खबरदार राथ, कोरकोई एरू न भोए कि नेबी केरि ए गल तुसन पुड़ सच्छे बीते, 41 तुस ज़ैना होरि केरि तुहीन केरतथ, हेरा, ते हैरान भोथ, ते बरबाद भोथ, किजोकि अवं तुशे ज़ीते ज़ागते एरू कम केरनेबालोई, कि अगर कोई तुसन सेईं तैसेरे बारे मां गलबात भी केरे, त तुस कथे विश्वास न केरेले।" 42 ज़ैखन पौलुस ते बरनबास प्रार्थना घरे मरां चले, त लोक तैन कां मिनत केरतां ज़ोने लगे, कि होरि आरामेरी दिहाडी भी एन्ने गल्लां केरे बारे मां ज़ोवं गाए। 43 ज़ैखन लोक आराधनारे बाद बेइर निस्से, त बडे लोक पौलुस ते बरनबासे पत्ती चले, ते तैन मां किछ यहूदी थिये, ते किछ नंब्वे यहूदी पंथ धारण कियोरे थिये, ते तैनेईं तैन सेईं गलबात केरतां तैन समझाव, कि परमेशेरे अनुग्रहे मां बनोरे राथ। 44 होरि आरामेरे दिहाडे लगभग सारू नगर परमेशेरे वचन शुन्नेरे लेइ अकोट्टू भोवं। 45 ज़ैखन यहूदी लीडरेईं एत्रे हछे लोक लाए त तैन जलन भोइ, ते पौलुसेरे खलाफ गल्लां लागे केरने। 46 तैखन पौलुस ते बरनबासे दिलेर भोइतां तैन ज़ोवं, "ज़रूरी एन थियूं कि असां पेइले तुसन परमेशेरे बच्चन शुनाम, पन तुस त इन्कर केरने लोरेथ, ते अपनो आप हमेशारी जिन्दगरे काबल न समझथ, त हेरा हुनी असां गैर कौमां केरे पासे गातम। (aiōnios g166) 47 किजोकि प्रभुए असन ई हुकम दितोरोए, मां तू मां तू गैर कौमां केरे लेइ लौ बनोरस, ताके तुशे ज़िरिये सारे ज़मीनी पुड़ मुक्ति आनी गाए, ते तू ज़मीनेरे हर पासे मुक्तू दार भोस।" 48 इन श्रुतां गैर कौमां केरे लोक बडे खुशी भोए, ते परमेशेरी तारीफ़ केरने लगे, ते ज़ैना परमेशेरे हमेशारी जिन्दगरे लेइ ठहरावरे थिये, तैनेईं विश्वास कियो। (aiōnios g166) 49 ते प्रभुएरू बच्चन सारे मुलखे मां फैली जेवं। 50 पन यहूदी लीडरेईं बडे भक्त ते इज़तदार कुआणां ते नगरेरे काई खास मैन्हु भडकाए, तैनेईं पौलुस ते बरनबासे सितेइतां तैना तैस इलाके मरां भी केडी छडे। 51 तैखन पौलुस ते बरनबासे तैन केरे सामने अपने पावां केरि धूड़ ठुडकतां तैना इकुनियुम नगरे जो चले जे। 52 ते चले इकुनियुम नगरे मां खुशी ते पवित्र आत्माई सेईं भरपूर भोते राए।

14 इकुनियुम नगरे मां पौलुस ते बरनबास दुइये ज़ने प्रार्थना घरे मां जे, ते एरू भाषण केरने लगे ते बडे यहूदी लोकेईं ते यूनानी लोकेईं विश्वास कियो। 2 पन विश्वास न केरनेबाले यहूदेईं, गैर यहूदी लोक भडकाए ते तैनेईं विश्वासी मैन्हु विश्वासे करां दूर किये, ते तैन केरे खलाफ क्रोध पैदा कियो। 3 ते पौलुस ते बरनबास काई दिहाडे तैडी राए, ते प्रभुएरी भरोसे पुड़ दिलेरी सेईं गल्लां केरते थिये, ते प्रभु तैन केरे ज़िरिये चमत्कार ते निशान करइतां अपने अनुग्रहेरे वचने सच्छो साबत केरतो राव। 4 पन नगरेरे लोकन एप्पू मांमेइं फूट भोइजेइ, किछ लोक यहूदी केरे पासे भोए, ते किछ प्रेरितां केरे पासे भोए। 5 यहूदी ते गैर यहूदी अपने प्रधानन सेईं मिलतां तैन बेइज़त केरने ते ते घोडेईं बाने लगे। 6 त तैन एस गल्लरो पतो लगे, तैना तैटां नेशेशी जे, ते लुकाउनिया इलाकेरे नगरन लुस्त्रा ते दिरबे मां ते तैसेरे आसे-पासेरे इलाके मां चले जे। 7 ते तैडी तैना खुशखबरी शुनाने लगे। 8 लुस्त्रा नगरे मां अक मैन्हु बिशोरो थियो, ज़ै पावां केरो कमजोर थियो, ते ज़मनेरो टोन्टो थियो, ते ते कथी न थियो चलोरो। 9 ते पौलुसेरी गल्लां ध्याने सेईं शुन्ने लगगेरो थियो, पौलुसे तैसेरे पासे ध्याने सेईं तक्कू त जानू, कि एसमां एत्रो विश्वासे कि ए बेइज़ोइड सकते। 10 ते पौलुसे तैस मैन्हु ज़ोरे सेईं ज़ोवं, "अपने पावन पुड़ खडो भो।" ते तै तैखने खडो भोव, ते चलने लगे। 11 ज़ैखन लोकेईं पौलुसेरू एन कम हेरू त लुकाउनिया भाषाई मां ज़ोरे सेईं ज़ोने लगे, "कि देबतो असन कां मैनेरो शकली मां ओरोए।" 12 ते तैन लोकेईं बरनबासेरू नवं ज्यूस रख्खू, (ज़ैन यूनानी देबतेरू नवं थियूं), ते पौलुसेरू हिर्मस नवं रख्खू, (ज़ै होरि देबतां केरो बिस्तार देने बालन मरां प्रधान थियो) किजोकि तै गल्लां केरने मां जादे माहिर थियो। 13 ते ज्यूस देबतेरू मन्दर नगरेरे सामने थियूं, तैसेरो पुजारी दांत ते फूड़ केरे हार एन्तां नगरेरे फाटके पुड़ पुजो,

किजोकि तैना लोक चाते थिये कि असां प्रेरितां केरे लेइ बलिदान केरन। 14 जैखन बरनबास ते पौलुस प्रेरितेई एन शुनु, त तैना दुखी भोए, ते तैनेई अपना लिगाड़ा छिन्दां ते मैन्न मां जे ते ज़ोरे-जोरे ज़ोने लगे। 15 “लोकव तुस एन कुन केरने लगेरेथ? असां भी तुशे ज़ेरे दुःख सुख झैल्लने बाले मैन्हु आम, ते तुसन खुशखबरी शुनातम, ताके तुस एना फुजूल चीजां शेरतां ज़ींते परमेशरेरे पासे एज्जथ, ज़ैनी धरती त कने अम्बर ते समुन्द्रे ते ज़ैन किछ भी एसमां आए तैनी बनोरूपे। 16 तैनी बीतोरे वक्ते मां सैरी कौमन अपनि-अपनि बत्तां चलने दिन्तू। 17 फिरी भी तैनी अपनो आप बेगवाह न बनाव, पन अपनि भलाई हेरानेरे लेइ तैनी अम्बरेरं झड़ी दिती, ते फसलां केरे लेइ मौसम बनाए, ताके तुसन हछु अन भोए ते तुशे दिल खुशी सेईं भरे।” 18 एना गल्लां जोइतां तैनेई लोक बड़े मुशकली सेईं रोके, कि एना इशे लेइ बलिदान न देन। 19 तैखन किछ यहूदी अन्ताकिया नगरे ते इकुनियुम नगरे मरां आए, ते तैनेई लोक अपने पासे केरतां पौलुसे पुड़ पथराव केरने लगे, ते तै मुओरो बुझतां नगर करां बेइरोवं घसीटतां नीयो। 20 जैखन चले तैड़ी पुजे त तैनेई पौलुस घरे मां आनो ते ते खड़ो उठो ते वापस नगर मां अव, ते होरसां बरनबासे सेईं साथी दिरबे नगरे जो चलो जेव। 21 पौलुस ते बरनबासे तैस नगर मां खुशखबरी शुनाई ते बड़े चले बनाए, ते तैसेरां बाद तैना लुस्त्रा ते इकुनियुम नगरे ते अन्ताकिया नगरे मां वापस आए। 22 तैना हर एक्की नगरेरे चेलां केरे मन मज़बूत केरते ते ई शिक्षा देते थिये कि विश्वासे मां बनोरे राथ, ते इन ज़ोते थी, “ते असेईं बड़ो दुःख झैल्लतां परमेशरेरे राज़े मां दाखल भोनुए।” 23 ते तैनेई हर कलीसियाई मां तैन केरे बुजुर्ग ठहराए, ते बरतां रेखतां प्रार्थना की, ते तैना प्रभुएरे सुपुद किये, जैस पुड़ तैनेई विश्वास कियोरो थियो। 24 फिरी तैना पिसिदिया इलाके मरां निस्तां पंफूलिया इलाके मां पुजे। 25 ते पिरगा नगरे मां वचन शुनेइतां त अत्लिया नगरे मां आए। 26 तैदां जिहाजे मां च़ेदतां वापस अन्ताकिया नगरे मां आए, ते तैड़ी तैनेई तैस सेवारे लेइ जै तैनेई पूरी कियोरी थी, परमेशरेरे अनुग्रहेरे सुपुद कियोरी थी। 27 अन्ताकिया नगरे मां पुजतां तैनेई कलीसियारे लोक अकोट्टे किये, कि परमेशरे असन सेईं साथी भोइतां केरहां-केरहां बडां कम्मां कियां! ते गैर कौमां केरे लेइ बत खोल्ली, कि तैना भी यीशु पुड़ विश्वास केरन। 28 ते तैना चलन सेईं साथी बड़े दिहाइन तगर राए।

15 फिरी किछ लोक यहूदिया इलाके मरां आए, ते विश्वासी ढलान ए शिक्षा देने लगे, “अगर मूसरेरे रसमेरे मुताबिक तुशेओ खतनो नईं भोरो त तुसन मुक्ति न मैल्ली बटे।” 2 एस गल्ली पुड़ पौलुस ते बरनबासेरो तैन लोकन सेईं बड़ो मतभेद ते बड़ी बेंस भोइ, ते कलीसियारे लोकेईं पौलुस ते बरनबास ते किछ होरे मैन्हु चुने कि तैना यरुशलम नगरे मां गोइतां तैड़ी एस मसले पुड़ प्रेरितन ते बुजुर्गन सेईं गलबात केरतां हल कढन। 3 तैखन कलीसियारे लोकेईं तैना खर्वां देइतां भेजे, ते जैखन तैना फीनीके ते सामरियारे इलाकन मांमेईं च़लोरे थिये, तैनेई ज़ोवं, कि केन्चरे गैर कौमां केरे लोक खुशखबरी शुन्तां मसीह पुड़ विश्वास कियो, ते कलीसियाई मां शामल भोए, एन शुन्तां सारे मसीह ढला बड़े खुश किये। 4 जैखन तैना यरुशलम नगरे मां पुजे, त तैठेरी कलीसियारे लोक ते प्रेरित ते बुजुर्ग तैन सेईं बड़े खुशी सेईं मिले, ते तैखन पौलुस ते बरनबासे सब किछ बिस्तार दित्तो, कि परमेशरे तैन केरे ज़िरिये सेईं केत्रा-केत्रा कम्मां कियां। 5 पन फरीसी पंथेरे किछ लोकेईं ज़ैनेई विश्वास कियोरो थियो, तैन मरां किछ ज़ोने लगे, “गैर कौमन मरां विश्वास केरनेबालां केरो खतनो कियोरो लोइे, ते एन मूसा नेबेरे कानूने पुड़ अमल केरनेरो हुक्म दित्तोरो लोइते।” 6 तैखन प्रेरित ते बुजुर्ग ए गलबात केरनेरे लेइ अकोट्टे भोए। 7 बड़ी बेंस भोनेरे बाद पतरसे तैन खड़े भोइतां ज़ोवं, “हे मेरे ढलाव, तुस जानतथ कि बड़े च़िरे पेइले परमेशरे अव तुसन लोकन मरां चुनो, ताके गैर कौमन मेरे ज़िरिये खुशखबरी शुनाई गाए ते तैना विश्वास केरन। 8 परमेशर ज़ै दिलेरो हाल ज़ानते, तैनी तैन भी इशशी ज़ेरि पवित्र आत्मा देइतां इन हिराव, कि परमेशरे तैना अपने लोकां केरे ज़ेरे कबूल किये। 9 ते विश्वास केरनेरे ज़िरिये सेईं तैन केरे मन पवित्र

केरतां असन मां ते तैन मां कोई फर्क न रखवो। 10 त हुनी तुस परमेशरेरी अज़मैइश किजो केरतथ? कि गैर कौमन मरां ओरे चलन (यानी विश्वासी लोकन) पुड़ एत्रो बोझ किजो रखतथ, ज़े न असेईं छुइयोए ते न इशे दादे-पड़दादे छुइयोए। 11 एरू केरनु ठीक नईं, किजोकि इशशी याकीन त इने कि प्रभु यीशु मसीहेरे अनुग्रह सेईं तैन केरे पापां केरि मुक्ति भोली, तेन्चरे इशशी मुक्ति भोली, न कि मूसरेरे कानूने सेईं।” 12 तैखन सारे लोक चुपचाप बरनबास ते पौलुसेरी गल्लां शुन्ने लगे, कि परमेशरे केन्चरे गैर कौमन मां तैन केरे ज़िरिये केरहे-केरहे निशान ते चमत्कार किये। 13 जैखन तैना चुप भोए त याकूब ज़ोने लगे, “मेरे ढलाव मेरी गल शुना।” 14 शमौन पतरसे रोइचारे ज़ोवं, कि परमेशरे पेइले केन्चरे गैर कौमन पुड़ सिद्धी नज़र की, ताके तैन मरां मैन्हु चुनतां अपने लोक बनाए। 15 नेबी केरू बच्चन भी एसेसे ज़ेरुए ज़ेन्चरे लिखोरूपे कि। 16 एसेरां बाद अव फिरी एइतां दाकूदेरा राज़े बनेइलो, ज़ैन तैसेरे दुश्मनेईं नाश कियोरू थियू। 17 ताके बाकी सारे लोक ते गैर कौमन समेत ज़ैना मां कुजोरेन मेरे लोक भोन, ते मां तोप्यन। 18 ए तैए प्रभु ज़ोते ज़ै दुनियारे शुरुआती करां इन गल्लां केरि खबर देतो अव। (aiōn g165) 19 “एल्हेरेलेइ मेरो खियाल ईए, गैर कौमन मरां ज़ैना लोक परमेशरे कां एइतन, तैन अस यहूदी केरो कानून मन्तरे लेइ मजबूर न केरन। 20 बल्के तेन चिट्ठी लिखतां एन ज़ोम कि मूरतन कां च़ेदोरी चीजां करां दूर नान, ते बदमैशी ते गलचैटी देइतां मारोरे ज़ानवरां केरू मास न खान ते खून न खान। 21 किजोकि बड़े पेइले नगर-नगरे मां मूसरे कानूनेरो प्रचार केरनेबाले भोते आए, ते तैना हर आरामेरे दिहाइ प्रार्थना घरे मां पेढी गाती थी।” 22 तैखन प्रेरित ते बुजुर्ग ते सारी यरुशलमेरे सारे कलीसिया मिलतां एन रोडू समझू, कि असन मरां किछ मैन्हु चुने गान, मतलब यहूदा, ज़ैस जो बरसब्बास ज़ोतन ते सीलास ज़ैना ढलान मां खास आन, ते तैन पौलुस ते बरनबासे सेईं साथी अन्ताकिया नगरेरे कलीसियाई मां भेज्म। 23 ते तैनेई तैन केरे हथ्थे इन लिखतां भेजू, “अन्ताकिया नगरे ते सीरिया ते किलिकिया इलाकां केरे रानेबाले विश्वासी ढलान ज़ैना गैर कौमन मरां आन, प्रेरितां ते बुजुर्ग ढलां केरू नमस्कार! 24 असेईं शुनेरुए, कि किछ मैन्हु बगैर अजाज़तां तुशे इड़ी आए, ते तैनेई अपनि गल्लेईं सेईं तुशेओ दिल परेशान कियो। 25 एल्हेरेलेइ असेईं एन ठीक समझू, कि इह्दां ढूईं मैन्हु अपने ढलारे बरनबास ते पौलुस सेईं साथी तुसन कां भेज्म। 26 एना एरे मैन्हु आन कि ज़ैन इशे प्रभु यीशु मसीहेरे लेइ अपनि जानरी भी परवाह नईं। 27 एल्हेरेलेइ असेईं यहूदा ते सीलास भेजोरेन, ते तैना एप्यू भी एना गल्लां शुनाले। 28 पवित्र आत्मा, ते असेईं एन ठीक समझू, कि इना ज़रूरी गल्लां केरे अलावा तुसन पुड़ होरो बोझ न देम। 29 बस्सा तुस मूरतन कां च़ादोरे बलिदाने ते खून करां ते गल दुबेइतां मारोरे जानवरे करां ते बदमाशी केरने करां दूर राथ एन तुशे लेइ रोडू भोली। अग्रोवं जो शुभकामना” 30 बस्सा तैना मैन्हु चलते-चलते अन्ताकिया नगरे मां पुजे, तैड़ी तैनेई कलीसियारे लोक अकोट्टे केरतां ए चिट्ठी तैन केरे हवाले की। 31 तैना चिट्ठी मां लिखोरी गल्लां पेइतां बड़े खुशी भोए। 32 यहूदा ते सीलास एप्यू भी नबी थिये, तैनेई तैदरे विश्वासी ढलान शिक्षा दिती ते तैना विश्वासे मां पक्के बनाए। 33 किछ दिहाइना बाद तैदरे विश्वासी ढलाएई आनन्दे सेईं ते प्रार्थना केरतां वापस भेजे, ताके अपने भेजने बालन कां वापस गान। 34 सीलासे अन्ताकिया नगरे मां रानेरो फैसलो कियो ते यहूदा अकेल्लो वापस यरुशलमे जे अव। 35 ते पौलुस ते बरनबास अन्ताकिया नगरे मां रुकी जे, तैड़ी तैना काई हौरि लोकन सेईं मिलतां लोकन प्रभु यीशुएरे वचनेरी शिक्षा देंते राए ते खुशखबरी शुनाते राए। 36 किछ च़िरेरां बाद पौलुसे बरनबास सेईं ज़ोवं, “च़ल असां तैन सारे नगरन मां गाम, ज़ेड़ी असेईं खुशखबरी शुनावरी थी, ते तैन विश्वासी ढलान सेईं मुलाकात केरम, ते हेरम कि तैन केरो कुन हाले!” 37 तैखन बरनबासे यूहन्ना ज़ैस जो मरकुस ज़ोतन, साथी नेनो चाव। 38 पन पौलुसे ठीक न समझू, कि यूहन्ना तैन सेईं साथी गाए, किजोकि तै पंफूलिया इलाके मां कम शेरतां अलग भोरो थियो। 39 पौलुस त बरनबासे एप्यू मांमेईं बड़ी अनबन भोइ, ते तैना अलग भोए, बरनबास ते मरकुस जिहाजे मां साइप्रस जो च़लो जे। 40 पन पौलुसे सीलास एप्यू साथी नीयो,

ते विश्वासी दूलाएई तैन केरे लेइ प्रार्थना की, ते तैना परमेशररे अनुग्रहरे सुपुर्द किये ते तैना तैदां चले जे। 41 पौलुस सीरिया ते किलिकिया इलाकन मामेई निस्सो च़लतो ते कलीसियां केरे विश्वासी लोकन मज़बूत केरतो जेव।

16 तैना फिरी दिरबे नगरे ते लुस्त्रा नगरे मां आए, तैदी अक चेलो तीमुथियुस नव्वेरो रातो थियो, तैसेरी अम्मा यहुदी थी, ते तै मसीह पुड़ विश्वास केरती थी, पन तैसेरो बाजी यूनान मुलखेरो रानेबालो थियो। 2 तीमुथियुस लुस्त्रा नगरे मां ते इकुनियुम नगरेरे विश्वासी दूलान मां बडो रोडो मैन्हु थियो। 3 पौलुसेरी इच्छा ई थी, कि तै तैस साथी ने, तैन यहुदी केरि वजाई ज़ैना तैदी रहते तैसेरो खतनो कियो, किजोकि तैना सब ज़ानते थी कि तैसेरो बाजी यूनान मुलखेरो रानेबालो थियो। 4 पौलुस ते तैसेरे साथी नगन-नगरे मामेई च़लते जे, तैदरे विश्वासी लोकन तैना हुकमां केरे बारे मां ज़ोंते जे, जैना यरूशलेम नगरे मां प्रेरितेई ते बुजुर्गेई मिलतां ठहरावरे थिये, ताके लोक तैन पुड़ अमल केरन। 5 बस्सा कलीसियां विश्वासे मां पेक्की भोती जेई, ते तैन केरि कलीसियां केरि तैधात बद्धती जेई। 6 पौलुस ते तैसेरे साथी फ़ूगिया ते गलातिया इलाकन मामेई निस्तां जे, किजोकि पवित्र आत्मा तैना आसिया इलाके मां बचचन शुनाने करां रोकोरे थिये। 7 ते तैना मूसिया इलाकेरे नेडे पुजतां, बितुनिया इलाके मां गानू चाते थिये, पन यीशुएरे आत्मा गाने न दिते। 8 एल्हेरेलेइ तैना मूसिया इलाकेरे नेडेरां त्रोआस नगरे मांजो च़ले जे। 9 राती पौलुसे अक मैन्हु दर्शन मां लाव, “तै मकिदुनी इलाकेरो थियो, ते खडो भोइतां पौलुसे कां मिनत केरने लोरो थियो, कि पार समुन्दरेरे मकिदुनिया इलाके मां पड़ते इश्शी मद्दत केर।” 10 तैसेरे इस दर्शन हेरनेरां पत्ती लूशी अस पार मकिदुनिया इलाके मां गानेरे लेइ तियार भोइ जे, किजोकि असेई बुडू कि परमेशररी असां तैदी खुशखबरी शुनानेरे लेइ कुजवरम। 11 असां त्रोआस नगरेरां जिहाजे मां जे, ते पैनरू सफर केरतां सुमात्राके टैपु पुड़ आए, ते तैदां होरसां नियापुलिस नगरे मां आए। 12 तैदां असां फिलिप्पी नगरे मां पुजे, जैन मकिदुनिया इलाके मां खास नगरे, ते रोमी केरि बेसती मांए, ते अस तैस नगरे मां किछ दिहाड़े राए। 13 आरामेरे दिहाड़े असां नगरेरे फाटके मरां निस्तां दरियाए पुड़ पुजे, किजोकि असन उमीद थी कि तैदी यहुदी केरि प्रार्थना केरनेरी कोई ठार भोनीए, असां तैदी गेइतां बिश्शी जे, तैदी किछ कुआन्शां थी, असां तैन सेइं गल्लां केरने लगे। 14 इश्शी गल्लां शुन्ने बैली कुआन्शन मां अक परमेशररी भक्त लुदिया नव्वेरी थी, ते थुआतीरा नगरेरी राने बाली थी, ते बैंगनी लिगडां बेचने बाली थी, ते प्रभुए तैसेरो मन खोल्लो, कि ते पौलुसेरे गल्लन पुड़ ध्यान केरे। 15 ज़ैखन तैसां ते तैसेरे पूरे टब्बरे बपतिस्मो नीयो त ते बिनती केरतां ज़ोने लगी, “अगर तुस लोक मां प्रभुएरी ईमानदार दासी समझतथ, त मरे घरे च़ला ते बिश्शी राथ,” ते तैसारी मिनत शुन्तां असां खुशी भोए। 16 एक्की फेरे असां प्रार्थना केरनेरी ठारी जो च़लोरे थिये त असन अक दासी मैल्ली ज़ै भूतां केरे मद्दती सेइं एजनेबाले वक्तेरे बारे मां ज़ोती थी। ते अपने मालिकां केरे लेइ बडे पेंडसे कमाती थी। 17 तै पौलुसे पत्ती ते असन पत्ती च़ली ते ज़ोने लगी, “ए मैन्हु परमप्रधान परमेशररो दासे, ते एना असन पापां केरि मुक्ती बत हिरातन।” 18 तै काई दिहाड़े एन्ने केरती राई, पन पौलुसे जिच भोव, ते मुइतां तैस भूते जो ज़ोव, “अव तै यीशु मसीहेरे नव्वे सेइं हुकम देताई निस्सी गा, ते तै तैसन तैस मरां निस्सी जेई।” 19 ज़ैखन तैसेरे मालिकेइ हेरू कि इश्शी कमैइयरी उमीद टलुटी जेई, त तैनेई पौलुस ते सीलास टलेइतां चौके मां प्रधानां केरे हवाले किये। 20 तैनेई पौलुस ते सीलास हाकिमन कां पेश किये, ते ज़ोने लगे, “एना यहुदीन ते इश्शे नगर मां बडी खलबली मचाने लगोरें। 21 ते एरे रुवाज़ेरी शिक्षा देतन, जैन केरू केरनू ते मन्नू असन रोमे मां रानेबालान केरे इश्शे लेइ बिलकुल भी ठीक नई।” 22 एन शुन्तां सारे लोक पौलुस ते सीलासेरे खलाफ अकोट्टे भोए, ते हाकिमेई तैन केरां लिगडां खोलतां छिन्दां ते सोटेई बानेरो हुकम दित्तो। 23 सिपैहीयेइ तैन खूब बतेइं बैदी ते कैदखाने मां छडे, ते कैदखानेरे प्रधाने हुकम दित्तो, कि रोडेचारे परहो दित्तो गाए। 24 ते हुकम शुन्तां तैना आँधरी कोठी मां छडे, ते तैन केरे पावन लेकडरी बेडि लेइ। 25 एध्ठी राती पौलुस ते

सीलास प्रार्थना केरने मां मघन थिये, ते परमेशररां भजना लोरे थी ज़ोने, ते होरे केदी भी शुन्ने लोरे थिये। 26 अचानक अक भुंजल अव, ते कैदखानेरे बुनीयाद हिल्ली ते सारां दारां खुल्ली जेआं, ते सैरी केदी केरि बेडि भी खुल्ली जेई। 27 कैदखानेरो प्रधान बीडोते ते खडो उठो, ते तकने लगे, ते हेरते कि कैदखानेरां दारां खुल्ली ज़ोरेन, त तैनी समझू कि सारे केदी नशशोरन, ते तैनी अपनि तलवार खिच्ची कि अव अपनो आप मेरी छेड्डी। 28 पन पौलुसे ज़ोरे सेइं ज़ोव, “अपनो आप न मार किजोकि असां सब इडी आम।” 29 तैखन तै दीयो बैलतां अन्तर जेव, ते पौलुसे ते सीलासेरे पावन पुड़ पेव, 30 फिरी तैनी तैना बेइर आने ते ज़ोने लगे, “जनाब अव कुन केरि, कि मेरी मुक्ति भोए?” 31 तैनेई ज़ोव, “प्रभु यीशु मसीह पुड़ विश्वास केर, त तां ते तेरे टब्बरे पावन करां मुक्ति मैल्लनीए।” 32 ते तैनेई तैस त तैसेरे टब्बरे प्रभुएरू वचन शुनाव। 33 तैखने तैने राती पौलुस ते सीलास नेइतां तैन केरे ज़खम थोए, ते तैनी तैसेरे सारे टब्बरे बपतिस्मो नीयो। 34 फिरी तैनी तैना अपने घरे ने, ते तैन खाने जो रोटी दित्ती, ते सारे टब्बरे परमेशररे पुड़ विश्वास केरतां बडे खुश थिये। 35 होरसां झेइ हाकिमेई सिपाही भेजतां बिस्तार भेजो, कि तैन मैन्न हथरां छेडी देथ। 36 दरोगा पौलुसे जो ज़ोव, “हाकिमे हुकम दित्तोरोए कि पौलुस ते सीलास कैदखाने मरां हथरां छडा, एल्हेरेलेइ तुस खुशी सेइं च़ले गाथा।” 37 पन पौलुसे तैन सेइं ज़ोव, “तैनेई अस ज़ैना रोम मुलखेरे राने बालेम, बगैर कसूरे सेबभी केरे सामने मारे कुटे ते कैदखाने मां छडे, ते हुनी चुपचारे हथरां छडने चाते? पन एन न भोइसखे, ते एप्पु एज्जे ते असन बेइर कडे।” 38 सिपैहीयेइ गेइतां हाकिमन बिस्तार दित्तो, कि पौलुस ते सीलास रोम मुलखेरे राने बालेन, ते तैना डेरि जे। 39 तैनेई तैदी एइतां तैन करां माफ़ी मग्गी, ते फिरी तैना कैदखाने मरां बेइर आने ते मिनत की, कि नगर मरां च़ले गाथा। 40 बस्सा पौलुस ते सीलास कैदखाने मरां बेइर निस्से ते लुदियारे घरे जे, ते तैदी विश्वासी दूलान सेइं मिले ते तैन शान्ति देइतां च़ले जे।

17 पौलुस ते सीलास तैसेरां बाद अम्फिपुलिस ते अपुल्लोनिया नगरन मामेई गेइतां थिस्सलुनीके नगरे मां आए, तैदी यहुदी केरू अक प्रार्थना घर थियू। 2 पौलुस अपने रीतेरे मुताबिक प्रार्थना घरे मां टलाई आरामेरे दिहाइन तगर पवित्रशास्त्रेरी किताबी मरां तैन सेइं बैस केरतो राव। 3 पौलुस तैन केरो मतलब खोल्ली-खोल्ली समझातो थियो, “कि यीशु मसीहेरो दुःख झैल्लनो ते मुइदन मरां ज़ीतू भोनु ज़रूरी थियू, कि ज़ैस यीशुएरे बारे मां अव प्रचार केरतम, तैए मसीह आए।” 4 तैन मरां किछ यहुदी ते गैर कौमां केरे लोक ज़ैनेई विश्वास कियोरो थियो, ते होरि भी बेडि भक्त कुआन्शां ज़ैनेई विश्वास कियोरो थियो पौलुसे ते सीलासे सेइं मिली जेई। 5 पन यहुदेई जलनी सेइं काई नगरन मां बुरे लोक अकोट्टे केरतां हंगामो केरनो शुरू कियो। तैनेई यासोनेरे घरे पुड़ हमलो कियो ताके पौलुसे ते सीलासे लोकां केरे सामने आनन। 6 पन ज़ैखन तैना न मैल्ले त यासोन त काई होरे विश्वासी दूला घसीटतां नगरेरे हाकिमन कां आने, ते ज़ोरे-ज़ोरे सेइं ज़ोने लगे, “एन मैनेई हर ठैरी परेशानी फैलावरी, ते अज़ इडी भी पुजोरें। 7 ते एना यासोने अपने घरे मां रखोरें, ते एना लोक महाराजरे हुकमेरी खलाफत केरतन, ते जोतन कि राज़ो त यीशु आए।” 8 ए गल शुन्तां नगरेरे हाकिम ते सारे लोक परेशान भोए। 9 ते तैनेई यासोन ते बाकी लोक ज़मानती पुड़ हथरां छडे। 10 डूलोइयां विश्वासी दूलाएई पौलुस ते सीलास तैदां बिरिया नगरे जो भेजे, ज़ैखन तैना तैदी पुजे त तैना यहुदी केरे प्रार्थना घरे मां जे। 11 बिरिया नगरेरे लोक थिस्सलुनीके नगरेरे यहुदन करां भले थिये, तांए तैनेई खुशखबरी बेडि खुशी सेइं कबूल की, तैना रोज़ एना गल्लां केरे बारे मां गलबात केरते थिये, कि पौलुसेरी गल्लां सेच्छी आन कि नई। 12 एल्हेरेलेइ काई यहुदेई ते काई होरि यूनानी इज़्जतदार कुआन्शेई भी यीशु पुड़ विश्वास कियो। 13 ज़ैखन थिस्सलुनीके नगरेरे यहुदन पतो लगे कि पौलुस बिरिया नगरे मां परमेशरेरू वचन शुनाते, ते तैना लोकन भक्कांने ते हलवल मचाने लगे। 14 तैखन विश्वासी दूलाएई पौलुस समुन्दरेरे बन्ने भेजो, पन सीलास त तीमुथियुस तैदी राए। 15 ते पौलुसेरी मद्दत केरनेबाले एथेंस नगरे तगर जे, ते सीलास ते

तीमथियुसरे लेइ बिस्तार नेइतां चले जे, कि मीं कां जल्दी एज्जे। 16 ज़ैखन पौलुस एथेंस नगरे मां तैन बलाने लग्गोरो थियो, त एन तकते कि सारू नगर मूरती सेइं भेरातां त तैसेरो दिल बडो उदास भोइ। 17 एल्हेरेलेइ तै प्रार्थना घरे मां यहूदन ते तैन सेइं ज़ैना परमेशेरो डर मन्नेबाले (भक्त) गैर कौमन मरां यहूदन मां ओरे थिये चौके मां गोइतां मिलतो थियो, ते तैन सेइं रोज बेंस केरतो थियो। 18 किछ इपिकुरी ते किछ स्तोईकी उस्ताद तैस सेइं बेंस केरने लगे, ते तैन मरां किछ ज़ोने लगे, “बकवादी कुन ज़ोनु चाते?” ते किछ ज़ोने लगे, “ए त होरि देबतां केरो पतो देनेबालो भोइ सकते, किजोकि पौलुस यीशुएरो ते कने ज़ीते भोनेरी खुशखबरी शुनातो थियो।” 19 तैखन तैनेई तै एप्पु सेइं साथी अरियुपगुस नव्वेरे मन्दरे मां नेव, ते तेस पुच्छू, “कुन अस ज़ैनी सकतम कि ज़ैस नव्वे पंथेरी तू शिक्षा देतस, तै कुने? 20 असां तेरे ऐशेरां बेइि आजीव गल्लां शुन्ने लोरेम, ते असां एन ज़ानून चातम कि एन केरो कुन मतलबे?” 21 (द्रासले मां एथेंसेरे लोक कुन देशी कुन परदेशी अपनि फुरस्तरो सारो मौको होरि कम्मां केरे बजाहे सिर्फ नव्वीं-नव्वीं गल्लां ज़ोने ते शुन्ने मां गुजारेते थियो।) 22 तैखन पौलुस अरियुपगुसे नव्वेरे मन्दरे मझाटे खडो भोइतां ज़ोने लगे, “हे एथेंसेरे लोकव, अवं हेरताई कि तुस हर गल्लां मां देबतन बडो उच्यो द्रजो देतथ। 23 ज़ैखन अवं तुशे नगर मां हठतो फिरतो थियो, त मेरी नजर तुशे पुज़नेरी चीज़न पुड ते बलिदानीरी ठारी पुड पेई, ज़ैस पुड लिखोरू थियूं, अनजान परमेशेरे लेइ, बस्सा तुस ज़ैस ज़ातथ नन्ना ते तैसेरी पूजा केरतथ, अवं तुसन तैसेरे बारे मां ज़ोताई। 24 ज़ैनी परमेशेरे दुनिया ते सैरी चीज़ां बनेवरिन, तै धेरतरो ते अम्बेरो मालिके, तै हथ्यां केरे बनेवेरे मन्दरन मां न राए। 25 तैस मैनेरे मद्दतरी ज़रूरत नई, किजोकि तै केन्ची चीज़री ज़रूरत नई, तै सैरन ज़िन्दगी ते सांस ते सब किछ देते। 26 तैनी एककी मैन्हु सेइं हर कौमारे लोक पैदा किये, ताके सारे ज़मीनी पुड आबाद भोन, तैनी तैन केरि ज़िन्दगरे दिहाड़े बनाए ते रानेरे लेइ ठार बनाई। 27 परमेशेरे एन कियूं ताके लोक तैस तोपन ते शैइद तोपते-तोपते तैन मैल्ली गाए, हालांकी ते असन केन्ची करां दूर नई। 28 किजोकि तै असन सेइं साथी आए ते ज़ीते रातम ते चलतम फिरतम, जेन्चरे कि तुशे लिखने बालेई भी ज़ोरूए, ‘असां त तैसेरे बच्चेम।’ 29 ते परमेशेरे बच्चे भोइतां सोचेरू लोड़े, कि ईश्वरत्व सोन्ने, चँदरी, या घोड़ेरी मूरतरीए ते ज़ै केन्ची मैनेरे हाथां केरि कारीगिरीए ते खियाले सेइं आए। 30 एल्हेरेलेइ परमेशेरे लोकां अज्ञानतारे वक्ते पुड ध्यान न दित्तू, ते हुनी ते मैन्नू सेबभी ठैरन हुक्म देते कि मन फिरान। 31 किजोकि तैनी अक दिहाड़ी ठुवालेवरीए ज़ैखन ते सञ्जे सेइं दुनियारो इन्फाफ एककी एरे मैनेरे ज़िरिये सेइं केरेलो, ज़ै तैनी रख्खोरोए, ते तै तैनी मुइदन मरां ज़ीतो केरतां ए गल सैरी मैन्नू साबत कियोरीए।” 32 ज़ैखन तैनेई मुइदां केरि आदालतरे बारे मां शुनू त तैन मरां किछ एस गल्लरी मज़ाक बनाने लगे, ते किछेई ज़ोवं, “अस एस बारे मां फिरी कोस्कोई शुन्नेले।” 33 एन हेरतां पौलुस तैदां निस्तां चलो जेव। 34 पन किछ लोक तैस सेइं मिली जे, ते तैनेई प्रभु पुड विश्वास कियो, तैन मरां अक दियुनिसियुस ज़ै अरियुपगुसरो प्रधान थियो, ते अक कुआन्श थी, तैसारू नवं दमरिस थियूं, ते तैन केरे अलावा होरे भी बडे मैन्हु थियो।

18 तैसेरां बाद पौलुस एथेंस नगरे मरां निस्तां कुरिन्थुस नगरे मां अव। 2 तैडी तैस अक यहूदी मैल्लो, तैसेरू नवं अक्विला थियूं, ते तै पुन्तुस इलाकेरो रानेबालो थियो, ते तैसेरी कुआन्शरू नवं प्रिस्किल्ला थियूं, ते दुइये साथी इतालिया इलाकेरां ओरां थियां, किजोकि क्लीदियुस हाकिमे हुक्म दित्तोरो थियो, कि सारे यहूदी रोमे मरां चले गान ते पौलुस तैन कां जेव। 3 किजोकि पौलुसरो ते अक्विलारो तेम्बु बनानेरो बुपार थियो, तांए पौलुस तैस सेइं साथी राव, तैना कम केरने लगे। 4 ते पौलुस हर आरामरे दिहाड़े तैन केरे प्रार्थना घरे मां गातो थियो, ते यहूदी लोकन ते यूनानी लोकन समझाने लगे कि, यीशु पुड विश्वास केरा। 5 ज़ैखन सीलास ते तीमथियुस मकिदुनिया इलाके मां आए, त पौलुस वचन शुनाने मां मघन थियो, ते लगातार यहूदन सेइं एन ज़ोतो थियो कि यीशु ही मसीह आए। 6 पन ज़ैखन यहूदी खलाफत

त कने तुहीन केरने लगे, त पौलुसे अपना लिगाडां टुडकां ते ज़ोने लगे, “तुशो खून तुशे दोगे पुड भोए! अवं बेइलज़ाम आई, अज़ेरे बाद अवं गैर कौमन कां गोइलो।” 7 तैखन प्रार्थना घरे मरां निस्तां तीतुस यूस्तुस नव्वेरे एककी परमेशेरे भक्त मैनेरे घरे जेव, ज़ै गैर कौमी मरां थियो, ज़ेसेरू घर प्रार्थना घरे सेइं साथी थियूं। 8 एस प्रार्थना घरेरो प्रधान क्रिस्पुसे ते तैसेरे सारे टब्बेरे प्रभु पुड विश्वास कियो, ते बडे कुरिन्थिसेरे लोकेई शुन्तां विश्वास कियो ते बपतिस्मो नीयो। 9 एककी राती प्रभुए पौलुसे सेइं दर्शने मां गल की, ते ज़ोवं, “डर नन्ना ते तू ज़ो ते चुप न रा, 10 किजोकि अवं तीं सेइं साथी आई, ते कोई तीं पुड हमलो केरतां नुकसान न पुजेई सकेलो, किजोकि इस नगर मां बडे लोकन ज़ैना मीं पुड भरोसो रख्खेले।” 11 पौलुस तैडी डैड साल राव, ते तैन परमेशेरी खुशखबरी शिखालतो राव। 12 ज़ैखन गल्लियो, अखाया इलाकेरो हाकिम थियो, त यहूदेई मिलतां पौलुसे पुड हमलो कमाव, ते पौलुस टलेइतां आदालतरे तखते कां नीयो, ते ज़ोने लग्गे। 13 “एन लोकन समझाते, कि परमेशेरी आराधना एन्चरे केरा, ज़ै मूसेरे कानूनेरे बिलकुल बरखलाफे।” 14 पौलुस ज़ैखन किछ ज़ोने बालो थियो, त गल्लियोए यहूदन सेइं ज़ोवं, “हे यहूदी लोकव, अगर केन्ची जुमेरी या कोई बड़ी बुदी गल भोथी त अवं तुशुही शुनेथो। 15 पन तुशुशो इलज़ाम त सिर्फ खाली गल्लां केरो ते नव्वां केरो ते तुशे कानूनेरे बारे मां आए, ते अवं न ज़ैनी, किजोकि अवं एन गल्लां केरो हाकिम बनाने न चेई।” 16 ते गल्लियो हुक्म दित्तो कि एन तखते करां बेइरोवं कडे। 17 तैखन तैनेई सेब्वेई प्रार्थना घरेरो प्रधान सोस्थिनेस इन्साफेरे तखतेरे सामने कुटो, पन गल्लियोए एन गल्लां केरि किछ भी परवाह न कमाई। 18 पौलुस काई दिहाड़े कुरिन्थुस नगरे मां राव, ते फिरी तै विश्वासी दूलान करां चलो जेव ते किखिया मां अपनि मिनत पूरी केरनेरे लेइ अपने दोगेरी टिड बनाई। ते बादे मां समुन्दरी ज़िहाजे मां सीरिया इलाके जो चलो जेव, ते प्रिस्किल्ला ते अक्विला भी तैस सेइं साथी थियां। 19 ज़ैखन तैना इफिसुस नगरे मां पुजे त पौलुसे प्रिस्किल्ला ते अक्विला तैडी छडां, ते पौलुस एककी प्रार्थना घरे मां जेव ते यहूदन सेइं बेंस केरने लगे। 20 ज़ैखन तैन लोकेई तैस कां मिनत की, “कि तू हेजू किछ दिहाड़े असन कां बिशा।” त पौलुसे तैन सेइं मन्नु, 21 पन ज़ैखन पौलुस तैदां चलो त तैनी तैन सेइं वादो कियो, “अगर परमेशेरी मर्ज़ी भोइ त अवं फिरी तुसन कां एज्जेलो।” ते फिरी पौलुस ज़िहाजे मां चेट्तां इफिसुसे जो चलो जेव। 22 ते तै सिर्फ सारिया नगरे मां ज़िहाजे मरां ओस्सो त तैनी यरूशलेम नगरे मां गोइतां तैन केरि कलीसियारे लोकन सेइं मिलने जेव, ते फिरी तै अन्ताकिया नगरे मां अव। 23 अन्ताकिया नगरे मां किछ छिर बितनेरे बाद तै तैदां चलो जेव, ते गलातिया ते फ्रूगिया इलाकां केरे सब चलन मज़बूत केरतो जेव। 24 अपुल्लोस नव्वेरे अक यहूदी थियो, तैसेरू ज़र्म सिक्न्दरिया नगरे मां भोरू थियूं, तै बडो ज्ञानी मैन्हु थियो, ते पवित्रशास्त्रेरे बारे मां बडो ज्ञानकार थियो, तै इफिसुस मां अव। 25 तैनी प्रभुएरे बत्तरी शिक्षा शिखोरि थी, ते लगातार यीशुएरे बारे मां ठीक-ठीक शुनातो ते शिखालतो थियो, पन तै सिर्फ यहून्नारे बपतिस्मे तगर ज्ञानतो थियो। 26 तै प्रार्थना घरे मां बेधड़क चारे ज़ोने लगे, पन प्रिस्किल्ला ते अक्विला तैसेरी गल्लां शुन्तां, तैनेई ते अपने घरे नीयो, ते परमेशेरी बत्तारे बारे तैस होरू भी रोड़े चारे ज़ोवं। 27 ज़ैखन तैनी थापू कि पार ओस्तां अखाया इलाके जो गाए ते विश्वासी दूलाएई तैस हिम्मत दित्ती, ते तैद्वेरे चलन जो चिट्ठी लिखी, कि एस सेइं रोड़ेचारे मिलाथ, ते तैनी तैडी पुजतां तैन केरि बडी मद्दत की, ज़ैनेई अनुग्रहेरे वजाई सेइं विश्वास कियोरो थियो। 28 किजोकि तै बडे ज़ोरे शोरे सेइं यहूदन सेइं बेंस केरतां खुल्ले आम पवित्रशास्त्रे सेइं साबत केरतो थियो, कि यीशु ही मसीह।

19 ज़ैखन अपुल्लोस कुरिन्थुस नगरे मां थियो, त पौलुस बेइए सारे इलाकन मेंई इफिसुस नगरे मां अव, तैसेरी तैडी होरे भी काई चलन सेइं मुलाकत भोइ। 2 तैनी तैन पुच्छू, “कुन विश्वास केरते बार तुसन पुड पवित्र आत्मा उतरोरि थी?” तैनेई जुवाब दित्तो, “असेई त पवित्र आत्मारो बारे मां शुनेरू भी नई।” 3 तैखन पौलुसे ज़ोवं, “फिरि तुसेई कोस किसमेरो

बपतिस्मो नीयो?" तेनेई जुवाव दितो, "यूहन्नारो।" 4 पौलुसे ज़ोव, "यूहन्ना त तैन लोकन बपतिस्मो दितो ज़ैनेई पापन करां मनफिराथ, ते यूहन्ना इस्त्राएली लोकन ज़ोव, ज़े मेरे बाद एजनेबालोए, तैस पुड़ विश्वास केरा, ज़े मसीह आए।" 5 एन शुन्तां तेनेई प्रभु यीशु मसीहेरे नव्वे सेइं बपतिस्मो नीयो। 6 ते ज़ैखन पौलुसे तैन पुड़ हथ रखे त पवित्र आत्मा तैन पुड़ उतरी, त तैना अलग-अलग भाषा केरने लगे, ते भविष्यवाणी केरने लगे। 7 एना सब लगभग 12 मैन्हु थिये। 8 फिरि पौलुसे प्रार्थना घरे मां गेइतां दलेइ महीन् तगर बडे निडर भोइतां परमेशरेरे राज़ेरे बारे मां लोकन सेइं बेंस केरने समझाने लाव। 9 पन तैन मरां किछ सकत दिलेरे भोइ जे, ते तेनेई विश्वास केरनेरे बजाहे इन्कार कमाव, ते एस पंथेरे बारे मां बुरु ज़ोने लगे, एल्हेरेलेइ पौलुस तैन करां कनारे भोइ जेव, ते चले भी कनारे कियो ते तुरन्नुसेरे सुकुले मां बेंस केरतो ते तैन शिखालतो राव। 10 दूई सालन तगर एरू भोतू राव, एडी तगर कि आसिया इलाकेरे रानेबाले कुन यहूदी ते कुन यूनानी सेम्भेई प्रभुएरू बच्चन शुनु। 11 ते परमेशर पौलुसेरे ज़िरिये सेइं बडां-बडां कम्मां ते चमत्कार हिरातो थियो। 12 एडी तगर कि पौलुस ज़ैस रूमाले सेइं या फटके सेइं हथ लातो थियो, त तैना बिमारन पुड़ छडते थिये, त तैना बिमार बेइज्जोते थिये, ते अगर तैन पुड़ भूतां केरो सैयो भोतो थियो, त तैना लोक ठीक भोते थियो। 13 पन किछ यहूदी मडद ज़ैना फुक-फक केरते थी, त एन केरने लगे कि, ज़ैन पुड़ भूतां केरो सैयो भी भोए तैन पुड़ यीशुएरे नव्वे इन ज़ोइतां फुक फक देने लाए, "ज़ैस यीशुएरो प्रचार पौलुस केरते, अवं तैसेरी कसम देताई।" 14 यहूदी प्रधान याजक ज़ेसेरू नवं स्क्कवा थियूं, तैसेरां सत मट्टां थियां, तैना एन्ने कम्मां केरतां थियां। 15 ते भूते जुवाव दितो ते ज़ोव, "अवं यीशु मसीह भी ज़ानताई ते पौलुसे भी ज़ानताई, पन तुस कौन आथ?" 16 तैखन ते मैन्हु ज़ैस पुड़ भूतेरो सैयो थियो, तैन यीशुएरे नव्वे सेइं फुक-फक देने बालन जो पेव, ते तैना अपने कळ्जे मां केरतां एत्रे कुट्टे कि तैना ज़ख्मी भोइतां नगनगे तेइं नशथे। 17 ज़ैखन इफिसुस नगरेरे रानेबाले यहूदन ते यूनानी लोकन एस गल्लरो पतो लगो, त तैना डेरि जे, ते प्रभु यीशु मसीहेरी बडयाई की। 18 ते ज़ैनेई विश्वास कियोरो थियो, तेनेई एइतां अपने-अपने बुरे कम्मां केरो इकरार सेम्भी केरे सामने कियो। 19 ते केही लोकेई ज़ैना जेइ केरते थिये, तैना किताबां सैरेई एन्तां सेम्भी केरे सामने फुकी, ते ज़ैखन तैन किताबां केरि कीमतारो हिसाब लाव त कोइ 50000 चेंदरे सिकन करां जादे थी। 20 एन्चरे प्रभुएरो वचन बडे तकडे चारे फैलतो जेव ते भारी राव। 21 एन गल्लरो केरे बाद पौलुसे फैसलो कियो, अवं मकिदुनिया ते अखाया इलाकां केरे विश्वासी लोकन सेइं मिलतां यरूशलेम नगरे जो गेइ, ते तै ज़ोव, "यरूशलेम नगर मां गेइतां रोम नगर भी मां गानू भी ज़रूरीए।" 22 एल्हेरेलेइ अपने सैथन मरां तीमुथियुस ते इरास्तुस दूई मैन्हु मकिदुनिया इलाके जो एप्पु करां पेइले भेजे, ते एप्पु भी किछ चिरे आसिया इलाके मां राव। 23 तैस वक्ते तैस पंथेरे बारे मां हंगामो भोव। 24 किजोकि अक चेंदरो करीगिर थियो, तैसेरू नवं दिमेत्रियुस थियूं, ते अरतिमिस देबारे मन्दरेरी मूरती बनेइतां, कारीगिरन बडू कम दुवेरू थियूं, ज़ैस सेइं तैन केरो बडी बुपार च़ल्लोरो थियो। 25 तैनी एन कम ज़ान्ने बाले सारे कारीगिर अकोट्टे कमाए ते ज़ोने लगो, "हे मेरे हलाव असां इन कम केरतां बडे पेंडसे कमातम। 26 पन तुस हेरतथ ते शुन्तन कि एना दूई मैन्हु पौलुसेरे ज़ेरे केन्चरे इफिसुस नगरे ते लगभग सारे आसिया इलाकेरे नगरन मां लोकन टपलाने लोरेन ते ज़ोतन कि ज़े हथेरां केरि कारीगिरीए, तै ईश्वर नई। 27 डर एस गल्लरो नई, सिर्फ कि इश्शे पैशेरी बदनामी भोली, बल्के पुरानी देवी अरतिमिस, ज़ै आए तैसारे मन्दर भी घटया समझ गालू, ज़ेसेरी पूजा सारे आसिया इलाके मां ते सारे दुनियाई मां केरतन, तैसेरी इज्जत भी खतम भोइगानिये।" 28 ज़ैखन तैन लोकेई शुनु त तैना सरकी सेइं भेरोई जे, ते ज़ोरे-ज़ोरे नहरे देने लगे, "इफिसी केरि देवी अरतिमिस, महान आए।" 29 हेरते-हेरते सारे नगर मां हलचल मेचि जेई, लोकेई गयुस ते अरिस्तर्खुस, मकिदुनी इलाके ज़ैना पौलुसे सेइं साथी ओरे थिये, तैना दलेइतां घसीटते तमाशो हेरनेरी ठैरी जो दौवडते ने। 30 पौलुस भी सभाई मां गानू चातो थियो पन चलेई तै रोको। 31

ते आसिया इलाकेरे हाकिमन मरां भी तेसेरे काई दोस्तेई तैस जो बिस्तार भेजतां ते मिनत केरतां ज़ोव, कि तमाशो हेरने न गेइयां किजोकि तैडी बडी खतराए। 32 तैडी पैन्चयती मां खलबली मञ्चोरी थी, किजोकि किछ लोक नहरे देते थिये, ते बडे लोकन पतो न थियो कि तैना तैडी किजो अकोट्टे भोरेन। 33 तैखन तेनेई सिकन्दर, ज़ै यहूदी लोकेई खडो कियोरो थियो, भीडी मरां किछ लोकेई तै अग्रोवं कियो, ते सिकन्दर हथे सेइं इशारो केरतां लोकां केरे सामने जुवाव देने चातो थियो। 34 पन ज़ेरो लोकन पतो लगो कि ए यहूदी आए, त सब ज़ोरे-ज़ोरे लगभग दूई घंटन तगर चिन्डां मारने लगगे, "इफिसुस नगरेरे देवी अरतिमिस, महान आए।" 35 तैखन एक्की मञ्ची नगरेरे लोकन चुप करेइतां ज़ोने लगो, "कि इफिसुस नगरेरे रानेबालो कौन न ज़ाने कि इफिसुस नगर लोक अरतिमिस देबारे मन्दरे, ते एसेरे मूरतरो बडो रखवालेन, ज़ैन अम्बरेरां बिछडोरो थी। 36 ज़ैखन एना गल्लां केरे खलाफ केन्चे किछ न ज़ोव त ठीक थियूं कि तुस चुप राथ ते बगैर सोच सेमझतां किछ न केरेथ। 37 तुसेई ज़ैना मैन्हु इडी आनोरेन तेनेई न मन्दरे लुटेरूए न इश्शी देबारे खलाफ तुहीन कियोरीए। 38 अगर दिमेत्रियुस ते एसेरे कारीगिरन केन्ची पुड़ दाओ केरनोए त आदालतरू दार खुल्लूए, ते हाकिम भी आन, ज़ैनी तुस एक्की होरि पुड़ दाओ केरि सकतथ। 39 पन अगर तुस होरि कोन्ची चीज़ेरे बारे मां पुछनू चाओ त तैसेरो फैसलो भी पंचेइती मां कियो गालो।" 40 मीं इस गल्लरो डरे कि अगर हाकिम इस हंगामेरे बारे मां शुनेलो त ज़ोलो कि अस रोमी सराकारारी खलाफज़जी केनेरी कोशिश केरने लोरेम, ते अस एत्रे लोकां केरे अकोट्टे भोनेरो कुन जुवाव देमेले। 41 एन ज़ोनेरां बाद तैनी पैन्चैयत खतम कमाई।

20 ज़ैखन हंगामो मुक्को त पौलुसे चले कुजाए ते तैन केरो होसलो बधव, ते तैन बिश्शा ज़ोइतां मकिदुनिया इलाके जो च़लो जेव। 2 तैस सारे मुलखे मांमेई चेलन होसलो देइतां यूनान इलाके मां (ज़ैस जो अखाया इलाको भी ज़ोतन) अव। 3 तैडी तै दलाई महीने राव, ते ज़ैखन ते समुन्दरी जिहाजे मां सीरिया इलाकेरे पासे गानेबालो थियो, त यहूदी केरे लोडरेई तैस बत्तां मारनेरी साज़िश बनाई, तैस पतो लगो त एल्हेरेलेइ तैनी एन रोडू समझू कि मकिदुनिया इलाके मांमेई जो सीरिया इलाके जो गाए। 4 बिरिया नगरेरे रानेबाले पुरुसंरू मट्टू सोपत्रुस, ते थिस्तसलुनीकि मांमेई अरिस्तर्खुस ते सिकुन्दुस ते दिरबे नगरेरां गयुस, ते तीमुथियुस ते आसियारो लुखिकुस ते युफिमस आसिया इलाके तगर असन सेइं साथी च़ले जे (लूका भी तैन सेइं साथी थियो)। 5 पन तैना अग्रोवं गेइतां त्रोआस नगरे मां असन बलगते राए। 6 ते अस अखमीरी रोटी केरे तिहारो बाद फिलिप्पी नगरे मरां सफर केरतां पंच दिहैडी मां त्रोआस नगरे मां तैन कां पुजे, ते रात दिहैडी तैडी राए। 7 हफतेरे पेइले दिहाइ असां प्रभु भोजेरे लेइ अकोट्टे भोए, ते पौलुसे होरसां तैइं अग्रोवं गानू थियूं, त एल्हेरेलेइ तै तैन सेइं गल्लां केरने लाव ते एध्डी राती तगर तैन शिक्षा देने लाव। 8 दोपरे ज़ैडी असां सब अकोट्टे बिश्शारे थियो, ते तैडी काई दीये बलते थिये। 9 त अक नौजवान देरी मां बिशोरो थियो, ते तैसेरू नवं यूतुखुस थियूं, तै पौलुसेरो प्रचार ठडी तगर शुन्तां तैस निडल आई, ते दलेइयोवं छतरां उन्डो खिरको, ते तै मेरि जेव। 10 पौलुस बुन अव ते तै नौजवान दलेइतां तैस सेइं लिपटो ते ज़ोने लगो, "कि डरा नन्ना ए ज़ीतोए।" 11 फिरि तेनेई बा गेइतां सेम्भेई मिलतां रोटी खाइ, ते फिरि दलेकडोने तगर बच्चन शुनाने लगो, तैखन तै तैइं च़लो जेव। 12 लोकेई तै नौजवान ज़ीतो घरजो नीयो, ते तैन बडी खुशी भोइ। 13 असां अगगर गेइतां जिहाजे मां सुवार भोइ जे, ते अस्सुस नगरे जो च़ले जे, ताके तैडी पौलुसे भी जिहाजे मां च़ाढ़म, किजोकि पौलुसे पेइले पैदल गानेरो बिस्तार कियोरो थियो। 14 ज़ैखन तै असन अस्सुस नगरे मां मैल्लो त तै असेई जिहाजे मां च़ाढ़ो ते असां मितुलेन नगरे मां आए। 15 तैइं असां जिहाजे मां सुवार भोइ जे ते अस खियुस जज़ीरेरे सामने पुजे, ते अग्री दिहाइ असां सामुसे मां पुजे, ते होरसां अस मीलेतुस नगरे मां आए। 16 पौलुसे थापेरू थियूं, कि अवं इफिसुस नगरे मां उतरेलो, किजोकि तै आसिया इलाके मां जादे वक्त बीतानो न थियो चातो,

किजोकि तै जल्दी मां थियो, कि अगर भोइसखे, त ते पिन्तेकुस्त तिहारे दिहाड़े यरूशलेम नगरे मां राए। 17 जैखन अस मीलेतुस नगरे मां ओस्से, त पौलुसे इफिसुस नगरेरे कलीसियारे बुजुर्गन जो बिस्तार भेजो कि तैना एज्जन। 18 जैखन तैना तैस कां आए, त तैनी तैन सेइं जोवं, तुस ज्ञानतथ कि पेइले दिहाड़ेरां जैखन अवं आसिया इलाके मां पुजो, अवं तेइसेरो दंतो अज तगर हर वक्त तुसन सेइं साथी केन्चरां राव। 19 मतलब बडे नेरमी सेइं, ते ऐंखरू बछोड़ी-बछोड़ी, ते तैन अजमैइश मां जैना यहूदी केरि चलेकी सेइं मीं पुइ एई, अवं प्रभुएरी सेवा केरतो राव। 20 ते जैना-जैना गल्लां तुशे लेइ फैइदेरी थी, तैना मीं तुसन सेइं बगैर केन्चरे डरे तुसन सेइं ज़ोई छेड्डी, ते बल्के जैन किछ भी शिखालू दिले सेइं ते घर-घर गेइतां शिखालू। 21 बल्के अवं यहूदी लोकां ते यूनानी लोकां केरे दुइयां केरे सामने गवाही देताई कि तैना परमेशरेरे सामने पापन करां मन फिजन, ते इशेशे प्रभु यीशु मसीह पुइ विश्वास केरन। 22 हेरा हुनी अवं पवित्र आत्मा री गल मेन्तां यरूशलेम नगरे जो गाताई, ते मीं पतो नई कि तैडी मीं पुइ केरि-केरि गुजरेली। 23 अवं सिर्फ एतू ज्ञानताई कि पवित्र आत्मा मीं हर नगर मां एन जोती राई, कि बन्धना ते मुसीबत मेरे लेइ तियारन। 24 पन मेरी जान, मेरे लेइ कोई कदर कीमत न रख्खे, त बरसा अवं एन चाटाई कि मेरी दौड़ पूरी भोए ते तैस सेवार्इ पूरी केरि, जै मीं परमेशरेरे अनुग्रहेरे खुशखबरी पुइ गवाही देनेरे लेइ प्रभु यीशु करां मैल्ली। 25 ते हुनी अवं ज्ञानताई, कि तुसेईं अवं जैन मां परमेशरेरे अनुग्रहेरी खुशखबरी हर पासे शुनातो राव, त मीं फिरी न लाएले। 26 एल्हेरेलेइ अवं तुसन साफ-साफ जोई छडताई, कि जैना लोक यीशु पुइ विश्वास केरने बगैर मरेले, त अवं तैन केरे जिमेवार नई। 27 किजोकि अवं बगैर केन्ची डेरों तुसन शिखालतो राव, कि परमेशरेरी मर्जी तुशे लेइ कुने। 28 बरसा अपनो ते सारे विश्वासी लोकां केरो खियाल रखा, जेसेरे लेइ तुस पवित्र आत्मा रे तरफां चुनोरेथ, कि परमेशरेरी कलीसियारी रखवाली केरा, जै लोक तैनी अपने खूने सेइं घिन्नोरेन। 29 अवं ज्ञानताई कि मेरे गानेरां बाद झूठे उस्ताद मारने बालां गिदां केरे जेरे तुसन मां एज्जले, ते जेन्चरे तैना भैट्टन मारतन तेन्चरे तैना झूठे उस्ताद तुसन नुकसान पुजाले। 30 बल्के तुसन मरां भी एरे लोक खडे भोले जैना सच दलोइ मरोइ केरतां छडेले, ताके चलन अपने पासे केरन। 31 एल्हेरेलेइ बींजे राथ ते याद रखा, कि अवं दलाई साल लेरां दंतो रात दिहेड़ी हर एककी तैन खबरदार केरतो राव। 32 हुनी अवं तुसन परमेशरेरे, ते तैसेरे अनुग्रहेरे वचनेरे सुपुई केरताई, कि जै तुसन विश्वासे मां मजबूत केरि सकते, ते तुसन तैस जागिरारो हकदार बनेइ सकते, जेसेरो वादो तैनी कियोरोए जैनी तुस पवित्र कियोरोथ। 33 मीं केन्चरे सोन्ने चेंदारू या लिगां केरू लालच नई कियेरू। 34 तुस एण्यू ज्ञानतथ कि मीं अपने हेथेइं सेइं अपने ते अपने सैथी केरि हर अक ज़रूरत पूरी कियोरीए। 35 मीं तुसन सब किछ केरतां हिराव, कि एन्चरे सेइं कमजोरन समैली सकतम, कि प्रभु यीशु मसीहेरी गल्लां याद रखम, “कि देनू नेने करां जादे धने।” 36 एन गल्लां केरे बाद पौलुसे ज़ैधू केरे भारे बिशतां तैन सेबन्धन सेइं साथी प्रार्थना की। 37 तैना सब गले मिलतां लेरां देने लगे, ते पौलुसे फुम्मड़ी देने लगे। 38 खास केरतां तैना इस गल्लां सेइं दुखी थी, जैना तैनी ज़ोरी थी, कि तुस मीं फिरी कधी न लाएले, ते तैनेई ते जिहाजे तगर पज़ाव।

21 जैखन असां तैन करां चले जे त समुन्दरेरे सफर शुरू कियूं, त सिधे बत्तां कोस जज़ीरे मां आए, ते होरसां अस रुदुस मां पुजे, ते फिरी तैट्टां पतरा जज़ीरे मां चले जे। 2 ते अक जिहाज फीनीके इलाके जो गांतू मैल्लू, त असां तैस पुइ चेटतां सफर शुरू कियूं। 3 जैखन इशशी नजर साइप्रस जज़ीरे पुइ पेई, त अस तैस बांए हथ्ये ओसैलातां सीरिया इलाके जो चले जे, सूरू नगरे मां ओस्से, किजोकि इशेशे जिहाजे तैडी किछ बोझ उसासनो थियो। 4 तैडी असन चले मैल्ले ते तैन कां असां सत दिहाड़े राए। तैनेई पवित्र आत्मा रे जोने मुताबिक पौलुसे यरूशलेम नगरे मां गानेरे लेइ ठाको। 5 सत दिहेइना बाद कुआन्शां मट्टन समेत नगरेरे बेइर तगर साथी आए, ते समुन्दरेरे बन्ने पुजतां असेई ज़ैधू केरे भारे बिशतां प्रार्थना की। 6 फिरी असां

तैन करां अलग भोए त जिहाजे मां चेटतां चले जे, ते तैना भी अपने-अपने घरजो चले जे। 7 जैखन असां सूरू नगरे मरां सफर पूरू केरतां पतुलिमयिस मां पुजे, ते विश्वासी दूलांन जो नमस्कार केरतां तैन सेइं साथी अक दिहाड़ी राए। 8 ते होरसां असां तैट्टां चेलतां कैसरिया नगरे मां आए, ते फिलिप्पुस खुशखबरी प्रचार केरनेबालेरे घरे जे ते तैडी राए, जै सत्तन मरां अक थियो। 9 तैसेरी चेत्रे कुवैरी कुइयां थी, ते तैना भविष्यवाणी केरती थी। 10 जैखन अस तैडी काई दिहाड़े राए, त तैडी अक नबी थियो, जेसेरू नवं अगबुस थियूं, ते यहूदिया इलाकेरां ओरो थियो। 11 तैनी असन कां एइतां पौलुसेरे मजे सेइं अपने हथ पाव बंधे ते जोने लगे, “पवित्र आत्मा इन जोतीए कि जैस मैनेरू इन मज आए, तैस यरूशलेम नगरेरे यहूदी इसेरे जेरे बंधेले, ते गैर कौमां केरे लोकां केरे हवाले केरेले।” 12 जैखन असेई एना गल्लां शुनी, त असेई ते होरि लोकेई पौलुसे कां मिनत की, कि यरूशलेम नगरे मां न गेइयां। 13 पन पौलुसे जुवाब दित्तो, “तुस एन कुन केरने लोरेथ? तुस किजो लेरां देइ-देइ मेरो दिल दलोइने लोरेथ? अवं यरूशलेम नगरे मां प्रभु यीशु मसीहेरे नंवे सेइं सिर्फ बेंधोनेरे लेइ नई बल्के मरनेरे लेइ भी तियार आई।” 14 जैखन तैनी न मन्नू त असां चुप राए, “कि प्रभुएरी मर्जी पूरी भोए।” 15 किछ दिहाइना बाद असां सफरिरी तियारी केरने लगे, ते फिरी असां यरूशलेम नगरे जो चले जे। 16 कैसरिया नगरेरे किछ चले असन सेइं साथी चले, ते असेई मनासोन नंवेरो साइप्रसरो अक पुरानो चेलो साथी आनो कि अस तैसेरे घरे रहम। 17 ते जैखन असां यरूशलेम नगरे मां पुजे, त इशेशे विश्वासी दूला बडे खुशी सेइं असन सेइं मिलने आए। 18 होरसां असां पौलुसे साथी नेइतां याकुबे सेइं मिलने जे, तैडी सब बुजुर्ग अकोट्टे भोरे थियो। 19 तैखन तैनी नमस्कार केरतां, जैना-जैना कम्मां परमेशरे तैसेरी सेवारे ज़िरिये सेइं गैर कौमन मां कियोरां थी, अक-अक केरतां सब ज़ोआं। 20 तैनेई इन शुन्तां परमेशरेरी तारीफ की, ते फिरी पौलुसे सेइं जोने लगे, “हे दूला तू ज्ञानतस, कि यहूदन मरां हज़ारेई लोकेई विश्वास कियोरोए, ते तैना सब मूसेरे कानूने पुइ अमल केरने मां मघनन। 21 ते तैन तेरे बारे शिखालेरू कि तू गैर कौमन मां रानेबाले सारे यहूदन ए शिक्षा देंतो ओरोस, कि मूसा नेबेरे कानूनेरे शारने, ते अपने मट्टां केरो खतनो न केरा, ते न यहूदी केरे रीतन पुइ न चला। 22 त फिरी कुन कियूं गाए? लोकेई ज़रूर शुनेले कि इडी ओरोस। 23 एल्हेरेलेइ जैन अस तीं सेइं जोतम, तैन केर। इशेशे इडी चेत्रे मैनु आन जैनेई मिनत मगोरीए। 24 तू ते तैन एण्यू सेइं साथी ने ते तैन सेइं मिलतां अपनो आप शुद्ध केर, ते तैन केरो खर्चो भी दे, ताके तैना अपनो दोग्गरी टिंड बनान। तैखन सेबन्धन पतो लानोए कि जैना गल्लां तेरे खलाफ फैलेवरिन, तैन केरि कोई बुनीयाद नई, ते तू एण्यू भी सच्चे दिले सेइं मूसेरे कानूने पुइ अमल केरतस। 25 ते जैडी तगर तैन गैर कौमां केरो सवाले, कि जैनेई विश्वास कियोरोए, तैन केरे बारे मां असेई पेइले फैसलो केरतां लिखतां भेजू, कि तैना मूरतन कां बलिदान कियेरू मास ते खूने करां ते गलचैटी देइतां मारोरे जानवरां केरे मासे करां परहेज केरन, ते बदमाशी न केरन। 26 होरसां पौलुसे तैना मैनु साथी ने, ते तैन सेइं साथी अपने आप शुद्ध केरतां मन्दरे मां जेव, ते खबर दित्ती कि तैन केरे शुद्ध भोनेरे बाद चढ़तल चढ़नेरे दिहाड़े केइस पूरे भोनेन।” 27 जैखन शुद्ध भोनेरे सत दिहाड़े पूरे भोनेबाले थिये, त आसिया इलाकेरे यहूदेई पौलुस मन्दरे मां लाव त लोक भडकाए, ते तैस टलेइतां चिन्डां मारने लगे। 28 “हे इस्राएली लोकव इशशी मद्दत केरा, ईए ते मैनुए, जै हर ठैरी लोकन इशेशे कानूनेरे खलाफ ते मन्दरेरे खलाफ शिक्षा देंतो रहते, ते एनी एसेरां अलावा गैर कौमां केरे लोक इशेशे मन्दरे मां एन्तां तै पवित्र ठार अपवित्र कराते।” 29 तैनेई एन एल्हेरेलेइ थियो कि तैनेई पौलुस इफिसुस नगरेरे रानेबाले त्रुफिमस सेइं साथी लाहोरो थियो, ते समझते थिये कि पौलुसे ते ज़रूरी मन्दरे मां नीयोरो भोनीए। 30 तैखन सारे नगर मां हलचल मेचि जेई, ते मैनु देवइतां जम्हां भोए, ते पौलुस टलेइतां मन्दरे मरां घसीटतां बेइर आनो, ते लूशी दारां बंद कियां। 31 जैखन तैना तैस मारनेरी कोशिश केरने लवरे थिये, त फौजी टोलरे सरदारे कां खबर पुजी, कि बडे लोकेई यरूशलेम नगरे मां खलबली मचोरीए। 32 तैखन तैना सिपेहिन ते सूबेदारन एन्तां तैन कांजो दौड़ो, ते तैनेई फौजी टोलरे सरदारे ते

सिपाही लेइतां पौलुस मारनो कुटनो बंद कियो। 33 फौजी टोलरे सरदारे नेडे गेइतां पौलुस अपने कब्जे मां कियो, ते तैस दूई शांगलेइं सेइ बंधनरो हुकम दित्तो, ते फिरी तैनी पुच्छू, “ए मैन्हु कौने ते एनी कुन कियेरू आप?” 34 तैस भीड़ी मां किछ लोक चिन्दां मारते थिये, ते एत्री शौर मचौरी थी, कि तैस पूरो पतो न लगे ते तैनी हुकम दित्तो, कि पौलुसे किल्लै मां पुजाथ। 35 जैखन पौलुस सिपाहीयेइं पेवडन उबरो चलेवरो थियो, त लोकां केरे वजाई सेइं सिपाहीयेइं पौलुस उबरो छुइतां नेव। 36 सारे लोक जैना पौलुसे पती पेवरे थिये, तैना चिन्दां मारते थिये, “एस मार।” 37 पौलुसे सिपाही किल्लै मां पुजाने बाले थिये, त तैनी फौजी टोलरे सरदारे सेइं जोंव, “कुन मीं अजाजत के कि अवं तीं सेइं किछ जोंई?” ते तैनी पुच्छू, “तू यूनानी भाषा ज्ञानतस?” 38 कुन तू तै मिश्र मुलखेरो रानेबालो नई, जैनी किछ चिरे पेइले सरकारी खलाफत कियोरी थी, ते 4000 मैन्न जैन कां हथियार थिये तैना जंगले मां नीयोर थिये? 39 पौलुसे जोंव, “अवं त यहुदी आई, ते तरसुस नगरेरो राने बालोई, जैन किलिकिया इलाकेरू मशूर नगर, अवं तीं कां मिनत केरताई मीं लोकन सेइं गल केरने दे।” 40 जैखन तैनी अजाजत दित्ती, त पौलुस पेवडन पुइ खडो भोइतां लोकन जो हथ्ये सेइं इशारो कमाव कि चुप रान। ते जैखन तैनेइं चुप कमाई त पौलुसे इब्रानी भाषाईं मां ज़ोनू शुरू कमाव:

22 “मेरे ह्वाव ते बुजुर्गाव, मेरी गल शुना, ज़े अवं अपनि सफैई मां पैश लोरोई केरने।” 2 जैखन लोकेईं तैस करां इब्रानी भाषा ज़ोती शुनी त तैना चुप रेइजे, तैखन पौलुसे जोंव: 3 “अवं त यहुदी आई, ते अवं किलिकिया इलाकेरे तरसुस नगरे मां ज़रमो, पन इस नगर मां गमलीएल करां शिक्षा हासिल की, ते अपने दादा-पडदादां केरे कानूने ठीक तरीके सेइं शिखोरीए, ते अवं भी परमेशरेरे लेइ एरो मघन थियो, ज़ेरे अज़ तुस आथ। 4 मीं मडदन ते कुआन्शन बंधतां, ते कैद केरतां, ई पंथ इड़ी तगर सताए, ते तैना माराए भी। 5 एप्यू महायाजक ते सब बुजुर्ग एस गल्लरे गवाह आन, कि मीं दमिश्क नगरे मां रानेबाले यहुदी ह्वाव केरे लेइ चिट्टी एन्हीरी थी, ते अवं तैड़ी एस नीती सेइं ज़ोरो थियो, ते ज़ैना तैड़ी भोन तैन सज़ा देनेरे लेइ बेन्थां यरूशलेम नगरे जो नेही।” 6 “अवं जैखन सफर केरते-केरते दमिश्क नगरेरे नेडे पुजो, त तै दुपाहरां केरो मौको थियो। ते अम्बरेरां अक बड़ी लौ आई ते मेरे चेत्रे पासन बलने लगी। 7 ते अवं तल्ले बिछड़ी जेव, ते मीं अक आवाज़ शुनी, ज़े मींजो ज़ोने लोरी थी, हे शाऊल, हे शाऊल तू मीं किजो स्तातस? 8 त मीं पुच्छू, हे प्रभु तू कौन आस? त तैनी मींजो जुवाव दित्तो, अवं यीशु नासरी आई, ज़ैस तू सतातस। 9 मेरे सैथेई लौ त लाई पन तैन कोई गल न समझी, कि तै आवाज़ मीं सेइं कुन लोरीए ज़ोने? 10 त मीं पुच्छू, हे प्रभु अवं कुन कम्मई, प्रभुए जोंव, उठ दमिश्क नगरे मां गा तैड़ी तीं ज़ैन तेरे केरनेरे लेइ रखेरुए तैड़ी तीं सेइं जोंव गालू। 11 मेरे सैथेई अवं हथ्येरां टलेइतां दमिश्क नगर मां पुजाव। किजोकि तैस बडे महिमारे वजाई सेइं मीं किछ न लेइयोवं।” 12 “तैड़ी अक मैन्हु हनन्याह नव्वेरो कानूनेरे मुताबिक भक्त मैन्हु अवं, ते तैट्टेरे यहूदन मां बडो इज़तदार थियो। 13 तै मीं कां खडो भोइतां ज़ोने लगे, हे ह्वाव, शाऊल, अपनि एछ्छी खोल्ल, ते मेरी एछ्छी तैखने खुल्ली जेई, ते अवं तैस लहने लगे। 14 तैखन तैनी जोंव, इश्शे लुजुर्गां केरे परमेशरे तू चुनोरोस, ताके तू तैसेरी मज़ी पूरी केरस ते मसीह बास ते तैसेरी गल्लां शुनस। 15 किजोकि तू सेरी लोकन मां तैसेरो गवाह भोलो, ते तैन ज़ोलो कि तीं कुन लाहेरुए ते कुन शुरूए। 16 हुनी चिर किजो लातस? उठ, ते बपतिस्मो ने ते तेरे पाप माफ़ भोन।” 17 “ते जैखन अवं यरूशलेम नगरे मां वापस अवं, ते अवं मन्दरे मां प्रार्थना केरने लोरो थियो, त मीं दर्शन लावं। 18 ते तै लाव ते एन ज़ोतू शुनू कि लुश केर, ते यरूशलेम नगरे मरां लूशी निस, किजोकि एना लोक मेरे बारे मां तेरी गवाही कबूल न केरेले। 19 मीं जोंव, हे प्रभु एना लोक ज्ञानतन कि अवं हर प्रार्थना घरे मां गातो थियो, ते केन्चरे अवं तेरे मन्ने बालन कैद केरतो ते कुटतो थियो। 20 ते जैखन तेरे गवाह रिताफनुस मारने लोरे थिये, त अवं भी तैड़ी थियो, ते तैसेरे मारने मां खुशी थियो। ते अवं मारने बालां केरां लिगइं पहरतो थियो। 21 ते

प्रभुए मीं सेइं जोंव, “गा अवं तीं गैर कौमन कां दूर-दूर भेजेले।” 22 सारे लोक तैसेरी गल्लां शुन्ने लोरे थिये, पन जैखन ते इड़ी तगर पुजो त सारे लोक ज़ोरे-ज़ोरे चिन्दां मारने लगे, “ए ज़ोतो खनेरे काबल नई!” एस मार। 23 जैखन लोकां केरि शौर ते चिन्दां चेलती रेइ, त तैना चोगे शैरतां धूइ आसमाने उडारने लगे। 24 त फौजी पलटनरे सरदारे पौलुस किल्लै मां नेनेरो हुकम दित्तो, “एस कोडेइं सेइं बाथ ते एसेरू बियांन धिन्ना ताके पतो लगे, कि लोक किजो चिन्दां मारने लोरेन।” 25 जैखन तैना कोडेइं सेइं बानेरे लेइ पौलुस रेसी सेइं बंधो, त तैनी एक्की सूबेदारे सेइं जोंव ज़े तैड़ी नेडे थियो। “कुन अक रोमी नगरेरे मैन्हु बगैर कसूरे झुसनो जेइजे?” 26 जैखन तैनी सूबेदारे एन शुनू त तै फौजी पलटनरे सरदारे कां जेव, “तू कुन ज़ोतस? ए त अक रोमी मैनूए।” 27 फौजी पलटनरे सरदारे पौलुसे कां एइतां पुच्छू, “कुन तू रोमीस?” तैनी जोंव, “हाँ।” 28 इन शुन्तां फौजी पलटनरे सरदारे जोंव, “कि मीं रोमी भोनेरी पदवी बडे पेंडसे देइतां हासिल कियोरीए।” ते पौलुसे जोंव, “पन अवं त ज़मनेरो रोमी।” 29 जैना लोक पौलुसेरू बियांन धिन्ने बाले थिये, तैना नेश्शी जे, फौजी पलटनरे सरदारे भी इन बुइतां कि ई रोमीए, ते तैनी ते बंधो, ते डेरि जेव। 30 होरसां ते ठीक-ठीक ज़ान्नेरी इच्छा सेइं कि यहुदी तैस पुइ किजो दोष लातन, एल्हेरेलेइ तैनी तै खोल्लो, ते प्रधान याजक ते सारी महासभा अकोट्टी केरनेरो हुकम दित्तो, ते पौलुस बुन गेइतां तैन केरे सामने खडो कियो।

23 पौलुसे महासभारे लोकां केरे पासे रोडेचारे तेकतां जोंव, “हे ह्वाव अवं बेइडे नेक नीती सेइं परमेशरेरे हुकमां केरे मुताबिक जिन्दगी गुजारतो ओरोई।” 2 महायाजक हनन्याह पौलुसेरी एना गल्लां शुन्तां पौलुसे कां खडे भोरे लोकन हुकम दित्तो, कि एसेरे तुतरे पुइ थप्पड बाथ। 3 पौलुसे तैस सेइं जोंव, “हे पाखंडी, परमेशर तीं बाए। तू इड़ी बिशोरोस कि मूसरे कानूनेरे मुताबिक मेरो इन्साफ केरस, ते कुन तू मूसरे कानूनेरे खलाफ बानेरो हुकम देतस?” 4 ज़ैना तैड़ी खडखडे थिये, त तैना ज़ोने लगे, “कुन तू परमेशरेरे महायाजकेरी तुहीन केरतस?” 5 पौलुसे तैन सेइं जोंव, “ह्वाव मीं पतो न थियो, कि ए महायाजक, किजोकि लिखोरूए, तू अपने लोकां केरे प्रधाने जो बुरु न जो।” 6 पौलुस ज़ानतो थियो, कि तैन मां किछ सदकी भी आन, ते किछ फरीसी लोक भी आन ते तै महासभाईं मां ज़ोरे सेइं ज़ोने लगे, “हे ह्वाव अवं त फरीसी लोकां केरे खानदेनी मरां आई, ते मीं पुइ एनेई एल्हेरेलेइ मुकदमो चलेवरोए, कि अवं उमीद रखताई कि मुइडे फिरी जीते भोले।” 7 पौलुसेरू एन ज़ोते फरीसी ते सदकी लोकन एप्यू मामेइं लडाईं शुरू भोइजेइ, ते सेभन एप्यू मामेइं खल बनो। 8 किजोकि सदकी ज़ोतन कि मुइडे जीते नई भोने, ते न स्वर्गदूतन ते न कोई आत्मा आए, पन फरीसी लोक एन दुइये गल्लन पुइ विश्वास केरतन। 9 तैखन तैना बैस केरने लगे, शास्त्री लोकन मरां ज़ैना फरीसी लोकन मां थिये, तैना खडे भोइतां लडाईं केरतां ज़ोने लगे, “असां इस मैन्हु मां कोई कसूर न लहम, अगर केन्ची आत्मा या स्वर्गदूते एस सेइं कोई गल कियोरीए त फिरी कुन भोवं?” 10 गल एत्री बेइदी जेई, कि फौजी पलटनरे सरदारे बुइजु, कि एरू न भोए कि पौलुसेरे टोटे-टोटे बनान, त तैनी हुकम दित्तो कि बुन गाथ ते पौलुसे ज़बरदस्ती तैट्टां कडाते ते किल्लै मांजो आना। 11 तैसेरे राती प्रभु यीशुए पौलुसे कां एइतां जोंव, “हे पौलुस हिम्मत रख जेन्चरे तीं यरूशलेम नगरे मां मेरी गवाही दित्तोरीए, तेन्चरे तीं रोमे मां भी गवाही देनी भोली।” 12 होरसां झेइं किछ यहुदी मैनेई मिलतां फैसलो कियो, ते कसम कमाई कि ज़ांतगर असां पौलुसे कल्ल न केरम, तांतगर किछ न खाम ते न पीम। 13 एस साज़िशी मां 40 मैन्न करां जादे थिये। 14 तैना प्रधान याजकन ते बुजुर्गन कां जे, ते ज़ोने लगे, “असन पुइ लानत भोए, अगर असां पौलुसे मारनेरे बगैर किछ खाम या पीम, असेई त तैस खतम केरनेरी कसम कमेवरीए। 15 एल्हेरेलेइ तुस सब महासभा मां मिलतां फौजी पलटनरे सरदारे कां दरखुवास देथ, कि तै पौलुसे लोकां केरे सामने आने, ताके एस मुकदमेरी सारी हकिकत फिरी पतो चले, एस करां पेइले पौलुस इड़ी पैश कियो

गाए, असां तियार आम, कि तैस मारम।” 16 पन ज़ैखन पौलुसेरे बेड़नारे मट्टे एस साजशरो पतो लगी, त तैनी किल्लै मां गेइतां पौलुसे पतो दित्तो, कि तैना लोक तैस मारनो चातन। 17 तैखन पौलुसे सूबेदारन मरां अक कुजाव, ते तैस सेइं ज़ोवं, “कि इस जवाने फौजी पलटनरे सरदारे कां नेथ, किजोकि ए किछ ज़ोनेरे लेइ ओरोए।” 18 बरसा, तैनी तै फौजी पलटनरे सरदारे कां साथी नीयो, ते ज़ोने लगी, “अवं पौलुसे ज़ै कैदी आए, तैनी अवं कुजाव, ते तैनी मीं कां दरखुवास कियोरीए, कि इस जवाने अवं तीं कां एन्ही, किजोकि ए किछ तीं सेइं ज़ोनु चाते।” 19 फौजी पलटनरे सरदारे तैस जवानेरो हथ टलेइतां ते कनारे ज़ेरे नीयो ते तैस पुच्छने लगी, “तू मीं सेइं कुन ज़ोनु चातस?” 20 तैनी जवाने ज़ोवं, “यहूदी लीडरेई अकोट्टे भोइतां तीं कां दरखुवास देनेरो फैसलो कियोरोए। कि तू पौलुसेरी पुछ गन केरनेरे बहाने तैस महासभा मां आनस। 21 तू तैन केरि गल न मेन्ना, किजोकि कोई 40 मैन्न करां जादे यहूदी तैस पुइ हमलो केरनेरी कोशिशी मां आन, तैनेई कसम कमेवरी कि ज़ांतगर असां पौलुसे न मारम तांतगर असां किछ खाम या पीम, त असन लानत भोए, हुनी तैना तियारन, सिर्फ तेरे वादेरो इंतज़ारे।” 22 फौजी पलटनरे सरदारे ते जवान वापस भेजो, ते तैस ज़ोवं कि गा, “एना गल्लां केरो ज़ेना तीं मीं सेइं ज़ोई, होरि केन्ची पतो न लोड़ी लागोरो।” 23 तैखन तैनी दूई सूबेदार कुजाए, ते तैन सेइं ज़ोवं, “तुस 200 सिपाही ते 70 सुवार ते 200 भाले च़लानेबाले तियार रख्खा, तैनेई राती 9 बजेई कैसरिया नगरे मां गानूए। 24 ते पौलुसेरे लेइ घोड़े तियार रखा, ताके तै गवर्नर फेलिक्स कां हफाज़ती सेइं पुजाव गाए।” 25 ते फौजेरे प्रधाने अक चिट्ठी एस तरिकेरी लिखी। 26 “श्रीमान फेलिक्स गवर्नर क्लौदियुस लूसियासे जो नमस्कार। 27 ए तै मैनुए, ज़ै यहूदेई टलातोरो थियो, ते एस तैना मारनेबाले थिये, त अवं सिपाही नेइतां साथी जेव, ते तै छुटाव, किजोकि मीं पतो थियो, कि तै अक रोमेरो रानेबालोए, त फौजी पलटन नेइतां छुटाव। 28 लिहाजा एन ज़ान्नेरी केरनेरे लेइ कि तैना तैस पुइ कुन इलज़ाम लातन, मीं तै तैन केरि महासभा मां पैश कियो। 29 ते पतो लगी, कि तैन केरो इलज़ाम तैन केरे कानूनेरे मुताबिक एसेरे खलाफ कोई एरो इलज़ाम नई, कि जेसेरे ज़िरिये सेइं असां तैस कैद केरम या मौतरी सज़ा देइ सखम। 30 मीं पतो लगगोरोए कि एसेरे खलाफ कोई साज़िश भोइ राहोरीए, ते मीं ए जल्दी तीं कांजो भेजोरोए, ते मीं तैस पुइ दाओ केरनेबालन भी जोरूए, कि तैना भी तीं कां अपनो मुकदमो पैश केरन।” 31 सिपाही, फौजी पलटनरे सरदारेरे हुक्मेरे मुताबिक पौलुसे पुइ सेइं साथी नेइतां रातो रात अन्तिपत्रिस नगरे मां पुजाव। 32 होरसां दीसां घोड़ सुवारन तैस सेइं साथी अग्री-अग्री गानेरो हुक्म दित्तो, ते तै एप्पू किल्लै मांजो वापस च़लो जेव। 33 ज़ैखन घोड़ सुवार कैसरिया नगरे मां पुज्जे त तैनेई गवर्नर कां चिट्ठी देइतां पौलुस तैस कां पैश कियो। 34 गवर्नर चिट्ठी पेइतां पुच्छू, “ए कौस इलाकेरो रानेबालोए?” ज़ैखन तैस पतो लगी कि ए किलिकिया इलाकेरो रानेबालोए। 35 त तैनी ज़ोवं, कि अवं तेरो मुकदमो तैखन शुनेलो, “ज़ैखन तीं पुइ दोष लाने बाले भी इडी हाज़र भोले।” तैखन तैनी हुक्म दित्तो कि पौलुसे हेरोदेसेरे पहरे मां रख्खा।

24 पंचे दिहैइना बाद हनन्याह महायाजके किछ बुजुर्ग ते तिरतुल्लुस नंवेरो वकील साथी कैसरिया नगरे मां पुजे, ते गवर्नर कां पैश भोइतां पौलुसेरां खलाफ फरयाद कमाई। 2 ज़ैखन पौलुस पैश कियो त तिरतुल्लुस इलज़ाम लेइतां ज़ोने लाव, “हे महान फेलिक्स, तेरे वजाई सेइं अस बड़े खुशी सेइं रातम, ते तेरे ज़िरिये सेइं इस कौमरी केत्री बुईई सुधेरी गैतिन। 3 एन अस हर ठेरी हर किसमे सेइं मन्तम। 4 पन हुनी अवं तेरो जादे वक्त नेनो न चैई, अवं तेरी मिनत केरताई कि इश्शी अक दूई गल शुन। 5 असेईं लाहेरूए कि ई मैन्हु बडो फसाद केरनेबालोए, ई दुनियारे सारे यहूदन मां फितनाबाजे, ते नासरी कुपंथेरो प्रधान आए। 6 एनी त मन्दरे भी अशुद्ध केरनेरी कोशिश की, ते एल्हेरेलेइ असेईं ए टलेइतां एस पुइ अस अपने कानूनेरे मुताबिक मुकदमो च़लानो चाते थिये। 7 पन फौजी पलटनरो सरदार लूसियास असन करां ज़बरदस्ती नेही जेव। 8 ते इस पुइ दोष लाने बाले तीं

कां हाज़र भोनेरो हुक्म दे। इन सेबभी गल्लां केरे बारे मां अस एउ पुइ दोष लातम, तू एप्पू सज़ ज़ान।” 9 यहूदी लोकेई भी तैस सेइं साथी भोइतां ज़ोवं, कि एना गल्लां केन्वां भोइ सेकतिन। 10 ज़ैखन गवर्नर पौलुसे बियांन देनेरे लेइ इशारो कियो, त पौलुसे जुवाब दित्तो, “अवं ज़ानताई कि तू केही सालां केरो देंतो इस कौमरो इन्साफ केरनेबालो आस, एल्हेरेलेइ अवं अपनि सफाई तीं कां पैश केरताई। 11 तू एप्पू पतो केरि सखत्स कि अवं 12 दिहाड़े पेइले यरूशलम नगरे मन्दरे मां आराधना केरनेरे लेइ जोरो थियो। 12 मेरे मुदेइयेइ अवं मन्दरे मां केन्ची सेइं भी बेंस केरतो नई लाहोरो, ते प्रार्थना घरे मां ते नगर मां इरां उरां लड़ाई केरतो भी नई लाहोरो। 13 हुनी एना इलज़ाम ज़ैना मीं पुइ लाने लोरेन, ते तेरे सामने साबत न केरि सखे। 14 हॉ अवं इकरार ज़रूर केरताई कि ज़ैस पंथे एना कुपंथ जोतन, अवं तैसेरे मुताबिक अपने दादे-पड़दादां केरे परमेशेरी आराधना केरताई, ते ज़ैन किछ मूसेरे कानूने ते नेबी केरि किताबी मां लिखोरूए, तेन सेबभन पुइ मेरो विश्वास आए। 15 अवं परमेशेरे पुइ तैए भरोसो रखताई, ज़ै तैना रखतन कि धर्मी लोकन ते पापी लोकन परमेशर मुइदन मरां ज़ीतो केरेलो। 16 ते एल्हेरेलेइ मेरो ज़मीर परमेशेरे कां भी ते इन्साने कां भी बेइलज़ाम राए। 17 केही सालां केरे बाद अवं अपने गरीब लोकन दान पुजाने, ते च़ढतल चाइने ओरो थियो। 18 तैखन एनेई अवं मन्दरे मां लाव, त अवं शुद्ध भोनेरी रीत पूरी केरने लोरो थियो, बगैर लोक अकोट्टे केरतां ते बगैर कोन्ची हंगामे इन कम केरतो लाव। पन तैना आसिया इलाकेरे किछ यहूदी थी, ते तैन जाईज थियुं। 19 अगर मीं किछ गलत कियोरू भोथू त तैनेई इडी तेरे सामने मीं पुइ दोष लोरो लोइतो थियो, किजोकि तैनेई एप्पू लावरूए कि मीं मन्दरे मां कुन कियुं। 20 इना लोक ज़ैना इडी ओरेन, एना ज़ोन कि ज़ैखन अवं महासभा मां पैश भोरो थियो, त एनेई मीं मां कुन कसूर लाहोरो थियो? 21 सुवाए इस गल्लेरे कि ज़ै मीं बड़े ज़ोरे सेइं अवाज देइतां जोरी थी, कि अवं ई विश्वास केरताई परमेशेरे मुइदन ज़ीति केरते, एल्हेरेलेइ मीं पुइ मुकदमो च़लाने लागोरेन।” 22 फेलिक्स ज़ै इस पंथेरे बारे मां ठीक-ठीक ज़ानतो थियो, एन जोइतां मुकदमो बंद कियो, “ज़ैखन फौजी पलटनरो सरदारे लूसियास इडी एज्जेलो त अवं तुश्शे सामने इस मुकदमेरो फैसलो केरेलो।” 23 तैनी सूबेदार हुक्म दित्तो, कि पौलुसे पेरेहे मां रख्खा, ते तैसेरे दोस्तन मरां केन्ची भी तैसेरी सेवा केरनेरे लेइ न रोकथ। 24 केही दिहैइना बाद गवर्नर फेलिक्स अपनि कुआन्श दुसिल्ला ज़ै यहूदी थी, ते तैस सेइं साथी कैसरिया मां अवं, तैनी पौलुसे जो समाद भेजो ते यीशु मसीह पुइ विश्वास केरनेरे बारे मां गल्लां अनाए। 25 ज़ैखन पौलुस एन ज़ोवं, कि परमेशेरी नज़री मां कुन रोइए ते अपने इच्छा कैबू केरनेरे बारे मां ते एजनेबाले परमेशेरे इन्साफेरे बारे मां भी ज़ोवं, त फेलिक्स डेरि जेव, ते ज़ोने लगी, “हुनी तू गा, अगर फुर्सत मैलेली त अवं तीं फिरी तीं कुजेइलो।” 26 तैस पौलुसे करां किछ मैलेनेरी उमीद थी, एल्हेरेलेइ तै तैस बार-बार कुजातो थियो, ते तैस सेइं गल्लां केरतो थियो। 27 पूरे दूई सालना बाद पुरकियुस फेस्तुस, फेलिक्सेरे ठेरी गवर्नर बनो, ते फेलिक्से यहूदी खुश केरनेरे लेइ पौलुस कैदखाने मां रख्खो।

25 फेस्तुस तैस इलाके मां पुजतां टलेइ दिहैइना बाद कैसरिया नगरेरां यरूशलम नगरे मांजो जेव। 2 ज़ैडी प्रधान याजकेई ते यहूदी लीडर तैस कां एइतां पौलुसेरे खलाफ दोष लाने लगे। 3 तैना तैस कां मिनत केरने लगे, कि लुशी पौलुसे यरूशलम नगरे मां हाज़र भोनेरो हुक्म दे, द्रासले मां तैनेई तैस बत्तां मारनेरी साज़िश कियोरी थी। 4 फेस्तुसे जुवाब दित्तो, “पौलुस कैसरिया नगरे मां कैदे, ते अवं भी तैडी लुशी गाने बालोई।” 5 फिरी ज़ोवं कि तुसन मरां किछ खास अधिकार रखनेबाले मीं सेइं साथी च़लन, “अगर सच्चे तैनी कोई गलत कम कियेरू भोए त तैस पुइ दोष लान।” 6 ते फेस्तुस अठ दश दिहाड़े यरूशलम नगरे मां राव, ते फिरी कैसरिया नगरे जो च़लो जेव, तैडी ते दुइयोवं दिहाड़े आदालतरी तखते पुइ बिश्शो, ते हुक्म दित्तो कि पौलुसे हाज़र केरा। 7 ज़ैखन पौलुस हाज़र भोव, त यरूशलम नगरेरे यहूदी लीडरेई तैस चुफुरतां घेरो देइतां बड़े झूठे इलज़ाम लाने शुरू

किये। पन कोई पक्कू सबूत न मैल्लू। 8 पौलुसे अपनि सफाई देते बार यहूदी केरे झूठे इलज़ामा केरे लेइ इन्कार कियो, ते ज़ोवं, “मीं त यहूदी केरे काननेरे खलाफ कोई कसूर नई कियोरो, ते न मन्दरेरे खलाफ ते न महाराजरे खलाफ कोई कसूर कियोरोए।” 9 पन फेस्तुस एप्पू यहूदी लीडरन खुश केरनेरे लेइ पौलुसे पुच्छू, “तीं यरूशलेम नगरे जो गानू मन्जुरे, ताके अवं एस मुकदमेरो फैसलो तैडी केरि?” 10 पौलुसे ज़ोवं, “अवं इडी महाराजरे इन्साफेरे तखतेरे सामने खड़ो आई, ते मेरे मुकदमेरो फैसलो इस्से ठैरी भोरो लोइते, ज़ैडी रोमी मैनेरो इन्साफ भोरो लोइते, तू एप्पू भी रोडेवारे ज्ञानतस कि मीं यहूदी केरो कोई कसूर नई कियोरो। 11 अगर अवं कुसुरवार आई त मौतीर सज़ारे काबल आई त मेरो मरनेरो इन्कार नई, पन अगर ज़ैना झूठे इलज़ामा यहूदी मीं पुड़ लाने लगौरेन ते अगर तैना झूठेन त केन्ची हक नई कि मीं तैन केरे हवाले केरे। ते अवं इडी महाराजो कां बिनती केरताई, कि मेरो इन्साफ इडी कियो गाए।” 12 तैखन फेस्तुस सल्लाकारन करां मुशोरो केरतां जुवाब दित्तो, “तीं महाराजो कां बिनती कियोरीए त तू महाराजो कां गालो।” 13 किछ दिहैइना बाद अग्रिप्या राजो ते तैसेरी निकडी बेडन बिरनीके कैसरिया नगरे मां एइतां फेस्तुसे सेइ मुलाकात की। 14 तैन केरे बड़े दिहाड़े तैडी राजेरे बाद फेस्तुसे पौलुसेरे बारे मां राजे ज़ोवं, “अवं मैन्हु आए, ज़े फेलिक्स केद कियोरोए। 15 ज़ैखन अवं यरूशलेम नगरे मां थियो, त प्रधान याजक ते यहूदी बुजुर्ग तैस पुड़ दोष लगे लाने, कि एस सज़ा दित्ती गाए। 16 पन मीं तैन ज़ोरू थियू, कि रोमी केरे दस्तूरेरे मुताबिक कोई मैन्हु सज़ा देनेरे लेइ हवाले न कियो गाए, ज़ांतगर तैस अपने मुदेइ केरे सामने तैन इलज़ामा केरे बारे मां अपनि सफाई पैश केरनेरो मौको न दित्तो गाए। 17 एल्हेरेलेइ ज़ैखन यहूदी लीडर इडी आए, त मीं ठढ न लाई, पन होरसां इन्साफेरे तखते पुड़ बिश्तां हुकम दित्तो, कि पौलुस आदालती मां आनो गाए। 18 ज़ैखन तैसेरे मुदेइ अपनो दाओ पैश केरनेरे लेइ खडे भोए त, तैनेई कोई एरो इलज़ामा तैस पुड़ न लाव, ज़ेसेरी बारे मां अवं समझतो थियो। 19 पन अपने फिरकेरे बल्के तैन केरि लड़ाई तैन केरे अपने धर्मरे केन्ची यीशु नव्वेरे मैनेरे बारे मां थी। ते मेरि जेवरोए, पन पौलुस तैस जो ज़ीतो ज़ोते। 20 अवं बेडि उलझनी मां राहोरोइ कि केन्चरे एन गल्लां केरो पतो केरि, एल्हेरेलेइ मीं पौलुसे पुच्छू, कि तीं यरूशलेम नगरे मां गानू मन्जुरे, ताके एन गल्लां केरो फैसलो तैडी भोए? 21 पन पौलुसे बिनती कमाई कि इस मुकदमेरो फैसलो महाराजो कां लोइते भोरो, एल्हेरेलेइ मीं हुकम दित्तो कि ते महाराजो कां गाने तगर इडी पाबंद राए।” 22 अग्रिप्या राजे फेस्तुसे सेइ ज़ोवं, “अवं भी एस मैनेरी गल्लां शुननी चाताई।” तैनी जुवाब दित्तो, “तू तैसेरी गल्लां कालां शुनी सखत्स।” 23 होरसां अग्रिप्या राजो ते कने बिनतीके बेडि शांनी सेइ आए, ते फौजी पलटनेरे सरदारैरे ते नगरेरे खास लोक सभा मां दाखल भोए, फेस्तुसे हुकम दित्तो कि पौलुसे हाज़र केरा। 24 फिरि फेस्तुस ज़ोवं, “हे अग्रिप्या राजा ते बाकी लोकव तुस इस मैन्हु हेरतथ एसेरे खलाफ सैरी यहूदी कौमां मीं कां यरूशलेम नगरे मां भी ते इडी भी चिन्डां मैरतां दरखुवास कियोरी थी, कि ए मैन्हु ज़ीतो रखनो ठीक नई। 25 पन मीं पतो लगे कि एनी कोई एरू गलत कम नई कियेरू, कि ए कल्ल कियो गाए, एल्हेरेलेइ एनी इडी बिनती कियोरीए, त अवं ठीक समझतां कि एस रोम नगरे मां भेज़ी। 26 पन मीं तैसेरे बारे मां कोई ठीक गल न मैल्ली, कि महाराजो जो लिखी, एल्हेरेलेइ मीं ते तुशे सामने ते खास केरतां अग्रिप्या राजा, तेरे सामने पैश कियोरोए, ताके पुछु गन केरनेरे बाद अगर कोई खास गल भोए त अवं लिखी। 27 किजोकि केन्ची कैदी भेज़ते बार तैसेरे इलज़ामा अगर अवं केन्ची न शुनेई त मेरी लेइ ठीक नई।”

26 अग्रिप्या राजे पौलुसे जो ज़ोवं, “तीं अपने बारे मां ज़ोनेरी अज़ाज़ते।” तैखन पौलुस अपनो हथ्ये सेइ इशारो केरतां अपनि सफाई पैश केरने लगे। 2 “हे अग्रिप्या राजा, अवं अपनो आप खुश किस्मत समझताई, कि तेरे सामने खड़ो भोइतां यहूदी लोकां केरे प्रधानां केरे इलज़ामा केरे खलाफ अपनि सफाई पैश केरने लगोरोइं। 3 खास केरतां तू सारे यहूदी केरि रीति

रुवाजरे बारे मां ज्ञानतस, ते एल्हेरेलेइ अवं तीं कां मिनत केरताई, कि तू सबरी सेइ मेरी गल शुन। 4 यहूदी मीं रोडेवारे ज्ञानतन कि पेड़ले अवं अपने लोकन मां ते यरूशलेम नगरे मां ते मेरी जवनेरो चालचलन केरहो थियो। 5 तैना पेड़ले देते मीं ज्ञानतन ते अगर चान त मेरे हके मां गवाही देइ सकतन, कि अवं अपने पंथेरे मुताबिक फरीसी भोइतां अपने धर्मरे सच्चे पंथे सेइं ज़िन्दगी गुज़रतो ओरोई। 6 परमेशेरे इश्शे दादे-पड़दादन सेइं अक वादो कियोरो थियो, मीं उमीदे कि ते पुरो भोलो, तैस उमीदारी वजाई सेइं मीं पुड़ मुकदमो वल्लेवरोए। 7 एस वादेरे पूरे भोनेरी उमीद इश्शे 12 केरे 12 गोत्रने, एल्हेरेलेइ तैना दिले सेइं रात दिहाडी परमेशेरी सेवा केरते रातन। हे अग्रिप्या राजा मेरी इस उमीदेरे लेइ यहूदी मीं पुड़ दोष लातन। 8 ज़ां कि परमेशर मुइदन फिरि ज़ीते केरते, तुस इस गल्ली पुड़ विश्वास कि न केरथ? 9 “पेड़ले अवं भी समझतो थियो, कि यीशु नैसरेरे नव्वेरी हर तरीके मुखालफत केरनि मेरो फरजे। 10 एल्हेरेलेइ अवं यरूशलेम नगरे मां एन्ने केरतो राव, मीं प्रधान याजकन करां अज़ाज़त एन्तां बड़े परमेशेरे सेवक कैद केरतां छड़े, ते ज़ैखन तैना मारे गाते थिये, त अवं भी तैडी खलाफत केरतो थियो। 11 अवं प्रार्थना घरन मां गातो थियो, ते तैन केरि तुहीन केरतो थियो। ते लोकन यीशुएरे खलाफ तुहीन केरनेरे लेइ मजबूर केरतो थियो। ते मसीही लोकां केरि मुखालफत केरने सेइं मीं एत्री खुशी भोती थी, कि अवं दूर-दूर नगरन मां गेइतां तैन सतातो थियो।” 12 “एक्की बार प्रधान याजकन करां अधिकार एन्तां एस्से कम्मरे लेइ दमिश्क नगरेरे सफर केरने लगोरो थियो। 13 त हे राजा अवं हेजु बत्तां थियो, त मीं दुपहरां केरे मौके अम्बेरां अक लौ एंडती लाई, ज़े दिहाड़ेरी लौई करां भी जादे थी, ते तै इश्शे चेत्रे पासन चमकने लगी। 14 असां सब ज़मनी पुड़ बिछड़ी जे, ते मीं अक आवाज़ शुनी, ज़े मीं सेइं इब्रानी भाषाईं मां एन ज़ोने लगोरी थी। कि हे शाऊल हे शाऊल तू मीं किजो स्तातस? मीं सेइं लड़ाई केरनि तेरे लेइ बेकारे। 15 “त मीं जुवाब दित्तो, हे प्रभु तू कौन आस, त प्रभुए मीं जुवाब दित्तो अवं यीशु आई ज़ैस तू सतातस? 16 पन उठ ते अपने पवन पुड़ खड़ो भो, किजोकि मीं तीं एल्हेरेलेइ दर्शन दित्तोरू, कि तीं अवं अपनो सेवक बनेइं, ते ज़ैन किछ तीं लाहेरूए तू तैसेरो गवाह बनस। 17 अवं तीं तेरे लोकन करां ते गैर कौमन करां बचातो रेइलो अवं तीं तैन मां भेज़ताई। 18 ताके तू तैन केरि एछ्छी खोल्लस ते तैन आंधेरे मरां लौईं मां आनस ते कने शैताने करां छुटेइतां परमेशेरे पासे आनस, ताके तैना मीं पुड़ विश्वास केरन ते परमेशर तैन केरे पा माफ़ केरे, ते तैन लोकन मां शामिल भोन ज़ैना पवित्र कियोरेन, तैना विरासत हासिल केरन।” 19 ते एल्हेरेलेइ, “हे अग्रिप्या राजा मीं एस स्वर्गेरे दश्नियो इन्कार नई कमेवरो। 20 ते पेड़ले मीं दमिश्क नगरेरे लोकन मां ते फिरि यरूशलेम नगरेरे ते सारे यहूदिया इलाकेरे रानेबालो ते गैर कौमन भी प्रचार केरतो कियो। कि पापन करां मनफिराथ, ते परमेशेरे पासे फिरा ते अपने स्भावे सेइं साबत केरा कि तुसेईं पापन करां मन फिरावरोए। 21 एन्ने गल्लां केरे लेइ यहूदेईं अवं मन्दरे मां ट्लातो ते मारनेरी कोशिश की। 22 “पन अवं परमेशेरी किर्पाई सेइं अज़ तगर ज़ीतोई, ते सेब्भी निक्के बडुन कां अवं गवाही देताई, कि ज़ैना गल्लां अवं ज़ोताई कि ज़ैना नेबेईं ज़ोरी थी, ते मूसा नेबे भी ज़ोरी थी। 23 कि मसीह बड़ो दुख भोगेलो, ते सेब्भन करां पेड़लो मुइदन मरां ज़ीतो भोइतां यहूदी कौमी त गैर कौमां केरे लोकन बचालो ज़े लौओ ज़ेरो आए।” 24 ज़ैखन पौलुस एन ज़ोने लगोरो थियो, त फेस्तुस ज़ोरे सेइं ज़ोवं, “तू पागल भोइ जेव। जादे ज्ञाने सेइं तू पागल भोइजेवरोस।” 25 पौलुसे जुवाब दित्तो, “जनाब फेस्तुस साहब अवं पागल नई भोरो, अवं ज़ैन किछ ज़ोने लगोरोइं तैन सच्चे ते ज्ञाने सेइं आए। 26 राजो भी ज़ेसेरे सामने अवं निडर भोइतां एन गल्लां ज्ञानते, ते मीं याकीने कि एन मरां कोई भी गल तैस करां छपोरी नई, किजोकि ए चमत्कार कोई एरो नई भोरो। 27 हे अग्रिप्या राजा कुन तू नेबी केरो, अवं ज्ञानताई कि तू मनतस?” 28 अग्रिप्या राजे पौलुसे सेइं ज़ोवं, “कुन तू थोडी ज़ेरि गल्लेई सेइं मीं तू मसीही बनानो चातस?” 29 पौलुसे जुवाब दित्तो, चाए थोडी ज़ेरि या जादे गल्लेई सेइं, “पन अवं त परमेशेरे कां प्रार्थना केरताई कि, न सिर्फ तू बल्के जेजे भी

अज़ मेरी गल्लां शुनी रावरेन सब मेरे ज़ेरे मसीही भोन, पन इन शंगलां केरे बबोर।” 30 तैखन अग्रिपपा राज़ो ते गवर्नर ते बिरनीके ते तैस सेइं साथी होंरे भी खड़े भोए ते चले जे। 31 ते बेइर निस्तां एककी होरि सेइं जोने लगे, “कि ए मैन्हु कोई एरू कम त नईं लोरो केरने, कि एस मौतरी सज़ा दिती गाए, या कैदखाने मां रख्खो गाए। 32 अग्रिपपा राज़े फेस्तुस सेइं ज़ोवं, अगर एनी मैने महाराज़े कां फरयाद न भोथी कियोरी त ए छुटी सकतो थियो।”

27 ज़ैखन फिस्तुस हाकिमेरे ज़िरिये ए बिस्तार बनो कि असां लोक जिहाज़े मां इतालिया जो गाम, त पौलुस त होंरे कैदी यूलियुस नंवे औगुस्तुस फौजी पलटनरे सरदारोंरे एककी सूबेदारोंरे सुपुर्द कियो। 2 असां अद्रमुलियुम नगरोंं एककी समुन्दरी जिहाज़े मां च़ेढ़तां आसिया इलाकेरे नेड़े ठेरी गानेबाले थियो, त अरिस्तर्खुस नंवे थिस्सलुनीके नगरोंरे अक मकिदुनी असन सेइं साथी थियो। 3 होरसां ज़ैखन जिहाज़ सैदा मां रुकी जेवं, त यूलियुसे पौलुसे पुड़ महरबानी केरतां तैस अपने दोस्तन सेइं मुलाकात केरनेरी अज़ाज़त दिती, ताके तैसेरे ज़िरिये सेइं पतो लगगे। 4 तैट्टां फिरी असां जिहाज़े मां च़ेढ़तां चले जे, ते साइप्रसेरे आडी मांमेइं निस्से, किजोकि हवा बड़ी ज़बरदस्त थी। 5 फिरी किलिकिया नगरे ते पंफूलिया नगरेरे नेड़े समुन्द्रेरी बत्तां निस्तां अग्रोवं चले जे, त लूसिया इलाकेरे मूरा नगर मां ओस्सो। 6 तैडी सूबेदारोंरे सिकन्दरिया नगरेरू अक जिहाज़ इतालिया इलाके जो चलेरू मैल्लू, तैनी असां तैस मां च़ाढ़े। 7 असां बड़े दिहाइन तगर बल्हे-बल्हे अग्रोवं चलेते राए, ते कनिदुस नगरेरे सामने पुज़े। पन तेज़ हवा चलने सेइं असन अग्रोवं गानेरी मुशकिल भोइजेइ, ते एल्हेरेलेइ असां सलमोनेरे सामने निस्तां क्रेतेरी आडी मां निस्से। 8 ते बेडि मुशकली सेइं समुन्द्रेरे बन्ने-बन्ने अग्रोवं चलेते शुभलंगरबारी नंवेरी एककी ठेरी पुज़े, ज़ैट्टां लसया नगर नेडू थियू। 9 तैडी असन केही दिहाड़े बीते, पैनेरे सफरे मां मुशकिल एल्हेरेलेइ भोती थी, कि छुटकारेरी दिहाड़ी तिहाररे बरतेरे दिहाड़ो बीतोरे थी, ते पौलुसे तैन एन जोइतां खबरदारी दिती, 10 “जनाब मीं एरू लग्गते कि इश्शू सफर बडू खतरनाक भोळू, कि न सिर्फ इश्शे माल सबाब ते जिहाज़े बल्के इश्शी जानी भी खतराए।” 11 पन सूबेदारोंरे कपताने ते जिहाज़ेरे मालिकेरी गल पौलुसेरी गल करां जादे मन्नी। 12 किजोकि ते बंदरगह ठंडारो मौसम कटनेरे लेइ रोडी न थी, एल्हेरेलेइ इश्शो फेसलो ए थियो, कि असां केन्ची तरीके अग्रोवं निस्सम ते असन उमीद थी, कि फिनिकस मां पुज़तां हीवतड़ेरो मौसम तैडी गुज़ेरी गामेले। ए क्रेते अक बंदरगह थी, ज़ैसेरां दारां क्षिण-पश्चिम ते उत्तर-पश्चिम पासे खुलतां थियां। 13 ज़ैखन दक्षिणी पासेरां हवा चलने लगगी, त तैनेईं सोचू कि तैन केरि मर्जी पूरी केरनेरे लेइ रोडो वक्ते, ते तैनेईं जिहाज़ेरू लैंगर तैट्टां खडू कियू, ते समुन्दरेरे बन्ने अग्रोवं चलेते जे। 14 पन लुशी अक बड़ी तूफानी हवा चली ज़ैस जो यूरकुलीन ज़ोतन। 15 ज़ैखन तैन जिहाज़ अपने पलेट्टे मां कियू, ते जिहाज़ ढलैवकां खाने लगू, ते असेईं जिहाज़ हावारे बहावे पुड़ छडू। 16 तैखन कौदा नंवेरो अक निकडो टैपू अव, त असेईं भी रुडते-रुडते ते डुंगी ज़ै जिहाज़ेरे पत्तोरों बंधोरि थी, त बेडि मुशकली सेइं कैबू मां की। 17 ते जिहाज़ेरे टोलरे मैनेईं ते उन्नी च़ेढ़तां जिहाज़ टलुटने करां बचानेरे लेइ रेस्सेइं सेइं बंधतां छडू। किजोकि तैन डर थियो, कि एरू न भोए, कि जिहाज़ सुरतिसेरे रेती मां डुबी गाए, एल्हेरेलेइ तैनेईं भारी सामान ओसालू ते जिहाज़े मां रुडते-रुडते चले जे। 18 ज़ैखन तूफानी हवाई सेइं जिहाज़ जादे ढलैवकां खाने लगू, त होरसां असेईं जिहाज़ेरो माल समुन्द्रे मांजो शारनो शुरू कियो, 19 टलेइयोंवं दिहाड़े तैनेईं जिहाज़ेरू सामान भी समुन्द्रे मांजो शैरी छडू। 20 त काई दिहाड़े न असेईं दिहाड़ो लाव ते न तारे ते तूफान भी मन्ना जादे ज़ोर केरने लगगोर थियो, ते असन बचनेरी हुनी कोई उमीद न राई। 21 रोटी खाने काई दिहाड़े भेरे थियो, एल्हेरेलेइ पौलुसे तैन मां खड़े भोइतां ज़ोवं, “ढूलाव अगर तुसेईं मेरू ज़ोनु मन्नोरू भोथू, ते क्रेते मरां अग्रोवं न ओरे भोथे, त ई नुकसान ते ई तकलीफ किजो भोनी थी? 22 “पन अवं तुसन कां मिनत केरताईं कि, हिम्मत न हारा तुसन मरां कोई भी न मरेलो, चाए जिहाज़ डुबी किना गाए। 23 किजोकि ज़ैस परमेशेरी अवं आराधना केरताईं, तैसेरो

स्वर्गदूत हीज राती मीं कां ओरो थियो। 24 ते तै ज़ोने लगगे, हे पौलुस डर नन्ना तू महाराज़े कां ज़रूर पैश भोलो ते परमेशर तेरी वजाईं सेइं एन सेबभी केरि जान बचालो, ज़ैना जिहाज़े मां तीं सेइं साथी आन। 25 एल्हेरेलेइ हे जनाब तुस हिम्मत रखा कि मेरे परमेशेरे ज़ैन किछ मीं सेइं जोरूए तैन्ने भोळू। 26 असां ज़रूर केन्ची टैपू पुड़ पुज़ी गामेले।” 27 च़ेवधोंवं राती ज़ैखन असां अद्रिया समुन्द्रे मां इरां उरां फिरते थियो, त जिहाज़े बाले मैनेईं अंदाजो लाव कि असां बन्नेरे नेड़े पुज़ी जोरेम। 28 तैनेईं पानी रेसी सेइं नापू त 37 मीटर निस्सू ते थोड़े अगगर गेइतां नापू त 27 मीटर निस्सू। 29 एस डरे सेइं कि कोस्कोई शफ़डी सेइं न बज़म, ते तैनेईं जिहाज़ेरे पैतरां पासे च़ेब्रे लैत्रां समुन्द्रे मां छडां ते ड़ेइरे लौअरे लेइ प्रार्थना केरने लगे। 30 जिहाज़ च़लानेबाले मुझाटां बेइरोवं निस्नेरे लेइ डोंगी उन्डी ओसाली। पन तैना जिहाज़ेरे एग्री पासेरां लैंगर पैनी मां छडूनु चाते थियो। 31 तैखन पौलुसे सूबेदारोंरे ते सिपेहिन सेइं ज़ोवं, “अगर इना लोक जिहाज़े मां न भोलो त तुश्शू लोकां केरू बचनु मुशकले।” 32 एल्हेरेलेइ सिपेहीयेइं ड़ुंगारी रेस्सी केटां समुन्द्रे मांजो शैरी दिती। 33 ड़ेइंग भोने करां पेइले पौलुसे सेबभन कां मिनत कमाई, कि तुस किछ रोटी खाथ। तैनी ज़ोवं, “तुस च़ेवधे दिहैडी केरे देंते बंचनेरे खियाले मां पवेरथ, ते तुस रोटी सेइं हुरोरे भी नईं। 34 अवं तुसन कां मिनत केरताईं कि तुस रोटी खाथ, किजोकि तुश्शे लेइ रोडू एन्ने कि याकीन केरा कि तुश्शो बाल बिंगो न भोलो।” 35 ज़ैखन तैनी एन ज़ोवं, त तैनी रोटी ट़लाई ते सेबभी केरे सामने परमेशेरु शुरू केरतां ट़लोडी ते खाने लगगे। 36 तैस करां लेइतां होरन भी हिम्मत आई, ते तैना भी रोटी खाने लगे। 37 असां सब मिलतां कोई 276 मैन्हु थियो, ज़ैना इस जिहाज़े मां सुवार थियो। 38 ज़ैखन तैनेईं रेज़तां रोटी खाइ त तैनेईं सारे गेहुं समुन्द्रे मांजो शारने शुरू कियो, ताके जिहाज़ पोल्लु भोए। 39 ज़ैखन दिहाड़ो निस्सो त तैनेईं तै ठार न पिशानी, पन अक ठार लाई ते तै पासो साफ थियो, तैनेईं बिस्तार कमाव कि अगर भोइसखे त असां जिहाज़ एस पुड़ च़ाढ़म। 40 बरसा लैंगर खोलतां समुन्द्रे मां छैडी दित्तू, ते पत्रवारां केरि रेसी भी ढिल्ली छैडी, एग्रीयों बादबान भी बा च़ैडी छुट्टो, ते एप्पू बन्नेरे पासे जो च़ले। 41 पन जिहाज़ खुशकी पुड़ गेइतां रेती पुड़ टिकी जेवं, ते जिहाज़ेरो एग्रीयों पासो रेती मां डुबी जेवं ते पैत्रीयों पासो छेल्लेईं सेइं बज़कने लगगे। 42 सिपेही केरि सल्लाह थी कि कैदन मारम ताके तैन मरां कोई तारी देइतां नेशी न गान। 43 पन सूबेदारोंरे पौलुसेरी जान बचानेरे लेइ एन न दित्तू केरने, ते हुकम दिता कि ज़ै तारी ज़ानते त तै पेइलो छाल मारे, ते खुशकी पुड़ पुज़तां अपने जान बचाए। 44 ते बाकी होंरे लेकडारे तखतन पुड़ ते जिहाज़ेरी होरि चीज़ां केरि मद्दती सेइं अपने जान बचाथ, ते बरसा सप एस तरीके सेइं खुशकी पुड़ ठीक ठाक पुज़ी जे।

28 ज़ैखन असां ठीक ठाक बन्ने पुड़ पुज़े, त असन पतो च़लो कि इस टैपू जो माल्टा ज़ोतन। 2 तैट्टेरे राने बालेईं असन सेइं बड़ो रोडो बर्ताव कियो, झड़ी लग्गोरि थी, ते ठंड भी बड़ी थी, तैनेईं अग बाली ते इश्शी बड़ी आदर कमाई। 3 पौलुसे कैडु केरो अक लेग्गू बनावं, ते ज़ैखन ते तैना कैडु अगगी मां छडने लगगे त आगारे सेके सेइं तैन केडन मरां अक सप निस्सो, ते पौलुसेरे हथ्थे सेइं पलेटोव। 4 ज़ैखन तैन लोकेईं सप पौलुसेरे हथ्थे सेइं पलेटोरो लव, त एप्पू मांमेइं ज़ोने लगे, “ए मैन्हु ज़रूर कोई खनी आए, ए समुन्द्रे मां गर्क भोने करां त बचरोए, पन इन्साफे ए ज़ीतो न राने न दितो।” 5 पन तैनी तैस सप्ये अगगी मांजो धिल देइतां दलट्टो, ते तैस किछ नुकसान न भोव। 6 तैना लोक बलाने लग्गोर थियो, कि एसेरी सारी जान एफरी गानीए ते ए मेरि गानोए, ते बडे च़िरे तार बलानेरे बाद पौलुसे किछ न भोवं, त तैना लोक सोचने लगे, “ए ज़रूर कोई देबतोए।” 7 तैस ठैरारे आसे-पासेरे टैपेरी प्रधान पुबलियुसेरी ज़मीन थी, तैनी असां अपने घरे ने ते ट़लाई दिहाड़े इश्शी आदर खातर की। 8 पुबलियुसेरे बाजी भुखार ते पैचसी सेइं बड़ो बिमार भोर थियो, ते पौलुसे तैस कां गेइतां तैसेरेलेइ प्रार्थना की, ते तैस पुड़ हथ रेखतां तै बड़ाव। 9 फिरी तैस टैपेरे बाकी बिमार लोक आए ते तैना ठीक भोइ जे। 10 तैन लोकेईं इश्शी बड़ी इज़ज़त की, ते असां तैट्टां अग्रोवं गानेरे

लेट तियार भोए, त तैनेई इश्शी जुकरतरी सैरी चीजां जिहाजे मां छैडी दिती। 11 इश्शू जिहाजे बिगडनेरे टलेइ महिना बाद असां सिकन्दरियारे एक्की जिहाजे मां चले जे, जैन ठंड मुकने तगर तैस टैपू मां रुकेरु थियूं, तैस मां यूनैनी केरि दूई अकोट्टी देबतेरी मूरतां बनोरी थी। 12 पेडले असां सुरकूसा नगरे मां पुजे, ते टलाई दिहाड़े तैडी राए। 13 तैट्टां असां चलते-चलते रेगियुम नगरे मां पुजे, ते होरसां दक्षिणी हवा चलने लगी ते असां होरसां पुतियुली नगरे मां पुजे। 14 तैडी असन किछ ढूला भी मैल्ले, तैनेई असां कुजाए ते असां तैडी सत दिहाड़े राए, ते तैसेरां बाद असां रोमे मां पुजे। 15 तैट्टेरे मसीही ढूलान पतो लगी, कि असां ओरेम त तैना असन अगराने अप्पियुसेरे चौके ते टलेइ धर्मशालन तगर आए, पौलुसे तैना लेइतां परमेशरेरु शुक्र कियूं ते तैस बडी हिम्मत भोइ। 16 जैखन अस रोम नगरे मां पुजे ते पौलुसे अजाजत मैल्ली, कि तै एक्की पैरहेदारी निगरेनी मां जैडी चाए गेइ सकते। 17 जैखन टलाई दिहाड़े बीते त पौलुसे यहूदी केरे प्रधान कुजाए, ते जैखन तैना अकोट्टे भोए त पौलुसे तैन सेइं ज़ोवं, “ढूलाव मीं अपनि कौमरे ते अपने दादे-पड़दादां केरि रसमरे खलाफ कोई कम नई कियेरु त फिर भी अवं पाबंद केरतां यरूशलम नगरे मां रोमी सरकारारे हवाले कियो। 18 तैनेई पुछु गन केरनेरे बाद अवं हथरां छडनो थियो। किजोकि मीं कोई एरु कम न थियूं कियेरु कि जैस सेइं मीं मौतरी सज़ा देथे। 19 पन जैखन यहूदेई मुखालफत की, त मीं महाराजे कां बिनती की। पन एल्हेरेलेइ नई कि अवं अपनि कौमी पुड कोई इलज़ाम लांनो चातो थियो। 20 एल्हेरेलेइ मीं एन रोडू समझू, कि तुसन सेइं मिलतां गल केरि, अवं इसाएलेरी एक्की उमीदी ज़े मसीह आए शांगलन सेइं बंधोरोई।” 21 तैनेई तैस सेइं ज़ोवं, “असन यहूदन करां न कोई चिटी मैल्ली ते न तैट्टां एजनेबाले इश्शे लोकेई तेरे बारे मां कोई खबर दिती, ते न तेरे खलाफ किछ ज़ोवं। 22 पन असां तेरे बारे मां ज़ाननू चातम, ए त असन पत्तोए, कि लोक सेइंभी ठैरन एस पंथेरे खलाफ गल्लां केरतन।” 23 तैखन यहूदी लोकेई पौलुसेरी गल्लां शुन्नेरे लेइ अक दिहाड़ी ठुवहलाई, जैखन तै दिहाड़ी आई, त लोक पेडले लोकन करां भी जादे अकोट्टे भोए। पौलुसे तैन परमेशरेरे राज़ेरे बारे मां समझाव, ते साथी यीशुएरे बारे मां मूसेरे कानूने ते नेबी केरे किताबन मरां तैन रोड़ेचारे समझेइतां झेझां करां इलोझी तगर गल्लां शुनातो राव। 24 किछ तैसेरी गल्लां शुन्तां मघन भोइ जे ते मन्नु ते किछेई विश्वास भी कियो। 25 जैखन तैना एप्पू मामेइं अक न भोए, त पौलुसे तैन गाने करां पेडले अक गल ज़ोई, “पवित्र आत्मारें ज़िरिये यशायाह नबी तुश्शे दादे-पड़दादां केरे बारे मां ठीके ज़ोरु थियूं।” 26 एन लोकन कां गा, ते एन ज़ो कि, “तुस शुन्ते त राले, पन समझेले न, ते तकते त राले पन पिशानेले न। 27 किजोकि एन लोकां केरे दिले मोट्टे भोरोरें, ते एना टोव्ने भोरोरें, ते एनेई अपनि एछ्छी निकोल कियोरिन। किजोकि एरु न भोए, कि एना लहन ते कन्न सेइं शुन्न ते दिले सेइं समझन, ते एना मेरे पासे फिरन ते अवं एन शिफ़ा देई। 28 “एल्हेरेलेइ अवं चाताई कि तुस ज़ानथ कि परमेशरेरी मुक्ति गैर कौमन कां भी भेजोरोए ते तैना तैस शुनेले।” 29 जैखन पौलुसे एन ज़ोवं, त यहूदी एप्पू मामेइं बेंस केरते तैट्टां चले जे। 30 पौलुस पूरे दूई सालन तगर क्रैइयेरे मुकाने मां राव, 31 ते ज़ै भी तैस सेइं मिलने एइतो थियो, पौलुस तैस सेइं मिलतो थियो, ते बेधड़क भोइतां परमेशरेरे राज़ेरी खुशखबरी शुनातो थियो, ते प्रभु यीशु मसीहरे बारे मां शिक्षा देंतो राव।

रोमियों

1 अवं पौलुस यीशु मसीहेरो दास आई, ते प्रेरित भोनेरे लेइ परमेशरे चुनोरोई, ते परमेशररी खुशखबरी प्रचार करेनेरे लेइ ठहरावरो आई। 2 जेसेरी तैने पेइले अपने नेबी केरे जिरिये पवित्रशास्त्रे मां, 3 अपने मट्टे इश्शे प्रभु यीशुएरे बारे मां वादो कियोरो थियो, जै जिसमेरे मुताबिक त दाऊदरे खानदाने मरां पैदा भोव। 4 ते पवित्र आत्मा रे जिरिये सेइं मुइदन मरां जीतो भोनेरे वजाई सेइं ते शक्ति सेइं परमेशरेरू मट्टु भोव। 5 जेसेरे जिरिये असन अनुग्रह ते प्रेरिताई मैल्ली; कि तैसेरे नंवे सेइं सब कौमां केरे लोक विश्वास केरतां तैसेरी मन्ना। 6 जैन मरां तुस भी यीशु मसीहेरे भोनेरे लेइ कुजोरेथा। 7 अवं ई चिट्ठी तुशे सेल्भी केरे नंवे लिखताई, जैना तुस रोम नगरे मां रातथ, ते परमेशररे ट्लारेथ, ते पवित्र भोनेरे लेइ चुनोरेथा। इश्शे बाजी परमेशर ते प्रभु यीशु मसीहेरे तरफां तुसन शान्ति ते अनुग्रह मैलतो राए। 8 पेइलो अवं तुशे सेल्भी केरे लेइ यीशु मसीहेरे जिरिये परमेशररू शुक्र केरताई, किजोकि तुशे विश्वास जै यीशु मसीह पुइ आए, तैसेरी चर्चा हर पासे भोने लोरो। 9 परमेशर जेसेरी सेवा अवं अपने पूरे दिले सेइं तैसेरे मट्टेरी खुशखबरी प्रचार केरतां केरताई, तै मेरो गवाहे; कि अवं तुसन कोस तरीके सेइं लगातर प्रार्थनाई मां याद केरताई। 10 ते लगातर अपने प्रार्थनान मां बिनती केरतो राताई, कि केन्चरे हेजू भी तुसन कां एजनेरे लेइ मेरू सफर परमेशररे तरफां कामयाब भोए। 11 किजोकि अवं तुसन सेइं मिलनेरे लेइ कोशिश केरताई, कि अवं तुसन कोई आत्मिक वरदान देई, जैस सेइं तुस विश्वासे मां मजबूत भोथ। 12 मतलब इन, कि अवं तुसन कां एइतां तुसन सेइं साथी तैस विश्वासेरे जिरिये, जै मां मां ते तुसन मांए, तैसेरे जिरिये अस हिम्मत हासिल केरस। 13 ते ढलाव ते बेइन्व, अवं चाताई तुस ज्ञानथ, कि मां तुसन कां बार-बार एजनु चाव। जेन्चरे मां गैर कौमेरे लोकन विश्वास केरनेरे लेइ बद्धनेरी मद्दत की, तेन्चरे तुशेरी भी मद्दत केरि, पन हुना तगर रूकोरो राव। 14 अवं संस्कारी लोकन ते असंस्कारी लोकन, पढोरे लोकन या अनपइ लोकन सेल्भन खुशखबरी शुनेइलो। 15 ते अवं तुसन भी जैना रोम नगरे मां रातथ, खुशखबरी शुनानेरे लेइ हर वक्त तियार आई। 16 किजोकि अवं यीशु मसीहेरी खुशखबरी प्रचार केरने करां न शर्मेई, एल्हेरेलेइ परमेशर अपने शक्ति सेइं तैन लोकन मुक्ति देते, जैना खुशखबरी पुइ विश्वास केरतन, पेइले यहूदन फिरी गैर यहूदन। 17 किजोकि खुशखबरे जिरिये परमेशर असन अपने नजरी मां धर्मी बनाते, जैन शुरू करां आखरी तगर विश्वासे सेइं भोते। जेन्चरे पवित्रशास्त्रे मां लिखोरूए, “जै मैन्हु विश्वासेरे जिरिये सेइं परमेशररे सामने धर्मी बनाव गाते तैए जीतो रालो।” 18 परमेशररो क्रोध तैन लोकन पुइ स्वर्गां एइते, जैना बुरां ते दुष्टां कम्मां केरतन, ते जैना सन्चरे अधर्म सेइं दबेइतां रखतन। 19 किजोकि परमेशररे बारे मां ज्ञान तैन मैन्हु केरे मन्ना मां बांदूए, एल्हेरेलेइ कि परमेशर तैन पुइ बांदू कियोरूए। 20 किजोकि तैसेरे आहरे गुण, मतलब तैसेरी सदारी शक्ति, ते परमेशररो सुभाव दुनियाई बनानेरे वक्तेरे दैतो तैसेरे कम्पन सेइं हेरने मां एइते, इडी तगर कि तैन लोकन कां कोई बहानो नई। (aidios g126) 21 हालांकि तैनेई परमेशर त पिशानो, पन परमेशररी तैस काबल बडयाई न की, ते न शुक्र कियुं, पन बेकार सोचने लाए, इडी तगर कि तैन केरो बेअक्ल मन आंधरो भोव (मतलब तैना गलत सोचने लगे)। 22 तैना अपने आपे अक्लमन्द सेमझतां बेवकूफ बने। 23 ते न मरने वाले परमेशररी महिमा मरने वाले मैन्हु, ते चुडोलू ते जानवरं, ते पेटेरे भारे चलने वाले जीपां केरे मूरतन मां बदली। 24 एल्हेरेलेइ परमेशर तैना तैन केरे मनरे खुवैइशां केरे मुताबिक अशुद्ध भोनेरे लेइ शारे कि, एप्पू मांमेइं अपने जानां केरो अनादर केरन। 25 किजोकि तैनेई परमेशररी सन्चर्राई बदलतां झूठ बनाई, ते सृष्टारी पूजा ते आराधना केरि, न कि तैस बनाने बालेरी, जै हर वक्त धन ते रोडोए। आमीन। (aiōn g165) 26 एल्हेरेलेइ परमेशर तैना नीच खुवाइशन मां शारे, इडी तगर कि तैन केरि कुआन्शेई भी स्थाविक कम्मां बदलतां तैन केरे जैना स्थाविक आन तैन केरे

खलाफ बदला। 27 तेन्चरे तैन केरे मइद भी कुआन्शन सेइं सुभाविक कम्मां शैरतां एप्पू मांमेइं गंदे कम्पन मां मसत भोए, मतलब कि मइदईं, मइदन सेइं रिशतो रेखतां प्रभु करां ठीक बदलो नेव। 28 ते तैनेई इन जेइज न समझू कि परमेशर कबूल केरन, एल्हेरेलेइ परमेशर भी तैना तैन केरे मनरे हालती पुइ शारे; कि बुरां कम्मां केरन। 29 ते तैना हर किसमेरे अधर्म, दुष्टे, लालच, बैरे सेइं भरोई जे; ते कपट, ते खून केरनो, ते लडाई केरनि, ते धोखो देनो, ते जलनी सेइं भरोए, ते चोगलखोर, 30 बदनाम केरनेवाले, परमेशर सेइं नफरत केरनेवाले, जैन केरि इज्जत केरीं लोइ तैन केरि इज्जत न केरनेवाले, घमण्डी, बडकां मारनेवाले, बुरी-बुरी गल्लां बनाने वाले, अम्मा बैपू केरो हुकम न मन्नेवाले। 31 बेवकूफ, धोखो देनेवाले, सन्चरे प्यारे करां खाली, दया न केरनेवाले भोइजेइ। 32 हालांकी तैना परमेशररो ई हुकम ज्ञातन, कि एरां जेरां कम्मां केरनेवाले माँतरे सजाए लाइकन, फिरी भी न सिर्फ एप्पू एरां कम्मां केरतन बल्के एरां कम्मां केरनेवालन सेइं भी खुश भोतन।

2 एल्हेरेलेइ हे दोष लाने बाला, तू कोई की न भोस; तीं कां कोई बहानो नई, किजोकि जैस गल्लरो तू होरन पुइ दोष लातस, तैस्से गल्ली पुइ तू अपनो आप भी दोषी बनातस, एल्हेरेलेइ तू एप्पू भी तैने कम केरतस। 2 ते अस ज्ञानतम कि, जैना एरां कम्मां केरतन परमेशर तैन केरो इन्साफे केरतां तैन सजा देते। 3 ते हे मैन्हु, तू जै बुरां-बुरां कम्मां केरनेवालन पुइ दोष लातस, ते एप्पू भी तैने कम केरतस; कुन तू समझतस, कि तू परमेशररे सजाई करां बनेलो? 4 कुन तू परमेशररी कृपा, ते बरदाश केरनू, ते सबराहू धन घटया समझतस, ते कुन इन न समझस, कि परमेशररी कृपा तीं पापन करां मन फिरानो शिखलतीए? 5 पन तू जिद्दी आस ते अपने पापन करां मन फिरानेरो इन्कार केरतस, जैस दिहाइ परमेशर अपनो क्रोध हिरालो, तैस मां परमेशररो सन्चरो इन्साफ बांदो भोलो, त परमेशर तेरो रोइघारे इन्साफ केरेलो। 6 परमेशर हर एक्की तैसेरे कम्मां केरे मुताबिक बदलो देलो। 7 जैना लोक रोडां कम्मां केरतां परमेशररी तरफां मैलने बैली महिमा, ते आदर, ते कथे न खतम भोने बाली जिन्दगरे तोपी मां रातन, परमेशर तैन हमेशारी जिन्दगी देलो। (aiōnios g166) 8 पन जैना खुदगारजन, ते सन्चरे न मन्नेवालेन, बल्के बुराई केरनि चातन, तैन पुइ परमेशररो क्रोध, ते कोप एज्जेलो। 9 ते मुसीबत ते दुःख हर एक्की मैन्हु पुइ एज्जेलो जै बुराई केरते। परमेशर पेइलो यहूदी लोकां केरो इन्साफ केरेलो फिरी गैर यहूदी लोकां केरो इन्साफ केरेलो। 10 हर अक मैन्हु जै रोडां कम्मां केरते तैस महिमा, आदर, ते शान्ति मैलेली, पन परमेशर इना सैरी चीजां पेइले यहूदी लोकन देलो फिरी गैर यहूदी लोकन। 11 किजोकि परमेशर केन्चरी तरफदारी न केरे। 12 एल्हेरेलेइ कि जैन गैर कौमेरे लोकेई बगैर मूसरो कानून मेलतां पाप कियो, परमेशर तैन बगैर मूसरो कानूने सजा देलो, ते जैनेई मूसरो कानून मेलतां पाप कियो, परमेशर तैन सजा भी मूसरे कानूनेरे मुताबिक देलो। 13 किजोकि परमेशररे नजरी मां मूसरो कानून शुनेने वाले धर्मी नई, बल्के मूसरे कानूने पुइ चलने वाले धर्मी ठहराए गानेन। 14 फिरी जैखन होरि कौमां केरे लोक जैन कां मूसरो कानून नई, सुभावे सेइं किछ मूसरे कानूनेरे गल्लन पुइ चलतन, ते मूसरो कानून तैन कां न भोनेरे बावजूद भी अपने लेइ एप्पू कानून आन। 15 तैना इन हिरातन कि परमेशररो कानून तैन केरे दिलन मां लिखोरोए, ते तैन केरे जमीर भी इस गल्ली पुइ गवाही देतन, किजोकि तैन केरे अपने खियाल भी तैन पुइ दोष लातन या बेइलजाम ठहरातन। 16 एरू तेइस भोळू जेइस परमेशर जै खुशखबरी मां शुनावरीए तैसेरे मुताबिक यीशु मसीहेरे जिरिये मैन्हु केरि छेपोरी गल्लां केरो इन्साफ केरेलो। 17 तू एप्पू जो यहूदी जौतस, ते मूसरे कानूने पुइ तेरो विश्वासे, ते तू अपने आपे पुइ घमण्ड केरतथ, कि तू परमेशररो खास मैन्हु आस। 18 ते तू परमेशररी मर्जी ज्ञानतस, ते तू इन भी ज्ञानतस कि कोनां गल्लां रोडी आन, किजोकि तीं इना गल्लां केरू ज्ञान मूसरे कानूने करां मैलोरेन। 19 ते तू भरोसो रखतस, कि तू कानून परमेशररी बत हिरानेवालोस, ते जैना आंधरे मां आन तैन केरे लेइ लोअरो जेरे आस। 20 ते बेअक्लन शिखलने बालोस, ते बच्चां केरो उस्तादातस, ते तीं पक्को

पातो कि परमेशरेरो कानून तीं पूरू ज्ञान ते सच्चर्राई शिखालते। 21 ते ज़ेन तू होरन शिखालतस, अपने आपे की न शिखालस? तू होरन शिक्षा देतस कि चोरी नई केरनि, कुन तू चोरी केतस? 22 तू ज़ै ज़ोतस, “बदमाशी नई केरनि,” कुन तू बदमाशी केरतस? तू ज़ै मूरान सेइं नफरत केरतस, कुन तू मन्दरन लुटतस? 23 तू ज़ै घमण्ड केरतस कि तू परमेशरेरे कानूने ज्ञानतस, एप्पू किजो कानून न मेन्तां, परमेशरेरी तूहीन केरतस? 24 “किजोकि तुशे यहुदी लोकां केरे वजाई सेइं गैर कौमन मां परमेशरेरे नंब्वेरी तूहीन भोतीए,” एल्हेरेलेइ पवित्रशास्त्रे मां एरू लिखोरूए। 25 अगर तू मूसरेरे कानूने पुड च़लस, त खतनो कराने सेइं तीं फैइदो त आए, पन अगर तू मूसरो कानून न मन्नस त तीं मां ते तैस मां, ज़ेसेरो खतनो नई भोरो कोई फर्क नई। 26 ते अगर कोई मैन्हु ज़ेसेरो खतनो न भोए भोरो, त तै मूसरे कानूने पुड च़ले, त परमेशरेरे लेइ ते मैन्हु ते ज़ेसेरो खतनो भोरोए दुइये बराबर आन। 27 ते ज़ैस मैनेरो खतनो नई भोरो, अगर तै मूसरे कानूने पूरू केरे, त ते तीं दोषी ठहरालो। किजोकि तीं कां मूसरो कानूने ते तेरो खतनो भी भोरोए, पन फिरी भी तू कानूने पुड न च़लस। 28 किजोकि सच्च्रो यहुदी ते नई ज़ेसेरू ज़र्म यहुदन मां भोरू या ज़ेसेरो खतनो भोरोए। 29 बलके सच्च्रो यहुदी तैए, ज़ेसेरो मन परमेशरे कां सच्च्रोए, ते सच्च्रो खतनो तैए ज़ै पवित्र आत्मार कम्मां केरे ज़िरिये दिलेरो भोरोए, न की मूसरो कानून मन्ने सेइं भोरोए। एरे लोकां केरे बड़याई लोक नई बल्के परमेशर एप्पू केरते।

3 (किछ लोक पुछ़तन) यहुदी केरि कुन बड़याई, या खतनेरो कुन फैइदो? 2 हर किसमे सेइं बडू किछ। पेडलू त इन कि सारू परमेशरेरू वचन तैन सॉफू। 3 अगर किछ यहुदी परमेशरे कां ईमानदार न निस्से त कुन भोवं? कुन तैन केरे ईमानदार न राने सेइं परमेशर तैन केरे लेइ अपने वादे पूरे केरने मां झूठो भोवं? 4 नई, कथे नई! बल्के परमेशर हमेशा सच़्र ज़ोते, ते हर अक मैन्हु झूठो भोवं, ज़ेन्चरे पवित्रशास्त्रे मां परमेशरेरे बारे मां लिखोरूए, “ज़ैस सेइं तू एपनी गल्लन मां धर्मी भोस, ते इन्साफेरे वक्ते तीं ज़ीत मैल्ले।” 5 अगर इश्शां बुरां कम्मां परमेशरेरी धार्मिकता ठहराते, त अस कुन ज़ोम? कुन इन कि परमेशर क्रोध केरते ते असन सजा देते। (इन अवं इन्सानेरी रीति पुड ज़ोताई।) 6 नई, कथे नई! अगर परमेशर इश्शो यहुदी केरो इन्साफ रोडे च़ारे न केरेलो, त तै किजो दुनियारो इन्साफ केरेलो? 7 किछ ज़ोतन, अगर मेरे झूठेरे वजाई सेइं परमेशरेरी सच्चर्राई बांदी भोतीए ते तैसेरी महिमा भोतीए, त फिरी किजो पैपी केरो ज़ेरो मीं पुड हुक्म दितो गाते? 8 “एज्जा, अस बुराई केरम, कि इस सेइं भलाई पैदा भोए?” पन असन पुड दोष भी लव गाते, ते केत्रे ज़ोतन, कि एन केरू भी एने ज़ोनु आए। पन एरे ज़ेरेन पुड दोष लानो ठीक आए। 9 त फिरी अस कुन ज़ोम? कुन अस यहुदी होरन करां रोडेम? नई, कथी नई; किजोकि असेईं यहुदी लोकन पुड ते गैर यहुदी लोकन पुड ई दोष लोरोए, कि तैना सारे पापेरे कब्जे मां आन। 10 ज़ेन्चरे पवित्रशास्त्रे मां लिखोरूए, “कोई परमेशरेरे सामने धर्मी नई, अक भी नई। 11 कोई सच्च्रे समझदार नई, कोई परमेशरे तोपने बालो नई। 12 सारे परमेशरे करां दूर भोरेन, सारे निकम्मे बनोरेन, कोई भलाई केरनेबालो नई, अक भी नई। 13 तैन केरू गल खुल्ली कब्रे, तैनेई अपने ऐशी सेइं धोखो दितो, तैन केरे ओठन पुड सप्यां केरू ख़रे। 14 ते तैन केरूे भाषण लानती, ते दृष्टो सेइं भेर्ताए। 15 तैन केरे पव ख़रेन केरने लेइ तेजेन। 16 तैना ज़ेरां मीं गातन तुबाही ते कलेश तैन पत्ती गाते। 17 तैन न ज़ानन शैन्ति सेइं केन्चरां ज़ीतन। 18 तैन मां परमेशरेरो डर बिलकुल भी नई।” 19 अस ज़ानतम, कि मूसरो कानून ज़ैन किछ ज़ोते, तैन्ने सेइं ज़ोते, ज़ैना तैस मन्तन, एल्हेरेलेइ कि केन्ची कां कोई बहानो न भोए, ते सारी दुनिया परमेशरेरे सज़ारे लायिक भोए। 20 किजोकि मूसरे कानूनेरे मुताबिक कम्मां केरने सेइं कोई मैन्हु परमेशरेरे सामने धर्मी नई भोनो, एल्हेरेलेइ कि मूसरे कानूने सेइं पिशाण भोतीए कि अस पापी आमा। 21 पन हुनी बगैर मूसरो कानून मन्ने सेइं तै धार्मिकता बांदी भोरीए ज़ै परमेशरेरे तरफां एइतीए, ज़ेसेरे बारे मां मूसरे कानूने ते नेबी केरि किबातन मां लिखोरूए। 22 मतलब परमेशरेरी तै धार्मिकता ज़ै यीशु मसीह

पुड विश्वास केरनेबालां केरे लेइए; किजोकि तैन मां किछ भेद भाव नई। 23 एल्हेरेलेइ कि सेबर्हई पाप कियो, ते तैस महिमा करां दूर आन ज़ै परमेशर देते। 24 पन परमेशरे अपने अनुग्रह सेइं अस पापां केरि सज़ाई करां यीशु मसीहरे ज़िरिये छुटाए ते मुफ्ते मां धर्मी ठहराए। 25 परमेशरे मसीहरे खूनेरे वजाई सेइं अक एरो छुटकारो ठहराव, ज़ै विश्वास केरने सेइं फैइदामंद भोते, कि ज़ैना पाप पेडले केरे, ते ज़ैना परमेशरे अपने बर्दाशती सेइं टाले; तैन केरे बारे मां तै अपनि धार्मिकता बांदी केरते। 26 बल्के इस्से वक्ते तैसेरी धार्मिकता बांदी भोए; कि ज़ैस सेइं तै एप्पू धर्मी ठहरे, ते ज़ै यीशु पुड विश्वास केरे, तैसेरो धर्मी ठहराने बालो भोए। 27 ते घमण्ड केरनु कोडि राव? तैसेरी त ठारे नई। कोस कानूनेरे वजाई सेइं? कुन मूसरो कानून मन्ने सेइं? नई, बल्के विश्वासेरे वजाई सेइं। 28 एल्हेरेलेइ अस ज़ानतम, कि मैन्हु मूसरो कानूनेरे मुताबिक कम्मां केरनेरे बगैर यीशु मसीह पुड विश्वास केरने सेइं धर्मी भोते। 29 कुन परमेशर सिर्फ़ यहुदी केरोए? कुन गैर कौमां केरो नई? हाँ गैर कौमां केरो भी आए। 30 किजोकि अक्के परमेशरे, ज़ै खतने बालन भी विश्वासे सेइं, ते ज़ैन केरो खतनो नई भोरो तैन भी विश्वासे सेइं धर्मी ठहरालो। 31 ते कुन अस विश्वासे सेइं मूसरेरे कानूने रद केरतम? नई, कथे नई; बल्के मूसरेरे कानूने बनोरू रखतम।

4 त अस कुन ज़ोम, कि इश्शे पूर्वज अब्राहमे कुन मैल्लू? 2 किजोकि अगर अब्राहम रोडे कम्मन सेइं धर्मी ठहरावरो भोथो, त तैस घमण्ड केरनेरी ठार भोथी, पन रोडां कम्मां केरू घमण्ड परमेशरेरे सामने नई। 3 पवित्रशास्त्र कुन ज़ोते, इन कि “अब्राहमे परमेशरेरे वादन पुड विश्वास कियो, ते तै तैसेरेलेइ धार्मिकता गनो जेव।” 4 कम केरनेबालेरी मज़दूरी देनी दान नई, पन हक समझू गाते। 5 पन ज़ै (पुन्नेरू) कम न केरे बल्के पापी मैन्हु धर्मी ठहराने बाले पुड विश्वास केरते, तैसेरो विश्वास तैसेरेलेइ धार्मिकता गनो गाते। 6 ज़ैस परमेशर बगैर (पुन्नेरे) कम्मां केरे धर्मी ठहराते, तैस दाऊद भी धन ज़ोते। 7 “धने ते ज़ेसेरे अधर्म माफ़ भोए, ते ज़ैन केरे पाप ढके जे। 8 धने ते मैन्हु ज़ैस परमेशर पापी न ठहराए।” 9 ते इन धन ज़ोनु, कुन खतने बालां केरे लेइ आए, या ज़ैन केरो खतनो नई भोरो तैन केरे लेइ भी आए? अस पवित्रशास्त्रे मरां ज़ोतम, “अब्राहमे परमेशरेरे वादन पुड विश्वास कियो ते तै तैसेरेलेइ धार्मिकता गनो जेव।” 10 इन तैसेरो खतनो भोने करां पेडलू भोव न कि खतनो भोनेरे बाद। 11 परमेशरे ते पेडलो कबूल कियो ते धर्मी ठहराव, ज़ेइस हेजू तैसेरो खतनो न थियो भोरो, ते तैस खतनेरो निशान मैलो, कि तैस धार्मिकता पुड छाप भोए, किजोकि तै तैन सेबर्ही केरो (आत्मिक) बाजी ठहरे ज़ैना विश्वास त केरतन पन तैन केरो खतनो नई भोरो। तैना भी तैन केरे विश्वासेरे वजाई सेइं धर्मी भोन। 12 ते ज़ैन केरो खतनो भोरोए तैन केरो पूर्वज भोए, ज़ैन केरो न सिर्फ़ खतनो कियोरोए, पन ज़ैन इश्शे पूर्वज अब्राहमेरो ज़ेरो विश्वास आए, ज़ै तैनी बगैर खतनेरी हालती मां कियोरी थियो। 13 परमेशरे अब्राहमे ते तैसेरे वंश सेइं वादो कियोरो थियो कि तैना दुनियारे बारस भोले। ई वादे एल्हेरेलेइ नई दित्तोरो कि अब्राहमे मूसरो कानून मन्ने, बल्के तैसेरो विश्वास ज़ै परमेशरे पुड थियो तैसेरे वजाई सेइं तै धर्मी ठहराव जेव। 14 ज़ै वादो परमेशरेरे दित्तोरो थियो कि तैना दुनियारे बारस भोले अगर मूसरो कानून मन्ने सेइं आए, त फिरी विश्वास बेमतलब, ते वादो बेकार भोव। 15 परमेशर तैस पुड क्रोध केरते ज़ै कानूने रोडे च़ारे न मन्ने, ते ज़ैडी कानून नई, तैडी तैसेरू टूलोडू भी नई। 16 एल्हेरेलेइ परमेशरेरे वादे विश्वासेरे ज़िरिये हासिल भोनन, ताके तैना वादे अनुग्रहरे ज़िरिये पक्के भोन, ते सारे वादे अब्राहमेरे वंशरे लेइ आन, न सिर्फ़ यहुदी केरे लेइ, ज़ैना मूसरू कानून मन्तन बल्के तैन सेबर्ही केरे लेइ भी आन, ज़ैना अब्राहमेरो ज़ेरो विश्वास केरनेबालन, तैए इश्शो सेबर्ही केरो पूर्वजे। 17 ज़ेन्चरे पवित्रशास्त्रे मां लिखोरूए, “मीं तू बेडि कौमां केरो पूर्वज बनेवरोस।” परमेशरे पुड तैने विश्वास कियो, ते ज़ै मुइदन ज़ीतो केरते ते ज़ैना चीज़ां वाजुद नई, तैन भी हाज़र केरते। 18 परमेशरेरे वचनेरे मुताबिक कि “तेरू खानदान एरू भोलू” तैना बेडि कौमां केरे पूर्वज भोन। तैनी न उमीदी मां भी उमीदी रेखतां विश्वास

कियो, 19 ते अब्राहम जै लगभग 100 सालेरो थियो, अपने मरं जानी, ते सारारे मरं पेटेरे हालीती पुड़ भी विश्वास मां कमजोर न भोव। 20 ते गैर विश्वासी भोइतां परमेशरेरे वादे पुड़ शक न की, पन विश्वासे मां मजबूत भोइतां परमेशरेरी बड़याई की। 21 ते तैस पूरो भरोसो भोव, कि जैस गल्लरो वादो परमेशरे कियोरोए, तै तैस पूरो केरनेरी शक्ति भी रखते। 22 अब्राहमेरो विश्वास तैसेरेलेइ धार्मिकता गनो जेव। 23 ते ई वचन, “विश्वास तैसेरेलेइ धार्मिकता गनो जेव,” न सिर्फ तैसेरेलेइ लिखो जेव। 24 बल्के इश्शे लेइ भी जैन केरे लेइ विश्वास धार्मिकता गनो जेव, मतलब इश्शे लेइ जैना अस परमेशरे पुड़ विश्वास केरतम, जैने इश्शो प्रभु यीशु मसीह मुडदन मरां जीतो कियो। 25 यीशु इश्शे पापां केरे लेइ मारनेरे लेइ दूलाव जेव, ते असन धर्मी ठहरानेरे लेइ परमेशरे जीतो भी कियो।

5 एल्हेरेलेइ असां विश्वासे सेइं धर्मी भोए, ते जैन किछ इश्शे प्रभु यीशु मसीहे इश्शे लेइ कियोरू तैसेरे जिरिये इश्शो मेल मलाप परमेशरे सेइं भोरोए। 2 ते इश्शे विश्वासेरे वजाई सेइं मसीहे अस इस अनुग्रहे तगर पुजाए, जैडी अज अस खडे भी आम, ते असां पूरे याकीने ते आनन्दे सेइं परमेशरेरी महिमा बंटनेरे लेइ उमीदी मां रातम। 3 सिर्फ एन्ने नई, बल्के मुसीबतन मां भी अस आनन्द केरम, किजोकि अस ज्ञानतम कि मुसीबतन सेइं सबर बढ़ती। 4 परमेशर असन रोडे समझते किजोकि केन्चरे सबर केरनि असेईं शिखोरोए, ते तै असन रोडे समझते तांए असन उमीदी। 5 ई उमीदी असन शरमिन्दा न केरे, किजोकि पवित्र आत्मा जै परमेशरे असन दितोरोए तैसेरे जिरिये सेइं तैसेरो प्यार इश्शे दिलन मां भरोरोए। 6 किजोकि जैखन अस अपनो आप बचानेरे लेइ कमजोर थिये, त मसीह परमेशरेरे ठहरावरे वक्ते पुड़ इश्शे पैपी केरे लेइ मरो। 7 केन्ची धर्मी मैनेरे लेइ भी कोई मरे, इन बडू मुशकले, पन शेइद केन्ची धर्मी मैनेरे लेइ कोई अपनि जान देनेरी जुरत केरे। 8 पन परमेशरे अपनो महान प्यार एन्चरे बांदो कियो, कि जैखन असां पापी थिये तैखन मसीह इश्शे लेइ मरो। 9 ते अस तैसेरे खूने सेइं धर्मी ठहरे, त मसीहेरे जिरिये सेइं परमेशरेरे हमेशारी सजाई करां ज़रूर बचमेले 10 किजोकि जैखन अस परमेशरेरे दुश्मन थिये त तैसेरे मट्टेरी मौती सेइं इश्शो मेल तैस सेइं भोव, ते फिरी मेल मलाप भोरोए त तैसेरे जिन्दगी सेइं असन पक्की मुक्ति मैलेली। 11 ते सिर्फ इन्ने नई, पन हुनी प्रभु यीशु मसीहेरे जिरिये सेइं इश्शो मेल परमेशरे सेइं भोरोए, एल्हेरेलेइ अस परमेशरे मां आनन्द केरतम। 12 एल्हेरेलेइ जेन्चरे एक्की मैनेरे जिरिये यानी आदमेरे जिरिये पाप दुनियाई मां अव, ते पापे सेइं मौत आई, ते एन्चरे मौत सेबभी मैन्नु मां फैली। किजोकि सेबभी पाप केरो। 13 मूसरो कानून देने करां पेड़ले पाप दुनियाई मां त थियो, पन जैडी कानून नई, तेडी पाप गनो न गाए। 14 फिरी भी आदमे करां मूसा तगर सेबभी लोकेई पाप कियो ते सब लोक मरे, जैन लोकेई तैस आदमेरो जेरो पाप न कियो तैना भी मरे, आदम मसीहेरो जेरो थियो, जै मसीह एजनेबालो थियो। 15 पन परमेशरेरू वरदान आदमेरे पापेरू जेरू नई, इन सख्ते कि एक्की मैन्नु यानी आदमेरे पापेरे वजाई सेइं बडे लोक मरे। पन परमेशरेरे अनुग्रह त कने तैसेरू वरदान बडे लोकां केरे लेइ महान आए जैन एक्की मैन्नु यानी यीशु मसीहेरे अनुग्रहे सेइं एइते। 16 जैन वरदान परमेशरे असन दितू तैन आदमेरे पापेरू जेरू नई, किजोकि एक्की मैनेरो पाप सजा घिन्तां अव। पन हालांकी असेईं भी बडे पाप कियोरेन फिरी भी परमेशरे असन एरू वरदान दितोरूए जैन असन परमेशरेरी नज़री मां धर्मी ठहराते। 17 किजोकि एक्की मैनेरे पापेरे वजाई सेइं सब लोक मरे, त जैन लोकन अनुग्रहेरू ते धार्मिकतारू बडू वरदान एक्की मैनेरे जिरिये मैलते, तैना लोक जीते राले ते एक्की मैन्नु यानी यीशु मसीहेरे जिरिये राज़ केरेले। 18 एल्हेरेलेइ जेन्चरे एक्की मैनेरो पाप सेबभी मैनेरू केरे लेइ सजा आनते, तेन्चरे मसीहेरे धार्मिकतारू कम सेबभी मैनेरू केरे लेइ धर्मी ठहराने लेइ वजा बनू, जैस सेइं जिन्दगी मैलतीए। 19 किजोकि जेन्चरे एक्की मैनेरे हुक्म न मन्ने सेइं बडे लोक पापी भोए, तेन्चरे एक्की मैनेरे हुक्म मन्ने सेइं बडे लोक धर्मी भोले। 20 मूसरो कानून एल्हेरेलेइ दितोरो थियो कि सारे लोकन

पातो लग्गे कि तैना केत्रे पापिन। पन जेन्चरे लोकेई जेत्रे जादे पाप कियो तेन्चरे परमेशरेरो अनुग्रह तैस करां भी बडो जादे भोव, 21 कि जेन्चरे सेबभी लोकेई पाप कियो ते मरे, तेन्चरे परमेशरेरो अनुग्रह राज़ केरते ते परमेशरे अस इश्शे प्रभु यीशु मसीहेरे वजाई सेइं धर्मी ठहरावरेम। मतलब असन हमेशारी जिन्दगी मैलेली। (aiōnios g166)

6 त अस कुन जोम? कुन अस पाप केरते रहम, कि परमेशरेरो अनुग्रह बढतो गाए? 2 नई, कधी नई! अस जैखन पापेरे लेइ मरे ते फिरी किजो अग्रोव जो पापे मां जिन्दगी बीताम? 3 तुस ज्ञानतम कि जैखन असेईं सेबभी लोकेई यीशु मसीहे सेइं साथी अक भोनेरे लेइ बपतिस्मो नीयोरो थियो, तैखन अस तैस सेइं साथी मरं थियो। 4 जैखन असेईं बपतिस्मो नीयोरो थियो तेखन अस मसीह सेइं साथी मरे ते दवे जे, ताके अस भी नर्वी जिन्दगी जीम, जेन्चरे मसीह बाजी परमेशरेरी महिमा सेइं मुडदन मरां जीतो कियो। 5 किजोकि अगर अस बपतिस्मेरे जिरिये मसीहेरी मौती मां शामिल भोरेम, त अस भी पक्के तैसेरे जेरे जीते भोमेले। 6 अस ज्ञानतम कि इश्शी पुरानी इन्सानयत यीशु मसीह सेइं साथी क्रूसे पुड़ चढोरोए, ताके पापेरो जिसम बेफाइदो भोए, ते अस अग्रोव जो पापेरे गुलामी मां न रहम। 7 जैखन मैन्नु मरते त तैखन तै पापेरी शक्ति करां आज़ाद भोते। 8 एल्हेरेलेइ अगर अस मसीह सेइं साथी मरे, ते इश्शो विश्वास ईए कि तैस सेइं साथी जीते भी भोमेले। 9 किजोकि अस एन ज्ञानतम, कि मसीह मुडदन मरां जीतो भोरोए ते तै फिरी न मरेलो, ते तैस पुड़ फिरी मौतरू राज़ नई भोनु। 10 जैखन मसीह मरो त तै एक्की बार सेबभी केरे पापेरे लेइ मरो; पन हुनी तै जीतोए, ते सिर्फ परमेशरेरे लेइ जीतोए। 11 एन्चरे तुस अपने बारे मां भी सोचा कि तुस पापेरे लेइ त मरोथे, पन यीशु मसीहे तुसन जिन्दगी दितोरोए ते तुस परमेशरेरे लेइ जीते आथ। 12 एल्हेरेलेइ तुस अपने जानी मां पापेरी इच्छान राज़ केरने न देथ, ते तुस तैन केरे मुताबिक न चला। 13 ते अपने जिसमेरे अंगन बुरे कर्मां केरे लेइ पापे न सोंपा, पन अपने आपे मुडदन मरां जीते सेमझतां परमेशरे सोंपा। ते अपने जिसमेरे अंगन धार्मिकतारे कर्मां केरे लेइ परमेशरे सोंपा। 14 ते तुसन पुड़ पापेरू राज़ न भोलू, किजोकि तुस मूसरे कानूनेरे अधीन नई बल्के अनुग्रहेरे अधीन आथ। 15 त कुन भोव कि अस एल्हेरेलेइ पाप केरम, कि असां मूसरे कानूनेरे अधीन नई बल्के अनुग्रहेरे? नई, कथे नई। 16 तुस ज्ञानथ, कि जैखन तुस जेसेरो हुक्म मन्नेरे लेइ अपनो आप गुलामां केरे जेरे सोफतथ त तुस तैसेरे गुलाम आथ। चाए पापेरी जेसेरो अन्त मौते, चाए हुक्म मन्नेरे जेसेरो अन्त धार्मिकताए। 17 तुस त पेड़ले पापेरे गुलाम थिये पन हुनी तुसन जै शिक्षा मैलोरी थी तैस पूरे दिले सेइं मन्नेबाले भोए, एल्हेरेलेइ अव परमेशरेरू शुकू केरताई। 18 ते हुनी परमेशरे तुस पापेरी शक्ति करां छुटेइतां आज़ाद कियो, ते तुस परमेशरेरे गुलाम बने ताके तुस जैन रोजू तैन केरि बटथ। 19 अव ई मिसाल एल्हेरेलेइ इस्तेमाल केरने लोरोई, किजोकि तुशे लेइ इन समझनु मुश्किले। जेन्चरे तुसेईं पेड़ले अपनो आप गुलामेरे जेरो बुरां कर्मां केरे लेइ अधर्मे ते बुरेइरे लेइ सोंपाते थियो, तेन्चरे हुनी तुस अपने आपे परमेशरेरी सेवारे लेइ सोंपा ताके तुस पूरे तरीके सेइं तैसेरे भोथ। 20 जेइस तुस पापेरे गुलाम थिये, त तुसन परमेशर खुश केरनेरी कोई ज़रूरत न थी। 21 तुसन पुरेनी जिन्दगी सेइं कुन फेइदो मैलो? सिर्फ तुस शरमातथ, किजोकि जैन तुसेईं कियूं तैसेरो नितीजो सिर्फ मौते। 22 पन हुनी तुस पापे करां आज़ाद भोरेथ ते तू परमेशरेरे दास बनोरेथ। किजोकि इना गल्लां तुसन पवित्र बनैली ते तुसन हमेशारी जिन्दगी मैलेली। (aiōnios g166) 23 किजोकि पापेरी मजदूरी त मौते, पन परमेशरेरू वरदान इश्शे प्रभु यीशु मसीह मां हमेशारी जिन्दगी आए। (aiōnios g166)

7 हे दूलाव ते बेइडन, कुन तुस न ज्ञानथ अव मूसरो कानून ज्ञाने बालन सेइं ज़ोताई, कि ज़ांतगर मैन्नु जीतो रहते, तांतगर तैस पुड़ मूसरे कानूनेरो अधिकार भोते? 2 मिसालेरे तोरे पुड़, इलावरी कुआन्हा कानूनेरे मुताबिक ज़ांतगर तैसेरो मुन्हा जीतोए तांतगर तैसेरी पाबंदे। पन अगर मुन्हा मेरे गाए,

त ते मुन्शेरे कानूने करां छुटी जेई। 3 ते अगर मुन्श हेजू जीतो ते होरि मडदेरी भोए त ते बदमाश भीतीए, पन मुन्श मेरि गाए, त तैसेरे कानूने करां छुटी, इडी तार कि होरि मडदेरी भोए, फिरी भी बदमाश न ठहरेली। 4 हे ढलाव ते बेइनव, जैखन तुस मसीह सेई साथी मरे, त तुस कानूनेरे लेइ मरे। हुनी तुस मसीहेरे आथ जै मुडदन मरां जीतो कियोरोए, ताके तुस परमेशरेरे लेइ फलदार जिन्दगी जीथ। 5 किजोकि जेइस अस अपने सुभावेरे मुताबिक चलते थिये, त पापी सुभाव असन मां कम केरतो थियो, ते कानूने तैना पापी इच्छां उकसेई, ते जैन किछ असेई कियूं तैसेरो फल मौत थियो। 6 पन जेसेरे बंधने मां अस थिये, तैसेरेलेइ मेरतां, हुनी कानूने करां एरे छुटोरेम, पन आत्माेरे नव्वे तरीके पुइ सेवा केरतम, न कि लफसन सेई। 7 त अस कुन जोम? कुन मूसरो कानून पापे? नई, कथी नई! बल्के बगैर मूसरे कानूने अवं पापे न पियैनी, अगर मूसरो कानून न जोतो कि “लालच न केर” त अवं लालचे न जैनेथो। 8 पन पापे मौको लेइतां हुकमे सेई मीं मां हर किसमेरू लालच पैदा कियूं, किजोकि बगैर मूसरे कानूने पाप मरां आए। 9 अवं त मूसरे कानूने बगैर पेइलो जीतो थियो, पन जैखन हुकम अवं, त पाप जीतो भोए ते अवं मारो। 10 ते तैए हुकम जै जिन्दगरे लेइ थियो, मेरे लेइ मौतरी वजा बनो। 11 किजोकि पापे मौको मेलतां हुकमे सेई मीं थोखो दितो, ते तैस सेई अवं आत्मिक तोरे पुइ मरो। 12 एल्हेरेलेइ मूसरो कानून पवित्र आए, ते हुकम भी पवित्र, ठीक ते रोड़ोए। 13 ते कुन जै चीज रोडी थी मेरे लेइ मौत बनी? नई, कथे नई! पन पापे तैस रोडी चीजी सेइं मेरे लेइ मौत पैदा केरतां अवं मारो, कि तैसेरो पाप भोनो बांदो भोए, ते हुकमे सेइं पाप बडो जादे बुझोए। 14 किजोकि अस ज्ञानतम कि मूसरो कानून त आत्मिके, पन अवं जिसमानी ते पापेरो गुलाम भोनेरे लेइ बिकोरोई। 15 ते जैन अवं केरताई, तैस न जैनी, किजोकि जैन अवं चाताई, तैन न केरि, पन जैस सेई मीं नफरते, तैने केरताई। 16 ते अगर, जैन अवं न चेई तैने केरताई, त अवं मनताई, कि मूसरो कानून रोड़ो आए। 17 ते एस हालती मां बुरी चीजां केरनेबालो अवं नई, बल्के पापे, जै मीं मां। 18 किजोकि अवं ज्ञानताई, कि मीं मां मतलब मेरे जिसमे मां कोई रोडी चीज नई, रोड़ु केरनेरी इच्छा त मीं मां आए, पन मीं करां न केरोए। 19 किजोकि जैस रोडे कम्मरी इच्छा अवं केरताई, तैन मीं करां न बने, पन जैस बुरेइयरी इच्छा भी न केरि तैस केरताई। 20 पन अगर अवं तैने केरताई, जेसेरी इच्छा न केरि, ते तैन केरनेबालो अवं नई, बल्के पापे जै मीं मां। 21 ते मीं ई कानून मैलते, कि जैखन रोडे कम्मरी इच्छा केरताई, त अवं बुराई केरताई। 22 किजोकि अवं जमीरे सेइं त परमेशरेरे कानूने सेइं बडो खुश भोताई। 23 पन मीं अपने जिसमेरे अंगन मां होरि जेरो कानून लेइहोते, जै मेरी अक्लरे कानूने सेइं लडते, ते मीं पापेरे गुलामेरे कानूने मां छडते जै मेरे जिसमेरे अंगन मां। 24 अवं केरो नुभाघ मैनुहु आई, मीं इस जिसमे करां जै मौतेरे पासे नेते कौन छुटालो? 25 अवं परमेशरेरू शुक्र केरताई जैने यीशु मसीहेरे जिरिये अवं बचाव, ते अवं अपनि अक्ली सेइं त परमेशरेरे कानूनेरो इस्तेमाल केरताई, पन अपने जिसमे सेइं पापेरी कानूनेरो इस्तेमाल केरताई।

8 एल्हेरेलेइ हुनी जैना मसीह यीशु मां आन, तैन पुइ सज़ारो हुकम नई। 2 किजोकि पवित्र आत्मा तुसन जिन्दगी देलो, जै यीशु मसीह करां एइती ते तै तुसन पाप ते मौती करां आज़ाद केरेलो। 3 किजोकि जैन कम कानूने इश्शे पापी सुभावेरे वजाई सेइं कमज़ोर भोइतां न केरि बडु, तैन परमेशरे कियूं, मतलब अपने मड्डे इश्शे पैपी केरो जेरो भोनेरे लेइ, ते पापेरे बलिदानेरे लेइ भेजू, परमेशरे मसीहेरे जिसमे मां पापेरी सज़ा दित्ती। 4 परमेशरे एन एल्हेरेलेइ कियूं ताके अस अपने पापी सुभावेरे मुताबिक नई, पन पवित्र आत्माेरे मुताबिक चेलतां जै हुकम कानून देते तैस केरि बटम। 5 किजोकि जैना लोक पापी सुभावेरे मुताबिक जिन्दगी बीतातन, तैना पापेरे बारे मां सोचतन, पन जैना लोक पवित्र आत्माेरे मुताबिक जिन्दगी बीतातन, तैना आत्मिक गल्लां केरे बारे मां सोचतन। 6 अगर इश्शो मन इश्शे पापी सुभावेरे मुताबिक चलते त अस मरमेले, पन अगर इश्शो मन आत्माेरे मुताबिक चलते

त असन कां जिन्दगी ते शान्ति मैलेली। 7 किजोकि पापी सुभावेरे मुताबिक चलनू परमेशरे सेइं बैर रखनोए, किजोकि न त पापी सुभाव परमेशरेरे कानूनेरे अधीने, ते न कानूनेरे मुताबिक चेलि बटते। 8 ते जैना पापी सुभावेरे मुताबिक चलनन तैना परमेशरेरे खुश न केरि बटन। 9 पन जैखन परमेशरेरो आत्मा तुसन मां बरसते, ते तुस पापी सुभावेरे मुताबिक न चलथ बल्के पवित्र आत्माेरे मुताबिक चलतथ, अगर कोन्ची मां पवित्र आत्मा नई त तै मसीहेरो मैनु नई। 10 ते अगर मसीह तुसन मांए, त जिसम पापेरे वजाई सेइं मरेलो, पन आत्मा धार्मिकतारे वजाई सेइं जीतीए। 11 ते अगर तैसेरी आत्मा जैने यीशु मुडदन मरां जीतो कियो तुसन मांए। ते जै मसीह तैने मुडदन मरां जीतो कियो, तैए तुश्शे भी नाश भोनेबाले जिसमे अपनि आत्मा सेइं जीतो केरेलो, जै तुसन मांए। 12 हे ढलाव ते बेइनव, असेई एन्चरे न लोडे जीयेरू जेन्चरे अस अपने पापी सुभावेरे मुताबिक जीनू चातम, पन असेई एन्चरे जीयेरू लोडे जेन्चरे परमेशरेरो आत्मा चाते। 13 किजोकि अगर तुस अपने पापी सुभावेरे मुताबिक जीले त तुस मरेले, पन अगर तुस पवित्र आत्माेरे मुताबिक चलेले त तुस अपने पापी सुभावेरां कम्मां केरनां बंद केरेले ते फिरी तुस जीते राले। 14 किजोकि जेत्रे परमेशरेरे आत्माेरे चलाने सेइं चलतन तैना परमेशरेरे बच्चेन। 15 किजोकि जै आत्मा तुसन मैलोरोए तुसन फिरी गुलाम बेनतां रानेरे लेइ नई, बल्के तै तुसन परमेशरेरे बच्चे बनाते। तैसेरे जिरिये अस परमेशरे जो हे अब्बा, हे बाजी जोतम। 16 पवित्र आत्मा एप्पू इश्शी आत्मा सेइं मिलतां गवाही देते, कि अस परमेशरेरे बच्चेम। 17 किजोकि अस परमेशरेरे बच्चेम ते असां तैना बरकतां हासिल केरमेले जैना परमेशर अपने लोकां केरे लेइ रेखोरिन, ते मसीहेरे लेइ भी जैन परमेशरे रेखोरुए, तैन भी अस मसीह सेइं साथी हासिल केरमेले; किजोकि अगर अस मसीहेरे जेरे दुःख झेलमेले त अस भी मसीहे साथी महिमा हासिल केरमेले। 18 मीं पूरू याकीने, कि जैना दुःख अस झेल्लेने लोरेम, तैस महिमारे सामने, जै परमेशर असन देनेबालोए, किछ भी नई। 19 किजोकि सैरी रघनारी चीजां बडे बे सबरी सेइं तैस वक्तेरो इंतज़ार केरने लोरिन, कि जेइस परमेशरे इन बांदो केरनू तैसेरे सच्चे बच्चे कौन आन। 20 किजोकि जैन किछ परमेशरे बनाव, तैन सैरी चीजेइं अपनि कीमत गवाइ, एल्हेरेलेइ नई कि तैना अपने आप चैती थी, पन परमेशरे एन भोने दित्नु। पन फिरी भी उमीदे। 21 कि सृष्टि एप्पू भी खुश आए कि विनाशे करां छुटकारो हासिल केरतां, परमेशरेरे बच्चां केरे महिमारी अज़ेदी मां खुशी मनाली। 22 किजोकि अस ज्ञानतम कि सारी सृष्टि मिलतां हुना तगर कर लातीए ते तकलीफी मां तडफतीए, जेन्चरे दोजीती गल्हे बिशनेरी तकलीफ भोतीए। 23 सिर्फ तैना नई पन अस भी जैन एजने बैली महिमारो पेइले फलेरो स्वाद चखनेरे लेइ पवित्र आत्मा दितो, पन अस हेजू भी परमेशरेरे वक्ते बलगने लोरेम जैखन परमेशर अपने बच्चे केरे रूपे मां कबूल केरेलो, ते असन जिसमेरे बुरेई करां छुटकारो देलो। 24 हुनी परमेशरे असन मुक्ति दित्तोरीए, असन ई उमीदे। पन अगर तुस कोन्ची चीजी हासिल केरनेरे लेइ उमीद केरथ जै तुसन कां पेइली आए, त फिरी तै उमीद नई। किजोकि जैस चीजी कोई हेरने लोरोए तैसेरी उमीद कुन केरे? 25 पन जैस चीजी अस न लहम, अगर तैसेरी उमीद रखतम, त सबरी सेइं तैस बलगते भी रातम। 26 एन्चरे पवित्र आत्मा इश्शी मदत केरते जैखन अस परमेशरे पुइ भरोसो रखने मां कमज़ोर भोतम, किजोकि अस न ज्ञानम, कि प्रार्थना केन्चरे केरतन; पन पवित्र आत्मा एप्पू कर लेइतां जै बयानेरे बेइरे, इश्शे लेइ बिनती केरतीए। 27 ते परमेशर जै मनां केरो ज्ञान्ने बालोए ज्ञानते, कि पवित्र आत्मा कुन लोरो जोने। किजोकि तै पवित्र लोकां केरे लेइ परमेशरेरे मेर्जी सेइं बिनती केरते। 28 ते अस ज्ञानतम, कि जैना लोक परमेशरे सेइं प्यार केरतन, परमेशर तैन केरे लेइ सब गल्लां केरे जिरिये भलाई पैदा केरते; मतलब तैन केरे लेइ जैना तैनी अपने मेरज़ारे मुताबिक चुनोरेन। 29 किजोकि तैन जैना पेइले चुने, ते पेइले ठहराए भी कि तैसेरे मट्टेरे रूपे मां भोन, ताके तै बडे ढलान मां जेठो भोए। 30 फिरी जैना तैन पेइले ठहराए, तैना चुने भी, ते जैना चुने, तैना धर्मी भी ठहराए, ते जैना धर्मी ठहराए तैन महिमा भी दित्तोरीए। 31 ते अस एन गल्लां केरे बारे मां कुन

जोम? अगर परमेश्वर इश्वर पासे, ते इश्वरो खलाफ कौन भोइ बटते? 32 परमेश्वरे अपनू मट्टू भी अपने लेइ न रखवू, बल्के तैन इश्वरो सेव्ही केरे लेइ तैसेरे दुश्मना केरे हवाले दित्तू, ते तै मसीह सेइ असन तैन सक् किछ देलो जेसेरो वादो तैन असन सेइ कियोरोए। 33 अस परमेश्वरे चुनोरम, कोई असन पुइ परमेश्वररे सामने दोष न लेई बटे, किजोकि तैए जैनै अस धर्मी ठहरावेम। 34 फिरी कौने जै सजारो हुक्म देलो? कोई नई, यीशु मसीह तैए जै मरो, बल्के मुइदन मरां जीतो भोव, ते परमेश्वररे देइने पासे, ते इश्वरो लेइ बिनती भी केरते। 35 कौन असन मसीहरे प्यारे करां अलग केरि बटते? मुसीबत या तंगी, या जुलम, या काल, या नगूपन, या खतरो, या तलवार? इन मरां कोई भी चीज असन मसीहरे प्यारे करां अलग न केरि बटे। 36 जेन्चरे पवित्रशास्त्रे मां लिखोरूए, “तेरे लेइ अस हर वक्त मौतरे खतरे मां रातम; अस मैरोने बैली भैट्टां केरे जेरे गने जोरेम।” 37 पन जैनै असन सेइ प्यार कियोरोए, तैसेरे जिरिये असन पूरे तरीके सेइ एन सैरी बुरी गल्लां पुइ जीत हासिल आए। 38 किजोकि मीं पूरू याकीने, कि न मौत, न जिन्दगी, न स्वर्गदूत, न हकोमतां, न जै वक्त चलोरोए, न एजनेबालो वक्त, न शक्ति, न उचार, 39 न दुघार ते न कोई होरि सृष्टि, असन परमेश्वररे प्यारे करां जै इश्वरो प्रभु यीशु मसीह मांए अलग केरि सकेली।

9 अवं मसीह मां सच्च जोताई, झूठ न जोई, ते मेरो ज़मीर भी पवित्र आत्माई मां गवाही देते। 2 कि मीं बड़ो दुःखे, ते मेरो दिल लगातार मेरे लोकां केरे लेइ उदास भोते। 3 किजोकि मेरे यहूदी ढला ते बेइनां केरे लेइ, अवं हमेशारे लेइ श्रापित भोथो ते मसीह करां अलग भोथो अगर तैन इस वजाई सेइ तैन मुक्ति मैलती। 4 तैना इस्राएलिन; ते तैना परमेश्वररे लेपलक बच्चे भोनेरे लेइ चुनोरेन, ते परमेश्वररे अपनि महिमा तैन पुइ बांदी की। ते तैनी तैस सेइं करार कियो, ते तैन मूसोरो कानून दित्तो। ते तैनी तैन अपनि आराधना ते अपने खूबसूत वादे पूरे केनेरे लेइ हासिल केनेरो मौको दित्तो। 5 अब्राहम, इसहाक ते याकूब तैन केरे दादे पड़दादे थिये, ते मसीह भी जिसमेरे लिहाजे सेइ तैन मरां अवं, ते परमेश्वररे ते सेव्भन करां बाए जै सेव्भन पुइ राज केरते, तैसेरी महिमा हमेशा भोती राए। आमीन। (aiōn g165) 6 पन इन नई, कि परमेश्वररू वचन टलू कि, सारे जैना इस्राएलैरे वंशन, तैना सब सच्चे इस्राएली नई। 7 ते न अब्राहमेरे वंश मां ज़र्म भोने सेइं सब परमेश्वररे बच्चे भोन। पन पवित्रशास्त्रे मां परमेश्वर अब्राहमे सेइं जोते, “जैना इसहाकेरे वंश मरां पैदा भोले तैन्ने तेरू वंश मन्नु गालू।” 8 मतलब जैना कुदुरती तरीके सेइं ज़र्म धिन्तन तैना परमेश्वररे बच्चे नई, पन सिर्फ वादेरे बच्चे अब्राहमेरे बच्चे गने गातन। 9 किजोकि वादेरू वचन इने, “अवं एग्री साल इस वक्ते फिरी एज्जेलो, ते सारारू अक मट्टू भोनूए।” 10 ते सिर्फ एन नई, पन जेइस रिबका भी एक्की सेइं मतलब इसहाके सेइं दोजीती थी ते तैसेरे पेटे मां दूई बच्चे थिये। 11 ते हेजू तगर तैना बच्चे न थिये ज़मोर्रो, ते न तैनेई रोइ या बुरू कियेरू थियू, कि परमेश्वर रिबका सेइं ज़ोवं, तेरू बडू मट्टू निकडैरी सेवा केरेलू। परमेश्वर एन एल्लेरेलेइ ज़ोवं कि एन हिराए, कि तै अपनि मेज्जी सेइं फैसले केरते ते इन तैन मट्टां केरे रोइयां या बुरे कम्मां केरे वजाई सेइं न थियूं। 13 जेन्चरे पवित्रशास्त्रे मां लिखोरूए, “मीं याकूब सेइं प्यार कियो, पन एसावेरो इन्कार कियो।” 14 ते अस कुन जोम, कि परमेश्वर बेइन्साफे कि ते जैस चाते चुनते? नई, कथे नई! 15 किजोकि परमेश्वर मूसे सेइं जोते, “अवं जैस केन्ची पुइ दया केरनि चैई, तैस पुइ दया केरेलो ते जैस पुइ तरस केरनो चैई तैस पुइ तरस केरेलो।” 16 एल्लेरेलेइ परमेश्वर तैस चुनेलो जैस पुइ तै दया हिरानी चाते; तैसेरी इच्छा लोक जैन चातन या केरनेरी कोशिश केरतन तैस पुइ निर्भर नई। 17 किजोकि पवित्रशास्त्रे मां परमेश्वर मिसेरे राजे फ़िरौन सेइं ज़ोवं, “मीं तू एल्लेरेलेइ राजो बनोरोस, कि तीं मां अपनि शक्ति हिरेई, ते मेरे नव्वेरो प्रचार सैरी ज़मीनी पुइ भोए।” 18 ते जैस पुइ तै चाते, तैस पुइ दया केरते; ते जैस चाते ढीठ केरते। 19 ते किछ लोक मीं सेइं जोले, “अगर एन्चरे, त फिरी परमेश्वर केन्चरे फैसलो केरि बटते कि अस गलत आम? एल्लेरेलेइ कोई भी तैस जैन तै चाते केरने करां न रोकी बटे।”

20 हे मैन्हु, तू कौन आस, जै तू परमेश्वर सेइं बेस केरतस? कुन बानोरी चीज बनाने बाले सेइं जोई बटतीए, “तीं अवं एरी किजो बनाई?” 21 कुन कुम्हार मिन्ती पुइ अधिकार नई, कि एक्की लुनदे मरां, अक भांड आदरारे लेइ बनाए, ते होरू नरादराए लेइ बनाए? 22 (परमेश्वर अपने बनावरो लोकन सेइं जैन तै चाए तैन केरनेरो अधिकारे) जैना नाश भोनेरे काबल थिये, तैन केरे खलाफ परमेश्वर अपनो क्रोध हिरानो ते अपनि सामर्थ बांदी केरनेरी चातो थियो, पन तैसेरे बदले मां तैनी सबर की। 23 (तैनी एन कियू) किजोकि तै हिरानू चातो थियो (मसीहरे मौतरे बलिदानेरे जिरिये) तै केत्रो महान आए, जैखन तै तैन लोकन पुइ दया केरते जैना तैनी अपनि महिमा मां शामिल भोने लेइ चुनोरेन। 24 मतलब असन पुइ जैना तैन न सिर्फ यहूदन मरां बल्के गैर कौमन मरां भी चुने। 25 जेन्चरे ते होशे नेबरे किताबी मां जोते, “जैना मेरे लोक न थी, तैन अवं अपने लोक ज़ोलो। ते जैना लोक मेरे टलारे न थिये, तैन जो टलारे जोइलो। 26 ते तैस्से ठैरी ज़ैडी परमेश्वर ज़ोरू थियू, तुस मेरे लोक नई, तैस्से ठैरी ज़ीतो परमेश्वर तैन ज़ोलो तुस मेरे बच्चे।” 27 ते यशायाह नबी इस्राएली लोकां केरे बारे मां जोते, “चाए इस्राएलेरी कुटमेरी गिनती समुद्रे किनारे रेतरि जेरि बड़ी जादे भोली फिर भी तैन मरां थोड़े बड़ेले। 28 किजोकि प्रभु जल्दी दुनियारे सेव्ही लोकां केरे सेखती सेइं इन्साफ केरेलो।” 29 जेन्चरे यशायाह नेबे पेइलू भी ज़ोरू थियू, “कि सर्वशक्तिमान परमेश्वर इश्वरो लेइ इश्वरू वंश न बाचाथो, त अस सदोम ते अमोरा नगरां केरे जेरे भोने थिये, जैना परमेश्वर पूरे तरीके सेइं बरबाद कियां।” 30 ते अस कुन जोम? इन कि जैना गैर कोमां केरे लोक जैना धार्मिकता न थी तोपते, तैनेई धार्मिकता हासिल की, मतलब तै धार्मिकता जै विश्वास सेइं आए। 31 पन इस्राएली लोक मूसोरो कानून मेन्तां परमेश्वररे करां धर्मां जुवानू चाते थिये, पन तैन न भोइ बटू। 32 किजो नई? एल्लेरेलेइ कि तैना विश्वासे सेइं नई, पन मूसोरो कानून मेन्तां धर्मां भोनेरी कोशिश केरते थिये, तैनेई तैस ठोकर खानेबाले घोड़े सेइं ठोकर खाइ। 33 जेन्चरे पवित्रशास्त्रे मां लिखोरूए; “तका अवं सिय्योने मां अक ठेस लानेबालो घोड़, ते ठोकर खाने बाली चट्टान रखताई, ते जै तैस पुइ विश्वास केरेलो, तै शरमिन्दा न भोलो।”

10 हे ढलाव ते बेइनव मेरे मनेरी इच्छा ते इस्राएली लोकां केरे लेइ परमेश्वर कां मेरी ई प्रार्थनाए, कि तैन मुक्ति मैल्ले। 2 अवं ज्ञानताई कि तैना परमेश्वररे लेइ जोशे मां रहतन, पन सच्चे ज्ञाने सेइं नई। 3 किजोकि तैना तैस धार्मिकताई करां अनजान राए जै परमेश्वर तरफां मैलतीए, ते तैनेई अपनि धार्मिकता बनानेरी कोशिश की, एल्लेरेलेइ तैनेई अपनो आप परमेश्वररी धार्मिकतारे अधीन न कियो। 4 किजोकि मसीह तै मकसद पूरो कियोरोए जेसेरे लेइ मूसोरो कानून दित्तोरो थियो, ताके जै कोई मसीह पुइ विश्वास केरे तै परमेश्वररी नज़री मां धर्मां भोए। 5 किजोकि मूसे इन लिखोरूए, “जै मैन्हु तैस धार्मिकता मुताबिक चलते जै कानूनेरे जिरिये आए, ते तैसेरे जिरिये सेइं जीतो रालो।” 6 पन जै धार्मिकता विश्वासे सेइं आए, तैसेरे बारे मां पवित्रशास्त्र इन जोते, “तू अपने मने मां इन न जोइयां कि स्वर्गो पुइ कौन चढ़ेलो?” (मतलब मसीह आन्ने) 7 या इन न जोइयां “पाताले मां कौन गालो?” (मतलब मसीह मुइदन मरां जीतो केरतां बा आने) (Abyssos g12) 8 पन पवित्रशास्त्र इन जोते “परमेश्वररू वचन तेरे नेडे, ते तेरे ऐशी मां ते मने मां आए,” इन तैन वचने जैन असन परमेश्वर पुइ विश्वास केरनेरे बारे मां जोते, जेसेरो अस प्रचार केरतम। 9 अगर तू अपने ज़बाना यीशुए, प्रभु जेनतां मन्स ते अपने दिल सेइं विश्वास केरस, कि परमेश्वर तै मुइदन मरां जीतो कियो, त तीं परमेश्वर पक्की मुक्ति देलो। 10 किजोकि इश्वरो विश्वासेरे जिरिये सेइं अस परमेश्वररी नज़री मां धर्मां भोतम, ते इश्वरो इकरार केरने सेइं मुक्ति मैलोरीए। 11 किजोकि पवित्रशास्त्र इन जोते, “जै कोई तैस पुइ विश्वास केरे, तै शरमिन्दा न भोलो।” 12 इन एल्लेरेलेइ आए कि यहूदन ते गैर कौमन मां कोई फर्क नई, किजोकि परमेश्वर सेव्ही केरो प्रभुए; ते जैना तैसेरू नवं धिन्तन तै तैन बरकत देते। 13 जेन्चरे पवित्रशास्त्र जोते, “जै कोई प्रभुएरू नवं धिन्नेलो, तैस मुक्ति मैलेली।” 14 पन प्रभु पुइ लोकेई

विश्वास न कियो त तैना तैसेरु नवं किजो घिन्ने? ते जेसेरे बारे मां तैनेई शुनोरु नई तैस पुड केन्चरं विश्वास केरेले? ते अगर तैसेरे बारे मां कोई प्रचार न केरे त तैना केन्चरं शुनी बटतन? 15 ते अगर कोई प्रचार केरनेरे भेजो न गाए त तैना केन्चरे शुनेई बटतन? जेन्चरे पवित्रशास्त्र जोते, “तैन केरे पव केत्रे रोडेन, जैना खुशखबरी शुनातन!” 16 पन सेबभैई तै खुशखबरी कबूल न की। यशायाह नबी जोते, “हे प्रभु कोई इश्शे सन्देशे पुड विश्वास न केरे।” 17 एल्हेरेलेइ मसीहरे बारे मां सन्देश शुन्नेरे बगैर कोई भी तैस पुड विश्वास न केरि बटे। 18 पन अवं पुछतई, “कुन इसाएली लोकेई न शुनु?” हॉ तैनेई जरूर शुनु, पन पवित्रशास्त्रे मां लिखोरूप “तैन केरु वचन सैरी ज़मीनी पुड, ते तैन केरि गल्लां दुनियारे हर पासे पुजोरिन।” 19 अवं फिरी पुछतई, कुन इसाएली लोकेई तैन वचन न समझू? पेइलो त प्रभुए मूसैरे ज़िरिये ई जुवाब देते, “अवं तैन केरे ज़िरिये ज़ै कौम नई, इसाएली लोकन जलन करालो, अवं बेवकूफ गैर कौमां केरे लोकां केरे ज़िरिये तुसन सरकालो।” 20 फिरी यशायाह बडे दिलेरी सेइं परमेशरेरे लेइ जोते, “जैना मीं न थी तोपते, तैन अवं मैलो, ते जैना मीं पुछते भी न थी, तैन पुड अवं बांदो भोव।” 21 पन इसाएलेरे बारे मां परमेशर इन जोते, “अवं हुक्म न मन्नेबाले ते बेंस केरनेबाले लोकन सैरी दिहैई कुजातो राव।”

11 एल्हेरेलेइ अवं पुछतई, कुन परमेशरे अपने लोक शारे? नई, कथे नई! अवं भी त इसाएली आई, अब्राहमेरे खानदाने ते बिन्ध्यामीनेरे गोत्रे मरां आई। 2 परमेशरे अपने तैना लोक न शारोरे, जैना तैने पेइले चुने, कुन तुस न जानथ, कि पवित्रशास्त्र एलियाहरे बारे मां कुन जोते, कि एलियाह नेबे इसाएली लोकां केरे खलाफ परमेशरे कां बिनती केरते? 3 तैने ज़ोवं “हे प्रभु, तैनेई तैरे नबी मारे, ते तेरी बलिदान केरनेरी ठारां बरबाद की, ते सिर्फ अवं ए ऐकैलो बचोरोई ज़ै तीं मन्ने बालोई, हुनी तैना मीं भी मारने चातना।” 4 पन परमेशरे एलियाह ज़ुवाब दितो, “मीं अपने लेइ 7000 मडद रखीरेन, ज़ैनेई बाल देबतेरे मूरती कां मथ्यो नई टेकोरो।” 5 एन्चरे इस वक्ते भी थोडे ज़ेरे लोक बजोरिन, जैना परमेशरे अपने अनुग्रह वजाई सेइं चुनोरिन। 6 अगर इन परमेशरेरे अनुग्रहे सेइं भोरूप, ते फिरी मूसैरे कानूनरे मुताबिक कम्मन केरने सेइं नई, नई त फिरी अनुग्रह, अनुग्रह न राव। 7 ते फिरी नितीजो कुन भोव? कि इसाएली ज़ेसेरी तोपी मां आन, तै तैन न मैलो; पन चुनोरिन मैलो, ते हारे बाकी लोक सखत कियोरिन। 8 जेन्चरे पवित्रशास्त्रे मां लिखोरूप, “परमेशरे अज़्जेरे दिहाड़ी तगर तैन केरो मन ते दिल सुस्त कियो, ते एरी एछड़े दिति कि ताके तैना लेई न बटन, ते एरे कन ताके तैना शुनी न बटन।” 9 ते राज़ो दाऊद जोते, “अवं परमेशरे कां प्रार्थना केरताई कि ते तैन केरे तिहारन मां टलेइ बटे ते फसाए, ते परमेशर तैन झुकाए ते तैन सज़ा देइ बटे। 10 ते तैन केरि एछड़न पुड आंथरु भोए, ताके तैना लेई न बटन, ते परमेशर तैन, तैन केरि परेशेनी केरे वजाई सेइं दुखी केरि बटे।” 11 त अवं पुछतई, कुन यहूदी लोक ठोकर लगनेरे वजाई सेइं हमेशारे लेइ बिछडे? नई, कथे नई! पन तैन केरे विश्वास न केरनेरे वजाई सेइं गैर कौमन मुक्ति मैल्ली ताके तैन जलन भोए। 12 ते अगर तैन केरे विश्वास न केरनेरे वजाई सेइं गैर कौमरे लोकां केरु भल्लू भोवं, हकीतिक मां गैर कौमां केरे लेइ बडू रोडू भोलू ज़ेइस यहूदी लोक परमेशरे कां वापस एज्जले। 13 अवं तुसन गैर कौमरे लोकन सेइं एन जोताई। कि अवं गैर कौमरे लोकां केरो प्रेरित आई, ते अपने सेवारे बारे मां घमण्ड केरि। 14 ताके अवं कोन्ची तरीके सेइं अपने लोकन जलन करेइतां तैन मरां किछन मुक्ति दूरेई। 15 किजोकि इसाएली लोकां केरु शाऱू गानू दुनियारे लोकां केरे लेइ मेल मिलापेरी वजा बनी, ते तैन केरु यीशु कबूल केरनु कि तै मसीह आए, एन एरु भोलू जेन्चरे मुडेरेरु ज़ीतू भोनु! 16 ते किजोकि पूर्वज अब्राहम ते दादे पडदादे पवित्र थिये ते तैन केरि खानदानी भी पवित्र भोली, ज़ैखन चडलारो पेइलो पेइडो परमेशरेरे लेइ च़ाढ़नेरे वजाई सेइं पवित्र भोरोए, त पूरु सन्नोरु अट्टू भी पवित्र भोरूप, ते ज़ैखन ज़ील पवित्र भोवं, त डाल भी पवित्ररन। 17 इसाएली लोक ज़ैतूनरे बुटेरे डैलडी केरे ज़ेरे आन ते इश्शे दादे

पडदादे अब्राहम, इसहाक ते याकूब एन बुटेरे ज़ीलां केरे ज़ेरे आन, ते अगर किछ डैलडी टलोडी जेई, त तुस गैर कौमरे लोक जंगली ज़ैतूनरे ज़ेरे आथ, ते तुस तैस असली ज़ैतून मां कलम कियोरिथ ते ज़ीलां केरे खुराकारे हकदार भोरिथ। 18 त तीं तैन डैलडन पुड ज़ैना टलोडी जेई ते शैरी जेई तैन पुड घमण्ड न लोडे कियेरु, ते अगर तू घमण्ड केरस त याद रख कि तू ज़ीलन नई, पन ज़ील तीं सुमभालते। 19 फिरी तू जोलो, “डैलडी एल्हेरेलेइ टलोडी, कि अवं कलम भोई।” 20 इन सच्चे, तैना त विश्वास न केरनेरे वजाई सेइं टलोडी जेई, पन तू विश्वासे सेइं बनोरो रातस, एल्हेरेलेइ घमण्ड न केर, पन डर केर। 21 किजोकि परमेशरे असली डैलडन पुड दया न की, त तुसन पुड भी दया न केरेलो जैना कलम कियोरिथ। 22 एल्हेरेलेइ परमेशरेरी दया ते सखती हेर! जैना पाप केरनेरे वजाई सेइं झडे तैन पुड सखती, पन तेरे लेइ दया, ते तू अपने आपे पुड तैसेरी दया बनोरि राने दे, नई त तू भी कटो गालो। 23 ते अगर यहूदी लोक फिरी विश्वास केरन, त कलम केरे गानेन किजोकि परमेशर एन केरनेरे लेइ शक्ति बालो आए। 24 किजोकि अगर तू तैस ज़ैतून, ज़ै सुभावे सेइं जंगलीए कटो जेव, ते ज़ै असलीए तैसेरे खलाफ रोडे ज़ैतून मां लव जेव, ते इना असली डैलडी आन अपने ज़ैतून मां किजो न लेई गैली। 25 हे ड़लाव ते बेइन्व, अवं न चैई कलम तुस गैर कौमरे लोक अपने बारे मां घमण्ड केरेथ। इसाएली लोकन सेइं कुन भोए, अवं एस भेदेरे बारे मां तुसन सेइं जोताई, कि ज़ांतगर गैर कौमां केरे बडे लोक मसीह कां न एज्ज, तांतगर किछ इसाएली लोकां केरो दिल सखत रालो। 26 ते एन्चरे सैरी इसाएली लोकन मुक्ति मैल्लीए; जेन्चरे पवित्रशास्त्रे मां लिखोरूप, “छुटानेबालो सिय्योनेरां (यरूशलेम) एज्जले, ते अभक्ति इसाएली लोकन करां दूर केरेलो। 27 ते तैन सेइं मेरो ई करार भोलो, कि अवं तैन केरे पाप माफ़ केरेलो।” 28 खुशखबरारे वजाई त तैना तुश्शे लेइ परमेशरेरे बैरिन, पन परमेशरेरे चुनेरे वजाई सेइं ते तैन केरे बुजुर्गन दितोरि वचनेरे वजाई सेइं परमेशर तैन सेइं हेजु भी प्यार केरते। 29 किजोकि परमेशरे अपने वरदान करां ते अपने कुजांने करां कथे अपनो मन न बदले। 30 किजोकि जेन्चरे पेइले तुसेई परमेशरेरो हुक्म न थियो मनोरो, पन हुना इसाएली लोकां केरे हुक्मन मन्ने सेइं तुसन पुड दया भोइ। 31 तैना हेजु भी हुक्म न मन्नेबालेन कि ज़ै दया तुसन पुड भोरिए तैन पुड भोली। 32 किजोकि सेबभी लोकेई हुक्म नई मन्नोरो एल्हेरेलेइ तैना केदी केरे ज़ेरे बनोरिन। पन परमेशरे एन एल्हेरेलेइ कियूं ताके तैन सेबभन पुड दया केरि बटे। (eleēsē g1653) 33 वाह! परमेशरे सेबभी केरे लेइ भलो आए ते ज़ानी ते अक्लमन्दे, कोई भी तैसेरे खियालन बियांन न केरि बटे ते कोई तैसेरी बत्तां न सेमझी बटे। 34 जेन्चरे पवित्रशास्त्रे मां लिखोरूप “कोई न जाने प्रभुएरे मने मां कुने या तैस सलाह देनेबालो कौने? 35 या केने पेइले तैस किछ दितु ज़ेसेरो बदलो तैस दितो गाए?” 36 किजोकि सब किछ परमेशरेरी तरफां आए। तैनी सब किछ बनाव, ते तैसेरे ज़िरिये, ते तैसेरेलेइ सब किछ। तैसेरी आदर सदा भोती राए। आमीन। (aiōn g165)

12 एल्हेरेलेइ हे ड़लाव ते बेइन्व, अवं तुसन कां परमेशरेरी दया याद केरताई बिनती केरतां जोताई, कि अपनि ज़िन्दगी पवित्र, ते ज़ेरु परमेशरे पसंद एइते, बलिदान केरतां च़ाढ़ा; ईए परमेशरेरी आराधना केरनेरो सही तरीको आए। 2 ते इस दुनियारे तरीके पुड न च़ला, पन परमेशर तुश्शी सोच बदलेरे ज़िरिये सेइं तुश्शो चालचलन भी बेदलोए, ताके तुस ज़ानथ कि परमेशर तुसन करां कुन चाते, या ज़े रोडी ते ज़ैन तैस पसंद एइते, ते सिद्ध आए। (aiōn g165) 3 किजोकि अवं तैस परमेशरेरे अनुग्रहे वजाई सेइं ज़ै मीं मैलो, तुसन मरां हर एक्की सेइं जोताई, कि जेन्चरे समझोरु लोडे, तैस करां कोई भी अपनो आप जादे न समझे, यानी कि ज़ेरो विश्वास परमेशरे तुसन दितोरोए तैसेरे मुताबिक अपने आपे समझा। 4 किजोकि जेन्चरे इश्शे एक्की जिसमे मां बडे अंगन, ते सेबभी अंगां केरु अक्कां ज़ेरु कम नई। 5 तेन्चरे अस ज़ैना मसीह पुड विश्वास केरतम, अस भी तैसेरे जिसमेरे ज़ेरे बने, ते अस तैसेरे अंग आम ते अस एक्की होरि सेइं जुडोरिम। 6 ते

जैखन कि तैस अनुग्रहरे मुताबिक जै परमेशरे असन दित्तोरूप, असन अलग-अलग वरदाना मैलोरना। ते जैस भविष्यवेनरु वरदान मैलोरूप, तै विश्वासेरे मुताबिक भविष्यवाणी केरे। 7 अगर सेवा केरनेरु वरदान मैलेरूप, त होरि केरि सेवाई मां लग्गोरो राए, अगर कोई शिखालने बालो भोए, त शिखालने मां लग्गोरो राए। 8 अगर तुशू वरदान हिम्मत देने बालू भोए त तुसेई हिम्मत देती लोडे रावरी, अगर कोन्ची दान देनेरु वरदान मैलोरु भोए तैने खुल्ले दिले सेई लोडे दितोरु, अगर केन्ची अगवाई केरनेबालोए, तै जोशे सेई अगवाई केरे, ते जै दया केरे तै खुशी सेई दया केरे। 9 तुशुओ प्यार सज़्जो भोए; बुरेई सेई नफरत केरा; भलाई केरने मां लग्गोरो राथ। 10 भाईचारेरे प्यारे सेई एककी होरि सेई प्यार केरा; आदरी सेई होरन एप्पू करां रोडो समझा। 11 मेहनत केरने मां आलस न केरा; आत्मिक जोशे सेई भरोरे राथ; पूरे दिले सेई प्रभुएरी सेवा केरते राथ। 12 जै उमीद तुसन आए तैस मां मघन राथ; मुसीबती मां मज़बूत राथ; प्रार्थना केरने मां लगातार लग्गोरो राथ। 13 परमेशरेरे लोकन जैन किछ ज़रूरी भोए, तैस मां तैन केरि मद्दत केरा; मेहमानां केरि आदर केरते राथ। 14 अपने सताने बालन बरकत देथ; बरकत देथ फिटकार न देथ। 15 आनन्द केरनेबालन सेई साथी आनन्द केरा, ते लेरां देने बालन सेई साथी लेरां देथ। 16 एप्पू मांमेईं मेल मलाप रखा; घमण्ड न केरा; गरीब लोकन सेई साथी साथ रखा; इन न समझा कि तुस बड़े अक्लमन्द आथ। 17 बुरेइयरे बदले केन्ची सेई बुराई न केरा; ध्यान देथ ते तैन्ने केरा जैन गल्लां सेव्ही केरि नज़री मां रोडिन। 18 जेजू भोइ सकते, सेव्ही मैनु सेई साथी मेल मलाप रखा। 19 हे टलारव अपनो बदलो न नेथ; पन परमेशरे तुशु लेइ बदलो नेने देथ, किजोकि पवित्रशास्त्रे मां प्रभु ज़ोते, “बदलो नेनो मेरु कम्मे, ते अर्वे बदलो देइलो।” 20 पन पवित्रशास्त्र ज़ोते “अगर तेरो दुश्मन ढलुखोरो त तैस रोटी खूवा; अगर दलिशोरो भोए, त तैस पानी पीया; किजोकि एरु केरने सेई तू तैस शरमिन्दो केरतस।” 21 बुरेई करां न हारा पन बुराई भलैई सेई ज़ीतां।

13 हर कोई मैन्हु प्रधान अधिकारी केरे अधीन राए; किजोकि कोई अधिकार एरो नई, जै परमेशरेरे तरफां न भोए; ते जैना अधिकारी आन, तेना परमेशरे ठहरावरेन। 2 एल्हेरेलेइ जै कोई अधिकारी केरि खलाफत केरते, तै परमेशरेरे कानुनेरी खलाफत केरते, ते जैना लोक परमेशरेरे कानुनेरी खलाफत केरतन तैन सज़ा मैल्लनीए। 3 किजोकि हेरा हाकिम तैस मैन्हु जै भलाई केरते तैस न डराए, पन तैस मैन्हु डराते जै बुरु कम केरते। अगर तुस हाकिमे करां डरनू न चाथ त भलाई केरते राथ ते तुसन हाकिमे करां शाबाश मैलेली 4 हाकिम परमेशरेरो सेवके ते तेरु भलू केरनेरे लेइ आए, पन अगर तू बुराई केरस, त तू डर, किजोकि तैस कां तलवार बैफैइदी नई, ते तै परमेशरेरो सेवके; जै बुरु कम केरनेबाले पुड़ कोप आनते। 5 एल्हेरेलेइ हाकिमेरे लेइ तुशु समर्पण ज़रूरी आए न सिर्फ परमेशरेरे सज़ारे वजाई सेई बल्के तुशु अपने ज़मीरेरे वजाई सेई। 6 एल्हेरेलेइ धड़त भी देतथ, किजोकि हकीमत केरनेबाले परमेशरेरे सेवकन, ते सदा एस्से कम्मे मां लग्गोरो रातन। 7 एल्हेरेलेइ हर केन्चेरु हक देथ, जेसेरी धड़त बनतीए तैस धड़त देथ; जेसेरी चुंगी बनतीए तैस चुंगी देथ; जेसेरी इज़्जत ते आदर केरी लोडे तैसेरी इज़्जत ते आदर केरा। 8 एप्पू मांमेईं प्यारेरे अलावा ते केन्ची गल्ली मां कोन्ची चीज़रे कर्ज़दार न राथ; किजोकि जै होरन सेई प्यार केरते, तैने परमेशरेरे दित्तोरे कानुनेरे हुक्म पूरे किये। 9 किजोकि मुसेरे कानुने मां बड़े हुक्म दित्तोरेन जेन्चरे कि “बदमाशी न केर, कल्ल न केर, चोरी न केरा, लालच न केर,” ते एन केरे अलावा होरो कोई भी हुक्म भोए त तैन सैरी केरि बुनीयाद इस्से गल्ली मांए, “अपने पड़ोसी सेई अपने बराबर प्यार केर।” 10 प्यार पड़ोसेरी किछ भी बुराई न केरे, एल्हेरेलेइ जै प्यार केरते ते परमेशरेरो दित्तोरो कानुन पूरे केरते। 11 एल्हेरेलेइ वक्त पिशेनातां इन केरा। तुशु लेइ निडली मरां बीज़नेरो वक्त ओरोए, किजोकि जैस वक्ते असेई विश्वास कियोरो थियो, तैस वक्तेरे खियाले सेई हुनी इशुनी मुक्ति नेडीए। 12 इस बुरे दुनियाई मां रानेरो इशुओ वक्त लगभग खतम भोरोए, जेन्चरे रात टलेकड़ोने बालीए, ते

लौ भोने बाली आए ते मसीहेरो वापस एजनेरो वक्त नेडे ओरोए, एल्हेरेलेइ असां तैना कम्मां शारम जैना लोक आंधरे मां केरतन ते तैना हथियार बंधम जैना लोई मां इस्तेमाल भोतन। 13 एल्हेरेलेइ अस भी तैन लोकां केरो ज़ेरो बर्ताव केरम, जैना लोई मां ज़िन्दगी जीतन न कि आंधरे मां, न कि नचने, नशो केरने, न बदमाशी केरने मां, ते लुचपने, लडैई, ते जलनी मां मसत भोम 14 बल्के जेन्चरे प्रभु यीशु मसीहे जीवं तेन्चरे तुस भी जीथ, ते जिसमेरी खुवैइशां पूरी केरनेरी कोशिश न केरा।

14 जै विश्वासे मां कमजोरे, तैस तुस कबूल केरा, पन तैस कुन कियेरु लोडे ते कुन न लोडे कियेरु तैस पुड़ बेंस केरनेरे लेइ नई। 2 किजोकि एककी विश्वासे, कि सब किछ खानू जेइजे, पन जै विश्वासे मां कमजोरे, तै सिर्फ शागां खाते। 3 सब किछ खाने बालो तैस पुड़ दोष न लाए जै सब किछ न खाए, किजोकि परमेशरे तैना दुइये कबूल कियोरेन। 4 तू कौन आस जै होरेरे नौकरे पुड़ दोष लातस? तैनी खरु कियूं या बुरु इसेरो फेसलो तैसेरो मालिके केरेलो, बल्के तै कामयाब भोलो; किजोकि प्रभु तै इस काबल बनोरोए। 5 एन्चरे किछ लोक एककी दिहाड़ी होरि करां बेधतां मन्तन, ते किछ सब दिहाड़े बराबर मन्तन, हर केन्ची इन याकीन कियेरु लोडे कि जैन तेना सोचतन तैन ठीके। 6 जै कोन्ची दिहाड़े मन्ते, तै प्रभुए इज़्जत देनेरे लेइ मन्ते। जै सब किछ खाते, तै भी प्रभुए इज़्जत देनेरे लेइ खाते, किजोकि तै परमेशरेरु शुक्र केरते, ते जै सब किछ न खाए, प्रभुएरे लेइ न खाए ते परमेशरेरु शुक्र केरते। 7 किजोकि असन मरां कोई न अपने लेइ ज़ीते, ते न कोई अपने लेइ मरते। 8 किजोकि अगर अस ज़ीतेम त, प्रभुएरे लेइ ज़ीतेम; ते अगर अस ज़ीम या मरम, अस प्रभुएरेम। 9 किजोकि मसीहे एल्हेरेलेइ मरो ते ज़ीतां भी भोव, ताके मररे ते ज़ीतां दुइयां केरो प्रभु भोए। 10 तू अपने विश्वासी ढलाए पुड़ किजो दोष लातस? या तू फिरी किजो अपने विश्वासी ढलाए घटिया समझतस? असा सब परमेशरेरे आदालतरे तखतरे सामने खड़े भोनेम। 11 जेन्चरे पवित्रशास्त्रे मां लिखोरुए, कि प्रभु ज़ोते, “अवं एप्पू तुसन सेई वादो केरताई, हर कोई मां कां ज़ेधू टिकेलो, ते हर अक ज़िभ परमेशरेरी इक्कार केरेली।” 12 ते असन मरां हर केन्ची अपने-अपने कम्मां केरो लेखो परमेशरे देलो पेनोए। 13 एल्हेरेलेइ अग्रोवं जो अस एककी होरि पुड़ दोष न लाम, पन तुस एने थापा, कि कोई भी तुशु वजाई सेई तुशुओ विश्वासी ढला या बेइन पाप न केरे। 14 अवं ज्ञानताई, ते प्रभु यीशुएरे तरफां मां पक्कू याकीन भोवं, कि कोई खानेरी चीज़ अपने आपे सेई अशुद्ध नई, पन जै तैस अशुद्ध समझते, तैसेरेलेइ अशुद्ध आए। 15 अगर तेरो विश्वासी ढलाए या बेइन तेरे खाने सेई दुःख पुजे ते तै अग्रोवं जो परमेशरे पुड़ विश्वास केरनो शारे, त फिरी तू प्यारेरे रीति पुड़ न च़लस, एरी चीज़ां न खा। जेसेरे लेइ मसीह मरो ते तू अपने खाने सेई तैस नाश न केर। 16 एल्हेरेलेइ जैन कम तुशु लेइ रोडू आए ते जेइजे, तैसेरे बारे मां होरन तुहीन केरनेरो मौको न दे। 17 किजोकि परमेशरेरे राज़े मां खानू पीनू माईने न रखे; माईने रखते धार्मिकतारी ज़िन्दगी ज़ीनी ते मेल मलाप, ते आनन्द ते आए जै पवित्र आत्मा देते। 18 जै कोई इस रीति सेई मसीहेरी सेवा केरते, तैस सेई परमेशरे खुश भोते, ते मैन्हु भी तैसेरे बारे मां रोडू ज़ोतन। 19 एल्हेरेलेइ असेई तैना कम्मां कियोरां लोड़न जैन सेई लोक मेल मिलापे सेई रेइ बटन, ते एककी होरि विश्वासे मां मज़बूत केरम। 20 तुस जेरु खानू चातथ तैसेरे वजाई सेई परमेशरेरु कम न बगाइ। सब किछ शुद्ध त आए, पन तुशु खाने सेई अगर होरो कोई मैन्हु परमेशरेरे पुड़ विश्वास केरनो शारे त तैसेरेलेइ बुरु आए। 21 रोडू त इन्ने, कि तू न मास खास, ते न शराब पीस, जेसेरे वजाई सेई तेरे ढला या बेइन पाप केरे। 22 तेरो इन चीज़ां केरे बारे मां जै विश्वासे, ते तेरे ते परमेशरेरे दरमियाने मां आए, धने तैए, जै तैस गल्ली मां, जै तै ठीक समझे, अपने आपे दोषी न ठहराए। 23 पन जै शक केरतां खाते, तै सज़ारे काबल भोइ जेव, किजोकि तै विश्वासे सेई न खाए, ते जैन किछ केरस ते विश्वास केरस कि एन ठीक नई त तू पाप केरतस।

15 एन्चरे अस जैना विश्वासे मां मज़बूत आम, असेई एन कियोरू लोडे कि जैना विश्वासे मां कमज़ोर आन तेन केरि मद्दत केरम; न कि अपनो आप खुश केरम। 2 असन मरां हर कोई अपने विश्वासी ढ़लान ते बेडन्न खुश केरनेरे लेड मद्दत केरे ज़ैस सेई तेन केरो विश्वास मज़बूत भोए। 3 किजोकि मसीहे भी अपनो आप खुश न कियो, पन जेन्चरे पवित्रशास्त्रे मां लिखोरूए, “तेरे तुहीन केरनेबालोई मेरी भी तुहीन की।” 4 जेत्री गल्लां पेडली पवित्रशास्त्रे मां लिखोरिन, तैना इश्शे शिखारे लेड लिखोरिन, कि अस सबरी ते पवित्रशास्त्रे करां हिम्मत हासिल केरम ताके असन उमीद भोए (परमेशर तैन्ने केरेलो जेसेरे बारे मां तैनी वादो कियोरोए)। 5 अवं प्रार्थना केरताई कि परमेशर तुसन सबर ते हिम्मत दे, ताके तुस यीशु मसीह पत्ती चलते-चलते अक भोइतां ज़ीथ। 6 ते तुस सारे अकोट्टे भोइतां अक भोइतां एक्की आवाज़ी मां परमेशर, इश्शे प्रभु यीशु मसीहेरे बाजेरी बडयाई केरा। 7 एल्हरेलेड, एक्की होरि कबूल केरा, जेन्चरे मसीहे तुस कबूल कियोरेथ; एल्हरेलेड एन केरा ताके लोक परमेशरीरे बडयाई केरम। 8 अवं ज़ोताई, कि जैना वादे दादन पडदादन दित्तोरे थिये, तैना वादे पूरे केरनेरे लेड ते इन बांदू केरनेरे लेड कि परमेशर सच्चो, मसीह खतनो कियोरे लोकां केरो (यानी यहूदी केरो) सेवक बनो। 9 ते गैर कौमां भी परमेशरीरे दयारे वजाई सेई परमेशरीरे बडयाई केरन, जेन्चरे पवित्रशास्त्रे मां लिखोरूए, “गैर कौमन मां अवं तेरू शुक्र केरेलो, ते तेरे नव्वेरू भजन केरेलो।” 10 फिरी होरि ठैरी लिखोरूए, “हे गैर कौमां केरे लोकव, परमेशरीरे लोकन सेई साथी आनन्द केरा।” 11 ते फिरी पवित्रशास्त्रे ज़ोते, “हे गैर कौमां केरे लोकव, प्रभुएरी बडयाई केरा; ते हे मुलखां-मुलखां केरे सब लोकव; तैसेरी बडयाई केरा।” 12 ते फिरी यशायाह नबी पवित्रशास्त्रे मां लिखोरूए; “यिशेरू अक वंश निसेलू, ते ते गैर कौमन पुड हकोमत केरेलो। तैस पुड गैर कौमां उमीद रेखेली।” 13 अवं प्रार्थना केरताई परमेशर जै उमीदरो देनेबालोए तुसन तैस पुड विश्वास केरनेरे वजाई सेई सब किसमेरे आनन्द ते शैनति सेई भरे, कि पवित्र आत्मारी शक्ति सेई तुशशी उमीद बद्धती गाए। 14 हे मेरे ढ़लाव ते बेडन्नव, अवं एप्पू भी तुशशे बारे मां ज़ानताई, कि तुस भी भलैई सेई भेरतथ, ते तुसेई कुन कियेरू लोडे तुस रोडे च़ारे ज़ानतथ ते एक्की होरि शिखेली बटतथ। 15 फिरी भी मीं ज़ैखन कैखन याद करानेरे लेड तुसन बडे दिलेरी सेई लिखू, इन तैस अनुग्रहेरे वजाई सेई भोव, जै परमेशरे मीं दित्तोरोए। 16 कि अवं गैर कौमां केरे लेड यीशु मसीहेरो सेवक भोइतां परमेशरीरे खुशखबरीरी सेवा याजकेरी जेरि केरि; ज़ैस सेई गैर कौमां केरे लोक परमेशरे दानेरे रूपे मां दित्ते गाले, ज़ैस सेई ते खुश भोलो, जैना पवित्र आत्मा पवित्र बनोरेन। 17 अवं यीशु मसीहेरे वजाई सेई परमेशरीरी सेवाई पुड घमण्ड केरि बटताई। 18 किजोकि तैन गल्लां केरे अलावा मीं होरि कोन्ची गल्लां केरे बारे मां ज़ोनेरी दिलेरी नई, जैना मसीहे गैर कौमन केरे लेड वचन, ते कर्म, 19 ते निशान ते बडे-बडे कम्मां केरे शक्ति सेई, ते पवित्र आत्मा रे शक्ते ज़िरिये किय्यां, इडी तगर कि मीं यरूशलेम नगरे मरां देइतां च़ेरे पासन इल्लुरिकुम इलाके तगर मसीहेरो खुशखबरीरो पूरो-पूरो प्रचार कियो। 20 पन मेरे मनैरी उमंगे, कि जैडी-जैडी यीशु मसीहेरी खुशखबरी प्रचार नई भोरो, तैडी खुशखबरी शुनेई; एरू न भोए होरेरे मुनीयादी पुड घर बनेई। 21 पन जेन्चरे पवित्रशास्त्रे मां लिखोरूए, तेन्चरे भोए, “जैने तेसेरे बारे मां कधी नई ज़ोरू, तैना लालहे, ते जैनेई तैसेरे बारे मां नई शुनोरू तैना समझेले।” 22 एल्हरेलेड अवं तुसन कां एजनेरे लेड बार-बार रुकोरो राव। 23 पन हुनी मीं इन इलाकन मां तैन लोकन खुशखबरी शुनेइतां अपनू कम पूरू कियूं, ज़ैनेई मसीहेरे बारे मां न थियूं शुनोरू, ते मीं बडे सालां केरि तुसन कां एजनेरी इच्छाए। 24 एल्हरेलेड ज़ैखन अवं इसपानिया मुलखे मां गेड त तुसन मेई एडते गेडलो, किजोकि मीं उमीदे, कि तैस सफरे मां तुसन सेई मिली, ते ज़ैखन तुसन सेई मिली त अवं खुश भोई, ते अवं चाताई तुस मेरे इसपानिया गानेरे सफरेरे लेड मेरी मद्दत केरा। 25 पन हुनी त परमेशरीरे लोकां केरि सेवा केरनेरे लेड यरूशलेम नगरे गाताई। 26 किजोकि मकिदुनिया ते अखया इलाकेरे केरे विश्वासी लोकन इन रोडू लग्गू, कि यरूशलेम नगरेरे परमेशरीरे

लोकां केरे लेड जैना गरीब आन, किछ चन्दो केरन। 27 तेनेई एन खुशी सेई कियूं, तैना यरूशलेम नगरेरे लोकां केरे कर्ज़दारन, यहूदी लोकेई गैर कौमरे लोकन परमेशरीरे तरफां रोडी चीजां दित्ती, ते इन रोडी कि गैर कौमां केरे लोक इस दुनियारी रोडी चीजां यहूदन देन। 28 अवं पेडलो यरूशलेम नगरे जो च़लोरोई ताके जै चन्दो अकोट्टो कियोरोए तैन देई, तैदां पत्ती अवं तुसन कां रोम नगरे मां एइतां इसपानिया मुलखे जो गेडलो। 29 ते अवं ज़ानताई, कि ज़ैखन तुसन कां एज्जेलो, त मेरे एजनेरे वजाई सेई मसीह तुसन पूरे तरीके सेई बरकत देलो। 30 ते हे ढ़लाव ते बेडन्नव, प्रभु यीशु मसीह पुड इश्शे विश्वासेरे वजाई सेई ते पवित्र आत्मारे दित्तोरे प्यारेरे वजाई सेई अवं तुसन कां बिनती केरताई, कि मीं सेई साथी मेरे लेड परमेशरे कां लगातार प्रार्थना केरा। 31 कि अवं यहूदिया इलाकेरे गैर विश्वासी लोकन करां बचोरो रेई, परमेशरीरे तैना लोक जैना यरूशलेम नगरे मां आन खुशी सेई ते मद्दत कबूल केरन जै अवं तैन कां नेडलो। 32 ते अवं परमेशरीरे मेर्जी सेई आनन्दे कां एज्जी ते मीं तुसन साथी आराम मैल्ले। 33 अवं प्रार्थना केरताई, कि शान्ति देनेबालो परमेशर तुसन सेबभन सेई साथी भोए। आमीन।

16 अवं तुसन सेई फीबेरे बारे मां, जै इश्शी विश्वासी बेडने ते किखिया नगरेरे कलीसियारी सेवकाए, अवं चाताई तुस तैसेरी इज्जत केरा। 2 कि तुस जेन्चरे पवित्र लोकन सेई कियेरू लोडे, तैस प्रभु मां कबूल केरा; ते ज़ैस गल्ल्मी मां तैस तुसन करां केन्चेरी मद्दतरी ज़रूरत भोए, तैसेरी मद्दत केरा; किजोकि ते भी बडां केरि मद्दत केरनेबाली बल्के मेरी भी मद्दत केरनेबाली भोरीए। 3 प्रिस्क्ल्ला ते अक्विला जैना प्रभु यीशु मसीह मां मेरे मद्दगारन, नमस्कार। 4 तेनेई मेरे जान बचानेरे लेड अपनि जान खतरे मां रखोरि थी। सिर्फ अवं ए नई, बल्के गैर कौमां केरि सैरी कलीसियां भी तैन केरू शुक्र केरतिन। 5 ते तैस कलीसिया भी नमस्कार जैना तैन केरे घरे मां अकोट्टी भोतीए। मेरे द्लारे इइनिनुसे भी जै आसिया इलाकेरो मसीह पुड विश्वास केरनेबालो पेडलो विश्वासी ए, नमस्कार। 6 मरियम ज़ैसां तुशशे लेड बडी मेहनत केरि, नमस्कार। 7 अन्टूनीकुस ते यूनियासे जै मेरो कुटमेरोए, ते मीं सेई साथी केद भोरो थियो, ते प्रेरितन मां मुशूर, ते मीं करां पेडले मसीह मां थी, नमस्कार। 8 अम्पलियातुसे, जै प्रभु मां मेरो द्लारोए, नमस्कार। 9 उरबानुसे, जै मसीह मां इश्शो मद्दतगार, ते मेरे द्लारो इस्तखुसे नमस्कार। 10 अपिल्लेसे जै मसीह मां ईमानदार निस्सो, नमस्कार। अरिस्तुबुलुस ते तैसेरे टब्बरे जो नमस्कार। 11 मेरे कुटमेरे हेरोदियोने नमस्कार। नरकिस्सुसेरे टब्बरे जैना लोक प्रभु मां आन, तैन नमस्कार। 12 त्रूफैना ते त्रूफोसा ज़ैन कुआन्शेई प्रभु मां बडी मेहनत की, नमस्कार। द्लारी मसीही बेडन गिरसिस ज़ैसां प्रभु मां बडी मेहनत की नमस्कार। 13 रूफुसे जै प्रभु मां चुनोरोए, ते तैसेरी अम्मा जै मेरी अम्मारी ज़ेरि ए, दुइयन नमस्कार। 14 असुक्रितुस ते फिलगोन ते हिर्मास ते पत्रुबास ते हर्मास ते तैन केरे सैथी विश्वासी लोकन नमस्कार। 15 फिलुलुगुस ते यूलिया ते नेर्युस ते तैसेरी बेडन, ते उलुम्पास ते तैन केरे साथी सब परमेशरीरे लोकन नमस्कार। 16 मसीहेरे प्यारे सेई एक्की होरि जो नमस्कार केरा। तुसन भी मसीहेरे सैरी कलीसियारे तरफां नमस्कार। 17 हुनी हे ढ़लाव ते बेडन्नव, अवं तुसन कां बिनती केरताई, कि जैना लोक तैस शिखारे खलाफ जै तुसन मांए, खलबली बनातन, ते ठोकर खानेरी वजा भोतन, तैन करां खबरदार राथ; ते तैन करां दूर राथ। 18 किजोकि एरे लोक इश्शे प्रभु यीशु मसीहेरी नई, पन अपने फैदरेरे लेड सेवा केरतन; ते तैना रोडी-रोडी गल्लां केरतन ते चापलूसी सेई सिधे सादे लोकन थोखो देतन। 19 तुशशे हुक्म मननेरे बारे मां सेबभी लोकन पतो च़ललोरोए; एल्हरेलेड अवं तुशशे बारे मां आनन्द केरताई; पन अवं इन चाताई, कि तुस भलाई केरनेरे लेड अक्लमन्द बना, पन बुराई केरनेरे लेड सादे बना। 20 शान्ति देनेबालो परमेशर शैताने जल्दी तुशशे पवन सेई इलेन्चालो। इश्शे प्रभु यीशु मसीहेरो अनुग्रह तुसन पुड भोतो राए। 21 तीमुथियुस जै मीं सेई साथी कम केरते, ते लूकियुस ते यासोन ते सोसिपत्रुस मेरे कुटुमबी केरे तरफां तुसन नमस्कार। 22 मेरे चिट्ठी लिखने बाले तिरितियुसेरू प्रभु मां तुसन

नमस्कार। 23 गयुस भी तुसन नमस्कार ज़ोते ज़ेसेरे घरे मां अवं राताई, तैड़ी कलीसियारे लोक अकोट्टे भोतन। इरास्तुस ज़ै नगरेरो भण्डारीए, ते ढला क्वारतुसेरू तुसन नमस्कार। 24 अवं प्रार्थना केरताई, इश्शे प्रभु यीशु मसीहेरो अनुग्रह तुसन पुड़ भोतो राए। आमीन। 25 हुनी तुसन ज़ै खुशखबरी मीं प्रचार की, मतलब यीशु मसीहेरे प्रचाररे मुताबिक विश्वासे मां मज़बूत केरि बटते, तैस भेदेरे प्रकाशेरे मुताबिक ज़ै बड़े पेड़लो देंतो छप्पोरो राव। (aiōnios g166) 26 पन हुनी बांदो भोड़तां सनातन परमेशेरे हुक्मे सेइं नेबी केरे किताबां केरे ज़िरिये सेब्भी कौमन ज़ोवरोए, कि तैना विश्वासेरे ज़िरिये सेइं हुक्म मन्नेबाले भोड़ गान। (aiōnios g166) 27 तैस्से एक्की बड़े अक्लमन्द परमेशेरी यीशु मसीहेरे ज़िरिये सदा महिमा भोती राए। आमीन। (aiōn g165)

1 कुरिन्थियों

1 अवं पौलुस ई चिट्ठी लिखने लोरोई। अवं, यीशु मसीहो प्रेरित भोनेरे लेइ परमेशरे मेर्री सेई कुजावरोई। मेरो विश्वासी साथी सोस्थिनेस भी मीं सेई साथी आए (जै मेरी मद्दत करेने लोरोए)। 2 तुस जैना कुरिन्थुस नगरेरे कालिसियारे विश्वासी आथ, परमेशरे तुस यीशु मसीह मां अपने लोकां केरे रूपे मां अलग कियोरेथ, त कने पवित्र भोनेरे लेइ कुजोरेथ। तैन सेबन्धी केरां नव्वे जैना हर ठैरी इश्शे त कने अपने प्रभु यीशुएरे नव्वे सेई प्रार्थना करतन। 3 इश्शे बाजी परमेशर, ते प्रभु यीशु मसीहरे तरफां तुसन अनुग्रह ते शान्ति मैलती राए। 4 अवं तुश्शे बारे मां अपने परमेशरेरु हर वक्त शुक्र करताई, एल्हेरेलेइ कि परमेशरोरे ई अनुग्रह तुसन पुड़ यीशु मसीह मां भोव। 5 किजोकि तुसेई हर लिहाजे सेई बेडि बरकतां हासिल कियोरिन, किजोकि तुस मसीह सेई साथी अक आथ। एल्हेरेलेइ तैने तुसन अपनू वचन ज़ोनेरी ते समझनेरी खास काबलीत दितोरीए। 6 एन्चरे परमेशरे तुश्शे लेइ पक्कू कियूं कि मसीहरे बारे मां सन्देश सच्चै। 7 हुनी तुसन कां सारां आत्मिक वरदानां आन, किजोकि तुस इश्शो प्रभु यीशु मसीह बांदो भोनेरे बड़े इंतजारे मां आथ। 8 परमेशर तुसन आखरी तगर विश्वासे मां मज़बूत भी केरेलो, कि तुस इश्शे प्रभु यीशु मसीहरे वापस एजनेरे दिहाड़े बेइलजाम भोथ। 9 परमेशर एन्चरे केरेलो, किजोकि जैन किछ तै ज़ोते, तैस केरनेरे मां ते वफादारे। ते तैने तुस अपने मट्टे इश्शे प्रभु यीशु मसीहरे संगती मां कुजावरेथ। 10 हे ढूलाव ते बेइनव, अवं इश्शो प्रभु यीशु मसीहरे अधिकारे सेई इन केरनेरी बिनती केरताई, कि सब एककी होरि सेई राजामंद भोथ; ते तुसन मां फिरके न भोन, पन अक मन भोथ, ते अक्के खियाल रख्खा। 11 किजोकि हे मेरे ढूलाव ते बेइनव, खलोएरे टब्बरेरे लोकेई मीं तुश्शे बारे मां ज़ोवरुए, कि तुसन मां लड़ाई लोरिन भोने। 12 मेरु ज़ोनेरो मतलब ई आए, कि तुसन मरां कोई त अपनो आप, “पौलुसेरे ज़ोते,” कोई “अपुल्लोसेरो,” कोई “कैफारो,” कोई “मसीहो ज़ोते।” 13 जैन तुस केरतथ तैन ठीक नई, कुन मसीह बेनटोव? कुन पौलुस कूसे पुड़ चाढो जेव? या तुसन पौलुसेरे नव्वे पुड़ बपतिस्मो मैलो? 14 अवं परमेशरेरु शुक्र केरताई, कि क्रिस्तुस ते गयुमेरु अलावा, मीं तुसन मरां केन्ची बपतिस्मो नई दितोरो। 15 कि एरु न भोए, कोई ज़ोए, कि तुसन मेरे चले बन्नेरे लेइ बपतिस्मो मैलो। 16 हौं मीं याद आऊं, मीं स्तिफन्यासेरे टब्बरे भी बपतिस्मो दित्तो; एन केरे अलावा, अवं न जैनी कि मीं होरि केन्ची बपतिस्मो दित्तो। 17 किजोकि मसीहे अवं बपतिस्मो देनेरे लेइ नई, बल्के खुशखबरी शुनानेरे लेइ भेजोरोई, ज़ैखन अवं लोकन परमेशरोरे सन्देश शुनाताई त अवं मैन्हु केरे चलाक खियालां केरो इस्तेमाल न केरि, एरु न भोए कि मसीहेरु कूसे बेफैडू भोए। 18 किजोकि कूसेरी कथा नाश भोने भालां केरे लेइ बेवकूफीए, पन असन मुक्ति मैलने बालां केरे लेइ परमेशरेरी शक्ति आए। 19 किजोकि पवित्रशास्त्रे मां परमेशर ज़ोते, “अवं इन हिरेइलो दुनियारे लोकां केरे खियालन कि तैना सोचतन कि तैना ज्ञानी आन, हकीकति मां तैना बेकार खियाल आन। अवं साबत केरेलो कि तैना अक्लमन्द नई।” 20 त फिरी, अक्लमन्द मैन्हु केरे बारे मां अस कुन ज़ोम? यहूदी केरे कानूनेरे महिर मैन्हु केरे बारे मां अस कुन ज़ोम? इस दुनियारे लोकां केरे बारे मां कुन ज़ोम जैना ज़ोने मां चलाकन? परमेशरे तैना सारे बेवकूफ बनाए ते तैन केरि अक्ल बेफैडू बकवास साबत की (aiōn g165) 21 किजोकि ज़ैखन परमेशरेरे ज्ञानेरे मुताबिक दुनियां ज्ञान सेई परमेशर न ज़ानो, त परमेशरे इन रोडू लग्गू, इस प्रचाररे बेवकूफरे मुताबिक विश्वास केरनेबालन मुक्ति दे। 22 यहूदी त निशान चातन, ते गैर कौमां ज्ञानेरे तोपी मां आन। 23 पन अस त तैस कूसे पुड़ चाढोरे मसीहो प्रचार केरतम ज़ै यहूदी केरे लेइ ठोकरारी वजाए, ते गैर कौमां केरे लेइ बेवकूफीए। 24 पन जैना परमेशरे (अपने लोक भोनेरे लेइ) कुजोरेन, कुन यहूदी, कुन गैर कौमां, तैन केरे लेइ मसीह परमेशरेरी शक्ति, ते परमेशरेरु ज्ञाने। 25 किजोकि परमेशरेरी बेवकूफी मैन्हु केरे ज्ञाने करां जादे ज्ञान बालीए; ते परमेशरेरी

कमज़ोरी मैन्हु केरे शक्ति करां जादे ज़ोरे बालीए। 26 हे ढूलाव ते बेइनव, इस बारे मां सोचा ज़ेइस परमेशरे तुस कुजाए तुस केरे थिये, कि न जिसमेरे मुताबिक बड़े ज्ञानी, ते न बेडि शक्तिबाले, ते न इज़्जतदार धररे कुजाए। 27 ज्ञाने बालन शरमिन्दा केरनेरे लेइ परमेशरे तैना चुने जैना दुनियारे नज़री मां बेवकूफन। ते ताकतबरन शरमिन्दा केरनेरे लेइ परमेशरे तैना चुने जैना दुनियारे नज़री मां कमज़ोरन। 28 परमेशरे तैना चुने जैना दुनियारी नज़री मां नीच ते घटिया आन, बल्के जैना अस्थी भी नई तैना भी चुने, कि तैन जैना आन, बेकार केरन। 29 परमेशरे एन केरु ताके कोई प्राणी परमेशरेरे सामने घमण्ड न केरि सके। 30 पन परमेशरे तुस यीशु मसीह सेई अक कियोरेथ, ते मसीहरे ज़िरिये तेने अपनू ज्ञान दितोरुए। परमेशर अपने नज़री मां असन धर्मी भी बनाते। मसीहरे ज़िरिये अस पवित्र किये जे, ते तै असन इश्शे पापन करां आज़ाद केरते। 31 ताके ज़ेन्चरे पवित्रशास्त्रे मां लिखोरए, तेन्चरे भोए, “कि ज़ै घमण्ड केरे तै तैस पुड़ घमण्ड केरे जैन प्रभुए कियोरुए।”

2 हे ढूलाव ते बेइनव, ज़ैखन मीं तुसन परमेशरेरे बारे मां सन्देश शुनव, त मीं बेडि गल्लां इस्तेमाल न की, कि अवं अपने आपे ज्ञानी हिरेई। 2 किजोकि मीं इन थापेरु थियूं कि तुसन मां यीशु मसीह, बल्के कूसे पुड़ चाढोरे मसीहरे अलावा होरि कोई गल न केरि। 3 ते कमज़ोरी ते डरे सेई तुसन सेई साथी, ते बड़ी थरकतो तुसन सेई साथी राव। 4 ते मेरे शिक्षाई, ते मेरे प्रचारे मां ज्ञानेरी लालचानेरी बैली गल्लां न थी; पन पवित्र आत्मा शक्ति सेई इन हिराव कि जै सन्देश मीं शुनव ते सच थियो। 5 एल्हेरेलेइ की तुश्शो विश्वास मैन्हु केरे ज्ञाने सेई नई, पन परमेशरेरे शक्ति पुड़ निर्भर भोए। 6 फिरी भी अवं आत्मिक सिद्ध लोकन ज्ञानेरो सन्देश शुनाताई, पन इस दुनियारे लोकां केरो नई, ते इस दुनियारे हाकिमां केरु नई जैना नाश भोनेन। (aiōn g165) 7 पन अस परमेशरेरु तैन छपोरु ज्ञान भेदेरे रीति पुड़ ज़ोतम, जैन परमेशरे दुनिया बनाने करां पेइलू इश्शे महिमा मेरे ठहराव। (aiōn g165) 8 परमेशरोरे ई मकसद इस दुनियारे हाकिमन मरां केन्चे भी न समझो, किजोकि अगर समझते भोथे, त महिमा बालो प्रभु कूसे पुड़ न चाढेथे। (aiōn g165) 9 पन जेन्चरे पवित्रशास्त्रेरे मां लिखोरुए, “कि जैन न एछुछेई लाव, न कन्नेई शुनु, ते जैना गल्लां मैन्हु केरे दिले मां न एई, तैना सब परमेशरेरे तैन केरे लेइ तियार की, जैना तैस सेई प्यार केरतन।” 10 पन परमेशरे पवित्र आत्मा ज़िरिये सेई असन पुड़ बांदू कियूं; किजोकि पवित्र आत्मा सब गल्लां, बल्के परमेशरेरी दुगी गल्लां ज्ञानते। 11 मैनन मरां कौन केसेरी गल्लां ज्ञानते, सिर्फ मैनेरी आत्मा ज़ै तैस मांए, तेन्चरे परमेशरेरी गल्लां भी कोई न ज्ञाने, सिर्फ परमेशरोरो आत्मा। 12 पन असन दुनियारी आत्मा नई, पन ते आत्मा मैलोरोए, जै परमेशरेरे तरफांए, कि आस तैन गल्लन समझम, जैना परमेशरे असन दितोरिन। 13 एल्हेरेलेइ अस मैन्हु केरे ज्ञानेरी शिखैलोरी गल्लन मरां नई, पन पवित्र आत्मा शिखैलोरी गल्लन मरां आत्मिक गल्लां आत्मिक ज्ञाने सेई समझातम। 14 पन जिसमानी मैन्हु परमेशरेरे आत्मारी सच्चैई कबूल न केरे, किजोकि तैसेरेलेइ तै बेवकूफीए, ते न तै तेन सेमझी सके, किजोकि तैना सिर्फ मैलोरो आत्मा ज़िरिये सेमझी गैतिन। 15 पन जैन लोकन पवित्र आत्मा मैलोरो तैना, तैन पैरी गल्लन परखतन ज़ैना पवित्र आत्मा शिखलत। पन जैन लोकन पवित्र आत्मा नई मैलोरो तैना, तैन न सेझी बटन जैन पवित्र आत्मा मैलोरोए। 16 इन सच आए, किजोकि पवित्रशास्त्र ज़ोते, “कोई न ज्ञाने प्रभुएरे मने मां कुने।” पन पवित्र आत्मा असन विश्वासी लोकन मसीहोरे मने दितोरोए।

3 हे ढूलाव ते बेइनव, ज़ैखन अवं तुसन कां थियो त तुसन सेई एन्चरे सब गल्लां न केरि बटो, जेन्चरे आत्मिक लोकन सेई; पन जेन्चरे तैन सेई जैना मसीह मां बच्चेन। 2 मीं तुसन परमेशरेरे वचने मरां सिर्फ बुनियादी गल्लां केरि शिक्षा दिती ते दुग्धी सच्चैई नई। किजोकि तैस वचने तुस तै शिक्षा हासिल केरनेरे ते समझनेरे काबल न थिये, बल्के हेजू भी हासिल केरनेरे काबल नई। 3 किजोकि हेजू तगर भी गैर विश्वासी केरे ज़ेरे आथ।

एल्हेरेलेइ कि जैखन तुसन मां बैर, ते लडाइयन, त कुन तुस गैर विश्वासी केरे जेरे न भोए? तुस एरे लोकां केरि जेरि जिन्दगी ज़िनि लोरेथ, जैन केरो रिशतो प्रभु सेई न भोए। 4 एल्हेरेलेइ अक ज़ोते, “अवं पौलुसेरोई,” ते होरो ज़ोते, “अवं अपुल्लोसेरो आई,” त कुन तुस एरे लोकां केरि जेरि जिन्दगी ज़िनि बाले न भोए, जैन केरो रिशतो प्रभु सेई न भोए। 5 अपुल्लोस कौने? ते पौलुस कौने? सिर्फ सेवक, जैन केरे ज़िरिये तुसेई प्रभु पुड विश्वास कियो, असन मरां हर केन्चे कम कियूं जेन्चरे परमेशरे केरनेरे लेइ दित्तु। 6 अगर अवं तुशुशी तुलना ऊडारे सेई केरि त मीं बीज बेंवं, अपुल्लोसे सम्गू, पन परमेशरे बडावं। 7 एल्हेरेलेइ न त लानेबालो किछे, ते न सगने बालो किछे, पन परमेशर ज़ै बडाने बालोए। 8 लानेबालो ते सगने बालो दुइये अक्कन; पन हर मैन्हु अपने-अपने मज़दूरो फल मैलनोए। 9 किजोकि अस परमेशरे सेई साथी कम केरनेबाले आम, तुस एरे ऊडारां केरे जेरे आथ जैन केरो तलक परमेशरे सेई आए, ते इसेरे आलाव तुशुशी तुलना एरे घरे सेई केरताई जैन परमेशरे बनावरुए। 10 परमेशरे जैन कम मीं केरनेरे लेइ दितोरु थियूं, मीं तैन अक्लमन्दी सेई कियूं; अवं माहिर मिसेरो जेरो आई, मीं तुशुशे नगरे मां खुशखबरी प्रचार की ते शुरु मां तुसन यीशु पुड विश्वास केरनेरे लेइ मदत की, तैदुं बाद ज़ैस कम्मरी शुरुआत मीं कियोरी थी, होरे मसीही सेवा केरनेबाले तेस बुनियादी पुड लगातार कम केरते राए। पन असन मरां हर एक्की कम केरनेबाले ध्याने सेई सोचोरु लोडे, कि असेई परमेशरेरु कम केन्चरे लोडे कियोरु। 11 किजोकि यीशु मसीह सच्ची बुनियाद आए, ते होरो कोई हॉरि बुनियाद न बनेइ सके, तैन इन आए, कोई तुसन मुक्ति हासिल केरनेरे लेइ नर्वी शिक्षा न शिखैली बटे, मीं तुसन सेई पेइलु ज़ोवरु कि परमेशर असन यीशु मसीहरे ज़िरिये मुक्ति देते। 12 ते अगर कोई इस मुनीयादी पुड सोन्नु चाँदी या कीमती घोइ या कैडु या घास फूसोरो रदो रखते। 13 जैखन मसीह फिरी वापस एज्जेलो, त अग हर एक्केरे कम्मरे परखेली, ते अग हर मैनेरे कम्मरी कीमत हिराली। 14 जेसेरु कम तैस अग्गी सेई न फुकोलू, तैस मज़दूरी मैलनीए। 15 ते अगर केन्चेरु कम फुकोलू, त तैस नुकसान भोलो; पन ते एप्पु बन्नोए पन फुकोते-फुकोते। 16 कुन तुस न ज़ानथ, कि तुस परमेशरेरु मन्दरथ, ते परमेशरेरो आत्मा तुसन मां रहते? 17 अगर कोई तुसन नुकसान पुजाए, त परमेशर तैस नाश केरेलो; किजोकि परमेशरेरु मन्दर पवित्रे, ते तैन तुस आथ। 18 कोई अपने आपे धोखो न दे, अगर तुसन मरां कोई इज दुनियाये लोकन मां अपने आपे अक्लमन्द सम्झ्ते, त तैस दुनियायी नज़री मां बेवकूफ बनोरु लोडे; ताके परमेशरेरे नज़री मां सच्चे ज़ानी बने। (aiōn g165) 19 किजोकि इस दुनियायी अक्ल परमेशरे कां बेवकूफीए, जेन्चरे पवित्रशास्त्रे मां लिखोरुए; “परमेशर ज़ैन्न तैन केरे ज़लैकी मां फसाते।” 20 ते फिरी पवित्रशास्त्र इन भी ज़ोते, “प्रभु ज़ैनी केरे खियालन ज़ानते कि बैफेइदेन।” 21 एल्हेरेलेइ कोई मैनु पुड घमण्ड न केरे, किजोकि किछ परमेशरे तुशुशु भलरे लेइ दितोरुए। 22 तैन इन आए कुन अवं पौलुस, कुन अपुल्लोस, कुन कैफा, कुन दुनिया, कुन ज़ीनु, कुन मरनु, कुन ई वक्त, कुन एजनेबालो वक्त, सब किछ तुशुशुए। 23 ते तुस मसीहरेथ, ते मसीह परमेशरेरोए।

4 मैन्हु असन मसीहरे सेवक, ते परमेशरेरे भेदां केरे भण्डारी सम्झन। 2 जेन्चरे कि ज़ैस मैन्हु तैसेरे मालिके जैन कम दितोरि भोए, तैने तैन कम केरने मां वफादार लोडे रावरु, जेसेरो तैस हुक्म दितो जेवरोए। 3 पन मेरे खियाले मां ई गल निकडीए, कि तुस या मैनु मरां कोई फैसलो केरनेबालो मीं परखे, बल्के अवं अपने आपे न परखी। 4 किजोकि मेरो ज़मीर मीं कोन्ची गल्ली मां दोषी न ठहराए, पन इस सेई अवं बेइलजाम न ठहरी, किजोकि मेरो परखने बालो प्रभुए। 5 ते ज़ांतगर प्रभु वापस न एज्जे, पेइली केन्चेरो इन्साफ न केरा, तैए लोकां केरे सारे खियाल साफ तरीके ज़ोलो, जैन केरे बारे मां होरो कोई तैन न ज़ाने, ते तैन केरे दिलां केरे इरादे बांटे केरेलो। तैखन परमेशरेरी तरफां हर केन्चेरी तारीफ़ भोनीए। 6 हे दूलाव ते बेइनव, मीं इन गल्लन मां तुशुशे लेइ अपनि ते अपुल्लोसेरी बेंस, मिसालारे रीति पुड

कियोरीए, एल्हेरेलेइ कि तुस इशु ज़िरिये सेई शिखा, कि जैन पवित्रशास्त्रे मां लिखोरे करां अग्रोवं न बधा, ते एक्केरे पासे ते होरेरे खलाफ घमण्ड न केरथ। 7 केन्चे तू होरन करां रोडो नई बनोरो। सब किछ तीं परमेशरेरे तरफां दित्तु जोरुए, अगर तीं सब किछ परमेशरेरे दितोरु त तुसन घमण्ड केरनेरो अधिकार नई। 8 तुस त रज़ोरेथ; तुस दौलतमन्द भोइजेइ, तुसेई इशुशे बगैर राज़ कियूं; पन रोडू भोथू कि तुस राज़ केरेथे ते अस भी तुसन सेई साथी भोथे। 9 मेरी सम्झी मां परमेशरे अस प्रेरित लोक सेभना पती तेन लोकां केरे जेरे ठहरावरेम, जैन केरे मौतरो हुक्म भोइ जेवरोए; किजोकि अस दुनियाये ते स्वर्गदूतां, ते मैन्हु केरे लेइ अक तमाशो बनोरेम। 10 लोक असन बेवकूफ सम्झतन किजोकि अस मसीहरे बारे मां प्रचार केरतम, पन तुस गेतली सेई सोचतथ कि तुस अक्लमन्द मसीही आथ। बडे लोक सम्झतन कि असन कां कोई अधिकार नई। पन तुस घमण्ड सेई ज़ोतथ कि तुसन कां परमेशरेरे तरफां शक्ति आए, तैना इशुशी आदर न केरन पन तुशुशी आदर केरतन। 11 अस इस वक्ते तगर नियन्ने-दुलिशोरे, ते छिनदोरे लिगडन मां आम, ते धक्के खातम, ते असन कां घर नई; 12 ते अपने हथेई सेई कम केरतां मेहनत केरतम। लोक बुरु ज़ोतन, अस तैन बरकत देतम; तैना सतातन, अस झैल्लतम। 13 तैना बदनम केरतन, अस नेरमी सेई गल केरतम, इडी तगर कि, अज तार लोक हेजु भी इशुशी इज्जत न केरन, तैना ज़ोतन कि इशुशी कोई कीमत नई। 14 मेरी इना गल्लां लिखनेरो मक्सद ई नई कि तुसन छिथेई, पन अवं तुसन सुधारने चाताई, किजोकि तुस मेरे बचां केरे जेरे आथ जैन सेई अवं प्यार केरताई। 15 किजोकि अगर मसीह मां तुशुशे शिखालनेबाले दश हज़ार भी भोथे, फिरी भी तुशुशे बडे बाजी नई, एल्हेरेलेइ कि मसीह यीशु मां खुशखबरी सेई अवं तुशुशे बाजी केरो जेरो भोव। 16 एल्हेरेलेइ अवं तुसन कां मिनत केरताई, कि मेरी जेरि चाल च़ला। 17 एल्हेरेलेइ मीं तीमुथियुसे जैन प्रभु मां मेरु दूलारु, ते वफादार मट्टुए, तुसन कां भेजोरुए, ते ते तुसन यीशु मसीह मां मेरु चालचलन याद करालो, जेन्चरे कि अवं हर एक्की ठेरी हर कलीसिया मां शिक्षा देताई। 18 तुसन मरां बडे लोक सोचतन कि अवं तुसन कां नई एज्जो, एल्हेरेलेइ तैना घमण्ड केरतन। 19 पन प्रभु चाए त मीं तुसन कां जल्दी एज्जुए, ते न सिर्फ तैन घमण्ड केरनेबालां केरि गल्लां नई, पन तैन केरि शक्ति भी ज़ैनेलो। 20 किजोकि परमेशरेरु राज़ गल्लां केरु नई, पन शक्ति मांए। 21 अगर हेजु भी तुसेई बुरी बत नई शारोरी, अवं तुस सेखती सेई झिडक देइलो। पन अगर तुसेई बुरी बत शारी त अवं तुसन सेई नेरमी त कने प्यारे सेई बर्ताव केरेलो।

5 इडी तगर शुन्ने मां ओरुए, कि तुसन मां बदमाशी भोचे, मतलब एरी बदमाशी जेरि गैर विश्वासी लोकन मां भी न भोए, कि अक मैन्हु अपने बेबानी-अम्मा रखते। 2 तुसेई त दुःख कियोरो लोडतो थियो ते उदास भोरु लोडतु थियूं, ते ज़ैनी मैने एरु कियूं तै कढोरो लोडतो थियो, पन इसेरे बदले तुस घमण्ड केरतथ। 3 चाए अवं तुस सेई साथी नई, पन मेरे विचार तुसन सेई साथी आन, चाए अवं तैडी नई, फिरी भी मेने मां इन आए, कि एरु कम केरनेबालेरे बारे मां फैसलो केरने लोरोई। 4 इन तैन आए जैन केरनेरी ज़रूरत आए। हकीकत मां इशुशे प्रभु यीशु मसीहोरो अधिकार तुसन कां आए, इन पिशैनातं विश्वासी केरे रुपां अक्टोई भोथ। इन एरु आए कि अवं भी अपने मेने मां तैडी आई। ते फिरी प्रभु यीशु मसीहरे ज़िरिये। 5 तैस मैन्हु ज़ैने पापी बर्ताव कियोरो, तैस अपने टोली मरां कडा ते तैस मैन्हु शैतानेरे अधिकारे मां वापस देथ, इस उमीदी सेई कि तै अपने पापन करां मन फिरालो। किजोकि अगर तै पापन करां मन फिरालो त तैस प्रभु यीशु मसीहरे इन्साफेरे दिहाडे मुक्ति मैलेली। 6 घमण्ड केरनु बंद केरा, कि तुस न ज़ानथ, कि थोडू ज़ेरु खमीर पूरे सन्नोरे अट्टे खमीर केरते। 7 परानू खमीर केढतां, अपनो आप साफ केरा, कि नवंवू सनोरु अट्टे बना; ताके तुस अखमीर राथ, किजोकि इशुशो भी फ़सह ज़ै मसीहै, ते बेनिदान भोरुए। 8 ते एज्जा अस तिहारे मां आनन्द मनाम, न पुराने खमीरे सेई न बुरेई, ते दुष्टरे खमीरे सेई, पन सिधौवैई, ते सचैइयरे बगैर खमीरेरे रोटी सेई। 9 मीं अपने पेइले चिट्टी मां

लिखोरूप, कि बद्दमाशी करेनेबालां केरि संगती न केरथ। 10 इन नई, कि तुस बिलकुल इस दुनियारे बद्दमाशी करेनेबाले, या लालज करेनेबाले, या धोखो करेनेबालन, या मूरती पुजने बालां केरि संगती न केरा; किजोकि एन्चरे तुसेई इस दुनियाई मरां निसनू पैथू। 11 मेरू ज़ोनू त इन्ने, कि अगर कोई अपने आपे विश्वासी ज़ोते, ते बद्दमाशी करेनेबालो, या लालची, या मूरती पुजने बालो, या गैई देनेबालो, या पीने बालो, या धोखो करेनेबालो भोए, त तैस सेई साथ न रेखतथ, बल्के एरे मैन्हु सेई साथी रोटी भी न खेइयथ। 12 ई मेरी ज़िमेबारी नई, कि ज़ैना लोक विश्वासी नई तैन केरि निन्दा केरि। पन हकीकति मां तुसेई तैन लोकन सज़ा दित्तोरी लोडे ज़ैना तुशे कलीसियारे हिस्सो आन। 13 पन ज़ैना विश्वासी नई तैन केरो इन्साफ परमेशर केरते पन पवित्रशास्त्र ज़ोते, बुरू कम करेनेबाले मैन्हु अपने टोली मां एजने न देथ।

6 अगर तुसन मरां केन्चरी होरि विश्वासी सेई लड़ाई भोए, त तुसेई फैसलेरे लेइ अधर्मी हाकिमन कां न लोडे ज़ोवरू; तुसेई अपने कलीसियारे विश्वासी लोकन ज़ोवरू लोडे कि तैना तुशे मुकदमेरो फैसलो केरन कि कौन सही ते कौन गलते। 2 कुन तुस न ज़ानथ, कि परमेशररे लोकेई दुनियारे लोकां केरो इन्साफ केरनोए? ते अगर तुसेई दुनियारे लोकां केरो इन्साफ केरनोए, ते कुन तुस निकडे करां निकडे लैइड्यरो फैसलो केरनेरी काबल नई? 3 तुस ज़ानतथ कि एजनेबाले वक्ते मां असेई तैन स्वर्गदूतां केरो इन्साफ केरनोए ज़ैना स्वर्ग मरां शारोरे थिये, त पक्को तुस रोज़ेरी आम गल्लां केरो फैसलो केरि बटतथ। 4 अगर एरी गल्लां भोन, त तुसेई तैन केरो फैसलो केरनेरे लेइ तैन कां न लोडे जेवरी ज़ैन केरि आदर कलीसियारे लोकन मां न की गाए। 5 अवं तुसन छिथामेरे लेइ इन ज़ोताई, कि सच्चे तुसन मां अक भी अक्लमन्द न मैल्लो, ज़ै विश्वासी लोकां केरो फैसलो केरे। 6 बल्के विश्वासी लोकन एप्पू मांमेई मुकदमे भोतन, ते तैना भी गैर विश्वासी लोकां केरे सामने। 7 पन सच्चे तुसन मां बडो दोष त ईए, एप्पू मांमेई मुकदमे केरतथ, बल्के बेइन्साफ किजो न झैल्लथ? अपनो नुकसान किजो न झैल्लथ? 8 बल्के बेइन्साफ केरतथ, ते नुकसान पुजातथ, ते तै भी विश्वासी लोकन। 9 कुन तुस न ज़ानथ, कि बेइन्साफ लोक, परमेशररे राज़ेरे बारिस नई भोने? धोखो न खाथ, न वेश्यागामी, न मूरती केरि पूजा करेनेबाले, न आयाश, न लुच्चे, न तैना ज़ैना मडद मडदन सेई जिसमानी रिश्तो रखतन। 10 न चोर, न लालची, न पीने बाले, न गैई देनेबाले, न अंधेर केरनेबाले परमेशररे राज़ेरे बारिस भोनेन। 11 तुसन मरां पेइले किछ एरे थिये, पन प्रभु यीशु मसीहेरे नब्बे ते इश्शे परमेशररी आत्माई सेई तुशे पाप धोए जे, ते तुस पवित्र भोए ते धर्मी ठहराए। 12 तुसन मरां किछ ज़ोई बटतन, कि सब चीज़ां मेरे लेइ जेइज त आन, पन सब चीज़ां फेइदेरी नई, सब चीज़ां मेरे लेइ जेइज त आन, पन अवं कोन्ची भी चीज़ोरो गुलाम बनेलो। 13 तुसन मरां किछ ज़ोई बटतन, खानू पेटेरे लेइए, ते पेट खानेरे लेइ, एन सच्चे, पन परमेशर रोटी भी ते पेटे भी नाश केरेलो, पन जिसम बद्दमाशी केरनेरे लेइ नई, बल्के प्रभुएरे लेइए; ते प्रभु जिसमेरे लेइए। 14 ते परमेशरे, प्रभु यीशु अपने शक्ति सेई ज़ीतो केरो, ते तै असन भी ज़ीतो केरेलो। 15 कुन तुस न ज़ानथ, कि तुशेरी जाना मसीहेरे अंगन? ते कुन अवं मसीहेरे अंगन वेश्यारे अंगन सेई शामिल केरि? नई, कधी नई। 16 कुन तुस न ज़ानथ, कि ज़ै कोई वेश्याए सेई न जेइज रिश्तो रखते, ते तैस सेई अक जान भोते? किजोकि पवित्रशास्त्र ज़ोते, “कि तैना दुइये अक जान भोलां।” 17 ते ज़ै प्रभुएरी संगती मां रहते, ते तैस सेई साथी अक आत्मा भोते। 18 बद्दमाशी केरने करां दूर राथ, जेते होरे पाप मैन्हु केरते, तैना जानरे बेइरन, पन बद्दमाशी केरनेबालो अपने जानरे खलाफ पाप केरते। 19 कुन तुस न ज़ानथ, कि तुशेरी जान पवित्र आत्मारू मन्दरे; ज़ै तुसन मां आप, ते तुसन परमेशररी तरफां मैलोरोए? ते तुस अपने नई पन तुस परमेशररे आथ; 20 किजोकि प्रभुए अपनि जानरी कीमत देइतां तुस धिनोरेथ, एल्हेरेलेइ अपने जानरे ज़िरिये सेई परमेशररी आदर केरा।

7 हुनी अवं तुशे तैन सवालां केरो जुवाब देताई, ज़ैना तुसेई अपने चिट्ठी मां पुच्छे, तुसेई पुच्छू, इन रोडू आए कि लोक इला न बनान? 2 हौं इन ज़रूरी आए कि बद्दमाशी केरनेरे डरे सेई हर मडदेरी कुआन्श, ते हर कुआन्शरो मुन्श भोए। 3 मुन्श अपने कुआन्शरू हक पूरू केरे; ते तेन्चरे कुआन्श भी अपने मुन्शरू। 4 कुआन्शी अपने जिसमे पुड अधिकार नई, पन तैसेरे मनशरो अधिकारे; तेन्चरे मुन्शे भी अपने जिसमे पुड अधिकार नई, पन कुआन्शी। 5 तुस एककी होरि करां अलग न भोथ; पन सिर्फ थोडे चिरेरे लेइ बिस्तारे सेई कि प्रार्थनारे लेइ फुर्सत मैल्ले, ते फिरी अकोट्टे भोथ, कि एरू न भोए, शैतान तुसन परखे। 6 पन ज़ैन अवं इन जोने लोरोई ई सुझावे, न कि हुकम। 7 अवं इन चाताई, कि ज़ेरो अवं अडुलाव आई, तेरेह सब मैन्हु भोन; पन परमेशररे किछन इला केरनू वरदान दित्तोरूप, ते किछन अक्ल्लू रानेरू वरदान दित्तोरू। 8 मेरी सल्लाह अडुलां ते विधवां केरे ई आए, कि तैना अडुलाए रान, जेन्चरे अवं आई। 9 पन अगर तैना अपनो आप केबू न केरि बटन, त इला बनान, किजोकि इला बनानो इच्छान मां मसत राने करां रोडोए। 10 ज़ैन केरो इला भोरुए, तैन केरे लेइ अवं नई, बल्के प्रभु हुकम देते, कि कुआन्श अपने मुन्शे करां अलग न भोए। 11 (अगर अलग भोइ गाए, त होरो इला न बनाए; या अपने मुन्शे सेई फिरी मेल मिलेप केरे) ते मुन्श अपने कुआन्शी न शारे। 12 होरन सेई प्रभु नई, पन अवं ज़ोताई, अगर केन्ची विश्वासी हुलाएरी कुआन्श विश्वासी न भोए, ते तै कुआन्श तैस साथी राने सेई खुश भोए, त तै तैस न शारे। 13 ते ज़ैस कुआन्शरो मुन्श विश्वासी न भोए, ते तै मैन्हु तैस साथी राने सेई खुश भोए; तै मुन्शे न शारे। 14 किजोकि एरो मुन्श ज़ै विश्वासी न भोए, परमेशर तैस सेई एरो बर्ताव केरते जेन्चरे अपने लोकन सेई, किजोकि तैसेरी कुआन्श मसीही आए, ते एरी कुआन्श ज़ै विश्वासी न भोए, परमेशर तैस सेई एरो बर्ताव केरते जेन्चरे अपने लोकन सेई, किजोकि तैसेरो मुन्श मसीही आए। अगर एरू न भोथू कि विश्वास न केरनेबालो मुन्श या कुआन्श परमेशररे लोक न भोथे, तैखन तुशे बच्चे भी परमेशररे न भोथे। पन हुनी तुशे बच्चे भी परमेशररे भोइ जे। 15 पन ज़ै मडद ते कुआन्श विश्वासी न भोए, अगर तैना अलग भोन, त अलग भोने देथ, एस हालती मां कोई विश्वासी हुलाए या बेइन बन्धने मां नई। पन परमेशरे अस कुजोरेम कि सुखे सेई ज़ीम। 16 हे कुआन्शव तुस इस गल्ली याद रखा कि तुशे मुन्श तुशे वजाई सेई मुक्ति हासिल केरि बटतन, ते हे मुन्शव तुस याद रखा कि तुशे वजाई सेई तुशेरी कुआन्शां मुक्ति हासिल केरि बटतन। 17 ज़ैन किछ अवं जोने लोरोई तैसेरो नचोइ ई आए: हर मैन्हु तैस हालती मां रावरो लोडे ज़ै प्रभुए तैस दित्तोरीए ज़ेइस तैनी परमेशररू कुजानू शुनू। अवं इन सेइभी कलीसियान मां एन्चरे ठहराताई। 18 अगर कोई मैन्हु ज़ै खतनो कियोरे कुजोरो; त तै प्रभु यीशु पुड विश्वास केरते, तैस अपनो आप बगैर खतने बालो हिरानेरी ज़रूरत नई; ते अगर कोई मैन्हु ज़ेसेरो खतनो नई भोरो, ते तै प्रभु यीशु पुड विश्वास केरते, तैस खतनो कराने ज़रूरत नई। 19 न खतनो किछ चीजे, ते न खतनो न करानो, बल्के परमेशररे हुकम मन्ने बडे ज़रूरिन। 20 हर अक ज़ैस हालती मां कुजावरोए, तेन्चरे राए। 21 तू गुलाम थियो ज़ेइस परमेशररे कुजावरो थियो, फिरी भी परेशान न भोथ; पन अगर तू आज़ाद भोइ सकतस, त भो। 22 किजोकि ज़ैना गुलामेरे हालती मां कुजोरेन, तैना प्रभु मां आज़ादन, तेन्चरे ज़ैना प्रभु मां आज़ाद कुजोरेन, तैना मसीहेरे गुलामन। 23 परमेशररे तुस बडी कीमत देइतां धिनोरेथ, मैन्हु केरे गुलाम न बना, पन परमेशररे गुलाम बना। 24 हे हुलाव ते बेइनव, ज़ै ज़ैस हालती मां परमेशररे कुजवरोए, ते तैस्से हालती मां परमेशररे सेई साथी राए। 25 कुवैरी केरे लेइ मीं प्रभु करां कोई हुकम नई मैल्लेरो, पन प्रभुए दयाई सेई मीं अक्ल दित्तोरीए, ज़ैस पुड भरोसो कियो गाते, ते अवं ई सलाह देताई। 26 किजोकि इन दिहाइन मां विश्वासी लोकां केरे लेइ बुरू गल्लां भोने लोरिन, एल्हेरेलेइ मीं लगते कि इन तुशे लेइ रोडूए, अवं ई सलाह देताई कि ज़ैना ज़ेरे आन तैना एन्चरे रान। 27 अगर तेरी कुआन्श, त तू तैस करां अलग भोनेरी कोशिश न केर, ते अगर तेरी कुआन्श नई त तू कुआन्शी न तोप। 28 पन अगर तू इला भी केरस, त पाप नई; ते अगर कुवारी इलाई गाए त कोई

पाप नई; पन एरें लोकन इस दुनियाई मां बड़ी परेशनी भोली, ते अवं बचाने चाताई। 29 हे ढूलाव ते बेइदनेव, अवं इन ज़ोताई, इश्शो इस दुनियाई मां जादे वक नई रावरो, एल्हरेलेइ जादे फिक्र न केरा कि तुश्शी कुआन्शां आन या नई, पन प्रभुएरी सेवारे बारे मां सोचते राथ। 30 ते तेना ज़ैना लेरां देतन या ज़ैना खुश आन, या ज़ैना अपनि बनानेरे लेइ चीजन घिन्तन, इन सेबभी गल्लां केरे बारे मां जादे लोड़े सोचोरू (किजोकि इना सब गल्लां प्रभुएरी सेवा केरनि बिसरैली)। 31 तेना ज़ैना दुनियारी चीजां इस्तेमाल केरतन, तैनेई तैन सेइं लगाव न लोड़े रखोरू, किजोकि जेन्चरे अस ज्ञानतम ई दुनिया जल्दी खतम भोनेबालीए। 32 मेरी इच्छा ई आए कि तुस दुनियारे जिन्दगारी खुवाइशन करां आज़ाद राथ, अडूलाव मैन्हु प्रभुएरी सेवा केन्चरे केरनि ई फिक्र केरते कि प्रभुएर खुश केरे। 33 पन डूलावरो मैन्हु दुनियारी गल्लां केरि फिक्री मां रहते, कि केन्चरे अपने कुआन्शी खुश रखे। 34 तैने दूई चीजां केरे बारे मां सोचोरू लोड़े, अपनि कुआन्शा खुश केरनेरे बारे मां ते प्रभु खुश केरनेरे बारे मां। डूलावरी ते अडूलाई मां भी फकें, अडूलाई प्रभुएरी फिक्री मां रहतीए, कि केन्चरे अपनि आत्मा, ते जिसम दुइये पवित्र रखे, पन डूलावरी दुनियारे फिक्री मां रहतीए, कि अपने मुन्शे खुश रखे। 35 ई गल तुश्शे फेइदरे लेइ ज़ोताई, न कि तुसम फसानेरे लेइ, बल्के एल्हरेलेइ जेन्चरे लोड़े तेन्चरे कियू गाए, ताके तुस अक मन भोइतां प्रभुएरी सेवाई मां लोगोरे राथ। 36 ते अगर कोई इन समझे कि, अवं एपनी तेन कुवैरारू हक लोरोई मारने जेसेरी जवानी लोरी ढलने, त जेन्चरे चाए तै केरे, इस मां पाप नई, तै तैसेरो डूला भोने दे। 37 पन अगर ज़ैने बाजी अपने मने मां पक्को फैसलो कियोरोए, कोन्ची होरेरे दबावेरे अलावा तै केरते, त तैस कां तै अधिकारे ज़ैन तै केरनु चाते। ते अगर तै फैसलो केरते कि तैसेरी कुई ज़ेरी आए तेरही रखे, तै परमेशररी नज़री मां रौडू कम केरेलो। 38 ज़ै अपनि कुवैरारो डूला कराते, तै रौडू केरते, ते ज़ै न कराए तै भी रौडू केरते। 39 ज़ांतांगर कोन्ची कुआन्शारो मुन्शा ज़ींतो रहते, तांतांगर तैस सेइं साथी रावरू लोड़े, पन जेइस तैसेरो मुन्शा मेरि गाए, ज़ैस सेइं चाए डूला केरि बटतीए, सिर्फ विश्वासी लोकन मां। 40 पन अगर तै फिरी दुबारां डूला न केरे, त मेरे खियाले मां बड़ी धने ते अवं समझताई, कि परमेशररो आत्मा मीं चलाने लोरीए।

8 तुसेईं अपने चिट्ठी मां मूरतन कां चाढ़ोरी चीजां केरे बारे मां पुछोरू थियू, इस बारे मां अस ज्ञानतम, पन ज्ञान असन अपने बारे मां घमण्डी बनाते, पन प्यार सेइं होरि केरि तरक्की भोतीए। 2 अगर कोई समझे, कि अवं किछ ज्ञानताई, ते जेरू ज्ञानेरू लोड़े तेरू हेजू तगर न ज्ञाने। 3 पन अगर कोई परमेशरे सेइं प्यार केरते, ते तैस परमेशर पिशानते। 4 एल्हरेलेइ अवं खानेरे बारे मां जुवाब देनो चाताई, अस मूरती केरे सामने बलिदान कियोरी चीजां केरे खानेरे बारे मां ज्ञानतम, कि अस ज्ञानतम कि मूरती सच्चो परमेशर नई, सिर्फ एक्के सच्चो परमेशरे। 5 पन फिरी भी अन्बरे ते धेरतली पुड़ लोक बडे देबते ते प्रभु ज़ोतन, पन इश्शो लेइ अक्के परमेशर, तै इश्शो बाजी आए। तैने सैरी चीजां बनेइ, अस तैसेरे ज़िरिये ज़ींते रातम। एन्चरे असन कां अक्के प्रभुएर ते तै प्रभु यीशु मसीहो। तैसेरे ज़िरिये सब किछ बनव जेवं, अस तैसेरेलेइ ज़ींतेम। 6 पन सेबभी विश्वासी लोकन इसेरू ज्ञान नई; पन किछ लोक हेजू तगर मूरतन असली भोनेरी सोचनेरी आदते, एल्हरेलेइ ज़ैखन लोक मूरतन कां ब्राढ़तन, त तेना असली देबतन पूजा केरे रूपे मां सोचतन ते तैन केरो ज़मीर कमजोर भोइतां अशुद्ध भोइ गाते। 8 पन खानू लोकन परमेशरे कां न पुजाए, अगर अस न खाम, त असन किछ नुकसान नई, ते अगर खाम त कोई फेइदो भी नई। 9 पन हुशार राथ, एरू न भोए, कि तुश्शी ई आज़ादी कमजोर विश्वासे बालां केरे लेइ पाप केरनेरे लेइ वजा बने। 10 किजोकि अगर तीं ज़ैनी मन्दरे मां मूरतन कां चाढ़ोरू खातो लाए, ते तै विश्वासे मां कमजोर मैन्हु भोए, ते कुन तैसेरे ज़मीरे मां मूरती केरे सामने च़ेढ़ोरी चीजां केरे खानेरी दिलेरी न भोली। 11 एस रीति सेइं तेरे ज्ञानेरे वजाई सेइं तै विश्वासे मां कमजोर ढूला जेसेरे लेइ मसीह मरो तै मसीह पुड़ विश्वास केरनो न शारे। 12 एन्चरे तुस अपने विश्वासी लोकन ठोकर पुजेइतां न सिर्फ

तेन केरे पापी भोए, बल्के मसीहेरे भी पापी भोले। 13 इस वजाई सेइं अगर खानू कोन्ची विश्वास केरनेबालेरे लेइ ठोकर भोए, ते अवं कोन्ची तरीके सेइं कथी मास न खेइलो, एरू न भोए कि मेरू खानू कोन्ची विश्वास केरनेबालेरे लेइ ठोकरारी वजा बने। (aiōn g165)

9 अवं ज़ैन केरनु चाताई तैन केरनेरे लेइ आज़ाद आई। अवं अक प्रेरित आई, मीं प्रभु यीशु लावरोए ज़ै इश्शो प्रभुए, ज़ैन कम मीं प्रभुएरे लेइ कियू तुस तैसेरो नतीजोथ। 2 अगर होरे लोक इस गल्लनी न मननु कि अवं प्रभु यीशुएरो प्रेरित आई, त ढूलाव तुसेईं त लोड़े मन्नीरू। किजोकि मीं ए तुसम कां खुशखबरी आनोरी थी। तुश्शो प्रभु विश्वास इस गल्लनी साफ केरते कि अवं हकीकति मां तैसेरो प्रेरित आई। 3 ज़ैना लोक मेरे प्रेरित भोनेरे अधिकारे पुड़ सवाल पुच्छतन, तैन केरे लेइ मेरो ईए फैसलो आए। 4 कुन असन खाने पीनेरू हक नई? 5 कुन असन अधिकार नई, कि कोन्ची मसीही कुआन्शी सेइं डूला बनाम, जेन्चरे होरे प्रेरित, ते प्रभुएरे ढूला ते कैफा (यानी पतरस) केरतन? 6 या सिर्फ मीं ते बरनबासे ज़िन्दगी ज़ींनेरे लेइ कम कियोरू लोड़े? 7 को ज़ेरो फौजी अपनु खेइतां जंग केरते? या कौन बाग लेइतां तैसेरो फल न खाए? कौन भेइंखां रेखतां तैन केरू दुद्ध न पीए? 8 अवं इना गल्लां मैन्हु केरि रीति पुड़ नई लोरो ज़ोने, मूसरो कानून भी इन्ने ज़ोते। 9 एल्हरेलेइ मूसरो कानून ज़ोते, तैस मां इन लिखोरूए, “तुस खल्ले मां चलते बार दांतेरू आशी न बेंदथा।” कुन परमेशर दांतां केरि फिक्र केरते? नई। 10 या खास केरतां इश्शो बारे मां लिखोरू, हॉ इश्शो लेइ लिखोरूए, किजोकि ठीके कि जोटलने बालो उमीदी सेइं जोटले, उपाने बालो उमीदी सेइं उपाए। 11 असेईं तुसम परमेशररो सन्देश शुनोवरोए। जेन्चरे लोक बीज बेतन तेन्चरे असेईं तुसम मां परमेशररे वचनेरू बीज बेव। एल्हरेलेइ तुश्शो फरजे कि इश्शो रोज़ेरो खच्चो असन देथ। 12 ज़ै कि तुसेईं होरि लोकां केरि मद्दत की, ज़ेनेई तुसम प्रचार कियो, त मेरू त कने बरनबासेरू जादे हके। किजोकि अस तुश्शे पेड़ले प्रेरित आम, फिर भी असेईं अपने ज़रूरते चीजां केरे लेइ ज़बरदस्ती न की, तैसेरे बदले अपने मेज़ीं सेइं सब किछ झैल्लू कि मसीहेरे खुशखबरी पुड़ विश्वास केरनेरे लेइ केन्चरे लेइ रुकावट बनम। 13 कुन तुस न ज्ञानथ कि ज़ै पवित्र चीजां केरि सेवा केरते; ते मन्दरे मरां खाते; ते ज़ै बलिदान केरनेरे ठारारी सेवा केरते; तै बलिदान केरनेरे ठारी सेइं शामिल भोते। 14 एन्चरे प्रभुएर ठहराव, कि ज़ैना लोक खुशखबरी शुनान, तैन केरि ज़िन्दगारो गुजारो भी तैन लोकन करां लोड़े भोरो ज़ैना लोक खुशखबरी शुन्तन। 15 पन मीं इन अधिकारन मरां कोई भी इस्तेमाल न कियो। ते मीं एना गल्लां एल्हरेलेइ नई लिखोरी, कि मेरे लेइ एरू कियू गाए। बिलकुल नई! किजोकि इस करां त मेरू मरनु रौडूए; कि कोई मेरू घमण्ड बेफेइदू ठहराए। 16 ते अगर अवं खुशखबरी शुनेई, त मेरू किछ घमण्ड नई, किजोकि इन त मेरे लेइ ज़रूरीए, ते अगर अवं खुशखबरी न शुनेई, त मीं पुड़ अफ़सोस। 17 किजोकि अगर अवं इन कम अपने मेज़ीं सेइं केरताई, त मीं इनाम मैलेलू। पन अगर इन मेरी मेज़ीं सेइं नई, पन अगर परमेशरे ई जिमेदारी दितोरीए, त अवं कोन्ची इनामेरी उमीद न रेख्खी बेटि। 18 ते फिरी मेरू कुन इनामे? कि खुशखबरी शुनाने मां मसीहेरी खुशखबरी मुफ्त बेंटी; इडो तगर कि ज़ैन खुशखबरी मां मेरू हक्के, तैसेरो पूरो इस्तेमाल केरि। 19 किजोकि सेबभन करां आज़ाद भोने पुड़ भी मीं अपनो आप सेबभी केरो गुलाम बनाव; कि जादे करां जादे लोकन खिचतां ऐनीं। 20 अवं यहूदी केरे लेइ यहूदी बनो ताके यहूदन खिचतां मसीह मां ऐनीं, ज़ैना लोक यहूदी केरे कानूनेरे अधीन तेन केरे लेइ कानूनेरे अधीन न भोने पुड़ भी अधीन भोव, कि तैन ज़ैना कानूनेरे अधीन तेन खिचतां मसीह मां ऐनीं। 21 ज़ैना कानूनेरे अधीन नई तैन केरे लेइ अवं (पन अवं ज्ञानताई कि अवं परमेशररे कानूने करां हीन नई, किजोकि अवं मसीहेरे कानूनेरे अधीन आई) तेरो बनो, कि तैन खिचतां मसीह कां ऐनीं। 22 अवं विश्वासे मां कमजोरां केरे लेइ कमजोर बनो, ताके कमजोरन खिचतां मसीह मां ऐनीं, अवं सेबभी मैन्हु केरे लेइ सब किछ बनो, कि कोन्ची न कोन्ची तरीके सेइं लोकन मुक्ति मैल्ली। 23 ते अवं सब किछ

मसीहारे खुशखेबारे लेइ केरताई, कि अवं होरन सेइं साथी तैन बरकतां केरो हिसेदार भोईं। 24 कुन तुस न जानथ, कि दौडी मां त सब दौडतन, पन इनाम अक्के नेते, तुस तेरह दौड़ा, कि जीतथ। 25 ते हर अक पलवान हर किसमेरो परेज रखते, तै त अक शुक्ने बाले ताजेरे लेइ इन सब किछ केरते, पन अस त तैस ताजेरे लेइ केरतम जैन कथी नईं शुक्नू। 26 एल्हेरेलेइ अवं एन्चरे दौडताई, पन बगैर मकसेदे नईं, अवं भी एन्चरे मुकन सेइं लडताई, पन तैसेरो जेरो नईं जै हवाई मां लडते। 27 पन अवं अपने जानरी खुवैइशन मारताई, ते केबू मां केरताई; एरू न भोए कि होरन प्रचार केरि, ते मां इनाम न मैलेले।

10 हे ढूलाव ते बेइनव, अवं तुसन याद करानू चाताई, इश्शे दादे-पड़दादन सेइं बडे पेइले सुनसान ठैरी मां कुन भोवं, परमेशरे तैन केरे अग्नी-अग्नी बिदलार भेजतां तैन सेबहन बत हिराई, ते तैना सब लाल समुन्दरेरे पैनी मांमेइं एन्चरे पार किये जेन्चरे शुक्कोरी जमीनी मांमेइं। 2 ते तैन सेबभेईं बिदलारी मां, ते समुन्द्रे मां मूसेरो बपतिस्मो नेव। 3 ते तैन सेबभेईं ते रोटी खाइ, जै परमेशरे तैन स्वर्गोर् दित्ती। 4 तैन सेबभेईं अक्के पानी पिव जैन परमेशर तैन दित्तू, किजोकि तैना आत्मिक चट्टानी मरां पीते थिये, जै तैन सेइं साथी-साथी चलती थी; ते ते चट्टान मसीह थियो। 5 पन परमेशर तैन मरां बडन सेइं खुश न भोव, एल्हेरेलेइ तैना रेगिस्ताने मां मेरि जे। 6 इना गल्लां इश्शे लेइ खबरदारी भोइ, कि जेन्चरे तेनेईं लालच कियूं, तेन्चरे अस बुरी चीजां केरू लालच न केरम। 7 ते न मूरती केरि पूजा केरनेबाले बनम; जेन्चरे तैना किछ बनोरे थिये, जेन्चरे पवित्रशास्त्रे मां लिखोरू, “लोक तिहारे मां खाने पीने बिश्शे, ते फिरी बुरू केरनेरे लेइ उठे।” 8 ते न असां बदमाशी केरम; जेन्चरे तैन मरां किलेईं की, कि एक्की दिहाड़ी मां 23000 मेरे। 9 ते न अस प्रभु यीशु मसीह अजमाम; जेन्चरे तैन मरां किलेईं अजमाम, ते तैना सपन सेइं मेरि जे। 10 ते न तुस कुडकइथ, जेन्चरे तैन मरां किलेईं कुडकइव, ते परमेशररे तरफां भेजोरे स्वर्गदूते तैना मारे। 11 पन इना सब गल्लां, जैना तैन पुइ बीती, तैना खबरदेरारी जेरि थी, ते तैना इश्शी लेइ हदेइयत भी आन, जैना अस दुनियारे आखरी वक्ते मां रातम लिखी जेईं। (ai0n g165) 12 एल्हेरेलेइ जै विश्वासी समझते, “कि अवं विश्वासे मां मजबूताई,” ते खबरदार राए; कि तैस्से पापे मां फिरी न बिछेडे। 13 तुसन पुइ एरी अजमैइश नईं ओरी, जै मैनु केरे झल्लनेरे बेइरे, परमेशर वाफदारे, तै तुसन शेक्ति करां जादे अजमैइशी मां गाने न देलो, बल्के अजमैइशी सेइं साथी तैस मरां कढेलो भी; कि तुस झेल्ली भी बटथ। 14 एल्हेरेलेइ, हे मेरे ट्लाराव, मूरती पूजने करां बेचते राथ। 15 अवं समझदार बुझतां, तुसन सेइं जोताई, जैन अवं जोताई, तुस तैसेरे बारे मां सोचा कि सही आए या नईं। 16 जैखन अस यीशु मसीहारे मौती याद केरनेरे लेइ अकोट्टे भोतम, त अस दाछारो रस कटोरे सेइं पीतम, जेसेरे बारे मां असेईं परमेशररू शुक्र कियोरूए, ते अस ट्लोडोरी रोटी भी खातम, ई तैन बरकतन मां शामिल भोनेरो निशाने, जैना मसीहारे जानी ते खूने करां एइतन? 17 एल्हेरेलेइ, कि अक्के रोटीए जै मसीहे, चाए अस बडेम, अस अक जान भोतम किजोकि अस तेए अक्के रोटी खातम। 18 इस्राएलरे लोकं केरे बारे मां सोचा, जैखन सारे लोक परमेशररे लेइ चाडोरी रोटी खातन, तैना परमेशररे आराधनारे हिस्सेदार भोतन, तेन्चरे जैना लोक मूरतन कां बलिदान कियोरी चीजन खातन तैना मूरती केरि पूजाईं मां हिस्सेदार भोतन। 19 फिरी अवं कुन जोताई? कि मूरतरी बलिदान किछे, या मूरती किछे? 20 नईं, बल्के इन, कि तैना जैन बलिदान केरतन, तैना परमेशररे लेइ नईं, पन भूतां केरे लेइ केरतन, ते अवं न चैई कि तुस भूतन सेइं साथी शामिल भोथ। 21 तुस प्रभुएरे कटोरे, ते भूतां केरे कटोरे दुइयन मरां न पी बटथ। तुस प्रभुएरे मेजे ते भूतां केरे मेजे मां शामिल न भोइ बटतथ। 22 कुन अस प्रभु सरकातम? कुन अस तैस करां जादे शेक्ति बालेम? 23 तुस जोतथ, अस किछ भी केरनेरे लेइ आजाद आम, हाँ, पन सब किछ इश्शे लेइ रोइ नईं। अस किछ भी केरनेरे लेइ आजाद आम, पन सब किछ इश्शे विश्वासे जै परमेशरे पुडे मजबूत न केरे। 24 कोई अपने भलेरे बारे मां न सोचे

बल्के होरि केरे भलेरे लेइ सोचे। 25 जैन किछ किसैईं केरे दुकान्न पुइ बिकते, तैन खाथ, ते इन न पुछा कि मास कोट्ठां आनोरू ते अपने ज़मीरे शुद्ध रखा। 26 तुस तैन खाथ किजोकि पवित्रशास्त्र जोते, “धरती ते सेरी चीजां प्रभुएरी आन।” 27 ते अगर गैर विश्वासी लोकन मरां तुसन कोई धाम जोए, त तुस गानू चातथ, त जैन किछ तुश्शे सामने रखवू गाए तैन खाथ, ते किछ न पुछा, कि कोट्ठां आनोरूए। 28 पन अगर कोई तुसन सेइं जोए, “इना त मूरतन कां बलिदान कियोरू,” त तुस तैस न खाथ, तुश्शे ज़मीरेरे वजाई सेइं नईं बल्के जैने तुसन सेइं ज़ोवं तैसेरे ज़मीरेरे वजाई सेइं। 29 मेरो मतलब, तेरो ज़मीर नईं, बल्के तैस होरेरो। भला, मेरी आजादी होरि मैनेरे ज़िरिये किजो परखी गाए? 30 अगर अवं शुक्र केरतां खाताई, त जैस पुइ अवं शुक्र केरताई, तैसेरे वजाई सेइं मेरी बदनामी किजो भोतीए? 31 आखरी मां अवं इन जोताई, तुस चाए खाथ, चाए पीथ, या चाए जैन किछ केरा परमेशररी महिमारे लेइ केरा। 32 अवं जैन किछ केरताई, हर केन्वी खुश केरनेरी कोशिश केरताई, अपने भलेरे बारे मां न सोची बल्के होरि केरे भलेरे बारे मां सोचताई, ताके सेबहन मुक्ति मैलेले। एन्चरे तुस भी जीथ ताके तुश्शे वजाई सेइं न यहूदन, न गैर यहूदन न परमेशररे कलीसियाई परेशानी भोए।

11 जेन्चरे अवं मसीहोरी जेरी चाल चलताई तुस भी मेरी जेरी चाल चल। 2 हे ढूलाव ते बेइनव, अवं तुश्शी तारीफ़ केरताई, किजोकि तुस मीं हर वक्त याद केरते रातथ; ते जै शिक्षां मीं तुसन दित्ती तैन केरे मुताबिक चलतथ। 3 ते अवं चाताई, कि तुस इन जानथ, हर एक्के मडदेरी क्रोडी मसीहे, ते कुआन्शरी क्रोडी मडदे, ते मसीहोरी क्रोडी परमेशरे। 4 जै मडद क्रोडी डेकतां प्रार्थना या भविष्यवाणी केरते, ते अपने क्रोडोरी अनादर केरते, किजोकि तैन घमण्डरे बराबरे। 5 पन जै कुआन्श बगैर दोग डेकतां प्रार्थना या भविष्यवाणी केरतीए, ते अपने क्रोडोरी अनादर केरती, किजोकि तैन टिनडी भोनेरे बराबरे। 6 अगर कुआन्श ओडनी न ओडे, त दोग भी कटे; अगर कुआन्शरे लेइ दोग कटानी शरमरी गल्ले, त ओडनी ओडे। 7 हाँ मडदे अपने दोग ढकनो जेइज नईं, किजोकि तै परमेशररू रूप ते शोभाए; पन कुआन्श मडदेरी शोभाए! 8 किजोकि मडद कुआन्शी मरां नईं, बल्के कुआन्श मडदे मरां निसोरिए। 9 ते मडद कुआन्शरे लेइ नईं पन कुआन्श मडदेरे लेइ बनेवरीए। 10 एल्हेरेलेइ स्वर्गदूतां केरे वजाई सेइं कुआन्शरे लेइ इन ठीके कि अपने दोग ढक्के, ताके इस सेइं बांदू भोए कि ते मडदेरे अधीने। 11 फिरी भी प्रभु पुइ विश्वास केरनेबालन मां कुआन्श मडदे करां अलग नईं, ते न मडद कुआन्शरी करां अलगे। 12 किजोकि जेन्चरे पेइली कुआन्श मडदे मरांए, पन हुनी मडदन कुआन्श जर्म देतीए। सब चीजां परमेशरे करां आन। 13 तुस एप्पू फैसलो केरा, कुन कुआन्शी खुले आम आराधनाई मां बगैर दोग डेकतां परमेशरे कां प्रार्थना केरनि शोभतीए? 14 कुन तुस भी न जानथ, कि अगर मडद लमो दोग रखे त तैसेरेलेइ शरमे। 15 पन अगर कुआन्श लमो दोग रखे; ते तैसेरेलेइ शोभाए किजोकि बाल तैसेरे ढकनेरे लेइ दित्तोरिन। 16 पन अगर कोई मीं सेइं राजी न भोए, त इन समझे न इश्शी न इश्शे परमेशररी कलीसियां केरि एरी रीतए। 17 इस बारे मां अवं तुसन इन जोताई, अवं तुश्शी तारीफ़ न केरि, एल्हेरेलेइ कि तुश्शे अकोट्टे भोने सेइं भलाई नईं, बल्के नुकसान भोते। 18 किजोकि पेइलू त अवं इन शुनताई, कि जैखन तुस कलीसिया मां आराधनारे लेइ अकोट्टे भोतथ, त तुसन मां अन-बन भोतीए ते अवं किछ हदी तगर याकीन केरताई। 19 पन, बिलकुल तुसन मां बटवारो भोरो लोडे, ताके तुसन जैन कां परमेशररी मन्जूरीए पिशाने गाथ। 20 ते जैखन तुस इश्शे प्रभु यीशुएरी मौती याद केरनेरे लेइ एक्की ठैरी अकोट्टे भोतथ, त तुश्शे बतावि सेइं इन न लग्गे कि प्रभु भोज खानेरे लेइ अकोट्टे भोरेथ। 21 किजोकि खानेरे वक्ते हर कोई अपने डूलाछडो होरन करां पेइलो खाते, ते किछ त नियन्नो रहतन, ते किछ मतवालो भोइ गाते। 22 कुन खाने पीनेरे लेइ तुसन घर नईं या परमेशररी कलीसियाई घटिया समझतथ, कि जैन कां नईं तैन छितातथ अवं तुसन कुन जोई? कुन इस गल्ली मां तुश्शी तारीफ़ केरि? अवं तारीफ़ न केरि। 23 जै शिक्षा

मीं प्रभु करां पुज्जी तै शिक्षा मीं तुसन दिक्ती, कि प्रभु यीशुए जैस राती तै ट्लुवाव जेन तैने रोटी नी। 24 ते शुक्र केरतां ट्लोड़ी, ते जोंव; “कि ई रोटी मेरे जानी हिराती, जै तुशे मुक्करे लेड बलिदान की गातीए, मेरी यादी मां इन्ने केरा।” 25 ते एन्चरे जेखन तेनेई रोटी खाइ, यीशुए दाछारो कटोरो भी नेव, ते जोंव; “ई कटोरो मेरे खुने मां नंच्वो करारे, जैखन भी पीथ, मेरे यादी मां इन्ने केरा।” 26 किजोकि जैखन ई रोटी खाथ, ते इस कटोरे मरां पीथ, त प्रभुएरे मीती जांतगर तै न एज्जे, इस बारे मां जोते राथ। 27 एल्हेरेलेड जै कोई प्रभुएरे रोटी नाजाइज तरीके सेइं खाए, या प्रभुएरे कटोरे मरां पीये, तै प्रभुएरे जानरो ते खुनेरे खलाफ पापी भोलो। 28 एल्हेरेलेड मैन्हु अपने बतवि परखे ते एन्चरे इस रोटी मरां खाए, ते इस कटोरे मरां पीये। 29 किजोकि जै इस रोटी खाते ते कटोरे मरां पीते बार इन न पिशाने कि तैसेरो रिश्तो प्रभुएरी जानी सेइं केरोए, तै इस खाने पीने सेइं एण्णु पुड़ आफत आनते। 30 एल्हेरेलेड तुसन मरां बड़े कमजोर ते रोगी आन, ते बड़े मेरि भी जे। 31 एल्हेरेलेड अगर अस पेड़ले अपनो आप परखम त परमेशर असन सज्जा न देलो। 32 पन प्रभु असन सज्जा देइतां शिखालते एल्हेरेलेड कि अस दुनियाई सेइं साथी दोषी न भोम। 33 ते हे मेरे ढूलाव ते बेइनव, जैखन तुस प्रभुएरी रोटी खानेरे लेइ अकोट्टे भोतथ, एक्की होरि बलगा। 34 अगर कोई नियन्नो भोए त अपने धरे मां खाए, जैस सेइं तुस अकोट्टे भोथ, रोड़े चारे बर्ताव केरा, जैस सेइं प्रभु तुसन सज्जा न दे, ते होरि गल्लां अवं एइतां ठीक केरेलो।

12 हे मेरे ढूलाव ते बेइनव, हुनी तुशे तैस सवालारे बारे मां जै तुसेईं पवित्र आत्मार वरदानां केरे बारे मां पुच्छो, अवं चाताई तुस रोड़े चारे समझा। 2 तुस ज्ञानतथ, कि तुस विश्वास केरने करां पेड़ले तुसन जेन्चरे जीते थिये तुसन पुड़ भूतां केरो अस्सर भोतो थियो, कि तुस मूरती केरि पूजा केरथ, जैना ज़ींती न भोन। 3 एल्हेरेलेड अवं चाताई तुस ज्ञानतथ, कि जै कोई परमेशररे आत्मार जुवाने सेइं जोते, तै न जोए, कि यीशु लानतीए, सिर्फ एकैलो पवित्र आत्मा आए, जै इस काबल बनाते, कि कोई भी इन जोई सकते कि “यीशु प्रभुए।” 4 वरदाना त बड़े किसमां केरन, पन इना सब परमेशररो आत्मा देते। 5 अस बड़े किसमां केरु कम परमेशररे लेड केरतम, पन अस तैस्से एक्की प्रभुएरी सेवा केरतम। 6 परमेशर इश्शे जिन्दगी मां अलग-अलग किसमे सेइं कम केरते, पन तैए परमेशर जै असन सेबहन तैसेरेलेड कम केरनेरी काबलीत देते। 7 असन सेबहन अक एरी काबलीत दिक्तीए, जैस सेइं पवित्र आत्मारी हजुरी साबत भोती, ताके अस अपने सैथी विश्वासी लोकां केरि मदत केरम। 8 किजोकि परमेशररे आत्मारे ज़िरिये एक्की मैन्हु समझदेरारो सन्देश शुनानेरी काबलीत दिक्तीए, ते होरि मैन्हु तैस्से आत्मार ज़िरिये सेइं जानेरो सन्देश शुनानेरी काबलीत दिक्तीए। 9 तैए आत्मा एक्की मैन्हु मसीह पुड़ मजबूती सेइं विश्वास केरनेरी काबलीत देते, ते तैए होरि मैन्हु, बिमार लोकन बझानेरी काबलीत देते। 10 आत्मा एक्की मैन्हु चमत्कारां कम्मां केरनेरी शक्ति देते, ते होरि परमेशररो सन्देश शुनानेरु वरदान, ते कोन्ची आत्मां केरि परख, ते कोन्ची मैन्हु बड़े किसमां केरि भाषां जोनेरी काबलीत दिक्ती, जैना तैने नई पेढोरी, ते होरि मैन्हु तैन भाषां केरो मतलब समझानेरी काबलीत दिक्ती, जैना तैनेई नई पेढोरी। 11 सब वरदानां तैस्से एक्की पवित्र आत्मार कम्मे। तैए जेन्चरे चाते सेबधी विश्वासी लोकन वरदान देते। 12 किजोकि जेन्चरे इश्शे जिसम त अक्के ते तैसेरे अंग बडेन, ते तैस एक्की जिसमेरे अंग हलछे भोने सेइं भी सब मिलतां अक्के जिसमे, तेन्चरे मसीह भी आए, ते तैना भी जैना तैस पुड़ विश्वास केरतन। 13 किजोकि असेईं सेबधेईं कुन यहूदी, कुन गैर कौमां, कुन गुलाम, कुन आज़ाद अक्के आत्मार ज़िरिये अक जिसम भोनेरे लेड बपतिस्मो नेवरोए, ते असन सेबहन अक्के आत्मा मैलली। 14 इश्शे जिसमे मां अक्के अंग नई, बल्के बडेन। 15 अगर पव जोए अवं हथ नई, एल्हेरेलेड अवं जिसमेरो अंग नई। त कुन तैसेरे जोने सेइं तै जिसमेरो अंग न राए? 16 ते अगर कन्न जोए; “अवं अछ नई, एल्हेरेलेड अवं जिसमेरो अंग नई,” त कुन तैस्से एरु जोने सेइं तै जिसमेरो न राए? 17 अगर सारो जिसम अछड़े भोथो त शुन्नु कौट्टां

भोथू? ते अगर सारो जिसम कन्न भोथो त शींघनु कौट्टां भोथू? 18 पन सच्चे परमेशररे इश्शे जिसमे मां अंग अपने मेज्जीं सेइं अक-अक केरतां इश्शे जिसमे मां अपने-अपने ठैरी रखोरन। 19 अगर तैना सभे अक्के अंग भोथे, त फिरी जिसम न भोथो। 20 एल्हेरेलेड, जिसमेरे बड़े अंग भोने सेइं अक जिसम बनते। 21 अछ हथ्ये सेइं न जोईं सके, “मीं तेरी ज़रूरत नई,” ते न क्रोड़ी पवन सेइं जोईं बटतीए, “मीं तेरी ज़रूरत नई।” 22 पन जिसमेरे अंग जैना होरन करां कमजोर लेइहोतन, बड़े ज़रूरन। 23 ते जिसमेरे जैन अंगन अस आदरारे काबल न समझम तैन केरि अस जादे आदर देतम; ते इश्शे अशोबते अंग होरे भी रोड़े भोतन। 24 फिरी इश्शे शोबते अंगन एसेरी ज़रूरत नई, पन परमेशररे जिसम बनवरोए, कि जैस अंगे घटी थी तैस होरि भी जादे आदर भोए। 25 परमेशररे एन कियूं ताके जिसमेरे अंगन मां अन-बन न भोए, पन तैना एक्की होरेरी देख-भाल केरन। 26 एल्हेरेलेड अगर जिसमेरे एक्की अंगे दुःख मैलते, त सारी जान ते सब अंग तैस सेइं साथी दुखी भोतन; ते अगर एक्की अंगेरी बडयाई भोतीए; त तैस साथी सब अंग आनन्द केरतन। 27 एन्चरे तुस सब मिलतां मसीहेरो जिसमत, ते तैसेरे जिसमेरे अंगथ। 28 मसीहेरी जानी मां यानी कलीसियाई मां, परमेशररे असन अलग-अलग कम केरने जेो दिक्तीरुए, पेड़ले प्रेरित, दुइयोवं नबी, ट्लेइयोवं शिक्षा देनेबाले, फिरी तैना, जैन चमत्कार केरनेरो अधिकार दिक्तीरोए। फिरी तैनी तैना जैन बझानेरो अधिकार दिक्तीरोए, ते तैना जैन होरि केरि मदत केरनेरी काबलीत दिक्तीरोए, जैना प्रधान्, तैना जैन पवित्र आत्मार तरफां अलग-अलग किसमां केरि भाषां जोनेरी काबलीत मैली। 29 हर कोई प्रेरित नई। हर कोई नबी नई। हर कोई शिक्षा देनेबालो नई। हर कोई चमत्कार केरनेबालो नई। 30 कुन सेबहन बझानेरु वरदान मैलेरु। हर कोई अलग-अलग भाषां केरनेबालो नई। हर कोई भाषां केरो मतलब समझानेबालो नई। 31 सेबहन कां तरजमो केरनेरी काबलीत नई, रोडू त इन आए पवित्र आत्मां करां वरदानां हासिल केरनेरी बेडि इच्छाईं मां राथ। पन सच्चे रोडू कुने, तैन अवं हुनी जोताई।

13 अगर अवं मैन्हु, ते स्वर्गदूतां केरि भाषां केरि, ते प्यार न रेख्खी, त अवं ठन-ठन केरनेबाली पितल, ते झन-झन केरनेबाली झाझाई। 2 ते अगर अवं भविष्यवाणी केरि सेखी, ते सब भेद जैनी ते, मीं इड़ी तगर पूरो विश्वास भोए, कि पहाइन घासेईं, पन प्यार न रेख्खी, त अवं किछ भी नई। 3 ते अगर अवं अपनि सारी जेइदाद कंगालन देई, या अपनो जिसम फुकनेरे लेड देई, ते प्यार न रेख्खी, त इन मेरे कोन्ची कम्मेरु नई। 4 जैना लोक होरन सेइं प्यार केरतन तैना सबर ते दयाई सेइं कम केरतन, तैना जलन न केरन, तैना अपनि बडीयाई न केरन, ते न घमण्ड केरन। 5 तैना होरन बेइज्जत न केरन, तैना खुदगर्ज न भोन, जल्दी क्रोध न केरन ते जैना बुरी गल्लां तैन केरे खलाफ भोइ, तैन तैना याद न केरन। ते तैन केरे खलाफ जैना पाप केरतन तैना, तैन बड़े आसान तरीके सेइं माफ़ केरतन। 6 तैना खुश न भोन जैखन लोक बुरु केरतन, पन तैना तैखन खुश भोतन जैखन लोक तैन केरतन जैन ठीक ते सच्जू। 7 तैना सब गल्लां झैल्लतन, प्यार विश्वास कधी न गुवाए, ते असन परमेशररे पुड़ भरोसो केरनेरे काबल बनाते, मुशकलन ते तकलीफन मां सबर रखते। 8 भविष्यवेनी ते गैर भाषां ते खास ज्ञान बेकार भोलू। पन प्यार हमेशारे लेड रालो! 9 किजोकि इश्शु ज्ञान ते इश्शी भविष्यवाणी केरनेरी काबलीत अध्ठीए, पन जैखन सिद्ध एज्जेलो, त जैन अध्ठीए तैसेरी ज़रूरत नई। 11 इन मैनेरे बेडोनेरु जेरु आए। जैखन अवं बच्चो थियो, त बच्चां केरो जेरो जोतो ते सोचतो ते समझतो थियो। पन जैखन अस बड्डे भोतम, त बच्चां केरि गल्लां शारतम। 12 एन्चरे असन सेइं भी आए जैना अस विश्वास केरतम, किजोकि अस तैस मैनेरे जेरे आम जै खराब शीशे मां शकल हेरते, (किजोकि अस सब किछ रोड़े चारे न ज्ञानम) सिर्फ एजनेबाले वक्ते मां, अस सब किछ समझमेले, एल्हेरेलेड असेईं परमेशर आमने सामने हेरनोए। हुना मेरु ज्ञान पूरु नई। पन तैस एजनेबाले वक्ते मां (जैखन तै दिहाड़ी एज्जेली) रोड़ेचारे जैनेलो, परमेशर भी मीं ज्ञानेलो। 13 लिहाजा, हुनी, ट्लेई किसमां केरि चीजन जैना असेईं ज़रूरी केरनन, परमेशररे पुड़

विश्वास, परमेश्वर वरदान पुढ उमीद, ते परमेश्वर ते होरन सेई प्यार। पन इन ट्लाई गल्लन मां जै महाने, तै ई आपः परमेश्वर ते होरन सेई प्यार केरन।

14 एक्की होरि सेई प्यार केरनेरी कोशिश केरा। ते आत्मिक वरदानां केरि बडी इच्छा रखा, खास केरतां इन, कि भविष्यवाणी केरा। 2 किजोकि, जै गैर भाषाई मां गल्लां केरते; तै मैनन सेई नई, बल्के परमेश्वर सेई गल्लां केरते; एल्हेरेलेइ कि तैसेरी कोई न समझे; किजोकि ते भेदरी गल्लां पवित्र आत्मार शक्ति सेई जोते। 3 पन जै परमेश्वर तरफां सन्देश शुनाते, ते विश्वासी लोकन, विश्वासे मां मज़बूत भोनेरे लेइ मद्दत केरते, ते होरि विश्वासी लोकां केरि हिम्मत बढ़ाते ते तस्सली देते। 4 जै गैर भाषाई मां जोते, तै अपने विश्वासे मज़बूत केरते। पन जै भविष्यवाणी केरते, तै कलीसियारे विश्वासी लोकां केरे विश्वासे मज़बूत केरते। 5 अवं चाताई, कि तुस गैर भाषाई मां गल्लां केरा, पन जादे इन चाताई कि भविष्यवाणी केरा: किजोकि अगर गैर भाषा जोनेबालो कलीसियारे विश्वासी लोकां केरे विश्वासे मां मज़बूत भोनेरे लेइ तरजमो न केरे त भविष्यवाणी केरनेबालो तैस करां जादे खास कम केरि रावरोए। 6 एल्हेरेलेइ हे ढूलाव ते बेडनव, अगर अवं तुसन कां एदतां गैर भाषाई मां गल्लां केरि त तुसन मीं करां कुन फेइदो भोलो। पन अगर अवं प्रकाश या खास ज्ञान, या परमेश्वर सन्देश शुनेई या शिक्षा देई त इस सेई तुशुशी मद्दत भोली। 7 एन्चरे, अगर तुस बाजो बजाथ जेन्चरे बेइशोई या सारंगी, अगर तैन रोडे चारे न बजाव गाए त जैन बजाव लावरू गाने त तैन केन्चरे पिशानेले बेइशोई या सारंगी मां कुन लावरू बजने। 8 जंगी मां अगर नइशिनोरी आवाज़ साफ न भोए, त फौजी जंगरे लेइ तियार न भोइ सकन। 9 एन्चरे, जैखन तुस तैना गल्लां केरथ जैना होरि लोकन समझ न एजन, त जैन किछ जोंव गाते तैसेरी कोई कीमत नई। 10 दुनियाई मां बेइडि भाषा आन, त हर भाषारो मतलब। 11 पन अगर अस तैस भाषाई न समझम जै होरे ज़ोने लोरेन, त एण एरू भोलू, कि जेन्चरे तैना इश्शे लेइ परदेशी भोले ते अस तैन केरे लेइ परदेशी भोले। 12 एन्चरे तुस भी जैखन पवित्र आत्मार वरदानां केरे लेइ बडी इच्छा रखतथ, त तैन वरदानां केरि इच्छा रखा जैन सेई कलीसियारे विश्वासी लोक विश्वासे मां मज़बूत भोन। 13 एल्हेरेलेइ जै गैर भाषा केरते, ते प्रार्थना केरे, कि जैन किछ तैने जोंव, तैसेरो मतलब समझेनेरे काबल भी भोइ सके। 14 किजोकि अगर अवं गैर भाषाई मां प्रार्थना केरने लोरोई, त मेरी आत्मा प्रार्थना केरतीए, पन मेरी सोचरे लेइ फेइदो नई, किजोकि इन मीं समझ न एज्जे। 15 त फिरी मीं कुन कियारू लोडे? एरो भी वक्त भोते जैखन मीं अपने आत्माई सेई प्रार्थना कियारी लोडे, एरो वक्त भी भोते जैखन मीं अपने अक्ली सेई भी प्रार्थना कियारी लोडे। किछ वक्ते मीं अपने आत्माई सेई गीतां ज़ोवरां लोडे, ते होरि वक्ते मीं अक्ली सेई भी गीत ज़ोवरां लोइन। 16 मन्ना कि जैखन किछ आम मैन्हु तुशुशे आराधनाई मां एजन, जैखन तुस अपने आत्माई सेई परमेश्वरि बडयाई केरथ। अगर तैना तुशुशी न समझे, त तुशुशे परमेश्वरेशु शुक केरनेरे बाद तैना केन्चरे बुझले कि किताली, “आमीन” ज़ोनू, किजोकि तैना न समझे तुस कुन लोरेथ ज़ोने। 17 तुशुशु परमेश्वरेशु शुक केरनु रौडूए, पन इन होरि केरे विश्वासे मज़बूत केरनेरे लेइ मद्दत न केरेलू। 18 अवं अपने परमेश्वरेशु शुक केरताई, कि अवं तुसन सेबन करां जादे गैर भाषां केरताई। 19 पन कलीसियाई मां गैर भाषा केरने मां दश हज़ार गल्लां केरे ज़ोनेरे केरतां इन मीं होरू भी रौडू लागते, कि होरन शिखालनेरे लेइ अक्ली सेई पंचे गल्लां जोई। 20 हे ढूलाव ते बेडनव, तुस इना गल्लां समझने मां बच्चे न बना, पन बुरेई केरनेरे लेइ बच्चां केरे बना, पन इस किसमेरी गल्लां समझनेरे लेइ समझदार बना। 21 कानूने मां प्रभु जोते; “अवं बखलां केरे ज़िरिये जोइलो, जैना गैर भाषां केरेले, पन फिरी भी तैना मेरी न शुनेले।” 22 एल्हेरेलेइ असन मरां किछ गैर भाषा केरन जै पवित्र आत्मार तरफां आए, इश्शे शब्द तैन लोकां केरे लेइ प्रभुए शक्तिरो निशाने, जैना प्रभु पुइ विश्वास न केरन। 23 ते अगर कलीसिया एक्की ठैरी अकोटी भोए, ते सब गैर भाषा केरन, त आम लोक जैना ई भाषा न समझन या गैर विश्वासी लोक अन्तर एजन त

कुन तैना इन न सोचेले कि तुस पागल आथ। 24 ते अगर सब भविष्यवाणी केरन, ते आम लोक या गैर विश्वासी लोक अन्तर एजन, त तैन एसास भोलो कि तैना पापिन, ते जैन तैनेई ज़ोव तैसेरे वजाई सेई अपनी बत बदलेले। 25 ते परमेश्वर सन्देशे सेई तैन एसास भोलो कि तैनेई बुरु कियोरू तैन केरे मनरे भेद बांदो भोइ गाले, ते तैन एसास भोलो कि तैना पापी आन त कने पापन करां मन फिराले। ते तैना मथथो टेकतां परमेश्वरि आराधना केरेले, ते मनले कि परमेश्वर तुसन मां आए। 26 हे ढूलाव ते बेडनव कुन कियोरू लोडूए? ज़ैखन तुस आराधना केरने लेइ अकोट्टे भोतथ, त किछ भजन जोन, किछ उपदेश देन, ते किछ जैन प्रकाशन परमेश्वर तरफां आए तैस देन, ते किछ गैर भाषाई मां गल्लां केरन ते किछ तैसेरो तरजमो केरन, तुस इन सब एल्हेरेलेइ केरा कि कलीसियारे लोकन विश्वासे मां मज़बूत भोनेरे लेइ मद्दत भोए। 27 अगर कोई गैर भाषाई मां ज़ोने लोरोए, त दूई या ट्लाई ज़ने बैरी-बैरी सेई ज़ोन, ते इन ज़रूरी कि अक मैन्हु तैस भाषारो मतलब जोए। 28 पन अगर तरजमो केरनेबालो न भोए, ते गैर भाषा जोने बालो कलीसियाई मां चुप राए, ते चुपचारे अपने मने सेई परमेश्वर सेई गल्लां केरे। 29 नेबन मरां दूई या ट्लाई ज़ोन, इन ज़रूरी आए कि हर कोई शुने, ते सोचन ते परखन कि जैन किछ जोंव लोरू काने सही आए आप या नई। 30 पन अगर कोई जै तैडी सभाई मां बिशोरोए, तैस परमेश्वर तरफां सन्देश मैल्ले, त जै ज़ोने लोरोए तै चुप भोए, ते तैस ज़ोने दे। 31 किजोकि तुस सब अक-अक भविष्यवाणी केरि बटतथ, पन अक-अक भोइतां ताके सब शिखन, ते हिम्मत बद्धे। 32 जै नबी परमेश्वर सन्देश शुनाते, तै अपने आपे वशे मां रखते। तै इस काबले कि अपने मेर्ज़ी सेई ज़ोई बटते ते चुप रेइ बटते। 33 किजोकि परमेश्वर गडबड केरनेबालो नई, पन शान्ति देनेबालोए; ई ते कानूने जैस परमेश्वरि सेरी कलीसियारे लोक मन्तन। 34 कुआन्शां कलीसियारे सभाई मां चुप रान, किजोकि तैन गल्लां केरनेरो हुक्म नई, जेन्चरे कानूने मां लिखोरू भी आए। 35 ते अगर तैना किछ सवाल पुच्छने चान, त सभाई मां न पुच्छन पन घरे अपने-अपने मुन्शन पुच्छन, किजोकि कलीसिया मां कुआन्शां केरि जादे गल्लां केरनि ठीक नई। 36 एरू किजो आए तुसन मरां किछ लोक पेइले ज़ोरे नियमन किजो न मन्नु चान? कुन तुस सोचतथ कि तुस पेइले लोक आथ ज़ैनेई परमेश्वरेशु वचन दित्तु? या सिर्फ तुसन दित्तु? 37 अगर कोई मैन्हु अपनी आप नबी समझे, या इन समझे कि मीं पवित्र आत्मार तरफां वरदान मैल्लोरूए, त इन समझे, कि जैना गल्लां अवं तुसन लिखताई, तैना प्रभुएरे हुक्मम। 38 पन अगर कोई इन गल्लन न मन्ने, त तैन पुइ विश्वास न केर। 39 एल्हेरेलेइ हे ढूलाव ते बेडनव, भविष्यवाणी केरनेरी बडी इच्छा रखा, ते गैर भाषाई केरनेरे लेइ न ठाका। 40 पन तैन सब किछ जैन तुस कलीसियाई मां केरतथ तरीके सेई कियू गाए।

15 हे ढूलाव ते बेडनव, अवं तुसन तैए खुशखबरी याद कराताई जै मीं तुसन शुनावरी थी, ते जैस सन्देशे पुइ तुसेई विश्वास कियोरो थियो, ते जैस पुइ तुस तुसेई लगातार भरसो रखोरोर। 2 अगर तुस तैस खुशखबरी पुइ लगातार विश्वास केरते राले, जै मीं प्रचार की, त परमेश्वर तुसन बचालो। नई त तुशुशु विश्वास केरनो बेफेइदो भोव। 3 एल्हेरेलेइ मीं तुसन खास सन्देश दित्तो, जै मीं प्रभु यीशु मसीह करां मैल्लो। तै सन्देश ई आए, कि पवित्रशास्त्रेरे मुताबिक यीशु मसीह इश्शे पापां केरे लेइ मरो 4 ते दबो जेव, ते पवित्रशास्त्रेरे मुताबिक टलेइयोंव दिहाइ मुइदन मरां ज़ीतो भोव। 5 ते कैफा (यानी पतरस) ते 12 चेलन लेइहोव। 6 फिरी 500 करां जादे चेलन एक्की साथी लेइहोव, जैन मरां हेजु बडे ज़ीतन ते किछ मेरि ज़ोरेन। 7 फिरी याकूबे लेइहोव फिरी सेबमी प्रेरितन लेइहोव। 8 ते आखरी मां तैनी अपनो आप मीं पुइ भी पुइ बांदो कियो, अवं जै तैस बच्चेरे ज़ेरो आई जै ठीक वक्ते पुइ नई ज़मोरू। 9 किजोकि अवं प्रेरितन मरां सेबनना निकोडोई, बल्के प्रेरित ज़ूवानेरे काबल भी नई, किजोकि अवं परमेश्वर कलीसियारे विश्वासी लोकन सतातो थियो। 10 पन परमेश्वर अनुग्रहे सेई अवं प्रेरित आई। ते तैसेरो अनुग्रहेरो अस्सर ई भोव कि, मीं तैन होरि प्रेरितन करां बेदतां मेहनत

भी की, ते ई मेहनत मीं अपने तरफां न की, बल्के परमेशरे मेरी मदत की, कि अवं इन केरि। 11 ते चाप अवं भोड़, चाप होंरे प्रेरित भोन, अस तैस मसीहरे बारे मां सन्देश प्रचार केरतम, ते इससे पुड़ तुसेई भी विश्वास कियो। 12 एल्हेरेलेइ हुनी अवं पुछताई, जैखन मसीहरो ई प्रचार कियो गाते, कि ते मुडदन मरां जीतो भोव, ते तुसन मरां किछ किजो जोतन, कि मुडदां केरू जीतू भोनू अथ्थी नई? 13 अगर मुडदां केरू जीतू भोनू अथ्थी नई, ते फिरी मसीह भी नई जीतो भोरो। 14 ते अगर मसीह भी मुडदन मरां जीतो नई भोरो, त फिरी इश्शो सन्देश प्रचार केरनो भी बे फैइदोए; ते तुशो मसीह पुड़ विश्वास केरनो भी बे फैइदोए। 15 अगर मुडदे जीते न भोन, त असेई इन जोइतां परमेशरे बारे मां झूठ जोवं, कि परमेशरे मसीह जीतो कियो जैन तैनी हकीकत मां नई कियोरू। 16 अवं दुबारां फिरी जोताई, अगर कोई मुडदन मरां जीतो न भोए, ते फिरी मसीह भी मुडन मरां जीतो नई भोरो। 17 ते अगर मसीह मुडदन मरां जीतो नई भोरो, ते तुशो मसीह पुड़ विश्वास भी बे फैइदोए, ते तुस हेजू तगर अपने पापन मां जीने लोरेथ। 18 बल्के जैना मसीह पुड़ विश्वास केरनेबाले मरें, तैना भी नाश भोए। 19 अगर अस सिर्फ इस जिन्दगी मां मसीह करां उमीद रखतम ते फिरी अस सेव्भी मैनु इन नां नुभागमां। 20 पन सच त कियो, कि परमेशरे मसीह मुडदन मरां करां साबत केरनेरे लेइ जीतो कियोरनो, ते जैना मरें, तैन मां पेइलो फल भोए। 21 किजोकि जैन पेइले मैने यानी आदमे कियू, तैसेरे वजाई सेइं सब मैनु मरे, एन्चरे जैना विश्वासी लोक एजनेबाले वक्ते मां मुडदन मरां जीते किये गाले, तैन भी एक्की मैनेरे केरनेरे वजाई सेइं आप, ते तै मैनु मसीह आप। 22 एल्हेरेलेइ एक्की मैनेरे पापेरे यानी आदमेरे वजाई सेइं सब मैनु मरतन, तेन्चरे एक्की मैनेरे केरनेरे सेइं यानी यीशु मसीह वजाई सेइं सारे फिरी मुडदे जीते किये गाले। 23 पन हर कोई ठीक तरीके सेइं जिन्दगरे लेइ वापस एजेलो, पन मसीह मुडदन मरां जीतो भोनेबालो पेइलोए, फिरी जैन लोकां केरो रिश्तो तैस सेइं साथी आप, तैना भी जीते भोले। 24 एसेरां पत्ती, मसीह सैरी दुष्ट शक्ति नाश केरेलो जैना परमेशरेरी खलाफत केरतिन। ते दुनियारो खातमां भोलो। तैखन मसीह, अपने बाजी परमेशर अपनू राज, राज केरनेरे लेइ पूरे तरीके सेइं देलो। 25 मसीहे तेइस तगर राजेरू जेरू राज केरनू जरूरीए, ज्ञातगर परमेशर तैसेरे सारे दुश्मन तैसेरे अधीन न केरे। 26 सेव्भना आखरी जै दुश्मन खतम कियो गालो तै मौते। 27 जैखन पवित्रशास्त्र जोते परमेशरे सब किछ तैसेरे अधीन मां केरेलो त इस मां परमेशर नई, किजोकि सब किछ मसीहरे अधीन केरनेबालो परमेशरे। 28 ते सब किछ परमेशरेरे मट्टेरे अधिकारे मां केरनेरे बाद, तैखन तै अपनो आप रोड़े चारे परमेशरेरे अधिकारे मां केरेलो, जैने तैस अधिकार दित्तो। सिर्फ परमेशर अकैल्लो प्रभुए तैए हर एक्की मां, ते हर गल्ली मां कम केरते। 29 हुनी तुस इस बारे मां सोचा, तुसन मां किछ एरे आन जैना मरें लोकां केरे लेइ बपतिस्मो नेतन, ते कोई तैन बपतिस्मो देते, अगर जेन्चरे किछ लोक जोतन, विश्वासी लोक मुडदन मरां जीते नई भोने, त फिरी एन केरनेरी कोई कीमत नई ते फिरी एन केरनेरी वजा नई। 30 ते इश्शे लेइ, अगर मुडदे जीते किये गान त अपनो आप खतरे मां रखनो बेवकूफी आप। 31 हे ढलाव ते बेडनव, इन पक्कू आप कि तुशे बारे मां घमण्ड केरताई, किजोकि तुस इश्शे प्रभु यीशु मसीह मां आथ, इन भी पक्कू आप कि अवं रोज मौतरे खतरे मां राताई। 32 मां इफिसुस नगरे मां बेडि तैन केरे वजाई सेइं मुशकलां झैल्ली जैना मेरी खलाफत केरते थिये, तैना जंगली जानवरां केरे जेरे थिये। लोकां केरे खियाले सेइं मां तैन मुशकलन सेइं कुन हासिल कियू? किछ भी नई। एल्हेरेलेइ इन साफे कि मुडदे दुबारां जीते न किये गान, त इन रोडूए जैन लोक जोने लोरेन, “एज्जा, खाम पीम, किजोकि असेई कालां मरनु आप ते इन सब खतम भोनू।” 33 जैना एरी गल्लां जोतन तैन केरे वजाई सेइं बेवकूफ न बना, “बुपी संगती रोड़े चाल-चलने बगाइतीए।” 34 तुस अपने सोचरे रोड़ी बत्तां वापस एज्जा ते पाप केरनो शारा। किजोकि तुसन मां किछ एरे आन जैन केरो रिश्तो परमेशरे सेइं साथी नई। अवं तुसन छिथानेरे लेइ इन जोताई। 35 पन किछ पुछतन, “कि मुडदे केन्चरे जीते

भोतन, ते केरहे जिसमे मां एदतन?” 36 हे बे समझाव, बीजे पुड़ ध्यान देथ, जैखन बीज बेवं गाते, त पोदो बन्ने करां पेइलू तैस मरनु पेटे। 37 ते जैन तू बेतस, चाप इन गेहुं भोन या होरू किछ। इन जै भोनेबालो पोदोए एन तैसेरू जेरू नई। 38 तैस बेनेरे पत्ती परमेशर तैस एपनी मेरजेरे मुताबिक बडाते ज्ञातगर गेहुं केरि या होरि आन्नेरे डाल बांटे न भोन। 39 इस दुनियाई मां हर जीती चीजां अलग-अलग आन इन सेव्भी केरो जिसम अक्कां जेरे नई। मैनु केरो जिसम केरो जिसम जानवरां केरो जेरो नई। चलोडू केरो जिसम, मेछली केरो जिसम करां अलगे। 40 जेन्चरे इस धरतली पुड़ बडे किसमां केरे जिसम भोतन तेन्चरे अम्बरे मां भी दिहाडो चाँदनी, ते तारे आन, पन अम्बरेरी चीजां केरि शोभा होरि जेरीए ते धरतरे चीजां केरि शोभा होरि जेरी आप। 41 ते दिहाडेरी शोभा होरीए, चंदनरी शोभा होरीए, ते तारां केरि शोभा होरीए, किजोकि तारे-तारेरी शोभाई मां फर्के। 42 मुडदां केरू जीतू भोनू भी एरू आप। जै जिसम नाश भोनेरे हालती मां दबो गाते, पन जैखन जीतो कियो गालो त कधी नाश न भोलो। 43 जैखन अस मरतम (इश्शो जिसम) बदसूरत ते कमजोर भोतन। पन जैखन ते दुबारां जीतो भोतो त तै बडे खूबसूरत ते मजबूत भोते। 44 जेन्चरे इश्शे जिसमे मास ते खूने सेइं आन, एरे जिसम आन जैन परमेशरेरो आत्मा जिन्दगी देते। ते इश्शे जिसम जै मासे त कने खूनेरोए तैस जिसमे मां बेदलोलां, जै परमेशरेरो आत्मा रे तरफां दित्तो गाते। 45 पवित्रशास्त्रे मां इन भी लिखोरूए, “कि पेइलो मैनु, मतलब आदम, जीतो प्राणी बनो,” त आखरी आदम, यानी मसीह, हमेशारी जिन्दगी देनेबालो बनो। 46 मासे ते खूने सेइं साथी पेइले जिसम वजूदे मां आप फिरी तैना जिसम जैना परमेशरेरो आत्मा देते। 47 पेइलो मैनु ज़मीनरो मतलब मिती सेइं बनोरो थियो, तेन्चरे दुइयोंव मैनु यानी मसीह, स्वर्गां ओरो थियो। 48 लोक जैना इस धरतरेन तैना धरतरे पेइले मैनु आदमेरे जेरेन। पन जैना लोक स्वर्गरेन तैना स्वर्गेरे मैनु यानी मसीहरे जेरे आन। 49 ते जेन्चरे असेई तैसेरू रूप जै मितारो थियू धारण कियू, तेन्चरे तैस जै स्वर्गरोए तैसेरू रूप धारण केरेमेले। 50 हे ढलाव ते बेडनव, इश्शे जिसम इस धरती पुड़ मास ते खूने सेइं बनोरो भोते, अस एरे जेरे जिसमे सेइं साथी स्वर्ग मां परमेशरेरे राज्जे मां रानेरे काबल न भोले। अस स्वर्ग मां अपने मरने बाले जिसमे सेइं साथी न रेइ बटेमेले, जै मरते, किजोकि तैडी कोई मौत नई। 51 शुना, अवं तुसन सेइं भेदेरी गल जोताई, अस सब नई मरने, पन जैखन आखरी नडशिगेरी आवाज भोली, त अस सब एक्की पले मां बेदलोनेम, 52 ते इन एक्की पले मां, जेन्चरे कोई चिप केरते, जैखन आखरी नडशिगेरी बजाव गालो त जैना मरें थिये तैना जीते भोनेन ताके हमेशारे लेइ जीते रान, ते अस जैना जीतम, इश्शे जिसम बेदलोनेन। 53 किजोकि इश्शो जिसम ऐसीनी सेइं मरते ते शडते, ते ई तैस जिसमे मां बेदलोई गालो जै कधे न मरे ते न शडे। 54 जैखन इन भोलू, तैखन पवित्रशास्त्रे मां लिखोरू परमेशरेरू तैन वचन पूरू भोलू, जैन जोते, “मौत रोड़े चारे हाराई गाली ते तैसेरू कोई वजूद न रालू।” 55 एन्चरे जैन पवित्रशास्त्रे मां लिखोरू तैन पूरू भोलू, “हे मौत तेरी जीत कोडि राई? हे मौत तेरो डस कोडि राव?” (Hades 986) 56 मौती तकलीफ देनेरी शक्ति पापे करां मैलतीए, ते पापे कानूने करां शक्ति मैलतीए। 57 पन परमेशरेरू शुक्र भोए, जै इश्शे प्रभु यीशु मसीहरे जिरिये पापे ते मौत पुड़ जीत देते। 58 हे मेरे ट्लारे ढलाव ते बेडनव, विश्वासे मां मजबूत राथ ते गलत शिक्षाई सेइं न टेपलोथ, ते हमेशा प्रभुएरू कम जोशे सेइं केरा, किजोकि तुस इन ज्ञानतथ, कि जैन किछ तुसेईं प्रभुएरे लेइ कियू तैन बेफैडू नई।

16 हुनी तुशे तैस चन्देरे सवालरे बारे मां जै यरूशलेम नगरेरे परमेशरेरे लोकां केरे लेइ कियो गाते, तुसेईं भी तेन्चरे कियोरू लोडे जेन्चरे मीं गलातियारे कलीसियान हुक्म दित्तो। 2 हफतेरे पेइले दिहाडे तुसन मरां हर कोई अपने आमदनेरे मुताबिक किछ एप्पू कां रखा, कि मेरे एजने पुड़ चन्दो अकोटो न केरनो पे। 3 जैखन अवं तैडी भोई, अवं किछ लोकन भेजेलो जैन तुस चुनेले कि एना भरोसेरे काबलन, चन्दो घिन्तां यरूशलेम नगरे जो गान। अवं तैन कां चिट्ठी भी भेजेलो ताके विश्वासी लोक तैन केरे बारे मां जानन। 4

ते अगर मेरू भी गानू ज़रूरीए, त तैना मीं सेइं साथी गाले। 5 ते मकिदुनिया गानेरे बाद अवं तुसन कां एज्जी रावरोई, किजोकि मीं मकिदुनिया मेइं गानेरो बिस्तार बनोरोए। 6 भोइ सकते, अवं तुसन सेइं साथी किछ चिरे रुकेलो, शैइद पूरे हिवतड़ो, फिरी तुस जेरां मीं गानू भोलू, तेरहां मीं भेज्जां। 7 अगर ई परमेशरेरी मर्जी भोली, ते मीं उमीदे अवं बादे मां जादे चिरेरे लेइ तुसन कां एज्जेलो, न कि इस वक्ते थोड़े चिरेरे लेइ। 8 पन अवं पेन्तिकुसत तिहारे तगर इफिसुस नगरे मां रानोई। 9 किजोकि मीं बड़ो रोड़ो मौको मैलोरे ज़ैस सेइं अवं तैन कम केरि सकताई ज़ेसेरो अस्सर बड़ोए, चाए बड़े लोक मेरी खलाफत केरनेबाले आन। 10 अगर तीमुथियुस एज्जे, त तैस कबूल केरा, तैसेरी रोड़े चारे आदर केरा, किजोकि ते मेरो ज़ेरो प्रभुएरू कम केरते। 11 एल्हेरेलेइ कोई तैस घटिया न समझे, पन तैन केरे सफरेरे लेइ ज़ै ज़रूरते तैन खुशी सेइं देथ। ताके मीं कां एज्जन, किजोकि अवं तैस लोरोई बलगने, कि तै विश्वासी ढलान सेइं साथी एज्जे। 12 ते विश्वासी साथी अपुल्लोसे सेइं मीं बड़ी बिनती की, कि तुसन कां होरि विश्वासी मैनन् सेइं साथी गाए ज़ैना तुसन सेइं मिलने ओरेन। पन तैनी इस वक्ते गानू न चाव, पन ज़ैखन ठीक वक्त भोलो, तैखन एज्जेलो। 13 खबरदार राथ, विश्वासे मां मज़बूत भोथ, हिम्मत रखा, मज़बूत भोथ। 14 ज़ैन किछ केरतथ तैन प्यारे सेइं केरा। 15 हे ढलाव ते बेइनव, तुस स्तिफनासेरे टब्बरे ज़ानतथ, कि तैना अखाया इलाकेरे, पेइले मसीह पुइ विश्वास केरनेबालेन, ते परमेशरेरे लोकां केरि मद्दत केरनेरे लेइ ज़ैन किछ केरि बटते थिये तैनेई तैन कियूं। 16 अवं तुसन कां बिनती केरताई कि एरे लोकां केरे अधीन राथ, बल्के तैन केरे भी ज़ैना इस कम्मे मां मेहनत केरतन ते मद्दत केरनेबालन। 17 ते अस स्तिफनास ते फूरतूनातुस ते अखइकुसेरे एजने सेइं खुश आई, किजोकि ज़ेइस तुस इड़ी न थिये, तैनेई मेरी ज़रूरतां पूरी केरनेरे लेइ मेरी मद्दत की। 18 ज़ेन्चरे तुसेईं अवं खुश कियो, तेन्चरे तैनेई भी अवं खुश कियो, एल्हेरेलेइ एरे लोकां केरि तारीफ़ केरा। 19 आसिया इलाकेरे कलीसियां केरे सारे विश्वासी लोकां केरे तरफां तुसन नमस्कार; अक्विला ते तैसेरी कुआन्श प्रिस्कारे तरफां ते तैन केरे घरे कलीसियाई भी तुसन प्रभु मां हछु-हछु नमस्कार। 20 इट्टेरे विश्वासी लोक तुसन नमस्कार ज़ोतन, मसीहरे प्यारे सेइं एक्की होरि जो नमस्कार केरा। 21 अवं पौलुस अपने हथे सेइं नमस्कार लिखताई। 22 अगर कोई प्रभु सेइं प्यार न रखे तै लानती भोए, हे इश्शे प्रभु एई! 23 प्रभु यीशुएरो अनुग्रह तुसन पुइ भोतो राए। 24 अवं तुसन सेव्भन सेइं प्यार केरताई ज़ैन केरो रिश्तो यीशु मसीह सेइं साथीए। आमीन।

2 कुरिन्थियों

1 अवं पौलुस परमेशरें मेर्रीं सेइं यीशु मसीहेरो प्रेरिताई, मेरे त कने ढूला तीमुथियुसेरे तरफां ई चिट्ठी परमेशरेंरी तैस कलीसियारे नंवे, जै कुरिन्थुस मांए, ते सारे अखाया इलाकेरे सब पवित्र लोकां केरे नंवे, 2 इश्शे बाजी परमेशर ते प्रभु यीशु मसीहेरे तरफां तुसन अनुग्रह ते शान्ति मैलती राए। 3 परमेशरेंशु शुक्र भोए जै इश्शे प्रभु यीशु मसीहेरो बाजी, जै दया केनेबालो बाजीए, ते जै असन हमेशा तसल्ली देनेबालो परमेशर। 4 तै इश्शे सेम्भी मुसीबतन मां असन तसल्ली देते; ताके अस तैस तसेल्लरे वजाई सेइं जै परमेशर असन देते, तैन भी तसल्ली देइ बटम, जैना कोन्ची वजाई सेइं मुसीबतन मां आन। 5 किजोकि जेन्चरे मसीहे दुःख झैल्लोरेन तेन्चरे अस भी दुःख झैल्लतम, एल्लेरेलेइ असन तसल्ली भी मसीहेरे जिरिये जादे भोतीए। 6 अगर अस दुःख झैल्लतम, ते ई तुश्शे तसल्लरे ते तुश्शे मुक्तेरे लेइए ते अगर असन तसल्ली मैलतीए, ते ई तुश्शे तसल्लरे लेइ आए; जेसेरे अस्सरे सेइं तुस सबरी सेइं तैना दुखन झल्लतथ, जैना अस भी झल्लतम। 7 ते इश्शी उमीद तुश्शे बारे मां पक्कीए; किजोकि अस ज्ञानतम, कि जेरे दुःखन तुसेईं असन सेइं साथी झैल्ले, तेरी तसल्ली तुसन भी असन सेइं साथी मैलेली, जै असन परमेशर देलो। 8 हे ढूलाव ते बेइनव, अस न चाम कि तुस इश्शे तैस दुखे करां अनजान राथ, जै आसिया इलाके मां असन पुइ अव, कि एरो भारी बोझ असन पुइ ओरोए थियो, जै इश्शे लेइ छुनो मुशकिल थियो, इडी तगर कि असन अग्रोवं जो जीनेरी कोई उमीद न थी। 9 बल्के असेईं अपने मने मां समझोरु थियू, कि अस मारे गानेमे ते अस अपनो भरोसो न रखम, बल्के परमेशरें पुइ भरोसो रखम जै मुइदन ज्जीते केरते। 10 तैने अस एत्रे बडे मोतरे खरने करां बघाए; ते बचालो; ते तैस करां इश्शी ई उमीदे, कि तै अग्रोवं भी बघातो रालो। 11 तुस भी मिलतां प्रार्थनाई सेइं इश्शी मदत केरेले, कि जैना बरकतां असन बडां लोकां केरे जिरिये मैली, किजोकि परमेशरें अनुग्रहे सेइं इश्शी हाफजतरे लेइ बेडि प्रार्थनां शुन्नी, तैल्लेरेलेइ बडे लोक इश्शु भोतू परमेशरेंशु शुक्र केरन। 12 किजोकि अस अपने इस ज़मीरेरे गुवैही पुइ घमण्ड केरतम, कि दुनियाई मां, खास केरतां तुसन मां इश्शो चालचलन परमेशरें लायिक ते पवित्रतैरे ते सचैईं सेइ थियो। जै दुनियारे ज्ञाने सेइं नई, बल्के परमेशरें अनुग्रह सेइं साथी थियो। 13 अस हमेशा तुसन इन लिखतम ताके तुस पढ़थ ते समझथ, ते मीं उमीदे, कि आखरी तगर समझते भी राले। 14 जेन्चरे तुसन मरां केत्रेई मन्नोरु भी आए, कि अस तुश्शे धुमण्डेरी वजाम; तेन्चरे तुस भी प्रभु यीशुएरे वापस एजनेरे दिहाडे इश्शे लेइ घमण्डेरी वजा भोलो। 15 ते इस भरोसे सेइं, अवं चातो थियो कि पेइलो तुसन कां एज्जी; कि तुसन दुगामी बरकत मैल्ले। 16 ते तुसन मेइं निस्तां मकिदुनिया इलाके जो गेई ते फिरी मकिदुनियारां तुसन कां एज्जी, ते तुस मेरी सफरेरी ज़रुररेरे मुताबिक मदत केरतां यहूदिया इलाकेरे पासे किछ दूर पुजाथा। 17 एल्लेरेलेइ मीं जैने ई इच्छा कियोरी थी कुन मीं चंचलता हिराई? या जैन केरनु चाताई कुन दुनियारे लोकां केरे जेरु केरनु चाताई, कि अवं गल्ली मां हॉ, हॉ भी केरि; नई, नई भी केरि? 18 जेन्चरे परमेशर वफादारे, तेन्चरे कि इश्शे तैस वचने मां जै तुसन सेइं ज़ोवं, “हॉ” ते “नई” दुइये न मैल्ले। 19 किजोकि परमेशरेंशु मडू यीशु मसीह जेसेरो इश्शे जिरिये मतलब मेरे ते सिलवानुस ते तीमुथियुसेरे जिरिये तुसन मां प्रचार भोव; तैस मां “हॉ” ते “नई” दुइये न थी; पन तैस मां “हॉ” ए “हॉ” भोइ। 20 किजोकि परमेशरें जेरे वादेन, मसीह मां हांए सेइं आन, एल्लेरेलेइ मसीहेरे जिरिये आमीन भी भोइ, कि इश्शे जिरिये परमेशरेंरी महिमा भोए। 21 ते जै असन तुसन सेइं साथी मसीह मां मजबूत केरते, ते जैने इश्शु अभिषेक कियोरुए, तैए परमेशरें। 22 जैने असन पुइ छाप भी की, ते जेन्चरे कोन्ची चीज़रे लेइ साई देतन तेन्चरे तैनी पेइली आत्मा इश्शे मने मां दिती। 23 परमेशर मेरे इस सचैइयरो गवाहे कि अवं कुरिन्थुस नगरे मां दुबारां एल्लेरेलेइ नई ओरोए कि अवं तुसन दुःख देनो चातो थियो। 24 इन नई, कि अस विश्वासेरे बारे मां

तुसन पुइ राज़ केरनु चातम; पन तुश्शे आनन्दे मां तुश्शी मदत केरनेबाले आम, किजोकि तुस विश्वासे सेइं मजबूत रातथ।

2 मीं अपने मने मां इन थापेरु थियू, कि फिरी तुसन कां एइतां तुसन दुख न देई। 2 किजोकि अगर अवं तुसन दुखी केरि, त मीं आनन्दे देनेबालो कौन भोलो, सिर्फ तेए जै मीं दुखी कियोरोए? 3 ते मीं ई गल तुसन एल्लेरेलेइ लिखी, कि एरु न भोए, कि मेरे एजने पुइ जैन सेइं आनन्द मैल्लेरो लोइतो थियो, अवं तैन करां दुखी भोई; किजोकि मीं तुसन सेम्भन पुइ इस गल्लेरो भरोसोए, कि जै मेरो आनन्दे, तैए तुश्शे सैरी केरो भी आए। 4 मीं बडे दुःख, ते मनरे कटे सेइं, बडे एंखरन सेइं तुसन चिट्ठी लिखोरी थी, एल्लेरेलेइ नई, कि तुस दुखी भोथ, पन एल्लेरेलेइ कि तुस तैस बडे प्यारे ज्ञानथ, जै मीं तुसन सेइं आए। 5 ते अगर केन्चे दुखी कियोरोई, त अवं नई बल्के (तैस सेइं बडी सखती न केरि) किछ-किछ तुस सब दुखी कियोरेथ। 6 एरे मैनेरे लेइ ई सजा जै विश्वासी ढूलान मरां बडेई दिती, सुडी आए। 7 एल्लेरेलेइ इस करां इन रोडूए कि तैसेरो पाप माफ़ केरा; ते तैस तसल्ली देथ, एरु न भोए कि एरो मैन्दु उडेसी मां डुबे। 8 एल्लेरेलेइ अवं तुसन कां बिनती केरताई, कि तैस अपने प्यारेरु सबूत देथ। 9 किजोकि मीं एल्लेरेलेइ भी लिखोरु थियू, कि तुसन पेरखी, कि तुस मेरे सब गल्लां मन्नेरे लेइ तियार आथ या नई। 10 जैस तुस माफ़ केरतथ तैस अवं भी माफ़ केरताई, किजोकि मीं भी जैन किछ माफ़ कियोरुए, अगर कियेरु भोए, त तुश्शे वजाई सेइं मसीहेरे ठैरी भोइतां कियोरुए। 11 कि शैतानेरो असन पुइ दावो न चले, किजोकि अस तैसेरी चालन करां अनजान नई। 12 ते जैखन अवं मसीहेरी खुशखबरी शुनाने त्रोआस नगरे मां अवं, ते प्रभुए मेरे लेइ अक बत खोल्ली। 13 त मेरे मने मां चैन न भोइ, एल्लेरेलेइ कि मेरे विश्वासी ढूला तीतुसे तुश्शे एटां कोई खबर घिन्तां न अवं; ते अवं त्रोआसेरे विश्वासी लोकेन करां अलग भोइतां अवं वापस मकिदुनिया इलाके मां अवं। 14 परमेशरेंशु शुक्र भोए, जै मसीह मां सदा असन जीतारे जशने मां चलाते, ते अपने ज्ञानेरे खुशबू इश्शे जिरिये हर ठैरी फैलाते। 15 किजोकि अस परमेशरें कां मुक्ति मैलने बालां, ते नाश भोने बालन कां, दुइयां केरे लेइ मसीहेरी खुशबू आम। 16 केत्रा केरे लेइ त मरनेरे मुशक, ते केत्रन जो ज़िन्दारे लेइ ज़िन्दगीरी खुशबू, ते इन गल्लां केरे काबल कौने? 17 किजोकि अस तैन केरे जेरे नई, जैना परमेशरेंशु वचन पेइसां केरे लेइ प्रचार केरतन, पन अस मनेरी सचैईं सेइं, ते परमेशरें तरफां परमेशर हाज़र सेमझतां मसीह मां ज़ोतम।

3 कुन अस दुबारा फिरी अपनि बडयाई केरने लगम? या असेईं केत्रा केरि जेरे सुपारशारी चिट्ठी तुसन कां ऐनिन या तुसन करां नेनिन? 2 तुस एप्पु इश्शी लेइ चिट्ठी केरे जेरेथ, जैना इश्शे लेइ सुपारश करतिन, जैना इश्शे दिले पुइ लिखोरिथ, तैन हर कोई पेढी सकते ते जैना रोडां कम्मां असेईं कियोरन, तैन लोक पिशैनी सकतन। 3 इन बांए, कि तुस मसीहेरे चिट्ठी केरे जेरेथ, जैना असेईं सेवकां केरि जेरे लिखी; ते जैना शैही सेइं नई, पन जीते परमेशरेंरी आत्माई सेइं घोडां केरे तेखी पुइ नई, बल्के दिलेरे मांसेरे तेखी पुइ लिखोरिन। 4 अस मसीहेरे जिरिये परमेशरें पुइ एरु याकीन रखतम। 5 इन नई, कि अस अपने आपे सेइं इस काबलम, कि एप्पु कोन्ची गल्लेरे बारे मां सोची बटम; पन इश्शी काबलीत परमेशरें तरफां आए। 6 जैनी अस नंवे करारेरे सेवक भोनेरे काबल भी किये, मूसेरे कानूनेरे सेवक नई बल्के पवित्र आत्मा सेइं; किजोकि मूसेरो कानून न मन्नेरो नितीजो मोत भोते, पन पवित्र आत्मा हमेशारी ज़िन्दगी देते। 7 जैखन मूसेरो कानून जेसेरे जिरिये मोत एइती जेसेरे लफस घोडां केरे तेखतिन पुइ घेइतां लिखोरे थिये, इडी तगर महिमा बाले भोए, कि इस्राएली लोक मूसेरे तुतररां तैकि न थी बटते, पन तै जादे वक्ते तगर न राव, 8 ते आत्मारो करार होरो भी महिमा बालो किना भोलो? 9 किजोकि दोषी ठहराने बालो करार महिमा बालो थियो, ते धर्मी बाने बालो करार होरो भी महिमा बालो किना भोए! 10 ते जै पुरानो महिमा बालो करार थियो, तै नव्वं करारे करां महिमा बालो न भोव। 11 किजोकि मूसेरु कानूने जेसेरी महिमा थोडे वक्तेरे लेइ थी, महिमा बालो

थियो, त तै नव्वों करार जै कायम रालो, होरू भी महिमा बालू किजो न भोलो। 12 एल्हेरेलेइ एरी उमीद रेखतां अस दिलेरी सेइं ज़ोतम। 13 अस मूसरे ज़ेरे नई, ज़ैने अपने तुतरे पुड़ पड़दो रखोरो थियो ताके इसाएली लोक तैस घटने बैली महिमारो अन्त न लहन। 14 पन तैन केरे मन सखत भोए, किजोकि अज़ तगर पुरानो नियम पढ़ते बार तैन केरे मन्न पुड़ तैए पड़दो रहते; पन पड़दो सिर्फ तै मसीह पुड़ विश्वास केरने सेइं उठते। 15 ते अज़ तगर ज़ैखन भी मूसरो कानून पढ़ो गाते, ते तैन केरे मन्न पुड़ सदा पड़दो रहते ते तैन रोड़े चारे समझ न एज्जे। 16 पन ज़ैखन भी तैना प्रभु यीशु पुड़ विश्वास केरेले, तैखन तै पड़दो दूर भोलो। 17 प्रभु त आत्मा आए, ते ज़ैडी भी प्रभुपुरो आत्माए तैडी कानूने करां अजादी आए। 18 पन ज़ैखन इश्शे सेब्भी केरे बगैर पड़दे तुतरन सेइं प्रभुएरू प्रकाश बांदू भोते, ज़ेन्चरे शीशे मां, ते प्रभुएरे ज़िरिये ज़ै आत्माए, अस प्रभुएरे महिमा बाले रूपे मां थोड़े-थोड़े बदलते रातम।

4 एल्हेरेलेइ अगर असन पुड़ एरी दया भोइ, कि असन ई खुशखबरी शुनानेरी सेवा मैल्ली, त अस दिलेरी न शारम। 2 पन असेईं शरमराँ छुपोरां कम्मां शारोरन, ते न च़लैकी सेइं च़लते, ते न परमेशरेरे वचन मां मलावट केरम। पन परमेशर इश्शो गवाहे कि अस सच़ ज़ोतम, ते हर कोई गवाही देते कि इन सच़्चे। 3 पन अगर इश्शे खुशखबरी पुड़ पड़दोए, त ई नाश भोने बालां केरे लेइए। 4 ते तैन विश्वास न केरनेबालां केरे लेइ, ज़ैन केरे अक्ल इस दुनियारे ईश्वर शैताने कानी कियोरीए, ताके मसीह ज़ै परमेशररू रूपे, तैसेरी महिमा खुशखबरी लौ तैन पुड़ न चमके। (aiōn g165) 5 किजोकि अस अपनो नई, बल्के यीशु मसीहेरो प्रचार केरतम, कि तै प्रभुए; अस यीशु मसीहेरे वजाई सेइं तुश्शे सेवकम। 6 एल्हेरेलेइ कि परमेशर तै आए ज़ैनी ज़ोवं, “कि आंधरे मरां लौ चमके,” ते परमेशरे इश्शे दिलन मां लोअरी ज़ेरे समझ दिती, कि अस परमेशरेरी महिमा पिशानम ज़ै यीशु मसीह मां लेइहोई। 7 पन अस मितारे भांडां केरे ज़ेरेम ज़ैन मां धन रखेरए, कि ई हछ्छी शक्ति इश्शे तरफां नई, बल्के परमेशरेरे तरफां भोए। 8 अस च़ेरे पासना दुःख त झल्लतम, पन मुशकली मां न पेम; घबरातम, पन न उमीद न भोम। 9 स्ताए त गातम, पन शारे न गाम, बछोड़े त गातम पन नाश न भोम। 10 अस यीशु मसीहेरी मौत अपनि जानी मां हर वक्त च़लातम; कि ज़ैन किछ अस केरतम तैसेरे ज़िरिये लोक यीशुएरी ज़िन्दगी हेरेले। 11 किजोकि इश्शे ज़ीते सांसेइं, सदा यीशुएरे वजाई सेइं असन मौतरे खतरो भोतो थियो, कि यीशुएरी ज़िन्दगी भी इश्शे नाश भोनेबाले जानी मां बांदी भोए। 12 अस त मौतरे खतरे मां ज़ोतम पन इसेरो नितीजो तुश्शे लेइ हमेशारी ज़िन्दगीए। 13 ते एल्हेरेलेइ कि असन मां तैए विश्वासेरी आत्माए, “जेसेरे बारे मां पवित्रशास्त्रे मां लिखोरूए, कि मीं विश्वास कियो, एल्हेरेलेइ मीं ज़ोवं” एल्हेरेलेइ अस भी विश्वास केरतम ते ज़ोतम। 14 किजोकि अस ज़ानतम, ज़ैने प्रभु यीशु मुड़न मरां ज़ीतो कियो, तैए असन भी यीशु मसीह मां हिसेदार सेमझतां ज़ीते केरेलो, ते तुसन सेइं साथी अपने सामने हाज़र केरेलो। 15 किजोकि सारे दुःख ज़ैना असन पुड़ आन, तुश्शे लेइ आन, ताके परमेशरेरो अनुग्रह जादे करां जादे लोकन मसीह मां आने, ते बड़े लोक परमेशररू शुक्र केरेले। 16 एल्हेरेलेइ अस दिलेरी न शारम; अगर इश्शी बेइरीं इन्सानयत नाश भी भोए, त फिरी भी इश्शी एनत्रीं इन्सानयत रोज़ नव्वीं भोती रहतीए। 17 किजोकि इश्शो एक्की पलेरो थोड़ो ज़ेरो दुःख बड़ी ते हमेशारी महिमा पैदा केरते, ज़ेसेरी तुलना केन्ची सेइं न केरोए। (aiōnios g166) 18 ते अस त लेवरी चीज़न नई पन अलैई चीज़न लाते रातम, किजोकि लेवरी चीज़ां थोड़े दिहाड़ां केरे लेइ आन, पन अलैई चीज़ां हमेशारे लेई आन। (aiōnios g166)

5 किजोकि अस ज़ानतम, कि ज़ैखन इश्शो जिसम ज़ै धरतली पुड़े ते तेम्बेरो ज़ेरो आए मेरतां नाश भोलो, त असन परमेशरेरी तरफां स्वर्ग मां अक भवन मैलनोए, ज़ै हथ्यां केरो बनावरो नई बल्के हमेशारोए। (aiōnios g166) 2 इस मां अस बडू कर लातम, ते बड़ी इच्छा केरतम; कि असन एरो

जिसम मैले ज़ै स्वर्गेरे घरेरो ज़ेरो भोए। 3 कि ज़ैखन असन स्वर्गेरो जिसम मैलेले त अस नगरे न लेइहोम। 4 ते अस इस तेम्बेरे ज़ेरे घरे मां रेइतां बोड़े सेइं देबोइतां कर लाते रातम; किजोकि अस दुनियारो जिसम शारनो न चाम, बल्के इन चातम कि परमेशर असन स्वर्गेरो जिसम दे, ताके ज़ै मरने बालो जिसमे तै न मरे बल्के हमेशारे ज़िन्दगी मां बेदलोए। 5 ते ज़ैनी अस इस नव्वेँ जिसमेरे लेइ तियार कियोरेम ज़ै असन मैलनोए, तै परमेशरे, ज़ैने असन जेन्चरे साईं देतन तेन्चरे पवित्र आत्मा भी दितोरोए। 6 असन सदा पूरू याकीने ते इन ज़ानतम; कि ज़ांतगर अस जिसमे मां रातम, तांतगर अस प्रभु करां अलग आम ज़ै स्वर्ग मां आए। 7 किजोकि अस शकल हेरतां नई, पन विश्वासे सेइं ज़ोतम। 8 एल्हेरेलेइ अस हिम्मत केरते रातम, ते जिसमे करां अलग भोइतां ज़ैखन अस मरमेले त प्रभु सेइं साथी रानू जादे रोडू समझतम। 9 एल्हेरेलेइ इश्शे मनरी उमंग ईए, कि चाए अस स्वर्ग मां तैस सेइं साथी रहम, चाए अलग इडी धरती पुड़ रहम पन अस तैस पसंद एइते रहम। 10 किजोकि ज़रूरीए, कि इश्शो सेब्भी केरो हाल मसीहेरे आदालतरे तखतेरे सामने खुल्ले, कि हर कोन्ची मैन्हु अपने रोड़ां बुरां कम्मां केरो बदलो मैल्ले ज़ैना तैने जिसमे सेइं कियोरन। 11 अस प्रभुपुरो डर मेन्तां लोकन कां बिनती केरतम कि सच़्चे पुड़ विश्वास केरन, ते परमेशर रोड़े च़ारे ज़ानते; ते मेरी उमीद ईए, कि तुस भी अपने दिले मां असन रोड़े च़ारे ज़ानाथ। 12 अस फिरी भी अपनि बडयाई तुश्शे सामने न केरम, बल्के अस अपने बारे मां तुसन घमण्ड केरनेरो मौको देतम, कि तुस तैन जुवाब देइ बटतथ, ज़ैना मने पुड़ नई, बल्के दिखवटी गल्लन पुड़ घमण्ड केरतन। 13 अगर कोई ज़ोते कि अस पागलम, त परमेशरेरे लेइ अहम; ते अगर कोई ज़ोते कि अस रोड़े अहम त तुश्शे लेइ आम। 14 किजोकि मसीहेरो प्यार असन मजबूर केरते; एल्हेरेलेइ कि असन याकीने कि ज़ैखन अक मैन्हु सेब्भी केरे लेइ मरो जेव त सब मेरि जे। 15 ते मसीह एन्चरे सेब्भी केरे लेइ मरो, कि ज़ैना ज़ीते आन, तैना अग्रोवं जो अपने लेइ न ज़ीन पन तैसेरेलेइ ज़ै तैन केरे लेइ मरो ते फिरी ज़ीतो भोव। 16 एल्हेरेलेइ अज़ेरां पत्ती अस कोन्ची दुनियारे मुताबिक न समझाम, ते अगर असेईं भी मसीह दुनियारे मुताबिक ज़ानोरो थियो त फिरी भी अज़्जेरे पत्ती फिरी एरू न ज़ानम। 17 ते अगर कोई मसीह मां आए त तै नव्वीं सष्टि आए, पुरैनी गल्लां बीती जेई; हेरा, तैना सब नेव्वीं भोइजेइ। 18 ते सब गल्लां परमेशरेरी तरफन, ज़ैने मसीह भेजतां फिरी इश्शो मेल मलाप एप्पू सेइं कराव, ते लोक तैस सेइं मेल मिलाप केरन ई सेवा परमेशरे असन साँफोरीए। 19 मतलब परमेशरे सेइं मेल मां भोइतां एप्पू सेइं साथी दुनियारो मेल मिलाप कियोरोए, ते लोकां केरे पापां केरो दोष तैन पुड़ नई लोरो, ते परमेशरे मेल मलापेरो बिस्तार असन साँफोरोए। 20 अस मसीहेरे राजदूत अहम; मन्ना कि परमेशर इश्शे ज़िरिये बिनती केरते कि तुस तैसेरो सन्देश कबूल केरथ, अस मसीहेरे तरफां बिनती केरतम, कि परमेशरे सेइं साथी मेल मिलाप केरा। 21 मसीह पापे करां अनजान थियो, तैए परमेशरे इश्शे लेइ पापी ठहराव, कि अस परमेशरेरी नज़री मां धर्मा बनम किजोकि मसीहे इश्शी पापां केरि सज़ा भुतातीरीए।

6 अस ज़ैना परमेशरे सेइं साथी कम केरनेबाले आम ई भी बिनती केरतम, कि परमेशरेरो अनुग्रह ज़ै तुसन पुड़ भोरोए, ज़ैया न भोने देथ। 2 किजोकि परमेशर पवित्रशास्त्रे मां ज़ोते, “कबूल केरनेरे वक्ते मीं तेरी शुनी, ते मुक्तेर दिहाड़े मीं तेरी मदद की,” हेरा, हुना तै कबूल केरनेरो वक्ते, हेरा, हुना तै मुक्ती दिहाड़ीए। 3 अस परमेशरे सेइं साथी कम केरनेबाले केन्ची भी गल्ली मां कोई भी मौको न देम, कि इश्शी सेवाई पुड़ कोई दोष लाए। 4 पन हर गल्ली सेइं परमेशरेरे सेवकां केरे ज़ेरे अपने रोड़े गुन्न बांटे केरतम, बड़े सबरी सेइं, दुःख सेइं, शारे गाने मां, मुशकलन सेइं। 5 कोड़े खाने सेइं, कैद भोने सेइं, हेल्लन सेइं मेहनती सेइं, बाँझे बिशने सेइं, बरत रखने सेइं। 6 पवित्रतैई सेइं, ज़ाने सेइं, सबरी सेइं, दयाई सेइं, पवित्र आत्मा सेइं। 7 सच़्चे प्यारे सेइं, सच़्चे वचने सेइं, परमेशरेरे शक्ति सेइं; अस धार्मिकतारे हथियारन इस्तेमाल केरतम, देइने हथ्ये सेइं हमलो केरनेरे लेइ ते खिशड़े हथ्ये सेइं अपनो आप

बचानेरे लेइ। 8 ते ज़ैखन लोक इश्शी इज़्जत केरतन या असन बेइज़त केरतन, ज़ैखन लोक ज़ोतन अस रोडेम या बुरे मैमूम, अस ईमानदारम फिरी भी लोक झूठ ज़ोतम। 9 अनज़ाना केरे ज़ेरेम; फिरी भी मुशूम, मरने बालां केरे ज़ेरेम पन हेरा ज़ीतम, मार खाने बालां केरे ज़ेरेम, पन जानी सेइं न मैरोम। 10 दुःख केरनेबालां केरे ज़ेरेम, पन सदा आनन्द केरतम, कंगालम, पन बडे लोकन आत्मिक धनी केरतम; एरेम कि असन कां किछ भी नई फिरी भी सब किछ रखतम। 11 हे कुरिन्थिस नगरेरे विश्वास लोकव, असेईं तुसन सेइं खुलतां गल्लां कमेईं, अस तुसन सेइं पूरे दिले सेइं प्यार केरतम। 12 इश्शे मने मां तुश्शे लेइ बडी ठारे, पन तुश्शे मन्न मां नई। 13 पन अवं बच्चे सेमझतां तुसन सेइं ज़ोताई, कि तुस भी तैसेरे बदले असन सेइं प्यार केरा। 14 गैर विश्वासी लोकां केरे संगती मां न गाथ, किजोकि धार्मिकता ते अधर्मरो कुन मेल जोल? या लौ ते आंधरेरो कुन साथ? 15 ते मसीहे शैताने सेइं कुन लगाव? या विश्वास केरनेबालेरो विश्वास न केरनेबाले सेइं कुन तालमेल? 16 ते परमेशेरे मन्दरेरे मां मूर्ती केरे लेइ कोई ठार नई, किजोकि अस त ज़ीते परमेशेरेरा मन्दर अहम; जेन्चरे परमेशेरे पवित्रशास्त्रे ज़ोवं, “अवं तैन लोकन साथी रेइलो ते तैन मां चलेलो फिरेलो; ते अवं तैन केरो परमेशेरे भोनेईं, ते तैन मेरे लोक भोले।” 17 एल्हेरेलेइ प्रभु पवित्रशास्त्रेरे ज़िरिये ज़ोते, “विश्वास न केरनेबालन मरान निस्सा ते अलग राथ; ते अशुद्ध चीजन करां दूर राथ; ते अवं तुसन कबूल केरेलो। 18 ते तुश्शो बाजी भोइलो, ते तुस मेरां मट्टां ते कुइयां भोलां, इन सर्वशक्तिमान प्रभु परमेशेरेरु वचने।”

7 किजोकि हे दलाराव परमेशेरे वादो कियोरो कि तै असन अपने बच्चां केरे रूपे मां कबूल केरेलो, ते एज्जा, अस अपने आपे ते जिसमेरी ते आत्मारी सब गंदगी शुद्ध केरम, ते परमेशेरो डर मेन्तां ते इज़्जत केरतां, ते परमेशेरी बत्तां चलनेरे लेइ पूरे तरीके सेइं पवित्र ज़िन्दगी जीमां। 2 असन अपने दिल मां ठार देथ, असेईं केन्ची सेइं बेइन्साफी नई कियोरी, न केन्चेरु किछ बिगाडेरुए, ते न कोई ठगोरो। 3 अवं तुसन दोषी बनानेरे लेइ इन नई लागोरो ज़ोने, किजोकि मीं इन पेइलू ज़ोरुए, कि तुस इश्शे मने मां बसोरेथ कि अस तुसन साथी मरने ज़ीनेरे लेइ तियारम। 4 अवं तुसन सेइं बडे दिलेरी सेइं जोने लोरोई, मीं तुसन पुइ बडू घमण्डे, अवं तसल्ली सेइं भरोईं जोरोई; अपने सारे दुखन मां अवं आनन्दे सेइं भरपूर राताई। 5 किजोकि ज़ैखन अस त्रअस शैरतां मकिदुनिया इलाके मां आए, तैखन भी इश्शे जानी चैन न भोइ, पन अस च़ेरे पासना दुःख झल्लते राए, बेइर लडैई थी, अन्तर बेइ-बेइ गल्लां थी। 6 फिरी भी उदासन तसल्ली देनेबाले परमेशेरे तीतुसेरे एजने सेइं असन तसल्ली दिती। 7 ते न सिर्फ तैसेरे एजने सेइं पन तैसेरी तैस तसल्ली सेइं, ज़ै तैस तुसन करां मैलती थी; ते तैनी तुश्शी इच्छा ते तुश्शे दुःख ते मीं सेइं मिलनेरे जोशेरी खबर असन शुनाई, ज़ैस सेइं होरो भी आनन्द भोव। 8 किजोकि अगर मीं एपनी चिट्ठी सेइं तुस दुखी किये, पन तैस करां पसतेईं न, जेन्चरे पेइलो पसतातो थियो, किजोकि अवं हेरताई तैस चिट्ठी सेइं तुसन दुःख त भोव पन ते थोडे च़िरेरे लेइ थियो। 9 हुनी अवं खुशी आई पन एल्हेरेलेइ नई कि तुसन दुःख पुजो, बल्के एल्हेरेलेइ कि तैस्से दुखेरे वजाईं तुसेईं पापन करां मन फिराव। किजोकि तुश्शो दुःख परमेशेरेरे मेज़ीं सेइं थियो, कि इश्शे पासरां तुसन कोई नुकसान न पुजे। 10 किजोकि परमेशेरेरे भक्तेरो दुःख एरी पसतावो पैदा केरते ज़ैस सेइं मुक्ति मैलतीए, फिरी तैस सेइं पसतानु न पे, पन दुनियारो दुःख हमेशारी मौत पैदा केरते। 11 ते हेरा, इस्से गल्ली सेइं तुसन परमेशेरेरे भक्तेरो दुःख भोव, कि तुसन केत्रो जोश, उज़र, सरक, डर, इच्छा, मधन भोनु, ते सज़ा देनेरो खियाल पैदा भोव? तुसेईं सेबभी तरीके सेइं इन सिद्ध कियूं, कि तुस इस गल्ली मां बेकसूर आथ। 12 फिरी मीं ज़ैन तुसन जो सेखती सेइं लिखोरु थियूं, तैन न तैसेरे वजाईं सेइं लिखूं, ज़ैने बेइन्साफी की, ते न तैसेरे वजाईं सेइं ज़ैस सेइं बेइन्साफी भोइ, पन एल्हेरेलेइ कि तुश्शी सरगरमि ज़ै इश्शे लेइए, तै परमेशेरेरे सामने तुसन पुइ बांदि भोए। 13 एल्हेरेलेइ असन हिम्मत मैल्ली; ते इश्शी इस हिम्मती सेइं साथी तीतुसेरे आनन्द सेइं होरो भी आनन्द भोव

किजोकि तैसेरो मन तुश्शे वजाईं सेइं हरो भरोए। 14 किजोकि अगर मीं तैसेरे सामने तुश्शे बारे मां किछ घमण्ड हिराव, त छिथोव न, पन जेन्चरे असेईं तुसन सेइं सब गल्लां सच्च-सच्च जोरी थी, तेन्चरे इश्शे घमण्ड हिरानु तीतुसेरे सामने भी सच्च निस्सू। 15 ते ज़ैखन तैस तुश्शो सेबभी केरु हुक्मन मन्नेबाले भोनु याद एइते; किजोकि तुसेईं थरकते-थरकते तैस सेइं मुलाकात की; तैसेरो प्यार तुश्शे पासरां होरो भी बढतो गाते। 16 अवं खुश भोताई, किजोकि तुसन करां मीं हर गल्ली मां भरोसो भोते।

8 हुनी मेरे द्वालाव बेइनव, अस तुसन परमेशेरेरे अनुग्रहेरी खबर देतम, ज़ैन मकिदुनिया इलाकेरे कलीसियारे लोकन पुइ भोरोए। 2 कि ज़ैखन बेइडि मुसीबतां केरे ज़िरिये परखे जे, त तैना बडे खुशी भोए, चाए तैना बडे गरीब थिये फिरी भी होरि विश्वासी लोकां केरि मद्दत केरनेरे लेइ खुल्ले दिले सेइं पेइंसो दितां। 3 ते तैन केरे बारे मां मेरी ई गवाहीए, कि तैनेईं अपने काबलीतेरे मुताबिक बल्के अपने काबलीती करां भी जादे मने सेइं दितां। 4 ते इस दाने मां ते पवित्र लोकां ज़ैना यहूदिया इलाके मां आन तैन केरे सेवाईं मां मद्दत केरनेरे बारे मां असन सेइं बार-बार बडी बिनती की। 5 ते जेन्चरे असेईं उमीद न थी कियोरी, कि तैनेईं पेइलो अपनो आप प्रभुएरी सेवा केरनेरे लेइ समर्पण कियो, फिरी परमेशेरी मेज़ीं सेइं असन पती चलनेरे लेइ अपनो आप समर्पण कियो। 6 एल्हेरेलेइ असेईं तीतुस समझव, कि जेन्चरे तैन पेइलू शुरू कियोरु थियूं, तेन्चरे इस दानेरे कम्मे पूरू भी केरे। 7 जेन्चरे हर गल्ली मां मतलब विश्वासे, वचन प्रचार केरनेरे काबलीत, ज़ाने ते सेबभी किसमेरे कोशिश मां, ते तैस प्यारे मां, ज़ै तुस असन सेइं केरतथ, बढते गातथ, तेन्चरे विश्वासी लोकन दान देनेरे कम्मे मां बढते राथ। 8 अवं हुक्मेरे तरीके पुइ नई, पन होरि केरे हिम्मतरे लेइ ते तुश्शे प्यार ते सलैईं परखनेरे लेइ ज़ोताई। 9 तुस इश्शे प्रभु यीशु मसीहेरे अनुग्रह ज़ानतथ, कि तै धनी भोइतां भी तुश्शे लेइ गरीब बनो ताके तैसेरे गरीब भोने सेइं तुस धनी भोथ। 10 ते इस गल्ली मां मेरो खियाल ईए, किजोकि तुश्शे लेइ रोइए; जै एक्की साले करां न सिर्फ इस कम्मे केरने मां, बल्के इस गल्लेरे चाने मां भी पेइले भोरे थी। 11 एल्हेरेलेइ हुनी इन कम पूरू केरा; जेन्चरे तुस इच्छा केरने तियार थिये, तेन्चरे अपने-अपने हैसियतरे मुताबिक पूरू भी केरा। 12 किजोकि अगर मनेरी तियारी भोए त दान तैसेरे मुताबिक कबूल भी भोते ज़ैन तैस कां आए न कि तैसेरे मुताबिक ज़ैन तैस कां अथी नई। 13 अवं इन न चैईं होरि केरि ज़िन्दगी आसान बनानेरे लेइ तुस अपने ज़िन्दगी मुशकिल बनाथ। 14 पन बराबर भोनेरे खियालन सेइं इस वक्ते तुश्शु जादे तैन केरि घाटे मां कम्मे एज्जे, ताके तैन केरु जादे तुश्शे घाटे मां कम्मे एज्जे, कि बराबरी भोए। 15 जेन्चरे पवित्रशास्त्रे मां लिखोरुए, “ज़ैनी बडू अकोट्टू कियूं तैसेरु जादे न निससू, ते ज़ैने थोडू अकोट्टू कियूं तैसेरु घट न निस्सू।” 16 परमेशेरेरु शुक्र भोए, ज़ैने तुश्शे लेइ ज़ै सौच मेरे मने मां आए तैए जोश तीतुसेरे मने मां छुड़ोरोए। 17 कि ज़ैखन असेईं तैस तुसन कां एजनेरे लेइ मिनत की त तैनी इश्शी गल मन्नी बल्के अपने मेज़ीं सेइं ते बडे जोशे सेइं तुसन कां अवं। 18 ते अस तैस सेइं साथी अक होरो विश्वासी द्वाला भेजने लोरेम, ज़ेसेरु नवं खुशखबरी शुनानेरे बारे मां कलीसियांरे लोकन मां फैलोए। 19 ते एत्रू नई, पन ते कलीसियां केरे लोकेईं ठहरावरो भी आए, कि इस दानेरे कम्मेरे लेइ असन सेइं साथी गाए ते अस ई सेवा एल्हेरेलेइ केरतम, कि प्रभुएरी महिमा भोए, ते इन हिरानेरे लेइ कि अस यरूशलेमेरे विश्वासी लोकां केरि मद्दत चातम। 20 अस इस गल्ली मां हुशार रातम, ते तीतुसे सेइं साथी विश्वासी लोक भेजने सेइं इस दान देनेबाले कम्मेरे बारे मां ज़ै सेवा अस केरतम, ताके कोई असन पुइ दोष न लेइ सखे। 21 किजोकि ज़ैना गल्लां सिर्फ प्रभुएरे नज़र मां रोडी नई बल्के मैन्दु केरे नज़री मां रोडी आन, अस तैन केरि फिक्क केरतम। 22 ते अस तैन सेइं साथी अक होरो विश्वासी द्वाला भी भेजी राओरेम, ज़ै असेईं बार-बार परखो ते बेइडि गल्लन मां जोशे बालो निस्सो; पन हुनी तुसन पुइ तैस बडो भरोसोए एल्हेरेलेइ ते दिले सेइं जोशे बालोए। 23 अगर कोई तीतुसेरे बारे मां पुछे, त तै मेरो साथीए, ते

तुशें लेइ मेरो मद्दतगार, ते अगर इश्शे विश्वासी ढूलां केरे बारे मां कोई पुछे, त तैना कलीसियां केरो भेजोरोए ते तैन केरि ज़िन्दगी सेइं मसीहीरी महिमा भोतीए। 24 एल्हेरेलेइ अपनो प्यार तैन हिराथ, सारे कलीसियां केरे विश्वासी लोकन सबूत देथ कि इश्शू तैन घमण्ड जैन तुशें बारे मांए सच्चै।

9 हुनी तैस सेवारे बारे मां जै यरूशलेमेरे विश्वासी लोकन जो दान देनेरे बारे मां की गातीए, मीं तुसन जो लिखनू ज़रूरीए नई। 2 किजोकि अवं तुशें मनेरे तियैरारे बारे मां ज्ञानताई, जेसेरे वजाई सेइं अवं तुशें बारे मां मकिदुनिया इलाकेरे विश्वासी लोकां केरे सामने घमण्ड हिराताई, कि तुस अखाया इलाकेरे लोक एककी साले करां तियार भोरेथ, ते तुशें जोशे होरन भी जोश बनेवरोए। 3 पन मीं तीतुस ते दूई होरे ढूला तुसन कां एल्हेरेलेइ भेजे, कि असेई जैन घमण्ड तुशें बारे मां हिराव, तैन इस गल्ली मां बैफेइदे न भोए; पन जेन्चरे मीं जांवे; तेन्चरे तुस यरूशलेम नगरेरे विश्वासी लोकां केरे लेइ दान देने जो तियार राथ। 4 एरू न भोए, कि अगर किछ मकिदुनिया इलाकेरे विश्वासी लोक मीं सेइं साथी एज्जन, ते तुशू दान तियार न भोए, त अस तुसन पुइ भरोसेरे केरनेरे वजाई छिथोम, पन तुस असन करां भी जादे छिथोले। 5 एल्हेरेलेइ मीं विश्वासी ढूलान सेइं ई बिनती केरनि ज़रूरी समझी, कि तैना पेइले तुसन कां गान, ते तुशें खुल्ले दिले सेइं दान देनेरे बारे मां, जेसेरे बारे मां पेइलो वादो कियोरो थियो, तियार केरतां रखा, कि इन दबावे सेइं नई बल्के इच्छाई सेइं भोए। 6 पन गल त ईए, कि जै थोडू बेते तै कटेलो भी थोडू; ते जै हलू बेते तै हलू कटेलो। 7 हर अक मैनु जेन्चरे मने मां थापेरू भोते तेन्चरे दान दे, न कुइ-कुइ केरतां, ते न दबावे सेइं, किजोकि परमेशर खुशी सेइं देने बालन पुइ खुश भोते। 8 परमेशर जैन किछ तुसन ज़रूरेते तैसेरो अनुग्रह देइ बटते, जैस सेइं हर गल्ली मां ते हर वक्र, सब किछ, जेसेरी तुसन ज़रूत भोए, तुसन कां राए, ते हर एककी रोडे कम्मरे लेइ तुसन कां बडू किछ भोए। 9 जेन्चरे पवित्रशास्त्रे मां लिखोरूए, “परमेशर जैन ज़रूरेते तैन हच्छु देते, जैन तै केरते तैन ठीके ते तैन हमेशा रालू।” (aiōn g165) 10 आखरी, जै बेनेबालो बीज, ते खानेरे लेइ रोटी देते, तै तुसन बीज देलो, ते तैस सेइं फलवन्त केरेलो, ते तुशें धार्मिकतारो फल बधालो। 11 तुसन हर गल्ली मां बरकत मैलेली जैस सेइं तुस जादे दान देनेरे काबल बनेले, ते ज़ैखन अस तुशें हल्ले दान तैन कां नेमले जैन ज़रूरेते त तैना लोक परमेशरेशू शुकू केरेले। 12 किजोकि सेवारे पूरे केरने सेइं, न सिर्फ परमेशररे लोकां केरो घाटो पूरो भोते, पन लोकां केरे तरफां परमेशरेशू बडू शुकू भोते। 13 किजोकि होरि लोकन दान देनेरी मद्दतरी सेवारू सबूत कबूल केरतां तैना परमेशरैरी महिमा बांदी केरतन, कि तुस मसीहीरी खुशखबरी मेन्तां तैसेरे अधीन रातथ, ते गरीब विश्वासी लोकां केरि, ते सेल्भी केरि मद्दत केरने मां हच्छु देनू बांदू केरतथ। 14 ते तैना तुशें लेइ परमेशर कां प्रार्थना केरेले; तैना तुसन सेइं प्यार केरतन, किजोकि परमेशर तुसन पुइ अनुग्रह कियोरोए। 15 परमेशर तैसेरे तैस दानेरे लेइ जैन समझी करां बेइर शुकू भोए।

10 अवं तैए पौलस जै तुशें सामने दीन आई, पन तुसन करां दूर भोताई सेखती सेइं ज़ोताई। अवं तुसन मसीहीरी नप्रता ते नरमी याद करेइतां तुसन कां मिनत केरताई। 2 अवं ई बिनती केरताई, कि तुशें सामने नझक भोइतां दिलेर न भोनु पे; जेन्चरे अवं केरन पुइ जैना असन दुनियारे लोकां केरे जेरे चलने बाले समझतन, बहदरी हिरानेरी खियाल केरताई। 3 किजोकि अगर अस दुनियाई मां ज़ीतम, पन फिरी भी अपने दुश्मन् सेइं दुनियारे मुताबिक न लडम। 4 किजोकि इश्शी लडईरे हथियार मैनु केरे नई, पन गड बछोइनेरे लेइ परमेशरैरी शक्ति। 5 ते अस खियालन, ते हर एककी उच्ची गल्ली, जैना परमेशरैरी पिशानेरे खलाफ उदुतन, खतम केरतम; ते हर एककी खियाले कज्जे मां केरतम, ते मसीहीरो हुक्म मन्ने बालो बनातम। 6 ते तियार रातम कि ज़ैखन तुस पूरे तरीके सेइं अपनो आप मसीहीरो हुक्म मन्नेबाले बनातथ, त अस मसीहीरे हुक्म न मन्ने बालन सजा देनेरे लेइ तियार रामेले। 7 तुस बेइरयू रूप हेरतथ, अगर केन्ची एप्प पुइ ई भरोसे, कि अवं मसीहीरोई, तै इन भी जाने, कि ज़ेरो तै मसीहीरोए, तेन्चरे अस भी मसीहीरेम आम।

8 किजोकि अगर अवं तैस अधिकारेरे बारे मां होरू भी घमण्ड हिरैई, जै प्रभु तुशें विश्वास नाश केरनेरे लेइ नई बल्के विश्वासे बद्दनेरे लेइ असन दितोरोए, त शरमिन्दे न भोलो। 9 इन अवं एल्हेरेलेइ ज़ोताई, कि चिट्ठी केरे जिरिये तुसन डराने बालो न भोई। 10 किजोकि किछ लोक ज़ोतन, “कि तैसेरी चिट्ठी त ज़रूरिन ते अस्सर केरने बैलिन; पन ज़ैखन हेरतन, त तै कमजोर मैनु आए, ते तैसेरां भाषाना बेकारन।” 11 ते जै एरू ज़ोते, तै ई समझ रखते, जेन्चरे ठीक इश्शे चिट्ठन मां इश्शो वचन आए, तेन्चरे तुशें सामने इश्शां कम्मां भी भोलां। 12 किजोकि असन ई दिलेरी नई कि अपनो आप तैन सेइं साथी गनम, या तैन सेइं अपनो आप मिलाम, जैना अपनि तारीफ़ केरतन, ते अपनो आप एककी होरि सेइं तुलोइतां बेवकूफ बनतन। 13 अस परमेशरैरे दितोरे कम्मे करां बेइर घमण्ड कथी न केरमेले, पन तैस्से हदी तगर जै परमेशर इश्शे लेइ बनोरीए, ते तैस मां तुस भी ओरिथ ते तैसेरे मुताबिक घमण्ड भी केरेले। 14 किजोकि अस एपनी हदी करां बेइर अपनो आप बधानो न चाम, जेन्चरे कि तुसन तगर न पुजनेरी हालती मां भोते, बल्के अस पेइले थिये जैना कुरिन्थुस नगरे मां मसीहीरी खुशखबरी शुनाते तुसन तगर पुजी जोरिम। 15 ते अस हदी करां जादे होरि केरे मेहनती पुइ घमण्ड न केरम; बल्के असन उमीदे, जेन्चरे-जेन्चरे तुशें विश्वास बधेलो तेन्चरे-तेन्चरे अस एपनी हदारे मुताबिक तुशें वजाई सेइं होरां भी बडां जादे कम्मां केरनेरे काबल भोले। 16 कि अस तुशें हदन करां सारे दूर-दूर इलाकन मां भी खुशखबरी शुनाम, इन नई कि अस होरि केरे हदां केरे अन्तर बनोरे कम्मन पुइ घमण्ड केरम। 17 पन जेन्चरे पवित्रशास्त्र ज़ोते, जै घमण्ड केरे तै प्रभु पुइ केरे। 18 किजोकि जै अपनि बडयाई केरते, तै नई, पन जेसेरी बडयाई प्रभु केरते, तैए परमेशरैरी नज़री मां रोडोए।

11 तुस होरन कबूल केरतथ जैना अपनि बडयाई केरतन, ते एल्हेरेलेइ अवं उमीद केरतां, अगर अवं थोड़ी जेरे बेवकूफी केरि त तुस झैल्ले। 2 किजोकि अवं तुसन सेइं प्यार केरताई ते तुशें खियाल रखाताई ठीक तेन्चरे, जेन्चरे परमेशर केरते, मीं वादो कियोरोए तुसन मसीही जो देनेरे लेइ, जेन्चरे लोक पूरे तरीके सेइं समर्पितन। 3 पन अवं डरताई कि जेन्चरे शैताने सप्पेरे रूपे मां एइतां अपनि चलैकी सेइं पेइली कुआन्था, हवा भटकवरी थी, तेन्चरे तुशें मन तैसेरे सिधयैई ते पवित्रतैई सेइं जै मसीहे कबूल केरते भोरी लोडे भ्रष्ट न की गाए। 4 ज़ैखन भी कोई तुसन कां एइते ते तुसन तैस यीशुएरी जैस यीशुएरो असेई नई कियोरो एइतां, कोन्ची होरि यीशुएरो प्रचार केरते, जेसेरो प्रचार असेई नई कियोरो: या जै आत्मा तुसन मैल्लोरी तैस करां अलग किसमेरी आत्मा तुसन मैल्ले; या जैस खुशखबरी पुइ तुसेई विश्वास कियू तेस करां अलग किसमेरे खुशखबरी तुसन शुनाए, त तुस तैन शिक्षान कबूल केरने मां गलतथ। 5 अवं समझताई, कि अवं कोन्ची गल्ली मां, जैना इस तरीके सेइं बर्ताव केरतन, कि तैना होरि सब प्रेरितन करां महान आन अवं भी तैन केरो ज़ेरो रोडो प्रेरित आई। 6 अगर अवं भाषण देने मां माहिर नई, पन मसीहे ते खुशखबरे बारे मां मीं कां जाने; बल्के मीं हर गल शिक्षालने मां अपनू ज्ञान हिरावरूए। 7 कि मीं तुसन परमेशरैरी खुशखबरी मुखत शुनाई; ते अपनो आप निकडो कियो, कि तुस उच्चे भोथ, कुन इस मां मीं किछ पाप कियो? 8 मीं होरि कलीसियान करां दान कबूल कियूं, ताके तुशें सेवा मुफते मां केरि बेटि, तैस जो लूट न जोथ। 9 ते ज़ैखन तुसन सेइं साथी थियो, ते मीं पेइसेरो घाटो भोव, ते मीं केन्ची पुइ भार न छुडो, किजोकि विश्वासी ढूलाएई, मकिदुनिया इलाकेरां एइतां मेरो घाटो पूरो कियो: ते मीं हर गल्ली मां अपनो आप तुसन पुइ भार भोने करां रोको, ते अग्रोवं जो भी रोकेलो। 10 मसीहीरी सच्चैई मीं मां आए, मीं अखाया इलाके मां कोन्ची करां दान नई नेवरू, एल्हेरेलेइ अखाया इलाके मां इस घमण्डे केरने करां कोई मीं न रोकी बटे। 11 किजो मीं तुशें पेइसो नई नेवरो? कुन मीं एन कियूं, कि अवं तुसन सेइं प्यार न केरि? परमेशर ज्ञानते कि अवं तुसन सेइं प्यार केरताई। 12 पन जैन अवं केरताई, तैने अग्रोवं भी केरतो रेइलो; अवं तुसन करां मद्दत न नेइलो जैस सेइं अवं तैन जैना घमण्ड

केरनेरो मौको चानत, कि जेरू कम अस परमेशरे लेइ केरतम तेरहु कम तैना भी केरतन। 13 किजोकि एरे लोक झूठे प्रेरित आन, ते दगो केरतां कम केरनेबालन, ते मसीहेरे प्रेरितां केरू जेरू रूप बनाने बालन। 14 ते ई हैरान राने बाली गल नई किजोकि शैतान एप्पू भी महिमा बाले स्वर्गदूतां केरू रूप बनाते। 15 ते अगर तैसेरे सेवक भी धर्मी सेवकां केरू जेरू रूप बनान, त कोई बडी गल नई पन तैन केरो अन्त तैन केरे कम्मां केरे मुताबिक भोणोए। 16 अवं फिरी जोताई, कोई मीं बेवकूफ न समझे; नई बेवकूफ समझतां मीं कबूल केरे, ताके अवं थोडू जेरू घमण्ड केरि। 17 जैन किछ अवं जोताई जेरू यीशु चाते तेरहु नई बल्के बेवकूफी सेइं जोताई। 18 जैखन कि बड़े लोक इस दुनियांरे लोकां केरू जेरू घमण्ड केरतन, त अवं भी घमण्ड केरेलो। 19 तुस त समझदार भोइतां आनदे सेइं बेकूफां केरि झलतथ। 20 किजोकि जैखन तुसन कोई गुलाम बनातन, या जैन किछ तुसन कां आए नेते, या तुसन सेइं धोखो केरते, या सोचतन कि तैना तुसन करां बड़ेन, या तुशे तुतेरे पुड थप्पड बातन, त तुस झल्लतथ। 21 एल्हेरेलेइ कुन तुस सोचतथ कि मीं छिथोरू लोइते किजोकि मीं तैन नई कियोरू; पन जै कोई कोन्ची गल्ली मां घमण्ड केरते, अवं बेवकूफी सेइं जोताई, फिरी भी घमण्ड केरताई। 22 कुन तैना इब्रानी आन? अवं भी आई। कुन तैना इस्राएली आन? अवं भी आई। कुन तैना अब्राहमेरे खानदाने मरां आन? अवं भी आई? 23 कुन तैना मसीहेरे सेवक आन? (अवं पागलेरो जेरो जोताई) अवं तैन करां बेइतां आई! मीं तैन करां जादे मेहनत कियोरीए, तैन करां जादे बार अवं कैद कियोरोई, बडे बार मीं मार बजोरीए, हमेशा मेरी जान मुश्किली मां पेवरीए। 24 मीं यहूदन लीडरेई करां पंच बार 39 कोडे खाए। 25 दलेइ बार मीं बेंतेइं खेइ; एक्की बार मीं पुड घोडेव कियो जेव; दलेइ बार जिहाजे मां जैन पुड अवं चढोरो थियो, दल्टुडी जेआं, अक रात ते दिहाडी मीं समुन्द्रे मां कट्टी। 26 अवं बार-बार सफरे मां; दरियारे खतरन मां; डैकू केरे खतरन मां; अपने जातरे खतरन मां; गैर कौमां केरे खतरन मां; नगरां केरे खतरन मां; जंगल्लेरे खतरन मां; झूठे विश्वासी लोकां केरे खतरन मां; 27 बडे मेहनती मां ते तकलीफी मां; बार-बार बींझे बिशने मां; बार-बार बरत रखने मां; दुलख दलिशी मां; हिवतडे मां; ते नगरे रानेरी हालती मां राहोरोई। 28 ते होरि इना गल्लां केरे अलावा जैन गल्लां केरे बारे मां अवं न जोई सेबभी कलीसिया केरे फिक्र मीं रोज़ दुबातीए। 29 जैखन कोई कमजोर भोते अवं भी कमजोर भोताई। जैखन कोई पापेरे पासे गाते त मेरो दिल बडे दुखी भोते? 30 अगर घमण्ड केरनु जरूरीए, त अवं एपनी कमजोरी गल्लन पुड केरेलो। 31 परमेशर इशे प्रभु यीशुएरो बाजी जै सदा धने, तै ज्ञानते, कि अवं झूठ नई लोरो जोने। (aiōn 9:165) 32 जैखन अवं दमिश्क नगरे मां थियो त अरितस राजेरे हाकिमे अवं कैद केरनेरे मकसदे सेइं सारे नगरे मां पेरहो रखोरो थियो। 33 ते अवं टोकरे मां शहरपनाहेरे दैरारे बत्तां दुवारी उन्डो औसालोरो थियो, ते अवं हाकिमेरे हथ्ये करां बचो।

12 अगर घमण्ड केरनु मेरे लेइ ठीक नई, फिरी भी केरनु पेटे; अवं प्रभुएरे दित्तोरे दर्शन ते प्रकाशेरे बारे मां जोइएलो। 2 अवं मसीह मां जेवथे साल पेइले दलेइयोवं स्वर्गं पुड नीयो जेव, चाए अवं जिसमे मां थियो या जिसमे मरां बेइर, अवं न जैनी सिर्फ परमेशर ज्ञानते। 3 अवं फिरी जोताई, कि ई मैन्हु स्वर्गं तगर अकदम नेव जेव (फिरि, अवं न जैनी कि इन जिसमे मां भोवं या अक दर्शन थियूं, सिर्फ परमेशरे ज्ञानते), तैडी तैनी तैना गल्लां शुनी जैना लफसन मां न जोइयोन, एरी गल्लां जैना मैन्हु ओठन सेइं न जोई बटन। 5 एरे मैन्हु पुड त अवं घमण्ड केरेलो, पन अपने कमजोरी केरे अलावा, अपने बारे मां घमण्ड न केरि। 6 किजोकि अगर अवं घमण्ड केरनु चेईं भी त बेवकूफ न बेई, किजोकि अवं सच जोइलो; पन अपने आपे एस किसमेरे घमण्डे करां रोकताई, एरु न भोए, कि जेन्चरे कोई मीं लाते, या मीं शुन्ते, मीं तैस करां भी बेइतां न समझे। 7 पन जैना अब्दूद गल्लां परमेशरे मीं हेरेवरिन तैन केरे वजाई सेइं अवं बडो जादे घमण्ड न भोइ गेइ। एल्हेरेलेइ तैनी मीं अक बडो मुशकिल मसलो तुसन सेइं बर्ताव केरनेरे लेइ दित्तोरोए

(मेरी जानी मां अक कटो)। शैतानेरे एक्की दूते मीं मडुनेरो इरादो कियोरोए ते अवं घमण्ड केरने करां रोकरोई। 8 इसेरे बारे मां मीं प्रभु कां दलाई बार बिनती की, कि मीं करां दूर भोइ गाए। 9 ते तैने मीं सेइं जोवं, “मेरो अनुग्रह तेरे लेइ सुधोए; किजोकि मेरी शक्ति कमजोरी मां सिद्ध भोतीए।” एल्हेरेलेइ अवं एपनी कमजोरी पुड घमण्ड केरेलो, कि मसीहेरी सामर्थ्य मीं पुड एइती राए। 10 इस वजाई सेइं अवं मसीहेरे लेइ कमजोरन मां, ते बेइजतन मां, गरीबी मां, सताए गाने मां, ते मुशकलन मां खुश आई; किजोकि जैखन अवं कमजोर भोताई, तैखन अवं मसीहेरी शक्ति सेइं जोरे बालो भोताई। 11 अवं बेवकूफ त बनो, पन अवं एरू केरनेरे लेइ तुसेईं अवं मजबूर कियो, तुसेईं त मेरी बड़याई कियोरी लोइती थी, किजोकि अगर अवं किछ भी नई, फिरी भी होरे प्रेरित जैना महान आन अवं तैन केरो जेरो रोडो आई। 12 मीं रोडे प्रेरितेरी पिशान भी तुशे दरमयान हर किसमेरे सबर साथी ते निशान ते बडां-बडां कम्मां, ते सामर्थेरां कम्मां हिरां। 13 अक गल थी जै मीं तुसन सेइं न की, जै मीं होरि कलीसियान सेइं की, यानी अवं पेइसां केरे बारे मां तुशे लेइ बोझ न बनो। कुन इन तुसन घटिया बनाते, एरू केरने सेइं मीं तुशे खलाफ गलत कियोरू ई तुशेरी सोच गलते। 14 हेरा, अवं दलेइयोवं बार एजनेरे लेइ तियाराई, ते अवं तुसन करां कोई पेइसां केरि मांग न रेखेलो। किजोकि अवं तुशेरी जेइदाद नई, बल्के तुसन चाताई, किजोकि बच्चेइं अम्मा बाजी केरे लेइ धन अकटोडू न लोडे कियोरू, पन अम्मा बाजेईं बच्चां केरे लेइ कियोरू लोडे। 15 अवं तुशेरी लेइ बडी खुशी सेइं खर्च केरेलो, बल्के अवं अपनु सब किछ तुसन देइलो, अवं तुसन सेइं बडो प्यार केरताई पन एरू लगेते कि तुस मीं सेइं घट प्यार केरतथ। 16 तुसन मरां किछ मन्तन कि मीं तुसन पुड भार नई छडोरो, पन किछ होरे सोचतन कि अवं चलाक आई ते मीं तुसन पूरे तरीके सेइं धोखो दित्तोरोए, जैन कि झूठ आए। 17 मीं अपने लेइ तुसन करां पेइसे नेनेरे लेइ तीतुस या होरो कोई इस्तेमाल नई कियोरो। 18 मीं तीतुस समझेइतां तैस साथी ते दूला भेजो, त कुन तीतुसे धोखे सेइं किछ नेव? कुन अस एक्की मकसदे सेइं न चले? कुन इश्यां कम्मां अक्कां जेरां नई। 19 हे दलाराव, तुस हेजू तगर इन समझतथ कि अस तुशे सामने अपनो बचाव लोरेम केरने, अस त परमेशरे हाजर सेमझतां मसीह मां जोतम, ते सब गल्लां एल्हेरेलेइ जोतम कि तुसन विश्वासे मां मजबूत केरने लोरेम। 20 किजोकि मीं डरे, कि एरु न भोए, कि अवं एज्जी ते जेन्चरे अवं चाताई, तेन्चरे तुस न भोथ; ते मीं भी जेन्चरे तुस मीं चातथ तेरे लाथ, कि तुसन मां लडैई, गर्म सुभाव, सरक, खलाफत, जलन, चोगली, अभिमान ते फसाद भोन। 21 कि एरु न भोए कि जैखन अवं तुसन कां दुबारां एज्जी, त मेरो परमेशर मीं छिथाए। ते मीं दुःख केरनो पे, किजोकि तुसन मरां बडेईं अपने पुराने पाप नई शारोरे। ते तैस गंदे कम्मे, ते बदमाशी, ते लुचपने सेइं, जै तैनेई कियो, मन न फिराव।

13 पवित्रशास्त्रे मां इन लिखोरूए कि, “हर अक गल दूई या दलेइ गवाहां केरे गवाही केरे जिरिये सेइं पक्की की गाली।” मीं तैन लोकन हदैइयत दित्तोरीए जैना पाप केरते थिये, जैखन अवं दुइयोवं बार ओरो थियो। हुनी अवं फिरी तैन ते होरि सेबभी लोकन हदैइयत देताई कि ठीक तेन्चरे जेन्चरे मीं पेइलू भी कियोरूए इस चिट्ठी मां खबरदार केरताई। हुनी अवं दलेइयोवं बार एजनेबालो आई, ते अगर तैना हेजू भी पाप केरनो बंद नई कियोरो, तैन मरां कोई भी सजाई करां न बचेलो। 3 अवं जोताई कि तुस इना गल्लां केरू सबूत चातथ, कि मसीह मेरे जिरिये गल्लां केरते, पन जैखन मसीह तुसन सेइं बर्ताव केरते त तै कमजोर नई; पन तुसन मां सामर्थ आए। 4 तै कमजोरांरे वजाई सेइं क्रूसे पुड चाढो त जेव, फिरी भी परमेशरेरे शक्ति सेइं जीतोए। अस भी कमजोरम, ठीक तेन्चरां, जेन्चरे मसीह थियो; पन जैखन अस तुसन सेइं बर्ताव केरमेले अस भी तैस सेइं साथी जीते भोमेले ते असन सेइं साथी परमेशरेरी शक्ति भोली। 5 अपनो आप परखा, कि तुशेरो विश्वास सच्चो आए कि नई; एप्पू परखा, कुन तुसन अपने बारे मां ई पतो नई, कि यीशु मसीह तुसन मां आए, नई त तुस निकम्मे भोए। 6 पन मेरी

उमीदे, कि तुस बुझेले, कि अस निकम्मे नई निसारे। 7 चाए अगर तुसन इन लेइहीते कि अस सच्चे प्रेरित नई, अस तुशे लेइ परमेशरे कां प्रार्थना केरने लोरिम, कि गलती केरनेरे बगैर सिर्फ रोडू केरा। 8 किजोकि अस सच्चेरे खलाफ किछ न केरि बटम, पन सच्चेरे लेइ केरि बटतम। 9 जैखन अस कमजोरम, ते तुस ताकतबरथ, अस खुशी रातम, ते ई प्रार्थना भी केरतम, कि तुस विश्वासे मां सिद्ध भोते राथ। 10 एल्हेरेलेइ अवं तुशे पिठी पतर इना गल्लां लिखताई, कि मौजूद भोइतां मीं तैस अधिकारेरे मुताबिक जै प्रभुए बिगाइनेरे लेइ नई पन बनानेरी लेइ मीं दित्तोरोए, सेखती सेइं किछ न केरनू पे। 11 हे ढूलाव ते बेइनव, खुश राथ, सिद्ध बनते राथ; एक्की होरि हिम्मत देथ; ते मेल मिलापे सेइं राथ, ते प्यार केरनेबालो ते शान्ति देनेबालो परमेशर तुसन साथी भोलो। 12 मसीहेरे प्यारे सेइं एक्की होरि जो नमस्कार केरा। 13 सब पवित्र लोक तुसन जो नमस्कार ज़ोतन। 14 प्रभु यीशु मसीहेरो अनुग्रह ते परमेशरेरो प्यार ते पवित्र आत्माारी सन्नाती तुसन सेबन साथी भोए।

गलातियों

1 अवं पौलुस ई चिट्ठी तुसन लिखताई, अवं अक प्रेरिताई, अवं न मैनुहू केर तरफां, ते न केन्ची मैनेर जिरिये प्रेरित भोनेरे लेइ चुनोरोई, बल्के यीशु मसीह ते बाजी परमेशरेर जिरिये, जैनी यीशु मुड़दन मरां ज़ाँतो कियो। 2 ते सारे ढूलां केरे तरफां, जैना मीं सेइं साथिन; गलातिया इलाकेरे कलीसियां केरे लेइ ई चिट्ठी लिखताई। 3 बाजी परमेशर, ते इश्शे प्रभु यीशु मसीहेरे तरफां तुसन अनुग्रह ते शान्ति मैलता राए। 4 इश्शे परमेशर ते बाजी केरि मेर्जा सेइं यीशु मसीहे अपनो आप इश्शे पापां केरे लेइ बलिदान कियो, ताके असन इस मोजूद बुरे दुनियाई करां छुटकारो दे। (aiōn g165) 5 तैसेरी महिमा हमेशा भोती राए। आमीन। (aiōn g165) 6 अवं हैरान भोताई, कि परमेशरे तुस मसीहेरे अनुग्रहे मां जीनेरे लेइ कुजाए; ते तुस तैस करां एत्रे जल्दी फिरतां होरि किसमेरी खुशखबरी मन्ने लाए। 7 पन सिर्फ एकके सच्च्यी खुशखबरी आए, गल ईए, कि किछ लोक एरेन, जैना तुसन धोखो देतन, ते मसीहेरी खुशखबरी बगाड़ने चातन। 8 पन अगर असन मरां कोई या कोई स्वर्गदूत भी तुसन कोई तैस खुशखबरे अलावा जै असेईं तुसन शुनोरी, शुनाए त लानती भोए। 9 जेन्चरे असेईं पेड़लू ज़ोवरूए, तेन्चरे अवं हुना फिरी ज़ोताई, कि तैस खुशखबरे अलावा जै तुसेईं कबूल कियोरोए, अगर कोई होरो खुशखबरी शुनाए, त लानती भोए। 10 हुनी कुन अवं मैनुहू केरि मन्चरी हासिल केरनेरी कोशिश केरताई या परमेशरेरी? कुन अवं लोकन खुश केरनेरी कोशिश केरने लोरोई? बिलकुल भी नई, अगर हेजू तगर लोकन खुश केरतो राताई, त मसीहेरो दास न भोथो। 11 हे ढूलाव ते बेडनव, अवं तुसन ज़ोताई, कि जै खुशखबरी मीं तुसन शुनाई, ई मैनुहू केरि बनोरी नई। 12 किजोकि ते मीं न केन्ची मैनुहू करां मैलोरी, ते न मीं कोन्ची उस्तादे करां शिखोरी, बल्के यीशु मसीहे मीं पुड़ बांदी की। 13 तुसेईं शुनोरूए यहुदी धर्म मां पेड़लो जै मेरो चालचलन थियो तै केरो थियो, कि अवं परमेशरेरी कलीसियाई बड़ी सतातो थियो, ते नाश केरनेरी कोशिश केरतो थियो। 14 ते अवं अपने धर्म मां तैस वक्ते बड़े मेरे उमरारे यहुदन करां अग्रोवं थियो। ते अपने बुजुर्गां केरे रीतन मां जोशे मां थियो। 15 पन परमेशरेरी ज़ैखन इच्छा भोइ, तैनी अवं मेरे ज़रमने करां पेड़लो चुनो ते अपने अनुग्रह सेइं कुजाव, 16 कि मीं मां अपने मडू बांदू केरे कि अवं गैर कौमन मां तैसेरी खुशखबरी शुनेई; ते मीं समझनेरे लेइ होरि कोन्ची करां सलाह नी। 17 ते न यरूशलेम नगरे मां तैन कां जेव जैना मीं करां पेड़ले प्रेरितन, पन अरब मुल्खे जो चलो जेव, ते फिरी किछ चिरेरां बाद तैहुं दमिश्क नगरे जो वापस अवं। 18 फिरी टूलाई सालना पत्ती अवं कैफा (यानी पतरस प्रेरिते) सेइं मिलने यरूशलेम नगरे जो जेव, ते 15 दिहाड़े तैड़ी राव। 19 पन प्रेरितन मरां प्रभुएरे ढूला याकूबेरे अलावा होरि कोन्ची सेइं न मिलो। 20 जैना गल्लां अवं तुसन लिखताई, हेरा परमेशरे हाज़र सेमझतां ज़ोताई, कि तैना झूठी नई। 21 यरूशलेम नगर शारनेरां पत्ती, अवं सीरिया ते किलिकियारे मुल्खे मां जेव। 22 पन यहूदिया इलाकेरे कलीसियां केरे लोक जैना मसीह मां थिये, जैना मीं सेइं कथे न थिये मिलोरे। 23 पन इन्ते शुन्ते रहते थिये, कि जै असन पेड़लो सतातो थियो, तैए तैस्से विश्वासेरी खुशखबरी शुनाते, जैस पेड़लो नाश केरतो थियो। 24 ते जैन परमेशरे मेरे ज़िन्दगी मां कियूं तैल्हेरेलेइ तैना परमेशरेरी बडीयाई केरते रहते थिये।

2 जेवथे सालना पत्ती अवं बरनबासे सेइं साथी यरूशलेम नगरे जो जेव, ते तीतुस भी मीं एण्यू सेइं साथी नीयो। 2 अवं एल्हेरेलेइ तैड़ी जेव किजोकि परमेशरे मीं गानेरे लेइ जोरू थियूं, ज़ैखन अवं तैड़ी थियो, अवं अकेल्ले मां कलीसियारे खास बुजुर्गन सेइं मिलो ते तैन खुशखबरी समझाई, जै अवं गैर कौमन मां प्रचार केरतो ओरो थियो, ताके एरू न भोए, कि जैन किछ अवं केरतो ओरोई ते जैन केरने लोरोई बेफेइदू भोए। 3 मेरो साथी तीतुस, जै यूनानीए, जेसेरो खतनो कथी न भोरो। पन जैना यरूशलेम नगर कलीसियारे खास बुजुर्ग थिये तैनेई तै खतनो करानेरे लेइ मजबूर न कियो, बल्के तैनेई तै

कबूल कियो। 4 ते ई गल तैन केरे लेइ परेशानी बनी, ई इन तैन झूठे ढूलां केरे वजाई सेइं भोवं, जैना छेपतां इश्शे टोली मां ओरे थी, कि तैस एज़ेदरी जै मसीह यीशु मां असन मैलोरीए, भेद नेइतां फिरी असन यहूदी केरे कानूनेरे गुलाम बनाना। 5 पन असेईं एककी पलेरे भी तैन केरि शुने करां इन्कार कियो, ताके जै सन्देश असेईं तुश्शे लेइ आनो तै सच्च्यी खुशखबरी बनोरी राए। 6 तैन यरूशलेम नगरेरे कलीसियारे खास लीडरेई मेरी शिक्षाई मां किछ न जोड़ू, इस सेइं मीं किछ फर्क न पे, कि तैना केरहे बुजुर्ग आन, किजोकि परमेशर बेइरोवं रूप हेरतां फैसलो न केरे। 7 पन इसेरे उलट ज़ैखन तैन बुजुर्गोई हेरू, कि जेन्चरे परमेशरे यहूदी लोकां केरे लेइ खुशखबरेरू कम पतरसे सोंफू, तेन्चरे परमेशरे गैर कौमां केरे लोकन खुशखबरी शुनानेरू कम मीं सोंफू। 8 जैने परमेशरे पतरस यहूदी केरो प्रेरित भोनेरे लेइ चुनो, तैन्ने अवं भी गैर कौमां केरो प्रेरित भोनेरे लेइ चुनो। 9 जैना मैनुहू कलीसियारे खम्मबे समझे गाते थिये (यानी खास लीडर) मतलब याकूब, कैफा (यानी पतरस) ते यूहन्ना तैनेई अनुग्रहेरू तैन वरदान पिशानू जैन मीं मैलोरू थियूं। तैनेई अवं ते बरनबास साथी सेमझतां ते असन सेइं हथ मिलेइतां राजी भोए। कि अस गैर कौमन मां खुशखबरी प्रचार केरम, ते तैना यहूदीन मां। 10 तैनेई असन कां बिनती की, कि अस यरूशलेमेरे गरीब विश्वासी लोकां केरि महत केरम, जैन केरनेरी अवं बड़ी इच्छा केरतो थियो। 11 पन ज़ैखन कैफा (पतरस) अन्ताकिया नगरे मां अवं, त मीं सेम्भी विश्वासी लोकां केरे सामने तैसेरी खलाफ की ते झाड़ दिती, किजोकि जैन तैनी कियोरू थियूं तैन गलत थियूं। 12 एल्हेरेलेइ कि याकूबेरे पासेरां किछ मैनुहू केरे एजनेरे पेड़ले तै गैर कौमां केरे लोकन साथी खातो थियो, पन ज़ैखन तैना आए, त खतनो कियोरे लोकां केरे डरे सेइं तैन करां हटो ते अलग भोने लव। 13 ते तैस साथी बाकी यहूदी विश्वासी लोकेई भी पाखंड कियूं, इड़ी तगर कि बरनबास भी तैन केरे संगती मां शामल भोव। 14 पन ज़ैखन मीं तैन केरो बर्ताव हेरू, कि तैना खुशखबरेरे सच्च्येरे खलाफ चलतन, त मीं सेम्भी केरे सामने कैफा (पतरस) सेइं ज़ोवं, “कि ज़ैखन तू यहूदी भोइतां गैर कौमन केरि ज़ेरि चाल चलतस, न कि यहूदी केरि ज़ेरि, त तू गैर कौमन यहूदी केरे रसमन पुड़ चलनेरे लेइ किजो ज़ोतस?” 15 अस जैना जर्मनेरे यहूदिम, ते पैपी गैर कौमां केरे ज़ेरे नई। 16 फिरी भी इन सेमझतां कि मैनुहू मूसेरे कानूनेरे कम्मन सेइं नई, पन सिर्फ यीशु मसीह पुड़ विश्वास केरने सेइं धर्मां भोते, असेईं एण्यू भी मसीह यीशु पुड़ विश्वास कियो, कि अस मुंसेरे कानूनेरे कम्मन सेइं नई पन यीशु मसीह पुड़ विश्वास केरने सेइं धर्मां भोए, किजोकि मूसेरे कानूनेरे कम्मन सेइं कोई धर्मां न भोलो। 17 किछ यहूदी सोचतन कि असेईं पाप कियो, किजोकि असेईं धर्मां भोनेरे लेइ कानून मन्नेरे बदले सिर्फ मसीह पुड़ विश्वास कियोरो, त कुन मसीहे अस पापी बनाए, नई, कथी नई। 18 किजोकि जैन किछ मीं बछोड़ू, अगर तैस फिरी बनेइं, त अपनो आप पापी बनाताई। 19 अवं त कानूने सेइं कानूनेरे लेइ मेरि जेव, कि परमेशरेरे लेइ जीई। 20 अवं मसीह सेइं साथी कूसे पुड़ चढोरोई, ते हुनी ज़ाँतो न राव, पन मसीह मीं मां ज़ाँतोए, ते अवं जिसमे मां हुनी ज़ाँतोई, त सिर्फ तैस विश्वासे सेइं ज़ाँतोई, जै परमेशरेरे मट्टे पुड़े, जैने मीं सेइं प्यार कियो, ते मेरे लेइ अपनि जान दिती। 21 अवं इस गल्लेरो इन्कार न केरि कि परमेशर अपने अनुग्रहे सेइं बचाते, किजोकि अगर कानून मन्ने सेइं लोक धर्मां भोथे, त मसीहे मरनेरी कोई ज़रूरत न थी।

3 हे बेसमझ गलातियारे लोकव, केने तुस टरे लाए? तुश्शे त मना तुश्शे सामने यीशु मसीह कूसे पुड़ चाढो! 2 अवं तुसन सिर्फ ई सवाल पुछनो चाताई, कि तुसेईं पवित्र आत्मा कुन कानून मन्ने सेइं हासिल कियो? बिलकुल भी नई, तुसेईं खुशखबरी शुनी ते तैस पुड़ विश्वास कियूं ते पवित्र आत्मा हासिल की। 3 कुन तुस एरे बेसमझथ, कि पवित्र आत्मा रे रीति पुड़ शुरू केरतथ ते जिसमेरे रीति पुड़ खतम केरेले? 4 कुन तुसेईं सब दुःख बेफेइदो झैल्ले? अवं उमीद केरताई बेफेइदो नई। 5 एल्हेरेलेइ जै तुसन पवित्र आत्मारू दान बडू जादे देते ते चमत्कार केरते, कुन तै कानून मन्नेरे

वजाई सेइं एन केरते या तुसेईं खुशखबरी शुनी ते तैस पुड़ विश्वास कियो? 6 हुनी अब्राहमेरे बारे मां सोचा “अब्राहमे परमेशरे पुड़ विश्वास कियो ते ते तैसेरेलेइ धार्मिकता गनो जेवा।” 7 एल्हेरेलेइ तुसन एन जान्नेरी ज़रुरते कि जैना अब्राहमेरो जेरो परमेशरे पुड़ विश्वास केरनेबालेन तैना हकीकति मां तैसेरी बच्चेन। 8 पवित्रशास्त्रे मां बडू पेड़लू इन लिखोरूप, कि परमेशर गैर कौमन विश्वासे सेइं धर्मी बनालो, पेड़ले अब्राहमे ई खुशखबरी शुनाई, “कि तेरे जिरिये सेब्भी कौमन बरकत मैलेली।” 9 ते जैना अब्राहमेरो जेरो परमेशरे पुड़ विश्वास केरतन, परमेशर तैन सेब्भन बरकत देते जैना मसीह पुड़ विश्वास केरतन जेन्चरे तैनी अब्राहमे बरकत दिती। 10 एल्हेरेलेइ जैना लोक सोचतन कि तैना मूसेरो कानून मेन्तां धर्मी बनाए गाले, तैन पुड़ परमेशरेरी लानते, किजोकि मूसेरे कानूने मां लिखोरूप, “कि जै कोई कानूने मां लिखोरे सब कानूनेरे मुताबिक न चले, तैस पुड़ परमेशरेरी लानते।” 11 ई गल साफे, कि मूसेरे कानून सेइं परमेशरे कां कोई मैन्हु धर्मी न भोए, “किजोकि जै मैन्हु परमेशरे पुड़ विश्वास केरते, परमेशर तैस धर्मी ठहराते ते तैस हमेशारी जिन्दगी मैलतीए।” 12 पन मूसेरे कानूनेरो विश्वासे सेइं कोई वासतो नई; पन “जै तैन मन्नेलो, ते तैन मन्ने सेइं ज़ीतो रालो।” 13 मसीहे जै इश्शे लेइ लानती बनो, तैने अस कीमत देइतां कानूनेरे लानती करां छुटाए किजोकि पवित्रशास्त्रे मां लिखोरूप, “जै कोई क्रूसे पुड़ टंगो गालो ते लानतीए।” 14 मसीहे एन एल्हेरेलेइ कियू, कि गैर कौमां तैसेरे जिरिये तैना सैरी बरकतां हासिल केरन, जैन केरो वादो परमेशरे अब्राहमे सेइं कियोरो थियो, ते मसीह पुड़ विश्वास केरने सेइं अस पवित्र आत्मा हासिल केरम, जेसेरो वादो तैने कियोरोए। 15 हे दुलाव ते बेइनव, अवं आम जिन्दगी मिसाल देने लोरोई, जैखन दूई मैन्हु केरो करार जै पक्को भोते, त न कोई तैस टालते ते न तैस मां किछ बढाते। 16 ते सारे वादे परमेशरे अब्राहमे ते तैसेरे खानदाने दिते; पवित्रशास्त्र इन न जोए, “कि वंशां,” कि बड़ां केरे बारे मां जोव, पन एककी मैनेरे बारे मां जोव “कि तेरु वंश इने, ते ते मसीहे।” 17 मेरे जोनेरो मतलब ई आए, परमेशरे अब्राहमे सेइं करार केरनेरां बाद 430 सालन पत्ती मूसे कानून दितो (ताके तैस करारे पक्को केरे), पन अस न जोई बटन कि परमेशरेरो करार टलुतो, तैए करार पक्कोए, तैए तैस पूरो केरेलो। 18 किजोकि परमेशर असन अपनि बरकत एल्हेरेलेइ न दे कि अस मूसेरे कानूनेरे मुताबिक चलतम, पन तै एल्हेरेलेइ देते कि तैनी वादो कियोरोए, परमेशरे अपने अनुग्रहे सेइं अब्राहमे बरकत दिती, किजोकि तैनी पेड़लो वादो कियोरो थियो। 19 तैखन, फिरी कानूनेरो कुन मकसद थियो? तैन त पापां केरे वजाई सेइं बादे मां दित्तू, ताके तैसेरे वंश मसीहेरे एजने तगर राए, जैस सेइं वादो कियोरो थियो, परमेशरे स्वर्गदूतां केरे जिरिये मूसे कानून दितो, जै परमेशर ते लोकां केरि बिचवाई केरनेबालो थियो। 20 परमेशरे एण्णू अब्राहमे सेइं वादो कियो। एल्हेरेलेइ हुनी बिचवाई केरनेबालेरी कोई ज़रुरत नई। 21 कुन कानून परमेशरेरे वादां केरे खलाफे? नई, कधी नई! किजोकि अगर एरो कानून दित्तो गाथो जै हमेशारी जिन्दगी देइ बटेथो, त सच्चे धार्मिकता कानून मन्ने सेइं भोथी। 22 पन पवित्रशास्त्रे जोते दुनियारे सब लोक पापेरे अधीन आन, ताके ते वादो जेसेरी बुनीयाद यीशु मसीह पुड़ विश्वास केरनोए, तैस पुड़ विश्वास केरनेबालां केरे लेइ पूरो भोए। 23 पन इस करां पेड़ले कि लोक मसीह पुड़ विश्वास केरन, मसीहेरे एजने करां पेड़ले अस यहूदी कैदे मां थिये कानून इश्शी रखवाली केरतो थियो। ते तैस विश्वासे एजने तगर जै बांदो भोनेबालो थियो, अस तैसेरे बन्धने मां रहम। 24 एल्हेरेलेइ कानून मसीह तगर पुजांनेरे लेइ असन बत हिरानेबालो ते स्मभालने बालो भोव, कि अस यीशु मसीह पुड़ विश्वास केरने सेइं परमेशरेरे सामने धर्मी भोम। 25 पन जैखन मसीह अव ते असेई विश्वास कियू, त असन ज़रुरत न पेई, कि कानून बत हिराए ते मदत केरे। 26 किजोकि तुस सब विश्वास केरने सेइं जै मसीह यीशु पुड़े, परमेशरेरे बच्चेथ। 27 ते तुसन मरां जेत्रेइ मसीह मां अक भोनेरे लेइ बपतिस्मो नीयो, तुसेईं मसीहेरी नव्वीं जिन्दगी तेन्चरे लाई जेन्चरे लिगडां लातन। 28 हुनी मसीह मां कोई फर्क नई, चाए कोई यहूदीए या गैर यहूदीए, गुलामे या आज़ाद। कोई फर्क नई मडदे या कुआन्शे, अस यीशु मसीह

मां सब बराबर आम। 29 किजोकि तुस मसीह सेइं साथी अक आथ, त अब्राहमेरे बच्चेथ, ते परमेशरेरे वादेरे मुताबिक बरकतां केरे वारस भी आथ।

4 अवं मिसाल देइतां जोताई, कि वारस जांतगर बच्चोए, अगर तै सेब्भी चीजां केरो मालिके, फिरी भी तैस त कने गुलामे मां कोई फर्क नई। 2 पन बाजी केरे ठहरावे वक्ते तगर सुमालने बालां ते भैन्डैरी केरे हेरगेशी मां रहते। 3 तेन्चरे अस भी जैखन बच्चां केरे जेरे थिये, त दुनियारे रीति रूवाजां ते कानूनेरे गुलाम थिये। 4 पन जैखन ठीक वक्त अव, त परमेशरे अपन मूठ दुनिया मां भेजू, जैस एककी कुआन्शां जर्म दित्तू, तैन यहूदन मां जर्म मूठ तैनी कानून मन्तो। 5 ताके तैन छुटाए जैना मूसेरे कानूनेरे अधीन थिये, ते असन तैसेरे बच्चे भोनेरो अधिकार मैल्ले। 6 ते तुस जैना बच्चेथ, एल्हेरेलेइ परमेशरेरे मडैरी आत्मा इश्शे दिले मां भेजोरीए, जै आत्मा, “हे बैपू, हे बाजी,” जोती। 7 एल्हेरेलेइ हुनी तू गुलाम नई, पन परमेशरेरो बच्चोस, ते जैखन परमेशरेरो बच्चोस, त तीं तैन सब मैल्ले जेसेरो वादो परमेशरे अपने बच्चन देनेरो वादो कियोरोए। 8 जैखन तुस परमेशर न थिये जानते, त तुसन तैन केरे गुलाम थिये, जैना हकीकति मां ईश्वर अस्थी नई। 9 पन हुनी तुशुशो रिश्तो परमेशर सेइं आए, ते तुसेईं ते जानो बल्के परमेशरे अस कबूल किये, ते तैन कमजोर ते निक्केमी पेड़ली गल्लां केरे पासे किजो गातथ, कुन तुस तैन केरे दुबारा गुलाम भोने चातथ? 10 मीं शुनरूप कि तुस गैर कौमां केरे विश्वासी, यहूदी केरे दिहाइन ते महीन ते खास वक्ते ते सालां केरे तिहारन मन्तथ, इन सोचतां कि परमेशर खुश भोते। 11 अवं तुशुशु एन केरनेरे वजाई सेइं परेशान आई, कि एरू न भोए, कि जै मेहनत मीं तुशुशे लेइ कियोरीए तै बैफेइदी भोए। 12 हे दुलाव ते बेइनव, अवं तुसन कां बिनती केरताई, तुस अपने आपे यहूदी केरे कानून करां आज़ाद केरा, किजोकि मीं अपने आप आज़ाद कियोरोए जेन्चरे तुस गैर कौमरे लोक पेड़ले आज़ाद थिये, तुस पेड़ले मेरे सामने बडे रोइ थी। 13 तुसन याद भोलू, जैखन अवं पेड़ली बार खुशखबरी शुनाने तुसन कां अव त अवं बिमार थियो। 14 ते मेरी जिसमानी हालत जै तुशुशे आजमैइशरी वजा थी, तुसेईं अवं घटिया न समझो ते तुसेईं दूर न कढो बल्के एन्चरे कबूल कियो जेन्चरे परमेशरेरो दूत या यीशु मसीह एण्णू। 15 ते तुशुशी तै खुशी मनानी कोरां जेई? अवं सच्चे जोई बटताई, तुस मेरे लेइ सब किछ बलिदान केरनेरे लेइ तियार थिये, इडी तगर कि अपनि एछ्छी भी। 16 ते कुन तुसन सेइं सच जोनेरे वजाई सेइं अवं तुशुशो बैरी भोरोई। 17 तैना झूठे उस्ताद तुसन दोस्त बनानो त चातन, पन रोडी नीती सेइं नई; बल्के तुसन अलग केरने चातन, कि तुस तैन केरे चले बना। 18 जोशे मां भोनु रोडूए, कि रोडी गल्लन मां हर वक्त दोस्त बनानेरी कोशिश की गाए, सिर्फ तैस वक्ते नई जैखन अवं तुसन सेइं साथी राताई। 19 हे मेरे बच्चेव, जांतगर तुसन मां मसीहेरू रूप न बने, तांतगर अवं तुशुशे लेइ जर्म देने बैली कुआन्शे जेरे तकलीफी मां राताई। 20 अवं त चाताई कि हुनी तुसन कां एइतां मिट्टी ज़बाना गल केरि, किजोकि मेरी समझी मां न एजजे कि अवं तुसन सेइं कुन केरि। 21 तुस जैना मूसेरे कानूनेरे अधीन भोने चातथ, मीं जोतथ, कुन कानूनेरी गल्लां शुन्चरे लेइ तियार नई? 22 तैस मां इन लिखोरूप, कि अब्राहमेरां दूई मड्डां थियां; अक गुलाम कुआन्शरू, ते अक जै आज़ाद थी तैसेरू। 23 पन जैन गुलाम कुआन्शरू भोव, तैन आम बच्चां केरू जेरू जर्मू, ते जैन आज़ाद कुआन्शरू भोव, तैन परमेशरेरे वादेरे मुताबिक जर्मू। 24 इना दूई कुआन्शां परमेशरेरे दूई करारां केरे रूपे मां कम केरतिन। पेड़ली कुआन्शा हाजिरा सीने पहाडे हिराती जैडी लोकन कानून मैल्लो, जैन तैन गुलाम बनातू थियू। 25 हाजिरा मना अरबेरू सीने पहाडेरो जेरे आए, जेसेरी तुलना मौजूद यरूशलम सेइं केरोतीए, किजोकि तैन अज अपने बच्चन यानी अपने लोकन समेत गुलैमी मांए। 26 पन बेयू यरूशलम अब्राहमेरे कुआन्शा सारारू जेरूए, ते तैसेरे बच्चे गुलाम नई। इन यरूशलम इश्शे लेइ इश्शे अम्मारू जेरू आए जैसां विश्वास कियो। 27 किजोकि पवित्रशास्त्र जोते, “हे बाँइ, तीं जैसां कथे बच्चे नई ज़ावरे, खुश भो, तीं जैस बच्चो ज़ानेरी तकलीफ नई भोरी; आवाज़ उच्चि केर ते जयजयकार केर, किजोकि शेरोरारी औलाद सुहागनी

करां भी जादे।” 28 हे ढूलाव ते बेडनव, तुस अब्राहमेरें मट्टे इसहाकेरे जेरे आथ, जैन परमेशरेरे वादरे मुताबिक ज़रूम, अस भी परमेशरेरे वादरे मुताबिक तैसेरे बच्चे बने। 29 ते जेन्चरे तैस वक्ते जै बच्चो आम बच्चां केरो जेरो ज़रामो थियो, तैस सतातो थियो जै परमेशरेरे आत्मारें मुताबिक ज़रामो थियो, तेन्चरे अज भी अस तैन करां सताव झैल्लतम जैना कानून मेन्तां परमेशरेरे सामने धर्मी भोनू चातन। 30 पन पवित्रशास्त्र कुन जोते? “गुलाम कुआन्शी ते तैसेरे मट्टे कढ, किजोकि गुलाम कुआन्शरू मट्टू आजादेरे मट्टे साथी वारस न भोलू।” 31 एल्हेरेलेइ हे ढूलाव ते बेडनव, अस गुलाम कुआन्शरे बच्चे नई, जै कानूने, बल्के आजाद कुआन्शरां बच्चेम, जै विश्वासे।

5 मसीहे अस आजाद कियोरें हुनी असन गुलामेरू जेरू यहूदी केरू कानून मन्नेरी ज़रूरत नई, अपने एस ऐजेदी मां बनोरे राथ, ते दुबारा अपने आपे कानून मन्नेरे गुलाम भोनेरे लेइ न देथ। 2 हेरा, अवं पौलुस तुसन सेइं जोताई, अगर परमेशरेरे सामने धर्मी भोनेरे लेइ खतनो कराले, फिरी जैन मसीहे कियोरू तैसेरो तुसन कोई फैइदो न भोलो। 3 फिरी भी अवं हर एक्की सेइं जोताई जै इस उमीदी सेइं खतनो कराते कि परमेशरेरे सामने धर्मी भोए, तैस कानूनेरो हर हुकम मन्नो पेनोए। 4 तुस जैना कानून मेन्तां धर्मी भोने चातथ, तुसेईं अपनो आप मसीह करां अलग कियो ते परमेशरेरो अनुग्रह कबूल केरने करां इन्कार कियो। 5 अवं इन ज़ोईं बटाताई, किजोकि असन पवित्र आत्मारें तरफां पूरो भरोसो कि परमेशर असन धर्मी कबूल केरेलो किजोकि अस मसीह पुइ विश्वास केरतम। 6 ते मसीह यीशु मां न खतनो, न बगैर खतनो किछ कम्मरोए, पन सिर्फ विश्वास जै प्यारे सेइं अस्सर केरते। 7 तुस त रोड़ी दौडे लोरे थिये दौडने, तुस केनि रोके, कि सच्चे न मन्न्थ। 8 एरी शिखर तुसन परमेशरे नई दित्तोरी जैने तुस अपने बच्चे भोनेरे लेइ कुजोरेथ। 9 झूठी शिक्षा थोड़े जेरे खमीरेरी जेरि जैन सारे सोन्नोरे अट्टे खमीर केरते। 10 अवं प्रभु पुइ भरोसो रखताई, कि तुसन झूठी शिक्षा पुइ विश्वास केरने करां दूर रखे; पन जै तुसन परेशान केरते, तै कोई कि न भोए परमेशर तैस सजा देलो। 11 पन हे ढूलाव ते बेडनव, अगर अवं लोकन प्रचार केरतो भोथो कि खतनो केरनो ज़रूरीए, त स्ताव न गाथो। अगर अवं ई प्रचार न केरतो राथो कि मुक्ति सिर्फ मसीहेरे क्रूसे सेइं, त फिरी केन्ची ठोकर न लगेथी। 12 रोडू भोथू कि जैना तुसन टपलातन, तैना अपनो अंग कटेथे। 13 हे ढूलाव ते बेडनव, तुस आजाद भोनेरे लेइ कुजोरेथ पन एरू न भोए, कि ई आजादी जिसमानी कम्मां केरे लेइ मौको बने, बल्के प्यारे सेइं एक्की होरेरे सेवक बना। 14 किजोकि सारो कानून इस्से एक्की गल्ली मां पूरो भोइ गाते, “कि तू अपने पड़ोसी सेइं अपनो जेरो प्यार केर।” 15 पन अगर तुस एक्की होरि सेइं लटते ते तंग केरते राथ, त खबरदार राथ, एक्की होरेरी बरबादी केरेले। 16 पन अवं जोताई, पवित्र आत्मारें च़लाने सेइं च़लेले, त तुस जिसमेरी खुवैइशां कधी पूरी न केरेले। 17 किजोकि जिसम पवित्र आत्मारें खलाफे, ते पवित्र आत्मा जिसमेरे खलाफ खुवैइश केरते, ते इना एक्की होरेरे दुश्मन आन; एल्हेरेलेइ जैन तुस केरनू चातथ तैन न केरि बटथ। 18 ते अगर तुस पवित्र आत्मारें च़लाने सेइं च़लतथ त कानूनेरे अधीन न राए। 19 जिसमेरां कम्मां बांदन, मतलब बदमाशी, गंदा कम्मां, चपलूसी। 20 मूरती केरि पूजा, टूनो, बैर, लड़ाई, जलन, सरक, खलाफत, फसाद, विधर्म। 21 नफरत, नशो केरनो, नाय, ते इन केरे जेरां होरां भी कम्मां आन, जैन केरे बारे मां अवं तुसन पेइलू जोताई, जेन्चरे पेइलू भी जोवरूए, कि एरां कम्मां केरनेबाले परमेशरेरे राज़ेरे वारस नई भोने। 22 पन पवित्र आत्मारो फल प्यार, आनन्द, शान्ति, सबर, ते दया, भलाई, विश्वास, 23 नम्रता, ते बरदाश केरनू; एरां कम्मां केरे खलाफ कोई कानून नई। 24 ते जैना मसीह यीशु मां आन, तैनेई जिसम तैसेरे खुवैइशन सेइं साथी क्रूसे पुइ च़ाढोरोए। 25 अगर पवित्र आत्मां असन नव्वीं ज़िन्दगी दित्तोरीए, त पवित्र आत्मारें मुताबिक च़लम भी। 26 अस घमण्ड न केरम, अस एक्की होरि न सरकाम, ते एक्की होरि सेइं न जलन केरम।

6 हे ढूलाव ते बेडनव, अगर तुसन पतो च़ले कि केन्चे कोई पाप कियोरोए, त तुस जैना पवित्र आत्मारें च़लाने सेइं च़लतथ, तैस बडे नेरमी सेइं वापस धार्मिकतारे बत्तां वापस एजनेरी लेइ मदत केरा, ते अपनो भी खियाल रखा, कि तुस भी तैसेरे अजमैइशी मां न पेथ। 2 तुस एक्की होरेरी मुशकलन मां मदत केरा, ते एन्चरे मसीहेरो कानून पूरो केरा। 3 अगर कोई अपने आपे खास मैनुह समझे ते तै सच्चे न भोए, त तै अपने आपे धोखो देते। 4 पन हर कोई अपने कम्मे परखे, ते तैखन तैस होरि केरे बारे मां नई पन अपने बारे मां घमण्ड केरनेरो मौको भोलो। 5 किजोकि हर कोई मैनुह अपनो भार छूलो। 6 जैन वचनेरी शिक्षा मैलतीए, तैना सब रोड़ी चीज़न मां शिखालनेबाले शामिल रखन। 7 धोखो न खाथ, परमेशर ठाठन मां न उड़ाव गाए, किजोकि मैनुह जैन किछ बेते, तैन्ने कटेलो। 8 किजोकि जै अपने जिसमेरे लेइ बेते, तै जिसमे सेइं विनाशेरी फसल कटेलो; ते जै आत्मारें लेइ बेते, तै आत्मा सेइं हमेशारी ज़िन्दगीरी फसल कटेलो। (aiōnios g166) 9 अस रोडां कम्मां केरने मां हिम्मत न हारम, किजोकि अगर अस हार न मनमेले त परमेशर अपने वक्ते पुइ असन इनाम देलो। 10 एल्हेरेलेइ जैड़ी तगर मौको मल्ले सेबभन सेइं भलाई केरा; खास केरतां मसीही लोकन सेइं। 11 हेरा, मीं केत्रे बडे-बडे लफसन मां तुसन अपने ह्दथे सेइं लिखूरूए। 12 जेत्रे लोक यहूदन खुश केरने चातन तैना तुसन खतनो कराने लेइ जोतन। तैना एन केरतन कि लोक प्रचार केरनेरे लेइ तैन न स्तान कि परमेशर लोकन सिर्फ एल्हेरेलेइ बचाते कि तैना विश्वास केरतन कि मसीह क्रूसे पुइ मरोए। 13 किजोकि खतनो करानेबाले एप्पू भी सेबभी कानूने पुइ न च़लन, पन तैना चातन तुस खतनो कराथ, ताके तैना होरि यहूदी केरे सामने घमण्ड केरनेरे काबल भोन, कि तुसेईं तैन केरे वजाई सेइं खतनो कियोरोए। 14 पन मेरे लेइ इने, अगर अवं घमण्ड केरि त सिर्फ इश्शे प्रभु यीशु मसीह पुइ जै इश्शे लेइ क्रूसे पुइ मरो। किजोकि तैसेरे मरने सेइं अवं हुनी दुनियारे चीज़ां केरि इच्छां केरो गुलाम न राव, ते तैन मीं पुइ राज़ केरनेरी कोई शक्ति नई। 15 किजोकि न खतनो, ते न खतनो न भोनो ज़रूरीए, पन ज़रूरी इने, कि परमेशरे तुस पवित्र आत्मारें कम्मरे ज़िरिये अक नव्वीं इन्सान बनोरेथ। 16 परमेशर तैन सेबभन अपनि शान्ति देलो ते तैन बरकत देलो जैना इस नियमें मन्तन, तैना परमेशरेरे लोक आन। 17 अग्रोवं जो कोई मीं दुख न दे, किजोकि मेरे जानी पुइ जैना दाग आन तैना हिरातन कि अवं यीशु मसीहेरो दास आई। 18 हे ढूलाव ते बेडनव, इश्शे प्रभु यीशु मसीहेरो अनुग्रह तुसन पुइ भोए। आमीन।

इफिसियों

1 अवं पौलुस परमेशरें मेर्जी सेईं यीशु मसीहो प्रेरित आईं। अवं तुसन जैना परमेशरें लोक आथ ते इफिसुस नगरे मां रातथ ई चिट्ठी लिखने लोरोईं। **2** इशशे बाजी परमेशर ते प्रभु यीशु मसीह करां तुसन अनुग्रह ते शान्ति मैलती राए। **3** इशशे प्रभु यीशु मसीहें परमेशर ते कने बाजी केरि बडयाईं भोए, इशशो रिशतो मसीह सेईं भोनेरे वजाईं सेईं तैने असन हर लिहाजे सेईं तैना आत्मिक बरकतां दितोरिन, जैना बरकतां स्वर्गां एइतिन। **4** जेन्चरे तैने अस दुनिया बानकरे पेइली मसीह मां चुने, कि अस तैसेरी नजरी मां प्यारे मां पवित्र ते बेइलजाम भोम। **5** किजोकि परमेशर असन सेईं प्यार कियो, तैनी बडे पेइले ई फैसलो कियोरो थियो कि तै असन यीशु मसीहें जिरिये अपने बच्चां केरे रूपे मां गोद ने, किजोकि तै इन केरनु चातो थियो। **6** अस परमेशरें अनुग्रहें लेइ तैसेरी बडयाईं केरतम, जै तैने असन मुफते मां दितो, किजोकि इशशो रिशतो तैसेरे दलारे मट्टे सेईं आए। **7** परमेशरें बडे अनुग्रहें मुताबिक मसीहें खूने बगाने सेईं असन छुटकारो मैल्लो, मतलब इशशे पाप माफ भोए। **8** जै तैनी सारे ज्ञान ते समझ सेईं साथी असन पुइ बडो जादे कियो। **9** कि तैने अपनि मेरजरां भेद, अपने रोडे इरादेरे मुताबिक असन पुइ बांदो कियो, जै तैने पूरो केरनो थापोरो थियो। **10** परमेशरें ठहरावे वक्ते पुइ तै स्वर्ग ते धेरतरी चीजन साथी आनेलो ते मसीह तैस पुइ राज करालो। **11** मसीह सेईं इशशो रिशतो भोनेरे वजाईं सेईं परमेशर अस चुने, तैन हासिल केरनेरे लेइ जेसेरो वादे तैने असन देनेरे लेइ कियोरो थियो। इन बिलकुल तेन्चरे भोव जेन्चरे तैनी बडे पेइलू पूरू केरनु थापेरू थियूं ते इच्छा कियोरी थी। **12** अस यहूदी पेइले लोक आम जेनेईं मसीह पुइ उमीद रखोरि थी, ते अस चुने जे, ताके परमेशरें महिमारा स्तुति केरि बटम। **13** ते तुस भी मसीह सेईं शामिल भोए जैखन तुसेईं सच्चू वचन शूनू, जै खुशखबरां तुशशे लेइ मुक्ति आनी, जैखन तुसेईं विश्वास कियो परमेशर तुसन पुइ अपनि छाप लाईं, ई छाप पवित्र आत्मा आए, जै तैनी असन दितो, जेसेरो वादो तैनी कियोरो थियो। **14** पवित्र आत्मा भी छुटकारे सैयरो जेरो आए, जै पक्कू केरते कि परमेशर असन तै विरासत देलो जेसेरो तैनी वादो कियोरोए, ते तैनी अस अपने लोकां केरे रूपे मां धिनोरम, ताके तैसेरे महिमारा बडयाईं भोए। **15** एल्हेरेलेइ, जेइसेरू मां शुनेरूए कि तुस प्रभु यीशु पुइ विश्वास केरतथ ते परमेशरें सेइंभी लोकन सेईं प्यार केरतथ, **16** तुशशे लेइ परमेशरें शुकू केरनु न शैरी, ते अपने प्रार्थनां मां तुसन याद केरताईं। **17** अवं प्रार्थना केरताईं कि परमेशर, इशशे प्रभु यीशु मसीहें महिमा बाले बाजी, तुसन पवित्र आत्मा दे, तै तुसन अक्लमन्द बनालो ते परमेशर तुसन पुइ बांदो केरेलो, ताके तुस तैस पिशैनी बटथ। **18** अवं ई भी प्रार्थना केरताईं कि तै तुशशे मने खोलेलो, कि तुस बुइथ कि इशशे कुजानेरी कुन उमीद आए, ते केत्री महान ते महिमा बैली बरकतां केरे लेइ परमेशर अपने लोकन जो वादो कियोरोए। **19** ते तैसेरी शक्ति इशशे लेइ जैना अस विश्वास केरतम, केत्री महाने, तैसेरी शक्तेर कम्मरे मुताबिक, **20** जैन तैनी मसीहें बारे मां कियूं, कि तैस मुइदन मरां जीते केरां स्वर्ग मां अपने देइने पासे बिशालो। **21** तैडी तै हर किसमेरी हकौमत, ते अधिकार, ते शक्ति, ते प्रभुता, ते तैसेरी पदवी हर एक्के अधिकारी करां तै महान आए, जैना न सिर्फ इस जहानी मां, पन एजनेबाले जहानी मां भी आए। (aiōn g165) **22** ते परमेशर सब किछ मसीहें अधिकारे मां कियूं, तैनी सेइंभी चीजन पुइ अधिकारी बनेइतां कलीसिया दितो। **23** कलीसिया मसीहेरी जान आए, ते तैसेरी भरपूरी जै सेइंभन मां सब किछ पूरू केरतीए।

2 बीतोरें वक्ते मां परमेशरें तरफां तुसन कां नव्वीं जिन्दगी न थी; तुस अपने पाप ते बुरे कम्मां केरे वजाईं मरोरे लोकां केरे जेरे थियो। **2** तैस वक्ते तुस दुनियारे रीति पुइ चलते थियो, ते तुस अम्बरेरे दुष्ट आत्मा केरे अधिकारी मुताबिक चलते थी, जेसेरी आत्मा हेजू भी परमेशरें हुकम न मन्नेबाले लोकां केरे मन्न मां कम केरती। (aiōn g165) **3** एन मां अस भी सब पेइले अपने जिसमेरे खुबैइशन मां दिहाडे कटते थी, ते जिसम, ते मनेरी

मर्जी पूरी केरते थी, ते होरि लोकां केरे जेरे सभाव सेईं बुरे थियो ते परमेशरें सजारे अधीन थियो। **4** पन परमेशर जै बडो दया केरनेबालोए; अपने तैस बडे प्यारे सेईं, जैस सेईं तैने असन सेईं प्यार कियो। **5** जैखन अस पापां केरे वजाईं सेईं मरें लोकां केरे जेरे थियो, तैनी असन जिन्दगी दितो जैखन तैनी मसीह मुइदन मरां जीतो कियो, परमेशरें अनुग्रह सेईं तुसन मुक्ति मैलोरीए। **6** किजोकि तैनी अस मसीह सेईं साथी मुइदन मरां जीते कियो, ते स्वर्गेरे ठैरन मां तैस सेईं साथी बिशाले। **7** परमेशरें एन कियूं कि एजनेबाले वक्ते मां दुनियारे लोकन हिराए कि तैसेरो अनुग्रह केत्रो महान आए। ई अनुग्रह इशशे लेइ हिराव, तैने इशशे लेइ एन कियूं जैना अस यीशु मसीह मां आम। (aiōn g165) **8** किजोकि विश्वासेरे जिरिये परमेशरें अनुग्रह सेईं तुसन मुक्ति मैलोरीए, ते तुसेईं अपनो आपे एप्पू नईं बचावरो बल्के परमेशरें दाने सेईं तुस बचोरैथ। **9** ते भले कम्मन सेईं नईं, एरू न भोए कि कोई घमण्ड केरे। **10** किजोकि अस परमेशरें बनोरम; ते मसीह यीशु मां तैन भले कम्मां केरे लेइ पैदा कियोरम, जैना परमेशरें पेइले इशशे केरनेरे लेइ तियार करां। **11** एल्हेरेलेइ याद केरा, कि तुस जैना ज़रमनेरे गैर कौमरेथ, ते खतनो कियो लोक तुसन जो बगैर खतने बाले ज़ोतन। **12** तुस लोक तैस वक्ते मसीह न थियो ज्ञानते, ते तुस परमेशरें चुनोरें इस्राएली लोक न थियो, ते तुस तैन रोडी चीजन मां हिस्सेदार न थियो जैन केरो वादो परमेशरें यहूदी लोकन सेईं कियोरो थियो, ते न उमीद ते दुनियाईं मां परमेशरें करां दूर थियो। **13** पन अक वक्त थियो कि तुस परमेशरें करां दूर थियो, पन हुनी यीशु मसीह मां तैसेरे खून सेईं नेडे आनोरैथ। **14** किजोकि मसीहे इशशो मेले कराव, तैने यहूदी ते गैर यहूदी दुइये अक केरे, ते अलग केरनेबाली दिवार जै मझाटे थी, डोली। **15** मसीहेरे कूसेरे मौतरी वजाईं सेईं, तैनी कानूनरे सारे नियम पूरे तरीके सेईं खतम कियो। मसीहेरो एरो केरनेरो मकसद ई थियो कि दूईं टोली केरि अक नव्वीं टोली बनाए, जै तैस सेईं जुड़ोरी भोए। **16** मसीहेरे कूसेरी मौतरे जिरिये, तैनी दूईं टोली अक की, ते परमेशरें सेईं तैन केरो मेल कराव, एन्चरे यहूदी ते गैर यहूदी केरि दुश्मनी खतम की। **17** ते मसीहे एइतां तुस गैर कौमरे लोक जैना परमेशरें करां दूर थियो, ते यहूदी जैना तैसेरे नेडे थियो, दुइयन मेल मिलापेरी खुशखबरी शुनाईं। **18** किजोकि मसीहेरे बदावलम अस सारे एक्की पवित्र आत्माेरे जिरिये बाजी परमेशरें कां एज्जी बटम। **19** एल्हेरेलेइ तुस गैर कौमां केरे लोक परदेशी ते मुसाफर न राए, पन परमेशरें लोकां केरू झुण्ड, ते परमेशरें घरानेरे भोए। **20** तैस इमारतरे जेरेथ जेसेरी बुनीयाद प्रेरित ते नेबी आन ते यीशु मसीह एप्पू तैसेरे कूनोरें घोडे। **21** जैस मां सारी इमारत साथी मिलतां प्रभु मां अक मन्दर बनती गातीए। **22** तुस गैर कौमरे विश्वासी लोक भी परमेशरें होरि लोकन सेईं साथी शामिल कियो जे, किजोकि तुस मसीह सेईं साथी अक भोरैथ। ताके तुस अक घर बनथ जैडी परमेशरें आत्मा रहते।

3 किजोकि परमेशरें तुशशे गैर कौमां केरे लेइ इन कियोरू, अवं पौलुस तुशशे लेइ प्रार्थना केरताईं, अवं कैदे मां आईं, किजोकि अवं तुशशे लेइ यीशु मसीहेरी सेवा केरताईं। **2** पक्कू तुसेईं शूनुरेए, परमेशरें अपने अनुग्रहें जिरिये तुसन खुशखबरी शूनुरेरी लेइ मां जिमेवारी दितोरीए। **3** परमेशरें छप्पोरो मकसद बडो पेइलो छपोतो थियो, हालांकी तैनी मां पुइ बांदो कियो, किछ गल्लां आन जैना अवं तुसन चिट्टेरे जिरिये समझानो चाताईं। **4** जैस सेईं तुस पेइतां बुझी बटतथ, कि अवं मसीहेरो तै भेद कोइ तगर समझताईं। **5** बीतोरें वक्ते मां परमेशरें ई भेद लोकन पुइ बांदो नईं कियोरो, पन हुनी पवित्र आत्माेरे जिरिये अपने पवित्र प्रेरितन ते नेबन पुइ बांदो कियो। **6** परमेशरें मकसद ई आए, खुशखबराेरे जिरिये यीशु मसीहे सेईं तैन केरो रिशतो भोनेरे वजाईं सेईं गैर कौमां केरे लोक तैस्से विरासती मां हिसेदार भोले, ते तैना तैस्से जानरे अंग आन, जेसेरो वादो परमेशरें यहूदन सेईं कियोरो। **7** परमेशरें अनुग्रह ते बेइं शक्ति सेईं मां तै खुशखबराेरी प्रचार केरनेरो लेइ सेवा केरनेरो खास अधिकार दितोरीए। **8** चाए अवं परमेशरें सेइंभी लोकन मरां निकडे करां निकोडोईं। परमेशरें मां पुइ अनुग्रह कियो,

कि अवं गैर कौमन खुशखबरी शुनेई बेटि कि मसीह हमेशारी बरकतां केरो देनाबालोए। 9 अवं इस भेदेरे मकसदेरे बारे जोनेरे लेई चुनोरोई, जै परमेशर हर चीज बनानेबालोए तैनी शुरु करां छुप्योरो रखोरो थियो। (aiōn g165) 10 ताके हुनी कलीसियारे जिरिये सेई, परमेशरु बडू ज्ञान, अम्बरेरे तैन प्रधान ते अधिकाँरन पुड बांदू कियुं गाए। 11 परमेशरे दुनिया बनानेरे पेडलो इन्ने थापेरु थियुं, जैन तैने इश्शे प्रभु यीशु मसीह मां पूरु कियुं। (aiōn g165) 12 किजोकि मसीह पुड इश्शो विश्वासे, तैसेरे वजाई सेई अस परमेशररी मौजूदगी मां हिम्मत ते भरोसे सेई साथी एज्जी बटतम। 13 एल्हेरेलेइ अवं बिनती केरताई कि ज़ैना दुःख तुश्शे लेइ मीं पुड लोरेन एजने, तैन केरे वजाई सेई दिलेरी न शरी, किजोकि इन सब तुश्शे फेइदेरे लेइ आए। 14 एल्हेरेलेइ अवं तैस बाजी परमेशररे कां ज़ैधू केरे बारे प्रार्थना केरताई, 15 तैए आए ज़ै स्वर्ग ते धरती पुड रानेबाले विश्वासी लोकां केरो बाजी। 16 कि ते अपने महिमारे धनेरे मुताबिक तुसन इन दान दे, कि तुस तैसेरी आत्माई सेई अपनो एनत्रीयां मैन्हु मां शक्ति हासिल केरतां मजबूत भोते गाथ। 17 ते विश्वासे सेई मसीह तुश्शे दिले मां राए, कि तुस प्यारे मां जील छेइतां ते मुनीयाद छेइतां, 18 सब पवित्र लोकन सेई रोडेघारे समझनेरी शक्ति हासिल करा; कि तैसेरी चौड़ाई, ते लम्बाई, ते ऊँचाई, ते डुघार क्रोए। 19 ते अवं प्रार्थना केरताई कि तुस मसीहेरे तैस प्यारे सेमझी बटतथ जै समझी करां बेइरे, कि तुस परमेशररी भरपूरी सेई भरोते गाथ। 20 हुनी जै एरो शक्ति बालोए, जै इश्शी बिनती ते समझी करां बडू जादे कम केरि बटते, ते तैस शेक्तेरे मुताबिक असन मां कम केरते, 21 कलीसिया मां, ते मसीह यीशु मां, तैसेरी महिमा पीडी करां पीडी तगर हमेशा भोती राए। आमीन। (aiōn g165)

4 अवं जै प्रभुएरी सेवा केरनेरे वजाई सेई कैदे मां आई, तुसन कां बिनती केरताई, कि जेन्चरे परमेशरे तुस अपने लोक भोनेरे लेइ कुजोरेथ, तैसेरे मुताबिक ज़िन्दगी भी जीथ। 2 मतलब सैरी दीनतां ते नम्रता सेई साथी, ते सबर केरतां प्यारे सेई एक्की होरेरी झल्लां। 3 इस कम्मे मां अपनि पूरी कोशिश केरा ताके तुस मेल मिलापे सेई राथ, किजोकि पवित्र आत्मारे जिरिये तुस अक कियोरेथ। 4 अस सारे विश्वासी एक्की जानरे अंगां केरे ज़ेरे आम, ते असन सेबभन अक्के पवित्र आत्माए मैलोरोए; ते तुसन अक्के उमीद दिती, जैखन तुस परमेशररे लोक भोनेरे लेइ चुने जे। 5 अक्के प्रभुए जै यीशु मसीहे, जैस पुड अस सब विश्वास केरतम, ते असेई सेबभन अक्के बपतिस्मां मैल्लो। 6 ते अक्के परमेशरे, जै सेबभी केरो बाजीए, तैए सेबभन पुड राज केरते ते इश्शे दरमियान कम केरते, ते असन सेबभन मांए रहते। 7 पन मसीहे असन मरां हर एक्की तैसेरु कम केरनेरे लेइ अलग-अलग किसमेरी काबलीत दितीरोए। 8 एल्हेरेलेइ पवित्रशास्त्र जोते, “जैखन तै उच्चे पुड चढावो, ते तैने बडे कैदी एप्पू सेई साथी ने, ते तैने लोकन बेडि बरकतां दिती।” 9 (तैसेरे उच्चे चढनेरो साफ मतलब ई आए, कि मसीह धरतेरे बुनीयं ठारन मां ओरो थियो। 10 एल्हेरेलेइ मसीह बुन ओरो थियो, तैए आए जै सैरी अम्बरे करां भी उबरो जेव, मसीहे एन एल्हेरेलेइ कियुं ताके सब किछ तैसेरे हजूरी सेई भरपूर भोए) 11 ते तै मसीहे जैने (कलीसियाई) जिमेबारी दिती, तैने किछ प्रेरित किछ नबी, किछ खुशखबरी शुनाने बाले, किछ रखवाले ते किछ उस्ताद चुने। 12 मसीहे अपने लोकन इना जिमेदारी एल्हेरेलेइ दितीरिन, कि कलीसिया जै मसीहेरी जाने तरक्की केरे। 13 जैखन कि अस सब विश्वास, ते परमेशररे मटेरी पिशानी मां अक भोम, ते ज्ञांतगर अक सिद्ध मैन्हु न भोम ते मसीहेरे कदेरे अनदाजे तगर न पुजाम। 14 ताके अस अग्रोवं जो बच्चां केरे जेरे न रहम, जैना मैन्हु केरि ठानेरी गल्लां ते चलेकी सेई तैन केरे कोशिशो सेई खियालां केरि ते शिक्षारी हर एक्की बयाने सेई उछड़ाए, ते इरां उरां घुमाए गाते भोना। 15 बल्के प्यारे सेई सच जोइतां, सेबभी गल्लन मां मसीहेरे जेरे सिद्ध भोथ जै कलीसियारी क्रोडी। 16 जैस सेई सारी जान सेबभी जोइं केरि मदी सेई साथी मिलतां, ते साथी जुडतां तैस अस्सरेरे मुताबिक जै सेबभी हिसन सेई भोइतां, अपने आपे बढाते, कि तै प्यारे मां तरक्की केरतो राए। 17 एल्हेरेलेइ अवं इन जोताई, ते प्रभु मां

खबरदार केरताई कि जेन्चरे गैर विश्वासी लोकां केरे लोक अपने मनरे बेकार खियालन पुड चलतन, तुस अजरेरे बाद तैन केरे जेरे न चला। 18 किजोकि तैना बेसमझ भोरेन, ते तै अज्ञानतारी वजाई सेई ते सखत मनरे वजाई सेई तैना तैस ज़िन्दगी करां दूर आन जै परमेशर देते। 19 ते तैना बेशर्म भोइतां, एशो मां लेगि जे, कि सेबभी किसमेरां गन्दां कम्मां शोके सेई केरन। 20 पन तुसन मसीहेरी एरी शिक्षा नई मैल्लोरी। 21 बल्के मीं पूरु याकीने कि जैखन तुसेई यीशुएरे बारे मां अपने उस्तादन करां शुनू, ते तुसेई तैन करां सच्ची शिक्षा शिखी। 22 कि तुस पेइले चाल चलनेरे पुरानी इन्सानयती जै टपलाने बैली इच्चां केरे मुताबिक भ्रष्ट भोइ गातीए, खोल्ला। 23 इसेरे बदले पवित्र आत्मा तुश्शे खियालन ते नजिरियो बदले। 24 परमेशरे तुसन नव्वो स्वभाव दितीरोए, जै तैसेरे स्वभावरे जेरो आए। त तुस नव्वे स्वभावरे जेरे जीथ। सच्चे तुस धर्मी ते पवित्र भोथ। 25 एल्हेरेलेइ झूठ ज़ोणू शैरतां हर कोई अपने पडोसी सेई सत्र जोए, किजोकि अस एप्पू मामेइं एक्की जानरे अंग आम। 26 अगर तुस क्रोधे मां भोथ खबरदार राथ, कि पाप न केरथ, दिहाडो डुबने तगर तुश्शो क्रोध मुक्की गाए। 27 ते शैताने मौको न देथ कि ते तुश्शे अज़मैइश केरे। 28 चोरी केरनेबालो फिरी चोरी न केरे; बल्के इमानदेरी सेई अपने हथ्थन सेई मेहनत केरे; एल्हेरेलेइ जैस ज़रूरत भोए तैस देनरे लेइ तैस कां किछ भोए। 29 कोई गन्दी गल तुश्शे ज़बाना न निस्से, पन ज़रूरतेरे मुताबिक तैन्ने जोथ, जैन होरि केरे लेइ विश्वासे मां मजबूती सेई बढनेरी वजा भोए। तैखन जैन तुसेई ज़ोवं तैन लोकां केरे लेइ रौडू भोल् जैना तुश्शी शुन्तन। 30 ते जैन किछ तुस केरथ तैसेरे वजाई सेई परमेशररे पवित्र आत्मा दुखी न केरा, जैस सेई तुसन पुड छुटकारेरे दिहाडरे लेइ छाप दितीरोए। 31 सेबभी किसमेरी टलइठार ते प्रकोप, ते क्रोध, सखत गल, ते तुहीन ते सारो बैर-भाव सेई तुस दूर कियोरेथ। 32 ते एक्की होरि पुड दया केरा, ते माफ़ केरनेबाले भोथ, ते जेन्चरे परमेशरे मसीह मां तुश्शे पाप माफ़ किये, तेन्चरे तुस भी एक्की होरेरे पाप माफ़ केरा।

5 एल्हेरेलेइ तुस परमेशररे बच्चेथ जैन सेई ते प्यार केरते, तैसेरे जेरे बननेरी कोशिश केरा। 2 होरि केरे लेइ प्यारे सेई भेरतां ज़िन्दगी जीथ, जेन्चरे मसीहे भी तुसन सेई प्यार कियो; ते इश्शे लेइ अपनो आप रोडी मुशकरे लेइ परमेशरे कां चढतां बलिदान केरो। 3 ते जेरु परमेशररे लोकां केरे लेइ ज़रूरीए, तेन्चरे तुसन मां भी बदमाशी, ते कोन्वी किसमेरु बुरु कम न भोए, या लालचरे बारे मां गल भी न भोए। 4 ते न बे शरमी, न बेसरी गल्लां, न मेवजेरी गल्लां, किजोकि इना गल्लां शोभन न, बल्के तुसेई परमेशरु शुक्र कियोरु लोडे। 5 किजोकि तुस इन ज्ञानतथ, कि कोन्वी बदमाश, या भिट्टो मैन्हु, या लालची मैनेरो जै मूरती पूजा केरनेबालोए, मसीह ते परमेशररे राज़े मां तैसेरो कोई हिस्सो नई। 6 कोई तुसन ई सल्लाह देइतां धोखो न दे, कि परमेशरे हकीकति मां तैन सज़ा न देलो जैना एरे पाप केरतन। 7 एल्हेरेलेइ तैन केरु साथ न रखा। 8 किजोकि तुस त पेइले आंधरु थी, पन हुनी प्रभु यीशु मां लोआथ, ते लोअरे बच्चां केरे जेरे चला। 9 (किजोकि लोअरो फल सेबभी किसमेरी भलाई, ते धार्मिकता, ते सच्चे)। 10 ते इन तोप्यां कि प्रभु कुन रौडू लगते। 11 ते आंधरेरां ते बेकार कम्मन मां शामिल न भोथ, बल्के लोकन इन हिराथ कि इना कम्मां बुरन। 12 किजोकि गैर विश्वासी लोकां केरां छुपोरां कम्मां केरि गल केरनि भी शमरी गल आए। 13 जैखन लौ कोन्वी चीजी पुड चमकती त हर कोई लेई बटते कि इन केरु, किजोकि जैखन लौ किछ हिराती, त तै चीज एप्पू लौ भोइ गातीए। 14 एल्हेरेलेइ एन्चरे ज़ोवं गाते, “हे झुलने बाला उठ ते मुडदन मरां जीतो भो, ते मसीहेरी लौ तीं पुड चमकेली।” 15 एल्हेरेलेइ रोडे चारे हेरा, कि केरि ज़िन्दगी जीनि लोरेथ। बेअक्कां केरि जेरे नई पन अक्लमन्दा केरि जेरे ज़िन्दगी जीथ। 16 ते मौको कीमती समझा, किजोकि दिहाडे बुरेन। 17 एल्हेरेलेइ बेअक्ल न बना, पन ध्याने सेई समझा, कि प्रभुएरी तुश्शे लेइ कुन मर्जी? 18 ते शराब पीने मां मतवाले न भोथ, किजोकि एस सेई बदचलनी भोतीए, पन पवित्र आत्मा सेई भरोते राथ। 19 ते एप्पू मामेइं परमेशररां भजन ते स्तुति केरते ते

आत्मिक गीत ज़ोथ, ते अपने-अपने मने मां प्रभुएरे लेइ गीत ज़ोथ ते किरतन केरते राथ। 20 ते सदा सेब्भी गल्लां केरे लेइ प्रभु यीशु मसीहरे नंवे सेइं बाजी परमेशेरू शुक्र केरते राथ। 21 ते मसीहरे डरे सेइं एक्की होरेरे अधीन राथ। 22 हे कुआन्शव, अपने-अपने मुन्शां केरे अधीन राथ, जेन्चरे प्रभुएरे। 23 किजोकि मुन्श त कुआन्शरी क्रोडी जेन्चरे मसीह कलीसियारी क्रोडी, ते मसीह कलीसियारो मुक्ति देनेबालोए जै तैसेरी जाने। 24 जेन्चरे कलीसिया मसीहरे अधीने, तेन्चरे कुआन्शां भी हर गलली मां अपने-अपने मुन्शेरे अधीन रान। 25 हे मुन्शव, अपने-अपने कुआन्शन सेइं प्यार केरा, जेन्चरे मसीहे भी कलीसिया सेइं प्यार केरतां अपने आप तेसेरेलेइ दित्तो। 26 ताके तैस वचनेरे ज़िरिये पैनेरे निहाने सेइं शुद्ध केरतां पवित्र बनाए। 27 ते तैस अक एरी महिमा बाली कलीसिया बनेइतां एप्पू कां खडी केरे, जैस मां न कोई दाग, न धबो, न कोई एरी चीज भोए, बल्के पवित्र ते बेदलजाम भोए। 28 एन्चरे मुन्श अपने कुआन्शी सेइं अपने जानी बराबर प्यार केरे। जै अपने कुआन्शी सेइं प्यार केरते, तै एप्पू सेइं प्यार केरते। 29 किजोकि कोन्चे कधी अपने जानी सेइं बैर नई रखोरो, बल्के तैसेरी हेरगेश कियारीए, जेन्चरे मसीहे भी कलीसियाई सेइं केरते। 30 एल्हेरेलेइ अस मसीहरे जानरे अंगां केरे जेरे आम। 31 जेन्चरे पवित्रशास्त्र ज़ोते “एल्हेरेलेइ मड़द अम्मा बाजी शैरतां अपने कुआन्शी सेइं मिलोरो रालो।” 32 ई भेद त बडोए; पन अवं मसीह ते कलीसियारे बारे मां ज़ोताई। 33 पन तुसन मरां हर कोई अपने कुआन्शी सेइं एप्पू बराबर प्यार केरे, ते कुआन्श भी अपने मुन्शेरो इज़्जत केरे।

6 पवित्रशास्त्र ज़ोते, “अपने अम्मा ते बाजी केरि आदर केरा, तैखन तुशू भलू भोलू ते दुनियार्ई मां तुशू लम्मी उमर भोली।” ई पेइलो हुक्म जैस सेइं परमेशेरे वादो कियारीए, त बचव इन तुशू लेइ रोडू आप, तुस ज़ैना प्रभु यीशु पुड़ विश्वास केरतथ, अपने अम्मा बाजी केरू ज़ोनू मन्ना। 4 ते हे बचचन बालव, अपने बचचन न सरकाथ, पन प्रभुएरी शिक्षा ते खबरदारी देइतां, तैन केरि हेरगेश केरा। 5 हे गुलामाव, जैने लोक दुनियारे मुताबिक तुशू मालिकन, अपने मनेरे सचैई सेइं डरते, ते थरकते, ते जेन्चरे मसीहरो तेन्चरे तैन केरो भी हुक्म मन्ना। 6 ते मैन्हु खुश केरेने बालां केरि जेरे हिरानेरे लेइ सेवा न केरा, पन मसीहरे दासां केरे जेरे मने सेइं परमेशेरी मेर्जी पुड़ चला। 7 ते तै सेवा मैन्हु केरि नई, पन प्रभुएरी जैनतां केरा। 8 किजोकि तुस जानतथ, कि जै कोई जेरू रोडू कम केरेलो, चाए गुलाम भोए, चाए आज़ाद; तैस प्रभु करां तेरहु इनाम मैलेलू। 9 एन्चरे हे मालिकव, तुस भी धेमकी शैरतां अपने नौकरन सेइं रोडो बर्ताव केरा, किजोकि तुस जानतथ, कि तैन केरो ते तुशू दुइयां केरो मालिक स्वर्ग मांए, ते तै केन्चेरी तरफदारी न केरे। 10 आखरी मां तुस प्रभुएरी शक्ति बाले शक्ति मां मज़बूत बना। 11 परमेशेरे सारे हथियार बन्धा; ताके तुस शैतानेरे सारे मन्सूबां केरो मुकाबलो केरि बटतथ। 12 किजोकि इशूई लड़ाई, खूने या मांसे सेइं यानी मैन्हु केरे खलाफ नई, बल्के प्रधान सेइं, ते अधिकैरन सेइं, ते इस दुनियारे आंधेरेरे हाकिमन सेइं ए, ते तैस दुष्टेरे आत्मिक फौजन सेइं ए ज़ैना आसामाने मां आन। (aiōn g165) 13 एल्हेरेलेइ परमेशेरे सारे हथियार बन्धा, ताके तुस जेइस बुरे दिहाइन एजन त तुस सामनो केरि बटतथ, ते सब किछ पूरू केरतां मज़बूत राथ। 14 परमेशेरे सच्चाई पटकेरी जेरि अपने कमरी सेइं बन्धा, ते धार्मिकतारी झिलम लेइतां, 15 ते पवन्न मां मेलेरे खुशखबरी शुनानेरे तियैरारे बूट लाथ। 16 ते तैन सेब्भन सेइं साथी विश्वासेरी ढाल घिन्तां मज़बूत भोथ जैस सेइं तुस तैस शैतानेरे सब ज़लते तीर हिशेई बटथ। 17 ते मुक्करो टोप, ते आत्मारो तलवार जैन परमेशेरू वचने, नेथ। 18 ते हर वक्त ते हर किसमे सेइं जै पवित्र आत्मा च़लाने सेइं प्रार्थना ते बिनती केरते राथ, ते बीड़ो राथ, कि सब परमेशेरे लोकां केरे लेइ लगातार बिनती केरा। 19 ते मेरे लेइ भी, कि मीं वचन शुनानेरे वक्त हिम्मत भोए, कि अवं दिलेरी सेइं खुशखेबराओ भेद ज़ोई बेटि। 20 एल्हेरेलेइ अवं शंगलन सेइं बन्धरो राजदूतेरो जेरो सेवा केरनेबालोई। प्रार्थना केरा कि जेन्चरे मीं शुनावरू लोइ, तेन्चरे अवं दिलेरी सेइं खुशखबरी शुनेई बेटि। 21 तुस भी, अवं ज़ोई बटताई ते कुन केरने

लोरोई, इस सेइं बुझा। तुखिक्सुस जै तुसन सब किछ ज़ोलो। तै इशशो द्वालो साथीए, ते प्रभु मां वफादार सेवके। 22 तै मीं तुसन कां एल्हेरेलेइ भेजोरोए, कि तुस इशशी हालती ज़ानतथ, ते ते तुशू मन्ना मां हिम्मत दे। 23 अवं प्रार्थना केरताई कि इशशो बाजी परमेशेरे ते प्रभु यीशु मसीह तुसन विश्वासी लोकन शान्ति दे, ते तैना तुसन एक्की होरि सेइं प्यारे मां ते मसीह पुड़ विश्वासे मां बनोरे रानेरे वजा भोन। 24 ज़ैना इशशे प्रभु यीशु मसीह सेइं सच्चो प्यार केरतन, तैन सेब्भन पुड़ अनुग्रह भोतो राए।

फिलिपियां

1 अवं पौलुस, त कने तीमुथियुस, यीशु मसीहेरे दास आम। इशो तरफां सेबभी पवित्र लोकां केरां नंवां, जैना मसीह यीशु मां भोइतां फिलिप्पी नगरे मां रातन, रखवालन ते सेवकन समेत, 2 इशो बाजी परमेशर ते प्रभु यीशु मसीहे करां तुसन अनुग्रह ते शान्ति मैलती राए। 3 अवं जैखन-जैखन तुसन याद केरताई, तैखन-तैखन अपने परमेशरुए शुक्र केरताई। 4 ते जैखन भी तुशुं सेबभी केरे लेइ सेबनी केरताई, ते हमेशा आनन्द सेइं प्रार्थना केरताई। 5 किजोकि तुस पेइले दिहैडे करां अज तगर यीशु मसीहेरी खुशखबरी फैलाने मां मीं सेइं साथी शामिल रावरेथ। 6 ते मीं इस गल्लरो भरोसोए, कि परमेशरे तुसन मां रोडे कम्मरी शुरुआत कियोरीए, तैए तैस कम्मे यीशु मसीहेरे वापस एजनेरे दिहाड़े तगर पूरू केरेलो। 7 इन जेइजे, कि अवं तुसन सेबभी केरे लेइ एरू सोची, किजोकि तुस मेरे मने मां बस्सोरेथ, ते मेरे केदे मां खुशखबरे लेइ जुवाब ते सबूत देने मां तुस सब मीं सेइं साथी अनुग्रहे मां मीं साथिथ, 8 इस मां परमेशर मेरो गवाहे, कि अवं यीशु मसीहेरो जेरो प्यार केरतां तुशुं सेबभी केरू लालच केरताई। 9 ते अवं ई प्रार्थना केरताई, कि तुशुं प्यार ज्ञान ते सेबभी किसमेरो ज़मीर सेइं होरे भी बद्धते गाथ। 10 इडी तगर तुस रोडी करां रोडी गल्लां ट्लाएरी बुझा, ते मसीहेरे दिहाड़े तगर सच्चे बनोरे राथ; ते ठोकर न खाथ। 11 ते तैस धार्मिकतारे फले सेइं जै यीशु मसीहेरे जिरिये भोते, भरोते गाथ जैस सेइं परमेशरी महिमा ते बड्याई भोती राए। 12 हे ढूलाव ते बेइनव, अवं सच ज़ोताई, कि तुस इन ज़ाती, कि मीं पुइ जै बीतोरीए, तैस सेइं खुशखबरी बडोती भी भोइ। 13 इडी तगर कि महाराजेरी सारी फौज ते बाकी सैन लोकन मां इन बांदू भोव कि अवं मसीहेरे लेइ कैद मां आई। 14 ते प्रभु यीशु मां जैना ढूला आन, तै मरां बडे मेरे कैद भोनेरे वजाई सेइं आन, तैना हिममत केरतां परमेशरेरो वचन बेधइक भोइतां ते दिलेरी सेइं शुनानेरी कोशिश केरतन। 15 किछ लोक त जलन ते लडेई सेइं मसीहेरो प्रचार केरतन ते किछ लोक सच्चे दिले सेइं। 16 किछ त इन सेमझतां कि अवं खुशखबरे लेइ जुवाब देनेरे लेइ ठेरावरोई प्यारे सेइं प्रचार केरताई। 17 पन तैना होरे लोक साफ दिले सेइं नई पन जलनी सेइं मसीहेरो प्रचार केरतन, इन सेमझतां कि मेरे कैद मां मेरे लेइ मुसीबत बथान। 18 त कुन भोव? सिर्फ इन, कि हर बचां चाए बुरे खियाले सेइं, चाए सचैई सेइं, मसीहेरे बारे मां खुशखबरी प्रचार भोतीए, ते अवं इस सेइं खुश आई, ते खुश भी रेइलो। 19 किजोकि अवं ज्ञानताई, कि तुशुं प्रार्थनाई सेइं, ते यीशु मसीहेरी आत्मार दाने सेइं इसेरो नितीजो मेरी मुक्ति भोली। 20 अवं त दिले सेइं इन चाताई, ते ई उमीद रखताई, कि अवं कोन्ची गल्ली मां न छिथोई, बल्के जेन्चरे मेरी बडी दिलेरी सेइं मसीहेरी बड्याई मेरे जिसमे सेइं भोती राई, तेन्चरे हुना भी भोए चाए अवं ज़ीतो रेइ या मेरी। 21 किजोकि मेरे लेइ ज़ीतू रानू मसीहे, ते मरनू फैइदोए। 22 पन अगर जिसमे मां ज़ीतू रानू मेरे कम्मरे लेइ फैइदेमंदे त अवं न जैनी, कि केस चुनी। 23 किजोकि मीं दुइयां केरे मझाटे चुने मां मुशकिल भोने लोरीए। अवं मरनू चाताई ताके स्वर्ग मां मसीह साथी रेइ बेटि, किजोकि इन बडू ज़रूरीए। 24 पन तुशुं मद्दत केरनेरे लेइ मेरू ज़ीतू रानू बडू ज़रूरीए। 25 एल्हेरेलेइ कि मीं इलहेरो भरोसोए ते अवं ज्ञानताई कि अवं ज़ीतो रानोई, बल्के तुसन सेबभन सेइं साथी रानोई जैस सेइं अवं तुशुं मद्दत केरि, कि विश्वासे मां मजबूत भोथ, ते इस मां खुश राथ। 26 जैखन अवं तुसन कां दुबारां एज्जी, तुसन कां जादे वजा भोली यीशु मसीह पुइ घमण्ड केरनेरी एल्हेरेलेइ जेन किछ ते मेरे जिरिये केरने लोरोए। 27 सिरिफ एत्रू केरा कि तुशुं चालचलन मसीहेरे खुशखबरे काबल भोए। चाए अवं तुसन एइतां हेरी, चाए न एज्जी, तुशुं बारे मां इन शुनी, कि तुस अक मन भोइतां बनोरे रातथ, ते अकोट्टे भोइतां खुशखबरे विश्वासेरे लेइ मेहनत केरते रातथ। 28 ते कोन्ची गल्ली मां खलाफत केरनेबालन करां न डराथ। ई तैन केरे लेइ बरबाद भोनेरो साफ निशाने, पन तुशुं लेइ मुक्तोरे, ते इन परमेशरेरे तरफां

आए। 29 किजोकि मसीहेरे वजाई सेइं तुसन पुइ ई अनुग्रह भोव कि न सिर्फ तैस पुइ विश्वासे केरा पन तैसेरेलेइ दुःख भी झैल्लां। 30 ते तुसन तेन्चरे मुसीबत केरनीए, जेन्चरे तुसेई मीं करां केरते लोरीए, ते हुना भी शुन्तन, कि अवं तेन्चरे केरताई।

2 अगर मसीह मां किछ तसल्ली ते प्यारे सेइं हिममत ते आत्मारी मौजूदगी, ते किछ दर्द ते दयाए। 2 ते मेरो ई आनन्द भूरो केरा कि अक्के मन राथ ते अक्के प्यार, ते अक्के खियाल, ते अक्के सोच रखा। 3 खुदगारज या झूटी बड्येरे लेइ किछ न केरा पन नर्म भोइतां एककी होरि एण्णू करां रोडो समझा। 4 तुसन मरां हर कोई सिर्फ अपने भलेइयेरे लेइ न सोचे, बल्के होरि केरि भलेइयेरे लेइ भी सोचे। 5 जेन्चरे यीशु मसीहेरो सुभाव थियो तेन्चरे तुशुं भी भोए। 6 जैने परमेशरेरे बराबर भोइतां भी परमेशरेरे बराबर भोने अपने कब्जे मां रखनेरी चीज न समझू। 7 बल्के अपनो आप खाली केरो, ते गुलामेरू रूप धारण केरू, ते मैनु केरे जेरो बनो। 8 ते मैनेरे रूपे मां बांदो केरतां दीन केरो, ते इडी तगर हुकम मन्ने बालो राव, कि मौत, हाँ, क्रूसरे मौत भी झैल्लो। 9 एल्हेरेलेइ परमेशरे तै बडो महान भी केरो, ते तैस तेन नवं दित्तू जैन सेबभी नंवन करां बडूए। 10 कि स्वर्ग मां ते धेरेती पुइ ते धेरतलरे बुने; तैना सब यीशुएरे नंवे पुइ जैधूए टिकन। 11 ते बाजी परमेशरेरी महिमारे लेइ हर अक जिभ मन्ने कि यीशु मसीह प्रभुए। 12 ते हे मेरे टलावर, जेन्चरे तुस सदा हुकम मन्ने ओरेथ, तेन्चरे हुना भी न सिर्फ मीं सेइं साथी रेइतां पन खास केरतां जैखन अवं दूर भोताई फिरी भी डरते राथ ते थरकते अपने मुक्तरू कम पूरू केरते गाथ। 13 किजोकि परमेशर जै तुसन मां कम केरते, ते तुसन इच्छा ते शक्ति तैन केरनेरे लेइ देते, जैस सेइं ते खुश भोते। 14 त सब कम्मां बगैर शकैइतां ते बगैर बेंसी सेइं केरा। 15 ताके तुस बेइलजाम ते शरीफ भोइतां टारे ते ढीठ लोकन मां परमेशरेरे बेइलजाम बच्चे बना, जैन मां तुस जिन्दगरो वचन घिन्तां दुनियाई मां बलते दीयां केरे जेरे लेइहोते रातथ, 16 कि मसीहेरे वापस एजनेरे दिहाड़े घमण्ड केरनेरी वजा भोए, कि न मेरी दौड़-धूप ते न मेरी मेहनत बेकार भोए। 17 अगर मीं तुशुं विश्वासेरे बलिदाने या सेवारे लेइ अपनो खून भी बगानो पे, त फिरी भी अवं खुश आई, ते तुसन सेबभी साथी खुश आई। 18 तेन्चरे तुस भी खुश भोथ, ते मीं साथी आनन्द केरा। 19 मीं प्रभु यीशु मां उमीदे, कि अवं तीमुथियुसे तुसन कां जल्दी भेजेलो, ताके तुशुं हाल शुन्तां मीं शान्ति मैल्ले। 20 किजोकि मीं कां एरे जेरे सुभावरो कोई नई, जै साफ दिले सेइं तुशुं फिक्क केरे। 21 किजोकि सब अपने फैइदो तोपतन, न कि यीशु मसीहे। 22 पन तुसेई तै परखो ते पिशानो भी, कि जेन्चरे मट्टू बाजी साथी केरते, तेन्चरे तैनी मीं सेइं साथी खुशखबरी फैलाने मां मीं सेइं साथी मेहनत केरि। 23 ते मीं उमीदे, कि जैखन मीं पतो जल्लेलो कि मेरी कुन हालत भोली, तैखन अवं तैस लूशी भेजेलो। 24 ते मीं प्रभु मां भरोसोए, कि अवं एण्णू भी जल्दी एज्जेलो। 25 पन मीं इपफ्रुदीतुस जै मेरो ढूलाए, ते मद्दतगार, ते साथी योथो ते तुशुं दूते, ते ज़रूरी गल्लन मां मेरी सेवा टेल केरनेबालोए, तुसन कां भेजनां ज़रूरी समझो। 26 किजोकि तैसेरो मन तुसन सेबभन मां लगगोरो थियो। एल्हेरेलेइ बे चैन रातो थियो किजोकि तुसेई तैसेरे बिमैरारो हाल शुनोरो थियो। 27 ते तै सच्चे बिमार त भोरो थियो, इडी तगर कि मरने पुइ थियो, परमेशरे तैस पुइ दया की; ते सिर्फ तैस्से पुइ नई, पन मीं पुइ भी, कि मीं दुःख पुइ दुख न भोए। 28 एल्हेरेलेइ अवं तैस भेजनेरी होरि भी कोशिश केरि, तुस फिरी तैस सेइं मिलतां खुश भोइयथ ते मेरो भी दुःख घटे। 29 एल्हेरेलेइ तुस प्रभु मां बडे आनन्दे सेइं तैस सेइं मुलाकात केरा, ते एरे जेरे लोकां केरि आदर केरा। 30 किजोकि तैए मसीहेरे कम्मरे लेइ अपनि जान खतरे मां छेइतां मौतरे नेडो पुजोरो थियो, ताके जै चाटो तुशुं तरफां मेरी सेवा मां भोव, तैस तै पूरो केरे।

3 हे मेरे ढूलाव ते बेइनव, प्रभु मां आनन्दित राथ, तैना गल्लां तुसन बार-बार लिखने मां मीं त कोई कष्ट न भोए, ते इस मां तुशुं सलामतीए। 2 तैन बुरां कम्मां केरनेबाले लोकन करां हुशार राथ, जैना खुवार कुतरां केरे जेरे

खाने बालां आन। 3 किजोकि खतने बाले त असां आम जैना परमेशरेरे आत्मारं चलाने सेइं चलतम ते आराधना केरतम ते मसीह यीशु पुड घमण्ड केरतम ते जिसमे पुड भरोसो न रखम। 4 पन अवं त जिसमे पुड भरोसो रेख्डी बटताई अगर कोन्ची होरि जिसमे पुड भरोसो रखनेरो वचार भोए, त अवं तैस करां भी जादे रेख्डी बटताई। 5 अठोवं दिहाडे मेरो खतनो भोव, इसाल एकरे कुटमे ते बिन्यामीनेरे गोत्रे मरां आई; इब्रैनी केरो इब्रानी; कानूनेरे बारे मां अगर कोई जोए त फरीसी। 6 जोशेरे बारे मां अगर कोई जोए त कलीसियाई सताने बालो; ते अगर कानूनेरे धार्मिकतारे बारे मां कोई जोए त बेडलजाम। 7 पन जैना-जैना गल्लां मेरे फैइदेरी थी तैना मीं मसीहेरे खातर नुकसान सैमझोरिन। 8 बल्के मीं अपने प्रभु यीशु मसीहेरे पिशानारी बड्यैरे वजाई सेइं अवं सब गल्लां नुकसान समझताई, जेसेरे वजाई सेइं मीं बेडि चीजां केरो नुकसान उठाव, ते तैन कूडो समझताई, जैस सेइं अवं मसीह हासिल केरि। 9 ते तैस मां भोइ, न कि एपनी तैस धार्मिता सेइं, जै मूसेरे कानूने सेइं ए, बल्के तैस धार्मिकता सेइं जै परमेशरेरे तरफां मसीह पुड विश्वास केरने सेइं भोतीए। 10 ते अवं तैस ते तैसेरे ज़ांती भोनेरी शक्ति, ते तैस साथी दुखन मां शामिल भोई, ते तैसेरी मौतरी बराबरी हासिल केरि। 11 ताके अवं कोन्ची रीति सेइं मुडदन मरां ज़ीते भोनेरे पटे तगर पुजी। 12 ईं मतलब नई, कि मीं हासिल केरू, या अवं सिद्ध भोइ जेव, पन तैस चीजी हासिल केरनेरे लेइ दौडने लोरोई, जेसेरे लेइ मसीह यीशुए अवं टलावरो थियो। 13 हे ढूलाव ते बेइनव, मेरू इन गुमान नई कि मीं टलाव, पन सिर्फ अक कम केरताई, कि जैना गल्लां पत्रोवं रेइ तैन बिसरतां, अग्री गल्लां केरे पासे गाताई। 14 निशानेरे पासे दौडतो चलताई, ताके मीं तैन इनाम मैल्ले, जेसेरे लेइ परमेशरे अवं मसीह यीशु मां बा कुजेवरोई। 15 असन मरां जेते सिद्धन, ईए विचार रखा, ते अगर कोन्ची गल्ली मां तुशुशो होरो खियाल भोए त परमेशर तैस भी तुसन पुड बांदो केरेलो। 16 एल्हेरेलेइ जैडी तगर पुजोरिम, तैसेरे मुताबिक चला। 17 हे ढूलाव ते बेइनव, तुस सब मिलतां मेरी जेरि चाल चला, ते तैन केरि पिशान रखा, जैना इस रीति पुड चलतन जेसेरी मिसाल तुस असन मां हेरतथ। 18 किजोकि बडे एरी चाल चलतन, जैन केरि चर्चा मीं तुसन सेइं बार-बार की ते अज भी लेरां देइ-देइ ज़ोताई, कि तैना अपने चालचलन सेइं मसीहेरे क्रूसेरे बैरिन। 19 तैन केरो अन्त विनाशे, तैन केरो ईश्वर पेटे, तैना एपनी शरमरी गल्लन पुड घमण्ड केरतन, ज़मीनारी गल्लन पुड मन लातन। 20 पन इशुशो मुलख स्वर्गे, ते अस एककी मुक्ति देनेबाले प्रभु यीशु मसीह स्वर्गां बलगने लोरेम। 21 तैए एपनी शेक्ति सेइं तैस अस्सेरे मुताबिक तैना सब चीज़न अपने वशे मां केरि बटते, इशुशे कमज़ोर जिसमेरू रूप बेदलतां, अपने महिमारे जिसमेरे मुताबिक बनालो।

4 एल्हेरेलेइ हे मेरे टलावे ढूलाव ते बेइनव अवं तुसन सेइं प्यार केरताई, जैन मां मेरो दिल लग्गोरो रहते जै मेरो आनन्द ते ताज भोए, हे टलावे ढूलाव ते बेइनव, प्रभु मां एन्चरे मजबूत राथ। 2 अवं यूओदियारे छंदे केरताई, ते सुन्तुखेरे भी, कि तैना प्रभु मां अक मन रान। 3 ते हे सच्चे मद्दतगार अवं तीं कां भी बिनती केरताई, कि तू तैन कुआन्शां केरि मद्दत केर, किजोकि तैनेई मीं सेइं साथी खुशखबरी फैलाने मां, क्लेमंस ते मेरे तैन मद्दत केरनेबालन समेत मेहनत की, जैन करां नंवां जिन्दगरे किताबी मां लिखोरन। 4 प्रभु मां सदा आनन्दित राथ; अवं फिरि ज़ोताई, आनन्दित राथ। 5 तुशुशी नरमी सेबभी मैनन् पुड बांदी भोए, प्रभु नेडोए। 6 कोन्ची भी गल्लारी फिक्र न केरा, पन हर एककी गल्ली मां तुशुशी दरखुवास, प्रार्थना बिनती सेइं शुक्रे साथी परमेशरे कां हाज़र भोन। 7 तैखन परमेशरेरी शान्ति, जै समझी करां बिलकुल बेइरे, तुशुशे दिलन ते तुशुशे खियालन मसीह यीशु मां बिलकुल मैफूज़ रखेली। 8 आखरी मां, हे मेरे ढूलाव ते बेइनव, जैना-जैना गल्लां सच्चीन, ते जैना-जैना आदारे काबलन, ते जैना-जैना गल्लां पवित्रन, ते जैना-जैना गल्लां रोडिन, ते जैना-जैना गल्लां मने रोडी लेगतिन, ते जैना-जैना गुण ते जैना-जैना गल्लां तरीफेरी, तैन पुड धयान केरा। 9 जैना गल्लां तुसेईं मीं करां शिखी, ते कबूल की, ते शुनी ते मीं हेरी, तैन केरो हुक्म मन्ना

तैखन परमेशर जै शान्ति देनेबालोए तुसन साथी भोलो। 10 अवं प्रभु मां बडो खुश आई कि हुनी एत्रे दिहाइन पत्ती तुसन मेरे बारे मां फिरि खियाल भोव; याकीन्नु तुशुशे शुरुआती मां इस एरो खियाल थियो, पन तुसन मौको न मैल्लो। 11 इन नई कि अवं अपने कम्मरे वजाई सेइं ज़ोताई; किजोकि मीं इन्ने शिखोरूए कि जैस हालती मां आई, तैस्से मां राज़ी भोई। 12 अवं निकडू भोनू भी ज्ञानताई ते बडू भोनू भी ज्ञानताई, ते मीं हर एककी गल्ली ते सेबभी हालतन मां रज़नू, ढूलुखूनू ते बधनू घटनू शिखोरूए। 13 जै मीं ताकत देते तैस मां अवं सब किछ केरि बटताई। 14 फिरि भी तुसेईं रोडू कियूं, कि मेरे दुखे मां मीं साथी भोए। 15 ते हे फिलिपियों, तुस एप्पू भी ज्ञानतथ, कि खुशखबरी प्रचारिरे शुरुआती मां जैखन अवं मकिदुनिया अग्रोवं जेव, तैखन मीं तुस शारे ते कोन्ची होरि मेनडलारे लोकेई लेने देनेरे बारे मां मद्दत न की। 16 एन्चरे जैखन अवं थिस्सलुनीके नगरे मां थियो; तैखन भी तुसेईं मेरी घटी पूरी केरनेरे लेइ एककी बार नई बल्के काई बार किछ भेजेरू थियूं। 17 इन नई कि अवं दान चाताई पन अवं एरो फल चाताई, जै तुशुशे फैइदेरे लेइ बडतो गाए। 18 मीं कां सब किछे, बल्के बडू जादे, जैन तुसेईं इपफ्रुदीतुसेरे हथ्ये भेजोरू थियूं, तैन मेलतां रज़ोरोई, तैन त खुशबू ते कबूल केरनेरे काबल बलिदाने, जैन परमेशरे पसंदे। 19 ते मेरो परमेशर भी अपने तैस धनेरे मुताबिक जैन महिमा सेइं यीशु मसीह मांए, तुशुशी हर अक ज़रूत पूरी केरेलो। 20 इशुशो परमेशर ते बाजी एरी महिमा हमेशा भोती राए। आमीन। (aiōn gl165) 21 हर अक पवित्र मैन्हु जै यीशु मसीह मांए तैस जो नमस्कार ज़ोथ। जै ढूला मीं साथीए तुसन नमस्कार ज़ोते। 22 सब पवित्र लोकन, खास केरतां जैना महाराजरे घरानेरेन तुसन नमस्कार ज़ोतन। 23 इशुशे प्रभु यीशु मसीहेरो अनुग्रह तुशुशी आत्माई सेइं साथी राए।

कुलुस्सियों

1 अवं पौलुस ई चिट्टी लिखने लोरोई, अवं परमेशरेरी मेर्जी सेइं मसीह यीशुएरो प्रेरित आई, ते विश्वासी दूला तीमुथियुस भी मीं साथी आए। 2 मसीह मां तैन पवित्र ते विश्वासी दूलां केरे नंवे जैना कुल्लुसे नगरे मां रातन। इश्शे बाजी परमेशरे तुसन अनुग्रह ते शान्ति देतो राए। 3 अस जैखन तुशुशे लेइ प्रार्थना केरतम त अपने प्रभु यीशु मसीहेरे बाजी, परमेशरेरु शुकुर केरतम। 4 किजोकि असेईं शुनोरुए, कि मसीह यीशु पुड़ तुशुशो विश्वासे, ते तुस सेबभी पवित्र लोकन सेइं तुस प्यार केरतथ। 5 तैस उमीद कियोरी चीजारे वजाई सेइं जै तुशुशे लेइ स्वर्ग मां रखोरीए, जेसेरे बारे मां तुसेईं तैस खुशखेबारे सच्चे वचने सेइं शुनोरुए, जै तुसन कां पुजोरोए। 6 ते जेन्चरे दुनियाई मां भी फल आनते, ते बद्धतो गाते; मतलब जैस दिहेड़ी करां देतू तुसेईं तै शुनु, ते सवैईं सेइं परमेशरेरो अनुग्रह पिशानो, तुसन मां भी एरू केरि बटते। 7 तैसेरी शिक्षा तुसेईं इश्शे ट्लारे मदतगर इपफ्रास करां हासिल की, जै इश्शे लेइ मसीहेरो वफादार सेवके। 8 तैने तुशुशे प्यारेरे बारे ज़ोवं जै होरि लोकां केरे लेइ आए, जै पवित्र आत्मा मांए तुसन दित्तोरोए। 9 एल्हेरेलेइ जैस दिहेड़ी करां इन शुनु, त असेईं हमेशा तुशुशे लेइ प्रार्थना की, कि परमेशरेरी आत्मा तुसन अक्ल ते मसझ दे जैस सेइं तुस तैसेरी मेर्जी पूरे तरीके सेइं सेमझी बटेले। 10 ताके तुस तेरही जिन्दगी जीथ जेरि प्रभुएरे लोकन ज़ोयोरी लोडे, ते तुस प्रभुए हर बत्तां खुश केरथ, ताके तुस लगातार हर किसमेरी भलाई केरते राथ, ते परमेशरेरी पिशानी मां बद्धते गाथ। 11 अवं प्रार्थना केरताई कि परमेशर अपनि महिमारे शेक्ते इस्तेमाल केरनेरे ज़िरिये तुसन मज़बूत केरे, ताके तुस आनन्दे ते सबरी सेइं दुख झैल्ली बटतथ। 12 बाजी परमेशरेरु शुकुर केरते राथ, जैने अस इस काबल बनाए कि स्वर्गेरे राज्जे मां तैसेरे अपने लोकन सेइं साथी विरासती मां हिसेदार भोम। 13 किजोकि तैने अस शैतानेरे राज्जे मरां छुटेइतां अपने ट्लारे मट्टेरे राज्जे मां आने 14 परमेशरेरे अपने मट्टेरे बलिदाने सेइं असन पापां केरि माफ़ी दित्ती (यानी शैतानेरे राज्जे करां आज़ाद किये)। 15 परमेशरे त कोई न लेई बटे, पन जैखन तैसेरू मट्टे मैनु बनु त तैनी परमेशर लोकन पुड़ बांदो कियो, जैन किछ परमेशरे बनावं तैस पुड़ तैस कां सेबभना जादे अधिकार आए। 16 किजोकि ई तै (मसीह) थियो जैने सब किछ बनानेरे वक्ते परमेशरे सेइं कम कियू, चाए अम्बरे पुड़ भोन या धेरती पुड़ भोन, लेवरी भोन या आलेई, कुन तखत भोन, या रियासतां, कुन हकौमतां भोन या अधिकार, सैरी चीज़ां तैस्से सेइं ते तैसेरेलेइ बनेइ। 17 ते मसीह सेबभी चीज़ां बनाने करां पेड़लो थियो, ते सब चीज़ां तैस मां बनोरी रैतिन। 18 तैए कलीसियारो प्रधाने जै तैसेरी जाने; तैए पेड़लोए ते मुड़न मरां ज़ीतो भोने बालन मरां पेड़लोए कि सेबभी गल्लन मां तैए प्रधान भोए। 19 किजोकि बाजी परमेशर इस्से मां खुश भोते कि मसीह मां तैसेरे सारे सुभाव वास केरतन। 20 परमेशरेरु फैसलो कियो कि अपने मट्टे भेजे, जैने अपनो खून बगाव ते कूसे पुड़ अपनि जान दित्ती। परमेशरे सेबभी चीज़न सेइं मेल मलाप केरनेरे लेइ एन कियू। एन्चरे तैनी मसीहेरे ज़िरिये सेइं सेबभी चीज़ां केरो मेल मिलाप एप्पू साथी कियो, चाए तैना धेरतरी भोन, चाए स्वर्गेरी भोन। 21 ते तुस जैना पेड़ले परमेशरे करां दूर थियो, ते बुरे कम्मां सेइं मने सेइं बैरी थी। 22 फिरी भी परमेशर अपने मट्टे यीशुएरे मैनु बन्ने सेइं ते कूसे पुड़ मौतरे जियरीए तुशुशो मेल कराव, ताके तुसन एप्पू कां पवित्र ते बे दाग ते बेइलज़ाम हज़ार केरे। 23 पन तुस मसीह पुड़ विश्वास केरनेरे मां बुनीयादेरे जेरे मज़बूत राथ, ते तैस खुशखेबारे उमीद पुड़ जै तुसेईं शुनोरी एन शारथ, जेसेरो प्रचार अम्बरे करां बुन सैरी स्रष्टि मां कियो जेव; ते जैस मां अवं पौलुस सेवक बनो। 24 हुनी अवं तैन दुखन सेइं खुश आई, जैना तुशुशे लेइ झैल्लताई, ते मसीहेरी दुखां केरि घटी तैसेरे जानारे लेइ, मतलब कलीसियारे लेइ, अपने जिसमे मां पूरी केरताई। 25 जेसेरो अवं परमेशरेरे इंतज़ामेरे मुताबिक सेवक बनो, जै तुशुशे लेइ मीं सोंफो, ताके अवं परमेशरेरु वचन पूरो-पूरो प्रचार केरि। 26 मतलब

तैस भेदे जै ज़माना ते पीड़न करां छप्पोरो थियो, पन हुनी तैसेरे तैन पवित्र लोकन पुड़ बांदो भोरोए। (aiōn g165) 27 जैन पुड़ परमेशरे बांदो केरनो चाव, कि तैन जान भोए होरि कौमन मां तैस भेदेरी महिमारी कीमत कुने ते ते ईए, कि मसीह जै महिमारी उमीदे तुसन मां रहते। 28 जेसेरो प्रचार केरतां अस हर एक्की मैनु ज़ोतम ते सारे ज़ाने सेइं हर एक्की मैनु शिखालतम, कि अस हर एक्की मैनु मसीह कां सिद्ध केरतां पेश केरम। 29 ते एल्हेरेलेइ अवं तैसेरी शेक्ते मुताबिक जै मीं मां शक्ति सेइं साथी अस्सर केरतीए तन मन लेइतां मेहनत भी केरतम।

2 अवं चाताई कि तुस ज़ानथ, कि तुशुशे ते तैन केरे जैना लौदीकिया नगरे मां आन, ते तैन सेबभी केरे लेइ जैनेई अवं नई लोरोई कि अवं केन्चरे मेहनत केरताई। 2 ताके तैन केरे मन्न मां शान्ति भोए ते तैना प्यारे सेइं एप्पू मांमेइं बनोरे रान, ते तैस पूरी समझरू धन हासिल केरन, बाजी परमेशरेरे भेदे मतलब मसीह पिशानन। 3 जैस मां समझरे ते ज़ानेरे सारे भण्डार छपोरेन। 4 इन अवं एल्हेरेलेइ ज़ोताई, कि कोई मैनु तुसन लालच देने बैली चीज़ी सेइं थोखो न दे। 5 किजोकि अवं अगर जिसमेरे लिहाजे सेइं दूराई, फिरी भी आत्मिक लिहाजे सेइं नेडो आई, ते तुशुशे रीति सेइं तुशुशी हालती ते तुशुशे विश्वासे जै मसीह यीशु मां मज़बूती हेरतां खुश भोव। 6 ते जेन्चरे तुसेईं मसीह यीशु अपनो प्रभु कबूल कियोरोए, तेन्चरे तैस मां चलते भी राथ। 7 ते तैस मां ज़ील छडते राथ ते बद्धते राथ; ते जेन्चरे तुस शिखालोरेथ तेन्चरे विश्वासे मां मज़बूत भोते गाथ, ते खूब शुकुर केरते राथ। 8 खबरदार राथ कि तुसन कोई तैसेरे ज़ाने ते थोखे सेइं शिकार न केरे, जैन मैनु केरू रुवाजेरू ते दुनियारी पेड़ली शिक्षारे मुताबिके पन मसीहेरे नई। 9 किजोकि तैस मां ईश्वरत्वैरी सारी भरपूरी जानी मां एइतां वास केरती। 10 ते तुस तैस मां धेरतेरथ जै सैरी हकौमती ते अधिकारोरी क़ोड़ी। 11 तैस्से मां तुशुशो एरो खतनो भोरोए, जै हाथेरो नई, मतलब मसीहेरोए खतनो, जैस सेइं तुशुशी पुरानी इन्सानयत अलग की गातीए। 12 ते तैस्से सेइं साथी बपतिस्मे मां दबे जे, ते तैस्से मां परमेशरेरी शक्ति पुड़ विश्वास केरतां, जैने ते मुड़न मरां ज़ीतो कियो, तुस भी तैस सेइं साथी ज़ीते कियो। 13 ते तैने तुस भी, जैना अपने पापन, ते अपने जिसमेरे खतनेरे हालती मां फटरे थी, तैस सेइं साथी ज़ीते भी केरे, ते इश्शे सब पाप माफ़ केरे। 14 ते विधि केरो ते लेख जै इश्शे नंवे पुड़ ते इश्शे खलाफ थियो मटाव; ते तैस कूसे पुड़ कील देइतां दूर केरो। 15 ते तैने प्रधान ते अधिकैरन हारेइतां तैन केरो खुल्लो मुखल्लो तमाशो बनावं ते कूसे सेइं जयजयकार भी केरू। 16 एल्हेरेलेइ खानू पीनु या तिहार या नर्वी चाँदनी, या आरामेरे दिहाड़ा केरे बारे मां तुशुशो कोई फैसलो न केरो। 17 किजोकि सब एजने बैली गल्लां केरि छावे, पन असली चीज़ां मसीहेरिन। 18 कोई मैनु दीनता ते स्वर्गदूतां केरि पूजा पसंद केरतां तुशुशी दौड़ेरे इनामे करां दूर न रखे। एरो मैनु लेवहरी गल्लां मां लग्गोरो रहते ते एपनी जिसमानी समझी पुड़ बेफैदो फुलते। 19 ते तैस क़ोड़ी टलेइतां न रखन जै मसीह आए ते जैस सेइं सारो जिसम जोड़न ते पठां केरे हफाज़ती सेइं ते एक्की सेइं साथी ज़ुइतां, परमेशरेरे तरफां बद्धतो गाते। 20 जैखन कि तुस मसीह सेइं साथी दुनियारे पेड़ली शिक्षाई सेइं मरोरेथ, त फिरी तैन केरे जेरे जैना दुनियाई मां जिन्दगी बीतातन मैनु केरे हुकम ते शिक्षा सेइं, 21 ते एरी शिक्षा मां किजो रातथ कि इस सेइं नई हुरुनु, एन नई खानू, ते तैस सेइं हथ नई लानो? 22 (किजोकि इना सब चीज़ां कम्मे मां आनते-आनते नाश भोइ गैली)। 23 इन गल्लन मां एपनी मेर्ज़री मुताबिक अपनि बनेवरी भक्ति सेइं, ते दीनता, ते जिसमानी कौशिश सेइं ज़ानेरू कम त आए, पन जिसमानी खुबेइशान रोक्ने मां इन सेइं किछ भी फैइदो न भोए।

3 ते जैखन तुस मसीह सेइं साथी ज़ीतो कियो, त स्वर्गेरे चीज़ां केरे तोपी मां राथ, जैडी मसीह मौजूदे ते परमेशरेरे देइने पासे बिशोरोए। 2 धेरतरे नई पन स्वर्गेरे चीज़न पुड़ ध्यान लाथ। 3 किजोकि तुस त मरे, ते तुशुशी जिन्दगी मसीह सेइं साथी परमेशरे मां छपोरूए। 4 जैखन मसीह जै इश्शे जिन्दगीए, बांदो भोलो, तेखन तुस भी तैस सेइं साथी महिमा साथी बांदे कियो गाले। 5

एल्हेरेलेइ अपने तैन अंगन मैरी देथ, जैना धरती पुड़ आन, मतलब बदमाशी, गन्दगी, बुरे खियाल, बुरी खुवैइश ते लालचे जैन मूर्ती पूजने बराबरे। 6 इन केरे वजाई सेइं परमेशरेरो क्रोध हुकम न मन्ने बालन पुड़ एइते। 7 ते तुस भी, जैखन इन बुरैइन मां जिन्दगी बीताते थी, त इन केरे मुताबिक चलते भी थी। 8 पन हुनी तुस भी इन सेबन मतलब क्रोध, सरक, बेर, तुहीन, गैई देनी इना सब गल्लां शारा। 9 एक्की होरि सेइं झूठ न जोथ किजोकि तुसेईं पुरानी इन्सानयत तैसेरे कम्मन समेत खोलोरीए। 10 ते नर्वीं इन्सानयत लोरीए जै अपने बनाने बालेरे रूपेरे मुताबिक ज्ञान हासिल केरनेरे लेइ नन्वी बनातीए। 11 तैस मां न कोई यूनानी राव, न यहूदी, न बगैर खतने बालो, न जंगली, न स्कूती, न गुलाम न आजाद, सिर्फ मसीह सब किछ ते सेबन मांए। 12 एल्हेरेलेइ परमेशरेरे चुनोरां केरे जेरे जैना पवित्र ते दलारेन, बड़ी, ते दूला, ते दीनता, ते नम्रता, ते बरदाशत धारण केरा। 13 ते अगर केन्ची, केन्ची पुड़ दोष लानेरी वजा भोए, त एक्की होरेरी झैल्ला, ते एक्की होरेरे पाप माफ़ केरा, जेन्चरे प्रभुए तुशे पाप माफ़ केरे, तेन्चरे तुस भी केरा। 14 इन सेबन करां बा प्यारे जै सेबन सिद्धतारो पटकोए बंधा। 15 ते मसीहेरी शान्ति जेसेरे लेइ तुस अक जान भोनेरे लेइ कुजेवरे भी आथ, तुशे दिलन मां राज़ केरे, ते तुस शुक्र केरते राथ। 16 मसीहेरे वचन अपने दिलन मां रोड़ेचारे बसने देथ; ते सारे ज्ञाने सेइं एक्की होरि शिखाला, ते नसीहत देथ, ते अपने-अपने मन्न मां अनुग्रहे साथी परमेशरेरे लेइ भजन ते स्तुति ते आत्मिक गीत जोते राथ। 17 ते वचन या कम जैन किछ भी केरा सब प्रभु यीशुएरे नन्वे सेइं, ते तैसेरे जिरिये बाजी परमेशरेरू शुक्र केरा। 18 हे कुआन्शव, जेन्चरे प्रभु मां जेइजे, तेन्चरे अपने-अपने मुन्शां केरे अधीन राथ। 19 हे मुन्शाव, एपनी-एपनी कुआन्शन सेइं प्यार रखा, ते तैन सेइं सखत बर्ताव न केरा। 20 हे बच्चाव, सेबभी गल्लन मां अपने-अपने अम्मा बाजी केरो हुकम मन्ना, किजोकि प्रभु इस सेइं खुश भोते। 21 हे बच्चन बालव, अपने बच्चन तंग न केरा, एरू न भोए कि तैन केरि हिम्मत न टलुटे। 22 हे सेवकाव, जैना जिसमेरे मुताबिक तुशे मालिकन, सेबभी गल्लन मां अपने मालिकां केरो हुकम मन्ना, मैनन् खुश केरनेरे बालां केरे जेरे हिरानेरे लेइ नईं, पन सच्चे मने सेइं ते परमेशरेरे डरे सेइं। 23 ते जैन किछ तुस केरतथ, तैन मने सेइं केरा, इन समझतां कि मैन्हु केरे लेइ नईं पन प्रभुएरे लेइ केरतथ। 24 किजोकि तुस ज्ञानतथ कि तुसन एसेरे बदले प्रभु करां बदले मां मीरास मैल्लनीए, तुस प्रभु यीशु मसीहेरी सेवा केरतथ। 25 किजोकि जै बुराई केरते, तैस एपनी बुरैइयो फल मैलनोए; तैड़ी केन्चरी तरफदारी नईं।

4 हे मालिकव, अपने-अपने गुलामन सेइं साथी इन्साफ ते ठीक-ठीक बर्ताव केरा, इन समझतां कि स्वर्गें मां तुशे भी अक मालिके। 2 प्रार्थना मां लग्गोरो राथ, ते शुक्र सेइं साथी हुशार राथ। 3 साथी इश्शे लेइ भी प्रार्थना केरते राथ, कि परमेशर इश्शे लेइ शुनानेरे लेइ एरी बत खोल्ले, कि अस मसीहेरे तैस भेदेरे बारे मां जोई बटम जेसेरे लेइ अवं कैदे मां आई। 4 ते तैस बांदो केरि, जेन्चरे मीं कियो लोडे। 5 वक्त कीमती सेमझतां बेइरन साथी सैमझदेरी सेइं बर्ताव केरा। 6 तुशे वचन सदा अनुग्रहे सेइं ते एरो लूनो भोए, कि तुसन हर एक्की मैन्हु रोड़ेचारे जुवाब देनो एज्जे। 7 दलारे दूलां ते वफादार सेवक, तुखिकुसे जै प्रभु मां मेरो मदतगार, तै मेरी सेबभी गल्लन मां तुसन जोलो। 8 तै मीं एल्हेरेलेइ तुसन कां भेजो, कि तुसन इश्शी हालतरो पतो भोए ते तै तुशे दिलन शान्ति दे। 9 ते तैस सेइं साथी उनेसिमस भी भेजो जै वफादार ते दलारो दूलाए ते तुसन मरांए, ते तुसन इडी तगर सैरी गल्लां जोले। 10 अरिस्तर्खुस जै मीं सेइं साथी कैदीए, ते मरकुस जै बरनबासेरो दूलाए लगते। (जेसेरे बारे मां तुसन हुकम मैल्लोरो थियो कि अगर तै तुसन कां एज्जे, त तैस सेइं रोड़ेचारे बर्ताव केरथ) 11 ते यीशु जै जो यूस्तुस ज़ोतन, तै तुसन नमस्कार ज़ोते। खतनो केरें लोकन मां सिर्फ ईए परमेशरेरे राज़े लेइ मदतगार ते मेरे शैनतरी वजा राए। 12 इपफ्रास जै तुसन मरांए, ते मसीह यीशुएरो दासे, तुसन जो नमस्कार ज़ोते ते सदा तुशे लेइ प्रार्थना केरते, ताके तुस सिद्ध भोइतां पूरे विश्वासे सेइं साथी परमेशरेरे मेजें

पुड़ मज़बूत राथ। 13 अवं तैसेरो गवाह आई, कि तै तुशे लेइ ते लौदीकिया ते हियरापुलिस बालां केरे लेइ बड़ी कोशिश केरतो रहते। 14 दलारे तबीब लूका ते देमासेरू तुसन नमस्कार। 15 लौदीकिया नगरेरे दूलान ते नुमफास ते तैन केरे घरेरे कलीसियान जो नमस्कार जोथ। 16 ते जैखन ई चिट्ठी तुशे इडी पढी गाए, त एरू केरनू कि लौदीकियारे कलीसिया मां भी पढी गाए, ते तै चिट्ठी जै लौदीकियारां एज्जे तैस तुस भी पेइथ। 17 फिरी अरखिप्पुसे सेइं जोइयथ कि जै सेवा प्रभु मां तीं सोंफी, तैस बड़े हुशेरी सेइं पूरी केरथ। 18 अवं पौलुस अपने हथ्थन सेइं नमस्कार लिखताई। मेरी शंगलन याद रखा; तुसन पुड़ अनुग्रह भोतो राए। आमीन।

1 थिस्सलुनीकियों

1 अवं पौलुस ई चिट्ठी लिखताई। सिलवानुस ते तीमुथियुस भी मीं सेईं साथी आन, थिस्सलुनीक नगरे कलीसियारे विश्वासी लोकन, जैना बाजी परमेशर ते प्रभु यीशु मसीह मां आन, तैन अनुग्रह ते शान्ति मैलती राए। 2 अस अपने प्रार्थनान मां तुसन याद केरतम, ते सदा तुशुशी सेइभी केरे लेइ परमेशररु शुक्र केरतम। 3 ते अपने बाजी परमेशररे सामने तुशुशां कम्मां, जैना तुस विश्वासेरे वजाई सेईं केरतथ, ते बड़ी मेहनतरां कम्मां जैन सेईं पतो चलते तुस होरन सेईं प्यार केरतथ, ते इशु प्रभु यीशु मसीहेरे वापस एजनेरे उमीदरे लेइ मुसीबतन मां सबर केरतथ, अस लगातार याद केरतम। 4 ते हे ढूलाव, ते परमेशररे टलारे लोकव, अस ज्ञानतम, कि तुस परमेशरे अपने लोक भोनेरे लेइ चुनोरेथ। 5 किजोकि यीशु मसीहेरे बारे मां खुशखबरी तुसन कां न सिर्फ लफसन मां पुजी बल्के पवित्र आत्मा रे शक्ति सेईं, ते बडे याकीने सेईं साथी पुजी, जेन्चरे तुस ज्ञानतथ, कि अस तुशुशे लेइ तुसन मां केरहे बनोरे थियो। 6 ते तुस बडे दुखे मां पवित्र आत्मा रे आनन्दे सेईं साथी वचने मेन्तां इशुशे ते प्रभुएरी चाल चलने लाए। 7 इडी तगर कि मकिदुनिया ते अखाया इलाकां केरे सेइभी विश्वासी लोकां केरे लेइ तुस अक नमूने बने। 8 किजोकि तुशुशे इट्टां न सिर्फ मकिदुनिया ते अखाया इलाकन मां प्रभुएरु वचन शुनावं, पन तुशुशे विश्वासेरी जै परमेशरे पुइ, हर ठेरी जैडी अस जे चर्चा फेलोरीए, कि असन तुशुशे बारे मां जोनेरी जरूरत नई। 9 किजोकि तैना एण्टू होरन जोतन कि जैखन अस तुसन कां आए त कुन भोवं। तुस मूरतन करां दूर भोइतां परमेशररे पासे फिरे, ताके जीते ते सच्चे परमेशररी सेवा केरथ, 10 ते तैसेरु मडू स्वर्गंरां वापस एजने बलगते राथ, जैन तैने मुड्डन मरां जीतो कियूं, मतलब यीशुए, जै असन एजनेबाले परमेशररे प्रकोपे करां बचाते।

2 हे ढूलाव, तुस एण्टू ज्ञानतथ कि इशुशु तुसन कां एजनु बैफेइदू न भोवं। 2 बल्के तुस एण्टू ज्ञानतथ, कि असेईं पेडले फिलिप्पी नगरे मां दुख झल्लने ते मुसीबत झल्लने पुइ भी इशुशे परमेशरे असन दिलेरी दिती, कि अस परमेशररो खुशखबरी बडी खलाफत भोते भी तुसन शुनाम। 3 किजोकि इशुशी शिक्षा न टपलाने सेईं ते न धोखे सेईं, ते न बुरे मकसदे सेईं आए। 4 पन जेन्चरे बनेइतरे अस इस काबल बनेइतां असन खुशखबरी सोफि, अस तेन्चरे बिद्यान केरतम, ते मैनुन नई, बल्के परमेशरे खुश केरनेरे लेइ शिक्षा देतम, जै इशुशे मन्न परखते। 5 तुस ज्ञानतथ, कि असेईं कधी चपलूसारी गल्लां नई कियोरी, ते न लालचरे लेइ बहानो केरते थी, परमेशर इस गल्लरो गवाहे। 6 ते असन मसीहेरे प्रेरित भोनेरे वजाई सेईं तुसन करां मदत नेनेरो अधिकार थियो। फिर भी अस मैनुन करां आदर न थिये चाते, ते न तुसन करां, न होरि कोन्ची करां। 7 पन जेन्चरे अम्मा अपने मट्टां केरि हेरगेश केरतीए, तेन्चरे असेईं भी तुसन मां रेइतां नरमी हिराई। 8 ते तेन्चरे अस तुशुशु लालच केरते, न सिर्फ परमेशररी खुशखबरी, पन अपने-अपने प्राण भी तुसन देनेरे लेइ तियार थिये, एल्हेरेलेइ तुस इशुशे बडे टलारे भोइ जोरे थियो। 9 किजोकि, हे ढूलाव, तुस इशुशी मेहनत ते कथे याद रखतथ, कि असेईं एल्हेरेलेइ रात दिहैडी कारोबार केरतां तुसन मां परमेशररी खुशखबरी प्रचार की, कि तुसन मरां कोन्ची पुइ भार न भोए। 10 तुस एण्टू गवाह आथ, ते परमेशर भी गवाहे, कि तुसन जैना विश्वास केरतथ, अस केरी पवित्रता, ते धार्मिकता ते बेइलजामे सेईं राए। 11 तुसन पतोए, कि जेन्चरे बाजी अपने बचन सेईं बतावं केरते, तेन्चरे अस भी तुसन मरां हर केन्ची शिक्षा देते, ते दिलासो देते, ते समझते थियो। 12 कि तुस एरी जिन्दगी जीथ जैस सेईं परमेशर खुश भोए, जै तुसन अपने राज्जे ते महिमा मां कुजाते। 13 अस भी परमेशररु शुक्र लगातार केरतम, कि जैखन इशुशे जिरिये परमेशररी खुशखबरी तुसन कां पुजी जै असेईं प्रचार की, त तुसेईं तै मैनु केरि नई, बल्के परमेशररु वचन सेमझतां (ते सच्चे इन परमेशररु वचन आए) कबूल की, ते तै वचन तुसन मां जैना मसीह पुइ विश्वास केरतथ कम केरते। 14 एल्हेरेलेइ तुस, हे ढूलाव, परमेशररी तैन कलीसियां केरि जेरि चाल चलने

लाए, जैना यहूदिया मां यीशु मसीह मां आन, किजोकि तुसन भी अपने लोकन करां एरो दुःख मैल्लो, जेन्चरे तैन यहूदन करां मैल्लोरो थियो। 15 जैनेईं प्रभु यीशु ते नबी भी मारे, ते अस सताए, ते परमेशर तैन सेईं खुश नई, ते तैना सेइभी मैनु केरि खलाफत केरतन। 16 ते तैना गैर कौमन सेईं तैन केरे मुक्तेरे लेइ गल्लां केरने लेइ असन रोकतन। तैना पापे पुइ पाप केरतन जांतगर परमेशर तैन सज्ञा न दे, ते हुनी परमेशरे तैन पक्को सज्ञा देनेबालोए। 17 हे ढूलाव, जैखन अस थोडे चिरेरे लेइ मने मां नई बल्के बांटे मां तुसन करां अलग भोरे थी, ते असेईं बडे लालचरे सेईं तुसन हेरनेरी बडी जादे कोशिश की। 18 एल्हेरेलेइ (मतलब मीं पौलुसे) एककी बार नई बल्के बार-बार तुसन कां एजनु चाव, पन शैतान अस तुसन कां एजनेरे लेइ रोके। 19 भला इशुशी उमीद, या आनन्द, या बडीयैयक ताज कौन आए? इन तुस भोले जैखन प्रभु यीशु वापस एज्जेलो 20 इशुशी बड़याई ते आनन्द तुस आथ।

3 एल्हेरेलेइ जैखन असेईं जादे न बेलगी बटु त असेईं इन ठहराव कि अस एथेंस नगरे मां अकैल्ले रेइ गाम। 2 ते असेईं तीमुथियुस जै मसीहेरे खुशखबरी मां इशुशे ढूलाए, ते परमेशररो सेवके, एल्हेरेलेइ तुसन कां भेजो, कि तै तुसन विश्वासे मां मजबूत केरे ते तुशुशी हिम्मत बधाए। 3 कि कोई इन दुखां केरे वजाई सेईं न घबराए, किजोकि तुस एण्टू रोडे चारे ज्ञानतथ परमेशररु फैसलो कियोरोए, कि अस सताए गाने। 4 किजोकि पेडले भी, जैखन अस तुसन कां थिये, त तुसन सेईं जोते थी, कि अस सताए गाने, ते तुस ज्ञानतथ एरु भोवं भी। 5 एल्हेरेलेइ जैखन मीं करां होरु न बेलगोव, त तुशुशे विश्वासेरो हाल जान्नेरे लेइ तीमुथियुस भेजो, किजोकि अवं डरों थियो कि एरु न भोए, कि अजमाने बाले (शैताने) तुस अजमाए त न, कि इशुशी मेहनत बेकार त न भोइ। 6 पन तीमुथियुसे जै तुसन करां इशुशे इडी अव, ते तुशुशे विश्वासेरे ते प्याररे बारे मां खुशखबरी शुनाई। ते ई गल भी शुनाई, कि तुस सदा प्यारे सेईं असन याद केरतथ, ते असन हेरनेरी इच्छा रखतथ, जेन्चरे अस भी तुसन हेरनेरी इच्छा रखतम। 7 एल्हेरेलेइ हे ढूलाव, अपनी सारी तंगी, ते मुसीबतन मां तुशुशे विश्वासे सेईं असन शान्ति मैल्ली। 8 तुशुशो प्रभु पुइ मजबूत विश्वासे इशुशे लेइ अक नव्वे जिन्दगरे साँसेरो जेरोए। 9 ते जेरो आनन्द असन तुशुशे वजाई सेईं अपने परमेशररे सामने, तैसेरे बदले मां अस कोस तरीके सेईं परमेशररु शुक्र केरम! 10 अस रात दिहाडी बडी प्रार्थना केरते रातम, कि तुसन सेईं दुबारां मिलम, ते तुशुशी मदत केरम कि तुस होरि जादे मजबूती सेईं प्रभु यीशु पुइ विश्वास केरथ। 11 ते अस प्रार्थना केरतम कि इशुशो बाजी परमेशर ते इशुशे प्रभु यीशु, बत खोल्ले कि अस तुसन कां एज्जी बटम। 12 ते प्रभु एरु केरे, कि जेन्चरे अस तुसन सेईं प्यार केरतम; तेन्चरे तुशुशो प्यार एण्टू मांमेइं, ते सेइभी मैनुन सेईं बधे, ते तरक्की केरतो राए। 13 ताके तै तुशुशे मन्न मजबूत केरे, कि जैखन इशुशो प्रभु यीशु अपने सब पवित्र लोकन सेईं साथी एज्जे, त तै इशुशे बाजी परमेशररे सामने तुशुशे मन्न पवित्रता मां बेइलजाम ठहरालो।

4 आखर, हे ढूलाव अस तुसन कां बिनती केरतम, ते तुसन प्रभु यीशु मां समझातम, कि जेन्चरे तुसेईं इशुशो जेरो चाल चलन रखवो, ते परमेशररु खुश केरने शिखोरोए, ते जेन्चरे तुस चलतथ भी, तेन्चरे तुस अग्रोवं बढ़ते राथ। 2 किजोकि तुस ज्ञानतथ, कि इना हदायतां असन प्रभु यीशु करां मैलोरीन। 3 परमेशर चाते, कि तुस पवित्र बना, मतलब बदमाशी केरने करां बचोरे राथ। 4 ते तुसन मरां हर केन्चे ज्ञाने लोडे कि केन्चरां अपने कुआन्शी सेईं पवित्रता ते आदरी सेईं जिन्दगी जीयोरी लोडे। 5 ते इन कम खुबैइशी सेईं नई, ते न गैर कौमां केरे जेरे, जैना परमेशर न पिशानन। 6 कि इस गल्लो मां कोई अपने विश्वासी ढूलाए न ठगे, ते न तैस पुइ हकोमत चलाए; किजोकि प्रभु इन सब गल्लां केरि सज्ञा देलो, जेन्चरे कि असेईं पेडलू तुसन सेईं जोरु थियूं, ते खबरदारी भी दितीरी थी। 7 किजोकि परमेशर अस अशुद्ध जिन्दगी जीनेरे लेइ नई, पन पवित्र जिन्दगी जीनेरे लेइ कुजवरेम। 8 एल्हेरेलेइ जै कोई इना हदायतां केरो इन्कार केरते, तै मैनु केरो नई, पन परमेशररो इन्कार केरते, जै अपनी पवित्र आत्मा तुसन देते। 9 पन विश्वासी

भाईचारे प्यारे बारे मां तुसन किछ लिखनेरी ज़रूरत नई, एप्पू मामेंड प्यार रखनो तुसेई परमेशरे करां एप्पू शिखोरोए। 10 ते सारे मकिदुनिया इलाकेरे सेबभी ढलान सेईं साथी एरू केरतथ भी, पन हे ढलाव, अस तुसन कां छन्दे केरतम कि होरे भी बढ़ते गाथा। 11 ते जेन्चरे असेईं तुसन हुक्म दितो, तेन्चरे तुस होरन सेईं लड़ाई न केरा, ते अपनू कम केरा त कने अपने लेइ कमाई केरा। 12 ते एन्चरां तैना भी तुशशी आदर केरेले जैना विश्वासी नई, ते तुसन कोन्ची चीजोरो घाटो न भोलो। 13 हे ढलाव, अस न चातम, कि तुस तैन केरे बारे मां अनजान राथ जैना विश्वासी मरन अनजान राथ, एरू न भोए, कि तुस होरि केरे जेरे शोग केरथ, जैन मरनेरां पत्ती उमीद नई। 14 किजोकि अगर अस विश्वास केरतम, कि यीशु मरो, ते ज़ीतो भोव, त तेन्चरे परमेशर तैन भी जैना यीशु पुड़ विश्वास केरतां मरे, परमेशर तैन भी यीशु सेईं साथी वापस आनेलो। 15 किजोकि अस प्रभु यीशुएरे वचनेरे मुताबिक तुसन सेईं इन जोतम, कि अस जैना ज़ीतम, ते प्रभुएरे वापस एजने तगर बंचोरे रामेले, त जैना विश्वासी मरोरन पेइले तैस सेईं मिलमेले, फिरी अस मिलमेले। 16 किजोकि प्रभु यीशु एप्पू स्वर्गोरां एज्जेलो; ते ज़ोरे सेईं हुक्म देलो, तैस वक्ते प्रधान दूतेरी आवाज शुनोली, ते परमेशरेरी महिमारो नइशिनगो बजो गालो, ते जैना मसीह पुड़ विश्वास केरनेबाले मां मरन, तैना पेइले ज़ीते भोनेन। 17 तैखन अस जैना ज़ीते बंचोरे रहमेले, ते तैन सेईं साथी बिदलारी पुड़ नियो गानेम, कि अम्बरे मां प्रभु सेईं मिलमेले, ते तेइसेरां बाद अस सदा प्रभु सेईं साथी रानेम। 18 एल्हेरेलेइ इन्ने गल्लन सेईं एक्की होरि तस्सली देते राथ।

5 हे ढलाव ते बेइनव, इसेरी ज़रूरत नई, कि वक्तन ते कालां केरे बारे जेइस प्रभु यीशु वापस एज्जेलो तुसन किछ लिखू गाए। 2 किजोकि तुस एप्पू रोडे चारे ज्ञानतथ, ते जेन्चरे चोर राती एइते, तेन्चरे प्रभुएरू दुबारां एजनू भोलू। 3 जैखन लोक ज़ोले, “कि शान्तिए, ते कोई डर नई,” त तैन पुड़ अकदम विनाश एजनोए, जेन्चरे दोर्जीती पुड़ तकलीफ; ते तैना तैस मुसीबती करां न बचैले। 4 पन हे ढलाव ते बेइनव, तुस त (आत्मिक) आंधरे मां नई, कि तै दिहाड़ी पुसन पुड़ चोरेरी जेरे एज्जे। 5 किजोकि तुस सब लोअरे बच्चे आथ, ते दीसारे बच्चे आथ, अस न रातेरम, न आंधारेरम। 6 एल्हेरेलेइ अस होरि केरे जेरे झूलोरे न रहम, पन बींझे रहम ते हुशार रहम। 7 किजोकि जैना झूलोरे रातन, तैना राती झूलतन, ते जैना नशे मां रातन, तैना राती नशे मां भोतन। 8 पन अस त दीसेरेम, विश्वास ते प्यार लेइतां कि इशशी हिफाज़त भोए जेन्चरे झिलम सिपाहेरी हिफाज़त केरतीए, ते मुक्करे उमीद लेइतां जेन्चरे सिपाही टोप लाते, खबरदार रहम। 9 किजोकि परमेशरे अस सज़ारे ते क्रोधेरे लेइ नई, पन एल्हेरेलेइ चुनोरेम कि अस अपने प्रभु यीशु मसीहेरे ज़िरिये सेईं मुक्ति हासिल केरम। 10 यीशु मसीह इशशे लेइ एल्हेरेलेइ मरो, कि अस चाए बींझे भोम, या झूलोरे भोम, सब मिलतां तैस सेईं साथी ज़ीम। 11 एल्हेरेलेइ एक्की होरि हिम्मत देथ, ते एक्की होरेरी तरक्की भोनेरी ज़िरियो बना, लगातार, तुस एरू केरतथ भी। 12 ते ढलाव, अस तुसन सेईं बिनती केरतम, कि जैना तुशशे लेइ बड़ी मेहनत केरतन, ते प्रभु मां तुशशी अगवाई केरनेबाले आम, ते जैना तुसन सलाह देतन, तैन केरि आदर केरा। 13 ते जैना कम्मां तैनेईं तुशशे लेइ किय्यां तैन केरे वजाईं सेईं तैन केरि आदर ते तैन सेईं बड़ो प्यार केरा, ते एप्पू मामेंड मेल मालपे सेईं राथ। 14 हे ढलाव ते बेइनव, अस तुसन कां मिनत केरतम, कि जैना आलसी आन, तैन खबरदार केरा, जैन केरि हिम्मत घटे तैन हिम्मत देथ, तैन केरि मदत केरा जैना (आत्मिकता) मां कमज़ोरन, सेबभी केरे लेइ बरदाशत केरनू हिराथा। 15 इस गल्लारू ध्यान रख्खा, कि कोई कोन्ची सेईं बुरीयीयेरे बदले बुराईं न केरे, पन सदा भलाई केरनेरे लेइ तियार राथ, एप्पू मामेंड ते सेबभन सेईं भी भलाई केरनेरी कोशिश केरा। 16 सदा खुश राथ। 17 लगातार प्रार्थना केरते राथ। 18 हर हाले मां शुक्र केरा, किजोकि तुशशे लेइ मसीह यीशु मां परमेशरेरी ईए मर्जीए। 19 पवित्र आत्मारो कम्मन जैना लोकां केरे ज़िन्दगी मां भोतन तैन न रोका। 20 भविष्यवैनी केरो इन्कार न केरा। 21 सब गल्लां परखा, जैना रोड़ी भोन तैन अपनाथ। 22 सेबभी किसमेरी

बुरेईं करां बंचोरे राथ। 23 शान्ति देनेबालो परमेशरे एप्पू तुसन पूरे तरीके सेईं पवित्र केरे; ते तुशशी आत्मा ते प्राण ते जिसम इशशे प्रभु यीशु मसीहेरे दुबारां एजने तगर पूरे, ते बेइलजाम ते सुरक्षित रान। 24 तुशशो कुजाने बालो वफादारे, तै एरू केरेलो। 25 हे ढलाव, इशशे लेइ प्रार्थना केरा। 26 सेबभी विश्वासी ढलान मसीहेरे प्यारे सेईं नमस्कार केरा। 27 अवं तुसन प्रभुएरी कसम देताई, कि ई चिट्ठी सेबभी विश्वासी ढलान पेइतां शुनाई गाए। 28 इशशे प्रभु यीशु मसीहेरो अनुग्रह तुसन पुड़ भोतो राए।

2 थिस्सलुनीकियों

1 अवं पौलुस ई चिट्ठी लिखने लोरोई। सिलवानुस ते तीमुथियुस भी मीं सेईं साथी आन। थिस्सलुनीक नगरे कलीसियारे विश्वासी लोकन, जैना बाजी परमेशर ते प्रभु यीशु मसीह मां आन, 2 अस प्रार्थना केरतम कि इश्शे बाजी परमेशर ते प्रभु यीशु मसीह तुसन अनुग्रह ते शान्ति दे। 3 हे ढूलाव ते बेडनव, तुश्शे बारे मां असेईं हर वक्त परमेशररू शुक्र कियेरू लोड़े, ते इन इश्शे लेइ ठीक भी आए। एल्हेरेलेइ कि तुश्शो यीशु मसीह पुड़ विश्वास बड़ो बढ्दतो गाते, त कने तुश्शो एककी होरि सेईं प्यार केरनो भी बड़ी बढ्दने लोरोए। 4 ई वजा आए, कि अस एप्पू परमेशररे कलीसियान मां, तुश्शे बारे मां घमण्ड केरतम, चाए तुसन पुड़ मुसीबत या दुःख भी एज्जन, फिरी भी तुस सबरी सेईं झैलतथ, ते तुस यीशु मसीह पुड़ विश्वास केरते रातथ। 5 परमेशर अपनो इन्साफ हिरानेरे लेइ ई स्ताव इस्तेमाल केरेलो, कि तुस परमेशररे राज्जेरे काबल भोथ, जेसेरे लेइ तुस दुःख भी झैलतथ। 6 परमेशर हमेशा ठीक तरीके सेईं इन्साफ केरते, कि जैना तुसन दुःख देतन, तैन बदले मां दुःख दे। 7 तुस जैना दुःख झैलतथ, परमेशर तुसन आराम देलो ते असन भी। इन तेइस भोलू जेइस प्रभु यीशु अपने शक्तिबाले स्वर्गदूतन सेईं साथी बेलति अगारे लप्पी सेईं साथी स्वर्गों एज्जेलो। 8 ते जैना लोक परमेशररे न पिशानन त कने इश्शे प्रभु यीशुएरे खुशखबरी न मन्न, तैन तै सजा देलो। 9 तैना प्रभुए करां हमेशारे लेइ अलग भोले, ते तैसेरे महान शेक्ते हिस्सेदार न भोले। ते तैन हमेशारी सजा देइतां नाश केरेलो। (aiōnios g166) 10 इना गल्लां तेइस भोली जेइस यीशु अपने लोकन करां आदर हासिल केरनेरे लेइ वापस एज्जेलो, ते जैना लोक कने पुड़ विश्वास केरतन तैना हेरान भोले। तुस भी तेन्ने लोकन मरं भोले, किजोकि जे सन्देश असेईं तैसेरे बारे मां तुसन शुनव तुसेईं तैस पुड़ विश्वास कियो। 11 एल्हेरेलेइ अस लगातार तुश्शे लेइ प्रार्थना भी केरतम, कि परमेशर तुसन इस काबल बनाए, जेरि जिन्दगी जीनेरे लेइ तुस कुजवरे तेन्चरे तुस ज़ीथ। ते तै तुसन अपने शेक्ति सेईं इस काबल बनालो कि तुस जैना रोड़ु केरथ ते जैन तुस केरनू चाथ, ते जैन कम तुस अपने विश्वासे सेईं केरतथ पूरू केरथ। 12 एन्चरे इश्शे प्रभु यीशु मसीहरे नंवेरी तुश्शे ज़िरिये बडीयाईं भोली। ते तैसेरे ज़िरिये तुसन आदर मैलेली। इन सब किछ इश्शे परमेशर त कने प्रभु यीशु मसीहरे अनुग्रहे सेईं भोलू।

2 हे ढूलाव ते बेडनव, असन कां प्रभु यीशु मसीहरे वापस एजनेरे बारे मां ज़ोनेरे लेइ किछ आए। तै वक्त एज्जेलो जेइस अस तैस सेईं साथी मिलमेलो। 2 इन सोचतां तुस परेशान न भोथ या तुश्शो दिल न घबराए कि प्रभुएरी दिहाड़ी पेड़ली ओरिए। किछ जोई बटन कि इन भविष्यवाणी मां या सन्देशे मां या चिट्ठी मां तैन कां ओरू थियूं। 3 लोक जैना इस बारे मां झूठी गल्लां ज़ोतन तैन पुड़ विश्वास न केरा। किजोकि यीशु मसीहरे वापस एजनेरे पेड़ले, तै वक्त एज्जेलो जेइस बड़े लोक परमेशररे खलाफ भोले, ते फिरी अधर्मी मैन्हु बांदो भोलो। तै, तै आए जै नाश भोनेरे लेइ ठहरावरोए। 4 तै अधर्मी मैन्हु परमेशररी खलाफत केरेलो, ते तैन सब किछ जैन लोक देबते सेमझतां आराधना केरतन, ते इन ज़ोली ई अवं इन सेभन करां महान आईं। इड़ी तगर कि तै परमेशररे मन्दरे मां बिश्तां अपनो आपे जो परमेशर ज़ोलो। 5 इन न बिसरा, कि मीं बड़े बार इन गल्लां केरे बारे मां ज़ोरूए, ज़ैखन अवं तुसन सेईं साथी थियो। 6 हुन्ना तै अधर्मी मैन्हु बांदो नईं भोरो किजोकि कोई आए ज़ैने तै रोकोरोए, कि तै अपने वक्ते पुड़ बांदो भोए। 7 किजोकि अधर्मी चीज़ां केरि शक्ति इस दुनियाईं मां पेड़ली छेपतां कम केरने लोरीए, पन अक आए ज़ै तैस रोकोते। ते तै तैस रोकोतो रालो ज़ां तगर तै दूर न कियो गाए। 8 तैज्ठां बाद तै दुष्ट मैन्हु एज्जेलो, पन बांदे मां ज़ैखन प्रभु यीशु एज्जेलो, त तैस दुष्ट मैन्हु अपने ऐशेरे फुकी सेईं ते एजनेरी महिमाईं सेईं मारलेलो। 9 तै दुष्ट मैन्हु, शैतानेरे शेक्ति सेईं एज्जेलो। तै हर किसमेरे झूठे चमत्कार ते निशान, ते बडां-बडां कम्मां केरेलो, ताके लोक सोचन कि ते परमेशर ज़ै एन

केरते। 10 ते तै हर किसमेरां बुरां कम्मां केरेलो, ते तैन धोखो देलो जैना परमेशर नाश केरनेन। किजोकि तैनेईं तैस सच्चे पुड़ विश्वास केरने करां इन्कार कियो, जैस सेईं तैन मुक्ति मैलेली। 11 एल्हेरेलेइ परमेशर तैन मां अक धोखो देनेबाली आत्मा भेजेलो जै तैन सच्चे करां दूर केरेली, ताके तैना झूठे पुड़ विश्वास केरन जैन तै दुष्ट मैन्हु तैन सेईं ज़ोलो। 12 परमेशर तैन सेभनी लोकन सजा देलो जैनेईं यीशु मसीहरे सच्चे सन्देशे पुड़ विश्वास न कियो, पन पाप केरने सेईं खुश भोए। 13 हे ढूलाव ते बेडनव, असेईं तुश्शे लेइ परमेशररू शुक्र कियेरू लोड़े। किजोकि परमेशर तुसन सेईं प्यार केरते, तेने तुस दुनिया बनाने करां पेड़ले चुने, कि पवित्र आत्मार पवित्र बनाते, ते यीशु मसीहरे बारे मां जै सच्चे सन्देशे तैस पुड़ विश्वास केरतां परमेशर तुसन मुक्ति दे। 14 जै खुशखबरी असेईं प्रचार की परमेशररे ते इस्तेमाल की, कि तुसन बचानेरे लेइ कुजाए, तुस इश्शे प्रभु यीशु मसीहरी महिमाईं मां शामिल भोथ। 15 एल्हेरेलेइ, ढूलाव ते बेडनव, जै शिक्षा असेईं तुसन दिती, ज़ैखन असेईं तुसन सेईं गल्लां की त कने चिट्ठी केरे ज़िरिये, तैस पुड़ तुस लगातार विश्वास केरते राथ। 16 अस प्रार्थना केरतम इश्शो प्रभु यीशु मसीह एप्पू, ते इश्शो बाजी परमेशर जैने असन सेईं प्यार कियो, ते जैने अपने अनुग्रहे सेईं असन हमेशारो होसलो ते पक्की उमीद दिती, (aiōnios g166) 17 तैना तुसन होसलो देन, ते तुसन मजबूत केरन ताके तुस लगातार भलाई केरथ ते जैन जोथ तैन रोड़ु भोए।

3 आखरी मां हे ढूलाव ते बेडनव, इश्शे लेइ प्रार्थना केरते राथ, कि अस प्रभु यीशुएरू वचन होरि भी बड़े ठैरन शुनेईं बटम, ते जैना शुन्न त तैना तेन्चरे मनन जेन्चरे तुसेईं मन्नु। 2 ते ई भी प्रार्थना केरा कि परमेशर असन बुरे ते दुष्ट लोकां केरे ज़िरिये नुकसान पुजाने करां बचेइतां रखवे, किजोकि बड़े लोक जैनेईं प्रभु यीशुएरी खुशखबरी शुनी, ते तैनेईं इस पुड़ विश्वास न कियो। 3 पन तुस प्रभु पुड़ पूरो भरोसो केरि बटतथ, तैए तुसन मजबूत केरेलो, ते दुष्टे करां यानी शैताने करां बचालो, ताके तै तुसन कोई नुकसान न पुजेईं बटे। 4 ते असन प्रभु मां तुसन पुड़ भरोसोए, कि जैन किछ असेईं तुसन केरनेरे लेइ ज़ोरूए, तुस तेन्चरे केरते ओरथ ते एजनेबाले वक्ते मां केरते राले। 5 अस प्रार्थना केरतम, कि प्रभु यीशु मसीह तुसन इन समझनेरे काबल बनाए कि परमेशर तुस सेईं केत्रो प्यार केरते, ते बरदाश केरा जेन्चरे मसीहे बरदाश कियूं। 6 हे ढूलाव ते बेडनव, अस प्रभु यीशु मसीहरे दित्तोरे अधिकार सेईं तुसन ई हुक्म देतम, कि तुसन मरां हर कोई एरे ढूलान ते बेडनव सेईं साथ न रखवे, जैना आलसी आन त कने जै शिक्षा असेईं तुसन दिती तैस न मन्न। 7 किजोकि तुस एप्पू रोड़े चारे ज्ञानतथ, कि तुसेईं तेन्चरे जिन्दगी ज़ीयोरी लोड़े जेन्चरे असेईं ज़ी, ज़ैखन अस तुसन सेईं साथी थियो, अस आलसी न थियो पन कम केरते थियो। 8 असेईं कोन्चेरी रोटी मुफ्त न खाइ, पन अस मेहनत ते कष्टे सेईं रात दिहेड़ी कारोबार केरते थियो, कि अस अपने ज़रूरतां केरे लेइ तुसन पुड़ निर्भर न भोम। 9 असेईं बड़ी मेहनत की, एल्हेरेलेइ नईं कि असन अधिकार नईं, कि तुसन हुक्म देम कि तुस इश्शी ज़रूरतां पूरी केरा। पन एल्हेरेलेइ कि असेईं अपनो आप तुश्शे लेइ मिसाल बनाईं ताके तुस इश्शे जेरि जिन्दगी ज़ीथ। 10 ज़ैखन अस तुसन सेईं साथी थियो तेखन असेईं तुसन हुक्म दित्तोरो थियो, कि आर कोई कम केरने करां इन्कार केरे त तैस रोटी भी न देथ। 11 इश्शे शुन्ने मां ओरू आए कि तुसन मां बड़े लोक एरे आन जैना आलसी जिन्दगी ज़ीतन। तैना एप्पू कम न केरन, पन होरि केरे कम्मन मां दखल देतन। 12 एरे लोकन अस प्रभु यीशु मसीहरे दित्तोरे अधिकारे सेईं हुक्म देतम ते समझातम, कि चुपचाप कम केरतां अपनि जिन्दगी जीनेरे लेइ कमाईं केरन। 13 ते तुस, ढूलाव ते बेडनव, भलाई केरने मां हिम्मत न हारा। 14 अगर कोई इश्शी इस चिट्ठे सन्देशे न मन्ने, त सेभनी केरे सामने तैसेरी पिशान केरा, ते तैस सेईं साथ न रखवा, ताके तै छिथोए; 15 फिरी भी तैस सेईं दुश्मनेरो ज़ेरो बर्ताव न केरा, पन तैस सेईं विश्वासी सैथेरो ज़ेरो बर्ताव केरतां तैस खबददार केरा, कि ज़ेरू तैने कियूं तैन न केरे। 16 हुनी अवं प्रार्थना केरताईं प्रभु जै शान्ति देनेबालोए, तुसन हर

वक्तु हर किसमे सेइं शान्ति देतो राए, ते प्रभु लगातार तुसन सेब्भन सेइं साथी भोए। 17 अवं पौलुस अपने हथ्थे सेइं नमस्कार लिखताई, इन मेरू सबूते, अवं चिट्ठी केरे आखरी मां एन्चरे लिखताई, ताके हर एक्की पतो ब्रले कि ई चिट्ठी मेरे तरफां आए। 18 इश्शे प्रभु यीशु मसीहेरो अनुग्रह तुसन सेब्भन पुड़ भोतो राए।

1 तीमथियुस

1 अवं पौलुस ई चिट्ठी लिखने लोरोई। अवं इशशे मुक्ति देनेबाले परमेशरे ते यीशु मसीहेरे अधिकारे सेइं प्रेरित आई, जैस पुड़ इशशी उमीदे। 2 अवं ई चिट्ठी तीमथियुसे जो लिखने लोरोई। हे तीमथियुस तू मेरे मट्टे जेरू आस, किजोकि जेन्चरे अवं विश्वास केरताई तेन्चरे तू भी विश्वास केरतस। अवं प्रार्थना केरताई इशशे बाजी परमेशर ते प्रभु यीशु मसीह तीं अनुग्रह, दया त कने शान्ति देतो राए। 3 हे तीमथियुस जेन्चरे तू ज्ञानतस, इफिसुस नगरे मां किछ एरे लोक आन जैना गलत शिक्षा देतन। तैना लगातार झूठी कहैनी शिखालतन ते पूर्वजां केरे नव्यां केरे बारे मां शिखालतन। जैखन अवं इफिसुस नगरेअं मकिदूनिया इलाके जो गानेरे लेइ तियार थियो, त मीं तीं जोरू थियुं कि इफिसुस नगरे मां रा ते तैन जो, कि एरी जेरि शिक्षा न देतन, जैखन तैना एरी जेरि शिक्षा देतन त लोक तैन केरे बारे मां बेंस केरतन। नितीजो ई आए, जैन कम परमेशरे दितोरूए, शिखालनेबाले तैन नई लौ केरने जैन सिर्फ परमेशरे पुड़ रेखातां भोइ सकते। 5 मेरो हुक्म देनेरो मकसद ई आए, कि तुस एककी होरि सेइं साफ दिले ते रोडे ज़मीरे, ते सच्चे विश्वासे सेइं प्यार केरा। 6 झूठी शिक्षा देनेबालेई इन सैरी गल्लां केरनि बंद की ते सिर्फ बेकार बेंस केरतन। 7 ते शास्त्री बन्नू चातन, पन जैना गल्लां तैना होरन शिखालतन ते जैन केरो दावो केरतन तैन एण्णू भी न समझन। 8 अस ज्ञानतम, कि अगर लोक मूसेरे कानुने सही तरीके सेइं शिखालन त तैन रोडू आए। 9 तुस ज्ञानतथ मूसेरो कानून धर्मां मैनेरे लेइ नई। पन तैन केरे लेइ आए, जैना परमेशरे कानूनरो इन्कार केरन ते तैस न मनन, ते जैना परमेशरेरी आराधना न केरन ते जैना लगातार पाप केरतन, ते जैना अशुद्ध आन, ते परमेशरेरी आदर न केरन, ते जैना अपने अम्मा बाजी ते होरि केरे कातलिन। 10 ते कने बदमाशी केरनेबालां, मडद मडदन सेइं जिसमानी रिशतो रखनेबालां, नौकर बेचबालां, झूठ जोने बालां, ते झूठी कसम खाने बालां, ते इन केरे अलावा रोड़ी शिक्षारी खलाफ कम केरनेबालां केरे लेइ आए। 11 ई शिक्षा महान परमेशरेरी महिमारे खुशखेबारे मुताबिके, ई परमेशरे मीं होरन शनानेरे लेइ दितोरीए। 12 अवं अपने प्रभु मसीह यीशुएरू शुक केरताई जैने मीं शक्ति दिती, तैने अवं वफादार सेमझतां मीं अपनि सेवा दिती। 13 विश्वासी बन्ने करां पेड़लो अवं यीशुएरे बारे मां तुहीन केरनेबालो ते विश्वासी लोकन सताने बालो, ते तैन नुकसान पुजाने बालो थियो। पन परमेशरे मीं पुड़ अपनि दया हिराई, किजोकि मीं हेजु यीशु पुड़ विश्वास न थियो कियोरो ते अवं न थियो ज्ञानतो कि कुन लोरोई केरने। 14 ते इशशे प्रभुए अपनो बडो अनुग्रह लगातार हिराव। ते तैनी विश्वास ते प्यार दितो, किजोकि अवं तैस सेइं साथी अक भोरो थियो। 15 ई गल सच्चे, ते हेर किसमे सेइं मन्ने काबल, कि मसीह यीशु असन पापी लोकन मुक्ति देने इस दुनियाई मां अवं, जैन मरां सेबन्ना जादे पापी अवं आई। 16 पन परमेशरे मीं पुड़ दया की, एन तैने एल्हेरेलेइ कियू, कि मेरे जिरिये, जैने मैने होरन करां जादे बुराई की, यीशु मसीह तैस पुड़ अपनि पूरी बरगशात हिरिई बटे, चाए मीं जैन भी कियेरू थियू। तैने एन कियू ताके बादे मां होरे लोक विश्वास केरन ते हमेशारी जिन्दगी हासिल केरन। (aiōnios g166) 17 हुनी हमेशारो राजो, जै सदा जीतोए ते आलाए महान परमेशरेरी आदर, ते महिमा सदा भोती राए। आमीन। (aiōn g165) 18 हे मट्टां तीमथियुस, अवं इन्ना हदायतां देने लोरोई: अवं तीं तैना गल्लां याद केरताई जैना बीतोरे वक्ते मां नेबई तीं जोरी थी। तू तैन गल्लां केरो इस्तेमाल हथियारां केरो जोरो तेन केरे खलाफ लड़नेरे लेइ केर, जैना झूठी शिक्षा देतन। 19 तू मसीह पुड़ लगातार विश्वास केर ते अपनो ज़मीर भी साफ रख। किछ लोकेई अपने साफ ज़मीरो इन्कार कियोरोए तैसेरो नितीजो ई भोव कि तैनेई यीशु पुड़ विश्वास केरनो शारो। 20 तैने मां हुमियुस ते सिकन्दरे, जैना मीं शैतानेरी शक्ति मां देइतां तैन सज़ा दितोरीए, एस सेइं तैना इन शिखेले कि परमेशरेरी तुहीन केरनि बंद केरन।

1 तीमथियुस

2 हुनी अवं सेबन्ना करां बेइतां इन जोताई, कि बिनती, ते प्रार्थनां, ते दरखुवासां, सेबन्नी मैन्हु केरे लेइ की गान। 2 राजां ते सेबन्नी उच्चे पदे बालां केरा लेइ प्रार्थना केरा, ताके तैना असन सुखे ते बगैर खतरे सेइं जीने देन ते अस परमेशरेरी आराधना केरि बटतम ते होरि लोकन सेइं रोडो बताव केरि बटम। 3 इन इशशे मुक्ति देनेबाले परमेशरे रोडू लगते ते पसंद एइते। 4 तै इन चाते, कि सेबन्नी मैन्नु मुक्ति मैल्ले; ते तैना सच्चेरे ज्ञाने जानन। 5 किजोकि सिर्फ अक्के परमेशरे, ते अक मैन्हु आए जै परमेशर ते लोकां केरो बिचवाई कराने बालो, ते तै मैन्हु यीशु मसीह आए। 6 सेबन्नी लोकन पाप ते मौतरी शक्ति करां छुटकारो देनेरे लेइ मसीहे अपनो आप बलिदान कियो। तैसेरे मौतरे जिरिये परमेशरे ठीक वक्ते पुड़ सबूत दितू कि तै सेबन्नी लोकन बचानो चाते। 7 ई वजा आए, परमेशरे अवं खुशखबरी प्रचार केरनेबालो ते प्रेरित भोनेरे लेइ चुनो। तैने अवं गैर कौमन विश्वासेरो सच्चे सन्देश शिखालनेरे लेइ चुनो। अवं झूठ नई लोरो जोने बलके सच जोने लोरोई। 8 अवं चाताई, कि हर ठैरी सभान मां मडद परमेशरेरे लेइ समर्पित हथ खडे केरतां बगैर सरकां ते बगैर बेसी सेइं प्रार्थना केरन। 9 तेन्चरे मसीही कुआन्शां भी इज़ज़तदार लिगड़ां लेइतां, ते अपनो आप रोड़ेचारे सजेइतां, न कि अलग-अलग किसमे सेइं दोग बनाने, ते सोन्ने, ते मोती, ते कीमती लिगडन सेइं। 10 बलके इसेरे बलके तैनेई होरि केरे लेइ रोड़ां कम्मां केरतां अपनो आप खूबसूत लोडे बनावरो, किजोकि परमेशरेरी भक्ति केरनेबैली कुआन्शन इन शोभा देते। 11 जैखन होरे लोक विश्वासी लोकन शिखालन त सेबन्नी कुआन्शेई चुपचाप ते आदरी सेइं शुन्तां शिखेरू लोडे। 12 अवं अज़ाज़त न देई कि कुआन्शां मडदन शिखालन ते तैन पुड़ अधिकार रखन। जैखन तुस आराधना केरनेरे लेइ अकोट्टे भोथ त कुआन्शेई चुप लोडे रावरू। 13 अवं इन एल्हेरेलेइ जोताई किजोकि परमेशरे पेड़लो आदम बनाव, तैसेरे पत्नी हव्वा बनाई। 14 होरि वजा ई आए कि कुआन्शां सपमे करां धोखो खाव न कि आदमे, एन्चरां हव्वा परमेशरेरो हुक्म टलोडो। 15 फिरी भी कुआन्शा बच्चे ज़रमने सेइं परमेशरेरे करां मुक्ति हासिल केरेली, अगर मसीह पुड़ लगातार विश्वास केरती राए, ते होरि लोकन सेइं प्यार केरती राए, ते शुद्ध त कने रोडे तरीके सेइं बताव केरे।

3 ई गल सच्चे, कि जै कलीसियाई मां अगवो भोनों चाते, त तै आदरारे पदेरी इच्छा रखते। 2 ते इन ज़रूरीए कि अगवो बेइलजाम भोए, ते तैसेरी अक कुआन्शा लोडे, ते तै अपने आपे पुड़ कैबू केरनेबालो, समझदेरी सेइं जीनेबालो भोए, इज़ज़तदार भोए, ते टलाहना केरि आदर केरनेरे लेइ तियार रानेबालो भोए, ते होरि लोकन परमेशरेरो सन्देश रोडे चारे शिखालनेरे काबल भोए। 3 तै शराबी या मार-पीट केरनेबालो न लोडे, बलके दया केरनेबालो लोडे, ते लड़ाई न केरनेबालो लोडे ते पेइसां केरे लालची न भोए। 4 तै अपने घरेरो रोडे चारे चलानेबालो ते बन्दो बसत केरनेबालो लोडे, ते तैनी अपने बच्चन शिखालेरू लोडे कि तैना हर गल्ली मां इज़ज़ती सेइं तैसेरी मनन। 5 जैखन अगर कोई अपने घरेरो बन्दो बसत केरनो न ज्ञानतो भोए, त तै परमेशरेरी कलीसियारी हेरगेश केन्चरे केरेलो? 6 तै नव्वो विश्वासी न लोडे, एरू न भोए अभिमान केरे ते तैस शैतानेरी जेरि तैस सज़ा मैल्ले। 7 ते जैना लोक विश्वासी नई तैनेई भी तैसेरे बारे मां इन ज़ोरू लोडे कि ए रोडो मैन्हु आए। ताके एरू न भोए कि ते घटिया भोए ते शैतानेरे जाले मां फंसे। 8 तेन्चरे सेवक भी तेरेह लोडन जैन केरि लोक आदर केरन। ईमानदार लोडन, ते पीने बाले न भोन, ते एरे मैन्हु न भोन जैना पेइसां केरे लेइ किछ भी केरि बटतन। 9 पन तैन केरे ज़मीर साफ लोडन ते जै शिक्षा परमेशरे बांदी कियोरीए, तैस पुड़ लगातार विश्वास केरनेबाले लोडन। 10 जैखन कलीसियारे सेवक चुने गान त पेड़लू तैन केरू चालचलन परखू गाए, कि तैन मां रोडे गुण आन, ते केन्ची तैन मां कोई गलती न लेइहोए, त फिरी सेवकेरू कम केरन। 11 एन्चरे कलीसियाई मां सेवा केरनेबालां केरि कुआन्शां भी आदरारे काबल भोन, होरन बदनाम केरनेबैली न लोडन, पन शांत सुभावे बैली, ते सेबन्नी गल्लन मां ईमानदार भोन। 12 कलीसियारो सेवक अपने

कुआन्शरे लेइ वफादार लोड़े, ते बच्चां ते अपने घरेरे सारे लोकां केरो रोड़ो चारे हेरोगेश केरनेबालो लोड़े। 13 किजोकि जैना सेवकेरू कम रोड़े चारे केरतन, तैना लोकां केरि नजरी मां इज़्जतदार भोतन। ते तैना अपने तैस विश्वासेरे बारे मां जै यीशु मसीहे पुड़े बड़े दिलेरी सेइं ज़ोतन। 14 अवं तीं कां जल्दी एजनेरी उमीद रखने पुड़ भी इना गल्लां एल्हेरेलेइ लिखताई। 15 अगर मां एजने मां चिर लगे, त तू ज़ानस, कि लोकेई परमेशरेरे टब्बरे होरि लोकन सेइं केन्चरे बर्ताव कियोरो लोड़े। इन टब्बर तैना लोकन सेइं बनोरू, जैना यीशु पुड़ विश्वास केरतन ते जीते परमेशरेरे कलीसियारेन। इना विश्वासी सच्च्यी शिक्षाई मज़बूती सेइं मन्तन ते सम्भालतन जेन्चरे बुनीयाद ते खम्बे इमारती सम्भालतन ते मज़बूत केरते। 16 ते इस मां शक नई, अस पूरे याकीन सेइं जोई बटतम, जैना शिक्षां परमेशरे बेंदी की एना बिलकुल सच्च्यी आन, मालब, मसीह मैनेरे रूपे मां बांदो भोव, पवित्र आत्मा ते हर कम्मे मां धर्मी ठहराव, स्वर्गदूतेई ते लाव, लोकेई तैसेरे बारे मां कौमन मां प्रचार कियो, सारे दुनियाई मरां लोकेई तैस पुड़ विश्वास कियो, परमेशरे ते उबरे स्वर्ग जो नीयो।

4 पन पवित्र आत्मा साफ ज़ोते, कि आखरी वक्ते मां किछ लोक मसीही शिक्षाई पुड़ विश्वास केरनो बन्द केरेले। तैना दुष्ट आत्मान कबूल केरेले, तैना तैन बुरी बत्ती च़लैली, त कने तैना लोक दुष्ट आत्मां केरि झूठी शिक्षाई पुड़ विश्वास केरेले। 2 इन तैना झूठे पाखंडी लोक आन, जैना इन झूठी शिक्षान शिखालतन, तैन केरो ज़मीर ज़ै रोड़े ते बुरे मां फैसलो केरते मरों आए ते जेन्चरे तात्ते लोहे सेइं ते फुकोरोए। 3 एरे लोक इन शिखालतन कि ड़ला नई बनानो ते खानेरी किछ चीज़ां न लोड़न खेवरी, पन परमेशरे इन खानेरी चीज़ां विश्वासी लोकां केरे खानेरे लेइ बनोरिन जैना सच्च्यी शिक्षा ज़ानतन कि प्रार्थना केरतां खावरू लोड़े। 4 किजोकि परमेशरेरी बनेवरी हर चीज़ रोड़ीए। अस परमेशरेरू शुक्र केरतां सब किछ खेइ बटतम। 5 किजोकि परमेशरेरे वचने, ते प्रार्थनाई सेइं शुद्ध भोते। 6 अगर तू दूलान ते बेडनन लगातार इन्ना गल्लां याद करातो रालो, ज़ैन केरि हदायत मां तीं दित्तोरीए त कने विश्वासेरे सन्देशे ते तैस रोड़ी शिक्षाई सेइं ज़ैस मां तू मज़बूत बनावरोस ज़ै तू मन्तो ओरोस। त तू यीशु मसीहेरो रोड़ो सेवक भोलो। 7 पन बनेवरी कहैनी ते बेकार कहैनी केरे वजाई सेइं वक्त बरबाद न केर ज़ैन सेइं परमेशरेरी आदर न भोए। पन तू लगातार परमेशरेरी आदर केरनेबाली ज़िन्दगी जीनी शिखाल। 8 किजोकि जिसमानी वर्जिशी सेइं जानी फ़ैडो भोते, पन भेक्तेरे लेइ तियारी बड़ी रोड़ीए किजोकि इस वक्तेरी ते एजनेबाले वक्तेरी ज़िन्दगारो फ़ैडो इस्से मां आए ज़ेसरो वादो परमेशरे कियोरोए। 9 ते ई गल सच, ते हर तरीके सेइं मन्नेरे काबल। 10 किजोकि अस मेहनत ते कोशिश एल्हेरेलेइ केरतम, किजोकि इश्शी उमीद तैस जीते परमेशरे पुड़े। ज़ै सेब्भी लोकां केरो, ते खास केरतां विश्वास केरनेबालन मुक्ति देनेबालोए। 11 विश्वासी लोकन इना गल्लां शिखाल ते तैन ई हुक्म दे कि तैना इन मनन। 12 तू एन्चरे बर्ताव केर कि कोई भी तेरी अनादर न केरे किजोकि तू जवान आस। पन तू विश्वासी लोकां केरे लेइ इन सैरी गल्लन मां अक मिसाल बन, गलबाती मां, होरन सेइं बर्ताव केरने मां, ते होरन सेइं प्यार केरने मां, ते यीशु मसीह पुड़ विश्वास केरने मां, ते बेडलज़ाम ज़िन्दगी जीने मां ताके लोक भी एन्चरां केरन। 13 ज़ांतगर अवं न एज्जी, तांतगर ज़ैखन विश्वासी लोक अकोठे भोतन ज़ोरे सेइं पढ़ने मां, ते तैन केरो होसलो बद्धा ते पवित्रशास्त्रो मतलब शिखाल। 14 इस गल्ली याद रख ज़ैखन बुजुर्गां केरे एक्की टोलां तीं पुड़ हथ रखोरे थिये, परमेशरे तैन अक सन्देश दित्तो कि तैस वरदानेरे बारे मां ज़ोन ज़ै तैने तीं दित्तोरी। तैस वरदानेरे नज़र अनदाज़ न केर। 15 तैन गल्लन सोचतो रा, ते तैन मां अपनू ध्यान लेइतां रख, एन्चरे हर कोई हेरी बटेलो कि तू विश्वासे मां बद्धने लोरोस। 16 इस गल्लरू ध्यान रख कि तू केन्चरे जीतस ते केन्चरे शिखालतस। इसेरो नितीजो ई भोलो कि परमेशरे इन्साफे मां तेरे ज़िरिये तीं ते तेरे शुन्नेबालन बचालो।

5 बूढे मैनु न झिड़क पन तैस एन्चरे आदरी सेइं सल्लाह दे जेन्चरे अपने बाजी, एपू करां निकड़े मैनु एन्चरे सल्लाह दे जेन्चरे अपने निकड़े

दूलाए। 2 बुढी कुआन्शन सेइं एन्चरे बर्ताव केर जेन्चरे अम्मा सेइं, ते जवान कुआन्शन सेइं एन्चरे बर्ताव केर जेन्चरे अपने बेडनी सेइं। इन साफ दिले सेइं केर। 3 तैन विधवां केरि आदर केरा, ज़ैन केरो कोई हेरोगेश केरनेबालो नई तैन केरू ध्यान रख्खा। 4 ते अगर कोन्ची विधवांरां मडुं या पोद्लडां या धियोडां भोन, ते तैन पेड्लू अपने घरेरे लोकां केरू ध्यान रेखतां परमेशरेरी भक्ति केरनि शिखरी लोड़े। ते तैना एन केरतां अपने अम्मा-बाजी ते दादा देदी केरू हक देन, किजोकि इन परमेशरे पसंद एइते। 5 ज़ै विधवा आए ते तैसेरो ध्यान रखनेबालो कोई नई, तै परमेशरे पुड़ उमीद रखतीए, ते रात दिहैदी बिनती ते प्रार्थनाई मां परमेशरे करां मद्दत मगतीए। 6 पन जैना विधवां अपनो सारो वक्त एशे मां बितेतितन तैना जिसमानी रूपे सेइं त ज़ीतितन पन आत्मिक रूपे सेइं मेरीन। 7 इन गल्लां केरो भी हुक्म दे कि तैना बेडलज़ाम रान। 8 पन अगर कोई अपने रिशतेदारां केरि ते खास केरतां अपने घरानेरू ध्यान न रख्खे, ते तै विश्वासे करां मुकरोरोए, ते ज़ै विश्वास न केरे तैस करां बुरो बनोरोए। 9 तैस्से विधवारू नवं लिखू गाए, ज़ै शत सालन करां घट न भोए, ते अपने मुन्शे सेइं वफादार रावरी भोए। 10 ते होरे लोक तैसेरे बारे मां जानते भोन कि तैसां हमेशा रोड़ां कम्मां कियोरन। जेन्चरे कि, तैसां बच्चे रोड़े चारे पाले, ते तैना विश्वासी लोक अपने घरे मां आने, जैना सफरे मां थिये, जेन्चरे होरि लोकां केरि सेवा कियोरी भोए, ते तैन लोकां केरि मद्दत कियोरी भोए जैना मुसीबती मां थिये, ते ज़ैसां हर किसमेरां रोड़ां कम्मां कियोरां भोन। 11 पन जवान विधवां करां नंवां न लिख, किजोकि ज़ैखन तैन केरि जिसमानी इच्छा तैस वादे करां शेक्ति बाली भोती, ज़ै तैनेई विधवा रेइतां मसीहेरी सेवा केरनेरे लेइ कियोरोए, त तैना ड़ला बनानो चैतन। 12 दुबारां ड़ला केरतां तैना दोषी भोतितन, किजोकि तैनेई अपनो पेड्लो वादो बरकरार नई रखोरो। 13 एन्चरे तैना घरे-घरे फिरतां आलसी भोनु शिखतितन, ते सिर्फ आलसी नई, पन होरि केरे खलाफ गल्लां केरतितन, ते होरि केरे कम्मन मां दुखल देतितन, ते तैना गल्लां ज़ोतितन जैना न लोड़न ज़ोरी। 14 एल्हेरेलेइ अवं इन चाताई, कि जवान विधवां ड़ला बनान; ते तैन बच्चे भोन ते घरबार सुमालन, ते दुश्मन्न बदनाम केरनेरो मौको न देन। 15 किजोकि किछ जवान विधवां कुआन्शेई परमेशरे करां दूर भोइतां शैताने पत्ती च़लनू शुरू कियोरू। 16 अगर कोन्ची विश्वास केरनेबालेरी टब्बरे मां विधवां भोन, त तैए तैन केरि मद्दत केरे न तैन केरि ज़िमेवारी कलीसियाई पुड़ भोए। तैखन कलीसिया तैस विधवारी मद्दत केरि बटते ज़ेसरो कोई न भोए। 17 ज़ै बुजुर्ग रोड़े चारे कम केरते ते आदर हासिल केरनेरे ते बराबर तनखाएरे काबले, खास केरतां तैना जैना परमेशरेरू वचन शुनाने, ते शिखालने मां बड़ी मेहनत केरतन। 18 किजोकि पवित्रशास्त्र मां इन लिखोरूए, “कि तू जोद्लोरे दांतेरू आशी न बेन्थाँ,” किजोकि, “मज़दूर अपने मज़दूरो हकदारो।” 19 कोई दोष कोन्ची बुजुर्ग लव गाए, त ज़ांतगर दूई या जादे लोक न ज़ोन कि असेई ए पाप केरतो लावरोए, तांतगर न शुन। 20 जैना लोक पाप केरतन तैन सेब्भी विश्वासी लोकां केरे सामने झिड़क, ताके होरे विश्वासी लोक भी डरन। 21 परमेशर ते मसीह यीशु, ते चुनोरे स्वर्गदूत हाज़र सेमझतां अवं तीं हादयत देताई, ध्यान राए कि तू केन्चरो इन्साफ जल्दी न केरस, ते कोन्चेरी तरफदारी न केर। 22 कलीसियारो बुजुर्ग चुनेरे बारे मां जल्दी कथे नई केरनि। ते होरि केरे पापन मां शामिल न भो, अपनो आप पवित्र बनोरो रख। 23 अग्रोवं जो पानी न पी, पन अपने पेटेरे ते अपने बार-बार बिमार भोनेरे लेइ थोड़ो-थोड़ो दाख़ारो रस भी कम्मे मां आन। 24 अवं ज़ोताई कि जल्दी बुजुर्ग नई चुने, किजोकि किछ लोक खुले आम पाप केरतन, इन्साफे करां पेड्ले भी तैना विश्वासी लोकां केरे सामने दोषी आन। 25 एन्चरे ज़ैखन लोक रोड़ां कम्मां केरतन, त तैन होरि विश्वासी केरे ज़िरिये हेरू गाते। अगर तैना तैन एक्की बारे साफ चारे लेई बटन, आखर तैना तैन पिशानेले।

6 जैना विश्वासी लोक गुलाम आन, तैनेई हर तरीके सेइं अपने मालिकां केरि आदर कियोरी लोड़े ताके होरे लोक परमेशरेरी ते इश्शे शिक्षारी

तुहीन न केरन। 2 ते ज़ैना मालिक विश्वासी भोन, त तैन केरू मसीह पुड विश्वास केरनेरे वजाई सेई तैन केरि बराबर इज़्ज़त की गाए, बल्के तैन केरे लेइ होरू भी जादे कम कियोरू लोड़े। किजोकि इस सेई फेइदो नेनेबाले विश्वासी आन ते तैना गुलाम तैन सेई प्यार केरतन, इन गल्लां केरि शिक्षा दे ते इन होसलो दे कि तैना इन सब केरन। 3 किछ लोक इश्शे शिक्षारी खलाफत केरि बटतन, पन इना यीशु मसीहेरी रोड़ी शिक्षां आन। इना शिक्षां भेक्करी ज़िन्दगी बद्धेतिन। 4 ज़ै कोई अलग शिखालते तै अभिमानी ते तै किछ न समझे। एरे ज़ेरे मैनुहु गैर ज़रूरी मुद्दां ते लफसां केरो मतलब ज़ान्नेरे लेइ होरन सेई बेस ते तर्क केरतन। ज़ैन केरो नितीजो जलन, ते लड़ाई ते तुहीनरी गल्लां, ते बुरी-बुरी शक, 5 ते मैनन् मां बेफेइदी लड़ेई पैदा भोतिन, ते ज़ैन केरे मन बुरे शक्की सेई भरोरेन, ते तैना लगातार होरन सेई बेस केरतन, ते तैना सेइजी न बटथ कि सच कुने, तैना समझतन परमेशरेरे बारे मां शिक्षा देनी कमाई केरनेरो ज़िरियोए। 6 पन इश्शे इन लेइ इन रोडू कि अस तैन केरम ज़ैस सेई परमेशर खुश भोए ते ज़ैन परमेशर असन देते तैस सेई अस राज़ी भोम। 7 ते न असेई दुनियाई मां किछ आनोरू, ते न किछ नेही बटम। 8 ते अगर असन कां किछ खाने पीने ते लाने जो भोए, ते इस्से मां खुश रहम। 9 पन ज़ै धनी भोनों चाए, तैना इन सब पाप केरतां बड़े आसान तरीके सेई धोखो खातन, ज़ेन्चरे जानवर ज़ाले मां फसतन तेन्चरे तैना फसतन। तैना इन केरनू चातन ज़ैन तैन केरे लेइ बेवकूफी ते खतरोए, ते एरी इच्छां तैन बरबाद ते नाश केरनेरे पासे नेतिन। 10 किजोकि पेइंसां केरू लालच सेब्भी किसमेरे बुरैइअरू वजाए, किछ लोकेई बले-बले मसीह पुड विश्वास केरनो शारो किजोकि तैना धनी भोनु चाते थिये, ते तैनेई तैस मैनेरो ज़ेरो बड़े तरीकन सेई दुःख झैल्लो ज़ै अपने आपे कोन्ची हथियारे सेई ज़खमी केरते। 11 पन हे तीमुथियुस, तू परमेशरेरो मैनुस, तीं इन गल्लां न लोइन कियोरी, सिर्फ ज़ैन ठीके तैन केरनेरे लेइ हर किसमे सेई कोशिश केर। एरी ज़िन्दगी ज़ी ज़ैस सेई परमेशरेरी आदर भोती, मसीह पुड भरोसो केर, होरि लोकन सेई प्यार केर, मुश्किल वक्ते मां हिम्मत रख, ते होरि लोकन सेई नेरमी सेई बर्ताव केर। 12 ज़ेन्चरे अक रोड़ो सिपाई जंगी मां लड़ेई मां हार न मन्ने, तेन्चरे तू भी परमेशरे पुड भरोसो रखने मां ते तैसेरी गल मन्ने मां हार न मन्न। ते तैस हमेशारी ज़िन्दगी मज़बूती सेई ठेमतां रख, ज़ेसेरे लेइ तू परमेशरे कुजावरोस, ते ज़ेसेरे बारे मां तीं बड़े लोकां केरे सामने दिलेरी सेई ज़ोरू थियू कि तू मसीह पुड विश्वास केरतस। (aiōnios g166) 13 अवं तीं परमेशरे सामने ज़ै सेब्भन ज़िन्दगी देते, ते मसीह यीशुएरे सामने ज़ोताई, ज़ैने पुन्तियुस पिलातुसेरे सामने रोड़ी गवाही दिती, ई हुक्म देताई। 14 ज़ैन किछ परमेशरे तीं केरनेरे लेइ हुक्म दित्तोरो तैन सब किछ पूरू केर, ताके यीशु मसीह ज़ांतगर वापस न एज्जे तीं पुड कोई दोष न लेई बटे तू कुन गलत केरने लोरोस। 15 सिर्फ परमेशर तै राज़ोए ज़ै बड़यैयरे काबले, तै महान राज़ो ते महान प्रभुए, तैए मसीहे सही वक्ते पुड बांदो केरेलो। 16 सिर्फ तैए हमेशा ज़ींती रहते, ते तै तैस महिमा बैली लोई मां रहते ज़ैस कां कोई न एज्जी बटे। तैसेरी आदर ते शक्ति हमेशा राली। आमीन। (aiōnios g166) 17 इस दुनियारे दौलतमंदन हुक्म दे, कि तैना घमण्डी न भोन ते चंचल धने पुड उमीद न रखन, पन परमेशरे पुड ज़ै इश्शे सुखेरे लेइ बडू हछ्छू देते। (aiōn g165) 18 ते तैन ज़ो कि तैना अपने पेइंसे रोड़े कम्मां केरे लेइ इस्तेमाल केरन ते भलाई केरने मां दौलतमंद बनन ते हमेशा तियार रान होरन खुल्ले दिले सेई देनेरे लेइ ज़ो। 19 एन्चरे केरने सेई तैना अपना रोड़ां कम्मां खज़ानेरे ज़ेरे जमा केरेले, ज़ैना तैन केरे लेइ एजनेबाले वक्ते स्वर्ग मां मज़बूत मुनीयादरां ज़ेरां भोलां। ते तैना तै सच्च्ची ज़िन्दगी हासिल केरेले ज़ै हमेशारे लेइ आए। 20 हे तीमुथियुस इस गल्ली पुड ध्यान दे कि ज़ैन परमेशरे तीं केरनेरे लेइ दित्तोरूए तेन्ने केर। दुष्ट ते बेकार गल्लन करां ते तैन शिक्षान करां बेचता रा, ज़ैना परमेशरेरी सच्च्ची शिक्षां केरि खलाफत केरतन, तैस तैना ज़ान ज़ोतन पन तैन गलते। 21 किछ लोकेई इन झूठू ज़ान कबूल कियोरूए, एन्चरे केरनेरे सेई तैनेई मसीहेरे सच्च्ची शिक्षान पुड विश्वास केरनो शारो। परमेशरेरो अनुग्रह तुसन सेब्भन पुड भोतो राए।

2 तीमथियुस

1 अवं पौलुस ई चिट्ठी लिखने लोरोई। परमेशरे अवं यीशु मसीहेरो प्रेरित भोनेरे लेइ चुनो, ताके अवं इस सन्देशो प्रचार केरि कि परमेशरे यीशु मसीह पुइ विश्वास केरनेरे जिरिये वादो कियो कि हमेशारी ज़िन्दगी देलो। 2 अवं ई चिट्ठी तीमथियुसे लिखने लोरोई, जैन मेरे मट्टेरू जेरुए, हे तीमथियुस अवं प्रार्थना केरताई बाजी परमेशर ते इश्शे प्रभु यीशु मसीह ती अनुग्रह ते दया ते शान्ति देतो राए। 3 जैस परमेशरी सेवा अवं अपने दादे पददादां केरे रीति पुइ शुद्ध जमीरे सेइं केरताई, तैसेरू शुक्र भोए, कि अवं अपनी प्रार्थनाना मां ती रात दिहैदी याद रखताई। 4 मीं यादे ज़ैखन अस अलग भोने लोरे थिये तैखन तू केन्चरे लोरां देने लोरो थियो, ते तीं सेइं मिलनेरी बडी इच्छा रखताई कि जैखन मिली त अवं आनन्दे सेइं भरी गेइ। 5 ते अवं तेरे अम्मा यूनिके ते तेरी नानी लोइसेरो ते सच्चरे विश्वास याद केरताई। तेरो विश्वास भी तेरहो आए, ते मीं याकीने तीं मां भी आए। 6 एल्हेरेलेइ अवं तीं याद कराताई, कि तू परमेशररे तैस वरदाने जैन मेरे हथ रखने सेइं तीं मैल्लोरू थियूं समका। 7 किजोकि परमेशर अस डरपोक नई बनावरे बल्के तैसेरो आत्मा इश्शे दिलन मजबूत केरते, ते मदत केरते कि अस होरि लोकन सेइं प्यार केरम ते ताके आपे केबू मां रखमा। 8 एल्हेरेलेइ होरि लोकन प्रभु यीशुएरे बारे मां ज़ोने करां शरमा ते एल्हेरेलेइ शरमा कि अवं प्रभुएरी सेवा केरनेरे लेइ कैदे मां आई। बल्के तू परमेशररे तैस शक्ति इस्तेमाल केर ते मीं सेइं साथी खुशखबरे लेइ दुःख झलने मां शामिल भो। 9 परमेशर असन मुक्ति दिती, ते अस पवित्र ज़िन्दगी ज़ीनेरे लेइ कुजाए, तैने अस एल्हेरेलेइ नई कुजवरे कि असेईं रोइं कम्मां कियो, किजोकि दुनिया बानाने करां पेइलो परमेशररो ई मकसद थियो कि ते यीशु मसीह इश्शे लेइ इस दुनिया मां भेजतां असन पुइ अनुग्रह हिराए। (aiōnios g166) 10 पन हुनी इश्शे मुक्ति देनेबाले यीशु मसीह ओरोए ते तैनी अपनो अनुग्रह हिरावरोए। तैने मौतरी शक्ति नाश की, तैने असन खुशखबरे जिरिये हमेशारे ज़िन्दगीरि बत हिराई। 11 इस खुशखबरे लेइ परमेशरे अवं प्रचारक ते प्रेरित ते शिक्षा देनेबालो चुनो। 12 एल्हेरेलेइ अवं कैदखाने मां दुःख भी झैल्लने लोरोई, पन शरमेई न, किजोकि अवं मसीहे जानताई जैस पुइ मीं विश्वास कियोरोए, ते मीं याकीने, कि जैन मसीहे दितोरू ज़ातंगर ते वापस न एज्जे तातंगर ते तैसेरी रखवाली केरि बटते। 13 जैना रोडी शिक्षां तीं मीं करां शुनोरिन तैन तू मिसालरे रूपे मां रख, इन तू विश्वासे ते प्यारे सेइं साथी केर, किजोकि तू मसीह यीशु सेइं साथी अक भोरस। 14 ते तैस सच्चरी रखवाली केर, जैन पवित्र आत्माए जिरिये सेइं तीं सोंफेरू, जै असन मां रहते। 15 तू ज्ञानतस, कि आसिया इलाकेरे बडे विश्वासी लोक जैनेई अवं शारोरोई, जैन मां फूगिलुस ते हिरमुगिनेसे भी अवं शारो। 16 उनसिफुरुसेरे घराने पुइ प्रभु दया केरे, किजोकि ते बडे बार मीं कां अवं ते मीं होसलो दित्तो, ते मीं सेइं कैदखाने मां एजनेरे लेइ न शरमाव। 17 पन जैखन ते रोम नगरे मां अवं, त बडे कोशिश सेइं तोपतां मीं सेइं मुलाकात केरि। 18 प्रभु इन्साफेरे दिहाडे अपनि महान दया उनसिफुरुसे पुइ हिराए। तू एप्पू रोडे चार ज्ञानतस कि इफिसुस नगरे मां तैनी मेरी केत्री मदत की।

2 एल्हेरेलेइ हे मेरे मट्टां तीमथियुस, तू अपने आपे मजबूत केर इन जैनतां कि परमेशरे तीं अनुग्रह दित्तोरो, जै सिर्फ यीशु मसीह सेइं अक भोइतां मैलते। 2 तीं बडे लोकां केरे सामने जै मसीहेरे सन्देशी शिक्षा मीं करां शुनोरिन। एल्हेरेलेइ अवं चाताई कि तैए सन्देश तू होरि विश्वासी लोकन शिखाल, जैना वफादार भोन ते होरन शिखालनेरे काबल भोन। 3 बिलकुल तेन्चरे जेन्चरे अक सिपाही जंगरे मैदाने मुश्किल हालातन मां सबरी सेइं झैल्लते, तेन्चरे तू भी मुश्किल हालातन मां सबरी सेइं दुःख झैल्ल जेन्चरे अस यीशु मसीहेरे लेइ झैल्लतम। 4 अक सिपाही जैखन फौजी मां नौकरी केरते त ते होरि किसमेरू कम न केरे, किजोकि ते अपने भरती केरनेबाले खुश केरनू चाते। 5 फिरी आखाडे मां घुल्लने बालो अगर कानूनेरे मुताबिक न घुल्लते त तैस ताज न मैल्ले। 6 जै ज़मीनदार मेहनत केरते, फसलरे पेइले

हिरसेरो हकदार तैए भोते। 7 जैन अवं ज़ोताई, तैस पुइ ध्यान दे, ते प्रभु तीं सेबनी गल्लां केरि समझ देलो। 8 लगातार याद रख कि यीशु मसीह कौने, ते दाऊदेरे खानदनीं मरां आए, ते परमेशरे ते मुइदन मरां ज़ीतो कियो ते ईए खुशखबरी अवं लोकन शुनाताई। 9 अवं खुशखबरी शुनाताई एल्हेरेलेइ अवं मुजरामेरो जेरो दुःख झैल्लताई, इडी तगर कि कैदे मां आई, पन कोई भी लोकन परमेशररू वचन प्रचार केरने करां न रोकी बटे। 10 एल्हेरेलेइ अवं तैन लोकां केरे फैइदेरे लेइ दुःख झैल्लताई जैना परमेशरे चुनोरिन, ताके तैना भी यीशु मसीह पुइ विश्वास केरतां मुक्ति हासिल केरन ते हमेशारी महिमा हासिल केरन। (aiōnios g166) 11 ई गल सच्चरे, कि अगर अस तैस सेइं साथी मरे त तैस साथी ज़ीते भी भोमेलो। 12 अगर अस तेसेरे वजाई सेइं दुःख झैल्लते रहले, त तैस सेइं साथी राजां केरू जेरू अस भी राजा केरमेलो, अगर अस तैसेरो इन्कार केरमेलो कि अस तैस न ज्ञानम, त ते भी इश्शो इन्कार केरेलो। 13 अगर अस मसीह सेइं साथी वफादार न भोम, त ते फिरी भी वफादार बनरो रालो, किजोकि ते अपने रूभावेरे खलाफ न गेइ बटे। 14 जैना गल्लां मीं तीं सेइं ज़ोरिन तैन तू अपने लोकन बिसरने न दे, ते प्रभुए गवाह रेखतां तैन खबरदार केर, कि लफसन पुइ बेंस न केरन, जैस सेइं किछ फैइदो न भोए, बल्के शुनने बालां केरो बडो नुकसान भोते। 15 बडी मेहनत केर ताके तू परमेशररे सामने कबूल भोनेरे काबल भोस, तू एरे मैनेरो जेरो भोनेरी कोशिश केर जै अपने कम्मे सेइं वजाई सेइं शरिमिदान न भोए, ते जै सच्चरी सन्देश ठीक तरीके सेइं शिखालतो भोए। 16 पन बेकार ते बेवकूफ गल्लन करां दूर राए, किजोकि एरी गल्लां परमेशरे करां दूर केरतिन। 17 ते तैन केरि गल्लां मैनेरे शडोरे जखमेरी ज़ेरि फैलतां लोकां केरे विश्वासे नाश केरतिन। ते हुमिनयुस ते फिलेतुस तैन केरे ज़ेरे आन। 18 तेनेई सच पुइ विश्वास केरनो बंद कियो। तैना ज़ोतन परमेशरे पेइले मरे विश्वासी लोक हमेशारे ज़िन्दगरे लेइ ज़ीते कियोरेन। एसेरो नितीजो जै भोते कि किछ लोक मसीहेरी शिक्षाई पुइ विश्वास केरनो बंद केरतन। 19 परमेशररे लोक पक्की मुनीयादारे ज़ेरे आन जै हिल्ले न। इस मुनीयादी पुइ एरे लफस लिखोरिन: “प्रभु ज्ञानते तैसेरे लोक कौन आन, ते इन भी कि जैना प्रभुएरी आराधना केरतन तेनेई बुरां कम्मां केरनां बंद कियोरां लोइन।” 20 एक्की अमीर घरे मां किछ सोन्नेरे ते चैदरां भांडां भोतन ते लेकडारां ते मितरां भोतन। माघां भांडां खास मौके पुइ इस्तेमाल केरनेरे लेइ भोतन ते सस्तां रोज इस्तेमाल केरनेरे लेइ भोतन। 21 तेन्चरे विश्वासी लोक जैना अपनो आप एन सैरी बुरी चीजना करां अलग केरे त ते कीमती भांडेरो जेरो भोलो जैन खास मौके पुइ इस्तेमाल कियूं गाते, जेसेरी ज़िन्दगी पवित्र भोली त ते अपने मालिकेरे इस्तेमाल भोनेरे काबल भोलो। 22 जवैनीर खुवैइशन करां दूर रा, ते जैना मैनु शुद्ध मने सेइं प्रभुएरू नवं घिन्तन, तैन सेइं साथी धार्मिकता, प्यार, ते मेल मलापेरो पीछो केर। 23 अवं फिरी ज़ोताई तू अपनो आप बेवकूफी, ते बेफैइदी गल्लन करां दूर रा, किजोकि तू ज्ञानतस, कि तैन सेइं लडाई भोतिन। 24 ते परमेशररो दास लडाको न लोडे, पन सेबभन दया केरनेबालो ते परमेशररे वचनेरी रोडे चार शिक्षा देनेबालो, ते जैना लोक तैसेरे खलाफ भोन तैन सेइं सबर केरनेबालो लोडे। 25 ते जैना लोक तैसेरी खलाफत केरन तैन बडे नेरमी सेइं शिखालेनेबालो लोडे, भोइ सकते परमेशर तैन लोकां केरि मदत केरे कि तैना मन फिरान, ते मसीहेरी सच्चराई पिशानन 26 ते एरे लोक दुबारां फिरी साफ तरीके सेइं सोचनेरे काबल भोले ते शैतानेरे धोखे करां जै ज़ालेरे ज़ेरोए बचेले। शैताने तैना फासवरे थिये कि जैन ते चाते तैना तैन करां कराए।

3 ध्यान दे अवं हुन्ना कुन ज़ोने लोरोई, कि दुनियारे आखरी दिहाइन मां बुरो वक्त एजनाए। 2 किजोकि लोक सिर्फ अपने आपे सेइं प्यार केरेले, दौलतरे लालची, बडकां मारनेबाले, अभिमानी, होरन बेइज्ज करेनेबाले, अम्मा-बैपू केरू ज़ोन्न न शुन्ने बाले, होरि केरू शुक्र न केरनेबाले, अपवित्र, 3 होरन सेइं प्यार न केरनेबाले, माफ्र न केरनेबाले, दोष लाने बाले, अपनि इच्छान पुइ केबू न केरनेबाले, सखत, सच्चरे सेइं नफरत केरनेबाले। 4 थोखो देनेबाले, धीठ, ते अभिमानी ते परमेशररे नई बल्के एशरे चानेबाले भोले 5

तैना भेक्करु रूप त बनाले पन तैस शक्ति न मन्नेले जै तैन भक्त बनाथी, एरे जेरे लोकन सेइं संगती न रेखां। 6 एन्ने मां तैना लोकन, जैना लोकां केरे घरन मां गेइतां बेवकूप कुआन्शन अपने वशे मां केरतन, जैन केरे मन पापे सेइं देबोइतां हर किसमेरी खुवैइशन मां आन। 7 ते हमेशा नर्वीं-नर्वीं गल्लां त शिखती रैतन, पन तैना मसीहेरी सच्चि शिक्षाई कथे न सेमझी बटन। 8 इना झूठे उस्ताद मसीहेरे सच्चि सन्देशेरे खलाफत केरतन जेन्चरे यन्नेस ते यन्नेसे मूसेरी खलाफत कियोरी थी। तैन केरे मन बुरेन ते तैन केरो मसीह पुइ विश्वास सच्चो नई। 9 तैन केरे कामयाबी सिर्फ थोड़े वक्तेरीए, किजोकि जेन्चरे लोकेई यन्नेस ते यन्नेस पिशानोरे थिये कि तैना बेवकूपन। तेन्चरे हर कोई इन भी पिशानेलो कि इना भी बेवकूपन। 10 पन हे तीमुथियुस तू एप्पू रोड़े चारे ज्ञान कि अवं शिखालताई, ते अवं केन्चरे जीताई, ते मेरो कुन मकसदे, ते अवं कुन विश्वास केरताई। तू ज्ञानतस अवं सबर केरतो ओरोई ते सेव्भी किसमेरे लोकन सेइं प्यार केरतो ओरोई, मीं मुसीबतां झैलली ते लोकेई अवं स्तव कि मीं बड़े दुःख भोए, 11 तू तैन भयानक गल्लां केरे बारे मां ज्ञानतस जैना लोकेई मीं सेइं अन्ताकिया ते इकुनियुम ते लुस्त्रा नगरन मां की, ते मीं तैडी केरो स्तव झैललो। पन प्रभुए अवं तैन सेव्भन मरां छुटव। 12 जै कोई तैन केरनू चाते जैस सेइं परमेशरे खुश भोते ते यीशु मसीह पुइ विश्वास केरते ते स्तव गानोए। 13 पन दुष्ट लोक ते तैना धोखो देनेबाले होरे भी बुरी चीजां केरेले। तैना लोकन धोखो देले ते एप्पू भी होरन करां धोखो खाले। 14 पन जैन तीं असन करां शिखोरूए तैस पुइ लगातार विश्वास केर, ते तीं पूरू याकीन किजोकि तू असन ज्ञानतस ते असन पुइ भरोसो केरि बटतस जैनेई तीं इना सैरी गल्लां शिखैली। 15 ते बचपनेरो तू पवित्रशास्त्रेरो ज्ञान्ने बालोस, जैन तेरी इन समझनेरे लेइ मद्दत केरते, कि जैखन तू यीशु मसीह पुइ विश्वास केरतस परमेशर तीं मुक्ति देते। 16 सारू पवित्रशास्त्र परमेशररे अगवैई सेइं लिखोरू, ते इन लोकन शिखालने लेइ मद्दतगारे, तैन जोनेरे लेइ कि जैन तैनेई कियुं तैन गलते, तैन केरि गेलती सुधारनेरे लेइ, ते तैन केरनेरे लेइ शिखालनेरे लेइ जैन सही आए। 17 ताके परमेशररो मैनुइ हर किसमेरां रोड़ां कम्मां केरनेरे लेइ तियार भोए।

4 जैखन मसीह यीशु राजेरो जेरो राज केरने एज्जेलो त तै जीते ते जैना मरेन, लोकां केरो इन्साफ केरेलो, अवं तीं परमेशरे ते मसीहे गवाह रेखतां हुक्म देताई। 2 कि तू परमेशररू वचन प्रचार केर, वक्त बे वक्ते तियार रा, तू लोकन जैना बुरां कम्मां तैनेई कियां हिरा, तैन केरे पापां केरे लेइ तैन झिड़क पन तैन होसलो भी दे ते तैन सबरी सेइं शिखाल। 3 किजोकि एरो वक्त एज्जेलोए, कि लोक रोडी शिक्षा न शुन्नी चाले, पन तैना अपने मेर्जी पुइ चलनू चाले ते तैना अपने लेइ बड़े उस्ताद तोप्पेले जैना तैन सेइं तैन ज्ञान जैन तैना शुन्नु चातन। 4 तैना तैन करां शुन्नु न चाले जैना परमेशररू सच्चू वचन शुनातन पन तैना झूठी कहैनी शुन्नी चाले (जैना मैनुइ केरि बनेवरिन)। 5 पन तू अपनो आप कैबू मां रख चाए किछ भी की न भोए, इस मां तीं जैना भी दुःख भी झैल्लने पेन त झाल, खुशखबरी शुनानेरे लेइ बड़ी प्रचार केर, ते जैन कम परमेशरे तीं केरनेरे लेइ दितोरू तैन पूरे केर। 6 अवं इना हुक्म तीं देताई किजोकि मेरी ज़िन्दगी ते परमेशररे लेइ कम खतम भोवरूए किजोकि अवं ज्ञानताई अवं जल्दी मरेलो। 7 मीं जंगी मां रोड़ो सिपेहेरे जेरे जै लडाई केरने मां कधी हार न मन्ने, तू भी मसीहेरे लेइ बड़ी मेहनत केरनि कथे हिम्मत न हार, मीं तैन कम पूरू कियुं जैन मसीह यीशुए मीं केरनेरे लेइ दितोरू थियुं, मीं वफादेरी सेइं खुशखबरी प्रचार की। 8 हुनी, प्रभुएरे मेरे लेइ स्वर्ग मां इनाम रखेरू किजोकि मीं तैस खुश केरनेबाली ज़िन्दगी जीयोरीए। प्रभु जै धर्मी इन्साफ केरनेबालोए मीं इन इनाम तेइस देलो जेइस तै वापस इन्साफ केरनेरे लेइ एज्जेलो। पन इन इनाम सिर्फ मेरे लेइ नई, पन तैन सेव्भी केरे लेइ भी आए, जैना तैसेरे एजनेरी बड़ी इच्छा रखतन। 9 मीं कां जल्दी एजनेरी कोशिश केर। 10 किजोकि देमासे इस दुनियारी चीजन सेइं प्यार केरतां अवं शारो, ते तै थिस्सलुनीके नगरे जो चलो जेव, ते क्रेसकंस गलातिया इलाके जो जेव ते तीतुस दलमतिया इलाके जो चलो जेव। (aiōn g165) 11 सिर्फ

लूका मीं सेइं साथीए, जैखन तू एजस त मरकुसे भी एप्पू सेइं साथी एना, किजोकि तै इडी मेरे मद्दत केरनेरे काबलो। 12 तुखिकुस मीं इफिसुस नगरे जो भेजोरोए। 13 जैखन तू एजस त तै चोगो एना जै मीं त्रोआस नगरे मां मरकुसेरे घरे रखोरोए। ते मेरे चर्मपत्र भी एना, खास केरतां तै जै छेल्ली केरे खेडू सेइं बनोरोए। 14 सिकन्दर ताम्बेरू कम केरनेबाले मीं बड़े बारे दुःख दितोरोए, प्रभु तैस तैसेरे बुरे कम्मां केरे मुताबिक बदलो देलो। 15 तू भी तैस करां खबरदार रा, किजोकि तैने इश्शे शिक्षारी बड़ी खलाफत की जै मसीहेरे बारे मां आए। 16 जैखन पेइले बार अवं आदालती मां अपनो आप बचाव केरनेरे लेइ जोरो थियो त कोई भी मीं सेइं साथी न थियो। पन तैना सारे मीं शेरतां चले जे, परमेशर इन तैन केरे खलाफ न गने। अवं प्रार्थना केरताई परमेशर तैन हछु माफ़ केरे। 17 पन प्रभु मेरो मद्दतगार राव, तैने मीं हिम्मत दित्ती, ते अवं यीशु मसीहेरी खुशखबरी शुनानेरे काबल भोव कि सारे गैर कौमां केरे लोक शुन्नु, ते तैने अवं मौती करां एन्चरे बचाव जेन्चरे शेरे करां। 18 ते प्रभु मीं हर एक्की बुरे हमले करां बचालो ते अपने स्वर्गेरे राज़े मां हाफ़ाज़ती सेइं पुजालो, सारे महिमा हमेशा-हमेशा परमेशररी भोती राए। आमीन। (aiōn g165) 19 मेरू नमस्कार प्रिस्का ते तैसेरे घरे बाले अक्चला ते कने उनेसिफुरुसेरे घराने दे। 20 इरास्तुस कुरिन्थुस नगरे मां रावरोए, ते त्रुफिमस मीं मीलेतुस नगरे मां बिमार शारोरोए। 21 हीवतडैरे पेइले एजनेरी कोशिश केर, ते यूबूलुस ते पूदंस ते लीनुस ते क्लौदिया, ते डठेरे सारे विश्वासी लोकेई नमस्कार भेजेरू आए। 22 अवं प्रार्थना केरताई प्रभु तीं सेइं साथी भोए, ते तैसेरो अनुग्रह तुसन सेव्भन पुइ भोतो राए।

तीतुस

1 अवं पौलुस ई चिट्ठी लिखने लोरोई। अवं परमेशरो दास ते यीशु मसीहेरो प्रेरित आई। अवं परमेशरें चुनोरे लोकां केरे विश्वास मज़बूत केरनेरे लेइ ते तैन केरि मद्दत केरनेरे लेइ चुनोरोई, कि तैना यीशु मसीहेरी सच्ची शिक्षा ज्ञानन ताके तैना एरी जिन्दगी ज़िन ज़ैस सेइ परमेशर खुश भोए। 2 तैसेरो नितीजो ई भोए कि तैना परमेशरें सेइ हमेशा रानेरी उमीद रखन, परमेशर जै कद्दे झूठ न ज़ोए, तैने दुनिया बनाने करां पेड़लो वादो कियोरो थियो, कि तैसेरे लोक हमेशारे लेइ ज़ीयेले। (aiōnios g166) 3 ते हुनी परमेशरे ठीक वक्ते पुइ ई खुशखबरी असन पुइ बांदी की ज़ै अस सेबन प्रचार केरतम। इश्शे मुक्ति देनेबाले परमेशरे ई जिमेवारी मीं दित्तोरीए ते तैसेरेलेइ इन कम केरनेरे लेइ मीं हुकम दित्तोरोए। 4 अवं ई चिट्ठी तीतुसे जो लिखने लोरोई। तू मेरे मट्टे जेरू आस, किजोकि जेन्चरे अवं विश्वास केरताई तेन्चरे तू भी विश्वास केरतस। अवं प्रार्थना केरताई इश्शो बाजी परमेशर ते इश्शो मुक्ति देनेबालो प्रभु यीशु मसीह तीं अनुग्रह त कने शान्ति देतो राए। 5 मीं तू एल्हेरेलेइ क्रेते टैपू मां शारोरो थियो, ताके तू तैडी इश्शू कम पूरू केरस, ते होरि नगहन मां बुजुर्ग चुन जेन्चरे तीं केरनेरो हुकम दित्तोरो थियो। 6 लौडर बेइलज़ाम लोडे ते अपने कुआन्शी सेइ वफादार लोडे, ज़ैन केरे बच्चे विश्वासी भोन ते बुरो बर्ताव केरनेबाले न भोन ते तैना अपने अम्मा बाजी केरो हुकम मन्नेबाले भोन। 7 किजोकि रखवालो परमेशरें भण्डारी भोने वजाई सेइ बेइलज़ाम लोडे, न अपनि चलावेबालो, न सेरकलो, न शराबी, न लड़ाको, ते न पेइसां केरो लालज़ी लोडे। 8 पन मेहमानां केरि आदर केरनेबालो, होरि केरि भलाई केरनेबालो, अपने आपे पुइ कैबू केरनेबालो, धरमात्मा, पवित्र ते अपने इच्छान कैबू केरनेबालो लोडे। 9 ते ते यीशु मसीहेरे तैस सन्देशे पुइ ज़ै भरोसेरे काबले मज़बूती सेइ विश्वास केरनेबालो लोडे, ज़ै असेई तैस शिखालोरोए। ताके तै होरन सही शिक्षाई मन्नेरे लेइ होसलो देइ बटे ते ज़ैना गलत भोन तैन सुधैरी बटे। 10 अवं इन एल्हेरेलेइ जोताई, किजोकि बड़े लोक सही शिक्षारी खलाफ केरेले, ज़ैना बेकार गल्लां शिखालतन ते होरन धोखो देतन। इन खास केरतां किछ यहूदी केरे लेइ सज़ आए ज़ैना विश्वासी बनोरेन (इना तैना लोकन ज़ैना चातन कि सारे मसीही लोक यहूदी केरे कानून मनन, खास केरतां खतनेरे कानून)। 11 पन लोकन शिखालनेरी अजाज़त न दे, किजोकि ज़ैखन तैना इन गल्लन शिखालतन, ज़ैना तैनेई शिखैलोरी लोडन, त ते सारे टब्बरां केरे विश्वासे बरबाद केरतन। तैना इन एल्हेरेलेइ केरतन कि पेइसो कमेई बटन। 12 अक मैनु क्रेत टैपैरो आए ज़ैस जो तैना अक्लमन्द ज़ोतन तैने ज़ोरूए, “क्रेतेरे लोक हमेशा झूठे, जंगली जानवरां केरो ज़ेरो बर्ताव केरनेबाले, तैना आलसी ते हमेशा अढंग खानेबाले भोतन।” 13 इन गल्लां क्रेतेरे लोकां केरे बारे मां सच्ची आन। एल्हेरेलेइ तैन खबरदार केर, कि तैना यीशु मसीहेरी शिक्षाई पुइ विश्वास केरन। 14 ते यहूदी केरि बनोवरी कहैनी ते ज़ैना लोक सच्चे करां दूर भोरैन तैन केरे हुकम शुन्ने बंद केरा। 15 ज़ैन लोकां केरे मने मां पापी खियाल नई तैन केरे लेइ रीतेरे मुताबिक सब किछ शुद्धे। पन तैन लोकां केरे लेइ ज़ैना बुरेन ते यीशु मसीह पुइ विश्वास न केरन तैन केरे लेइ किछ भी शुद्ध नई ज़ैन तैना केरतन। 16 तैना झूठे उस्ताद ज़ोतन कि अस परमेशरे ज़ानतम, पन तैन केरां कम्मां साफ तरीके सेइ हिरातन कि तैना तैस न ज़ानन, किजोकि परमेशर तैन सेइ नफरत केरते ते तैना हुकम न मन्नेबालेन, ते किछ भी रौडू केरनेरे काबल नई।

2 पन हे तीतुस तू विश्वासी लोकन तैन शिखाल ज़ैन यीशु मसीहेरे बारे मां सही शिक्षारे मुताबिक ठीके। 2 बुडे मडदन शिखाल कि अपने आपे पुइ कैबू केरनेबाले बनन, ते तैनेई एरो बर्ताव केरन कि लोक तैन केरि आदर केरन, ते समझदारी सेइ बर्ताव केरनेबाले भोन। ते तैना परमेशरें पुइ मज़बूती सेइ विश्वास केरनेबाले बनन, होरन सेइ प्यार केरनेबाले ते सबर केरनेबाले बनन। 3 एन्चरे बुट्टी कुआन्शन शिखाल कि एरी जिन्दगी

जीन ज़ैस सेइ परमेशरें आदर भोए। तैना होरन पुइ दोष लाने बैली, ते पीने बैली नई, पन ते तैन ज़ो कि तैन होरन तैन शिखालन ज़ैन रौडूए। 4 ताके तैना जवान कुआन्शां केरे लेइ मिसाल भोन ते तैन शिखालनेरे काबल भोन कि अपने मुन्शन ते बचन सेइ केन्चरे प्यार केरन। 5 ते तैना अपने आपे कैबू केरनेबैली, अपने मुन्शां केरे लेइ वफादार, ते घरेरो कारोबार केरनेबैली, भलाई केरनेबैली ते अपने-अपने मुन्शां केरे अधीन राने बैली भोन, ताके परमेशरें वचनेरी तुहीन न भोए। 6 एन्चरे जवान मडदन भी अक्लमन्द भोइतां ज़ीनेरे लेइ समझा। 7 हर गल्ली मां तू हमेशा अपने आप अक मिसाल बना, ताके तैन भी एन्चरे केरन। ज़ैखन तू परमेशरें बारे मां शिखालस त रोडे मकसदे सेइ शिखाल। एन्चरे लोक तेरी आदर केरेले। 8 ते ज़ैन सच्चे तैन शिखाल ते जेसेरी आलोचना न भोए, ताके तेरे दुश्मन छिथोन, किजोकि फिरि कोई बुराई नई भोनी जेसेरी तैना खलाफ केरि बटन। 9 ज़ैना विश्वासी गुलाम आन तैन शिखाल कि हमेशा अपने मालिकां केरि गल मनन। तैन ज़ो कि तैन केरन ज़ैस सेइ तैन केरे मालिक खुश भोन ते कम्मेरे बारे मां शिकायत न केरन। 10 चोरी न केरन, पन इन साबत केरन कि तैना हमेशा ईमानदारन, ताके लोक तैन केरे रोडे बर्ताव हेरन ते ज़ैन तैना केरतन तैन लोकां केरे लेइ, इश्शे मुक्ति देनेबाले परमेशरें सन्देशे शुन्नेरी वजा भोली। 11 किजोकि परमेशरे सेबमी लोकन मुक्ति देनेरे लेइ अक बत देइतां अपनो अनुग्रह हिराव। 12 परमेशर अपने अनुग्रहें ज़िरिये असन शिखालते, परमेशर असन शिखालते कि अस तेरोहो बर्ताव न केरम ज़ैस सेइ तै खुश भोए। जेन्चरे गैर विश्वासी चीज़ां केरू लालच केरतन तुस एरू न केरा, तुस ज़ांतगर इस दुनियाई मां आथ, अक्लमन्द ते धर्मी लोकां केरो ज़ेरो ते एरो ज़ेरो बर्ताव केरा ज़ैस सेइ परमेशर खुश भोते। (aiōn g165) 13 अस तैस अनोखी दिहेइरी उमीदी मां रातम, कि जेइस इश्शो महान परमेशर ते मुक्ति देनेबाले यीशु मसीह महिमाई सेइ साथी वापस एज्जेलो। 14 एने यीशु मसीहे अपने आप इश्शे लेइ बलिदान कियो ताके असन पापेरे शक्ति करां छुटकारो दे, ताके अस शुद्ध भोम ते तैसेरे अपने लोक बनम ज़ैना रोडां केरतन। 15 इना गल्लां शिखाल ते अपनो पूरो अधिकार इस्तेमाल केर, ते अपने शुन्नेबालन होसलो दे ते झिइक दे। कोई तीं घटया न समझै।

3 विश्वासी लोकन याद करा, कि हाकिमां ते अधिकैरी केरे अधीन रान, ते तैन केरो हुकम मन्न, ते हमेशा रोडो केरनेरे लेइ तियार रान। 2 कोन्वी बदनाम न केरन, लड़ाके न भोन, पन नर्म सुभावेरे भोन, ते सेबमी मैनु सेइ साथी बेडि नेरमी सेइ रान। 3 किजोकि अस भी पेइले बेअक्ल ते हुकम न मन्नेबाले थिये ते लोकेई असन धोखो दित्तोरो थियो। बड़े खुवेइशां ते एशेरे केरनेरे गुलाम थिये, इश्शो जिन्दगी दुष्टे ते जलनी सेइ भेरोरी थी ते एक्की होरि सेइ नफरत केरते थिये। 4 पन फिर भी इश्शे मुक्ति देनेबाले परमेशरें असन लोकन पुइ दया ते प्यार हिराव। 5 तैने अस इश्शे पापां केरि सज़ाई करां बचाए एल्हेरेलेइ नई कि असेई रोडां कम्मां कियोरां थियां, पन तैसेरे दयारे वजाई सेइ। तैन इश्शे पाप धोइतां असन नन्वू ज़र्म दित्तू ते पवित्र आत्मा देनेरे ज़िरिये असन नर्वी जिन्दगी दित्ती। 6 परमेशर पवित्र असन मुफते मां दित्तो कि इश्शे जिन्दगी मां शक्ति सेइ कम केरे, किजोकि यीशु मसीह इश्शो मुक्ति देनेबालो बननेरे लेइ इश्शे पापां केरे लेइ मरो। 7 परमेशरें इन कियू ताके ते अपने अनुग्रह सेइ अपने नज़री मां धर्मी बनाए, ताके अस तैसेरे बच्चे बनम ते पूरे तरीके सेइ हमेशा तैस सेइ साथी रानेरे उमीदी सेइ केरम। (aiōnios g166) 8 ई गल सच्चे, अवं चाताई कि तू इन शिक्षान पुइ ज़ोर दे ताके सब ज़ैना परमेशरे पुइ भरोसो रखतन तै अपनो आप रौडू केरनेरे लेइ सॉफेले, इना शिक्षां सेबमी केरे लेइ रोडी ते फैइदामंद आन। 9 पन बेवकूफी बेंस ते पूर्वजां केरे नव्वां केरे बारे मां, ते लड़ाई ते तैन ते मूसैरे कानूनेरे बारे मां लड़ाई करां दूर रा, किजोकि तैन सब बेकार ते बेफैदू आए। 10 ज़ैना लोक कलीसियाई मां फिरके बनानेरी वजा बनतन, कम से कम दूई बारू तैन खबरदार केर कि तैना एन न केरन, तैदां बाद अपनो वक्त तैन पत्ती बर्बाद न केर। 11 तुस ज़रूर ज़ैनी बटतथ एरो ज़ेरो मैनु ज़ैनी बुजझतां गलत

बत्तां चलते, ते तैन अपना बुरां कम्मां इन साबत केरतन कि तैना पापिन। 12 अवं अरतिमास या तुखिकुसे तुसन कां भेजनेरे लेइ बिस्तार बनाने लोरोई, जैखन तैन मरां अक तीं कां पुजते त निकुपुलिस नगरे मां मीं सेइ मिलनेरी पूरी कोशिश केर, किजोकि मीं तैड़ीए हिवतड़ो कटनो थापोरोए। 13 जैखन जेनास शास्त्री ते अपुल्लोस तैट्टां गानेरे लेइ तियार भोन त जेत्रू भोइ बटे तैन केरि मद्दत केर, ताके तैन कोन्वी भी चीज़री घटी न भोए। 14 सिर्फ इन नई, बल्के तू विश्वासी लोकन शिक्षा देतो रा, कि तैना रोड़ां कम्मां केरन ताके तैन लोकां केरि मद्दत केरन जैन ज़रूरत आए। इस सेइं तैन केरि मद्दत भोली कि तैना एक्की मकसदे सेइं ज़िन्दगी जींन। 15 सारे विश्वासी लोक जैना मीं सेइं साथी आन तीजो नमस्कार ज़ोतन। इश्शे विश्वासी सैथी लोकन जैना असन सेइं प्यार केरतन तैन नमस्कार। अवं प्रार्थना केरताई प्रभु तुसन सेबभन पुइ अनुग्रह केरतो राए।

1 अवं पौलुस ई चिट्ठी लिखने लोरोई। अवं कैदे मां आई किजोकि अवं यीशु मसीहेरे बारे मां प्रचार केरताई। हे फिलेमोन तीं इश्शे ढूला तीमुथियुस ते मेरे तरफां नमस्कार। तू इश्शो ढूलारो दोस्तस आस ते जेन्चरे अस मसीहेरे लेइ कम केरतम तेन्चरे तू भी केरतस। 2 अवं इश्शी विश्वासी बेइन अफफिया ते इश्शे सैथी अरखिप्युस जै सिपेहेरे जेरो प्रभुपरी सेवा केरते, ते तैन कलीसियारे लोक जैना तेरे घरे मां अकोट्टे भोतन, तैन भी लिखने लोरोई, 3 अवं प्रार्थना केरताई, इश्शे बाजी परमेशर ते प्रभु यीशु मसीह तुसन पुड़ अनुग्रह केरे ते तुसन शान्ति दे। 4 अवं ज़ैखन भी तेरे लेइ प्रार्थना केरताई, तेरे लेइ अवं परमेशरेरू शुक्र केरताई। 5 किजोकि मीं प्रभु यीशु मां तेरे विश्वासेरे बारे मां ते परमेशररे लोकां केरे लेइ तेरे प्यारे बारे मां शूनु। 6 अवं प्रार्थना केरताई तेरी संगती जै विश्वासी लोकन सेइं साथीए, तुश्शे तैन रोड़ि चीज़ां केरे ज़ान्नेरे ज़िरिये जैना परमेशरे दित्तोरिन बद्धती गाए। इन मसीहेरे महिमारे लेइ भोतू राए। 7 किजोकि हे ढूला, अवं तेरे प्यारे सेइं जै तू मीं केरतस बड़ो खुश आई, ते मीं बड़ो होसलो भोव, एल्हेरेलेइ कि तेरे प्यारेरे ज़िरिये होरे परमेशररे लोकन भी होसलो मैल्लो। 8 अवं तीं किछ केरनेरे लेइ पुछताई जैन तीं कियोरू लोड़े। अवं मसीहेरो दित्तोरे अधिकारे इस्तेमाल केरतां इन केरनेरे लेइ हुकम देइ बटलो थियो, पन अवं न केरेलो। इसेरे बदले मां, अवं बल्हे चारे ज़ोताई कि तू इन केर, किजोकि अस एक्की होरे सेइं ते परमेशररे लोकन सेइं प्यार केरतम। अवं पौलुस हुनी सियाने मैनेरे रूपे मां तीं पुछतई, अवं लोकेई कैदे मां बंद कियोरोई किजोकि अवं यीशु मसीहेरी सेवा केरताई। 10 अवं उनेसिमुसेरे लेइ मिनत केरताई जैन मेरे लेइ मट्टेरू जेरूए। तैन मसीह मां मेरू मट्टू इड़ी कैदखाने मां बनू। 11 ते बीतोरे वक्ते मां तेरे लेइ केन्ची कम्मरो न थियो, पन हुनी तेरे त कने मेरे दुइयां केरे बड़े कम्मरोए। 12 अवं उनेसिमुसे तीं कां वापस भेजने लोरोई, तैस सेइं अवं पूरे दिले सेइं प्यार केरताई। 13 अवं ज़ांतगर खुशखबरी प्रचार केरनेरे वजाई कैदखाने मां आई तांतगर तैस अपनि मदत केरनेरे लेइ इड़ी एप्पू सेइं साथी रखनो चातो थियो। ताके ते तेरे ठैरी मेरी मदत केरे, किजोकि अवं ज़ानताई तू मेरी मदत केरनि चातस। 14 पन मीं तेरी मेज़ीं बगैर किछ भी केरनू न चाव, अवं चाताई तू ई मेरी मदत केर, किजोकि तू इन केरनेरे लेइ खुश आस ते एल्हेरेलेइ नई कि अवं इन केरनेरे लेइ दबाव बनाने लोरोई। 15 शैइद परमेशरे उनेसिमुस एल्हेरेलेइ तीं करां नश्शने दित्तो, ताके ते मसीह पुड़ विश्वास केरे, ते तैसेरो नितीजो ई भोए कि ते हमेशा तीं सेइं साथी राए। (aiōnios g166) 16 पन हुनी ते तेरो गुलाम नई, बल्के गुलामे करां भी बेद्धतां आए। ते हुनी तेरो ढूलारो विश्वासी ढूला आए। अवं तैस सेइं बड़ो प्यार केरताई, पन तीं तैस अपने गुलामेरे रूपे मां होरो भी प्यार कियोरो लोड़े किजोकि ते मसीह मां अक ढूलाए। 17 अगर तू मीं शामिल समझतस, त ज़ैखन उनेसिमुस वापस तीं कां एज्जे त तैस एन्चरे कबूल केर ज़ेन्चरे मीं। 18 ते अगर तैने किछ तेरो नुकसान कियोरोए, या तेरे किछ पेइंसां केरो कर्जो भोए त अवं तैसेरे बदले देइलो। 19 अवं पौलुस अपने हथ्थन सेइं लिखताई, कि अवं तीं एप्पू वापस देइलो, तू इन पेइलू ज़ानतस, अगर मीं तेरी मदत न भोथी कियोरी त तीं अपने आपे सेइं न भोथू मैलोरू, मेरो कर्जो जै तीं पुड़े ते तेरी अपनि ज़िन्दगी आए। 20 हे मेरे ढूलारे दोस्त, साथी विश्वासी भोनेरे वजाई सेइं इन मेरे लेइ केर ते मसीह मां मीं खुश केर। 21 मीं ई चिट्ठी लिखोरीए, किजोकि मीं याकीन कि जैन केरनेरे लेइ ज़ोरू तैन तू केरेलो। हकीकति मां अवं ज़ानताई तू तैस करां भी बडू जादे केरेलो, जैन केरनेरे लेइ मीं ज़ोरूए। 22 ते अक होरे गल, तू अपने घरे मां मेरे लेइ अक कमरो तियार केर। किजोकि मीं उमीदे परमेशर तुश्शे प्रार्थनां केरो जुवाब देलो ते तीं कां फिरी एजने देलो। 23 इपफ्रास, जै यीशु मसीहेरी खुशखबरी प्रचार केरनेरे वजाई सेइं मीं साथी कैदीए ते तीं नमस्कार ज़ोते। 24 ते मरकुस ते अरिस्तर्खुस ते देमास ते लूका

इब्रानियों

1 परमेश्वर बड़े पेड़ले इश्शे दादे पड़दादन सेइं बड़े बारे ते अलग-अलग किसमे सेइं नेबी केरे जिरिये गल्लां की। **2** पन इन आखरी दिहाइन मां परमेश्वर असन सेइं अपने मट्टेरे जिरिये गल्लां की, जैन तैनी सैरी चीजां केरू बारस ठहराव ते तैसेरे जिरिये परमेश्वर सारी सष्टि बनाई। (aiōn g165) **3** मट्टू परमेश्वरी महिमा प्रकाश आए, ते तैन हर किसमे सेइं परमेश्वर जेरू आए, तैन्ने सैरी चीजन अपने शेकरे वचनेरे जिरिये सेइं संभालते, तैन्ने लोकन पापन करां शुद्ध केरतां स्वर्ग मां परमेश्वर महिमा मां देइने पासे बिश्शू। **4** एन केरने सेइं परमेश्वर मट्टू, स्वर्गदूतन करां महान कियूं, ते जैन नवं तैस दित् जेवं तैन स्वर्गदूतन करां महान आए। **5** किजोकि परमेश्वर स्वर्गदूतन मरां कोन्ची सेइं कथे नईं जोरू, “तू मेरू मट्टू आस; अज्र अवं इन बांदू केरताई तू मेरू मट्टू आस” ते फिरी परमेश्वर केन्ची स्वर्गदूते सेइं इन नईं जोरू, “अवं तैसेरो बाजी भोइलो, ते तैन मेरू मट्टू भोलू” **6** ते फिरी परमेश्वर अपने पेड़ले मट्टे दुनियाई मां भेजने करां पेड़लू, इन जोवं, “परमेश्वर सब स्वर्गदूत तैस कां मथ्थो टेकन।” **7** परमेश्वर स्वर्गदूतां केरे बारे मां इन जोते, “तै अपने स्वर्गदूतन हवारे जेरे बनाते, ते अपने सेवकन अगारे लपारे जेरे बनाते।” **8** पन परमेश्वर अपने मट्टेरे बारे मां जोते, “हे परमेश्वर तेरू राज सदा रालू, ते तू इन्साफे सेइं राज केरेलो। (aiōn g165) **9** जैन रोडूए तैस केरने सेइं तू प्यार केरतस ते जैन गलते तैन केरने सेइं नफरत केरतस; एल्हेरेलेइ तेरे परमेश्वर तू चुनोरोस ते तेरे सैथन करां जादे तीं आदर ते आनन्द दित्तोरोए।” **10** ते पवित्रशास्त्र इन भी जोते, “हे प्रभु, तीं शुनस मां दुनियारी रचना की;” ते जैन किछ अन्बरे मां आए तैन तीं बनाई। **11** तैन सब किछ खतम भोइ गानूए; पन तू हमेशा रालो; ते तैन सब किछ लिगडां केरू जेरू पुरान भोइ गालू। **12** ते तू तैन चादराख जेरो बनालो, ते तैन लिगडां केरू जेरू बेदलोई गालू; पन तू कथे न बेदलोस; ते तेरी जिन्दगी कथी खतम न भोली। **13** ते परमेश्वर स्वर्गदूतन मरां केस सेइं किताली जोवं, ‘तू मेरे देइने पासे आदरारे ठैरी बिश,’ ते अवं तेरे दुश्मन तेरे अधीन केरेलो।” **14** तैना सब स्वर्गदूत सिर्फ परमेश्वर सेवक आन; परमेश्वर तैना तैन लोकां केरि हिफाजत केरनेरे लेइ भेजोरेन जैन मुक्ति मैलोरीए।

2 एल्हेरेलेइ, जैना गल्लां असेईं शुनोरिन, तैन पुड़ असेईं होरो भी मन लेइतां ध्यान कियेरू लोडे, कोस्कोई एरू न भोए, कि असां टेपलोइतां तैन करां दूर चले गाम। **2** किजोकि जैन वचन परमेश्वर स्वर्गदूतां केरे जिरिये जोरू थियूं, तैन सच्चू साबत भोवं, ते हर एककी पाप केरनेबाले ते हुकम न मन्नेबाले सजा मैलली। **3** त असन भी सजा मैलली, अगर अस एत्री महान मुक्ति करां बे खबर राए त। जेसेरे बारे मां पेड़ले प्रभुए एणू जोरूए, ते जैन चलेई एन प्रभु करां शुनोरि थियूं तैन केरे जिरिये असन याकीन भोवं कि एन सच्र आए। **4** परमेश्वर भी निशान ते चमत्कार ते बड्डां-बड्डां कम्मां केरे जिरिये ते अपने मेरजरे मुताबिक लोकन पवित्र आत्मा रे जिरिये वरदान देइतां इन साबत कियूं। **5** परमेश्वर एजने बैली दुनिया जेसेरे बारे मां अस जोने लोरेम, स्वर्गदूत केरे अधीन मां न की पन प्रभु यीशुए अधीन की। **6** बल्के पवित्रशास्त्रे मां कोस्कोई केन्चे परमेश्वर सेइं एन जोरूए, “मैन्हु कुन चीजे, जेसेरे बारे मां तू सोचतस? या इन्सान कौने, कि तू तैसरी फिक् केरतस? **7** तीं ते शक्ति मां किछ वक्तेरे लेइ स्वर्गदूतन करां थोडो जेरो घट कियो, ते तीं तैस राजेरी जेरि महिमा ते आदर दित्तोरीए, ते तैस अपने हथ्थां केरे कम्मन पुड़ अधिकार दित्तो। **8** तीं तैस सेबभी चीजन पुड़ अधिकार दित्तोरोए,” जेउन सब किछ तैसरे अधिकारे मां कियूं, ते किछ भी बाकी न रख्खू, जैन तैसरे अधीन न भोए। पन असां हुन्ना तगर सैरी चीजां तैसरे अधिकारे मां न लहम। **9** पन असां यीशु लहतम, जै स्वर्गदूतन करां किछ वक्तेरे लेइ निकडो कियोरो थियो, ताके ते परमेश्वर अनुग्रह सेइं सेबभी केरे लेइ अपनि जान दे। किजोकि यीशुए दुख बरदाश कियो ते मरो, ते हुनी अस ज्ञानतम कि तैस महिमा ते आदर दित्तोरीए। **10** परमेश्वर सब किछ बनाव, ते तै सब किछ

अपने लेइ सुमैलतां रखते। परमेश्वर ठीक कियूं जैन तैनी दुखेरे जिरिये यीशु सिद्ध कियो, ताके ते बड़े लोकन महिमा मां पुजाए। किजोकि यीशु ही आए जै असन मुक्तेरे पासे नेते। **11** किजोकि पवित्र केरनेबालेरो ते पवित्र भोने बालां केरो बाजी अक्के, एल्हेरेलेइ यीशु तैन जो ढला बेइन जोने करां न शरमाए। **12** पन मसीह परमेश्वर सेइं जोते, “अवं अपने लोकन इन जोएलो कि तीं मेरे लेइ इन कियोरूए ते तैन केरे सभाई मां तेरे नव्वेरू गीत जोइलो।” **13** ते फिरी तै जोते, “अवं तैस पुड़ भरोसो रेखेलो।” ते फिरी तै जोते, “अवं तैन लोकन सेइं साथी भोनोई, जैना परमेश्वर मीं दित्तोरिन।” **14** किजोकि जेन्चरे परमेश्वर बच्चे, मैन्हु आन, तेन्चरे यीशु भी तैन केरो जेरो मैन्हु बनो। परमेश्वर एन एल्हेरेलेइ कियूं ताके तैसेरे मौतरे जिरिये शेताने बरबाद केरे जैस कां मौतरो अधिकार थियो। **15** ते एन्चरे तैनी तैना आज्ञाद किये जैना मौतरे डरे सेइं सैरी उमरी गुलामेरे जेरे जीते थिये। **16** किजोकि प्रभु यीशु स्वर्गदूतां केरि नईं बल्के अब्राहमेरे वंशरी मद्दत केरते। **17** एल्हेरेलेइ यीशु मसीह हर गल्ली मां मैन्हु केरो जेरो बनू ज़रूरी थियूं, ताके सेबभी केरे पापां केरे बलिदानेरे लेइ परमेश्वर सामने दया केरनेबालो ते ईमानदार महायाजक बने। **18** किजोकि यीशुएरी अजमेइश कीजेई ते तैनी एणू दुःख झेल्लोरोए, एल्हेरेलेइ तै तैन लोकां केरि मद्दत केरि बटते, जैना आजमेइशरो सामनो केरतन।

3 एल्हेरेलेइ हे विश्वासी ढूलाव ते बेइनव, तुस परमेश्वर स्वर्ग मां तैस सेइं शामिल भोनेरे लेइ कुजोरेथ। एल्हेरेलेइ प्रभु यीशुएरे बारे मां ध्यान देथ जै इश्शे लेइ परमेश्वर बिस्तार आन्ने बालो दूत ते महायाजक आए जेसेरो अस इकरार केरतम। **2** यीशु परमेश्वर लेइ वफादार थियो, जैनी तै ठहरावरो थियो, जेन्चरे मूसा भी परमेश्वर लोकां केरि सेवाई मां वफादार थियो। **3** किजोकि घर बनानेबालो घरे करां जादे इज्जतरे काबल समझो गाते, तेन्चरे यीशु भी मूसा करां जादे इज्जतरे काबल समझो जेव। **4** किजोकि हर घरेरो कोई न कोई बनानेबालो ज़रूर भोते, पन जैनी सब किछ बनावं तै परमेश्वर। **5** मूसा त परमेश्वर सेवक भोने सेइं परमेश्वर घरेरे लोकन मां वफादार राव। ताके तैना गल्लां केरि बटे, जैना परमेश्वर एजनेबाले वक्ते मां जोनेबालो थियो। **6** पन मसीह मट्टू भोनेरे वजाई सेइं परमेश्वर लोकां केरू मुखतियारे, ते असां तैसेरे लोकम, शर्त एने कि असां तैस दिलेरी ते उमीदी मजबूत रखम, जैस पुड़ असां भरोसो केरतम। **7** बस्सा पवित्र आत्मा जोते, “अगर अज्र तुस परमेश्वर आवाज शुनथ। **8** त अपने दादे पड़दादां केरे जेरे तैसेरो हुकम मन्ने करां इन्कार न केरथ, जैखन तैनेई परमेश्वर खलाफ खलाफत की, ते जेन्चरे तैस दिहाडे तुशे दादे पड़दादेई जेइस तैना सुनसान ठैरी मां थिये, तैनेई परमेश्वर अजमेइश की। **9** तैदी तुशे दादे-पड़दादे **40** सालन तगर मेरां महान कम्मां हेरनेरे बाद भी, अवं चनोती देइतां अज्रमाव। **10** एल्हेरेलेइ अवं तैस वक्तेरे लोकन पुड़ क्रोधे भोव, ते मीं जोवं, तैना हमेशा मेरो इन्कार केरतन, ते जैन केरनेरो मीं हुकम दित्तोरोए तैन केरने करां इन्कार केरतन। **11** एल्हेरेलेइ मीं एपनी सरकी मां कसम खाइ, कि तैना तैस ठैरी कथे दाखल न भोले जैदी अवं तैन आराम देथो।” **12** हे ढूलाव ते बेइनव खबरदार राथ, तुसन मरां केन्चेरो दिल एत्रो बुरो ते बेईमान न भोए, कि जै तैस जीते परमेश्वर करां दूर केरे। **13** पन ज्ञातगर तै दिहाडी जैस जो अज्र जोतन, रोज एक्की होरि हिम्मत देते राथ, एरू न भोए कि तुसन मरां कोई पापेरे धोखे मां एइतां परमेश्वर लेइ सखत दिल न भोइ गाए। **14** किजोकि अगर असां अपने पेड़ले विश्वासे पुड़ अपने मौती तगर लगातार मजबूत रातम, त अस अकोडू कम केरने मां मसीह सेइं साथी जुइतम। **15** जेन्चरे पवित्रशास्त्रे मां लिखोरूए, “अगर अज्र तुस तैसरी आवाज शुनथ त तुस अपने दिले सखत न केरा, त अपने दादे पड़दादां केरे जेरे तैसेरो हुकम मन्ने करां इन्कार न केरथ, जैखन तैनेई परमेश्वर खलाफ खलाफत की।” **16** तैना लोक कौन थिये, जैनेई परमेश्वर आवाज शुन्तां भी तैसेरे खलाफ खलाफत की? तैना सब लोक तैना थिये जैना मूसेरे जिरिये मिस मुलखे मरां निसोरे थिये। **17** तैना कौन लोक थिये, जैन सेइं परमेश्वर **40** सालन तगर

क्रोधे राव? तैना लोक तैना थियो, जैनेई पाप कियो ते मेरतां तैन केरि लाशां सुनसान ठैरी मां रेड जेई। 18 जैखन परमेशरे क्रोधे मां कसम खाइ, कि तैना तैस ठैरी कथे दाखल न भोले जेई अवं तैन आराम देथो, हकीकति मां ते तैन केरे बारे मां जोतो थियो जैनेई हुक्म न थियो मन्नोरो। 19 बस्सा, असन हुनी पतो लगे, कि तैना विश्वास न केरनेरी वजाई सेई तैडी दाखल न भोइ सके।

4 एल्हेरेलेइ जैखन परमेशरो ए वादोए कि असां तैस आरामे मां दाखल भोइ सकतम, ते असेई खबरदार राहेरु लोडते, ताके कोरकोई एरु न भोए, कि तुसन मरां कोई तैस मां दाखल भोने करां एरो रेड गाए। 2 किजोकि जेन्चरे असेई यीशु मसीहेरी खुशखबरी शुनी, तेन्चरे इस्राएली लोकेई भी आरामे ठैरी दाखल भोनेरी खुशखबरी शुनोरी थी। पन तैनेई तैस पुइ विश्वास न कियो, एल्हेरेलेइ ते सन्देश तैन केरे लेइ बेफेइदो भोव। 3 पन असेई जैनेई विश्वास कियो, परमेशरे तैस वादो कियोरे आरामे मां दाखल भोतम, जेन्चरे परमेशरे जोरु थियू, “मीं अपने क्रोधे मां कसम खाइ, कि तैना तैस ठैरी कथे दाखल न भोले जेई अवं तैन आराम देथो।” परमेशरे एन एल्हेरेलेइ नई जोरु, किजोकि हेजू तगर आरामेरी ठार तियार न थी, पन तै ठार दुनिया बनानेरे वक्ते करां तै तियार आए। 4 किजोकि परमेशरे सत्तोवं दिहेइदारे बारे मां पवित्रशास्त्रे मां एन्चरे जोरु आए, “परमेशरे अपना सब कम्मां खतम केरतां सत्तोवं दिहाइ आराम कियो।” 5 ते अस भी इन पढतम कि तैनी बादे मां जोव, “एना मेरे आरामेरे ठैरी कथी दाखल न भोले।” 6 तैना इस्राएलेरे लोक जैनेई पेडली ई खुशखबरी त शुनी, पन आरामेरे ठैरी दाखल भोने मां कामयाब न भोए, किजोकि तैनेई परमेशरे हुक्म न मन्ने। पन हुन्ना भी किछ लोकां केरे लेइ आरामेरे ठैरी दाखल भोनेरे लेइ मौको आए। 7 एल्हेरेलेइ परमेशरे कोई होरो वक्ते अपने आरामेरे ठैरी मां दाखल भोनेरे लेइ ठहरावरो, तै वक्त अज्र आए, इशो दादे पड़दादेई खलाफ केरनेरे बडे सालना बाद परमेशरे दाऊदरे जिरिये जोव, जेन्चरे तैने जोव “अगर अज्र तुस तैसेरी आवाज शुनथ, त अपनो दिल सखत न केरा।” 8 अगर यहीशुए तैना लोक आरामे मां दाखल करावरे भोथे त बादे मां परमेशरे होरि दिहेइदरे बारे मां गल न थी केरनि। 9 एल्हेरेलेइ परमेशरे लोकां केरे लेइ एरी ठार तियार आए जेई तैना पूरे तरीके सेई आराम केरि बटतन। तैना तेन्चरे आराम केरेले जेन्चरे परमेशरे सत्तोवं दिहाइ आराम कियोरो थियो। 10 किजोकि जै कोई परमेशरेरे आरामे मां दाखल भोते त तै परमेशरो जेरो अपने कम्मन पूरे केरतां आराम केरते। 11 एल्हेरेलेइ एज्जा अस भी तैस आरामेरी ठैरी मां दाखल भोनेरी कोशिश केरम, ताके कोई भी मैनु इस्राएली लोकां केरे जेरो हुक्म न मन्तां तैस आरामेरी ठैरी दाखल भोने करां रेड न गाए। 12 किजोकि परमेशरेरु वचन जौतू ते शेक्ति बालू आए, ते हर दूई धारण बैली तलवारी करां भी जादे तिखवू आए। ते तैन प्राण ते आत्माई गहराई तगर चीरते, जेन्चरे तिखवी तलवार जोडन ते हेडी केरे अन्त्रीयां मासे वारां पार चिरतां निसतीए ते दिलेरे खियाल ते मैनेरो इरादो भी जानते। 13 दुनियारी कोई भी चीज परमेशरेरी नजरी करां छप्योरी नई, बल्के तैसेरे सामने सब चीजां खुल्ली ते बँदिन, ते असेई तैस, जैन किछ भी अपने पूरे जिन्दगी मां कियोरु तैसेरो हिसाब देनो पेनोए। 14 बस्सा, एज्जा अस अपने विश्वासे पुइ मजबूत रहम। किजोकि इशशो अक महान महायाजके, जै स्वर्ग मां जोरोए, यानी परमेशरेरु मट्टू यीशु। 15 किजोकि इशशो महायाजक इशशी सैरी कमजोरी समझते। किजोकि शैताने ते सेबमी गल्लन मां इशशो जेरो अज्रमाव, पन तैनी कोई पाप न कियो। 16 एल्हेरेलेइ एज्जा असां दिलेरी सेई, अनुग्रह देनेबाले परमेशरेरे तखतेरे सामने चलम, ताके तै असन पुइ अनुग्रह ते दया केरे ते ज़रूरतेर मौके तै इशशो मद्दत केरे।

5 परमेशरे हर महायाजक इस्राएली लोकन मरां चुनो, ते परमेशरे महायाजक, लोकां केरि तरफां अपनि सेवा केराने लेइ ठहराए, ताके तैना लोकां केरे मेफरे लेइ चढ़तल ते पापां केरु बलिदान चाढ़न। 2 किजोकि अक याजक एप्पू बेडि गल्लन मां कमजोरे, एल्हेरेलेइ तै बेसमझ, ते टेपलोरे

लोकन नेरमी सेई बर्ताव केरि बटते। 3 किजोकि तै एप्पू कमजोरे, एल्हेरेलेइ तैस न सिर्फ लोकां केरे पापां केरे लेइ, बल्के अपने पापां केरे लेइ भी बलिदान चाढ़नेरि ज़रूरत भोतीए। 4 कोई मैनु अपने लेइ महायाजकेरी पदवी अपने आपे सेई हासिल न केरि सखे, जांतागर तै हास्नेरो जेरो परमेशरेरी तरफां कुजाव न गाए। 5 तेन्चरे मसीहे भी महायाजक बेनतां अपनि आदर न की, बल्के परमेशरे तैस आदर दिती जैखन तैने जोव, “तू मेरु मट्टू आस, अज्र अवं इन बांदू केरताई तू मेरु मट्टू आस।” 6 एल्हेरेलेइ परमेशर फिरी एक्की होरि ठैरी जोते, “तू मोलिकिसिदकेरो जेरो हमेशारे लेइ याजक आस।” (aiōn g165) 7 यीशुए एक्की मैनेरी जेरि जिन्दगी गुजारनेरे दिहाइन मां फुकैरी-फुकैरी ते लेरां देइ-देइ परमेशरे कां प्रार्थना ते बिनती की, जै तैस मोती करां बचेइ सकतो थियो, ते परमेशरेरे लेइ तैसेरे भक्तेरे वजाई सेई परमेशरे तैसेरी फरयाद शुनी। 8 ते परमेशरेरु मट्टू भोइतां भी तैनी दुख झैल्लतां हुक्म मन्ने शिखो। 9 जैखन तैनी तैन सब कियू जैन तैनी कियेरु लोइतू थियू, त तै तैन केरे लेइ हमेशारे लेइ मुक्तेरो जिरियो बनो, जैना तैसेरे हुक्म मन्तन। (aiōnios g166) 10 ते तैस परमेशरेरी तरफां मेलिकिसिदकेरी जेरि महायाजकेरी पदवी मेल्ली। 11 असन कां इस बारे मां जोनेरे लेइ बडू किछ आए, पन तुसन समझानू मुश्किले, किजोकि तुस समझाने मां सुसतथ। 12 द्रासले मां अज्र तगर तुस गुरु बनोरे लोइते थियो, किजोकि तुसन विश्वास कियोरे बडू चिर भोरुए। पन हुन्ना त ज़रूरत इस गल्लरीए कि कोई मैनु तुसन परमेशरेरे वचनेरी शुरुआतरी गल्लां दुबारां शिखाले। तुस तैन बच्चां केरे जेथे जैन हेजू दुद्ध पीतन ते शुरी रोटी न खेइ बटन। 13 जै दुद्ध पीते, तै हेजू बच्चो भोते, किजोकि तैस नई पतो सही कुने ते गलत कुने। 14 पन शुरी रोटी तैन केरे लेइ भोचे जैना विश्वासे मां बडेन, ते अपने तजरबे सेई इस काबल भोरन, कि रोडे ते बुरे मां फ्रक सेमझी सखन।

6 एल्हेरेलेइ एज्जा अस मसीहेरे बारे मां शुरुआतरी शिक्षारी गल्लां बार-बार दोरहानेरे बगैर अस सिधतारे पासे चलते रहम। ते मौतरे पासे नेनेबाले कम्मन करां मन फिराम ते परमेशरे पुइ विश्वास केरनो, 2 बपतिस्मे ते हथ रखनेरी शिक्षारे बारे मां, ते मुडदां केरे जीते भोनेरे बारे, ते हमेशारे इन्साफेरे बारे मां दुबारा गल न केरम। (aiōnios g166) 3 एज्जा अस परिपक्व विश्वासी बनम! अगर परमेशर अजाज़त दे त असां इन केरमेले। 4 जैना लोक अपने विश्वास शारतन तैन फिरी मनफिरानेरे पासे केन्चरे आने गान? तैनी एक्की बारे परमेशरेरी सज़्जाई पिशानोरी थी, ते तैन स्वर्गां वरदाना मैलोरो थियां ते तैनेई होरन सेई साथी पवित्र आत्मा हासिल कियोरो थियो। 5 तैनेई मैसूस कियोरु थियू कि परमेशरेरु वचन रोडू आए, ते तैनेई एजनेबाले ज़मानेरी शक्ति मैसूस कियोरी थी। (aiōn g165) 6 ते हुनी तैनेई अपनो विश्वासे शारोरो! एल्हेरेलेइ तैन मनफिरानेरे पासे आनू मुश्किले, किजोकि तैना एप्पू परमेशरेरे मट्टे फिरी क्रूसे पुइ चाढ़ने लोरेन! ते लोकां केरे सामने तैसेरी बेइजी केरने लोरेन। 7 जैन लोकन रोडी शिक्षा मैलोरीए तैना तैस ज़मीनेरे जेरे आन ज़ैस पुइ झीडी लगती रातीए। अगर ज़मीन रोडीए त ज़िमदाररे लेइ रोडी फसल देचे, ते तैस परमेशरेरी तरफां बरकत मैलचे। 8 होरे लोक तैस ज़मीनेरे जेरे आन ज़ैस मां कंटे ते झैल्लां लगतन ते तै कोन्वी कम्मरी नई। ते परमेशर तैस ज़मीनी फिटकार देनेबालोए ते आखरी मां तैस अग्गी मां बरबाद केरेलो। 9 हे मेरे ट्वाले ढूलाव ते बेडनव, हालांकी असां एरी गल्लां जोतम फिर भी अस विश्वास केरतम कि एन तुशो लेइ नई। इशशो भरोसोए कि तुस रोडी गल्लां केरे लेइ आथ जैना मुक्तेरे जिरिये एडितन। 10 किजोकि परमेशर बेडनसाफ नई कि जै तुशू कम ते प्यार बिसरी गाए, जै तुसेई तैसेरे लोकां केरि सेवा केरनेरे जिरिये तैसेरेलेइ हिरावरोए। ते परमेशर याद केरेलो कि तुस हेजू भी तैन केरि मद्दत केरने लोथे। 11 इशशी इच्छा ई आए कि तुस जांतागर जीतेथ रोडी बर्ताव केरते राथ, इन पक्कू केरनेरे लेइ कि तुशुमी उमीद सच भोली। 12 तैखन तुस आलसी न बनेले। पन तुस तैन केरे जेरे चलेले जैना अपने विश्वास ते सबरारे वजाई सेई परमेशरेरे वादां केरे बारस भोले। 13 जैखन परमेशरे अब्राहमे सेई वादो कियोरो थियो त कसम केरनेरे लेई तैस करां बड्डो

कोई न थियो, एल्हरेलेइ तैनी अपनि ही कसम कमाइतां ज़ोवं, 14 “अवं तीं सच्छे बरकत देइलो, ते तेरू वंश बेशुमार बेधेइलो।” 15 एल्हरेलेइ अब्राहम तेन वादन हासिल केरनेरे लेइ सवरी सेई इंतज़ार केरतो राव। 16 मैन्हु त एप्पु करां बडां केरे नव्वेरी कसम केरतन ते एन्चरे तैन हर मसलेरो हल कसम केरतां खतम भोते। 17 एल्हरेलेइ परमेशरे भी कसम खाइ, एन केरने सेई तैनी तैन लोकन जैन सेईं वादो कियोरो थियो, इन हिरानू चाऊ कि ज़ै वादो तैनी कियोरोए तै पूरो केरेलो। 18 त इडी दूई गल्लां आन तैसेरो वादो ते तैसेरी कसम, ज़ैना कथे न बेदलोने ते तैन केरे बारे मां परमेशर कथे झूठ न जोए। एल्हरेलेइ अस ज़ैना तैसेरे सहारे मां ओरिम त ज़ै उमीद असन दित्तोरीए, तैस मां अस बनोरे रहम, ते अस बडे जादे जोशे मां आम। 19 इश्शी उमीद प्राणा केरे लेइ पक्की आए तै टेली न बटे ते ई असन परमेशरे करां भटकने न दे, बल्के ई असन परमेशरे मन्दरे मां महा पवित्र ठैरी पुजातीए। 20 ज़ैडी यीशु इश्शे लेइ मेलिकिसिदक महायाजकेरो ज़ेरो हमेशारो महायाजक बेनातां इश्शे लेइ बत हिराने बालेरो ज़ेरो दाखल भोव। (aiōn g165)

7 ई मेलिकिसिदक शालेमेरो राज़ो ते परमप्रधान परमेशरेरो याजक थियो, ज़ैखन अब्राहम राज़न मौरतां वापस ओरो थियो, त मेलिकिसिदके तैस सेईं मिलतां तैसेरी बडी आदर की ते तैस बरकत दित्ती। 2 अब्राहमे तैस तैन सेब्भी चीजां केरो दशोवं हिस्सो दित्तो ज़ैना तैनी कब्ज़ो केरतां एनोरी थी। मेलिकिसिदकेरो नव्वेरो मतलब धार्मिकतारो राज़ो आए, ते शालेमेरो मतलब शैन्तरो राज़ो। 3 तैसेरो न कोई बाजी, न अम्मा, न तैसेरू कोई वंशे, न तैसेरी ज़रमनेरे बारे मां न तैसेरे मरनेरे बारे मां लिखोरूए। तै परमेशरेरे मट्टेरो ज़ेरोए तै हमेशारे लेइ याजक बनोरो रहते। 4 पन हुनी इस पुइ ध्यान देथ मेलिकिसिदक केत्रो महान थियो। ज़ैस पूवज अब्राहमे कब्ज़ो कियोरी चीजां केरो दशोवं हिस्सो दित्तो। 5 मूसेरे कानूनेरे मुताबिक ज़ैना लेवेरे खानदाने मरां थियो यानी ज़ैना याजक ठहराए गानन, तैन हुक्म दित्तो जोरोए कि तैना इसाएली लोकन यानी अपने लोकन करां दशोवं हिस्सो नेन, हालांकी तैना भी अब्राहमेरी वंशे मरां आन। 6 पन मेलिकिसिदके ज़ै लेवी केरे वंशे मरां न थियो फिरी भी अब्राहमे करां दशोवं हिस्सो नीयो, ते तैस बरकत दित्ती ज़ैस सेईं परमेशरे वादो कियो थियो। 7 अस पक्कू ज़ानतम कि ज़ै बरकत देते तै बरकत मैलने बाले करां महान आए। 8 ते याजक ज़ैना दशोवं हिस्सो नेतन तैना तैन मैन्हु आन ज़ैना मरतन, पन मेलिकिसिदक पन करां भी महान आए, किजोकि पवित्रशास्त्र ज़ोते कि तै ज़ाँतो आए। 9 बल्के अस ज़ोईं सकतम कि लेवी भी ज़ै दशोवं हिस्सो नेते, अब्राहमेरे ज़िरिये मेलिकिसिदक जो दशोवं हिस्सो दित्तो। 10 एल्हरेलेइ कि ज़ैस मौके मेलिकिसिदके लेवेरे पूवज अब्राहमे सेईं मुलाकत की, तैस मौके लेवी ज़रमोरो भी न थियो। 11 इना लेवी याजकेरे आधारे पुइ कानून इसाएली लोकन दित्तोरो थियो, अगर लेवी ते याजकेरू कम ठीक थियू, त अलग किसमेरे याजकेरू बांदू भोनु ज़रूरी न थियू, ज़ै मेलिकिसिदकेरो ज़ेरो आए। पन हारूनेरो ज़ेरो नई। 12 किजोकि ज़ैखन याजकेरी पदवी बेदलोतीए त कानूनेरू बेदलोनु भी ज़रूरीए। 13 असां इना सैरी गल्लां मसीहरे बारे मां ज़ोने लोरेम ज़ै होरि गोत्रे मरां आए, ते तैस गोत्रे मरां केन्चे बलिदान केरनेरे ठैरी याजकेरी सेवा नई कियोरी। 14 किजोकि इन अस ज़ानतम, कि इश्शो प्रभु यहूदारे गोत्रे मरां थियो। ते मूसा एस गोत्रे मरां याजकेरे पेदवरे बारे मां कोई गल नई कियोरी। 15 मेलिकिसिदकेरो ज़ेरो अक होरो भी याजक एजने सेईं इन होरू भी साफ भोते। 16 किजोकि यीशु कानूनेरे हुक्मेरे मुताबिक याजक लोइतो थियो, पन तै नाश न भोनेबेली ज़िन्दगरे शक्तेर ज़िरिये महायाजक बनो। 17 किजोकि तैसेरे बारे मां परमेशर पवित्रशास्त्रे मां ई गवाही देते, “कि तू मेलिकिसिदके ज़ेरो हमेशारे लेइ याजक आस।” (aiōn g165) 18 एन्चरे मूसरो कानून कमजोर ते बेफल भोनेरे वजाई सेईं हुनी कम न केरि बटे। 19 (किजोकि मूसरे कानूने कोई गल्ली सिद्ध न केरि बटी) पन हुनी असन कां अक रोडी उमीदे ज़ेसरे ज़िरिये सेईं असां परमेशरेरे सामने एज्जी बटतम। 20 ते परमेशरे भी तैस वक्ते कसम खाइ ज़ैखन तैनी यीशु महायाजक बनाव। 21 किजोकि

होरे याजक त बगेर कसमा याजक बनाए, पन ज़ैखन यीशु, परमेशरेरी तरफां याजक बनाव त तैनी ज़ोवं, “अवं, प्रभु कसम खाताई, कि तू हमेशा याजक रालो ते अवं अपने मने कथी न बेदलेलो।” (aiōn g165) 22 एल्हरेलेइ यीशु ज़मानत देते कि पुरानो करार नव्वे करारे करां रोडो भोलो। 23 ते अक फर्के, किजोकि पेइले बडे याजक बेनातां आए, पन तैना सब मरे ते तैनेई लगातार याजकेरू कम न केरि बट्टु। 24 पन यीशु आखरी तगर रानेबालो याजके ते एल्हरेलेइ तैसेरी ठैरी होरो कोई याजक न रख्खो गाए। (aiōn g165) 25 एल्हरेलेइ ज़ैना लोक यीशुएरे ज़िरिये सेईं परमेशरे कां एइतन, यीशु तैन पूरी-पूरी मुक्ति देइ बटटे, किजोकि तै तैन केरे लेइ बिनती केरनेरे लेइ हमेशा ज़ाँतोए। 26 एल्हरेलेइ असन एरे ज़ेरो महायाजक ज़रूरी थी, ज़ै इश्शे ज़रूरतन पूरी केरे, ज़ै पवित्र, निष्कपट ते शुद्ध, ते पैपन करां अलग भोए ते ज़ै परमेशरे स्वर्ग जो नेवरो भोए। 27 ते होरि महायाजक केरू ज़ेरू यीशु ज़रूरी नई, कि पेइले अपने पापां केरे लेइ ते फिरी अपने लोकां केरे पापां केरे लेइ रोज बलिदानां चाढ़े, किजोकि यीशुए सेब्भी लोकां केरे पापां केरे लेइ एक्की बार अपनो आप बलिदान केरतां एरू बलिदान चाढ़ू ज़ैन हमेशारे लेइ आए। 28 किजोकि मूसरो कानून त तैन मैन्हु महायाजक भोनेरे लेइ ठहराते ज़ैना सिद्ध नई, पन मूसरे कानूनेरे बाद परमेशरे कसम खेइतां अपनू मट्टू ठहराव ते तैसेरू मट्टू हमेशारे लेइ सिद्ध महायाजक बनोरोए। (aiōn g165)

8 ज़ैना गल्लां हुन्ना अस ज़ोने लोरेम तैन मरां सेभना बड्डी गल ई आए कि इश्शे एरो महायाजक, ज़ै स्वर्ग मां परमेशरेरे महिमा बाले तखतेरे देइने पासे बिशोरोए। 2 ते ज़ै तैस महा पवित्र ठैरी ते तैस सच्छे तेम्बु मां सेवा केरते, ज़ै केन्चे मैने नई बल्के परमेशरे खडो कियोरोए। 3 किजोकि हर महायाजक पापां केरे मैफरे लेइ चढतल ते बलिदान चाढ़नेरे लेइ ठहराव गाते, एल्हरेलेइ ज़रूरी आए, कि इश्शे महायाजके (यीशु) कां भी किछ चाढ़नेरे लेइ भोए। 4 ते अगर यीशु दुनियाई मां भोथो त कथे कोई याजक न थियो भोनी, किजोकि इडी मूसरे कानूनेरे मुताबिक चढतल चाढ़नेरे लेइ याजक आन। 5 इना याजक ज़ैना कम केरतन, तैना सिर्फ स्वर्गेरे चीजां केरि नकल ते सैयोए, पन ज़ैना चीजां स्वर्ग मां आन। एल्हरेलेइ ज़ैखन मूसा तेम्बु बनानेरी तियेरी मां थियो, त परमेशरे तैस हदेइयत दित्ती, “हेर ज़ै नमनूो मीं तीं पहाडे पुइ हिरावरो थियो तैसेरे हिसाबे सेईं तू सैरी चीजां बना।” 6 पन हुनी ज़ै महायाजकेरी सेवा यीशु दित्तोरी तै पुराने याजकेरे सेवाईं करां बडी बड्डीए, किजोकि तै ज़ैना गल्लां केरि बिचवाईं केरते तैना पुराने करारे करां भी उच्ची आन, ते वादन पुइ तैसेरी बुनियादे। 7 किजोकि अगर पेइले करारे मां कोई खांमी न भोथी त होरो करार केरनेरी कोई ज़रूरत न थी भोनी। 8 पन परमेशर लोकन पुइ दोष लेइतां ज़ोते, “तक्का प्रभु ज़ोते कि तै दिहाडी एज्जी राहोरीए, इसाएलेरे लोक ते यहूदारे लोकन सेईं साथी नव्वो करार केरेलो। 9 ए तैस करारेरो ज़ेरो न भोलो ज़ै मीं तैन केरे दादे पइदादन सेईं तैस दिहाडे कियोरो थियो। ज़ैखन मीं मिस्रे मरां तैन कढनेरे लेइ तैन केरो हथ ठमोरो थियो, किजोकि प्रभु ज़ोते कि तैना मेरे तैस करारेरे मुताबिक वफादार न राए, एल्हरेलेइ मीं भी तैन केरे पासे कोई ध्यान न दित्तू। 10 प्रभु ज़ोते कि ज़ै करार अवं इसाएलेरे लोकन सेईं तैस मौके केरेलो ते ईए, कि अवं अपने कानून तैन केरे मन्न मां छेइलो, ते तैन केरे दिलन मां लिखेलो, ते अवं तैन केरो परमेशर भोलो ते तैना मेरे लोक भोले। 11 ते केन्ची ए ज़रूरत न भोली कि अपने पुडोसन, या अपने रिशतेदारन ए शिक्षा दे कि प्रभु पिशाना, किजोकि निकडे करां बडे तगर सब मीं पिशानेले। 12 एल्हरेलेइ अवं तैन केरे अधर्म माफ़ केरेलो, ते तैन केरे पापन फिरी कथे याद न केरेलो।” 13 ज़ैखन परमेशरे नव्वो करारे कमाव त पेइलो करारे पुरानो बनाव, ते ज़ै चीज़ पुरानी ते कमजोर भोती तै जल्दी खतम भोतीए।

9 पेइले करारेरे मुताबिक भी परमेशरेरी आराधना केरनेरे नियम थिये; ते आराधना केरनेरे लेइ मैन्हु केरि बनोरी अक ठार थी। 2 यानी अक तेम्बु बनोरो थियो, ते तैसेरे दूई हिस्से थिये, पेइले हिस्से मां अक दीवट (दीयो), मेज़ ते त्रैहोरो रोटी रेखोरी भोती थी, तैस हिस्से जो पवित्र ठार ज़ोते थिये। 3

ते होरि हिस्से मां पड़दे पतोरों ते ठार थी, तैस हिस्से जो परमपवित्र ठार ज़ोते थिये। 4 एसमां सोन्नेरी तै बलिदान केरनेरी ठार थी जैस पुड़ खुशबूदार चीज़ां बालते थिये, ते च्चेरे पासन सोन्ने सेइं पलेटोरो करारोरो सुंदुख थियो। ते तैस सुंदुखे मां मन्ने सेइं भेरतां अक सोन्नेरू भांड थियूं, ते कने हारूनेरी तै सौटी थी जैस पुड़ पटलां लगगोरों थियां ते दुईं घोड़ां केरि सलेटां थी, जैन पुड़ दश हुकम लिखोरे थिये। 5 एस सुंदुखेरे बेइयेंं पासे महिमा बाले करूब बनोरे थिये, जैना परमेशरेरी मौजूदगी हिराते थिये। तैना अपने-अपने फंगन सेइं तैस ठैरी सैयो केरि रावरे थिये, जैड़ी पाप माफ़ कियोरे थिये। पन हुनी इन गल्लन रोड़े च़ारे ज़ोनेरो वक्त नईं। 6 एना सब चीज़ां एस तरीके सेइं तियार केरनेरे बाद, याजक तेम्बेरे तैस पेड़ले हिस्से मां रोड़ गाते, ताके सेवारू कम पूरू केरन। 7 पन परमपवित्र ठैरी मां सिर्फ़ महायाजक साले मां सिर्फ़ एककी बार गाते। ते तै भी खून घिन्तां ताके अपनि ते अपने लोकां केरे पापां केरे लेइ बलिदान च़ाढ़े, जैना तैनेईं अनजाने मां किये। 8 एस नियमं सेइं पवित्र आत्मा इन हिराते, कि ज़ांतगर पेड़लो तेम्बु आए, तांतगर परमपवित्र ठैरी गानेरी बात बंदे। 9 ते इन सब किछ इस वक्तेरे लेइ अक मसाले, एस सेइं एन बांदू भोते कि ज़े च़दतल ते बलिदान याजक परमेशरे जो च़ाढ़ते थिये, तैस सेइं आराधना केरनेबालां केरो ज़मीर रोड़ेच़ारे शुद्ध भोनेर सभोए। 10 तैन केरो तलक सिर्फ़ खाने पीनेरे चीज ते अलग-अलग शुद्ध भोनेरे रसमन सेइं भोतो थियो। इन सिर्फ़ जिसमानी रसमां आन, इन तैखन तगर लागू भोतन ज़ांतगर परमेशरे नव्वों नियाम न बनाए। 11 पन ज़ैखन मसीह इश्शो महायाजक बेनतां अव, त तै रोड़ी चीज़ां घिन्तां अव जैना हुन्ना मौजूद आन। ते स्वर्गं मांजो परमेशरे हज़री मां जेव। ते तै हज़री एककी महान ते सिद्ध तेम्बेरो ज़ेरी आए, जै मैन्हु केरे हथ्यां केरे ज़िरिये सेइं नईं बनोरो ते न दुनियारो। 12 ज़ैखन मसीह तैस तेम्बु मांमेइं भोइतां पवित्र ठैरी दाखल भोव, त तैनी थावां ते बछड़ां केरो खून नईं, बल्के अपनो खूनेरे ज़िरिये एककी पेरे पवित्र ठैरी दाखल भोव ते असन इश्शो पापन करां हमेशारे लेइ छुटकारो दित्तो। (aiōnios g166) 13 किजोकि ज़ैखन थावां ते दांतां केरो खून ते बेछड़ी केरि मांजन अपवित्र लोकन पुड़ छक्के गाने सेइं तैना लोक जिसमानी तरीके पवित्र मन्ने गाते थिये, 14 त मसीहे सनातन आत्माेरे ज़िरिये सेइं अपनो आप परमेशरे कां बगैर पापेरू बलिदान केरतां च़ाढ़ू, ते तैसेरो खून असन इश्शो ज़मीरेरे तैन कम्मन करां होरो भी जादे पवित्र केरेलो, जैन केरो तलक मौती सेइं ए, ताके अस ज़ीते परमेशरेरी आराधना केरमा (aiōnios g166) 15 एहे वजा आए कि परमेशरे अपने ते दुनिया मत्नाके मसीह बिचवाईं बनेइतां तैसेरे ज़िरिये सेइं अक नव्वो करार बनावरोए, ताके जैना परमेशरेरे कुजोरेन तैना हमेशारी बरकत हासिल केरन जेसेरे लेइ परमेशरे तैना कुजोरेन। किजोकि पेड़ले दित्तोरे करारोरे अधीन कियोरे पापन करां तैन आज़ाद केरनेरे बदले मां मसीह मरोए। (aiōnios g166) 16 किजोकि वसीयतरे सिलसले मां वसीयत देनेबालेरी मौत साबत भोनी ज़रूरीए। 17 एल्हेरेलेइ वसीयत देनेबालेरे ज़ीते दम्मं तगर वसीयत कम्मरी न भोए, पन तैसेरे मरनेरे बाद ते वसीयत पक्की भोतीए। 18 एहे वजा आए कि पेड़लो करार भी खूनेरे बगैर नईं कियोरो। 19 एन्चरॉ ज़ैखन मूसा सैरी लोकन कानूनेरो अक-अक हुकम शुनाव, त तैनी थावां ते बछड़ां केरो खून पैनी मां मिलाव, ते फिरी लाल उन्ना ते जूफा सेइं एतां कानूनेरी किताबी ते सैरी लोकन पुड़ छिड़को। 20 ते ज़ोवं कि, “ए तैस करारोरो खूने जेसेरो हुकम परमेशरे तुश्शे लेइ दित्तोरोए।” 21 एन्चरे तैनी तेम्बु पुड़ ते आराधना केरनेरी सैरी चीज़न पुड़ खून छिड़को। 22 किजोकि मूसे कानूनेरे मुताबिक लगभग सैरी चीज़ां खूने सेइं पवित्र की गेइचन, ते ज़ांतगर खून न बगाव गाए, तांतगर पाप भी माफ़ न भोना। 23 त फिरी ए ज़रूरते कि तैना चीज़ां जैना स्वर्गरी नकल आन, तैना जानवरां केरे बलिदाने सेइं शुद्ध की गान। पन स्वर्गरी चीज़न इन करां भी जादे रोड़े बलिदाने सेइं शुद्ध भोनेरी ज़रूरते। 24 किजोकि मसीह मैन्हु केरे बनेवेरे घरे मां जैन सच्चे पवित्र ठारारी नकले, दाखल नईं भोरो, बल्के स्वर्गं मां दाखल भोव ज़ैड़ी ते इश्शे लेइ परमेशरे कां हाज़रे। 25 यहूदी केरो महायाजक पवित्र घरे मां हर साल होरि केरो यानी जानवरां केरो खून नेइतां गाते, पन मसीह अपने आपे बार-बार

बलिदान केरनेरे लेइ न गाए। 26 वरना दुनियारे शुरू करां लेइतां हुन्ना तगर तैस बार-बार दुख झैलनो पेथो; पन हुनी जुगेरे आखरी मां ते बांदो भोवं, ताके अपने बलिदाने सेइं पाप दूर केरे। (aiōn g165) 27 ते जेन्चरे सेइं मैनेरू मरनू ते एककी बार इन्साफेरू भोनु पक्कुए। 28 तेन्चरे सेइं मसीहे भी बड़े लोकां केरे पाप सैलतां गानेरे लेइ एककी बार बलिदान भोव, ते दुबारां पापां केरू बलिदान देनेरे लेइ नईं, बल्के तैन मुक्ति देनेरे लेइ एज्जेलो, जैना तैसेरे इंतज़ारे मां आन।

10 मूसेरो कानून एजने बैली रोड़ी चीज़ां केरो सिर्फ़ अक सैयोए, न कि असली रूपे। एल्हेरेलेइ एककी किसमेरां बलिदानां जैना हर साल च़ाढ़ां गातन, तैना परमेशरे कां एजने बालन कथे भी सिद्ध न केरि सखन। 2 अगर केरि सखथां, त कुन तैन केरू च़ाढ़नू बंद न भोथू? एल्हेरेलेइ अगर आराधना केरनेबाले एककी बारे हमेशारे लेइ पवित्र भोइ गथे, त तैन केरो ज़मीर तैन पापी न बनाथो। 3 पन तैना बलिदानां तैन लोकन हर साल याद करातन कि तैना पापिन। 4 किजोकि मुमकिन नईं, कि दांतां केरो ते थावां केरो खून पापे दूर केरि सके। 5 एल्हेरेलेइ ज़ैखन मसीह दुनियाईं मां ओरो थियो, त तैनी परमेशर सेइं ज़ोरू थियूं, “तीं बलिदान ते च़दतल न चाई, बल्के तीं मेरे लेइ अक जान तियार की। 6 तू न भस्म भोनेबाले बलिदाने सेइं, ते न पापेरे बलिदाने सेइं खुश भोवो।” 7 तेखन मसीहे ज़ोवं, “हे परमेशर, हेर, अवं तेरी इच्छा पूरी केरनेरे लेइ ओरोईं, जेन्चरे मेरे बारे मां पवित्रशास्त्रे मां लिखोरूए।” 8 पेड़ले त तै ज़ोते, न तीं कोई बलिदान ते न कोई च़दतल चाई, ते न भस्म भोनेबालू बलिदान ते न पापेरू बलिदान चाव, ते न तैन सेइं तू खुशी भोव, हालांकी एना बलिदानां मूसेरे कानूनेरे मुताबिक दित्तां गातन। 9 फिरी तै एन ज़ोते, “हेर, अवं तेरी मर्जी पूरी केरनेरे लेइ ओरोईं,” एन्चरे तै पेड़ले सारे बलिदानन हटाते ताके तैन केरे ठैरी मसीहेरे बलिदाने रख्खे। 10 परमेशरेरी मर्जी ई थी, कि यीशु मसीहेरे जिसम एककी बार बलिदान भोने सेइं अस हमेशारे लेइ पवित्र भोमा। 11 पेड़ले करारोरे मुताबिक हर याजक बलिदान केरनेरे ठैरी खड़े भोइतां रोज सेवा केरतन, ते एककी किसमेरां बलिदानां बार-बार च़ाढ़तन, जैना पापे कधी भी दूर न केरि सखन। 12 पन मसीह ज़ै इश्शो महायाजके, इश्शो पापां केरे लेइ एककी बार बलिदान भोइतां परमेशरेरे देइने पासे गेइतां बिश्शी जेव। 13 तैड़ी तै तैस वक्तेरो इंतज़ार केरने लोरोए, कि परमेशर तैसेरे दुश्मन पूरे तरीके सेइं हाराए। 14 तैनी एककी बलिदाने सेइं जैना लोक पवित्र कियोरेन, तैना हमेशारे लेइ सिद्ध कियोरेन। 15 पवित्र आत्मा भी एस गल्लरी गवाही देते। पेड़लू त एन ज़ोते कि 16 “प्रभु ज़ोते, कि ज़े करार अवं तैन दिहेइना बाद अपने लोकन सेइं केरेलो ते ईए, अवं अपने कानून तैन केरे मन्न मां छड़ेलो ते तैन केरे दिलन मां लिखेलो।” 17 ते फिरी एन भी ज़ोते कि, “अवं तैन केरे पाप ते बुरां कम्मां माफ़ केरेलो, ते फिरी कधी याद न केरेलो।” 18 बरसा, ज़ैखन तैन केरे पापां केरि माफ़ी भोइजेइ, त फिरी पापां केरे लेइ बलिदानेरी ज़रूरत नईं। 19 एल्हेरेलेइ ढ़लाव ते बेइनव, असन यीशुएरे खूनेरे ज़िरिये सेइं मन्दरेरे परमपवित्र ठारी मां दाखल भोनेरी दिलेरी भोरीए। 20 यीशुए इश्शे लेइ अक नव्वीं ते ज़िन्दागी देनेबाली बात खोलरोरीए, ज़ै तैनी पड़दे मां यानी अपने जिसमे मां मौतरे ज़िरिये इश्शे लेइ बनाईं। 21 ते एल्हेरेलेइ इश्शो एत्रो महान याजक ज़ै परमेशरेरे घरेरो मुखतियारे। 22 त एज्जा अस सच्चे दिले सेइं ते पूरे विश्वासे सेइं, ते एरो ज़मीर ज़ै खूनेरे तेपेइं सेइं पापेरे एसासे करां पवित्र कियोरे, ते एरो जिसम नेइतां ज़ै साफ पैनी सेइं धोवरोए, परमेशरे कां नेम। 23 ते अस एपनी उमीदरो इकरार रोड़ेच़ारे दूलेइतां रखम, किजोकि ज़ैनी असन सेइं वादो कियोरोए तै सच्चोए। 24 ते असेईं इस गल्लारू ध्यान लोड़े रखोरू कि अस केन्चरे प्यार ते रोड़ां कम्मां केरे लेइ एककी होरेरी हिम्मत बधाम। 25 ते एककी ठैरी अकोटू भोनु न शारम, जेन्चरे होरे लोक केरतन बल्के अस एककी होरि हिम्मत देथ, तुस ज़ैस हिसाबे सेइं परमेशरे दुबारे एजनेरी दिहेईं नेइतोते लातथ तैस्से हिसाबे सेइं जादे एन गल्लन पुड़ चलते भी राथ। 26 किजोकि अगर अस सच पिशानेरां बाद, ज़ैनी बुझतां पाप

केरम त पापां केरे लेइ कोई बलिदान बाकी नई रावरु। 27 हॉ, परमेशरेरे इन्साफ ते भयानक अग जै परमेशरेरे दुश्मन भस्म केरेली ते बाकी आए। 28 जैखन मूसरे कानून न मन्नेबाले, दुई या टलाई मैन्हु केरे गवाही देने सेई तैस मैन्हु बगैर दया केरतां मौतरी सजा दिती गातीए। 29 त ते मैन्हु केत्री सजारो लेईक भोलो, जैनी परमेशरेरे मट्टु पावन हैठ ढलेन्चु, ते करारो खून जैस सेई तै पवित्र ठहरावरो थियो, तै अपवित्र समझो। ते पवित्र आत्मारी बेइजती की, जेसेरे जिरिये असन अनुग्रह मैलते। 30 किजोकि अस ज्ञानतम, तैनी ज़ोरु थियू, “बदलो घिन्नी मेरु कम्मे, अवं एण्पू बदलो देइलो।” ते फिरी तैनी एन भी जोवं, “प्रभु अपने लोकां केरि इन्साफ केरेलो।” 31 जैते परमेशरेरे हश्थन मां गानू बड़ी खतरनाक गल्ले। 32 पन तैना पेइले दिहाड़े याद केरा, जैखन तुसन मसीह पिशानेरी लौ मैल्ली, ते तैसेरे बाद तुसेई बेइ मुशकलातां केरो देटतां मुकाबलोइ कियो। 33 यानी कथे त तुस लोकां केरे तुहीन केरने सेई ते मुसीबती सेई तुस तमाशो बने, ते कधी तुसेई होरे मुसीबत बरदाशत केरते लाए ते तुसेई तैन केरु साथ दिनु। 34 किजोकि तुसेई कैदन सेई हमदरदी की, ते अपनो माल भी लुटानो खुशी सेई कबूल कियो। किजोकि तुस ज्ञानते थिये कि अक बड़ी बड़ी खास मलकियत तुसन कां आए जै हमेशारे लेई आए। 35 एल्हेरेलेइ तुस हिम्मत न हरा, किजोकि तैसेरो फल बड़े बड्डोए। 36 तुसेई बेइ सत्री सेई कम कियेरु लोइते, ताके तुस परमेशरेरी मर्जी पूरी केरतां तै चीज हासिल केरि सखथ जेसेरो तैनी वादो कियोरोए। 37 किजोकि जेन्चरे पवित्रशास्त्रे मां लिखेरु आए, “हुनी थोडु चिर बाकी आए, कि एजनेबालो एज्जेलो ते चिर न लाएलो। 38 पन मेरे धर्मी लोक मीं पुइ विश्वासे रखने सेई जैते राले, अगर तैना मीं पुइ विश्वास केरने करां पत्रोवं हटन त मेरो दिल तैन पुइ खुश न भोलो।” 39 पन अस हटने बाले नई, कि परमेशरेरे पुइ विश्वास केरने करां पत्रोवं हटम ते नाश भोम, बल्के अस विश्वास केरनेबाले आम, ताके इश्शे प्राण बचाए गान।

11 हुनी विश्वास उमीद कियोरी चीजां केरु याकीन, ते अलैई चीजां केरु सबूते। 2 इश्शे दादे पड़दादन भी एरो विश्वास थियो। एल्हेरेलेइ परमेशर तैन पुइ खुश भोव। 3 विश्वासे सेई असन पतो लगते कि दुनियाारी हर चीज परमेशरेरे वचने सेई बनोरीए। एल्हेरेलेइ जैन किछ अस लहतम, तैन लेइहोने बैली चीजन सेई नई बनोरोए। (aion g165) 4 विश्वासे सेई आदमेरे मट्टु हाबिले अपने बड्डे ढला कैने केरां रोडू बलिदान परमेशरेरे लेइ च़ाहू। जेसेरी वजाई सेई परमेशरेरे तैसेरु बलिदान कबूल कियू, ते तैसेरे बारे मां गवाही दिती, कि हाबिल धर्मी मैन्हु आए। हालांकी हाबिल मेरि जोरोए, फिरी भी अस तैसेरे विश्वासेरे जिरिये परमेशरेरे पुइ भरोसो केरनो शिखतम। 5 विश्वासे सेई हनोक नच्वेरो मैन्हु मौती करां पेइलो जैतो स्वर्ग जो नीयो, ते तैसेरो पतो न च़लो, किजोकि परमेशरेरे ते स्वर्ग जो नीयोरो थियो, तैसेरे उबरे गाने करां पेइले तैसेरे हके मां गवाही दितीरी थी, कि तैनी परमेशर खुश कियो। 6 किजोकि विश्वासेरे बगैर परमेशर खुश केरनो नामुमकिन, बस्सा रोडू एने कि परमेशरेरे कां एजने बालन विश्वास कियोरो लोइ कि परमेशर आए, परमेशर तैन जैना तैस सज़्जैई सेई तोपतन फल देते। 7 विश्वासे सेई नूहे तैन गल्लां केरे बारे मां जैना एजनेबाले वक्ते मां भोनी बैली थी, परमेशरेरे तरफां हुक्म मैलतां परमेशरेरे थिये सेई तैस पुइ अमल कियू, ते अक किशती बनाई जैस मां तैसेरु सारु टब्बर बचू, एन केरने सेई तैनी सारी दुनिया मुर्जम बनाई ते एण्पू तैस धार्मिकतारो बारस बना जै विश्वासे सेई हासिल भोवे। 8 विश्वासे सेई जैखन परमेशरेरे अब्राहम, जैस जगाई गाने जो परमेशरेरे तै कुजोरो थियो, त तै हुक्म मेन्तां तैस जगाई च़लो जेव, जै जगाई बादे मां परमेशर तैस विरासतरो जेरो देनेबालो थियो। हालांकी तै एन भी न थियो ज्ञानतो कि अवं कोरां च़लोरोई, फिरी भी च़लो जेव। 9 विश्वासेरे जिरिये सेई तै परमेशरेरे कियोरे वादोरे मुताबिक तैस मुलखे मां परदेशी केरो जेरो तेम्बन मां गेइतां बस्सो। ते तैस सेई साथी तैसेरु मट्टु इसहाक ते तैसेरु पोदलडू याकूब भी राए, तैन भी परमेशरेरे करां तैए वादो मैलो ते तैना भी तेम्बन राए। 10 किजोकि अब्राहम तैस नगरेरे इंतज़ारे मां थियो (जैन स्वर्ग मांए) जेसेरी

मुनीयाद सदारे लेइ आए, जेसेरो तियार केरनेबालो ते बानेबालो परमेशरेरे। 11 विश्वासे सेई सारा दोर्जाती भोनेरी ताकत हासिल की, हालांकी तै उमरारे हिसाबे सेई बच्चो ज़ानेरे काबल न थी राहोरी, सारा एन याकीन थियू कि वादो केरनेबालो परमेशर अपनो वादो पूरो केरेलो। 12 जेइस अब्राहम बड्डो बुड्डो थियो ते बच्चे पैदा केरनेरे काबल न थियो, अम्बरेरे तारां केरे ते समुदरेरी रेतारे बराबर एण्पू हछु वंश पैदा भोव। 13 एन सेबमी लोकेई परमेशरेरे पुइ भरोसो कियो ते मेरि जे, ते तैन तै कोई चीज न मैल्ली जेसेरो वादो परमेशरेरे कियोरो थियो, तैनेई समझू कि परमेशर एन एजनेबाले वक्ते मां केरेलो, ते तैना इन भी समझते थिये, कि तैना ज़मीनी पुइ परदेशी ते मुसाफर आन। 14 जैना एरी गल्लां ज़ोतन तैन सेई एन साबत भोते, कि तैना अज़ तगर अपने मुलखेरी तलाशी मां आन। 15 अगर तैना तैस मुलखेरो खियाल रखते भोथे जैस मरां तैना ओरे थिये, त तैना वापस गेइ बटते थिये। 16 पन असलीती मां तैना एक्की रोडे स्वर्गेरे मुलखेरे उमीदी मां थिये, एल्हेरेलेइ परमेशर तैन केरो परमेशर ज़ुवाने सेई खुश भोव, एल्हेरेलेइ तैनी तैन केरे लेइ अक नगर तियार कियोरोए। 17 विश्वासे सेई अब्राहमे अपने इम्तिहानेरे मौके अपने मट्टे इसहाकेरु बलिदान देने करां न टलो, जैन तैस परमेशरेरे वादे कबूल केरने बदे मैलोरो थियू, तैसेरे अकेल्ले मट्टे बलिदान केरने जो तियार भोइ जेव। 18 हालांकी परमेशरेरे तैस सेई ज़ोरु थियू, “कि इसहाकेरे वंश सेई तेरे वंशेरु नवं रालू।” 19 किजोकि अब्राहमे याकीन थियू, कि परमेशरेरे कां मुडुदन जैते केरनेरी शक्ति आए, एल्हेरेलेइ लेइ जेन्चरे परमेशरेरे इसहाक मुडुदन मरां फिरी वापस आनो। 20 विश्वासे सेई इसहाके अपने दुइये मट्टुन याकूबे ते एसावे आशिर्वाद दिती, कि एजनेबाले वक्ते मां तैना वादे पूरे भोले। 21 विश्वासे सेई याकूबे मरते वक्ते यूसुफेरे दुइये मट्टुन बरकत दिती ते अपने सोट्टे सहारे सेई परमेशरेरी आराधना की। 22 विश्वासे सेई यूसुफे मरते बार पूरे याकीन सेई ज़ोरु थियू, इस्राएली लोक मिस्र मुलख शांले। ते तैन हुक्म दितीरो थियो कि जेइस तैना मिस्र मुलखे मरां निसले त तैना तैसेरी हेड्डी साथी नेना। 23 विश्वासे सेई मूसरे हाज बच्चेई तैसेरे जरमनेरां पत्ती टलाई महीन तगर छपेइतां रख्खो, किजोकि तैनेई हेरु कि ते बच्चो खासे, ते तैना राजेरो हुक्म टलोइने करां न डरे। 24 विश्वासे सेई मूसा बड्डे भोइतां फिरीनेरे कुइयेरु मट्टु बन्ने करां इन्कार कमाव। 25 पापेरे थोडे दिहाइ आनन्देरी ज़िन्दगी गुजारनेरे बजाहे तैनी परमेशरेरे लोकन सेई साथी मिलतां दुख झैलनो चुनो। 26 तैनी मसीहरे लेइ दुख झैलनो मिसरेरे खज़ानन करां जादे दौलत समझी, किजोकि ते ज्ञानतो थियो कि तैस स्वर्ग मां इनाम मैलनूए। 27 विश्वासे सेई तैनी राजेरे सरकरो डर न कियो, बल्के मिस्र मुलख छेडी दिती, एल्हेरेलेइ तैनी समझोरु थियू जेन्चरे तैनी न लेइहोने बाले परमेशरेरे लाहू। 28 विश्वासे सेई मूसे इस्राएली लोकन हुक्म दिती कि तैना फ़सह तितारेरी दिहाडी बनानी ते गबडेरो खून दारन छिड़कन, ताके मौतरो स्वर्गदूत जै परमेशरेरी तरफां भेजोरोए इस्राएलेरे पेइले मट्टुन न मैरी बटे। 29 विश्वासे सेई इस्राएली लोक लाल समुन्द्रे मांमेई एन्चरे लंघे जेन्चरे शुक्कोरी ज़मीनी पुइमेई पार निस्से, पन जैखन मिस्रै तेट्टां पार लंघेरी कोशिश की त तैना डुबतां मेरि जे। 30 किजोकि इस्राएली लोकेई परमेशरेरे पुइ विश्वास कियो, ते सत दिहेइन तगर यरीहो नगरेरे चक्कर लाए (जेन्चरे परमेशरेरे ज़ोरु थियू) ते दिवार डुल्ली। 31 विश्वासे सेई राहाब वेश्या परमेशरेरे हुक्म न मन्ने बालन साथी नाश न भोइ; एल्हेरेलेइ कि तैसां इस्राएली जासूस शैन्ति सेई अपने घरे मां आने जैना छेपतां यरूहो नगरे हेरने ओरे थिये। 32 हुनी होरु किछ ज़ोनेरी ज़रूरत नई। हुनी मीं कां वक्त नई कि एरे जेरे लोकां केरे बारे मां जोई, जेन्चरे गिदोन, बाराक, शिमशोन, यिफतह, दाऊद, ते शमूएल ते होरे नबी। 33 तैनेई विश्वासे सेई राज़ां ज़ांतां, ते धार्मिकतारो कम्मां कियां ते वादो कियोरी चीजां हासिल की, ते शेरेई तैना न खाए। 34 अग्गां तैना न फुके, ते तलवारी सेई तैना न मारे जे, जैखन तैना कमजोर थिये तैखन तैन ताकतवर बनाए, ते जंगी मां भी बहादर निस्से, ते तैनेई दुश्मना केरि फौज निशानी। 35 विश्वासे सेई किछ कुआन्शन अपने मुओरे लोक ज़ांतो मैल्ले, किछ मार खांते-खांते मेरि जे। ते तैनेई अपनो विश्वास शारनो न चाव, तैसेरे बदले मां तैनेई कैद रानू मन्ज़ूर

कियुं, एल्हेरेलेइ तैना मरनेरां बाद फिरी ज़ांते भोन, ते तैन रोड़ी ज़िन्दगी मैल्लो। 36 किछ लोकां केरो मज़ाक बनाव जेव, किछ लोकन कोड़े बाए, ते किछ शंगलन सेई बंधे ते कैदखाने मां छुडे। 37 ते किछन घोड़ेई बेई; ते आरे सेई चिरे, ते तलवारी सेई मारे जे। तैना गरीब थिये, तैन दुःख दित्तो जेव ते तैन सेई बुरो बताव कियो जेव। तैना भैङ्गां छैल्ली केरि खाडी लेइतां इरां उरां नशते थियो। 38 तैना जंगलन ते पहाड़न ते कुदुन मां ते धेरतेर खडन मांमेइ हंठते थियो। 39 इन बुरू संसार तैन विश्वासी लोकां केरे काबल न थियुं, तैन सेबभी केरे विश्वासेरे वजाई सेई परमेशर तैन पुड खुश भोव, पन तैन, तैन मैल्लू जेसेरो वादो परमेशरे कियोरो थियो। 40 किजोकि परमेशरे कां न सिर्फ तैन केरे लेइ बल्के इश्शे लेइ रोड़ी योजनाए। परमेशरे तैन शुद्ध बनानो चाते, पन सिर्फ असन सेई साथी।

12 एल्हेरेलेइ ज़ैखन गवाहां केरे एत्रो बड्डो घाने असां घेरोरम, त अस भी सैरी रकावटां ते तैस पापे दूर केरम ज़ै असन उलझाते, ते तैस दौड़ी ज़ै असेई दौवइनीए बल्हे सेई दौवइम। 2 एज्जा अस विश्वासे मां पवित्र करेनेबाले यीशु पुड नज़र रखम, ज़ैनी तैस खुशारे लेइ ज़ै तैसेरी नज़री मां थियो, बेइज़तरी परवाह न की, बल्के क्रूसेरो दुख झैल्लो ते परमेशरेरे तखतेरे देइने पासे गेइतां बिशशो। 3 तुस एस गल्ली पुड खियाल केरा, कि अपने खलाफत करेनेबाले ज़ैनी पैपी केरि तरफां केत्रो दुख झैलो, ताके बेदिल भोइतां हिम्मत न हैरी। 4 तुसेई पापे सेई लड़ते-लड़ते हेज़ु तगर एत्रो मुकाबलो नई कियोरो कि तुसेई अपनो खून बगावरो भोए। 5 ते तुसेई तैन समझानू बिसरी छूछू, कि ज़ैस मां तुसन जो मट्टां ज़ोव, “कि हे मेरे बच्चव परमेशरेरे हुक्मे एरे न समझा। ते ज़ैखन प्रभु तीं झिड़के त शारनेरे ज़ेरे मैसुस न केर। 6 किजोकि ज़ैस सेई परमेशर प्यार केरते तैस झिड़ते भी, ते ज़ैस तै अपनू मट्ट बनाते तैस सोटेई भी बाते।” 7 ए हदैइत तुशे समझनेरे लेइए, एस बल्हे सेई बरदाशत केरा, परमेशर तुसन अपना मट्टां सेमझतां बताव केरते, किजोकि तैन कौन ज़ेरू मट्टूए ज़ैस तैसेरो बाजी समझाए नन्ना? 8 पन अगर तुसन सुधारे न गाथ ज़ैस शामिल त तुसन न गैर औलाद भोनेथ न की अपना मट्टां। 9 एसेरे अलावा ज़ैखन इश्शे जिसमानी बाजी सुधारते रहते थिये ते अस तैन केरि इज़्जत केरते राए, त कुन आत्मां केरो बाजी यानी परमेशरेरी जादे इज़्जत न केरम ताके ज़ांते राम। 10 इश्शे जिसमानी बाजी त थोड़े दिहाड़ां केरे लेइ एपनी समझरे मुताबिक असन सुधारते रहते थिये, पन परमेशर इश्शे फैइदेरे लेइ असन सुधारते ताके असां तैसेरी पवित्रतैई मां शामिल भोम। 11 एसमां शक नई कि ज़ैखन केन्ची हदैइत की गाचे त तै खुशी नई, बल्के बडू बुरू बुझते, पन ज़ैखन ते बले-बले पक्को भोइ गाते त तैस बादे मां धर्मा बेनतां चैनरो फल मैलतो। 12 बरसा एपनी कमज़ोर पैखडन ते कमज़ोर ज़ैखु मज़बूत केरा। 13 ते अपने पावन सिंधी बत्तां चलाथ ताके टोंटे टेपलोए न ते तैना बेझोन। 14 सेबभन सेई मेल मिलापे सेई राथ, ते तै पवित्रताई हासिल केरनेरी हर वक्त कोशिश केरा जेसेरे गैर कोई प्रभु न लेई सके। 15 खबरदार एरू न भोए कि कोई मैन्हु परमेशरेरे अनुग्रह करां रेइ गाए, एरू न भोए कि कोई दलित न ज़ील लगगे ते तुसन परेशान केरे ते होरे लोक भी भिटे भोइ गाए। 16 ते न कोई मैन्हु तुसन मां बदमाशी केरनेबालो भोए, या एसावरो ज़ेरो अधर्मी न बने, ज़ैनी एक्की बार रोटी खानेरे लेइ अपने बड्डे भोनेरू हक बेचतां छुडू। 17 किजोकि तुस ज्ञानतथ कि बादे मां ज़ैखन तैनी तै बरकत हासिल केरनेरी कोशिश की, त तैस न मैल्ली, तैस अपनि नियत बदलनेरो मौको न मैलो हालांकी ते लेरां देइ-देइ तैस तोपनेरी कोशिश केरतो राव। 18 तुस तैस पहाड़े कां नेडे नई ओरे, ज़ैस सेई तुस हुरी सकते थिए, तैन पहाड़ अग्गी सेई फुकोतू थियुं ते अंधगुबारी ते बडो तूफान थियो। 19 तैडी नइशिगेरी शोर ते ज़ोने शुनाने बालेरी एरी आवाज़ शुनोती थी, कि ज़ैखन लोकेई ते आवाज़ शुनी त मिनत केरने लगे, कि असन सेई हीरि गल्लां न केर। 20 एल्हेरेलेइ कि तैनेई ते हुक्म बरदाशत न केरि बटो, “अगर कोई जानवर भी एस पहाड़े सेई हुरेलो त तै घोड़ेई बैइतां मारो गालो।” 21 तै नज़ारो एत्रो खतरनाक थियो कि मूसे ज़ोव, “अवं डरने ते थरकने लोरोई।”

22 बल्के तुस सिय्योनेरे पहाड़े ते ज़ांते परमेशरेरे नगर यानी स्वर्गरे यरूशलेमे मां लखेई स्वर्गदूतन कां खुशी मनाने ओरेथ। 23 ते तुस परमेशरेरी पेड़ले बच्चां केरि सभाई मां ते कलीसियाई मां ओरेथ, एना तैना लोकन ज़ैन केरां नक्वां स्वर्गं मां लिखोरेन, तुस इन्साफ करेनेबाले परमेशरे कां ओरेथ, ते धेरमी केरि आत्मन कां ओरेथ, यानी तैन कां ज़ैना सिद्ध कियोरेन। 24 तुस नंवे करारे बिचवाई करेनेबाले यीशु ते तैसेरे छिड़कोरे खूने कां ओरेथ, ज़ै हाबिलेरे खूने करां रोड़ी गल्लां ज़ोते। 25 खबरदार राथ, तुस परमेशर ज़ै तुसन सेई गल्लां केरते तैसेरो इन्कार न केरथ, किजोकि ज़ैनेई ज़मीनी पुड हदैइत करेनेबालेरो इन्कार कियो त तैना न बंत्रे, त अगर अस स्वर्गं हदैइत करेनेबालेरो इन्कार केरमेले त केन्चरे बंचमेले? 26 तैखन तैसेरी आवाजी सेई धरती हिली जेई पन तैनी ई वादो कियोरोए कि, “एक्की फेरे फिरी अवं सिर्फ ज़मीन नई बल्के अन्चरे भी हिलेइलो।” 27 तैसेरू “एक्की फेरे फिरी” ज़ोने सेई साफ पतो लगते की पैदा कियोरी चीज़ां ज़ैना हिलचन तैना खतम भोनिन ताके ज़ैना हिलन नन्ना तैना रैनिन। 28 ज़ैडी असन तैन राज़ मैलने लोरूए ज़ैन हिलनेरू नई त एज्जा अस तैसेरू शुक्र केरम ते हिम्मत केरम कि, अस परमेशरेरी आराधना परमेशरेरे डरे सेई केरि बटम ज़ैस सेई ते खुश भोए। 29 किजोकि इश्शो परमेशर भस्म केरनेबैली अगरो ज़ेरोए।

13 एक्की होरि सेई ढूला ते बेइनां केरो ज़ेरो प्यार केरते राथ। 2 बखले लोकां केरि खातरदारी केरा, किजोकि एरू केरने सेई किछेई अनजाने मां स्वर्गदूतां केरि खातरदारी कियोरीए। 3 कैदन याद रखा, मन्ना कि जेन्चरे तुस एप्पू भी तैन सेई साथी कैद आथ, ते ज़ैन सेई बुरो बताव भोते तैन भी याद रखा, इन सेमझतां मन्ना कि जेन्चरे तुसन सेई बुरो बताव भोव। 4 इला बनानो सेबभी लोकन मां इज़्जतरी गल समझी गाए, ते कुआन्शा ते मड़द एक्की होरेरे लेइ वफादार रान, किजोकि परमेशर बदमाशी केरने ते नाजाइज़ रिशते रखनेबालां केरो इन्साफ केरेलो। 5 अपने आपे दौलतेरे लालच्रे करां दूर रखा, ते ज़ेजू तुसन कां आप तैसेस मां राज़ी राथ, किजोकि परमेशरेरे एप्पू एन ज़ोरूए, “अवं तीं करां कथे भी दूर न भोइलो, ते न कथे तीं शैरेलो।” 6 एल्हेरेलेइ अस दिलेरी सेई जोई सकतम कि, “प्रभु मेरो मद्दत करेनेबालोए, अवं डेरि नन्ना इन्सान मेरू कुन गैडी सकते?” 7 ज़ैना तुशे अगुवे थिये, तैन याद रखा, ज़ैनेई तुसन परमेशरेरू बच्चन शुनावरू थियुं, इस गल्ली पुड ध्यान देथ, कि तैना केरी ज़िन्दगी गुज़ेरां चले जे, ते ज़ेरो विश्वास तैन थियो तुस भी तैन केरो ज़ेरो विश्वास केरा। 8 यीशु मसीह हीज ते अज़ बल्के हमेशारे लेइ अक्कां ज़ेरोए। (aiōn g165) 9 अलग-अलग किसमां केरि शिक्वाई सेई न टेपलोथ, रोडू एन्ने कि तुशेरो दिल परमेशरेरे अनुग्रहे सेई मज़बूत राए, न कि एरो परहेजेरे खाने सेई, जेसेरे खाने बालन कोई फैइदो न मैलो। 10 इश्शी अक एरी बलिदान केरनेरी ठारे, तैस मरां तैन खानेरी कोई अज़ाज़त नई ज़ैना तेम्बु मां सेवा केरतन। 11 किजोकि महायाजक ज़ैन जानवरां केरो खून मन्दरे मां परमपवित्र ठैरी मां पापेरे बलिदानेरे लेइ नेतो थियो, तैन केरो बाकी जिसम ज़ैडी इसाएली लोक रहते थिये तैङ्गां बेइर फुकते थियो। 12 एल्हेरेलेइ, यीशुए भी लोक एप्पू अपने खूने सेई पवित्र केरनेरे लेइ यरूशलेम नगरे करां बेइर दुःख झैल्लो ते मरो। 13 एल्हेरेलेइ, एज्जा अस भी यहूदी केरि रसमन शैरतां यीशु पुड विश्वास केरम ते तैसेरो ज़ेरो दुःख ते निन्दा झैल्लो। 14 किजोकि ई दुनिया इश्शू हमेशाक घर नई, पन अस एजनेबाले घरेरे इंतज़ारे मां आम ज़ैन एजनेबाले वक्ते मां इश्शू भोल्। 15 एल्हेरेलेइ असां यीशुएरे ज़िरिये परमेशरेरे लेइ तारीफरू बलिदान च़ादम, यानी ज़ैखन अस अपने शब्दन सेई इकरार केरतम कि यीशु इश्शो प्रभु आए। 16 पन भलाई केरनि ते ज़ैन ज़रूरते तैन केरि मद्दत केरा, किजोकि परमेशर एरे ज़ेरे बलिदान सेई खुश भोते। 17 अपने अगुवां केरो हुक्म मन्ना, ते तैन केरे अधीन राथ, किजोकि तैन केरे ज़िमेदारी कि तैना प्राणा केरि रखवाली केरन, ते एस कम्मरो तैनेई परमेशरेरे हिसाब भी देने पेनोए। अगर तुस तैन केरो हुक्म मन्नेले त तैना अपनू कम खुशी सेई केरेले त तुसन फैइदो भोलो, पन अगर तैस कम तकलीफ बुझेले त तुसन कोई फैइदो न

भोलो। 18 इशशो लेइ प्रार्थना केरते राथ, असन याकीने इशशो जमीर साफे, ते अस हर हिसाबे सेइं नेक नीती सेइं ज़िन्दगी गुजारनी चातम। 19 अवं तुसन कां बिनती केरताई कि मेरे लेइ प्रार्थना केरा, कि अवं फिरी लूशी तुसन कां एज्जी सेखी। 20 हुनी शान्ति देनेबालो परमेशर, ज़ैनी भैड्डां केरो महान रखवालो मतलब प्रभु यीशु मसीहे, इशशो प्रभु हमेशारे करारेरे खूने सेइं मुड़दन मरां जीतो कियो, (aiōnios g166) 21 तुसन हर रोड़े कम्मे मां सिद्ध केरे, ज़ैस सेइं तुस तैसेरी मर्जी पूरी केरथ, ते ज़ैन किछ परमेशरे पसंद एइते तैस यीशु मसीहेरे ज़िरिये असन मां केरे, ते मसीहेरी बड़याई हमेशा-हमेशा भोती राए, आमीन। (aiōn g165) 22 हे ढूलाव ते बेइनव, अवं तुसन कां बिनती केरताई कि मेरी तुस तेना गल्लां सबरी सेइं शुना, ज़ैना मीं तुशशे हिम्मत बढानेरे लेइ लिखोरिन, किजोकि ई चिट्ठी ज़ै मीं तुसन लिखी बड़ी नई। 23 ताके तुसन पतो लगगे कि इशशो विश्वासी ढूला तीमुथियुस कैदेरां छोटोरोए, ते अगर तै जल्दी अव, त अस दुइये तुसन सेइं मिलमेले। 24 अपने सेबभी विश्वासी लोकन ते सेबभी पवित्र लोकन जो इशशू नमस्कार ज़ोथ। इतालिया मुलखेरे विश्वासी लोकेई तुसन जो नमस्कार ज़ोरूए। 25 तुसन सेबभन पुड़ परमेशरेरो अनुग्रह भोतो राए, आमीन।

याकूब

1 अवं याकूब, जै परमेशर ते प्रभु यीशु मसीहेरे दास आई। अवं तैन 12 यहूदी गोत्रां केरे विश्वासी लोकन जैना तितर बितर भोइतां सारे दुनियाई मां रातन, तैन जो नमस्कार लिखताई। 2 हे मेरे ढलाव ते बेइनव, जैखन तुसन पुड़ अलग-अलग किसमां केरि अजमैइशां एज्जन, त एस खुशारी गल समझा, 3 किजोकि तुस ज्ञानतथ, तुशे विश्वासेरे परखे गाने सेइं इन साबत भोते, कि तुस हेजु तगार भी परमेशरे पुड़ भरोसो रखतथ, ते तुस मुशकलन सबरी सेइं झललेलो। 4 पन मुशकलन मां सबर केरनि शिख्खा, कि तुस आत्मिकता मां मजबूत ते सिद्ध भोते गाथ, ते तुसन मां कोन्ची रोड़ी गल्लीरी घटी न भोए। 5 पन अगर तुसन मरां कोन्ची अक्लारी घटी भोए, त तै परमेशरे करां मगगे, जै बगैर दोष लेइतां सेबन खुशी सेइं देते, त मगने बाले दिती गाली। 6 पन विश्वासे सेइं मगगे, ते शक न केरे। किजोकि शक केरनेबालो समुन्द्री छेल्ली केरो जेरोए, जैना हवाई सेइं चेलतिन ते उछड़तिन। 7 एरो मैन्हु इन न समझे, कि मीं प्रभु करां किछ मैलेलू। 8 ई मैन्हु दूमनोए ते एपनी सैरी गल्लन मां चंचल आए। 9 गरीब विश्वासी ढला खुश भोए, किजोकि परमेशरे तैसेरी आदर कियोरीए। 10 ते धनी विश्वासी अपने घटिया हालती पुड़ खुश भोए, किजोकि घासेरे फूडोवेंरो जेरो मिटी गातो। 11 दिहाड़ो निसते बडी धुप पेतीए, ते घासे शुकाते, ते तैसेरू फूडोव झैडी गाते, ते तैसेरी शोभा गाती रहतीए; तेन्चरे दौलतमन्द ढला भी अपने कम्मन मां मैरी गानेन। 12 धने तै मैन्हु, जै अजमैइशी मां मजबूत रहते; किजोकि तै अपनो विश्वास साबत केरतां जिन्दगारू तैन इनाम हासिल केरेलो, जेसेरो वादो प्रभुए तैन सेइं कियोरोए, जैना तैस सेइं प्यार केरतन। 13 जैखन कोन्चेरी अजमैइश भोए, त तै इन न जोए, कि मेरी अजमैइश परमेशरेरी तरफां भोतीए। न बुरी गल्लन सेइं परमेशरेरी अजमैइश भोड़ बटतीए, ते न तै बुरी गल्लन सेइं केन्चेरी अजमैइश केरते। 14 पन हर कोई अपने खुवैइशन मां खिचोइतां, ते फेसतां अजमैइशी मां गाते। 15 ते फिरी बुरू केरनेरी खुवैइशरो नितीजो ई भोते, कि मैन्हु बुरी चीजां केरतन, ते आखरी मां तैन हमेशारी सजा मैलतीए। 16 हे मेरे ट्लारे ढलाव ते बेइनव, धोखो न खाथ। 17 किजोकि हर रोडू वरदान, ते हर रोडू दान इशे बाजी परमेशरेरे तरफां आए, जैनी सैरी लोआं (यानी दिहाड़ी चाँदनी, तारे) बनेइं। परमेशर हमेशा अक्कां जेरो आए, तै छावरो जेरो न बेदलो। 18 तैन अपने मेज्जी सेइं असन सञ्चरे वचने जिरिये सेइं नर्वीं जिन्दगी दिती, ताके अस तैसेरी सजनाई मरां फसलारे जेरे पेडले फल भोम। 19 मेरे ट्लारे ढलाव ते बेइनव, ई गल तुस ज्ञानतथ, एल्हेरेलेइ हर कोई मैन्हु शुन्नेरे लेइ हुशार ते ज़ोने मां पत्रोव भोए, ते सरकी मां ढिल्लो भोए। 20 किजोकि जैखन मैन्हु सरकी मां भोए त तै धार्मिकतारू कम न केरि बटे जैस सेइं परमेशर खुश भोए। 21 एल्हेरेलेइ सारी गंदगी ते दुष्ट दूर केरतां, तैन परमेशरेरू वचन नेरमी सेइं कबूल केरे, जैन दिले मां छडू जेव, जैन तुशे प्राणन मुक्ति देइ बटे। 22 पन परमेशरेरे वचने पुड़ चलनेबाला बना, ते सिर्फ शुन्ने बाले नई, जैना अपने आपे धोखो देतन। 23 किजोकि जै परमेशरेरू वचन शुन्ने बालो भोए, ते तैस पुड़ चलने बालो न भोए, त तै तैस मैनेरो जेरोए, जै अपनू तुतर शीशे मां हेरते। 24 ते तै तै अपनो आप हेरतां चलो गाते, ते तैखने बिसरते कि अवं केरो थियो। 25 पन जै मैन्हु कानूने ध्यान सेइं पढते, जै पूरे तरीके सेइं असन आजादी देते, सिर्फ शुने न पन तेन्चरे कम केरते, तै अपने कम्मे मां बरकत हासिल केरेलो। 26 अगर कोई अपनो आप भक्त समझे, ते अपनि जिंभी कैबू मां न रखे, तै अपने आपे धोखो देते, ते तैसेरी भक्ति बेफैइदी आए। 27 इशे बाजी परमेशरेरे नेडे शुद्ध ते रोडी भक्ति ई आए, कि बे सहारां ते विधवां केरे मुसीबती मां खबर नी गाए, ते अपनो आप दुनियारे बुरे सुभावेरे अस्सरे करां दूर रखम।

2 हे मेरे ढलाव ते बेइनव, इशो महिमा बालो प्रभु यीशु मसीहेरो विश्वास तुसन मां तरफदेरी सेइं न भोए। 2 अगर अक मैन्हु सोन्नेरे छल्ले ते रोड़ां लिगडां लेइतां तुशे झुण्डे मां एज्जे ते अक गरीब भी मेलां लिगडां लेइतां

एज्जे। 3 ते तुस तैस रोडे लिगइन बालेरू तुतर हेरतां जोथ, “तू इडी रोडी ठैरी बिश,” ते तैस गरीबे सेइं जोथ, “कि तू इडी खडो रा, या इडी तल्ले बिशा।” 4 त कुन तुसेईं भेद भाव न कियो, ते बुरे खियाले सेइं इन्साफ केरनेबाले न भोए? 5 हे मेरे ट्लारे ढलाव ते बेइनव शुना, कुन परमेशरे दुनियारे गरीब न चुने, कि विश्वासे मां धनी भोन, ते तैस राज्जेरे बारस भोन, जेसेरो वादो तैन तैन सेइं कियोरोए जैना तैस सेइं प्यार केरतन। 6 पन तुसेईं तैस गरीबेरी बेइजती की, कुन धनी लोक तुसन पुड़ जुलम न केरन? ते कुन तैना तुसन आदालतन मां घसीटी-घसीटी न नेन? 7 कुन तैना तैस रोडे नव्वेरी तुहीन न केरन जेसेरे तुसन जो ज़ोतन? 8 फिरी भी तुस पवित्रशास्त्रेरे इस वचनेरे मुताबिक, कि “तू अपने पडोसी सेइं अपनो जेरो प्यार केर,” सञ्चरे तैस राज्कानून पूरो केरतथ, त रोडू केरतथ। 9 पन अगर तुस तरफदारी केरतथ, त पाप केरतथ; ते मूसरो कानून तुसन पापी ठहराते। 10 किजोकि अगर कोई मूसरे सारे कानूने पुड़ चलते, ते एक्की गल्ली पुड़ न चेलि बटो त तै सेबभी गल्लन मां दोषी भोते। 11 एल्हेरेलेइ कि जैने इन जोव, कि “तू बदमाशी न केरां,” तैन इन भी जोव, “तू खून न केरां” एल्हेरेलेइ अगर तीं बदमाशी न की, पन खून कियो फिरी भी तू मूसरे कानूने पुड़ चलने बालो न भोए। 12 तुशेरी गल्लां ते बताव तैन लोकां केरे जेरो भोए, जैन केरो इन्साफ आजादी देनेबाले कानूनेरे मुताबिक भोला। 13 किजोकि जैने दया न की तैसेरो इन्साफ बगैर दयाई सेइं भोलो। दया इन्साफे करां भारी भोतीए। 14 हे मेरे ढलाव ते बेइनव, अगर कोई जोए कि मीं यीशु मसीह पुड़ विश्वासे, पन होरि केरे लेइ रोड़ां कम्मां न केरतो भोए, त तैस सेइं कुन फैइदो? कुन एरो विश्वास तैस मुक्ति देइ बटे? 15 अगर कोई विश्वासी ढला या बेइन भोए जैन लिगडा केरि ज़रूरत भोए, ते तैन रोड़ खाने जो न भोए। 16 ते तुसन मरां कोई तैन सेइं जोए, “खुशी सेइं गाथ परमेशर तुसन बरकत दे,” तुस गर्म राथ, ते रज्जा; पन जैना चीजां जानरे लेइ ज़रूरिन तैना तैन न दे, त कुन फैइदो? 17 तेन्चरे विश्वास भी, अगर रोडे कम्मन सेइं न भोए, त अपने सुभावे मां मरौए। 18 बल्के कोई जोई बटेते कि, “तीं विश्वासे, ते अवं रोड़ां कम्मां केरताई” पन अवं जोताई तू अपनो विश्वास मीं रोड़ां कम्मां केरे बगैर हिरा, ते अवं अपनो विश्वास रोडे कम्मन सेइं तीं हिरालो। 19 तीं विश्वासे कि अक्के परमेशरे, तू रोडू केरतस, भूतां भी विश्वास केरतन, ते थरकतन। 20 पन हे निकम्मे मैन्हु तू इन न जानस, कि रोडे कम्मन बगैर विश्वास मरौए। 21 जैखन इशे पूर्वज अब्राहमे अपनू मूठ इसहाक बलिदान केरनेरे ठैरी पुड़ चाडू, त कुन ते कम्मन सेइं धर्मी न भोव? 22 तीं हेरू कि विश्वासे तैसेरे कम्मन सेइं साथी अस्सर कियोरोए, ते कम्मन सेइं विश्वास सिद्ध भोव। 23 ते पवित्रशास्त्रेरो ई वचन पूरो भोव, “कि अब्राहमे परमेशरे पुड़ विश्वास कियो, ते तै तैसेरेलेइ धार्मिकता गनो जेव,” ते तै परमेशरेरो दोस्त भोव। 24 ते तुसेईं हेरू कि मैन्हु सिर्फ विश्वासे सेइं नई, बल्के कम्मन सेइं भी धर्मी भोते। 25 तेन्चरे राहाब वेश्यां भी जैखन तैसां बिस्तार देनेबाले लोक अपने घरे मां रखे, ते होरि बत्तां वापस भेजे, त कुन कम्मन सेइं धर्मी न भोइ? 26 ते जेन्चरे जान आत्मा बगैर मरीं आए, तेन्चरे विश्वास भी रोडे कम्मन बगैर मरौए।

3 हे मेरे ढलाव ते बेइनव, तुसन मरां बडे परमेशरेरे वचनेरे उस्ताद न भोन, किजोकि तुसन पतोए, कि इशो उस्तादां केरो इन्साफ जादे सेखती सेइं भोलो। 2 अस बडे बार गेलती केरतम, जै जोने मां गलती न केरे, तैए सिद्ध मैनुए, ते सारे जानी कैबू केरते। 3 जैखन अस अपने कैबू मां केरनेरे लेइ घोड़ां केरे ऐशी मां लगाम लातम, त अस तैन केरि सारी जानी भी फेरी सखम। 4 हेरा, पैनरां जिहाजां भी, अगर बडां भोतन, ते तेज हवाई सेइं चलां गातन, फिरी भी एक्की निकडी पतवारी सेइं चलानेबालो अपने मेज्जी सेइं फिराते। 5 तेन्चरे जिंभ भी, अगर अक निकडो अगे, ते बेड़ि-बेड़ि घमण्डेरी गल्लां केरती, तक्का, थोड़ी जेरी अग्गी सेइं केके बडे-बडे जंगले मां आ लाई गातीए। 6 जिंभ भी अक अगारी जेरीए, जिंभ इशे जानी मां अक बुरो हिस्सो आए, ते सैरी जानी पुड़ कलक लातीए, ते जिन्दगरी दुनियाई मां अग लातीए, ते नरकेरी अग्गी सेइं बलती रहतीए। (Geenna g1067) 7 हर किसमां

केरें जंगली जानवर, चुड़ो लू, ते पेदेरे भारे बाले जीप जन्तू ते दरियारे जानवर त इन्सानेरे हथे एज्जी बटतन ते ओरे भी आन। 8 पन जिभी मैन्न मरां कोई भी कैबू मां न केरि सके, तै अक एरी बलाए जै कथे रुके न, ते सप्येरे जेहरेरे जेरीए नुकसान देने वालीए। 9 इस्से जिभी सेइं अस प्रभु ते बाजी परमेशरेरी तारीफ़ केरतम, ते इस्से सेइं मैन्हु, जै परमेशरेरे रूपे मां बनोरोए श्राप देतम। 10 एक्की ऐशी सेइं शुक्र ते श्राप निसतन। हे मेरे ढलाव ते बेइन्व एरू न लोडे भोरू। 11 कुन एक्की नागे मरां मिट्टू ते लूनू पानी निस्सी बटते? 12 हे मेरे ढलाव ते बेइन्व, कुन फेगेरो बुट्टे पुड जैतन, या दाछी पुड फेगू लेगि बटतन? तेन्चरे लूनू नाग भी मिट्टू पानी न निस्सी बटे। 13 तुसन मरां ज्ञानी ते समझदार कौने? जै एरो भोए तै अपने कम्मन रोडे चाल चलने सेइं तैस नम्रता सेइं साथी बांदो केरे जै ज्ञाने सेइं पैदा भोतीए। 14 पन अगर तुस अपने-अपने मने मां सखत जलन, ते खुदगरजी रखतथ, त बेडि-बेडि गल्लां न केरथ ते सच्चरे खलाफ झूठ न जोइयथ। 15 इन ज्ञान तैन नई, जैन स्वर्गो ओरूए बल्के दुनियारू, ते जिसमानी, ते शैतानीए। 16 एल्हेरेलेइ कि जैडी जलन, ते खुदगरजी भोतीए, तैडी फसाद ते हर बुरू कम भोते। 17 पन जैन ज्ञान स्वर्गो एइं तैन पेइलू त पवित्र भोते, फिरी मिलनसार, हलीम ते शिखालने बालू, ते दया ते रोडे कम्मन सेइं ते बगैर तरफदारी ते पाखंडे बगैर भोते। 18 ते मिलाप केराने बालां केरे लेइ धार्मिकतरो फल मेल मलापे सेइं साथी बेव गाते।

4 तुसन मां लड़ाई ते झगड़े कोट्टां एइतन? कुन तैन खुवैइशन सेइं नई जैना तुशे अंगन मां लेइतिन? 2 तुस खुवैइश रखतथ, पन तुसन मैल्ले न, एल्हेरेलेइ तुस खून ते जलन केरतथ, ते किछ हासिल न केरि बटथ तुस झगड़तथ ते लड़तथ; तुसन एल्हेरेलेइ न मैल्ले, कि तुस मगतथ न। 3 तुस मगतथ ते मैल्ले न, किजोकि बुरी इच्छा सेइं मगतथ, ताके अपने एशे मां खर्च केरथ। 4 हे बेईमान लोकव, कुन तुस न ज्ञानथ, कि दुनियारी चीजन सेइं दोस्ती रखनी परमेशरे सेइं बैर केरनोए, जै कोई दुनियारो दोस्त भोनो चाते, तै अपनो आप परमेशरेरो दुश्मन बनाते। 5 कुन तुस इन समझतथ, कि पवित्रशास्त्र बेफेइदू जोते कि, “जै आत्मा तैने असन मां छडी, कुन तै एरी इच्छा केरती, जेसेरो फल जलन भोए?” 6 पन जै अनुग्रह परमेशर देते तै बडो मजबूते, एल्हेरेलेइ पवित्रशास्त्रे मां इन लिखोरूए, “कि परमेशर अभिमान केरनेबालां केरो मुकाबलो केरते, पन दीननु पुड अनुग्रह केरते।” 7 एल्हेरेलेइ परमेशरेरे अधीन भोथ, ते जैन शैतान तुसन करां करानू चाते तैन न केरा, त तै तुसन करां दूर नशेलो। 8 परमेशरेरे नेडे एज्जा, त तै तुशे नेडे एज्जेलो, हे पापी लोकव, अपने जिन्दगी करां पाप दूर केरा, ते हे दुमन्ने बाले लोकव अपने मन्न पवित्र केरा। 9 अपने पापां केरे वजाई सेइं दुखी भोथ, ते शोग केरा, ते लेरां देथ, तुशुशी हासी शोगे मां, ते तुशुशी खुशी उदैसी मां बदलोए। 10 प्रभुएरे सामने नम्र बना, त तै तुसन इज्जत देइतां उच्चे केरेलो। 11 हे ढलाव ते बेइन्व, एक्की होरेरी तुहीन न केरा, जै अपने ढलाएरी तुहीन केरते, या अपने ढलाए पुड दोष लाते, तै मूसरे कानूनेरी भी तुहीन केरते, ते मूसरे कानूने पुड दोष लाते, ते अगर तू कानूने पुड दोष लातस, त तू कानूने पुड चलने बालो न भोव, पन तैसेरो हाकिम भोव। 12 मूसरो कानून देनेबालो ते हाकिम त अक्के, तै परमेशर आए, जैस कां बचाने ते नाश केरनेरी शक्ति आए, तू कौन आस, जै अपने पडोसी पुड दोष लातस? 13 तुस जैना इन जोतथ, “कि अज या कालां अस कोन्ची होरि नगर मां गेइतां अक साल बीतामेले, ते बुपार केरतां फैइदो उठामेले।” 14 ते इन न ज्ञानथ कि कालां कुन भोलू, शुना, तुशुशी जिन्दगी आए कुन? तुस त भाखेरे जेरेथ, जै थोडे चिरे लेइहोते, ते फिरी गैइब भोते। 15 एल्हेरेलेइ तुसेईं इन जोरू लोडे, “अगर प्रभु चाए, त अस जीते रहमेले, ते इन या तैन कम भी केरमेले।” 16 पन हुनी तुस अपने अभिमाने पुड घमण्ड केरतथ, एरू सब घमण्ड बुरू भोते। 17 एल्हेरेलेइ जै कोई भलाई केरनि ज्ञानते ते न केरे, तैसेरेलेइ ई पापे।

5 हे दौलतमंदव विश्वासी लोकव, शुना, तुस अपने एजनेबाले दुखेरे लेइ जोरे-जोरे लेरां देथ। 2 तुशुशू धन नाश भोवं ते तुशे लिगइन् खर लग्गो। 3 तुशे सोन्ने चैदी मोरसो लगी, जेइस परमेशरे तुशुशो इन्साफ केरेलो त ई मोरसो तुशे खलाफ गवाहरो जेरो भोलो, ते अग्गारो जेरो तुशुशू मास फुकेलो, तुसेईं आखरी युगे मां धन अकोट्टू कियूं। 4 तक्का, जैन मजदूरेई तुशुशां ऊडारां कट्टां, तैन केरि तै मजदूरी जै तुसेईं तैन न दिती, चिन्दां मारने लोरीए, ते फसल कटने बालां केरि फरयाद फौजरे परमेशरे शुनोरीए। 5 तुस धेरती पुड एश केरने मां लग्गोरो राए, तुसेईं सिर्फ अपने सुखेरे लेइ जिन्दगी जी, एल्हेरेलेइ तुसेईं अपनो आप तैस दिहाड़े लेइ तियार कियोरोए जेइस परमेशर तुशुशो इन्साफ केरेलो। 6 तुसेईं धर्मी दोषी बनेइतां मारो, ते तुशुशे सामनो न केरे। 7 ते हे ढलाव ते बेइन्व, प्रभुएरे एजने तगर सबरी सेइं बलगा, हेरा, ज़मीनदार कीमती फसलरे कीमती फलेरे उमीदरो पेइली ते आखरी झैडी भोने तगर सबरी सेइं बलगते। 8 तुस भी तेन्चरे सबरी सेइं बलगा, ते अपने दिले मजबूत केरा, किजोकि प्रभुएरू एजनु नेइए। 9 हे ढलाव ते बेइन्व, एक्की होरि पुड दोष न लाथ ताके तुसन पुड भी दोष न लाव गाए, हेरा, हाकिम नेडे ते एजनेरे लेइ तियारे। 10 हे ढलाव ते बेइन्व, जैन नेबेईं प्रभुएरे नव्वे सेइं गल्लां की, तैन सबर केरनेरो अक नमूनो समझा। 11 हेरा, अस बलगने बालन जो धन जोतम, तुसेईं अय्यबेरे सबरारे बारे मां शुनोरूए, ते प्रभु करां तैसेरो जै प्रतिफल भोव तैने भी बुझू, जैस सेइं प्रभुएरी बडी महरबानी ते दया बांदी भोतीए 12 पन हे मेरे ढलाव ते बेइन्व, सेबन्हन करां बड्डी गल ईए, कि कसम न खाथ, न स्वर्गी न धेरतरी, न होरि कोन्ची चीजरी, पन तुशुशी गल हांएरी हाँ, ते न एरी मां भोए, फिरी परमेशर तुसन सजा न देलो। 13 अगर तुसन मां कोई दुखी भोए त तै प्रार्थना केरे, अगर खुश भोए, त परमेशरेरां भजना जोए। 14 अगर तुसन मां कोई रोगी भोए, त कलीसियारे बुजुर्गन कुजाए, ते तेना प्रभुएरे नव्वे सेइं तैस पुड तेल मेलतां तैसेरेलेइ प्रार्थना केरन। 15 ते विश्वासेरी प्रार्थनाई सेइं रोगी बचेलो ते प्रभु तैस बज्जालो, ते अगर तैने पाप कियोरे भोले त परमेशर तैस माफ़ केरेलो। 16 एल्हेरेलेइ तुस एक्की होरेरे सामने अपने-अपने पाप मन्ना, ते एक्की होरेरे लेइ प्रार्थना केरा, जैस सेइं तुस बेइज्जोथ, धर्मी मैनेरे प्रार्थनारे अस्सरे सेइं बडू किछ भोइ बटते। 17 एलिय्याह भी इशरो जेरो दुःख सुख झैल्लने बालो मैन्हु थियो, तैने दिले सेइं प्रार्थना की, कि झैडी न भोए, ते सडे टलाई साल झैडी न भोइ। 18 फिरी तैने प्रार्थना की, त अम्बरेरां झैडी भोइ, ते धेरती पुड फसल भोइ। 19 हे मेरे ढलाव ते बेइन्व, अगर कोई विश्वासी परमेशरेरी सच्ची शिक्षा मन्नी शारे, ते कोई तैस मनफिरानेरे लेइ मदत केरे, 20 त तै इन बुझे, कि जै कोई कोन्ची भटकोरे पैपी मनफिरानेरे लेइ मदत केरे, त तै एक्की प्राणे (मैन्हु) मौती करां बचालो, ते परमेशर तैसेरे बडे पाप भी माफ़ केरेलो।

1 पतरस

1 अवं पतरस यीशु मसीहेरो प्रेरित आई, अवं ई चिट्ठी परमेशरेरें चुनोरे लोकां केरे लेइ लिखने लोरोई, जैना परदेशी केरे जेरे पुनुस, गलातिया, कप्पूकिया, आसिया ते बितुनिया इलाकां केरे अलग-अलग नगरन मां तितर-बितर भोइतां रातन। 2 बाजी परमेशरे बडो पेइलो ई फैसलो कियोरो थियो कि तुस तैसेरे लोक भोथ त कने तै तुसन पवित्र आत्मारें कम्मरे जिरिये पवित्र बनाए। तैने एन एल्हेरेलेइ कियूं ताके तुस यीशु मसीहेरी मन्न्थ ते तैसेरे खूनरे जिरिये सेई शुद्ध भोथ। अवं प्रार्थना केरताई कि परमेशर तुसन अनुग्रह ते शान्ति जादे करां जादे दे। 3 इश्शे प्रभु यीशु मसीहेरे बाजी ते परमेशरेरु शुक्र भोए, परमेशरे असन पुड महान दया केरतां असन नक्वीं जिन्दगी दित्ती। किजोकि परमेशरे यीशु मसीह मुडन मरां जीतो कियो त कने तैने अस पूरी उमीदी सेइं जीनेरे काबल बनोरेम, मतलब असन तैन चीजां हासिल केरनेरी पूरी उमीद, जैन केरो देनेरो वादो परमेशरे असन सेइं कियोरोए। 4 अस तैस विरासती हासिल केरनेरो इंतज़ार केरने लोरेम जै परमेशरे इश्शे लेइ तियार कियोरीए। कोई भी तैन चीजन कधी बरबाद न केरे बटे। किछ भी तैस खराब केरे बटे। तैना चीजां कधी भी पुरेनी न भोली ते तैन केरे खूबसूरती कधे न घटेली। परमेशरे इना चीजां तुश्शे लेइ स्वर्ग मां रेखोरिन। 5 परमेशर तुसन अपने महान शेक्तेर जिरिये सेइं सम्भाले, किजोकि तुस यीशु पुड विश्वास केरतथ। तै तुसन यीशु मसीहेरे वापस एजने तगर सम्भलतां रखेलो। तेइस तुस ज्ञानेले कि परमेशरे तुस पापे करां ते मौती करां पूरे तरीके सेइं बचावरेथ। 6 तुसेईं इन सेब्मी चीजां केरे बारे मां खुश भोरू लेइ, चाए हुना किछ वक्तेरे लेइ अलग-अलग किसमैरी मुसीबतां तुसन दुखी केरतिन। 7 इन मुसीबतां केरो मकसद ई आए कि इन बांदू भोए कि तुस सच्चे परमेशरे पुड विश्वास केरतथ। तुश्शो यीशु मसीह पुड विश्वास केरनो सोन्ने करां भी जादे कीमतीए। जेन्चरे नाश भोनेबालू सोन्नु अग्गी सेइं परखू ते शुद्ध कियूं गाते, तेन्चरे अगर तुश्शो विश्वास अगारे जेरे अज़मैइशन सेइं परखनेरे बाद भी मजबूत रहते त जेइस यीशु मसीह फिरी एज्जेलो, परमेशर तुसन जो शाबाश ज़ोलो, महिमा ते आदर देलो। 8 तुसेईं यीशु मसीह कधे नईं लवरो, पन फिरी भी तुस तैस सेइं प्यार केरतथ। तुस हुना तैस न लाथ पन तुस तैस पुड विश्वास केरतथ। एसेरो नितीजो ई आए, कि तुस बडे खुश आथ। तुस एत्रे खुश आथ कि लफज़न मां बियांन न केरोए। 9 तुस एल्हेरेलेइ खुश आथ किजोकि परमेशर तुश्शे प्राण पापेरे सज़ाई करां बचाने लोरोए। इन यीशु मसीह मां तुश्शे विश्वासेरू इनामे। 10 ई मुक्ति किछ एरी थी जेसेरे बारे मां नबी बडू ज्ञानू चाते थिये। तैनेईं जोंवं केन्चरे परमेशर तुसन पुड अनुग्रह केरतां बचालो जेसेरे काबल तुस न थिये, तैनेईं बडी जांच पडताल की, कि तैन जुवाब मैल्ले। 11 मसीहेरो आत्मा तैन मां थियो ते तैन सेइं ज़ोने लोरो थियो कि मसीहे केन्चरे दुःख झैल्लेले तो तेट्टां बाद तैस महान आदर दित्ती गाली। एल्हेरेलेइ तैना इन खोज केरतां तोपने लग कि सच्चे मसीह कौन भोलो ते इन केइस भोलू। 12 पन परमेशरे इन अपने गल्लां ज़ोनेबालन सेइं ज़ोवं, कि तैन केरो सन्देश तैन केरे अपने आपेरे लेइ नईं, पन तुश्शे लेइ आए। तै सन्देश यीशु मसीहेरे बारे मां खुशखबरी आए, जै तुसेईं इस वक्त थुनी। परमेशरे स्वर्गरां पवित्र आत्मा भेजो कि लोकां केरि मदत केरे कि तैना तुसन खुशखबरी श्रुनान। इन सब एत्रू हैरान केरनेबालू ए कि स्वर्गदूत भी इन हेनेरी बडी इच्छा रखतन। 13 एल्हेरेलेइ अपने मन तियार केरा ते अपने आपे कैबू मां रख्खा। तैस मुकरी उमीद रख्खा जै तुसन अनुग्रह सेइं तेइस मैलनी जेइस यीशु मसीह दुबारा इस दुनियाईं मां एजोनोए। 14 परमेशरे मन्ना किजोकि तुस तैसेरे बच्चेथ। बुरां कम्मां न केरा जैना तुस बुरी इच्छाई सेइं केरते थिये जेइस तुस परमेशरेरे सच्चाई न थिये ज्ञानते। 15 पन हुनी तुस जैन किछ केरतथ तैस मां पवित्र भोथ, जेन्चरे परमेशर पवित्रे जैने तुस अपने बच्चे भोनेरे लेइ चुनोरेथ। 16 किजोकि पवित्रशास्त्रे मां परमेशरे ज़ोवरू ए “पवित्र बना, किजोकि अवं पवित्र आई।” 17 ज़खन तुस प्रार्थना

केरतथ तुस परमेशरे जो बाजी ज़ोतथ। पन याद रख्खा तै तरफदारी न केरे। एल्हेरेलेइ ज़ैखन तुस इस दुनियाईं मां परदेशी केरे जेरे रातथ त तुसेईं तैसेरी बडी इज़्जत कियोरी लोइ। 18 किजोकि तुस ज्ञानतथ, बीतोरे वक्ते मां तुस बेकार तरीके सेइं जीते थिये जेन्चरे तुश्शे दाद-पडदादे जीते थिये। पन हुनी तुस बेकार जिन्दगी करां छुटावरेथ, तुस नाश भोनेबाले सोन्ने चैदी सेइं नईं धिन्नोरे, 19 पन मसीहेरे कीमती खूने सेइं धिन्नोरेथ, मसीह जै शुद्ध ते सिद्ध गबडोरो ज़ोरोए। 20 दुनिया बनाने करां पेइले परमेशरे इन ठहरावरू थियूं कि यीशु मसीह मुक्ति देनेबालो भोलो। पन ते इन आखरी दिहाइन मां इस दुनियाईं मां अव ताके तुश्शे मदत केरे। 21 यीशु मसीहे जैन कियूं तैसेरे वजाई सेइं तुस हुनी परमेशरे पुड विश्वास केरतथ, तैए आए जैने यीशु मसीह मुडन मरां जीतो कियो ते तैस आदर दित्ती ताके तुश्शो विश्वास ते उमीद परमेशरे पुड भोए। 22 किजोकि तुस सच मन्नेरे जिरिये शुद्ध कियोरेथ, ते हुनी तुसेईं विश्वासी सैथन सेइं इमानदेरी सेइं प्यार कियोरो लोइ। तुसेईं एक्की होरि सेइं गहराई ते पूरे दिले सेइं प्यार कियोरो लोइ। 23 किजोकि तुसन परमेशरेरी तरफां नक्वीं जिन्दगी मैलोरी। तुसेईं ई जिन्दगी एरी चीजी सेइं नईं हासिल कियोरी जै नाश भोली। पन तैस सेइं जैन हमेशा रालू। मतलब परमेशरेरे ज़ीते ते हमेशा रानेबाले वचने सेइं मैलोरीए। (aiōn g165) 24 किजोकि पवित्रशास्त्र ज़ोते “सारे लोक घासेरे ज़ेरे आन ते तैन केरि शोभा जंगली फूडोवेरी जेरी। घास शुक्की गालो ते फूडोवं झेडी गालू। 25 पन प्रभुएरू वचन सदा बनोरू रालू, ते वचन मसीहेरे बारे मां खुशखबरी जैन तुसन शुनव जेवं।” (aiōn g165)

2 एल्हेरेलेइ सब किसमोरो बुरो सलूख केरनो शारा। होरन धोखो न देथ, पाखंड न केरा। ते होरन सेइं जनन न केरा। होरि केरे बारे मां बुरी गल्लां न ज़ोथ। 2 जेन्चरे नंवे ज़मैरे बच्चे अपने अम्मारे खालिस दुद्धेरी इच्छा रखतन, तेन्चरे तुस भी परमेशरेरू वचन शिखनेरे लेइ इच्छा रख्खा जैस सेइं तुस आत्मिक तरीके सेइं मजबूत बनेले। फिरी आखरी मां परमेशर तुसन दुनियारी बुरी चीजन करां पूरे तरीके सेइं बचालो। 3 जेन्चरे पवित्रशास्त्र ज़ोते, “तुसेईं तजरबे सेइं ज्ञानेरू कि प्रभु भलो आए।” 4 तुस प्रभु यीशु कां ओरिथ। ते खास घोडेरे ज़ेरोए जै घरेरे बुनियादी मां लोरोए, पन ते ज़ीतो घोडे। बडे लोकेईं तै रद कियो, पन परमेशरे तै चुनो ते बडो कीमती मन्नो। जेन्चरे लोक घोइन सेइं घर बनातन, तेन्चरे परमेशर तुसन एक्की एरे झुण्डे मां शामिल भोनेरी वजा बनाने लोरोए, जैस मां परमेशरेरो आत्मा रहते, ताके तुस जैन यीशु मसीहे इश्शे लेइ कियोरू तैसेरे वजाई सेइं याजक बना, जैना बलिदाना चाढतन, तुस भी तैन केरां ज़ेरां रोडां कम्मां केरथ जैन सेइं परमेशर खुश भोते। 6 एल्हेरेलेइ जेन्चरे परमेशर पवित्रशास्त्रे मां ज़ोते, “तक्का, अवं अक मैन्हु सिव्योन नगरे मां रखने लोरोई। जै कुनेरो खास ते चुनोरो घोडे, तै अक कीमती घोडेरो ज़ेरो जै मुनीयादी मां रख्खोरोए। ते जै तैस पुड विश्वास केरेलो तै कोन्ची भी तरीके सेइं शरमिनदो न भोलो।” 7 तुस जैना यीशु मसीह पुड विश्वास केरतथ ई घोड तुश्शे लेइ बडो कीमतीए। पन पवित्रशास्त्र तैन लोकां केरे बारे मां ज़ोते जैना विश्वास न केरन, “जै घोड राज़ मिस्त्रेईं इस्तेमाल केरनो न चाव, तैए घरेरे मुनीयादोरो खास घोड भोव, 8 ते पवित्रशास्त्र फिरी ज़ोते, “ई घोड लोकां केरे बिछुडनेरी वजा भोलो। ई अक चट्टाने जै तैन बिछोडेली।” तैना एन्चरे बिछुडन किजोकि तैना परमेशरेरे सन्देश मन्ने करां इन्कार केरतन। तैन सेइं इन भोनेरे लेइ परमेशर इन थापेरू थियूं। 9 पन तुस तैन केरे जेरे नईं किजोकि तुस परमेशरेरे चुनोरे लोक आथ, परमेशर जै राज़ोए, तुस तैसेरे याजक आथ, तुस एरे लोक आथ जैनेईं अपनो आप परमेशरे सोंफोरोए, ते परमेशरेरे अपने लोक आथ। तैन तुस आंधरे मरां बडे लोईं मां कुजावरेथ, ताके तुस परमेशरेरे महान कम्मां केरे बारे मां एलान केरथ। 10 तुश्शे बारे मां होशे नेबे जैन ज़ोरू तैन सच्चे, “तुस पेइले परमेशरेरे लोक न थिये पन हुनी तुस परमेशरेरे लोक आथ। तुस पुड पेइले परमेशरेरी दयाईं न थिये जानते पन हुनी ज्ञानतथ, किजोकि तैन तुसन पुड अपन दया हिरावरीए।” 11 हे ट्लाराथ, तुस इस दुनियाईं मां परदेशी

ते मुसाफरां केरे जेरे ज़िने लोरेथ, अवं तुसन खबरदार केरताई, कि तुस जिसमेरी सैरी पापी खुबेइशन करां दूर राथ, किजोकि तैना हमेशा तुशशे आत्मांरे खलाफ लेइतिना। 12 जैना लोक परमेशरे पुइ विश्वास न केरन तैना तुशशे चेत्रे पासन रहनन, तैना जोले तुस गलत केरने लोरेथ। तुस एरी रोड़ी जिन्दगी जीथ कि लोक तुशशां रोड़ां कम्मां हेरतां तैस दिहाड़े जेइस यीशु मसीह दुबारा एजोनो परमेशररी बडयाई केरेले। 13 प्रभुएरे इज्जतरे खातर, मैन्हु केरे ठहरावरे हर एककी अधिकारेरे अधीन राथ, किजोकि ई प्रभुएरी इच्छा आए, हकोमत केरनेबालेरे अधीन एल्हेरेलेइ राथ किजोकि तै बड़ो खास अधिकारी आए। 14 ते हाकिमेरे भी अधीन भोध, किजोकि राजां तैस बुरां कम्मां केरनेबालन सज़ा देने लेइ ते रोड़ां कम्मां केरनेबालां केरि तारीफ़ केरनेरे लेइ इस्तेमाल केरते। 15 किजोकि परमेशररी मर्ज़ा ईए, कि तुस रोड़ां कम्मां केरतां तैना बेवकूफ़ लोकन जैना परमेशरे न ज़ानन, तुशशे खलाफ़ दोष लाने करां रोकथ। 16 हुनी तुस पापेरे गुलाम नई किजोकि तुस इशशे प्रभु यीशु मसीहेरे ज़िरिये आज़ाद कियोरेथ। पन अपनि ई आज़ादी बुरे कम्मां केरे लेइ इस्तेमाल न केरा, पन तुस भला कम्मां केरे ज़िरिये इन हिराथ कि तुस सच्चे परमेशरे दास आथ। 17 सेबभी केरि आदर केरा, अपने विश्वासी साथी लोकन सेई प्यार केरा, परमेशरे करां डरा, हकोमत केरनेबालेरी इज्जत केरा। 18 हे घरन मां कम केरनेबाले सेवकव, तुस जैना विश्वासी आथ अपने मालिकां केरे हुक्म मन्ना ते हमेशा तैन केरि आदर केरा। इन न सिर्फ़ दया केरनेबालन सेई केरा, बल्के जैना दया न केरन तैन सेई भी। 19 किजोकि अगर अस बगैर गलती केरतां दुःख झैल्लतम त अस ज़ानतम कि परमेशरे सब किछ ज़ानते ते परमेशर असन सेई खुश भोते। 20 किजोकि अगर तुसेई पाप केरतां मार खाइ त तुशशी कोई बडयाई नई कि तुसेई सज़ाई मां सबर की। पन अगर भलाई केरतां दुःख झैलतथ ते सबर केरतथ त इस सेई परमेशर खुश भोते। 21 परमेशरे तुसन कुजानेरी अक वजा ई भी आए कि तुस तेसरेलेइ दुःख झैल्ला, मसीह भी तुशशे लेइ दुःख झैल्लतां तुसन अक मिसाल दिती। तुसेई भी तेन्चरे कियोरु लोड़े जेन्चरे मसीहे कियूं। 22 पवित्रशास्त्र ज़ोते, तैने कधी पाप नई कियोरो। तैने कधी झूठ नई ज़ोवरु। 23 ज़ैखन लोकेई यीशु बेइज्जत कियो, त तैने तेसरे बदले मां तैना बेइज्जत न कियो। ज़ैखन लोकेई तैस दुःख दितो त तैने बदले मां तैन दुख न दितो, बल्के तैने परमेशरे 19 पैदा भरोसो कियो कि तै तेसरी मद्दत केरे। ते ज़ानतो थियो कि परमेशर हमेशा धार्मिकताई सेई लोकां केरो इन्साफ़ केरते। 24 ज़ैखन मसीह मरो, त तेसरे जानी पुइ इशशे पापां केरे लेइ तैस क्रूसे पुइ सज़ा दिती। तेने एन कियूं कि अस पाप केरनो बंद केरम ते धार्मिकतारी जिन्दगी ज़िनी शुरू केरम। तेसरे ज़खम जैना तैनी झैल्ले तैन केरे वजाई सेई अस बेइज्जोए। 25 तुस पेड़ले टेपलोरी भैडुं केरे जेरे थिये, पन हुनी तुस मसीह कां वापस ओरेथ ज़ै तुशशे प्राणा केरो पुहाल ते रखवालोए।

3 हे कुआन्शव, तुस भी अपने मुन्शां केरे अधीन राथ। एल्हेरेलेइ अगर इन मां कोई एरो भोए ज़ै परमेशररे वचने न मनतो भोए, तुशशे ज़िनेरे तरीके सेई तुशशे बगैर ज़ोने तैन केरे विश्वास केरनेरी वजा भोली। तैना तुशशे रोड़े ते पवित्र बताव हेरतां मसीह पुइ विश्वास केरेले। 3 ते तुशशी सजावट दिखावरी न भोए, मतलब अलग-अलग किसमे दोग बनानो, ते सोन्नेरे गेहने, या किसमां-किसमां केरां लिगां लाना। 4 बल्के तुस अपने गुना केरे ज़िरिये अपनो आप खूबसूरत बनाथ ज़ै तुसन करां दूर न गाए, मतलब नेरमी ते शांत स्भावे सेई ज़ै परमेशररे लेइ बड़ो कीमती आए। 5 ते पेड़ले जुमाने मां पवित्र कुआन्शां भी, जैना परमेशररे पुइ उमीद रेखती थी, तैना अपनो आप इस तरीके सेई सज़ैती ते अपने-अपने मुन्शां केरे अधीन रैती थी। 6 जेन्चरे सारा अब्राहमेरे अधीन रहती थी ते तैस ज़ो मालिक ज़ोती थी, ते तुस भी अगर भलाई केरथ, ते केन्ची किसमेरे फ़िक्रन सेई न डरथ त सारारे कुइयां केरि ज़ेरि भोली। 7 तेन्चरे हे मुन्शव, तुस भी समझदेरी सेई कुआन्शन सेई जिन्दगी बीताथ ते इन याद रख्खा कि तैना तुसन करां कमज़ोरन, एल्हेरे तुसेई तैन केरि आदर कियोरी लोड़े, किजोकि तुस दुइये तैस वरदानेरे

हिसेदार आथ जैन परमेशर तुसन अनुग्रहे सेई दितोरु आए, ते हमेशारी जिन्दगी आए। एरु केरा ताके ज़ैखन तुस प्रार्थना केरथ त परमेशर तुशशी प्रार्थना शुने। 8 आखरी मां अवं तुसन इन ज़ोताई, तुसेई सैभेई अक मन भोवरु लोड़े ते एककी होरि सेई हमदेरदी केरा ते एककी होरि सेई दुला बेइनां केरो जेरो प्यार केरा, ते एककी होरि पुइ दया केरा, एककी होरिरे लेइ नर्म बना। 9 बुरेइदरे बदले बुराई न केरा, गैई केरे बदले गैई न देथ, पन इसेरे बदले बरकत देथ, किजोकि परमेशरे तुस होरन बरकतां देनेरे लेइ कुजावरेथ। अगर तुस इन केरतथ, त परमेशर तुसन भी बरकतां देलो 10 किजोकि पवित्रशास्त्र ज़ोते, “अगर कोई मैन्हु जिन्दगरो आनन्द नेनो चाते, ते रोड़े दिहाड़े हेरने चाते त तैनी ध्यान लोड़े दितोरु कि बुरी गल्लां न ज़ोए। ते तैनी होरन धोखो न लोड़े दितोरो। 11 ते बुरु केरनु बंद कियोरी लोड़े बल्के तैनी रोड़ु कियोरु लोड़े। होरन सेई मेल मिलापे सेई ज़िनेरे लेइ मेहनत कियोरी लोड़े। 12 किजोकि प्रभु तैन लोकां केरु ध्यान रखते जैना तैन्ने केरतन जैन सही आए, ते तै हमेशा तैन केरि प्रार्थना शुन्नेरे लेइ तियार रहते। पन परमेशर तैन केरे खलाफ़ कम केरते जैना बुरु केरतन।” 13 अगर तुस हमेशा भलू केरनेरी कोशिश केरथ, त फिरी कोई भी तुसन हकीकति मां नुकसान न पुजेई बटे। 14 अगर अस धार्मिकतारे स्भावरे वजाई सेई दुःख झैल्लम, त अस सच्चे धन भोले, पन अगर कोई असन डराते त तैस करां डरू न लोड़े ते न घबरावरु लोड़े। 15 पन इसेरे बदले, तुसेई मसीहेरी आराधना अपने जिन्दगरे प्रभुएरे रूपे मां कियोरी लोड़े। ते ज़ै कोई तुसन तुशशे उमीदरे बारे मां किछ पुच्छे ज़ैस मां सारे विश्वासी शामिल आन, त तैस जुवाब देनेरे लेइ हमेशा तियार राथ, पन नेरमी ते आदरी सेई। 16 हमेशा तैन्ने केरा जैन सही भोए। तैखन अगर लोक तुशशे लेइ बुरु ज़ोले त तैना मसीह सेई तुशशे रिशतो भोनेरे वजाई सेई तुशशे रोड़ी बताव हेरेले त तैना छिथोले। 17 किजोकि इन रोड़ु आए अगर इशशां रोड़ां कम्मां केरे वजाई सेई अस दुःख झैल्लम, अगर इशशे लेइ परमेशररी इच्छा ई आए। इन इशशे बुरां कम्मां केरे वजाई सेई दुःख झैल्लने करां बडू रोड़ुए। 18 अवं इन ज़ोताई, मसीहे भी इशशे पापां केरे लेइ दुःख झैल्लो ते मरो। ते एककी बारे मरो ते तैस दुबारा मरनेरी ज़रूरत नई। तै अक धर्मा मैन्हु थियो ज़ै पापी लोकां केरे लेइ मरो ताके तै असन परमेशरे कां आने। तेनेई तेसरो जिसम मारो पन ते पवित्र आत्मा रे शक्ते ज़िरिये ज़िंतो कियो 19 तैदां बाद तेसरी आत्मा तैन आत्मान खुशखबरी शुनाने जेई, जैना परमेशर तैस ठैरी कैद कियोरिन ज़ेडी मरं लोकां केरि आत्मा रैती थी। 20 इन तैन मैन्हु केरि आत्मा आन ज़ेनेई बड़े पेड़ले परमेशररो हुक्म न थियो मन्नोरो। ज़ैखन नूह किशती बनाने लोरो थियो, त परमेशरे बड़े सबरी सेई बलगू कि तैना पापन करां मन फिरान। पन सिर्फ़ अठ तैस भयानक टूफाने करां बचे। 21 पुराने वक्ते मां तैन केरि मुक्ति हुना इशशे लेइ ज़ैखन अस बपतिस्मो नेतम मिसाले। ज़ैस पैनी मां अस बपतिस्मो नेतम तैन इशशे जानरो मैल दूर न केरे, पन ई अक निशान आए कि असेई परमेशरे करां माफ़ी मगोरीए ताके इशशो मन असन परेशान न केरे। असन माफ़ी मैल्ली बटतीए किजोकि यीशु मसीह मेरतां ज़िंतो भोवरोए, 22 ते तै स्वर्ग जो जोवरो। तैडी हुनी ते परमेशररे देइने पासे खास ठैरी, तैडी ते सारे स्वर्गदूतन ते अधिकेरन ते शक्तन पुइ राज़ केरने लोरोए।

4 एल्हेरेलेइ ज़ैखन मसीहे जिसमे मां भोइतां दुःख झैल्लो, त जेन्चरे तेसरो स्भाव थियो तेन्चरे तुस भी दुःख झैल्लनेरे लेइ तियार भोथ। किजोकि अगर तुस मसीहेरे लेइ दुःख झैल्लनो चातथ त तुसेई पाप न केरनेरो फैसलो कियो। 2 नितीजो ई भोलो, कि तै मैन्हु बाकी अपनि जिन्दगी मैन्हु केरे पापी खुबेइशां केरे मुताबिक इस दुनियाई मां न ज़ीयोले पन ते तैन्ने केरेलो जैन परमेशर तैस करां करानो चाते। 3 किजोकि बीतोरे वक्ते मां तुस गैर विश्वासी लोकां केरे जेरे आनन्द केरने मां वक्त बबाद केरते थिये, ते तुस अपनि जिन्दगी एश केरने मां, बुरी खुबेइशन मां, ते तैन केरे तिहारन मां, शराब पीने मां ते नाचे मां, ते तैन केरि मूरती केरि पूजाई मां जैन सेई परमेशर नफरत केरते बीताते थिये। 4 एल्हेरेलेइ तुशशे पुराने दोस्त हैरान भोतन, ज़ैखन तुस

तैन केरे बुरी गल्लन मां जैना तैन केरतन शामिल न भोथ, तांए तैना तुशुशे बारे बुरू-भलू ज़ोतन। 5 पन एक्की दिहाड़े तैनेई ज़रूर परमेशरेंरे सामने इन्साफेरे लेइ खडू भोनु पेनुए। ते परमेशर तैन मरां हर एक्की जैन तैनेई इस धेतली पुड़ कियोरो तैसेरे बारे मां पुछेले। परमेशर ज़ीते ते मुड़दां केरो इन्साफ केरेलो। 6 ईए वजा आए कि मुड़दन भी मसीहेरे बारे मां खुशखबरी शुनाई। तैन केरे जिसम भी एन्चरे मरे जेन्चरे सारे मैनु मरतन। पन हुनी तैना आत्माई मां परमेशरेंरे सेइं साथी हमेशा ज़ीइले। 7 सेब्भी गल्लां केरो अन्त जल्दी भोने बालोए, एल्हेरेलेइ साफ तरीके सेइं सोचा ते अपने आपे पुड़ कैबू केरा ताके तुस प्रार्थना केरी सकतथ। 8 सेब्भन करां रोड़ी गल ईए, कि एक्की होरि सेइं ईमादेरी सेइं प्यार केरा, किजोकि अगर तुस लोकन सेइं प्यार केरेले त तुस तैन केरि गेलती भी माफ केरनेरे लेइ तियार भोले। 9 ज़ैखन लोक तुशुशे घरन मां एजन त बगैर कोन्ची शिकायातां तैन केरु स्वागत केरा। 10 हर एक्की परमेशरेंरे करां वरदान मैलोरुए ते तैनी तैन वरदान होरि केरि मद्दत केरनेरे लेइ इस्तेमाल कियोरु लोड़े। तैनेई तैना काई किसमां केरां वरदानां इस्तेमाल कियोरां लोइन जैना परमेशरेंरे अपने अनुग्रहे सेइं दितोरन। 11 अगर तुसन कां प्रचार केरनेरु वरदाने त तुसेईं परमेशरेंरु वचन प्रचार कियोरु लोड़े। अगर तुसन कां होरि लोकां केरि मद्दत केरनेरु वरदाने त तैस शक्ति सेइं केरा जै परमेशरेंरे तुसन दितोरीए। फिरी सब किछ जैन तुस केरेले तैस सेइं यीशु मसीहेरे ज़िरिये परमेशरेंरी महिमा भोली। सारी महिमा ते शक्ति हमेशा-हमेशा तैसेरीए। आमीन। (aiōn g165) 12 टलारव, जैना दुःख तुस झैल्लने लोरिथ तैन केरे बारे मां हैरान न भोथ किजोकि तुस मसीहेरे आथ। पन इना चीजां इन हिरानेरे लेइ भोनेरे लोरिन कि तुस सच्चे परमेशरेंरे पुड़ विश्वास केरतथ की नई। एल्हेरेलेइ इन न सोचा कि तुसन सेइं नव्वीं गल भोने लोरीए। 13 पन इसेरे बारे मां खुश भोथ, कि जैना दुःख मसीहे मैल्ले तुस भी तैन मां शामिल भोए। एल्हेरेलेइ ज़ैखन मसीह दुबारा एज्जेलो त सेब्भी लोकन पुड़ अपनि महिमा बांदी केरेलो, त तुस बड़े खुश भोले। 14 फिरी अगर मसीहेरे नंवेरे लेइ तुशुशी तुहीन भोतीए, त तुस धन आथ। किजोकि परमेशरेंरे महिमा बालो आत्मा तुसन मां रहते। 15 तुसन मरां कोई मैनु खुनी ते चोर, या कुकर्मी भोने, या होरि केरे कम्मन मां दखल देनेरे वजाई सेइं दुख न झैल्ले। 16 पन अगर मसीही भोने सेइं दुःख झैल्लथ त शरमाए न, पन इस गल्लरे लेइ परमेशरेंरी बडीयाई केरे किजोकि तुस विश्वासी आथ। 17 किजोकि इन्साफेरो वक्त ओरोए, ते ते इश्शो विश्वासी लोकां केरो इन्साफ पेइलो केरेलो, तैन डरानेबेली गल्लां केरे बारे मां सोचा जैना तैन सेइं भोनिन, जैना खुशखबरी पुड़ विश्वास न केरन जै परमेशरेंरे तरफां एइतीए। 18 जेन्चरे पवित्रशास्त्र ज़ोते, “अगर धर्मी मैनेरे लेइ मुक्ति हासिल केरनि बडी मुशकलीए, त बुरे ते पापी मैनु पक्के नाश भोनेन!” 19 एल्हेरेलेइ जैना परमेशरेंरी मेरज़रे मुताबिक दुःख झैल्लतन, तैनेई तैस पुड़ लगातार भरोसो कियोरो लोड़े जैने तैना बनाए। परमेशर हमेशा तैन केरते जैन केरनेरो वादो तैनी कियोरोए ते ते लगातार तैन केरेलो जैन रोडूए।

5 अवं साथी बुजुर्गन सेइं इन ज़ोनु चाताई किजोकि अवं तुशुशो ज़ेरो आई। मीं एप्पू तैना दुःख हेरोरेन जैना मसीहे बड़े पेइले झैल्ले। ज़ैखन ते दुबारा एज्जेलो, त अवं तैसेरे महिमा मां शामिल भोनीई। अवं तुशुशो साथी बुजुर्ग भोने सेइं तुसन कां ई बिनती केरताई, 2 जेन्चरे पुहाल अपनि भैङ्गां हेरतन, तुस भी तेन्चरे हर एक्केरी हेरगेश केरा, जैना परमेशरेंरे तुशुशे रखवैली मां रखेरिन। इन अपने मेज़ीं सेइं केरा किजोकि परमेशर इन चाते। तुस इन एल्हेरेलेइ न केरा कि तुसन पुड़ दबाव बनाव गाते। ते इन कम एल्हेरेलेइ न केरा कि तुस कमाई केरनि चाथ, पन इस इच्छाई सेइं केरा कि तुस परमेशरेंरी ते लोकां केरि सेवा केरनि चातथ। 3 ते जैना लोक तुसन सौंफे तैन पुड़ हकोमत न केरा, बल्के तैन केरे लेइ रोड़ी मिसालां बना। 4 ते ज़ैखन यीशु मसीह ज़ै इश्शो प्रधान पुहालेरो ज़ेरोए, वापस एज्जेलो त ते तुसन तैन इनाम देलो जेसेरी शोभा कथे खतम न भोली। 5 तेन्चरे हे जवान लोकव, तुस भी बुजुर्गां केरे अधीन राथ, तुस सारे एक्की होरेरी मद्दत बड़े नर्म रभावे सेइं

केरा। किजोकि कोई पवित्रशास्त्रे मां पेढी बटते “परमेशर घमण्ड केरनेबालां केरि खलाफ केरते, पन ते तैन केरे लेइ रोडो आए जैना दीन आन।” 6 एल्हेरेलेइ अपनो आप परमेशरेंरे कां दीन बनाथ ते तुशुशी हफाज़त केरनेरे लेइ शक्ति बालोए, ज़ैस सेइं ते तुसन ठीक वक्ते पुड़ आदर दे। 7 परमेशरेंरे अपने परेशनी ते फिकरां केरे बारे मां ज़ोथ, किजोकि तैस तुशुशु ध्यान आए। 8 खबरदार राथ, ते बींझे राथ, किजोकि तुशुशो दुश्मन शैतान तुसन पुड़ हमलो केरनेरे लेइ तियारे, कि तुस परमेशरेंरे मनु शारा। ते गज़नेबाले शेर ज़ेरो तोपने लोरो कि केस मारे ते खाए। 9 तुस विश्वासे मां मज़बूत भोइतां तैसेरो मुकाबलो केरा, तैन विश्वासी लोकन याद रख्खा जैना दुनियारे अलग-अलग ठैरन मां आन, तैना भी तुशुशो ज़ेरो दुःख झैल्लने लोरिन। 10 हुनी परमेशरेंरे ज़ै सारे अनुग्रहे सेइं भरतां, तैने अस हमेशारी महिमा मां शामिल भोनेरे लेइ चुनोरेम किजोकि इश्शो रिश्तो यीशु मसीह सेइं आए। थोड़े वक्तेरे दुःख झैल्लनेरे बाद परमेशर तुसन सही बनालो ताके तुसन मां कोई गलती न राए, ते तुशुशे दिलन मज़बूत केरेलो ताके तुस मज़बूती सेइं तैस पुड़ विश्वास केरथ। (aiōnios g166) 11 ते शक्ति सेइं हमेशा राज़ केरेलो। आमीन। (aiōn g165) 12 मीं सिलवानुसेरे मद्दती सेइं ई निकड़ी ज़ेरि चिट्टी लिखी ते तुसन जो भेजी, अवं तैस ज्ञानताई तै मसीह मां वफादार ढूला आए, मेरे लिखनेरो मकसद ई आए कि तुशुशो होसलो बधेई ते याकीन दूवेई कि जै तजरबो तुस केरने लोरोरेथ ते सच्चे परमेशरेंरे अनुग्रहेरो अक हिस्सो ए, इस अनुग्रहे मां मज़बूती सेइं बनोरे राथ। 13 बाबेल नगरेरे विश्वासी जैना परमेशरेंरे चुनोरेन ठीक तेन्चरे जेन्चरे तुस चुनोरेथ, तैना तुसन जो नमस्कार ज़ोतन। मरकुस ज़ै मेरे मट्टेरो ज़ेरोए तुसन जो नमस्कार ज़ोते। 14 मसीहेरे प्यारे सेइं एक्की होरि जो नमस्कार केरा। अवं प्रार्थना केरताई परमेशर तुसन सेब्भन जैन केरो रिश्तो मसीह सेइं साथी शान्ति दे।

2 पतरस

1 अवं शमौन पतरस, यीशु मसीहेरो दास ते प्रेरित आई, अवं तुशे सेव्ही केरे लेइ लिखने लोरोई, तुस भी तैस कीमती विश्वासे मां शामलथ जै अस केरतम, ई विश्वास असन यीशु मसीह, इशु परमेशर ते मुक्ति देनेबाले जिरिये दित्तो जेव, जै असन धर्मी बनाते। 2 अवं प्रार्थना केरताई जेन्चरे तुस परमेशररे ते प्रभु यीशुएरे ज्ञाने मां बढ़ते गाथ, परमेशर तुसन अनुग्रह ते शान्ति जादे करां जादे दे। 3 परमेशर अपने शक्ति सेई असन तेन सब दितोरु जैन असन परमेशर खुश केरनेरी जिन्दगी जीनेरे लेइ लोइते। इन भोइ बटते किजोकि अस परमेशर ज्ञानतम कि तैने अस अपने महिमा ते अपने रोइ गुना केरे मुताबिक तैसेरे लोक भोनेरे लेइ कुजोरेमा। 4 इन सेव्ही केरे जिरिये परमेशर असन महान ते कीमती वरदानां दित्तोरन जैन केरो तैनी वादो कियोरो थियो, इन वरदानां इस्तेमाल केरतां अस दुनियारी बुरी इच्छान करां बेची बटतम, जैना लोकन नाश केरतिन, ते अस परमेशररे स्थावे मां शामिल भोइ बटतम। 5 एल्हेरेलेइ तुसेई न सिर्फ यीशु पुइ विश्वास कियोरो लोडे, बल्के होरि केरे लेइ भलाई केरनेरे लेइ सखत मेहनत भी कियोरी लोडे, तुसेई न सिर्फ तैन कियोरु लोडे जैन रोडू भोए, बल्के तुसेई एरे लोक बनोरु लोडे जैना ज्ञातन समझदारी सेई केन्चरे बर्ताव केरतन, 6 तुसेई सिर्फ इन न लोडे ज्ञानोरु कि समझदारी सेई केन्चरे बर्ताव केरतन, पन तुसेई अपनो आप कैबू भी कियोरो लोडे, तुसेई न सिर्फ अपनो आप कैबू मां लोडे कियोरो, बल्के मुसीबत मां सबर भी कियोरी लोडे, तुसेई न सिर्फ मुसीबत मां सबर कियोरी लोडे बल्के तुसेई एरी जिन्दगी भी जीयोरी लोडे जैस सेई परमेशर खुश भोए। 7 तुसेई न सिर्फ एरी जिन्दगी जीयोरी लोडे जैस सेई परमेशर खुश भोए, बल्के तुसेई एक्की होरि विश्वासी लोकन सेई अपने टब्बरेरे लोकां केरो जेरो प्यार भी कियोरो लोडे, तुसेई एक्की होरि सेई न सिर्फ अपने टब्बरेरे लोकां केरो जेरो प्यार कियोरो लोडे बल्के तुसेई सैरी लोकन सेई प्यार कियोरो लोडे। 8 अगर तुस एन्चरे ज़ीले त तुस इशु प्रभु यीशु मसीह ज्ञानेले ते तुस इस्तेमाल भोनेबाले ते फलदार भोले। 9 पन अगर कोन्ची मां इना गुण न भोन त त एरे मैनेरो जेरोए जै कानोए, ते तैने बिसरोरुए कि परमेशर ते तैसेरे पुराने पापन करां साफ कियोरोए। 10 एल्हेरेलेइ हे इलाव ते बेडनव, एन्चरे कम केरनेरे लेइ होरि जादे मेहनत केरा, जैस सेई तुस अपनो आप साबत केरा कि परमेशर तुस हकीकति मां तैस पत्ती चलनेरे लेइ चुनोरेथ ते तैसेरे लोक भोनेरे लेइ चुनोरेथ। अगर तुस इना गुणा केरे मुताबिक केरेले त तुस कधी मसीह पुइ भरोसो केरनो न शारिेले। 11 ते परमेशर भी तुसन तैस राज़े मां बड़े जोश सेई कबूल केरेलो जैडी यीशु मसीह, जै इशु प्रभु ते इशु मुक्ति देनेबालोए, तै राज़ेरो जेरो हमेशा राज़ केरेलो। (aiōnios g166) 12 चाए तुस इना सैरी गल्लां ज्ञानतथ, ते सच्ची शिक्षा तैस मां तुस मजबूती सेई बनोरे रातथ, जै लोकेई तुसन शिखालोरी, अवं तैन केरे बारे मां लगातार याद किराइलो। 13 अवं ज्ञानताई जांतगर अवं जीतोई, तैन केरे बारे मां लगातार तुसन ज़ोनू सही आए, ताके तुस तैन न बिसरथ। 14 किजोकि अवं ज्ञानताई, अवं जल्दी मरनोई, किजोकि इशु प्रभु यीशु मसीह मीं एल्हेरे बारे मां साफ ज़ोवरुए। 15 एल्हेरेलेइ अवं इना गल्लां केरे बारे मां ज़ोनेरी बड़ी कोशिश केरताई, ताके तुस मेरे मरनेरां पत्ती इना सैरी गल्लां याद केरि बटथ। 16 ज़ैखन असेई प्रेरितेई तुसन अपने प्रभु यीशु मसीहेरी शक्ति ते एजनेरी खबर शुनावरी थी, त असेई च़लैकी सेई बनेवरी कहैनी न जोई बल्के असेई मसीहेरी तैस महिमारे बारे मां ज़ोवं जै असेई अपने एछड़ेई सेई लाई। 17 ज़ैखन अस तैस सेई साथी पवित्र पहाडे पुइ थिये ज़ैखन बाजी परमेशर तैस आदर ते महिमा दित्ती। तैस वक्ते परमेशर करां तैस महान महिमाई मरां आवाज़ आई, “इन मेरु ट़लारु मटूए ज़ैस सेई अवं खुश आई।” असेई एप्पू ई आवाज़ स्वर्गंरं शुनी। 18 अस नेबी केरु वचन भी ज्ञानतम, जैन तैनेई मसीहेरे बारे मां ज़ोवं तैन बिलकुल सच्चे, तैना इस बारे मां पक्कू केरतन जैन असेई तुसन तैसेरे वापस एजनेरे बारे मां शिखालू। तुसेई तैना गल्लां ध्यान

सेई शुनोरी लोइन, जेन्चरे दीयो आंधरे मां बलते ते लोकन सही बत्तां गानेरे लेइ मद्दत केरते, इन वचन तुशरी इन ज़ान्नेरे लेइ मद्दत केरेलू कि सज़ कुने। 19 तुसेई तैन वचन रोडे च़ारे शुनोरे लोइन ज़ांतगर इशु प्रभु यीशु मसीह वापस न एज्जे। तैसेरु एज्जु एरु भोलू जेन्चरे न्वंचे दिहैडरी लौ भोली, ते तै झेझेरे तारेरो जेरो भोले। तैस वक्त तैसेरी लौ तुशुश दिलन मां चमकेली त कने तुसन पुइ परमेशर बांदी केरेली। 20 पन इन ज़रूरी कि तुस नेबी केरु वचन जैन तुस पवित्रशास्त्रे मां पढतथ, तैन वचन तैन केरे अपने खियाल नई। 21 किजोकि कोई भी भविष्यवाणी मैन्हु केरे मेज़ी सेई न भोइ, पन भक्त लोक पवित्र आत्मा अगवैई सेई परमेशररे तरफां सन्देश ज़ोते थिये।

2 ते जेन्चरे बड़े पेइले इसाएली लोकन मां झूठे नबी थिये, तेन्चरे तुसन मां भी झूठे उस्ताद भोले। तैना बल्हे च़ारे तुसन मां एज्जले ते परमेशररे बारे मां नाश केरनेबालू झूठ ज़ोले। इडी तगर तैना मसीहेरो इन्कार केरेले कि तै प्रभु नई ज़ैने तैना पापन करां आज़ाद किये। एन्चरे केरने सेई तैना एप्पू पुइ विनाश आनेले। 2 परमेशररे बड़े लोक तैन इन झूठे उस्तादां केरे बुरे कम्मां केरि नकल केरेले, ते तैन बुरां कम्मां केरे वजाई सेई सच्चे बतारे खलाफ बुरी गल्लां ज़ोले। 3 इना उस्ताद बड़े लालची भोले ते तैना तुसन बनेवरी कहैनी शुनेइतां तुसन धोखो देले, ताके तुसन करां पेइसो हासिल केरन। परमेशर बड़े पेइले ई फैसलो कियोरो कि तैन सज़ा दे ते तै इन केरनेरे लेइ तियार भी आए, तैसेरे एजने मां किछ भी च़िर नई, ते तैन केरो विनाश बलगतोए। तै पक्को तैन नाश केरेलो। 4 तुस ज्ञानतथ बड़े पेइले किछ स्वर्गदूतेई परमेशररो हुकम न मन्नो, जैन तैनेई कियू तैसेरेलेइ परमेशर तैन सज़ा दित्ती। तैने तैना नरके मां छुड़े, ते तैस दिहैडी तगर आंधरे मां कैद किये ज़ांतगर तै तैन केरो इन्साफ न केरे ते तैन सज़ा न दे। (Tartarō g5020) 5 तुस इन भी ज्ञानतथ ज़ैना लोक बड़े पेइले इस दुनियाई मां जीते थिये तैनेई परमेशररो डर न मन्नो, परमेशर तैन करां बुरां कम्मां नज़रानदाज़ न कियां। बल्के तैनी पापी भेजतां तैन सज़ा दित्ती जैस मां सारी धरती छुपी ते तैना सारे नाश भोए। पन तैने तैन मरां नूहे समेत अठ लोक बचाए, जैने धार्मिकतारो प्रचार कियो। 6 परमेशर सदोम ते अमोरा नगरन सज़ा दित्ती, तैना भस्म भोइतां मांजन बना, एन केरतां परमेशर लोक खबरदार किये, कि ज़ैना तैसेरे हुकम न मनन तैन सेई भी एरु भोलू। 7 पन सदोम ते अमोरा नगरन नाश केरने करां पेइले तैने धर्मी लूत नगरे करां बेडर कढो ते बचाव। लूत तैन लोकन सेई खुश न थियो किजोकि तैना कोई भी कानून न थिये मन्ते ते बेशर्म कम्मां केरते थियो। 8 (लूत धर्मी मैन्हु थियो, पन तै रोज़ तैन बुरे लोकन मां रातो थियो, एल्हेरेलेइ जैन बुरी गल्लां तै शुनतो थियो ते हेरतो थियो तैन सेई तैसेरो रोडो दिल बडो दुखी भोतो थियो।) 9 इन सैरी गल्लां ज़ैना परमेशर कियोरिन इन हिरेतिन कि प्रभु परमेशर अपने धर्मी लोकन तैन केरे मुसीबतरे वक्त तैन सम्भालेले, ते इन्साफेरे दिहाडे तगर बुरे लोकन सज़ा देतो रालो। 10 परमेशर तैन झूठे उस्तादन पक्की सज़ा देलो, ज़ैना इना गल्लां अपने गलत ते बुरी खवैइशन सेई केरतन, ते तैना परमेशररे अधिकारे जै तैन पुडे घटया समझतन, ते तैना ढीठ ते घमण्डी आन। तैना स्वर्गे प्राणैरी केरे बारे मां बुरु ज़ोने करां न डरन। 11 स्वर्गदूतां केरे बारे मां सोचा, तैना तैन झूठे उस्तादन करां बड़े शक्ति बालेन। तैना ज़ैखन इन झूठे उस्तादन पुइ परमेशररी हज़ूरी मां दोष लातन, त गलत ज़बान इस्तेमाल न केरतन। 12 पन इना झूठे उस्ताद जंगली जानवरां केरे जेरन, इना जानवर न ज्ञानन केन्चरे सोचोरु लोडे तैन केरो मकसद सिर्फ ट़लानू ते मारनू भोते। इन लोक भी जैन तैन केरे मने मां एइते तैन केरतन, ते जैन गल्लन न समझन तैन केरे बारे मां बुरु ज़ोतन, तैना पक्के नाश भोनेन। 13 तैन नाश भोनु तैन केरे कियोरे नुकसानेरो इनामे। तैन भर ट़पारं एश केरनो रोडो लगते, तैना तुसन मां कलंक ते दाग आन। इडी तगर कि तैना तुसन सेई धामन मां खतन-पीतन फिरी भी धोखो देन मां खुश भोतन। 14 तैना जैस कुआन्शी भी लातन तैस सेई बदमाशी केरनि चातन। तैना पाप केरने लेइ मौके तोपने कधी न शारन। तैना तैन लोकन धोखो देतन ज़ैना मसीह पुइ मजबूती सेई

विश्वास न केरन ते तैन पापे मां नेतन। तैन केरि जादे करां जादे बुरी इच्छां केरे वजाई सेई परमेशर तैन सजा देलो। 15 तैनेई सही केरनु बंद कियोरूप, ते तैनेई तेन्चरे बुरां कम्मां केरनां शुरू कियां जेन्चरे बडे पेडले बओरें मट्टे बिलामे कियोरां थियां। तैनेई बुरी चीजां केरतां पेडसे कमाने पसंद किये। 16 परमेशरे ते तैसेरे बुरेदार लेइ डांटो जै तैनी कियोरी थी, तैसेरे गेथां मैन्हु केरि भाषाई मां गल की ते नबी गलत केरने करां रोको। 17 इन झूठे उस्ताद शुक्कोरे खुआं केरे जेरे बेकार आन, ते तैना बेफेइदी बिदलारे जेरे आन, जैस झुडी भोने करां पेडले हवा दूर उडारती। परमेशरे तैन केरे लेइ एरी ठार तियार कियोरी जै बिलकुल आंधरीए। 18 जैखन तैना लोकन शिखालतन त तैना बेकार ते घमण्डी लफज इस्तेमाल केरतन, तैना लोकन ज़ोतन कि तैना बेइज़्जत चीजां केरि बटतन जैना तैन केरे जिसम केरने चातन, तैना लोकन धोखो देइतां पाप करातन जैना इस किसमेरी बुरी ज़िन्दगी करां बचोरेन। 19 तैना तैन लोकन सेई वं वादो केरतन अगर तैना तैन केरि मनन, त तैना जैन चातन तैन केरि बटतन, किजोकि तैन केरो कोई मालिक नई। पन इन सच्चे, तैन एपू भी अपने बुरे रूवाजां केरे गुलामन, किजोकि जै कोई चीज केरनेरो आदी त ते तैस केरनेरो गुलाम बनते। 20 जैखन लोकेई यीशु मसीह तैन केरो प्रभु ते मुक्ति देनेबालोए पिशानो, त तैना दुनियारे बुरेई करां छुटोरे थिये। पन तैना फिरी तैन बुरी चीजां केरने मां शामिल भोए ते तैना बुरी चीजां तैन केबू केरतन, ते तैन केरि आखरी हालत पेडली हालती करां भी बुरी भोइ। 21 जोनेरो मतलब ई आए, किजोकि जैन लोकेई मसीहे पुइ विश्वास केरनो शारो, परमेशर तैन, तैन लोकन करां जादे सजा देलो, जैनेई कथे विश्वास नई कियोरो, तैन लोकां केरे लेइ रोडू भोथू कि तैना कधी न ज़ानेथे कि धार्मिकतारी ज़िन्दगी केन्चरे ज़ीतन। हुनी तैना ज़ानतन कि सही कुन आए, पन तैना परमेशरे हुक्मन न मनन जैना असेई प्रेरितेई शिखालोरेन। 22 जैन तैनेई कियूं तैन केरे लेइ इना दूई कहावत ठीक आन, “तैना कुत्रां केरे जेरे आन जैना उलटी केरतां फिरी खातन, ते तैना निहावरे सूरां केरे जेरे आन जैना फिरी चिकरी मां गातन।”

3 हे ट्लारव, अवं दुइयोवं चिट्टी लिखने लोरोई, अवं दुइये चिट्टन मां तुसन किछ गल्लां याद करेइतां होसलो देनेरी कोशिश केरने लोरोई। जैना तुसेई पेडली शिखोरिन ताके तुस सही तरीके सेइं सोचथ। 2 अवं इन एल्हेरेलेइ लोरोई केरने, कि अवं तुसन तैना गल्लां याद करैनी चाताई जैना बडे पेडले नेबेई ज़ोरिन ते इश्शे प्रभु ते मुक्ति देनेबाले यीशु मसीहेरी शिक्षा आन। जैना प्रेरित तुसन कां आए तैनेई तुसन शिखैलोरिन। 3 सेबभन करां खास गल ई आए, कि तुस ज़ानथ, कि आखरी दिहाइन मां मसीहेरे वापस एजने करां पेडले, लोक तुश्शो मज़ाक बनाने कि तुस विश्वास केरतथ कि मसीह दुबारा वापस एजनीए, तैना आदी भोनेरे वजाई सेई एना बुरी चीजां केरेले जैन सेई तैना खुश भोतन। 4 तैना ज़ोले, “तैसेरो एजनेरो वादो सच नई, तै बिलकुल भी नई एजनी! किजोकि जैना शुरुआती मां इश्शे मसीही बुजुर्ग थिये तैना सब मरे, पन किछ भी बेदलोवं। सब किछ तेरहु आए, जेन्चरे दुनिया बनानेरे वक्ते करां थियूं।” 5 तैना एन एल्हेरेलेइ ज़ोतन किजोकि तैना इन बिस्सरनू चातन, कि बडे पेडले अम्बर ते धरती परमेशरेरे हुक्मे सेई बनाव जेव। तैने धरती पैनी मरां कढी ते पैनी करां अलग की। 6 फिरी तैनी पैनेरो इस्तेमाल कियो कि पुरानी दुनिया बडे तूफाने सेई नाश केरे। 7 पन परमेशरे अम्बर ते धरती तैस्से हुक्मेरे ज़िरिये रखोरेन, ताके तैन अग्गी सेई नाश केरे। ते तैन तैस दिहैडी तगर रखेलो जेइस ते तैन लोकां केरो इन्साफ केरेलो ते नाश केरेलो जैना तैसेरी आदर न केरन। 8 हे ट्लारव, जैना गल्लां अवं हुन्ना ज़ोने लोरोई तैन नज़रानदाज़ न केरा, कि प्रभुएरी नज़री मां अक दिहाडी हज़ार सालन बराबरे ते हज़ार साल एक्की दिहैडरे बराबर आन (तैना तैसेरेलेइ अक्कां जेरे आन)। 9 किछ लोक सोचतन कि प्रभु अपनो वापस एजनेरो वादे पूरे केरने मां च़िर लोरो लाने। पन परमेशर एन्चरे च़िर नई लाने लोरो, बल्के इसरे बदले ते तुसन सेई सज़ लोरो केरने। किजोकि ते न चाए कोई भी नाश भोए। पन ते चाते कि हर कोई अपनो मन बदले त कने

गलत केरनु शारे ते तैस कां एज्जे। 10 पन मसीह पक्को वापस एज्जेलो, तै अचानक एज्जेलो जेन्चरे च़ोर अचानक एइते। तैस वक्त अम्बर मां गर्जनीरी ज़ेरि शोर भोली, ते अम्बर गायब भोइ गालू। सब किछ जैन अम्बरे मां आए, दिहाडो, चाँदनी, तारे सब अग्गी सेई बिलकुल नाश भोलू, तैस दिहाडे परमेशर इन्साफ केरनेरे लेइ तैन सब किछ बादू केरेलो जैन लोकेई इस दुनियार्ई मां कियोरूप। 11 एल्हेरेलेइ कि परमेशर इना सैरी चीजां पेक्की नाश केरेलो जेन्चरे मां ज़ोवं, एल्हेरेलेइ तुसेई पवित्र ज़िन्दगी जीयोरी लोडे ते अपनो आप परमेशरे सोंफोरो लोडे। 12 जेन्चरे तुस तैस दिहैडी बलगने लोरेथ जेइस परमेशर दुनियारो इन्साफ केरने एज्जेलो, ते बडी कोशिश केरा कि ते दिहाडी जल्दी एजनेरे लेइ। तैस दिहाडे परमेशर अम्बरे अग्गी सेई फुकेलो ते नाश केरेलो त कने अम्बरेरी सैरी चीजां अगारे गेरमी सेई गेलेली। 13 पन अस विश्वासी नंवे अम्बरे ते नंवे धरती बलगने लोरेम जेसेरो वादो परमेशरे कियोरो, ज़ैडी लोक परमेशरेरे इच्छाई सेईं जीयेले। 14 एल्हेरेलेइ, हे ट्लारव, जेन्चरे तुस तैस दिहैडी बलगने लोरेथ जेइस परमेशर इस दुनियारो इन्साफ केरेलो, त तुस पूरी कोशिश केरा कि तुस शैन्ति सेईं परमेशरेरे नज़री मां शुद्ध ते बेइलज़ाम भोथ। 15 ते इश्शे प्रभुपुरे सबारे बारे मां सोचा तैन तुसन मोको दित्तो, कि तुस एजनेबाले इन्साफे करां बचथ। इन इश्शे ट्लारे विश्वासी सैथे पोलुसे भी तुश्शे लेइ तैस समझारे मुताबिक अपने चिट्टी मां लिखोरू जै परमेशरे तैस दित्तोरीए। 16 तैन अपने सैरी चिट्टन मां जैना तैन विश्वासी लोकन जो लिखी, इना सैरी गल्लां तुसन लिखी। पन किछ तैसेरी लिखोरी गल्लां समझनी मुश्किल आन। तैन लोकां केरे लेइ जैनेई रोडे च़ारे नई पढोरू जैन इस बारे मां पक्को पतो नई कि तैना कुन विश्वास केरतन, तैना गलत तरीके सेइं इन मुश्किल गल्लां केरे मतलब कढतन, जेन्चरे तैना पवित्रशास्त्रेरी किछ गल्लां केरो गलत तरीके मतलब समझातन। एन्चरे केरने सेईं तैना अपनो आप इस काबल बनातन कि परमेशर तैन नाश केरे। 17 एल्हेरेलेइ, हे ट्लारव तुस पेडले ज़ानतथ कि इना गल्लां भोनिन, एल्हेरेलेइ तुस हुशार राथ ताके जैना लोक कानून न मनन तैना तुसन झूठ जोइतां धोखो न देन, ते तुस सेच्ची गल्लन विश्वास केरनो शारथ। 18 पन तुस इश्शे प्रभु ते मुक्ति देनेबाले यीशु मसीहेरे अनुग्रह ते ज़ाने मां बद्धे गाथ। तैसेरी महिमा हुन्ना भी भोए, ते हमेशा भोती राए। आमीन। (ai0n g165)

1 यूहन्ना

1 अस तैस एककी वचनेरे (मैनेरे) बारे मां लिखने लोरेम जै जिन्दगरो वचन आए, जै शुरू करां थियो, जै असेई शुनो, ते जै अपनि एछ्छेई सेई लाव, बल्के जै असेई ध्याने सेई लाव, ते तैस सेई अपने हथ लाए। 2 (ई जिन्दगी बांदि भोइ, ते असेई लाई, ते अस तैसेरी गवाही देतम, ते तुसन तैस हमेशारी जिन्दगरी खबर शुनातम, जै बाजी सेई साथी थी, ते असन पुड़ बांदि भोइ)। (aiōnios g166) 3 जैन किछ असेई यीशुएरे बारे हेरू के शुनु तैसेरी खबर तुसन भी देतम, एल्लेरेलेइ कि तुस भी असन सेई साथी शामलथ, ते इशशी ई शामलीत बाजी सेई साथी, ते तैसेरे मट्टे यीशु मसीह सेई साथीए। 4 ते इना गल्लां अस एल्लेरेलेइ लिखतम, कि इशशी खुशी पूरी भोए। 5 जै खबर असेई प्रभु यीशु करां शुनी, ते तुसन शुनातम, तै ईए; कि परमेशर लोओ जेरो शुद्ध, ते तैस मां किछ भी आंधरू (बुराई) नई। 6 अगर अस जोम, कि तैस सेई साथी इशशी शामलीते, ते फिरी आंधरे मां चलतम, त अस झूठे, ते सच्चे पुड़ न चलतम। 7 पन अगर जेन्चरे परमेशर लोई मांए, तेन्चरे अस भी लोई मां ज़ोम, त एककी होरि सेई शामिल रातम ते तैसेरे मट्टे यीशु मसीहोरे खून असन सेब्भी पापन करां शुद्ध केरते। 8 अगर अस जोम, कि असन मां कोई पाप नई, त अपने आपे धोखे देतम, ते असन मां सच्चे नई। 9 अगर अस अपने पाप मन्तम, त तै इशशे पाप माफ़ केरने, ते असन सेब्भी अधर्म करां शुद्ध केरने मां वफादार ते धर्मीए। 10 अगर अस जोम कि असेई पाप नई कियोरो, त परमेशरे झूठो ठहरातम, ते तैसेरू वचन असेई कधी कबूल नई कियोरू।

2 हे मरे ट्लारे बच्चव, अव इना गल्लां तुसन एल्लेरेलेइ लिखताई, कि तुस पाप न केरा, ते अगर कोई पाप केरे, त बाजी परमेशरे कां इशशो अक मद्दतगारे, मतलब धर्मी यीशु मसीह। 2 तै इशशे पापां केरो छुटकारे लेइ बलिदान भोव, ते सिर्फ इशशे लेइ नई, बल्के सैरी दुनियारे पापां केरे लेइ भी। 3 अगर अस तैसेरे हुक्मन मन्तम, त इस सेई अस समझे गाले कि अस तैस ज्ञानतम। 4 जै कोई इन जोते, “कि अव तैस ज्ञानताई,” ते तैसेरे हुक्मन न मन्ते, ते झूठो, ते तैस मां सच्र नई। 5 पन जै कोई तैसेरे वचने पुड़ चलते, त तैस मां सच्चे परमेशरोरे प्यार सिद्ध भोए, असन इस सेई पतो चलते, कि अस तैस मां आम। 6 जै कोई इन जोते, कि अव तैस मां बनरो राताई, त तैनी तेन्चरे ज़ीयोरू लोडे जेन्चरे यीशु मसीहे ज़ीयोरूए। 7 ट्लारव, अव तुसन कोई न्वो हुक्म न लिखी, पन तैए पुरानो हुक्म जै पेइलो तुसन मैल्लो; ई पुरानो हुक्म तैन वचने, जैखन तुसेई मसीह पुड़ विश्वास कियूं। 8 फिरी भी अव तुशशे लेइ न्वो हुक्म लिखताई, किजोकि एन सच्र आए, जैन मसीह मां ते तुसन मां भी लेइहोव, किजोकि अन्धकार मिटतो गाते ते सच्चेरी लौ हुनी चमकने लोरीए। 9 जै इन जोते, कि अव लोई मां आई ते विश्वासी ढूलाए सेई बैर रखते, ते हेजू तगर आंधरे मां आए। 10 जै कोई अपने ढूलाए सेई प्यार केरते, ते लोई मांए, तैसेरेलेइ पाप केरनेरे लेइ कोई वजा नई। 11 पन जै कोई अपने ढूलाए सेई बैर रखते, तै आंधरे मांए, ते तै आंधरे मां चलते; ते न ज़ाने, कि कोरां गाते, किजोकि आंधरे तैसेरी एछ्छी कैनी केररिन। 12 हे बच्चाव अव तुसन एल्लेरेलेइ लिखताई, कि यीशु मसीहेरे न्वे सेई तुशशे पाप माफ़ भोए। 13 हे बुजुर्गव अव तुसन एल्लेरेलेइ लिखताई, कि जै शुरू करां आए तुसन तैस ज्ञानथ, हे जवानव, अव तुसन एल्लेरेलेइ लिखताई कि तुसेई तैस शैताने पुड़ जीत हासिल केरीए। हे बच्चाव अव तुसन एल्लेरेलेइ लिखताई कि तुसेई बाजी परमेशर पिशानो। 14 हे बाजव, अव तुसन एल्लेरेलेइ लिखताई, कि जै पेइलोए तुसेई पिशानो, हे जवानव, अव तुसन एल्लेरेलेइ लिखताई, कि तुस मज़बूतथ, ते परमेशरेरू वचन तुसन मां बनोरू रहते, ते तुस शैताने करां जीतोरेथ। 15 तुस न दुनियाई सेई ते न दुनियारी चीजन सेई प्यार केरा, अगर कोई दुनियाई सेई प्यार केरते, त तैस मां बाजी परमेशरोरे प्यार नई। 16 किजोकि जैन किछ दुनियाई मां आए, मतलब जिसमेरी खुबेइश, ते एछ्छी केरि खुबेइश ते जिन्दगरू घमण्ड, तैन बाजी परमेशरेरे तरफां नई पन

दुनियारे तरफांए। 17 दुनिया ते तैसेरी खुबेइश दुइये मिटती गैतिन, पन जै परमेशरेरे मेज़ीं पुड़ चलते, तै सदा बनोरो रालो। (aiōn g165) 18 हे बच्चव, ई आखरी वक्ते कि मसीह वापस एजोनोए, ते जेन्चरे तुसेई शुनोरूए, कि मसीहेरी खलाफत केरनेबालो एजनेबालोए, तैसेरे मुताबिक हुना भी बडे मसीहेरी खलाफत केरनेबाले उठोरेन, इस सेई अस ज्ञानतम, कि ई आखरी वक्ते कि मसीह वापस एजोनोए। 19 तैना मसीहेरी खलाफत केरनेबाले लोक निस्से त असने मरां, पन तैना असन मरां न थिये, किजोकि अगर असन मरां भोथे, त असन सेई साथी राथे, पन निस्से एल्लेरेलेइ कि इन बांदू भोए कि तैना सब असन मरां नई। 20 पन मसीहेरे ज़िरिये तुसन पवित्र आत्मा दितोरोए, तैसेरे वजाई सेई तुस सब सच्र ज्ञानतथ। 21 मीं तुसन एल्लेरेलेइ नई लिखोरू, कि तुस सच्चे न ज्ञानथ, पन एल्लेरेलेइ, कि तैस ज्ञानतथ, ते एल्लेरेलेइ कोई झूठ, सच्चेरे पासरां नई। 22 झूठो कौने? सिर्फ तै, जै यीशुएरू मसीह भोनोरो इन्कार केरते, ते मसीहेरी खलाफत केरनेबालो तैए आए, जै बाजी परमेशरोरी ते कने मट्टेरो यानी यीशुएरो इन्कार केरते। 23 जै मट्टेरो इन्कार केरते तैस कां बाजी परमेशर भी नई, जै मट्टे मन्ते, तैस कां बाजी परमेशर भी आए। 24 जैखन तुसेई यीशु मसीह पुड़ विश्वास कियूं, तुसेई जै सच्ची शिक्षा शुरू करां शुनोरोए, तैए तुसन मां बनोरी राए, त तुस भी मट्टे मां, ते बाजी परमेशरे मां बनोरे राले। 25 ते जेसेरो वादो परमेशरे कियोरोए, तै हमेशारी जिन्दगीए। (aiōnios g166) 26 मीं इना गल्लां तुसन तैन करां खबरदार रांनेरे लेइ लिखी, जैना लोक तुसन झूठी शिक्षारे ज़िरिये टपलातन। 27 ते तुशशू तैन अभिषेक, जैन तैसेरे तरफां केरूए, तुसन मां बनोरू रहते; ते तुसन एल्लेरी ज़रूरत नई, कि कोई तुसन शिखाले। बल्के जेन्चरे तैन अभिषेक जैन तैसेरे तरफां कियोरूए, तुसन सब गल्लां शिखालते, ते इन सच्चे, ते झूठ नई, ते जेन्चरे तैन तुसन शिखालोरूए, तेन्चरे तुस तैस मां बनोरे रातथ। 28 हे बच्चव, तैस मां बनोरे राथ, कि जैखन इन बांदू भोए, त असन दिलेरी भोए ते अस तैसेरे एजने पुड़ तैसेरे सामने शरमिनदे न भोम। 29 अगर तुस ज्ञानतथ, कि मसीह धर्मीए, त इन भी ज्ञानतथ, कि जैना धार्मिकतारां कम्मां केरतन, तैना परमेशरेरे बच्चेन।

3 हेरा बाजे परमेशरे असन सेई केरो प्यार कियो, कि असन जो परमेशरेरे बच्चे जोन, ते अस अहम भी, एल्लेरेलेइ दुनियारे लोकेई अस न पिशाने कि अस परमेशरेरे बच्चेम, किजोकि तैनेई बाजी परमेशर भी न पिशानो। 2 हे ट्लारव, हुनी अस परमेशरेरे बच्चेम, ते हेजू तगर इन बांदू नई भोरू, कि अस केरे भोनेम! इन ज्ञानतम, कि जैखन यीशु मसीह बांदो भोलो त अस भी तैसेरे जेरे भोमेले, किजोकि तैस तेरेहे लहमेले जेरो तै आए। 3 ते जै कोई भी मसीह पुड़ ई उमीद रखते, तै अपनो आप तेरहो पवित्र केरते, जेरो मसीह पवित्र आए। 4 जै लगातार पाप केरतो रहते, तै मूसरे कानूनोरो इन्कार केरते, ते पाप त कानूनोरो इन्कार केरनो। 5 ते तुस ज्ञानतथ, कि यीशु मसीह एल्लेरेलेइ अव, कि पापन दूर केरे, ते तैस मां पाप नई। 6 जै तैस मां बनोरो रहते, तै लगातार पाप न केरे, जै लगातार पाप केरते, तै न समझे कि मसीह कौन आए, ते न तैसेरो तैस सेई रिशतोए। 7 ट्लारे बच्चव, केन्चरे धोखे मां न एजाथ, जै धार्मिकारां कम्मां केरते, तैए मसीहेरो जेरो धर्मीए। 8 जै कोई लगातार पाप केरते, तै शैतानेरे तरफांए, किजोकि शैतान शुरूआती करां पाप केरतो ओरोए, परमेशरेरू मट्टे एल्लेरेलेइ अव, कि शैतानेरे कम्मन खतम केरे। 9 जैना परमेशरेरे बच्चेन तैना लगातार पाप न केरन, किजोकि परमेशरोरो सुभाव तैन मां बनोरू रहते, ते तैना पाप केरि न सकन, किजोकि तैना परमेशरेरे बच्चेन। 10 इस्से सेई परमेशरेरे बच्चे, ते शैतानेरे बच्चे पिशेनोतन, जैना धार्मिकता कम्मां न केरन, तैना परमेशरे सेई नई, ते न तै जै अपने ढूलाए सेई प्यार न केरे। 11 जै खबर तुसेई पेइली शुनी, तै ईए, कि अस एककी होरि सेई प्यार रखम। 12 ते आदमेरे मट्टेरे कैनेरे जेरे न बनम, जै तैस शैताने सेई थियो, ते जैने अपनो ढूला मारो, ते तै कोस वजाई सेई मारो! एल्लेरेलेइ कि तैसेरां कम्मां बुरां थियां, ते तैसेरे ढूलाएरां कम्मां रोड़ां थियां। 13 हे ढूलाव, अगर दुनियारे लोक तुसन सेई बैर केरते त

हेरान न भोथ। 14 अस ज्ञानतम, कि अस मौती करां पार भोइतां जिन्दगी मां पुजोरिम, किजोकि अस दलान सेइं प्यार रखतम। जै प्यार न रखे, तै मोतरे हालती मांए। 15 जै अपने दलाए सेइं बैर केरते, तै खूनी आप, ते तुस ज्ञानतथ, कि कोन्ची खूनी मां हमेशारी जिन्दगी न राए। (aiōnios g166) 16 असेईं प्यार इस्से सेइं ज्ञानो, कि यीशु मसीहे इश्शो लेइ अपने प्राण दित्ते, एल्हेरेलेइ इश्शो भी दलां केरे लेइ प्राण देने फर्जें। 17 पन जैस कां दुनियारी जेइदाद भोए, त तै अपने दलाए जैस जरूरत भोए, तैस हेरतां तैस पुइ तरस खानो न चाए, त तैस मां परमेशरो प्यार केन्चरे बनोरो रेइ बटते? 18 हे दलारे बच्चव, अस सिर्फ वचन ते जुबानी सेइं नईं, पन कम्मन ते सच्चे सेइं भी प्यार केरम। 19 जैखन अस होरन सेइं प्यार केरमेले एस्से सेइं अस ज्ञानमेले, कि अस सच्चेरिम, ते जैस गल्ली मां इश्शो जमीर असन दोष लाए, तैसेरे बारे मां अस तैसेरे सामने अपने-अपने मने याकीन देइ बटमेले। 20 किजोकि परमेशर इश्शो मने करां बड्डोए, ते सब किछ ज्ञानते। 21 हे दलारव, अगर इश्शो मन असन दोष न दे, त असन परमेशरेरे सामने दिलेरी भोतीए। 22 ते जैन किछ अस मगतम, तैन असन तैस करां मैलते, किजोकि अस तैसेरे हुक्म मन्तम, ते जैन तैस पसंदे तैन केरतम। 23 ते तैसेरो हुक्म ईए कि अस तैसेरे मट्टे यीशु मसीहेरे नब्बे पुइ विश्वास केरम ते जेन्चरे तेने असन हुक्म दित्तो तैसेरे मुताबिक एक्की होरि सेइं प्यार केरम। 24 ते जैना परमेशरोरो हुक्म मन्तन, तेना परमेशरो मां, ते परमेशर तैन मां बनोरो रहते, ते इस्से सेइं, मतलब तैस पवित्र आत्मा सेइं जै तैने असन दित्तोरोए, अस ज्ञानतम, कि तै असन मां बनोरो रहते।

4 हे दलारव, हर एक्की मैनेरु याकीन न केरा जै दावो केरते कि परमेशरेरी आत्मा तैस मां आप, बल्के आत्मां अज्रमाथ कि तै परमेशरेरी तरफांए कि नईं; किजोकि बडे झूठे नबी दुनियाईं मां निसोरेन। 2 परमेशरेरी आत्मा तुस इस रीति सेइं पिशैनी बटतथ, कि जै आत्मा इन मन्ने, कि यीशु मसीह जिसमे मां ओरोए तै परमेशरेरे तरफांए। 3 ते जै आत्मा यीशु न मन्ने, तै परमेशरेरे तरफां नईं, ते तैए मसीहेरी खलाफत केरनेबाली आत्माए, जेसेरे बारे मां तुसेईं शुनोरु, कि ते एजने बालीए, ते अज्र भी दुनियाईं मां आप। 4 हे दलारे बच्चव, तुस परमेशरेरे लोक आथ, ते तुसेईं तैन झूठन पुइ जीत हासिल कियोरीए, किजोकि पवित्र आत्माारी शक्ति जै तुसन मांए तै शैतानेरे शक्ति करां बडी, जै दुनियाईं पुइ राज केरते। 5 तैना झूठे नबी दुनियारेन, एल्हेरेलेइ तैना दुनियारी गल्लां जोतन, ते दुनियारे लोक तैन केरि शुन्तन। 6 अस परमेशरेरेम, जै परमेशरे ज्ञानते, ते इश्शी शुन्ते, जै परमेशरे न ज्ञाने ते इश्शी न शुने, एल्हेरेलेइ अस तैस आत्माईं जै सत्र जोतीए ते जै आत्मा झूठ जोतीए पिशानतम। 7 हे दलारव, अस एक्की होरि सेइं प्यार केरम; किजोकि प्यार परमेशरे करां आप, जै कोई प्यार केरते, तै परमेशरोरो बच्चोए, ते परमेशरे ज्ञानते। 8 जै होरन सेइं प्यार न केरे, तै परमेशरे न ज्ञाने, किजोकि परमेशर प्यारे। 9 जै प्यार परमेशरे असन सेइं केरते, तै इस सेइं बांदो भोव, कि परमेशरे अपन अकेल्लू मट्टु दुनियाईं मां भेजू, कि तैस पुइ विश्वास केरने सेइं असन हमेशारी जिन्दगी मैल्ले। 10 प्यार इस सेइं नईं कि असेईं परमेशरे सेइं प्यार कियो, पन इस मां आप, कि तैने असन सेइं प्यार केरो, ते इश्शे पापां केरे छुटकारेरे लेइ अपन मट्टु भेजू। 11 हे दलारव, जेखन परमेशरे असन सेइं एरो प्यार कियो, त असेईं भी एक्की होरि सेइं प्यार कियोरो लोडे। 12 परमेशर कधी केन्चे नईं लवरो; अगर अस एप्पू मांमेइं प्यार रखम, त परमेशर असन मां बनो रहते; ते तैसेरो प्यार असन मां सिद्ध भोरोए। 13 इस सेइं अस ज्ञानतम, कि अस परमेशरे मां बनो रातम, ते परमेशर असन मां, किजोकि तैने असन अपने आत्माईं मरां दित्ती। 14 ते असेईं हेरु भी, ते गवाही भी देतम, कि बाजी परमेशरे, मट्टु दुनियाईं मां मुक्ति देनेबालो केरतां भेजोरोए। 15 जै इन मन्ने, कि यीशु परमेशरेरु मट्टुए, परमेशर तैस मां बनोरो रहते, ते ते परमेशरे मांए। 16 ते जै प्यार परमेशर असन सेइं केरते, ते असेईं ज्ञानो, ते असन तैस पुइ विश्वासे, परमेशर प्यारे, जै प्यारे मां बनोरो रहते, ते परमेशर तैस मां बनोरो रहते। 17 इस सेइं प्यार असन मां सिद्ध भोव, कि

असन इन्साफेरे दिहेडी दिलेरी भोए, किजोकि जेरो ते आए, तेरे अस भी दुनिया मां अहम। 18 प्यारे मां डर न भोए, बल्के सिद्ध प्यार डरे दूर केरते, किजोकि डरोरि रिशतो सजाईं सेइं भोते, ते जै डरते, तै प्यार मां सिद्ध नईं। 19 अस परमेशरे सेइं ते होरन सेइं एल्हेरेलेइ प्यार केरतम, कि पेइलो परमेशरे असन सेइं प्यार कियो। 20 अगर कोई जोए कि, “अवं परमेशरे सेइं प्यार केरताईं,” पन अपने दलाए सेइं बैर रखे, तै झूठोए, किजोकि जै विश्वासी दलाए सेइं जै तैने लोरोए प्यार न केरे, त परमेशरे सेइं भी जै तैने लवरो नईं, प्यार न केरि सके। 21 ते तैस करां असन ई हुक्म मैलते, कि जै अपने परमेशरे सेइं प्यार केरते, ते विश्वासी दलाए सेइं भी प्यार केरते।

5 जेसेरो ई विश्वासे कि यीशु ही मसीहे, ते परमेशरोरो बच्चोए, ते जै परमेशरे सेइं प्यार केरते, ते तैस सेइं भी प्यार केरते, जैना परमेशरेरे बच्चन। 2 जैखन अस परमेशरे सेइं प्यार केरतम, ते तैसेरे हुक्मन मन्तम, त इस सेइं अस ज्ञानतम, कि अस परमेशरेरे बच्चन सेइं प्यार केरतम। 3 अस परमेशरेरे हुक्म मेन्तां तैस प्यार हिरातम, ते तैसेरे हुक्म मुशकलन नईं। 4 किजोकि जै परमेशरोरो बच्चोए, तै दुनियाईं पुइ जीत हासिल केरते, ते तै जीत जैस सेइं दुनियाईं पुइ जीत हासिल केरतम ते इश्शो विश्वासे। 5 दुनियाईं पुइ जीत हासिल केरनेबालो कौने, सिर्फ तै जेसेरो ई विश्वासे, कि यीशु, परमेशरेरु मट्टुए। 6 ईए तैए, जै पैनी ते खूनेरे जिरिये ओरो थियो; मतलब यीशु मसीह, तै न सिर्फ पैनी सेइं, बल्के पैनी ते खूने दुइयां केरे जिरिये ओरो थियो। ते ई आत्मा जै गवाही देतीए, किजोकि तै सच्चे। 7 ते गवाही देनेबाले दलाईं आन 8 आत्मा, ते पानी, ते खून, ते दलेइयां केरि एक्की गल्ली पुडे गवाही देतन। 9 जैखन अस मैनु केरि गवाही मन्तम, त परमेशरेरी गवाही त तैस करां भी बड्डोए, कि तैने अपने मट्टेरे बारे मां गवाही दित्ती। 10 जै परमेशरेरे मट्टे पुइ विश्वास केरते, तै अपने आपे मां ई गवाही रखते, जैने परमेशरे पुइ विश्वास न कियूं, तैने तै झूठो ठहराव, किजोकि तैने तैस गवाही पुइ विश्वास न कियो, जै परमेशरे अपने मट्टेरे बारे मां दित्तोरीए। 11 ते तै गवाही ईए, कि परमेशरे असन हमेशारी जिन्दगी दित्ती, ते ई जिन्दगी तैसेरे मट्टे मांए। (aiōnios g166) 12 जेसेरो रिशतो मट्टे सेइं आप तैस कां जिन्दगीए, ते जेसेरो रिशतो परमेशरेरे मट्टे सेइं नईं, तैस कां हमेशारी जिन्दगी भी नईं। 13 मीं तुसन, जै परमेशरेरे मट्टेरे नब्बे पुइ विश्वास केरतो भोए, एल्हेरेलेइ लिखताईं, कि तुसन पतो लग्गे, कि हमेशारी जिन्दगी तुश्शीए। (aiōnios g166) 14 ते असन परमेशरेरे सामने ई दिलेरी भोतीए, तै ईए; कि अगर अस तैसेरे मेर्जी सेइं किछ मगतम, त तै इश्शी शुन्ते। 15 ते अगर अस ज्ञानतम, कि जैन किछ अस परमेशरे करां मगतम, तैन असन मैलते। 16 अगर कोई विश्वासी दलाए कोई एरो पाप केरतो लाए, जेसेरो नितीजो मौत न भोए, त बिनती केरे, ते परमेशर तैसेरेलेइ, जैने एरो पाप कियोरोए जेसेरो नितीजो मौत नईं, जिन्दगी देलो। पाप एरो भी भोतेए जेसेरो नितीजो मौते, एसेरे बारे मां अवं प्रार्थना केरनेरे बारे मां न जोई। 17 सेबभी किसमेरी बुराई त पापे पन एरो भी पापे, जैरेरो नितीजो मौत नईं। 18 अस ज्ञानतम, कि जैना परमेशरेरे बच्चन, तेना लगातार पाप न केरन, पन परमेशरेरु मट्टु यीशु तैस बचाते, ते शैतान तैसेरु किछ न केरि सके। 19 अस ज्ञानतम, कि अस परमेशरे सेइं अहम, ते सारी दुनिया तैस शैतानेरे कब्जे मां आप। 20 ते इन भी ज्ञानतम, कि परमेशरेरु मट्टु यीशु मसीह इस दुनियाईं मां ओरुए, ते तैने असन समझ दित्तोरीए, कि अस सच्चे परमेशरे पिशानम, ते अस तैस मां जै सच्चे मां आप, मतलब तैसेरे मट्टे यीशु मसीह मां बनोरे रातम, सच्चो परमेशर ते हमेशारी जिन्दगी ईए। (aiōnios g166) 21 हे बच्चव, हर अक तैस चीजी करां दूर राथ, जै तुश्शे दिले मां परमेशरेरी ठार नेतीए।

2 यूहन्ना

1 अवं यूहन्ना कलीसियारो बुजुर्ग, तैस बेङन ते तैसेरे बच्चन जैना परमेशरे चुनोरेन ई चिट्ठी लिखने लोरोई। जैन सेइं अवं सच्चो प्यार केरताई। सिर्फ अवं नईं पन तैना सारे जैना सच्चे ज्ञानतन तुसन सेइं प्यार केरतन। 2 अस तुसन सेइं प्यार केरतम किजोकि अस सच्ची शिक्षाई पुड़ विश्वास केरतम, ते अस तैस शिक्षाई हमेशारे लेइ मन्ते राले। (aiōn g165) 3 बाजी परमेशर ते तैसेरे मट्टू यीशु मसीह असन अनुग्रह, दया, शान्ति देन। इना सब इशे लेइ आए अस जैना सच्चे मन्तम ते एक्की होरि सेइं प्यारे केरतम। 4 अवं बडो खुश भोव, जैखन मीं तेरे किछ बच्चं केरे बारे मां शुनु कि तैना परमेशरेरे बत्तां चलने लोरेन, तैना तैन्ने केरने लोरेन जैन इशे बाजी परमेशरे असन केरनेरे लेइ जोरुए। 5 हुनी हे बेङन, अवं तीं कां मिनत केरताई, असेईं एक्की होरि सेइं प्यार कियोरो लोडे, ई अक नंवो हुक्म नईं पन अक आदेशे जै अस तैस वक्ते करां ज्ञानतम, जेइसेरू असेईं यीशु मसीह पत्ती चलनू शुरू कियोरुए। 6 सच्चो प्यार ई आए जैखन अस परमेशरेरे हुक्म मन्तम। जेइसेरू तुसेईं यीशु मसीह पत्ती चलनू शुरू कियोरू तेइसेरू तुसेईं शुनेरू कि परमेशरे हुक्म दित्तोरो, कि हमेशा एक्की होरि सेइं प्यार कियो लोडे। 7 अवं इन एल्हेरेलेइ ज़ोताई, किजोकि बडे लोक जैना होरि लोकन झूठी शिक्षारे ज़िरिये धोखो देतन। तैना दुनियारे अलग-अलग ठैरन मां जोरेन। तैना ज़ोतन यीशु मसीह मैनेरे रूपे मां नईं ओरो, अगर कोई मैन्हु एन्चरे ज़ोते, त तै मसीहेरो खलाफत केरनेबालोए जै हमेशा लोकन धोखो देते। 8 एल्हेरेलेइ तू अपने बारे मां खबरदार रा कि तैना लोक तीं धोखो न देन। जै मेहनत परमेशरेरे सेवारे लेइ तीं की तै बेफैइदी न भोए, पन तुस तैना सैरी बरकतां हासिल केरेलो जैना देनेरो वादो परमेशरे तुसन सेइं कियोरोए। 9 अगर कोई मैन्हु मसीहेरी शिक्षाई पुड़ लगातार न चले पन तैस मां होरू किछ ज़ोडते त तैसेरो रिशतो परमेशरे सेइं साथी नईं, तैस कां परमेशर नईं। पन अगर कोई मसीहेरी शिक्षाई मां बनोरो रहते, तैसेरो रिशतो बाजी परमेशर ते तैसेरे मट्टे यीशु मसीह सेइं भी आए। 10 अगर कोई तुशे सभाई कां एज्जे, ते मसीहेरे बारे मां ईए शिक्षा न दे, त तैस न अपने घरे मां एज्जे देथ, ते न तैस नमस्कार केरतां होसलो न देथ। 11 किजोकि जै कोई एरे मैन्हु जो नमस्कार केरते, तै तैसेरे बुरे कम्मन मां शामिल भोते। 12 बेङि गल्लां आन जैना अवं तुसन सेइं ज़ोनी चाताई, पन अवं तैना एन्चरे चिट्ठी मां लिखनी न चैई। पन मीं उमीदे कि अवं तुसन कां एज्जेलो ते अस आमने-सामने भोडतां गल्लां केरमेले, तैखन अस पूरे तरीके सेइं खुश भोले। 13 तेरी चुनोरी बेङनारे बच्चे इडी जैना परमेशरेरे चुनोरेन नमस्कार ज़ोतन।

3 यूहन्ना

1 अवं यूहन्ना कलीसियारो बुजुर्ग आई, हे टलारे गयुसे अवं तींजो ई चिट्ठी लिखने लोरोई। अवं सच्चे तीं सेइं प्यार केरताई। 2 मेरे टलारे दोस्त, मेरी प्रार्थना ई आए, कि जेन्चरे तू आत्मिक तरक्की केरि रवरोस, तेन्चरे तू सेबभी गल्लन मां तरक्की केरतो रास, ते तेरी जान भी राजी राए। 3 किजोकि किछ विश्वासी लोकेई मीं सेइं एइतां जोंवं, कि तू केन्चरे सच्चेरे मुताबिक ज़ीने लोरोस त अवं बड़ो खुश भोव। 4 ज़ैखन भी अवं शूनताई कि तैना, ज़ैना मेरे बच्चां केरे जेरे आन तैना सच्चेरे मुताबिक ज़ीतन, तैखन अवं बड़ो खुश भोताई। 5 हे टलारा, तीं इश्शे विश्वासी सैथी केरि मदत केरनेरे लेइ वफादेरी सेइं बडू किछ कियोरूप, इडी तगर ज़ैन तू ज़ानस भी न तैन केरि भी मदत केरतस। 6 इन मरां किछ लोकेई इट्टेरी कलीसियारे विश्वासी लोकन सेइं जोंवं, कि तुस अपने मसीही लोकन सेइं केत्रो जादे प्यार केरतथ। हुनी अवं तीं ज़ोताई ज़ैना इना लोक तीं करां गान त तीं तैन केरि मदत केरती रावरी लोडे किजोकि एस सेइं परमेशर खुश भोते। 7 किजोकि इना लोक मसीहेरू वचन प्रचार केरनेरे लेइ सफर केरतन, ते गैर विश्वासी लोकन करां किछ मदत न नेन। 8 एल्हेरेलेइ असेई तैन केरि आदर-खातर कियोरी लोडे, ताके अस भी तैन सेइं साथी सच्च प्रचार केरनेरे कम्मे मां शामिल भोम। 9 मीं तुश्शे नगरेरे कलीसियारे लोकन पेइले चिट्ठी लिखोरी थी, पन दियुत्रिफेस मेरे हदायतन कबूल केरने करां इन्कार केरते, किजोकि तै हमेशा अपना आप कलीसियारो लीडर बनानो चाते। 10 एल्हेरेलेइ अगर अवं एज्जेलो, त कलीसियारे लोकां केरे सामने ज़ैन तै केरि रावरोए ज़ोइलो। तै इश्शे खलाफ बुरी-बुरी गल्लां ज़ोइतां झूठे दोष लाते, ते एत्रू नई तै एप्पू प्रचार केरनेबालन कबूल न केरे, ते ज़ैना तैन कबूल केरने चातन, तैन भी ठाकते ते कलीसिया मरां कढतन। 11 हे टलारा, तैन लोकां केरि नकल न केरा ज़ैना बुरां कम्मां केरन, पन तैन लोकां केरू ज़ेरू बन्नेरी कोशिश केरा ज़ैना भला कम्मां केरतन। ज़ैखन कोई भला कम्मां केरते तैस सेइं साबत भोते कि तै परमेशरेरो बच्चोए, अगर कोई बुराई केरते तैस सेइं साबत भोते कि तै परमेशर न ज़ाने। 12 कलीसियारो सारे मैन्हु दिमेत्रियुसेरे बारे मां ज़ोतन कि तै रोडो मैन्हु आए, किजोकि तै सच्चेरे मुताबिक ज़ीते ते अस भी ज़ोतम कि तै अक रोडो मैन्हु आए, ते तू ज़ानतस अस सच्च ज़ोतम। 13 बेडि गल्लां आन ज़ैना अवं तीं सेइं ज़ोनी चाताई, पन अवं तैना एन्चरे चिट्ठेरे जिरिये न लिखनी चैई। 14 पन मीं उमीदे कि अवं तीं सेइं जल्दी मुलाकत केरेलो, तैखन अस आमने-सामने गल्लां केरमेले। अवं प्रार्थना केरताई परमेशर तीं शान्ति दे, इट्टेरे मसीही दोस्त तींजो नमस्कार ज़ोतन, एट्टेरे दोस्तन अकैल्ले-अकैल्ले मां गेइतां मेरू नमस्कार ज़ोइयां।

यहूदा

1 अवं यहूदा यीशु मसीहेरो सेवक ते कने याकूबेरो निकडो ढूला आई। अवं यहूदा ई चिट्ठी तुसन लोकन लिखने लोरोई, जैना परमेशर कुजवरेथ कि तैस पुड़ विश्वास केरथ। बाजी परमेशर तुसन सेइं प्यार केरते ते यीशु मसीहेरे जिरिये तुस सुरक्षित आथ। 2 अवं प्रार्थना केरताई कि परमेशर तुसन दया ते शान्ति ते प्यार जादे करां जादे दे। 3 हे ट्लारव, अवं लिखनेरे लेइ हेर मुमकिन कोशिश केरि रावरो थियो तैस (मुक्त्तरे) नंवे ज़िन्दगेरे बारे मां जै यीशु मसीहेरे जिरिये परमेशरे तरफां मैलतीए, जैस मां अस शामिल आम। पन हुना अवं इन ज़रूरी समझताई कि तुसन इस चिट्ठेरे जिरिये होलसो देई, ताके तुस मसीही विश्वास बनरो रखनेरे लेइ बड़ी मेहनत केरि बटथ, परमेशरे ई विश्वास अपने सेबमी लोकां केरे लेइ एक्की बार दित्तोरोए, ते ई न बेदलोए। 4 किछ लोक जैना यीशु मसीह पुड़ विश्वास केरनेरो दिखावो केरतन तैना तुशे कलीसियान मां शामिल भोरन। तैना परमेशरेरी आदर न केरन ते तैना ई गलत शिक्षा देतन, कि परमेशरे इशेस पाप माफ़ कियोरन ते अस अधर्मी ज़िन्दगी जी बटतम। तैना यीशु मसीहेरो इन्कार केरतन, जै इशेसो अक्के मालिक ते प्रभुए। बड़े पेड़ले पवित्रशास्त्र ज़ोते, परमेशरे एरे ज़ेरे लोकन सज़ा देलो। 5 पन अगर तुसेई सब गल्लां एक्की बार ज़ैनोरिन, फिरी भी अवं तुसन इना गल्लां याद करैनी चाताई, कि प्रभुए इस्राएली लोक गुलैमी मरां आज़ाद किये, ते मिस्र मुलखे मरां कडे पन बादे मां तैने तैना मारे ज़ैनेई सुनसान ठारी मां तैस पुड़ विश्वास न कियो। 6 तुसेई तैन स्वर्गदूतां केरे बारे मां सोचोरू लोडे जैना अपने पदे पुड़ खुश न थिये, ज़ै परमेशरे तैन दित्तोरो थियो, पन तैनेई स्वर्गरू घर शाः; परमेशरे तैना कधी न टलुटेन बैली शंगलन सेइं बेंधतां बुन आंधरे मां तैस महान दिहेड़ी तगर रखोरन, ज़ेइस ते तैन दोषी बनालो। (aiōnios g126) 7 इना इस्राएली ते स्वर्गदूतां केरू जेरू इन भी याद रखवा कि सदोम ते अमोरा नगरां ते कने आसपासेरे नगरां केरे रानेबाले लोकन सेइं कुन भोवं। लोक अधर्मी भोए ते हर किसमेरी बदमाशी केरनेबाले थिये। एल्हेरेलेइ परमेशरे तैना अगारे जिरिये भस्म किये। ज़ैन तैन सेइं भोवं ई तैन झूठे उस्तादां केरे लेइ खबरदारी आए कि तैन भी हमेशारे अगारे जिरिये सज़ा मैलनीए। (aiōnios g166) 8 तेन्चरे इना अधर्मी लोक ई दावो केरतन कि परमेशरे दर्शने मां ज़ोवरू अधर्मी ज़िन्दगी जीतां तैना अपनो जिसम अशुद्ध केरि बटतन, ते कोन्ची भी एप्पू पुड़ अधिकार रखनेरी अज़ाज़त न देन ते तैना महिमा बाले स्वर्गदूतां केरे बारे मां बुरी गल्लां ज़ोतन। 9 पन इड़ी तगर कि प्रधान स्वर्गदूत मीकाईले इन अधर्मी लोकां केरू जेरू न कियूं। ज़ैखन शैतान ते मीकाईले मूसा नेबेरी लाश दबनेरे अधिकारेरे बारे मां बेंस भोइ, त मीकाईले स्वर्गदूते कां इन लोकन करां जादे अधिकार भोनेरे बावजूद भी तैने शैताने बुरी गल्लां ज़ोइतां दोषी न ठहराव, इसेरे बदले तैने इन ज़ोवं, कि “प्रभु तीं डटि।” 10 पन इना लोक तैन चीज़ां केरे खलाफ गलत ज़बान इस्तेमाल केरतन ज़ैन तैना न समझन। ते ज़ैन चीज़न तैना समझतन तैन लैट्टे जानवरां केरे ज़ेरे केरतन, एना चीज़ां केरतां तैना अपनो आप नाश केरतन। 11 तैन पुड़ अफ़सोस! किजोकि तैना आदमेरे मट्टे कैनेरो ज़ेरो बुरो सलूख केरतन, ज़ैने अपनो ढूला मारो। तैना जल्दी जेन्चरे बिलामे पेइंसो कमानेरे लेइ लोकन करां पाप कराव तैनेई भी तैए गलती की, ते जेन्चरे करोह नाश कियो किजोकि तैने (मूसेरे खलाफ) खलाफत की, तेन्चरे तैना लोक भी नाश किये गाले किजोकि तैना भी प्रभुएरे खलाफ खलाफत केरने लोरन। 12 ज़ैखन इना लोक धामन मां खातन ज़ैना तुस प्रभुएरो प्यार याद केरनेरे लेइ बनातथ, त तैना समुन्दरेरी छेपोरी शफ़डां केरे ज़ेरे खतरनाक आन, ज़ैना तुसन डोबनेरी वजा बेनि बटतन। तैना तैन बेशर्म पुहालां केरे ज़ेरे आन ज़ैना सिर्फ़ अपनो खियाल रखतन। तैना बगैर पने बिदलारारे ज़ेरेन ज़ैन हवा उडारतीए, तैना शेरारे बेफल बुट्टां केरे ज़ेरे आन. ज़ैना ज़ीलना उखड़ोरेन ते दुइये तरीकेई सेइं मरन। 13 जेन्चरे समुन्दरेरी मजबूत छेल्ली गंदी शैमफ एनतिन, तेन्चरे इना लोक बेशर्म कम्मां केरतन। तैना किछ तारां केरे ज़ेरे

आन ज़ैना सिद्धे बत्तां न चलन, तैना सही बत न हिरान। प्रभुए तैन केरे लेइ अक ठार रखोरि ज़ै पूरे तरीके सेइं आंधरीए ज़ेड़ी तैनेई हमेशारे लेइ रानू पेनु। (aiōn g165) 14 ते हनोक ज़ै आदमेरे सतोवं पीड़ी मरां थियो, तैने इन अधर्मी लोकां केरे बारे मां भविष्यद्वाणी की। तैने ज़ोवं “हेरा, प्रभु अपने बेशुमार पवित्र स्वर्गदूतन सेइं साथी एज्जेलो। 15 कि सेबमी लोकां केरो इन्साफ़ केरे, ते तैन केरे सेबमी बुरां कम्मां केरे बारे मां ज़ैना तैनेई परमेशरेरे खलाफ कियोरन ते सैरी बुरी गल्लां ज़ैना तैनेई तैसेरे खलाफ कियोरिन तैन केरे बारे मां तैन दोषी बनालो।” 16 इना लोक हमेशा परमेशरेरे खलाफ ज़ोतन ते होरि केरि गेलती कढतन। तैना अपने मनेरे मेरज़रे मुताबिक लगातार बुरां कम्मां केरतन। तैना अपने बारे मां धमण्ड केरतन ते अपने फेइदेरे लेइ होरि केरि चापलूसी केरतन। 17 पन हे ट्लारव, तुस तैन गल्लन याद रखा; ज़ैना गल्लां इशेस प्रभु यीशु मसीहेरे प्रेरितेई पेड़ली ज़ोरिन। 18 तैना तुसन सेइं ज़ोते थिये, “कि आखरी दिहाइन मां एरे लोक भोले ज़ैना प्रभु ते तैसेरे लोकां केरो मज़ाक बनाले। इना तैना लोक आन ज़ैन केरि ज़िन्दगी तैन केरे बुरी इच्छा केरे कैबू मां आए।” 19 इना तैना लोक आन ज़ैना तुसन अलग-अलग टोलन मां बंटतन, तैन केरि बुरी इच्छां तैन च़लैतिन ते तैन कां परमेशरेरो आत्मा नई। 20 पन हे ट्लारव, तुस एक्की होरेरी मद्दत केरते राथ कि बड़े पवित्र सज़ेरे मां बद्ध ज़ैन तुस विश्वास केरतथ। तुसेई पवित्र आत्मार शोकरे अगवैई सेइं प्रार्थना कियोरो लोडे। 21 तुसेई लगातार इन ज़ैनतां ज़ोयोरू लोडे कि परमेशर तुसन सेइं प्यार केरते, जेन्चरे तुस बलगने लोरेथ ज़ेइस इशेसो प्रभु यीशु मसीह अपने दयाई मां तुसन हमेशारी ज़िन्दगी देलो। (aiōnios g166) 22 तैन लोकन पुड़ दया केरा ज़ैन नई पतो कि तैना कोस शिक्षाई पुड़ विश्वास केरन। 23 किछ होरे लोक ज़ैन तुस ज़ानतथ कि नरके मां च़लोरन। तैन जल्दी खिचतां हमेशारी अग्गी मरां बज़ाथ। हेजू भी होरन पुड़ दया केरा। हालांकि, ध्यान देथ तैस्से पापे दुबारा न केरा। तुस तैन केरे पापन सेइं अज़मैइशी मां न पेथ, ते तैना पाप केरनेरे जिरिये अपनो आप दागदार न केरा। 24 परमेशर तुशुशी हफ़ाज़त केरनेरे बाले ताके तुस पापेरी ज़िन्दगी जीतां धोखो न खाथ। तै महिमा बालो परमेशर तुसन एप्पू कां आन्नेरे ते तुसन बेकसूर ते खुशी सेइं भरनेरे काबले। 25 तैए अक परमेशरे ज़ैने यीशु मसीहेरे जिरिये असन मुक्ति दित्ती, इशेसो प्रभु यीशु लोकन परमेशरेरी आदर केरने ते तैसेरी बडयाई केरनेरी वजा बनाते। ताके तैना इस गल्ली पिशानन कि तैस कां शुरू करां हुना ते हमेशारे लेइ शक्ति ते अधिकार आए। आमीन। (aiōn g165)

प्रकाशित वाक्य

1 यीशु मसीहेरो प्रकाशितवाक्य, जै परमेशरे तैस एल्हेरेलेइ दित्तो कि तै अपने सेवकन तैना गल्लां हिराए, जैन केरू जल्दी भोनू ज़रूरीए। यीशु मसीहे अपने स्वर्गदूत भेजतां तैसेरे ज़िरिये अपने दास यूहन्ना इना गल्लां जोई, 2 अवं यूहन्ना तैन सब लिखने लोरोई जैन मीं लवं, अवं इस मां परमेशररू वचन ते यीशु मसीहेरी सच्चै शिक्षारी गल्लां लिखने लोरोई जैना तैनी मीं सेई जोई। 3 परमेशर तै सेख्मी लोकन बरकत देलो जैना इस भविष्यवेनरे वचने पढ़तन, ते कने जैना शुन्तन ते इस मां लिखोरी गल्लन मन्तन, किजोकि इन गल्लां पूरी भोनोरो वक्त नेडो ओरोए। 4 अवं यूहन्ना आसिया इलाकेरे सत कलीसियान जो लिखने लोरोई। परमेशरे जै आप ते जै हमेशा थियो, ते जै एजनेबालो आए; ते तैन सत आत्मां केरे तरफां जैना तैसेरे तखतेरे सामनेन तुसन अनुग्रह ते शान्ति मैलती राए। 5 ते यीशु मसीहेरे तरफां, जै वफादार गवाह ते मुडदन मरां जीतो भोने बालन मरां पेइलोए त कने धेरतरे राजां केरो प्रधाने तुसन अनुग्रह ते शान्ति मैलती राए। यीशु मसीहे असन सेईं प्यार कियो, त कने तैने अपने खूने सेईं अस पापन करां छुटाए। 6 तैनै अस अक राजा ते अपने बाजी परमेशररी सेवा केरनेरे लेइ याजक भी बनाए; तैसेरी महिमा ते हकोमत हमेशा भोती राए। आमीन। (aiōn g165) 7 हेरा, मसीह बिदलारी सेईं साथी एजनेबालोए, ते हर कोई तैस लाएलो, बल्के जैना लोक तैसेरे मौतरे लेइ जिमेवार थिये, तैना भी तैस लाएले, ते धेरतरे सारे लोक ज़ोरे-ज़ोरे सेईं लेरां देले। हाँ इन भोलू आमीन। 8 प्रभु-परमेशर जोते, “अव्वे अलफा ते ओमोगा आई, (मतलब पेइलो ते आखर) अवं तै आई, जै आए, जै हमेशा थियो, ते जै एजने बालोई, ते बडो शक्ति बालोई।” तै इन जोते, 9 अवं यूहन्ना तुशरो विश्वासी दूला, ते कने यीशु मसीहेरे लेइ दुःखन मां, परमेशररे राज्ञे मां, ते सबरी मां तुसन सेईं साथी शामलाई। अवं पतमुस नव्वेरे टैपु पुड परमेशररू वचन शुनानेरे त कने यीशुएरी गवाही देनेरे वजाई सेईं कैद थियो। 10 हफतेरे पेइले दिहाइ पवित्र आत्मां अवं अपने कैबू मां कियो, मीं एप्पु पत्र अक आवाज़ इन जोते शुनी। तै आवाज़ नडिशिगेरी उच्चि आवाज़री ज़ेरि थी। 11 “जैन किछ तू लातस, तैस किताबी मां लिखतां सत नगरां केरे कलीसियान कां भेज, मतलब इफिसुस, स्मुरना, पिरगामुन, थुआतीरा, सरदीस, फिलदिलफिया ते लौदीकिया नगरन मां आन।” 12 तैखन जै मीं सेईं गल्लां केरने लोरो थियो तैस हेरनेरे लेइ तक्कू; ते पत्रावं फिरतां मीं सोन्नेरे सत दीवट लाए। 13 ते तैन दीवटां केरे मझाटे मड्डेरो ज़ेरो कोई लाव, तैनै पवन तगर लम्मो चोगो लोरो थियो, ते तैसेरे छैती पुड सोन्नेरो पटको बंधोरो थियो। 14 तैसेरे दोगे पुड तैसेरे बाल छिती उन्नी या हिवेरे ज़ेरे थिये। तैसेरी एछ्छी अगारे लपारी ज़ेरि बेलती थी। 15 ते तैसेरे पाव भेड्डी मां गन कियोरे पितलरे ज़ेरे चमकते थिये, ते ज़ैखन तैनै गल की तैसेरी आवाज़ बडे जोरे सेई थी, जेन्चरे बडे दरियां केरि ज़ेरा बडे जोरे सेईं चलतन। 16 ते तै अपने देइने हथ्ये मां सत तारे घिन्तां थियो, ते तैसेरे मुखे सेईं दूई धारण बाली तलवार निसती थी, तैसेरू तुतर एरू चमकतू थियू, जेन्चरे दिहाडो भर-दुपारेई चमकते। 17 ज़ैखन मीं तै लव, त तैसेरे पावन पुड मुड्डेरो ज़ेरो पेव, ते तैनै मीं पुड अपने देइने हथ रखतां इन जोवं, “डर न, अवं पेइलो त कने आखरी आई। 18 ते ज़ीतो भी अवं आई, अवं एककी बार मरो थियो, पन हुनी अवं ज़ीतोई ते अवं हमेशा ज़ीतो रानोई। मीं मौती पुड ते पाताले पुड ज़ै मरे लोकां केरि ठारे अधिकारि। (aiōn g165, HadEs g86) 19 एल्हेरेलेइ जैना गल्लां तीं हेरी ते जैना गल्लां भोइ रेवरिन, ते जैना इट्टां बाद भोने बैलिन, तैना सब लिख।” 20 मतलब तैनै सत तारां केरो भेद जैना तीं मेरे देइने हथ्ये मां लोरे थिये, ते तैन सत सोन्नेरे दीवटां केरो भेद, ते सत तारे सत कलीसियां केरे स्वर्गदूतन, ते तैना सत दीवट सत कलीसियान।

2 तैनै मीं सेईं इन भी जोवं: “इफिसुस नगरेरे कलीसियारे स्वर्गदूते जो ई सन्देश लिख कि, ‘अवं तै आई जै सते तारे अपने देइने हथ्ये मां घिन्तां फिरताई, ते सोन्नेरे सत दीवटां केरे मझाटे फिरताई, अवं इन जोताई: 2 अवं

तेरां कम्मां, तेरी मेहनत, ते तेरू सबर ज्ञानताई। ते इन भी, कि तू बुरे लोकन बर्दाश न केरि बटस; त कने तैन जैना अपने आप प्रेरित ज़ोतन पन आन नई, तैना तीं परखे ते तैना झूठे निस्से। 3 अवं इन भी ज्ञानताई मेरे नव्वेरे खातर तीं सबरी सेईं दुःख झेल्ले ते तीं मेरी सेवा केरनि न शारी। 4 पन मीं तेरे खलाफ इन जोनूए कि ज़ेरो प्यार तीं मीं सेईं विश्वास केरनेरे वक्ते मां कियोरो थियो इस वक्ते मां न केरस। 5 याद रख तू बिछड़ने करां पेइलो कोडि थियो। तू पाप केरने करां मनफिरा ते तेरही ज़िन्दगी जी ज़ेरि पेइलो विश्वास केरनेरे वक्ते जीतो थियो। अगर तू मन न फिरालो त अवं तीं कां एइतां तेरू दीवट तैस ठारारां पुटेलो। 6 पन हाँ तीं मां ई गल त आए, कि तू नीकुलइयां केरे कम्मन सेईं नफरत केरतस, जैन सेईं अवं भी नफरत केरताई। 7 जै समझून चाते तै ध्यान सेईं शुने कि परमेशररो आत्मा कलीसियान सेईं कुन जोते, जै जीत हासिल केरे, अवं तैस, ज़िन्दगरे बुटे मरां फल खानेरे लेइ देइलो जै ज़िन्दगी देते, जै परमेशररे स्वर्ग लोके मांए।” 8 तैनै मीं सेईं इन भी जोवं, “स्मुरना नगरेरे कलीसियारे स्वर्गदूते जो ई सन्देश लिख, ‘जै पेइलो ते आखरीए; जै मरो थियो ते हुनी जीतो भोरोए, तै इन जोते: 9 अवं ज्ञानताई कि तू स्वत गतस ते तू गरीब आस, पन आत्मिक गल्लन मां तू धनी आस। अवं इन भी ज्ञानताई कि जैना लोक ज़ोतन कि तैना परमेशररे चुनोरे (यहूदी) लोकन, पन तैनै असलती मीं नई। तैना तुशुशे बारे मां बुरी गल्लां ज़ोतन, पन हकीकति मां तैन केरो रिशतो एरे टोली सेईं आए जै शैतानेरी। 10 जैना दुःख तीं झेल्लने पेनेन तैन करां न डर। शैतान तुसन मरां किछ लोकन टुलुइतां कैद करालो ताके तैना परखे गान। ते तुसन दश दिहाइन तगर बडो दुःख झेल्लनो भोलो। पन मीं पुड विश्वास केरनो न शार, चाए जान भी देनी पे, किजोकि अवं तेरे जीतरे लेइ हमेशारे ज़िन्दगारू इनाम देइलो। 11 जै समझून चाते तै ध्यान सेईं शुने कि परमेशररो आत्मा कलीसियान सेईं कुन जोते, जै जीते, तैस दुइयोवं मौती सेईं नुकसान न पुजेलो।” 12 तैनै मीं सेईं इन भी जोवं, “पिरगामुन नगरेरे कलीसियारे स्वर्गदूते जो ई सन्देश लिख, ‘अवं तै आई जैस का दूई धारण बाली तिख्खी तलवारे, अवं इन जोताई: 13 अवं इन ज्ञानताई, कि तू तैदी रातस ज़ैदी शैतान राजा केरते, तू मीं सेईं साथी ईमानदार राव, त कने तू मीं पुड विश्वास केरनो कथे न शारस। तीं इडी तगर विश्वास कियो ज़ेइस मेरो वफादार गवाह अन्तिपास तैनैई तैस ठैरी मारो, ज़ैदी शैतान राजा केरते। 14 पन मीं तेरे खलाफ किछ गल्लां ज़ोनिन, किजोकि तू तैन केरे खलाफत न केरस जैना तुशुशे कलीसियां मां झूठी शिक्षा देतन तेन्चरे जैन बिलामे बीततेरे वक्ते मां शिखलू। बिलामे बालाक राजे शिखलू कि इस्राएली लोकां केरि अजमैइश केरे ताके तैना पाप केरन। तैनै शिखलू कि तैना मूरतन पुड बलिदान कियोरी चीजां खान ते बदमाशी केरन। 15 तेन्चरे तुसन मां किछ लोक एरे आन जैना नीकुलइयां केरि शिक्षा मन्तन। 16 ते मनफिरा, नई त अवं तीं कां जल्दी एजतां तैन लोकन सेईं तैस तलवारी सेईं लेइलो जै मेरे ऐशरां निसतीए। 17 जै समझून चाते तै ध्यान सेईं शुने कि परमेशररो आत्मा कलीसियान सेईं कुन जोते; जैना लोक जीत हासिल केरन, तैन अवं छप्पोरो मन्ने मरां देइलो, त कने अवं तैन अक छितो घोड भी देइलो; तैस घोडे पुड अक नवं लिखरू भोलू, जैस तैसेरे हासिल केरनेबालेरी अलावा होरो कोई न ज्ञानेलो।” 18 तैनै मीं सेईं इन भी जोवं, “थुआतीरा नगरेरे कलीसियारे स्वर्गदूते जो ई सन्देश लिख कि, ‘अवं परमेशररू मडू ज़ेसेरी एछ्छी अगारी ज़ेरिन, त कने ज़ेसेरे पाव कीमती पीतलारे ज़ेरिन, अवं इन जोताई: 19 अवं तेरे कम्मन, तेरे प्यारे, विश्वास, सेवा त कने सबरी ज्ञानताई, ते इन भी ज्ञानताई, कि तेरां आखरी कम्मां पेइले कम्मन करां बेइतन। 20 पन मीं तेरे खलाफ इन जोनूए, कि तू तै कुआन्श इजेबेल राने देतस; जै अपनी आप नबिन जोतीए, ते मेरे दासन बदमाशी केरने त कने मूरतन कां चाढेरू खानू शिखैलतां टपलातीए। 21 मीं तैस मनफिरानेरे लेइ मौको दित्तो, पन तैसा अपने बदमाशी केरने करां मन न फिरानो चाव। 22 हेरा, एल्हेरेलेइ अवं तैस बिमार केरेलो; ते जै तैस सेईं बदमाशी केरेलो अगर तैना भी तैन कम्मन करां मन न फिराले, त तैन बडे मुसीबती मां छेडेलो। 23 ते अवं तैसेरे बचन मैरेलो; ते तैखन सब कलीसियां बुझेली कि दिल त कने मनोरे परखने

बालो अवं आई; ते अवं तुसन मां हर एक्की तैसेरे कम्मां केरे मुताबिक बदलो देइलो। 24 पन तुस थुआतीरा नगरेरे बाकी लोकन सेइं, जैना तैस शिक्षाई न मन्न, जैन गल्लन जो तैना शैतानेरी डुगी गल्लां ज़ोतन न ज़ानन, इन ज़ोताई, कि अवं तुसन पुड़ होरो बोझ न रेख्खी। 25 पन हाँ, जैन तींकांए तैस मेरे एजने तर ठेमतां रख। 26 जैना लोक ज़ांत हासिल केरन, ते ज़ै मेरे इच्छारे मुताबिक आखरी तगर केरतो राए, अवं तैस सैरी कौमां केरे लोकन पुड़ अधिकार देइलो। 27 अवं तैस तेरहो अधिकार राज़ केरनेरे लेइ देइलो ज़ेरो मेरे बाजे मीं दित्तोरोए। तैन केरू राज़ लोहिरू ज़ेरू मज़बूत भोलू ज़ैन टलुटे न, ते तैन केरे दुश्मन मिचरे भाण्डां केरे ज़ेरे चूर-चूर भोले। 28 अवं तैन केरि ज़ांत हिरानेरे लेइ तैन झेइरो तारो भी देइलो। 29 ज़ै समझनू चाते तै ध्याने सेइं शुने कि परमेशरेरो आत्मा कलीसियान सेइं कुन ज़ोते।”

3 तैने मीं सेइं इन भी ज़ोवं, “सरदीस नगरेरे कलीसियारे स्वर्गदूते जो ई सन्देश लिख कि, ‘जैस कां परमेशरेरी सत आत्मान ते सत तारन, तै इन ज़ोते कि अवं तेरे कम्मन ज़ानताई, कि तींझो ज़ांतो ज़ोतन, पन तू आस मरौ। 2 एल्हेरेलेइ बींझो रा, ते तैन चीज़न ज़ैना रेवरिन, ते ज़ैना मिटने बैलिन, तैन मज़बूत केर; किजोकि मीं तू केन्ची चीज़ी मां अपने परमेशरे कां पूरो न लव। 3 याद केर, कि तीं केरि शिक्षा मैलोरी थी तीं ते शुनोरी थी, ते तैस मनतो रा ते कने मनफिरा, ते अगर तू बींझो न रालो, त अवं चोरोरे ज़ेरो एज्जेलो ते तू कधे न ज़ानेलो, कि अवं कोस घेड़ी तीं पुड़ एज्जेलो। 4 पन सरदीस नगरे मां तुसन मां किछ लोक एरे आन, ज़ैनेई अपनो आप पापे सेइं अशुद्ध नई कियोरो, तैना छित्तां लिगडां लेइतां मीं सेइं साथी चलेले किजोकि तैना इस काबलन। 5 ज़ैना ज़ांत हासिल केरेले तैन इस्से तरीके सेइं तैन केरां ज़ेरां छित्तां लिगडां लुवां गालां। अवं तैन केरू नवं तैस किताबी मरां हटेइलो ज़ैस मां परमेशरे तैन केरां नव्वां लिखोरन ज़ैना हमेशारी जिन्दगी हासिल केरेलो। अवं तैन केरू नवं अपने बाजी ते अपने स्वर्गदूतां केरे सामने एलान केरेलो। 6 ज़ै समझनू चाते तै ध्याने सेइं शुने कि परमेशरेरो आत्मा कलीसियान सेइं कुन ज़ोते।” 7 तैने मीं सेइं इन भी ज़ोवं, “फिलदिलफिया नगरेरे कलीसियारे स्वर्गदूते जो इन लिख, ‘अवं तै आई ज़ै पवित्र ते सच्चे, ते ज़ैस कां दाऊदरी चाबीए, ज़ेसेरे खोल्लेरे कोई बंद न केरि सके ते ज़ेसेरे बंद केरे कोई खोल्लेरे न सके, तै इन ज़ोते: 8 अवं तेरे कम्मन ज़ानताई, हेर, मीं तेरे सामने अक बत खोलरोरीए, ज़ैस कोई बंद न केरि सके कि तेरी शक्ति थोड़ीए, ते तीं मेरू वचन मनोरूए, ते मेरे नव्वेरो इन्कार नई कियोरो। 9 हेर, ज़ैन लोकां केरो रिश्तो शैतानेरी टोली सेइं आए, तैना ज़ोतन कि तैना यहूदी आन, पन आन नई, बल्के झूठ ज़ोतन हेर, अवं एरू केरेलो, तैना तीं कां एइतां झुकेले, ते इन ज़ानेले, कि अवं तीं सेइं प्यार केरताई। 10 ज़ैखन तू दुःख झैल्लतो थियो तीं सबरी सेइं मेरो सन्देश मन्नो। एल्हेरेलेइ अवं भी तीं बड़े अज़मैइशरे वक्ते बचेइलो, ज़ै धेरतली पुड़ रानेबालन पुड़ परखनेरे लेइ सारे दुनियाई पुड़ एजने बालीए। 11 अवं जल्दी एजने बालोई; ज़ैन किछ तींकांए, तैस ठेमतां रख, कि कोई तेरू ताज न थसोड़े। 12 ज़ै ज़ांत हासिल केरे, ते ज़ेन्चरे अक खम्भो घरे मज़बूत रखते, तेन्चरे तै भी परमेशरेरे मन्दरे मां हमेशा रालो; ते अवं अपने परमेशरेरे नवं, ते अपने परमेशरेरे नगर, मन्तख नव्वे यशूशलेमेरू नवं, ज़ैन नगर स्वर्ग पुड़ा एजने बालूए ते अपनू नव्वू नवं तैस पुड़ लिखेलो। 13 ज़ै समझनू चाते तै ध्याने सेइं शुने कि परमेशरेरो आत्मा कलीसियान सेइं कुन ज़ोते।” 14 तैने मीं सेइं इन भी ज़ोवं “लौदीकिया नगरेरे कलीसियारे स्वर्गदूते जो ई सन्देश लिख कि, ‘ज़ै आमीन, वफादारे, ते सज़्जो गवाह आए, ते परमेशरेरी सपिरी वजाए, तै इन ज़ोते। 15 कि अवं तेरे कम्मन ज़ानताई, कि तू तैस पैनरो ज़ेरोस ज़ैन न ठंठू ए ते न गर्म, रोडू भोथू कि तू ठंडो भोथो या फिरी गर्म, यानी तू मीं पूरो विश्वास केरेथो या बिलकुल न केरेथो। 16 एल्हेरेलेइ तू निघोस, ते न ठंडोस ते न च्त्ओस, पन तू अस्थे मने सेइं मीं पुड़ विश्वास केरतस, एल्हेरेलेइ अवं तीं रद केरनेबालो आई। 17 तू ज़ैन ज़ोतस, कि अवं धनी, ते धनी भोरोई, ते मीं केन्ची चीज़री घटी नई, ते इन न ज़ानस, कि तू बदकिसमत ते तुच्छ ते कंगाल ते कानो, ते

नगोस। 18 एल्हेरेलेइ अवं तीं सलाह देताई, कि अग्गी मां तौरू सोनू मीं करं ने, कि धनी भोस; ते छित्तां लिगडां ने, कि तीं अपने नग्गे पनेरी शर्म न भोए; ते अपने एछ्छी केरे लानेरे लेइ कजल ने, कि तू लास। 19 अवं ज़ैन-ज़ैन सेइं प्यार केरताई, तैन शिखलताई ते सज़ा देताई ताके तैना रोड़े बनन। एल्हेरेलेइ भलाई केरने मां लगगोरो रा, ते पापन करां मनफिरा। 20 हेर, तेरे दिले मां एजनेरे लेइ अवं ज़ेन्चरे कोई घरेरू दार गुडुकाते अवं तेन्चरे आई; अगर तू मेरी आवाज़ शुन्तां अपनो दिल खोल्लस, त अवं अन्तर एज्जेलो ते अस एपू मांमेइं संगती केरमेले। 21 ज़ै ज़ीते, अवं तैस एपू सेइं साथी अपने तखते पुड़ बिशेलेलो, ज़ेन्चरे अवं भी ज़ांत हासिल केरतां अपने बाजी केरे तखते पुड़ बिशरोरोई। 22 ज़ै समझनू चाते तै ध्याने सेइं शुने कि परमेशरेरो आत्मा कलीसियान सेइं कुन ज़ोते।”

4 इना गल्लां हेरनेरां पत्ती, मीं स्वर्ग मां अक दार खुल्लोरू लाव। ते मीं सेइं कोई गल्लां केरने लाव ई तैए थियो ज़ैने मीं सेइं पेइली गल्लां की, तैसेरी आवाज़ नइशिनगेरे ज़ेरी थी। तैने मीं सेइं ज़ोवं, “इडी बा एई: अवं तीं तैना गल्लां हिरेइलो, ज़ैन केरू इन गल्लां केरे पत्ती पूरू भोनु ज़रूरीए।” 2 अकदम पवित्र आत्मां अवं अपने कैबू मां कियो; ते मीं स्वर्ग मां अक तखत लाव ते तैस तखते पुड़ कोई बिशरोरो लाव। 3 ते ज़ै तैस तखते पुड़ बिशरोरो थियो, तै यशब ते मानिक कीमती घोडां केरो ज़ेरो लेइहोतो थियो। ते तैस तखते च़ेरे पासन भुन्जल्लैठ थी, ज़ै मरकत घोड़ेरी ज़ेरी लेइहोती थी। 4 तैस तखतेरे च़ेरे पासन चोक्की तखत थिये; ते तैन तखतन पुड़ चोक्की बुजुर्ग छित्तां लिगडां लेइतां बिशरोरे थिये, ते तैन केरे दोगन पुड़ सोन्नेरां ताजां थियां। 5 ते तैस तखते मां बिजली ते गुडने ते तखतेरे सामने अगारे सत दीवट बलने लोरे थिये, इन परमेशरेरे सत आत्मा आन। 6 ते तैस तखतेरे सामने शीशरो साफ समुन्द्र थियो ज़ै बरफारो ज़ेरो थियो, ते तखतेरे मझाटे ते तखतेरे च़ेरे पासन प्राणी थिये, तैन केरे सैरी जानी पुड़ एछ्छी-एछ्छी थी। 7 पेइलो प्राणी शेररो ज़ेरो थियो, ते दुइयोवं प्राणी दंतितो ज़ेरो, दलेइयोवं प्राणी मैनेरो ज़ेरो थियो, ते च़ेवरोवं प्राणी उडरने बाले उकाबेरो ज़ेरो थियो। 8 ते च़ेरे परेणी केरां शा-शा फंगां थियां ते तैन पुड़ एछ्छी थी इडी तगर कि फंगन अन्तर भी एछ्छी थी, तैना रात दिहाड़ी बगेर आरामे इन ज़ोते रातन, “पवित्र, पवित्र, प्रभु-परमेशर, सर्वशक्तिमान, ज़ै थियो, ज़ै आए, ते ज़ै एजनेबालोए।” 9 ज़ै तखते पुड़ बिशरोरो ज़ै हमेशा-हमेशा ज़ांतोए, तैना प्राणी तैसेरी महिमा ते आदर ते शुक्र केरेले, (aiōn g165) 10 ज़ैखन चोक्की बुजुर्ग तखतन पुड़ बिशने बाले कां मथ्यो टेकेले, ते तैसेरी आराधना केरेले। ते तैना अपना-अपना ताजां तखतेरे सामने इन ज़ोइतां रखेले: (aiōn g165) 11 “हे इश्शे प्रभु-परमेशर, तींए सैरी चीज़ां बनेइ। तेरे मेज़ां सेइं सब चीज़ां बनेइ जेई ते वजूदे मां एई। एल्हेरेलेइ तूए महिमा, आदर ते शेक्तेरे काबलस।”

5 ज़ै तखते पुड़ बिशरोरो थियो, मीं तैसेरे देइने हथ्यं मां अक किताब लाई, ज़ै अन्त्रमेई त कने बेडरमेई लिखोरी थी, ते तै सत मोहरां लेइतां बन्द कियोरी थी। 2 फिरी मीं अक ताकतबर स्वर्गदूत लाव, ज़ै ज़ोरे ज़ोरे सेइं ई प्रचार केरतो थियो। “इस किताबारो खोल्लने ते इसेरी मोहरां टलोइनेरे काबल कौने?” 3 पन न स्वर्ग मां, न धेरती पुड़ न धेरतारे बुन कोई तैस किताबी खोल्लने या तैस पुड़ नज़र केरनेरे काबल मैलो। 4 ते अवं ज़ोरे-ज़ोरे सेइं लेरां देने लव, किजोकि तैस किताबरे खोल्लनेरे या तैस पुड़ नज़र केरनेरे काबल कोई न मैलो। 5 तैखन तैन बुजुर्गन मरां एक्के मीं सेइं ज़ोवं, “लेरां न दे, तक, तै ज़ैस जो यहूदारे गोत्रेरो शर ज़ोतन, ज़ै दाऊद राज़ेरे खानदाने मरांए तैने तै किताबी खोल्लनेरे ते सत्ते मोहरां टलोइनेरे लेइ शैतान हारावरोए।” 6 तैखन मीं तखत ते च़ेरे प्राणी त कने तैन बुजुर्गां केरे मझाटे अक मारोरू गबडू लाव। तैसेरां सत शिन्गाँ ते सत एछ्छी थी; इना परमेशरेरी सते आत्मान, ज़ैना सैरी धेरतली पुड़ भेजोरिन। 7 गबड़े अगगर एइतां ज़ै तखते पुड़ बिशरोरो थियो तैसेरे देइने हथ्ये मरां तै किताब नेही। 8 ते ज़ैखन तैने किताब नेही, त तै च़ेरे प्राणी ते चोक्की बुजुर्ग तैस गबड़े सामने झुके; ते

हर केन्चेरे हथ्ये मां बर्बत ते धूपे सेईं भरोरे सोन्नेरे कटोरे थिये, इना पवित्र लोकां केरि प्रार्थनाम। 9 त तेना इन नव्वू गीत जोने लगे, “तीं कां अधिकारे कि तू मोहरन ट्लोइस ते इस किताबी खोल्लस, किजोकि तीं मेरतां अपने खूने सेईं परमेशरेरे लेइ हर एककी कुले मरां, हर भाषाई मरां, हर लोकन मरां, ते कौमी मरां लोक घिन्नेरेन।” 10 “तीं तैना राजे बनाए, तीं तैना याजक बनाए जैना इशो प्रभु परमेशरेरे लेइ सेवारू कम केरन, ते तैना धेरती पुड़ राजां केरू जेरू राज क्केरतन।” 11 मीं दुबारा तक्कू, त मीं बेशुमार स्वर्गदूतां त चेरे प्रणी ते बुजुर्गां केरि आवाज़ शुनी जैना तखतेरे चेरे पासन थिये। 12 तैना जोरे सेईं जोते थी, “मारोरू गबडू समर्थ, धन, ज्ञान, शक्ति, आदर, महिमा, ते कने शुक्लेरे काबले।” 13 फिरी मीं स्वर्ग मां ते धेरतली पुड़ त कने धेरतलरे बुन, ते समुन्दरेरी सब चीजां, ते सब किछ जैन तैन मांए, इन जोते शुनु कि, “जै तखते पुड़ बिशोरिए तैसरू त कने गबडेरू शुक्र, आदर, महिमा ते राज, हमेशा राए।” (aiōn g165) 14 ते चेरे प्रेणेईं आमीन जोवं, ते बुजुर्गेईं मथ्यो टेको।

6 फिरी मीं लाव, कि गबडे तैन सत मोहरन मरां अक खोल्ली; ते तैन चेरे प्रेणन मरां एककेरी गुडनेरी जेरि आवाज़ शुनी कि, “एई।” 2 ते मीं नजर की, ते अक छितो घोडोए, ते तैसेरे सुवारे कां धनक थियू, ते तैस अक ताज दित्तू, ते तै जांतां निस्सो कि होरि भी जीत हासिल केरे। 3 जैखन गबडे दुइयोवं मोहर खोल्ली, त मीं होरो प्राणी इन जोते शुनु कि, “एई।” 4 फिरी अक होरो घोडो निस्सो, जै लाल रंगोरे थियो; ते तैसेरे सुवारे ई अधिकार दित्तो, कि धेरतली पुड़ां मेल-मिलाप सल्ले, ताके लोक एककी होरि मारन; ते तैस अक बड्डी तलवार दित्ती। 5 ते जैखन गबडे ट्लेइयोवं मोहर खोल्ली, त मीं ट्लेइयोवं प्राणी इन जोते शुनु कि, “एई।” जैखन मीं तक्कू त अक कालो घोडो निस्सो; 6 ते मीं तैन चेरे प्रेणन मरां मैनेरी जेरि ई गल जोते शुनी, कि दीनारो गेहुं, “ते दीनाररे ट्लाई सेर जो, तेल, ते कने दाछोरो रसेरो नुकसान न केरथा।” 7 जैखन तैन चेरवरोवं मोहर खोल्ली, त मीं चेरवरोवं प्राणी इन जोते शुनु कि, “एई।” 8 ते मीं नजर की, ते हेरा, अक हेइदुलो घोडोए; तैसेरे सुवारेरू नवं मौते, ते पाताल तैस पत्ती-पत्तीए, ते तैन ई अधिकार मैल्लो कि धेरती पुड़ रानेबाले लोकन मरां हर चेरवरो मैनु मारन, कि तैना तैन तलवारी सेईं मारन, ते ढुलुखी सेईं मारन, ते बुरी बिमेरी सेईं मारन, ते तैन जंगली जानवरन सेईं भी मारन। (Hadēs g86) 9 जैखन गबडे पंचोवं मोहर खोल्ली, त मीं बलिदान केरनेरी ठारी करां बुन आत्मा लेईं, जैना परमेशरेरे वचनरेरे वजाई सेईं, ते तैस गवाहेरी वजाई सेईं जै तैनेईं दित्तोरी थी, कि यीशु मसीह तैन केरो प्रभुए मारोरो थियो। 10 ते तैनेईं बडे जोरे सेईं हक देइतां जोवं, “हे पवित्र, ते सञ्जे प्रभु; तू केइस तगर इशो इन्साफ न केरेलो? ते धेरतलरे रानेबालन सेईं इशो खूनेरो बदलो केइस नेलो?” 11 ते तैन सेबभन छित्तां लिगडां दित्तां, ते तैन सेईं जोवं, कि थोडे चिरिरे लेइ आराम केरा, ज्ञांतगर तुशेशे संगी दास, ते विश्वासी साथी, जैना तुशे जेरे मारे गानेन, तैन केरि भी गिनती पूरी न भोए। 12 जैखन गबडे शेइयोवं मोहर खोल्ली, त मीं हेरू, कि अक बडो भुंजल अव; ते दिहडो कमलेरो जेरो भोव, ते चाँदनी पूरी खूनेरी जेरि भोइ। 13 ते अम्बरेरे तारे धेरतली पुड़ां झडे जेन्चेरे बडे तूफाने सेईं फ्रेगेरे बुटे मरां कञ्चे फल झइतन। 14 ते अम्बर एरू घिशाकू, जेन्चेरे बरको पलेटोते ते हर अक पहाइ, ते टैपू, अपने-अपने ठारां घिशाके। 15 ते धेरतलरे राजे, प्रधान, सरदार, धनी ते समर्थ लोक, ते हर अक दास, ते हर अक आज़ाद पहाडां केरे कुडन मां, ते शफडन मां छुप्ये। 16 ते पहाइन, ते शफडन सेईं जोने लाए, “कि असन पुड़ झडा; ते असन तैसेरे ऐशी सेईं जै तखते पुड़ बिशोरिए ते गबडरे सरकी करां छुपा। 17 किजोकि ते खतरनाक दिहाडी एज्जेली जेइस परमेशर ते गबडू हर एककी सजा देले, ते कोई भी तैस झैल्लनेरे काबल नईं।”

7 इसेरां पत्ती मीं दुनियारे चेरे कूनन पुड़ चेर स्वर्गदूत खडे लाए। तैन स्वर्गदूतन दुनियाईं मां आफत फैलेइतां नुकसान पुजानेरे लेइ परमेशरे करां अधिकार हासिल कियोरो थियो, चाए धेरती पुड़ या समुन्द्रे पुड़। तैनेईं

दुनियारे चेरे कूनन करां हवान ठेमतां रख्खी ताके धेरतली, या समुद्र, या कोन्ची बुटे पुड़, हवां न चले। ते मीं अक होरो स्वर्गदूत पूबेरां एइतो लाव। तैस कां अक महोर थी जै हमेशा जांते परमेशरेरे तरफां थी। तैन चेरे स्वर्गदूतन सेईं जोरे सेईं जोवं: 3 “ज्ञांतगर अस अपने परमेशरेरे दासां केरे कुपाए पुड़ मोहरन न लाम तांतगर तैना आफतां तैन पुड़ न एजन, ते धेरतली, समुन्द्र ते कने बुटन नुकसान न पुजान।” 4 ते जैन पुड़ मोहर कीजेई, मीं तैन केरि गिनती शुनी, कि इसाएलेरी खानदानेरे गोदलन मरां अक लख चुरतैली हज़ारन पुड़ महोर कीजेई। 5 यहदारे गोदलन मरां 12 हज़ारन पुड़ मोहर लाईं, रूबेनेरे गोत्रे मरां 12 हज़ारन पुड़; गादरे गोत्रे मरां 12 हज़ारन पुड़। 6 अशेरेरे गोदलेरे मरां 12 हज़ारन पुड़; नत्तालेरे गोत्रे मरां 12 हज़ारन पुड़; मनशेरे गोत्रे मरां 12 हज़ारन पुड़। 7 शमोनेरे गोत्रे मरां 12 हज़ारन पुड़; लेवेरे गोत्रे मरां 12 हज़ारन पुड़; इसाकारेरे गोत्रे मरां 12 हज़ारन पुड़। 8 जबूलनेरे गोत्रे मरां 12 हज़ारन पुड़; यूसुफेरे गोत्रे मरां 12 हज़ारन पुड़, बिन्यामीनेरे गोत्रे मरां 12 हज़ारन पुड़ मोहर लाईं जेईं। 9 इसेरां पत्ती मीं मैनु केरि भीड लाईं जैस कोई गेनि न थियो बखतो। तैना हर कुले मरां, हर कौमी मरां, ते हर भाषाई मरां ओरे थियो। तैना तखतेरे ते गबडरे सामने खडे थियो। तैनेईं छित्तां लिगडां लोरो थियां, ते सेभैईं अपने हथ्यन मां तैसेरे आदरारे निशानेरे रूपां मां खजुरेरी डेलडी घित्तां थियो। 10 ते तैना लोक बडे जोरे सेईं जोती थियो, “मुन्चेरे लेइ इशो परमेशरेरू जै तखते पुड़ बिशोरियो, ते गबडेरू जयजयकार भोए।” 11 ते सारे स्वर्गदूत जैना तखतेरे चेरे पासन ते बुजुर्गां केरे चेरे पासन थियो ते चेरे प्रेणेईं तैनेईं मथ्यो टेको, ते परमेशरे कां मथ्यो टेकतां जोवं, 12 “आमीन, इशो परमेशरेरी स्तुति, ते महिमा, ते ज्ञान, ते शुक्र ते आदर, ते समर्थ, ते शक्ति हमेशा बनोरी राए। आमीन।” (aiōn g165) 13 इन गल्लन पुड़ बुजुर्गन मरां एक्के मीं सेईं जोवं, “इना छित्तां लिगडां लेइतां कौन? ते कोइटां ओरेन?” 14 मीं तैस सेईं जोवं; “हे मालिक, तूए ज्ञानतस।” तैने मीं सेईं जोवं; “इना तैना आन, जैना तैस बडे मुसीबती मरां निसोरेन; तैनेईं अपना लिगडां गबडरे खूने सेईं धोइतां छित्तां केरन, जेसेरो मतलब तैन केरे पाप दूर कियो।” 15 “एह्लेरेलेइ तैना परमेशरेरे तखतेरे सामनेन, ते तैसेरे मन्दरे मां रात दिहाडी तैसेरी सेवा केरतन; ते जै तखते पुड़ बिशोरिए, तै तैन मां रालो ते तैन केरि रक्षा केरेलो। 16 ते तैना फिरी ढुलुखोरे ते ट्लिशोरे न भोले: ते तैना दिहाडे सेईं ते कोन्ची भी गेरमी सेईं न फुकोले। 17 किजोकि गबडू जैन तखतेरे मझाटे, तैन केरि रखवाली केरेलू; ते तैन लोकन जिन्दारे पैनी कां नेलू, ते परमेशर तैन केरे एछ्छी केरां सब एंखरू पुछेला।”

8 जैखन गबडे सतोवं मोहर खोल्ली, त स्वर्ग मां अध्ये घंटे तगर खामोशी राईं। 2 मीं तैन सत स्वर्गदूत जैना परमेशरेरे सामने खडे रहतन, लाए, ते तैन सत नइशिगे दित्ते जे। 3 फिरी अक होरो स्वर्गदूत सोन्नेरू धूपदान घित्तां अव, ते बलिदान केरनेरी ठारी कां जेव; ते तैस बडो धूप दित्तो, कि सेबभी पवित्र लोकां केरि प्रार्थनाम सेईं साथी तैस सोन्नेरे बलिदान केरनेरी ठारी पुड़ जै तखतेरे सामने चाडे। 4 ते तैस धूपेरो तू परमेशरेरे लोकां केरि प्रार्थनाम सेईं साथी स्वर्गदूतां केरे जिरिये परमेशरेरे सामने पुजो। 5 तैखन स्वर्गदूत धूपदान नेइतां तैस मां बलिदान केरनेरी ठारारी अग भरी, ते धेतली पुड़ छडी, ते गुडनेरी आवाज़ ते बिजली ते भुंजल भोने लाए। 6 ते तैना सते स्वर्गदूत जैन कां सत नइशिनगे थियो, बजानेरे लेइ तियाए भोए। 7 पेइले स्वर्गदूत नइशिनगां बजाव, ते खूने सेईं मिलोरी आण ते अग धेरतली पुड़ शारी; ते धेरतली ट्लेइन मरां अक हिस्सो फुकोई, ते बुट भी अक तीयाही फुकोए, ते सब नीलो घास भी फुकोव। 8 दुइयोवं स्वर्गदूते नइशिनगां बजाव, त किछ जेन्चेरे बडे पहाडेरू जेरू अग्गी सेईं फुकोतू समुन्द्रे मां शारू; ते समुन्द्र अक तीहाई खून भोव। 9 ते अक तीहाई जानवर जैना समुन्द्रे मां रहते थिये मेरि जे, ते समुन्दरेरां अक तीहाई जिहाजां तुवा भुआं। 10 ट्लेइयोवं स्वर्गदूते नइशिनगां बजाव, ते अक बड्डो तारो जै दीपेरो जेरो बलतो थियो, स्वर्गरां ट्लुटो, ते दरियां केरे एककी तीहाई पुड़, ते पैन्न पुड़ पेव। 11 ते तैस तारेरू नवं नागदौनाए, ते अक तीहाई पानी नागदौनारू जेरू ट्लितू भोवं, ते बडे मैनु

तैस पैनेरे टल्लो भोने सेइं मेरि जे। 12 जेवरोवें स्वर्गदूते नडशिनगो बजाव, ते दिहाडो अक तीहाई, ते चेंदमरी अक तीहाई ते तारां केरि एककी तीहाई पुड हलचल पेई, इडी तगर कि तैन केरो अक तीहाई हिस्सो आंधरो भोव ते दिहैडरी एक्की तीहाई मां लौ न राई, ते तेन्चरे राती मां भी। 13 जैखन मीं हेरु, त अम्बरे मझामेई अक उकाव उडरते ते जोरे सेइं इन जोते शुनु, “कि तैन टलाई स्वर्गदूतां केरे नडशिनगरे आवाजारे वजाई सेइं जैना बजाने हेजू बाकिन, धेरतली रानेबालन पुड अफसोस! अफसोस! अफसोस!”

9 जैखन पंचोंव स्वर्गदूते नडशिनगो बजाव, त मीं स्वर्गों धेरतली पुड अक तारो झड़तो लाव, ते तैस अथाह कुण्डेरी चाबी दिती। (Abyssos g12) 2 तैने अथाह कुण्ड खोल्लू, ते कुण्डे मरां एक्की भेटारो जेरो तू निस्सो, ते कुण्डेरे तू सेइं दिहाडो ते अम्बर आंधरु भोइ जेव। (Abyssos g12) 3 ते तैस तूप मरां धेरतली पुड टिट्टां निस्सां, ते तैन धेरतलरे बिच्चू केरि जेरे ताकत दिती जेई। 4 ते तैन सेइं जोंव, कि न धेरतलरे घासे, न केन्ची नीलारे, न केन्ची बुटे नुकसान पुजान, सिर्फ तैन मैनन् जैन केरे कुपाए पुड परमेशरेरी मोहर नई। 5 ते तैन मारनेरे लेइ नई, पन पंच महीन तगर लोकन दुःख देनेरो अधिकार दितो, ते तैन केरो दुःख एरो थियो, जेन्चरे बिच्चू केरे डस मारने सेइं मैनन् भोते। 6 तैन पंच महीन मां मैन्हु मरनु चाएले, पन तैना न मेरि बटले। तैना मरनेरी इच्छा रखले पन तैना कोन्ची भी तरीके सेइं मरनेरी बत न मेलेली। 7 तैना टिट्टां जंग केरनेरे लेइ तियार घोडां केरे जेरां लेइहोतां थियां, तैन केरे दोगन पुड सोत्रां ताजां केरु जेरु किछ लेइहोतु थियू; तैन केरां तुत्रां मैन्हु केरे तुत्रां केरां जेरां थियां। 8 ते तैन केरे बाल कुआन्शां केरे जेरे लम्मे थिये, ते तैन केरे दंत शेरां केरे जेरे मजबूत थिये। 9 ते तैने लोंहेरी जेरे झिलम लोरी थी, ते तैन केरे फंगां केरि आवाज एरी थी जेन्चरे रथां केरि ते लडैई मां दडते बडे घोडां केरि। 10 तैन केरां पूछडां बिच्चू केरां जेरां थियां, ते तैन मां डस थियो, ते तैन पंच महीन तगर मैनन् दुःख पुजानेरी ताकत थी, ते ताकत तैन केरे पूछडन मां थी। 11 अथाह कुण्डेरो दूत तैन पुड राजा थियो, तैसेरु नवं इब्रानी भाषाई मां अबद्दीन, ते यूनानी भाषाई मां अपुल्लहोने, जेसेरो मतलब नाश केरनेबालो। (Abyssos g12) 12 पंच महिना बाद पेडली आफत बीती जेई, ते इट्टां पत्ती दूई बल्के दूई केरां जादे आफतां एजने बैलिन। 13 जैखन शेइयोवं स्वर्गदूते नडशिनगो बजव ते जै सोन्नेरे बलिदान केरनेरी ठार परमेशरेरे सामने, तैसेरे चेत्रे कूनन मरां मीं एरी आवाज शुनी। 14 जेन्चरे कोई शेइयोवं स्वर्गदूत सेइं जेने लोरोए जैस कां नडशिनगो थियो, “कि तैन चेत्रे दूत जैना बडे दरियाए फराते कां बन्दोरोए, तैन खोल्ल।” 15 तैखन तैना चेत्रे दूत खोल्ले, तैना पेडले तियार भोरे थिये, त इस घेडी, ते दिहाडे, ते महीने, ते सालेरे लेइ तैन बलगनेरे लेइ जोरु थियू, ते हुनी ई वक्त अव, कि तैना दुनियारे लोकन मरां अक तीहाई लोक मारन। 16 ते तैन केरे फौजरी गिनती बी करोड थी जैना घोडन पुड सुवार थिये, मीं तैन केरि गिनती शुनी। 17 ते मीं इस दशन मां घोडे ते तैन केरे एरे सुवार लेइहोए, जैन केरि झिल्लमां अगारे जेरी लाल, ते नीले ते हेडले रंगेरे जेरे थी, ते तैन घोडां केरि क्रोडी शेरां केरे क्रोडी केरि जेरी थी, ते तैन केरे ऐशेरां अग ते तू ते गन्धक निसती थी। 18 इन टलेइ आफतन सेइं जैना इना आन, अग, तू, ते कने गन्धक, जै तैन घोडां केरे ऐशी मरां निसती थी; तैन सेइं अक तीहाई लोक मेरि जे। 19 तैन घोडां केरि ताकत तैन केरे ऐशी, ते कने तैन केरे पूछडन मां थी, किजोकि तैन केरां पूछडां सप्पां केरां जेरां थियां, ते तैन केरे पूछडां केरि क्रोडी भी थी, ते तैन सेइं तैना दुःख भी पुजाते थियो। 20 ते होरे मैन्हु जैना तैन आफतन सेइं न थी मरं, ते तैनेई मूरती केरि पुजा केरनि न शारी, जैना तैनेई सोन्ने, पितल, ते कन्ने घोड, लेकडरे बनेई। तैना मूरती न लहन, न शुन्न, न चेलि बटन, ते तैनेई भूतां केरि आराधना केरनि भी न शारी। 21 ते तैनेई, खून, टूनों, बदमाशी, ते कने चोरी केरने केरां मन न फिराव।

10 फिरी मीं अक होरो ताकतबर स्वर्गदूत बिदलार पलेटतां स्वर्गों एइतो लाव, तैसेरे दोगे पुड भुजल्लैठ थी, ते तैसेरु आशी दिहाड़ेरु जेरु ते

तैसेरे पाव अगारे खम्बेरे जेरे थियो। 2 तैने अपनो देइने पाव समुन्द्रे पुड रख्खो, ते खिशडो धेरतली पुड रख्खो, ते तैसेरे हथ्थे मां अक निकडी किताब खोलोरी थी। 3 तैनी स्वर्गदूते बडे जोरे सेइं जोंव, तैसेरी आवाज शेरें गजनेरी जेरी थी। ते जैखन तैने जोरे सेइं चिन्ड मारी, त सत आवाजेई जुवाव दित्तो, जैन केरि आवाज गुडनेरी जेरी थी। 4 ते जैखन मीं सत्ते गुडनेरी आवाज शुनी, त अव लिखनेबालो थियो, त मीं स्वर्गों ई आवाज शुनी, “कि जैना गल्लां तीं गुडनेरी जेरी शुनोरिन, तैन छेपोरी रख, ते तैन न लिख।” 5 ते जै स्वर्गदूत मीं समुन्द्रे ते धेरतली पुड खडो लोरो थियो; तैने अपनो देइने हथ स्वर्गेरे पासे खडो कियो। 6 ते जै हमेशा जीतोए ते जैने स्वर्ग, धरती त कने समुन्द्रे ते जैन किछ तैन मांए बनोरुए, तैनी तैसेरी कसम खेइतां जोंव, “हुनी होरि कोन्ची चीजरो इंतजार नई। हुनी सब पूरु कियू गालू।” (aiōn g165) 7 बल्के जैखन सतोवं स्वर्गदूत नडशिनगो बजालो, त परमेशरेरो तै मकसद पूरो भोलो जै तैसेरे नेबेई जोरोए, जैनेई तैसेरी सेवा की, पन तैन होरि लोकन तैसेरो पतो लगने न दित्तो। 8 मीं फिरी दुबारां स्वर्गों तैए आवाज शुनी। तैस आवाजां मीं सेइं जोंव, तैए फिरी मीं सेइं गल्लां केरने लाव; “कि गा, जै स्वर्गदूत समुन्द्रे ते धेरतली पुड खडोए, तैसेरे हथ्थे मरां खुलोरी किताब ने।” 9 ते मीं स्वर्गदूत कां गेइतां जोंव, “ई निकडी किताब मीं दे।” तैने मीं सेइं जोंव, “यां इस खा, ते ई तेरे पेटे टलडट्टी त केरेली, पन तेरे ऐशी मेछी केरां भी जादे मिट्टी लगेली।” 10 ते मीं तै निकडी किताब तैस स्वर्गदूत केरां नेइतां खाइ, तै मेरे ऐशी मां मेछेरी जेरी मिट्टी लगगी, पन जैखन मीं तै खाइ, ते तैस सेइं मेरु पेट टलिटू भोवं। 11 तैखन मीं सेइं इन जोंव, “तीं बडे लोकन, कौमन, भाषान, ते कने राजन पुड, फिरी दुबारां भविष्यवाणी केरनि भोली।”

11 फिरी मीं नापनेरे लेइ अक निराठी दिती, ते तैने मीं सेइं जोंव, “उठ परमेशरेरे मन्दरे ते बलिदान केरनेरी ठार नाप, ते जैना लोक तैडी मेरी आराधना केरने लोरिन तैन गन। 2 पन मन्दरेरे बेइरयां अंगन न नाप, किजोकि पन तैन लोकां केरे लेइ आए जैना मीं पुड विश्वास न केरन, ते तैना तैस पवित्र नगर यरूशलमे 42 महीन तगर तुबा केरेले। 3 तैस वक्ते अवं अपने दुइये गवाहन ई अधिकार देइलो, तैना टाट यानी मातमेरां लिंगडां लेइतां 1260 दिहाइन तगर मेरे सन्देशेरु एलान केरन।” 4 तैना दूई गवाह, जैन केरे बारे मां बडे पेडले केन्चे जैतूनेरे दूई बुट ते दूई दीवट केरि मिसाल दित्तोरी थी जैना परमेशरेरे सामने रहतन जै धेरतरे लोकां केरो प्रभु। 5 ते अग कोई तैन नुकसान पुजानो चाए, त तैन केरे ऐशी मरां अग निस्तां तैन केरे दुश्मन भस्म केरतीए, ते अग कोई तैन नुकसान पुजानो चाए, त जरूर तै इस्से तरीके सेइं मारे गाले। 6 परमेशरे तैन अधिकार दित्तोरे, कि तैना सन्देश एलान केरनेरे दौरान अम्बर बंद केरन (यानी झडी रोकन)। तैन ई भी अधिकार मैल्लो पानी खुनेरु जेरु लाल बनान, ते इन भी कि जैखन तैना चान धेरतली पुड हर किसमेरी आफत एनी बटन। 7 ते जैखन तैना दूई गवाह परमेशरेरे सन्देशेरु एलान केरतां झाडेले, त तैए हवान जै अथाह कुण्डे मरां निसेलो, तैन सेइं लेइतां तैन केरां जीतिलो ते तैन मारेलो। (Abyssos g12) 8 ते तैन केरि लाशां तैस महान नगर यरूशलमेरे सडकी मां राली जेडी तैन केरो प्रभु क्रूस पुड चाढोरो थियो, जेसेरी तुलना सदोम नगर ते कने मिसे मुल्खे सेइं कियोरीए। 9 ते सब लोकन, कुलन, भाषान ते कने कौमन मरां लोक तैन गवाहां केरि लाशां सडे टलाई दिहाइन तगर हेरते राले। ते तैना लोक तैन केरि लाशन कोन्ची भी दबने न देले। 10 ते धेरतलरे रानेबाले, तैन केरे मारने सेइं खुश ते मघन भोले, ते तैन केरे हेरने बालन बडे डरेले। 11 ते सडे टलाई दिहाइन पत्ती परमेशरेरे तरफां जिन्दगरी सांस तैन मां आई, ते तैना खडे भोए, ते जैनेई तैना दुबारां जीते लाए तैना बडे डेरि जे। 12 एसेरां बाद, तैन दूई मैनेई स्वर्गों अक जेनेबालो उच्चि आवाजी मां जोते शुनो, “कि इडी बा एज्जा!” जैखन तैन केरे दुश्मन हेरनेरे लोरे थिये तैना तैन केरे सामने बिदलारी पलेटतां स्वर्गें मांजो चले जे। 13 फिरी तैसेरे वक्ते यरूशलम नगरे मां अक बडो भुंजल अव, ते नगररे इमारतां केरो दशोंव हिस्सो झडो; ते तैस भुंजले सेइं 7000 मरे, ते होरे जैना बचोरे थिये तैना बडे डरे, ते

तेनेई स्वर्गेर परमेशरेरी बडीयाई की। 14 दुइयोंव आफत बीती जेई, हेरा, टलेइयोंव आफत एजने बालीए। 15 जैखन सतोंव स्वर्गदूते नइशिनो बजव, त मीं स्वर्गं मां बडी जौरे सेई आवाज शुनी, “हुनी इस दुनियाई मां कोई राज केरनेबालो नई सिर्फ इशरो प्रभु-परमेशर ते तैसेरो चुनोरो मसीह, ते ते हमेशारे लेइ राज केरेलो।” (aion g165) 16 ते चोबी बुजुर्ग जैना परमेशरेरे सामने अपने-अपने तखते पुइ बिशारेर थिये, परमेशरे कां मथ्यो टेकतां, 17 इन जोने लाए: “हे सर्वशक्तिमान प्रभु-परमेशर, तू जै आस, ते जै थियो, अस तेरु शुकु केरतम, कि तीं हुना महान शक्ति हिराई, ते तीं धेरती पुइ राज केरनु शुरु कियोरूप। 18 होरि कोमां केरे लोकेई तीं पुइ क्रोध कियो, ते तेरो प्रकोप अव, ते ते वक्त ओरोए कि मर्रां केरो इन्साफ कियो गाए, ते ई वक्त भी आए, कि तेरे दास नेबन ते सारे लोकन जैना तेरे आदर केरतन जैना कमजोरन ते जैना ताकतबरन तैन तू इनाम देस, ते तैसेरे वक्ते तैन नाश केरस जैना धेरतेर नाश भोनेरी वजा थियो।” 19 परमेशरेरु जैन मन्दर स्वर्गं मांए, तैन खोल्लु, ते तैसेरे मन्दरे मां कारारेरो सन्दुख लेइहोव, ते बिजली ते आवाज ते गुइने ते भुंजल आए, ते बडी-बडी आण पेई।

12 जैखन तैन बीती जेव, त फिरी अम्बरे मां अक बडो आजीब निशान लेइहोव। मतलब अक कुआन्श जै चाँदनी पुइ खडी आए ते तैसां जैना लिगडां लोरन तेना दिहाड़े जेरां लेइहोतन। ते तैसेरे अपने दोग्गे पुइ ताज लोरु थियूं जैस पुइ 12 तारे थियो। 2 ते दोर्जीती भोइ, ते चिन्डां मारती थी; किजोकि तैस बच्चो ज्ञानेरी तकलीफ थी। 3 ते अक होरो निशान अम्बरे मां लेइहोव, ते हेरा; अक बडो लाल अजगर (यानी शैतान) थियो, तैसेरी सत क्रोडी ते दश शिनाँ थियां, ते तैसेरे दोगन पुइ सत ताजां थियां। 4 ते तैसेरे पूछडां अम्बरेरे तारां केरि अक तीहाई जमीनी पुइ आनी, ते तै अजगर तैस कुआन्शरे सामने खडो भोव जै दोर्जीती थी, कि जैखन ते बच्चो ज्ञाए त ते बच्चे तैस खाए। 5 तैखन तैस कुआन्शां मट्टू जाऊं, तैन अजगरे न खेइ बटु किजोकि तैन अकदम परमेशरे ते तैसेरे तंखते कां आन जेव। तैन मट्टू सारी कौमन पुइ लोहरे डण्डे सेई राज केरेलु। 6 ते ई कुआन्श जंगले जौ नशरी, जैडी परमेशरेरे तरफां तैसेरेलेइ अक ठार तियार कोयोरी थी, कि तैडी 1260 दिहाइन तगर तैसेरी हेरगेश की गाए। 7 फिरी स्वर्गं पुइ लडाई भोइ, मीकाईल ते तैसेरे स्वर्गदूत अजगरे सेई लडने लेइ निस्से, ते अजगर ते तैसेरे दूतन सेई लडे। 8 अजगरे लडाई हारी, ते फिरी तेना स्वर्गं मां न रेइ बटे। 9 एल्हरेलेइ ते तै तैसेरे दूत धेरती पुइ शारे, तैए बड्डो अजगर, ई तैए जै बडे पेइले सपरे रूपे मां बांदो भोरो थियो, जेसेरु नव शैतान या दोष लानेबालोए। तैए आए जै दुनियारे लोकन धोखे देने लोरोए। 10 फिरी मीं स्वर्गंरां ई बडी आवाज एइती शुनी, “कि हुनी परमेशर अपने लोकन बघालो। हुनी ते अपनि शक्ति इस्तेमाल केरेलो ते राजेरु जेरु राज केरेलो! हुनी तैसेरो मसीह दुनियाई पुइ अधिकार रखेलो! किजोकि हुनी शैतान इशरो परमेशरेरे हजुरी मां खडो न रेइ बटेले कि इशरो साथी सेवकन पुइ रात दिहाडी दोष लाए। ते स्वर्गं मरां शारो जोरोए। 11 ते तैनेई गबड़ेरे खूनेरे वजाई सेई ते अपने गवाहरे वचनेरे वजाई सेई, तैस पुइ जीत हासिल की, ते तैनेई अपने प्राण टलारे न समझे, इडी तगर की मोतरी भी परवाह न की। 12 एल्हरेलेइ तुस सब जैना इडी स्वर्गं मां रहने बालेथ खुश भोथ। पन हे धेरतली ते कने समुन्द्रे मां रानेबालव तुसन पुइ अफ्रसोस! किजोकि शैतान बडे क्रोधे सेई दुसुन्द्रे मां एजनेबालोए, किजोकि ते ज्ञानते कि तैसेरो आखरी वक्त एजनेबालो।” 13 ते जैखन अजगरे समझू, कि अवं जमीनी पुइ जो शारोरो, त तैस कुआन्शी पत्ती दौडो जैसां मट्टू जावक थियूं। 14 पन परमेशरे तैस कुआन्शी उकाबेरां दूई बड्डां फंगां दितां, कि अजगरे करां उडरतां जंगले मां तैस ठैरी पुजे, जैडी सडे टलाई सालन तगर तैसेरी हेरगेश भोरी थी, ताके तैडी अजगर न पुजी बटे। 15 फिरी अजगरे तैस कुआन्शी पत्ती अपने ऐशी सेई दरियारु जेरु पानी शारु, कि तैस इस दरियाए सेई रुइए। 16 तैस कुआन्शी मद्दत केरनेरे लेइ जमीना तैन पानी पियूं जैन तैस अजगरेरे ऐशी मरां निसोरु थियूं। 17 ते अजगर कुआन्शी जो सेरकोव। एल्हरेलेइ तैन कुआन्शरे औलादी सेई लडाई

केरनेरु एलान कियूं। तैना लोक जैन परमेशरे हुकमन मन्तन, ते यीशुएरी दित्तोरी शिक्षाई पुइ चलतन।

13 तैखन अजगर जेव, ते समुन्दरेरे बन्ने पुइ खडो भोव। मीं अक हैवान समुन्द्रे मरां निसतो लाव, तैसेरां दश शिनाँ ते सत क्रोडी थी; तैन शिन्गन पुइ दश राजमुकट ते तैसेरे दोगन पुइ परमेशरेरी तुहीनरां नव्वां लिखोरां थियां। 2 जै मीं हैवान लाव, तै इलाघेरो जेरो थियो; ते तैसेरे पाव इछेरे पावां केरे जेरे थियो; ते तैसेरु आशी शेररे एशेरु जेरु थियूं, ते अजगरे तैस हैवानेरे करोइन मरां एककी पुइ अक एरो जखम लाव, जेन्चरे ते मरने पुडे; फिरी तैसेरो मारनेबालो जखम रोडो भोव, ते सारे धेरतलरे लोक हैरान भोए, ते तैस हैवाने पत्ती चलने लगे। 4 ते तैन सेबमी लोकेई तैस अजगरेरी पूजा की, किजोकि तैन हैवाने अपनो अधिकार दित्तोरो थियो। ते इन जोइतां कि, “इस हैवानेरो जेरो कौने? हैवाने सेई कौने लेइ बटते?” 5 परमेशरे तैस हैवाने अजाजत दित्तोरी थी कि अपने अधिकारे पुइ घमण्ड केरे ते एन्चरे परमेशरेरी तुहीन केरे। परमेशरे तैस 42 महीन तगर ई अधिकार रखनेरे लेइ अजाजत दित्ती। 6 तै हैवान परमेशरेरी तुहीन केरने लगे, कि तैसेरे नव्वेरे खलाफ, ते जैडी परमेशर रहते ते स्वर्गं मां रानेबाले सेबमी लोकां केरे खलाफ तुहीन केरने लगे। 7 परमेशरे तैस हैवाने अजाजत दित्तोरी थी, कि परमेशरेरे लोकन सेई लडे, ते तैन करां जीति, ते तैस हर कुले, सारे लोकन, भाषान, त कने कौमन पुइ अधिकार दित्तो जेव। 8 ते धेरती पुइ रानेबाले सेबमी लोकेई तैसेरी पूजा की। सिर्फ तैनेई न की जैन केरां नव्वां जिन्दगरे किताबी मां दुनिया बनाने केरे पेइले लिखोरां थियां। ते किताब गबड़ेरी जिन्दगरी किताबे जैन बलिदानेरे लेइ मारु जोंव। 9 जै समझून चाते ते ध्याने सेई शुने। 10 जैना कैद भोनेन, तैना कैद भोले, जैना तलवारी सेई मरेलो, जरूरीए तेना तलवारी सेई मरेले, परमेशरेरे लोकां केरि सबर ते विश्वास इस्से मांए। 11 फिरी मीं अक होरो हैवान धेरतली पुडां निसतो लाव, तैस गबड़ेरे जेरां दूई शिनाँ थियां, पन जैखन तैन जोंव त तैसेरी आवाज अजगरेरे जेरी थी। 12 ई दुइयोंव हैवान पेइले हैवानेरो सारो अधिकार इस्तेमाल केरते। दुइयोंव हैवाने धेरती ते तैस पुइ रानेबालन करां पेइले हैवानेरी पूजा कराते जेसेरो मारनेबालो जखम ठीक भोरो थियो। 13 दुइयोंव हैवान बडे-बडे निशान हिरातो थियो, इडी तगर कि मैनु केरे सामने अम्बरेरां जमीनी पुइ अग भेजतो थियो। 14 दुइयोंव हैवाने परमेशरे अजाजत दित्ती कि ते पेइले हैवानेरे सामने चमत्कार हिराए। एन चमत्कारां केरे जिरिये तैनी दुनियारे सारे लोक टपलाए। तैन तैन पेइले हैवानेरी मूरती बनानेरो हुकम दित्तो, जै तलवारी सेई मारोरो थियो पन फिरी जीतो भोरोए। 15 दुइयोंव हैवाने परमेशरे अजाजत दित्तोरी थी कि ते पेइले हैवानेरी मूरती बनाए ते तै जीतोए, ताके तैस हैवानेरी मूरती गल्लां केरि बटे ते जैना तैस हैवानेरी पूजा न केरने तैना मारे गान। 16 दुइयोंव हैवाने सारे लोकन सेई जैवरदस्ती की, जैना खास आन ते जैना खास नई, अमीर, गरीब, आजाद, गुलाम आन, कि तैना पेइले हैवानेरे नव्वेरी मोहर देइने हथ्ये या कुपाए पुइ लान। 17 जैस पुइ छाप मतलब तैस हैवानेरु नवं या तैसेरो नव्वेरो अंक भोए, त तैसेरे अलावा होरो कोई लेन देन न केरि सके। 18 इस समझनेरे लेइ अक्ल जरूरीए। जैस अक्ल भोए, ते इस हैवानेरो अंक जमा केरे, किजोकि तै मैनेरो अंके, ते तैसेरो अंक 666 आए।

14 एसेरे बाद, मीं किछ लाऊं, मीं गबडू सिय्योन पहाड़े पुइ खडू लाऊं। ते तैस सेई साथी 144000 लोक थिये, जैन केरे कुपाए पुइ तैसेरु ते कने तैसेरे बाजेरु नवं लिखोरु थियूं। 2 ते स्वर्गंरां एरी आवाज शुनोई, जै बडे पैनेरी ते बडे गुइनेरी जेरी आवाज थी, ते जै आवाज मीं शुनी; तै एरी थी जेन्चरे कोई सारंगी बाजाने बालो सारंगी बजाने लोरोए। 3 144000 लोक तखतेरे सामने, ते प्राणी ते कने बुजुर्गां केरे सामने खडे थिये; तैना अक नव्वू गीत जोने लोरे थिये, तैन गीत सिर्फ तैन लोकेई शिखोरु थियूं। तैना लोक इना आन जैना सिर्फ इस दुनियाई मां रानेबाले लोकन मरां परमेशरेरे छुटोरे थियो। 4 इना तैना लोक आन, जैना कुआन्शान सेई अशुद्ध नई भोरे, पन

कुवारेन, इना तैना आन, जेरां भी गबडू गाते तैना भी तैस पत्ती चलतन, इना त परमेशरें लेड पेडले फल भोनेरे लेड भोनेन मरां धिने जौरेन। 5 तैनेई कधी झूठ नई जोरू, ते तैना बेडलजामान। 6 फिरी मीं अक होरो स्वर्गदूत अम्बरे मझामेई उडरतो लाव जैस कां धेरतली पुड रानेबालां केरि हर अक कौम, कुल, ते कने भाषारे लोकन शुनानेरे लेड हमेशारी खुशखबरी थी जै कथे न बेदलोए। (aiōnios g166) 7 तैने बडे जौरे सेई जौवं, “परमेशरे करां डरा; ते तैसेरी बड़याई केरा; किजोकि तैसेरो इन्साफ केरनेरो वक्त पुजोरोए, ते तैसेरी आराधना केरा, जैने स्वर्ग, धरती, समुन्द्र, पैनेरे नाग बनोरेन।” 8 फिरी तैसेरां पत्ती अक होरो स्वर्गदूत इन जौतो अव, “कि झडू, तैन बाबेल नगर झडू, तैने सारे कौमन अपनि शराबी पियाई, जेसेरो मतलब ई आप कि तैने सैरी लोकन मूरती केरि पूजा केरनि शिखाली।” 9 फिरी एसेरां पत्ती अक होरो स्वर्गदूत बडे आवाजी सेई इन जौतो अव, “कि जै कोई इस हैवाने ते तैसेरी मूरतरी पूजा केरे, ते अपने कुपाए या अपने हथ्ये पुड तैसेरी छाप लाए। 10 परमेशर तैन ट्लिठी शराबी पियालो जैस मां पानी न भोए मिलावरू जेसेरो मतलब परमेशरे तैन सेई बड़ी क्रोधे मां आए ते तैन पुड दया न केरेलो, तैना लोक अग ते गन्धकेरे दुखे मां छडे गाले, जैखन परमेशर तैन सजा देतो भोलो त पवित्र स्वर्गदूत गबडू लालू। 11 ते तैन केरे दुखेरो तू सदा उन्वरी रालो, ते जैना तैस हैवाने ते तैसेरे मूरतरी पूजा केरेले, ते जैना तैसेरे नञ्चरी छाप नेनेन, तैन रात दिहाड़ी चैन न मैलेली।” (aiōn g165) 12 एल्हेरेलेड परमेशरे लोकां केरे लेड जरूरी आप कि जैना भी दुःख तैन पुड एज्जन तैन सबरी सेई झैल्लन, परमेशर जैन केरनेरो हुक्म तैन दे तैनेई तैन कियोरू लोडे, ते तैनेई यीशु पुड विश्वास केरनो न लोडे शारोरो। 13 मीं स्वर्गरां ई आवाज शुनी, “लिख; जैना मुडदे प्रभु मां मरतन, तैना धन आन।” पवित्र आत्मा पक्कू केरते, “तै जौते, तैन सञ्चे। हाँ किजोकि तैना अपने मेहनती करां आराम हासिल केरेले, ते जैन तैनेई कियू तैसेरे बदले तैन इनाम मैलेली।” 14 फिरी मीं अक छिती बिदलार लाई, ते तैस बिदलारी पुड मैनेरू जेरो कोई बिशोरो लाव, तैसेरे दोगे पुड सोन्नेरू ताज ते हथ्ये मां तिखी डुलातीए। 15 फिरी अक होरो स्वर्गदूत मन्दरे मरां निस्तां, तैने जै बिदलारी पुड बिशोरो थियो, तैस बडे जौरे सेई जौवं, “कि अपनि डुलाती चला किजोकि कटनेरो वक्त ओरोए।” 16 ते जै बिदलारी पुड बिशोरो थियो, तैने धेरतली पुड अपनि डुलाती लाई, ते धेरतलरी फसल केटीई। 17 फिरी अक होरो स्वर्गदूत तैस मन्दरे मरां निस्सो, जै स्वर्ग मांए, ते तैस कां भी तिखी डुलाती थी। 18 फिरी एक्की होरे स्वर्गदूत जैस अगगी पुड अधिकार थियो, बलिदान केरनेरी ठारी मरां निस्सो, ते जैस कां तिखी डुलाती थी, तैस सेई जौरे सेई जौवं; “अपने तिखे डुलैइती लेइतां धेरतलरी दाछ कटी; किजोकि तैसेरी दाछ पकोरीए।” 19 ते तैने स्वर्गदूत धेरतली पुड अपनि डुलाती रख्खी, ते धेरतलरे दाछारे फल केटां, अपने परमेशरे परकोपेरे बडे रसेरे कुण्ड मां छडी। 20 ते नगररे बेडर तैस रसेरे कुण्डे मां दाछ ढूलेन्ची, ते रस कुण्ड मरां एजो खून निस्सो कि घोड़ां केरे लगामी तगर पुजो, ते 100 कोसे तगर रूडी।

15 फिरी मीं स्वर्ग मां अक बड्डो ते आजीब निशान लाव, मतलब सत स्वर्गदूत जैन कां आखरी सत आफतां थी, किजोकि तैन केरे भोने पुड परमेशरेरो क्रोध मुकेलो। 2 तैखन मीं समुन्द्रे जेरू किछ लाव जैन शीशेरू जेरू चमकतू थियू ते अग भी तैस मां मिलोरी थी। मीं तैना लोक भी लाए जैना हैवाने न थिये हैरेई बटोरो, तैन लोकेई हैवाने ते तैसेरे मूरतरी पूजा न थी कियोरी। ते तैन पुड तैस हैवाने नञ्चरे अंकेरी महोर न थी लोरोरी। तैना तैस शीशेरे समुन्दरेर बन्ने पुड तै सारंगी धिन्तां खडे भोए जै परमेशरे तैन दित्तोरी थी। 3 तैना परमेशरेर दास मूसेरू गीत, ते गबडेरू गीत जौते थी, “हे सर्वशक्तिमान प्रभु-परमेशर, जैना कम्मां तीं कियां तैना बड़ा महान ते आजीब आन, तू सेबभी कौमां केरो राजोस, तैन सब जैन तीं कियू तैन सही ते धर्मी आए।” 4 “हे प्रभु, सेबभी लोकेई तेरी आदर की, ते तैना सारे तेरे नञ्चरी इज्जत केरतन, किजोकि तूए सिर्फ पवित्रस। सैरी कौमां केरे लोक हर राज्जन मरां तीं कां एज्जले, तैना तेरी आराधना केरेले किजोकि तेरे धर्मी

कम्मां बड़ां मशूर आन।” 5 जैखन तैन लोकेई गीत जौताई खतम कियां, त मीं स्वर्ग मां मन्दर खोलेरू लाव। तैन एरू थियू जेन्चरे तेम्बु। 6 ते तैना सत स्वर्गदूत जैन कां सत आखरी आफतां थी, तैना तैस मन्दरे मरां निस्सो। तैनेई छिन्तां चमकतां लिगडां लोरां थियां ते तैनेई अपने छैती पुड सोन्नेरी पेटी बेन्धोरी थी। 7 ते तैन चेरे प्रैणन मरां एक्के सत्ते स्वर्गदूतन हमेशा जीते रानेबाले परमेशरे प्रकोपे सेई भरोरे सत सोन्नेरे कटोरे दित्ते। (aiōn g165) 8 ते परमेशरेरी महिमा, ते तैसेरे शेक्ते वजाई सेई मन्दर तूए सेई भरोई जेव, ते जां तगर तैन सत्ते स्वर्गदूतेई सत्ते आफतां खतम की, तांतगर कोई मन्दरे मां न गेड बटो।

16 तैह्वां पत्ती मीं मन्दरे मां कोई जौरे सेई तैन सत स्वर्गदूतन सेई जौतो शुनो कि, “गाथ, परमेशरेरे सजारे सत्ते कटोरे दुनियारे लोकन पुड उलटाथ।” 2 ते पेडले गेइतां अपनो कटोरे धेरतली पुड उलटव। ते तैन मैन्हु केरे जैन पुड हैवानेरी छाप थी, ते जैना लोकेई तैसेरी मूरतरी पूजा केरते थी, एक्की किसमेरे बुरे ते दुःख देनेबालो फोडे निस्सो। 3 ते दुइयोवं अपनो कटोरो समुन्द्रे पुड उलटव, ते तै मुडदां केरे खूनेरो जेरो बनो, ते समुन्दरेरे सारे जानदार मरे। 4 ते टलेइयोवं स्वर्गदूते अपनो कटोरो दरियान ते पैनेरे नागन पुड उलटव, ते सारू पानी खून बन्नु। 5 ते जैस स्वर्गदूते पैनी पुड अधिकारे मीं ते परमेशरे सेई इन जौते शुनो कि, “हे पवित्र परमेशर, तू जै आस, ते हमेशा करां थियो, तीं कां एन्चरे इन्साफ केरनेरू हक्के। 6 किजोकि तैनेई तेरे लोक ते तेरे नची मारे ते तैन केरो खून बगोरो थियो, एल्हेरेलेड तीं हुना तैन खून पीने जो दित्तो। इन इनामेरे रूपे मां तैन केरे लेड ठीक आए।” 7 फिरी मीं बलिदान केरनेरी ठारी मरां ई आवाज शुनी कि, “हाँ सर्वशक्तिमान प्रभु-परमेशर, तेरो इन्साफ सही ते कने सञ्चे आए।” 8 ते चेवरोवं स्वर्गदूते अपनो कटोरो दिहाडे पुड उलटव, ते दिहाडे जादे गर्भ भोनेरी अजाजत दिती कि तैस सेई लोक फुकोन। 9 ते लोक तैस बडे सेके सेई फुकोए, ते तैना लोक परमेशरेरी तुहीन केरने लाए, किजोकि तैए आए जैस कां सैरी आफनन पुड अधिकारे। फिरी भी तैन लोकेई अपने पापन करां मन न फिराव, ते फिरी भी तैनेई परमेशरेरे महिमारो इकरार न कियो। 10 ते पंचोवं स्वर्गदूते अपनो कटोरो तैस हैवानेरे तखते पुड उलटव ते तैसेरे सारे राज्जे मां आंधरू भोवं। ते लोक दुखे सेई मरे ते अपनि-अपनि जिभ चपाने लाए। 11 ते अपने दुखे ते फोडां केरे वजाई सेई स्वर्गेरे परमेशरेरी तुहीन की; ते अपने-अपने कम्मन करां मन न फिरव। 12 शेइयोवं स्वर्गदूते अपनो कटोरो बडे दरिया फराते पुड उलटव ते तैसेरू पानी शुक्की जेव एसेरो नितीजो ई भोव कि पूरबेरे राजे अपनि फौज धिन्तां पार जे। 13 एसेरां पत्ती मीं ट्लाई भूतां मैन्हु केरे रूपे मां लाए। अक अजगरेरे ऐशी मरां निस्सू, ते अक पेडले हैवानेरे ऐशी मरां निस्सू, ते अक दुइयोवं हैवानेरे ऐशी मरां निस्सू, जै जो झूठो सन्देशे जौते। 14 इन भूतन कां चमत्कार केरनेरी काबलीत थी ते तैना दुनियारे सारे मुलखां केरे राज केरनेबालन अकोट्टे केरने चले ताके तैना परमेशरे सेई लडन, ई तै दिहाड़ी आए जेइस परमेशर भूतन नाश केरेलो ते अपने लोकन मुक्ति देलो। 15 तैन भूतेई हकोमत केरनेबाले ते तैन केरि फौज एक्की ठैरी अकोट्टी की जैस जो इब्रानी भाषाई मां हर-मगिदोन जौतान। एल्हेरेलेड यीशुए जोरूए, “इस शुना। मेरू एज्जन अचानक चोरेरू जेरूए। धने ते मैन्हु जेखन अवं एज्जी त तै बीडो रहते, ते अपने लिगडन तियार रखते। फिरी ते नग्गो न भोलो, ते फिरी तैस लोकन मां गाने सेई शर्म न भोली।” 17 ते सतोवं स्वर्गदूते अपनो कटोरो हवाई पुड उलटव, ते मीं स्वर्ग मां मन्दरे मरां परमेशरे तखते पुडां ई बड़ी आवाज शुनी कि कोई जौने लोरोए, “सब किछ पूरू भोवं।” 18 फिरी बिजली, ते आवाज, ते गुडने लाव, ते अक एजो बड्डो भुंजल अव, कि जेइसेरे मैन्हु इस धेरतली पुड पैदा भोरोरेन, तेइसेरो अज तगर एरो भुंजल कधी नई ओरो। 19 ते तैस महान बाबेल नगररे ट्लाई टुकडे भोए, ते दुनियारे कौमां-कौमां केरे सारे नगर बबाद भोए। ताके परमेशर तै वादो पूरो केरे जै तैने बाबेल नगररे लोकन सजा देनेरे लेड कियोरो थियो। ई सजा परमेशर पक्की देलो। परमेशर तैन ट्लिठी शराबी पियालो जैस मां पानी न भोए

मिलावरू जेसेरो मतलब परमेशरे तैन सेइं बडो क्रोधे मां आए ते तैन पुड दया न केरेलो। 20 तैस वक्ते हर अक टैपु समुन्दरे मां डुबो; ते कोई भी पहाड़ न राऊं। 21 ते अम्बरेरां मैनन पुड मन-मन आण पेई, ते एल्हेरेलेइ कि ई आफ्त बडी भारी थी, लोकेई आनहरी आफतरे वजाई सेइं परमेशरेरी तुहीन की।

17 जैन सत स्वर्गदूतन कां तैना सत कटोरे थिये, तैन मरां एइतां एक्के मीं सेइं जोवं, “इरां एई, अवं तीं तैस बडे वेश्यारी सजा हिराताई, जै बडे पैनु पुड बिशोरीए। 2 जैस सेइं धेरतलरे राजेई बदमाशी की, ते धेरतली पुड रानेबाले तैसेरे बदमैशरे शराबी सेइं मसत भोरे थिये।” 3 तैखन आत्मा अवं अपने केबू मां कियो ते स्वर्गदूते अवं सुनसान ठेरी मांजो नेव। तैडी मीं अक कुआन्श हवाने पुड सुवार लाई, जेसेरी सत क्रोडी ते दश शिमां थियां, तैसेरे जान परमेशरेरी तुहीन केरनेरे न्वनन सेइं ढकोरी थी। 4 तैस कुआन्शां बैंगनी ते लाल लिगडां लोरो थियां, ते सोन्नेरे ते कीमती मेनी ते मोतन सेइं सजोरी थी, ते तैसेरे हथ्ये मां अक सोन्नेरो कटोरो शराबी सेइं भेरतां थियो, जै भिट्टे कम्मन ते बदमैशरे कम्मन हिराते। 5 ते तैसेरे कुपाए पुड इन नवं लिखोरू थियूं, “भेद-बडो बाबेल धेरतलरी वेश्यां ते भिट्टी चीजां केरि अम्मा।” 6 ते मीं तै कुआन्श परमेशरेरे लोकं केरो खून ते यीशुपरे गुवाहां केरो खून पीने सेइं मसत भोती लाई, ते अवं तैन लेइतां हैरान भोव। 7 तैने स्वर्गदूते मीं सेइं जोवं; “तू किजो हैरान भोव? अवं तीं सेइं इस कुआन्शारो, ते तैस हैवानेरो भेद जोताई, जैस पुड तै सुवारे, ते जेसेरी सत क्रोडी ते दश शिनगन। 8 जै हैवान तीं लाव, ई पेइलो थियो, पन हुनी नई रानो, ते अथाह कुण्डरां निसेलो ते परमेशर तैस पूरे तरीके सेइं नाश केरेलो, ते जैना लोक इस दुनियाई मां ज़िनि लोरेन जैन केरां नव्वां परमेशरे दुनिया बनाने केरां पेइले जिन्दगरे किताबी मां नई लिखोरां, तैना इस फैरान हिरातां हैरान भोले, ई हैवान पेइलो ज़ीतो थियो ते हुनी ज़ीतो तैन पन हुनी एज्जेलो। (Abyssos गल 9) इन समुन्दरे लेइ जानी मन ज़रूरीए, तैना सत पहाड़न, जैन पुड ते कुआन्श राज केरतीए। 10 ते तैना सत राजे भी आन, पंच त मेरि जोरेन, ते अक हेजू ए; ते अक आखरी हेजू नई ओरो, पन ज़ैखन तै एज्जेलो त थोडे चिरेरे लेइ राज केरेलो। 11 ते जै हैवान पेइलो थियो, ते हुना नई, तै एप्पु अठोवं राजोए; ते तैन सत्तन मरां पैदा भोव, ते आखरी मां तैस राजे हमेशारी सजा मैलेली। 12 ते जैना दश शिमां तीं पेइलां लां, तैना दश राजेन, जैनेई हेजू तगर राज शुरु नई कियोरू। तैन दश राजेन हैवाने सेइं साथी राज केरनेरो अधिकार दित्तो जेव, पन तैन राज केरनेरे लेइ थोडो वक्त दित्तो। 13 इना सब अक मन भोले, ते तैना अपनि-अपनि शक्ति ते अधिकार तैस हैवान देले। 14 इना गबडे सेइं लडेले, ते गबडू तैन पुड ज़ीत हासिल केरेल; किजोकि तै राजां केरो राजो ते प्रभुं केरो प्रभु आए। तैस पत्ती चलने बाले तैना आन जैना परमेशरे कुजोरेन ते चुनोरेन, ते जैना तैस सेइं साथी ईमानदार आन।” 15 फिरी तैने स्वर्गदूते मीं सेइं जोवं, “कि जैन पानी तीं पेइलु लोरो थियूं, जैस पुड तै वेश्या बिशोरी थी, ए दुनियारे सारे कोमन हिराती, जैना बडे मुलखन मरां ते भाषान मरां आन। 16 तै वक्त एज्जेलो ज़ेइस हैवान दश राजन सेइं जैना तैस सेइं साथी आन, तैस वेश्याई सेइं बैर रखेले, तैना तैस पुड हमलो केरेले ते तैस नग्गी केरेले तैसेरू किछ मास खाले, ते बाकी फुकेले। 17 किजोकि परमेशर तैन केरे मन्न मां इन छुडेले, कि तैना तैसेरी मर्जी पूरी केरेले; ते ज़ांतगर परमेशरेरू वचन पूरु न भोए, तांतगर अक मन भोइतां अपनु राज हैवाने देन। 18 ते तै कुआन्श, जै तीं लोरीए तैन बडू नगरे, जैन धेरतलरे राजन पुड राज केरते।”

18 इट्टां पत्ती मीं अक स्वर्गदूत स्वर्गं मरां एइतो लाव। तैस कां बडो अधिकार थियो, ते एल्हेरेलेइ तैसेरे बडे चमकने बाले महिमा सेइं सारी धरतली लौ बनी। 2 तैने जोरे सेइं जोवं, “कि डुल्ली बाबेल नगरी डुल्ली, ते भूतां केरे रानेरी ठार, ते हर एक्की भूतेरो अड्डो, ते हर एक्की दुष्ट ते भिट्टे चडोलीवेरो अड्डो बीती जेव। 3 किजोकि तैसेरे बदमैशरे शराबी सेइं सब कौमां मसत भोइ, ते धेरतलरे राजेई तैस सेइं बदमाशी की, ते धेरतलरे बुपारी तैसेरे एशरे वजाई सेइं अमीर भोइ जे।” 4 फिरी मीं स्वर्गं अक हीरि आवाज़ शुनी, “हे मेरे लोकव तुस तैस मरां निस्सा ताके तुस तैसेरे पापन मां

शामिल न भोथ, ते तैसेरी आफतन मरां कोई भी तुसन पुड न एज्जे। 5 किजोकि तैसारे पाप बडे आन जेन्चरे कि अगर ढेर लाव गाए त अम्बरे तगर पुजोरेन, ते परमेशरे तैसेरी बुवाई नई बिसरोरी जै तैसां कियोरी आए। 6 जेन्चरे तैसां लोकन सेइं कियूं तेन्चरे तैस सेइं भी केरा। तैना दुःख जैना तैसां लोकन दिते तैस दुगने देथ, तैसां लोक अपने बुरां कम्मां केरो स्वाद चखनेरे लेइ प्रभावित किये, तै परमेशरेरी दुगनी सरक मैसूस केरनेरे लेइ भी बनाई जेई। 7 जेन्चरी तैसां अपनि बडयाई की, ते एश किये, तेतरी तैस तकलीफ ते दुःख देथ, किजोकि तै अपने मने मां जोतीए, अवं रानई, विधवा नई; अवं विधवारे दुखे मां कधे न गेइली। 8 एल्हेरेलेइ तैसेरे घमण्डरे वजाई सेइं तैस पुड अचानक आफतां एज्जेली। अचानक तैस पुड बिमारी, दुःख ते कने काल साथी एज्जेलो। ते तै अग्गी मां भस्म की गाली, किजोकि प्रभु-परमेशर शक्तिमाने ते तै तैस सजा देलो।” 9 ते दुनियारे राजे जैनेई तैस सेइं बदमाशी ते एश कियोरे थिये, ज़ैखन तैना तैसेरे फुकोनेरो तू लाएले ते तैसेरेलेइ ढा छुडेले, ते छाती कुटेले। 10 ते तैना डरेले कि तैना भी तैसेरे सजाई मां टलेइयोनेन, ते दूर खडे भोइतां जोले, “हे महान नगरी, बाबेल! हे मजबूत नगरी, हाय! हाय! एक्की सैइती मां तीं सजा मैलली।” 11 “ते धेरतलरे बुपारी तैसेरेलेइ लेरां देले ते मिनत केरेले किजोकि हुनी कोई तैन सेइं लेन देन न केरेलो। 12 तैने एक सामान बडे किसमां केरू थियूं। सोन्नु चाँदी, जुवाहर, मोती। ते मलमल, बैंगनी, रेशमी, ते लाल लिगडां थियां, ते कने किसमां-किसमां केरि खुशबूदार लकडी, ते हथीदंतरी हर किसमेरी चीजां, ते कीमती लकडी, पितल, लूहां, संगमरमरेरे किसमां-किसमां केरि चीजां, 13 ते दालचीनी, मसाले, धूप, गन्धरस, लोबान, मदिरा, तेल, मैदो, गेहुं, बेछी-दांत, भेइटां-छेल्ली, घोडे, रथ, गुलाम, ते कने मैन्दु केरे प्राण। 14 ते बुपारी तैस सेइं जोले, जैना चीजां तीं चैई तैना हुनी न रेली, जैना खुशबूदार चीजां तीं पसंद की, तैना सैरी चीजां जैना तीं अपनो जिसम खूबसूत बनानेरे लेइ इस्तेमाल की, तैना सैरी तीं गवेई ते हुनी तैना न मैल्लन। 15 इन चीजन सेइं बुपारी जैना तैसेरे वजाई सेइं अमीर भोरे थी, तैसेरे दुखेरे डरे सेइं दूर खडे भोले, ते लेरां देइतां ते तडफते जोले, 16 “अफ्रसोस! अफ्रसोस! ई बडी नगरी जै मलमल, बैंगनी, लाल लिगडां लेइतां थी, ते सोन्नु, ते जुवाहर ते मोतन सेइं सजोरी थी, 17 एक्की सैइती मां तैसेरू एरू धन बरबाद भोवं, ते सब मांडी, ते भुसाफर, ते मल्लाह, ते जेन्चरे समुन्द्रे मरां कमाई कमातन तैना सारे दूर खडे भोए।” 18 ज़ैखन तैना तैस नेगरारे फुकोनेरो तू लाएले त ज़ोरे सेइं जोले, इस महान नेगारी ज़ेरे कोई नगरी नई। 19 ते अपने-अपने दोगे पुड थूड मलेले, ते लेरां देते ते कर लाते चिन्डां मैरतां जोले, “अफ्रसोस! अफ्रसोस! ई बडी नगरी जेसेरी दौलती सेइं समुन्दरेरां सब जिहाजन बाले धनी भोरे थी, एक्की सैइती मां उजड़े। 20 तुस जैना स्वर्गं मां रातथ, ते परमेशरेरे लोकव, ते प्रेरितव, ते कने नेबव, जैन तैस सेइं भोवं तैसेरे वजाई सेइं खुश भोथ, किजोकि परमेशरे तैस नेगरारो इन्साफ कियोरो किजोकि तैसां तुसन सेइं बुरु कियोरू थियूं।” 21 फिरी एक्की ताकतबर स्वर्गदूते बडे चेकारे पाठोरो जेरो अक घोड़ छुवां, ते इन जोइतां समुन्द्रे मां शारो, कि बडी नगरी बाबेल एन्चरे बछोडी गाली, ते फिरी कथे तैसेरो पतो न मैलेलो। 22 ते सारंगी बजानेबाले, ते गीतां जोनेबाले, ते बेइशोई बजानेबाले, ते नइशिनगां बजानेबालां केरि आवाज़ फिरी तीं मां कधी न शुनोली, ते फिरी केन्ची पेशेरो करीगिर तीं मां न मैलेलो; ते चक्की चलनेरी आवाज़ तीं कधे न शुनोली। 23 ते लोक दीयेरी लौ फिरी तीं मां न बालेले, ते लाइरी ते लैडारी आवाज़ कथे तीं मां न शुनोली; किजोकि तेरे बुपारी धेरतली पुड प्रधान थिये, ते तेरे दूने सेइं सब कौमां टेपलोवरी थी। 24 परमेशर बाबेले सजा देलो किजोकि सारे नेबी ते परमेशरेरे लोकां, ते धेरतली पुड सब मारोरां केरो खून तैस्से मां।

19 ताकतबर स्वर्गदूतेरे जोइतां झाड़नेरां बाद, मीं स्वर्गं मां बडे लोकां केरि भीड़ उच्चे आवाजी मां इन जोते शुनी, “हल्लिलूयाह! मुक्ति, महिमा, शक्ति इश्शे परमेशरेरीए। 2 तैसेरी बडयाई भोए किजोकि तैसेरे सारे फैसले सही ते ठीक आन। तैने मशूर वेश्यारो इन्साफ कियो तैसां दुनियारे लोक पाप

केरनेरे लेइ प्रभावित किये। परमेशर तैस बदलो देलो किजोकि तैसारे जिरिये परमेशररे दास मारोरेन।” 3 फिरी दुइयों बर तेनेई जोवं, “हल्लिलूय्याह! ते तैसरे फुकोनेरो तू सदा च़लतो रालो।” (aiōn g165) 4 ते चोब्ही बुजुंगई ते चेत्रे प्रेणेई परमेशरे कां मथ्यो टेको; जै तखते पुइ बिशोरो थियो, ते जोवं, “आमीना! हल्लिलूय्याह!” 5 ते तैखन मीं जोते शुनो, ते परमेशररे तखते मरां अक आवाज़ आई, तैने जोवं, “तुस इश्शे परमेशररे दास आथ जैना तैसेरी आदर केरतथ, कुन निकडे, कुन बडे, तुस सब तैसेरी तारीफ़ केरा।” 6 फिरी मीं बडी भीड़ारी, ते बडे पैनेरी आवाज़ शुनी, ते गुइनेरी जेरि आवाज़ शुनी, “हल्लिलूय्याह! कि प्रभु इश्शो परमेशर, सर्वशक्तिमान राज़ केरते। 7 एज्जा अस खुश ते मगन भोम, ते तैसेरी बडयाई केरम; किजोकि गबडेरो ड़ला पुजोरोए, ते तैसरे लैइं अपनो आप तियार केरोए। 8 ते तैस साफ़ ते चमकदार महीन मतलब मलमल लानेरो अधिकार दितो,” किजोकि तैस महीन मलमलेरो मतलब परमेशररे लोकां केरां धर्मरां कम्मन। 9 ते स्वर्गदूते मीं सेइं जोवं, “इन लिख, कि धन आन तैना, जैना गबडेरे ड़लाए धामी मां कुजोरेन।” फिरी तैने मीं सेइं जोवं, “इना गल्लां जैना परमेशरे जोई सघ्र आना।” 10 ज़ैखन मीं शुनु, अवं ज़ै मीं सेइं गल्लां लोरो थियो केरने तैसेरी आराधना केरनेरे लेइ तैस कां झुको तैने मीं सेइं जोवं, “मेरी आराधना न केर, तै परमेशरे जेसेरी आराधना कियोरी लोइ। अवं भी परमेशररो दास आई, जेन्चरे तू त तेरे विश्वासी साथी आन जैना यीशुएरो अपने प्रभुएरे रूपे मां इकरार केरतन।” ई सच्च्छाई यीशुए बांदी कियोरी जै लोकन शक्ति देती कि परमेशररे वचनेरू एलान केरन। 11 फिरी मीं स्वर्ग खुल्लू लाव; तैडी मेरे सामने छितो घोडो थियो; ते तैस पुइ अक सुवार थियो, जै वफादार, ते झूठ न जोए; ते ज़ैन परमेशररी नज़री मां सही आए तैसरे मुताबिक इन्साफ़ ते परमेशररे दुश्मन सेइं लड़ाई केरते। 12 तैसरे एछ्छी अगारे लपारी जेरि थी, ते तैने बड़ां ताज़ा लोरो थियो; ते तैसेरू नवं तैस पुइ लिखोरूए, तैसेरो मतलब सिर्फ़ तैए ज्ञानतो थियो। 13 तैनी खूने मां ड़ुबोरू लिगड़ लोरो थियू, तैसेरू नवं परमेशररे वचने। 14 ते स्वर्गी फौज छिते घोइन पुइ सुवार; ते तैना छिते ते साफ़ मलमल लेइतां तैस पत्ती पत्तीन। 15 ते कौमी-कौमी मारनेरे लेइ तैसरे ऐशी मरां अक तिखी तलवार निसतीए, ते तै लोहरे सोटे सेइं तैन पुइ राज़ केरेलो, ते तै सर्वशक्तिमान परमेशररे बडे प्रकोपेरी खालिस शराबी सेइं दाछ़ ढ़लेन्चेलो। 16 ते तैसेरां लिगड़न ते जंघी पुइ इन नवं लिखोरूए, “राजां केरो राज़ो ते प्रभुं केरो प्रभु।” 17 फिरी मीं अक स्वर्गदूत दिहाड़े पुइ खडो लाव, ते तैने बेडि आवाज़ी सेइं अम्बरे मां उडने बाले च़डोलन सेइं जोवं, “एज्जा परमेशररे बडे धामी मां शामिल भोनेरे लेइ अकोडो भोथा। 18 ज़ैस सेइं तुस राजां, प्रधानां, ताकतबर लोकां, घोडां ते कने तैन केरे सवारां, आज़ादां, गुलामां, निकडे, बडे, सेबमी लोकां केरू मास खाथा।” 19 फिरी मीं हैवान लाव ज़ै समुन्दरे मरां ओरो थियो, ते धेरतलरे राज़े ते कने तैन केरि फौज तैस घोडेर सुवार ते तैसेरी फौजी सेइं लड़नेरे लेइ अकोट्टी लाई। 20 ते तै पेइलो हैवान ते तैस सेइं साथी ते झूठो नबी ट़लाव, ज़ैने तैसरे सामने एरे निशान हिरावरो थियो, जेसेरे जिरिये तैने तैना सारे लोक टपलाए, ज़ैनेई तैस हैवानी छाप नेवरी थी, ते ज़ैना तैसेरी मूतरी पूजा केरते थिये, इन दुइये ज़ीते तैस अगारे झीली मां छडे जे, ज़ै गन्धके सेइं बलतीए। (Limnē Pyr g3041 g4442) 21 ते बाकी लोक तैस घोडेर सवारेरी तलवारी सेइं ज़ै तैसरे ऐशी मरां निस्सती थी मारे जे; ते चुडोलू तैसरे मासे सेइं रेज़्जी जेआं।

20 फिरी मीं अक स्वर्गदूत स्वर्गरां एइतो लाव; जेसेरे हथ्ये मां अथाह कुण्डेरी चाबी ते कने अक बड्डी शंगल थी। (Abyssos g12) 2 तैने तै अजगर ट़लाव ज़ै बडे पेइले सप्पेरे रूपे मां लेइहोरो थियो जेसेरू नवं शैतान भी आए। तैने तै ट़लेइतां हज़ार सालेरे लेइ बन्थो। 3 ते तै अथाह कुण्डे मां शैरतां बन्द कियो ते तैस पुइ मोहर लई; कि तै हज़ार साल पूरे भोने तगर कौमां-कौमां केरे लोकन फिरी न भटकाए; इसेरां पत्ती ज़ररे, कि थोडे च़िरेरे लेइ खोल्लो गाए। (Abyssos g12) 4 फिरी मीं किछ तखत लाए ते ज़ैना लोक तैन पुइ बिश्शारे थिये ते तैन राज़ केरनेरो अधिकार दितो; ते तैन केरि


आत्मा भी लेई, ज़ैन केरि क्रोडी एल्लेरेलेइ केटोरी थी कि तैना यीशु मसीह अपनो प्रभु मन्तन ते परमेशररे वचने पुइ विश्वास केरतन, ते ज़ैनेई तैस हैवानीरे, ते तैसरे मूरतरी पूजा न थी कियोरी, ते तैसेरी महोर अपने कुपाए ते हथ्यन पुइ न थी। तैना ज़ीते भोइतां मसीह सेइं साथी हज़ार सालन तगर राज़ केरेले। 5 इना लोक पेइले आन ज़ैना ज़ीते किये गाले ते तैना धन ते पवित्र आन। दुइयोंव मौतरी तैन पुइ कोई शक्ति न भोली। तैना परमेशररे लेइ याजक भोले ते मसीह तैन सेइं साथी हज़ार साल राज़ केरेलो, ज़ांतगर तैना हज़ार साल पूरे न भोन तांतगर होरे मरं लोक ज़ीते न किये गाले। 7 ज़ैखन हज़ार साल खतम भोनेबाले भोले त स्वर्गदूत शैताने तैस ठैरा हथरां छडेलो ज़ैडी तै बन्धोरो थियो। 8 ते तैन कौमन ज़ैना सेरी दुनियाई मां आन धोखो देनेरे लेइ निस्सेलो। तैन कौमन जो गोग ते मागोग ज़ोतन। शैतान तैन तैस ठैरी आनेलो ज़ैडी तै तैन सेइं लडेलो। तैन केरि गिनती समुन्दरेरे रैती बराबर भोली। 9 शैतानेरी फौज सारे दुनियाई मां गाली, तैना तैस नगरे घेरेले ज़ैस सेइं परमेशर प्यार केरते ते ज़ैडी तैसरे लोक रहतन, परमेशररे तरफां स्वर्गरां अग तैन सेबभन भस्म केरेली। 10 ते तैन केरो गुमरा केरनेबालो शैतान अग ते गन्धकेरे समुन्दरे मां शारो गालो, ज़ैस मां तै हैवान ते कने झूठो नबी भी भोलो, तैना रात दिहाडी हमेशा दुखे मां राले। (aiōn g165, Limnē Pyr g3041 g4442) 11 फिरी मीं अक बड्डी छितो तखत ते ज़ै तैस पुइ बिशोरो थियो लाव, जेसेरे सामनेरां धरती ते अम्बर नश्शू, ते तैन केरे लेइ ठार न मैल्ली। 12 फिरी मीं निकडे बडे ज़ैना मरं थिये तखतेरे सामने खडे लाए, ते किताबां खोल्ली जेई; ते फिरी अक होरि किताब खोल्ली; मतलब ज़िन्दगरी किताब खोल्ली; ते जेन्चरे तैन किताबन मां लिखोरू थियू, तैन केरे कम्मां केरे मुताबिक मुडदां केरो इन्साफ़ कियो। 13 ते समुन्द्रे तैना मरं मैन्हु दिते ज़ैना तैस मां थी, ते मौतां ते पाताले ज़ैना तैस मां मरं थिये दिते; ते तैन मरां हर एककेरो तैन केरे कम्मां केरे मुताबिक इन्साफ़ कियो। (Hadēs g86) 14 ते मौत ते पाताल भी अगारे समुन्दरे मां शाकू, ई अगारो समुन्दरे त दुइयोंव मौते। (Hadēs g86, Limnē Pyr g3041 g4442) 15 ते जेसेरू भी नवं ज़िन्दगरे किताबी मां लिखोरू न मैल्लू, तै अगारे समुन्दरे मां शारो जेव। (Limnē Pyr g3041 g4442)

21 फिरी मीं नव्वू अम्बर ते नव्वी धेरतली लाई, किजोकि पेइलू अम्बर, ते पेइली धेरतली न थी रावरी, ते समुन्दर भी न राव। 2 फिरी मीं पवित्र नगर नव्वू यरूशलेम स्वर्गरां परमेशरे करां एइतू लाव, ते तैन तैस लैइज़ा ज़ेरू थियू, ज़ै अपने लाडेर लेइ तियार भोरी भोए। 3 फिरी मीं परमेशररे तखते मरां कोई उच्च्यी आवाज़ी सेइं इन जोते शुनो, “अज़ेरां बाद परमेशर मैनु सेइं साथी रालो, ते तैसेरू घर तेन लोकन मां भोलू, ते तैना तैसरे लोक भोले, ते परमेशर एप्पू तैन, अपने लोकां केरे रूपे मां कबूल केरेलो ते तैना लोक तैस अपनो परमेशर कबूल केरेले। 4 ते तै तैन लोकां केरे एछ्छी केरां सब एंखरू पुछेलो; ते तैट्टां पत्ती मौत न राली, ते न दुःख, न मातम, न मुसीबत राली; पेइली गल्लां बीती जेई।” 5 ज़ै तखते पुइ बिशोरो थियो तैने जोवं, “कि तक, अवं सब किछ नव्वू केरताई।” फिरी तैने जोवं, “कि लिख, किजोकि इना वचन विश्वासेरे काबल ते सच्च्छे आना।” 6 फिरी तैने मीं सेइं जोवं, “सब किछ पूरू भोवं, अवं अलफा ते ओमेगा, पेइलो ते आखरी आई, अवं ट़्लिशोरे ज़िन्दगरे पैनेरे नागन मरां मुखत देइलो। 7 ज़ै ज़ीत हासिल केरे, तेए इन चीज़ां केरो बारस भोलो; ते अवं तैसेरो परमेशर भोलो, ते तैन मेरू मठू भोलू। 8 पन डरपोक, विश्वास न केरनेबाले, भिटे, खूनी, बदमाशी केरनेबाले, जैदू केरने बाले, मूरती केरि पूजा केरनेबाले ते सब झूठां केरो हिस्सो तैस समुन्दरे मां मैलेलो ज़ै अगगी ते गन्धकी सेइं बलतो रहते, ई दुइयोंव मौते।” (Limnē Pyr g3041 g4442) 9 फिरी तैन सत स्वर्गदूतेई ज़ैनेई सत आखरी आफतन सेइं भरिरे कटोरे मैनु पुइ उलटावरे थिये, तैन मरां एकके मीं कां एइतां जोवं, “इरां एई, तीं अवं लैडे ज़ै जन्दी गबडे सेइं ड़ला बनावली हिराताई।” 10 परमेशररे आत्मा अवं अपने केबू मां कियो ते स्वर्गदूते अवं एककी बडे ते उच्चे पहाडे पुइ नेव, ते पवित्र नगर यरूशलेम स्वर्गरां मरां परमेशरे करां

एडतो हिरव। 11 परमेशेरी महिमा तैस मां थी, ते तैसेरी लौ बड़े कीमती घोड़ा, मतलब बिल्लौरै जेरे यशबे बराबर साफ थी। 12 तैस नगरेरे चेत्रे पासन बड़ी उच्चि दिवार थी, ते तैसेरां 12 दारां ते दारन पुड़ 12 स्वर्गदूत थिये; ते तैन पुड़ इस्राएली केरे 12 गोत्रां केरां नंवां लिखोरां थियां। 13 पूरैरे पासे टलाई दारां, उत्तरेरे पासे टलाई दारां, दखिनेरे पासे टलाई दारां, ते पशिचमेरे पासे टलाई दारां थियां। 14 ते नगरेरे दिवारा 12 मुनीयादां थी, ते तैन पुड़ गबड़ेरे 12 प्रेरितां केरां 12 नंवां लिखोरां थियां। 15 ते जै मीं सेइं गल्लां केरतो थियो, तैस कां नगर, ते तैसेरे दारन ते तैसेरे दिवारन नापनेरे लेइ अक सोन्नेरो गज़ थियो। 16 ते तैस नगरेरे चेत्र पासे थिये, ते तैसेरी लमबाई चोडाइअरे बराबर थी, ते तैने तैस गजे सेइं नगर नापू, त सड़े 750 कोस निस्सी, ते तैसेरी लमबाई, ते चौडाई, ते ऊँचाई बराबर थी। 17 तैसेरां बाद स्वर्गदूते दिवारा 12 ऊँचाई नापी। तैने एन्चरे नापी जेन्चरे मैनु चीजां नापतन, ते दिवार 66 मीटर उच्चि निस्सी। 18 ते तै दिवार कीमती घोड़न सेइं बनोरी थी जैस जो यशब ज़ोतन, नगर खालिस सोन्ने सेइं बनोरू थियूं, जैन साफ चमकते शीशेरू जेरू भोए। 19 ते तैस नगरेरी मुनीयादारे घोड़ हर किसमेरी कीमती घोड़न सेइं सजावरी थी, पेड़ली मुनीयाद यशबेरी दुइयोवं नीलमणेरी ट्लेइयोवं लालड़ी, चेत्रोवं मरकते, 20 पंचोंव गोदेक, शेइयोवं माणिक्ये, सतावं पीतमणि, अठोवं पेरोजे, नावांवं पुखराजे, दशोवं लहसनिए, यारोवं धूपकान्त, बारांवं याकूतेरी थी। 21 ते 12 दारां, 12 मोती केरां थियां, अक-अक दार, एक्की-एक्की मोती सेइं बनोरू थियूं, ते नगरेरी सड़क साफ शीशेरी जेरि खालिस सोन्नेरी थी। 22 मीं कोई मन्दर न लाव, किजोकि सर्वशक्तिमान प्रभु-परमेशर, ते गबडू तैड़ी नगरे मां आए। एल्हेरेलेइ मन्दरेरी कोई ज़रूरत नई। 23 ते तैस नगर मां दिहाड़ो ते चेंदनेरे लोअरी ज़रूरत नई, किजोकि परमेशेरे महिमा सेइं तैस मां लौ भोइ रावरीए, ते कने गबडू तैसेरो दीयोए। 24 ते कौमां-कौमां केरे लोक तैसेरी लोई मां राले, ते धेरतलरे राजे अपनि-अपनि धन दौलत तैस नगरे मां आनेले। 25 तैस नगरेरां दारां सारे दिहैड़ी खुल्लां भोलो ते कधी बंद न भोलां। किजोकि तैड़ी कोई रात न भोली। 26 दुनियारे लोक दुनियारे कौमां केरि सैरी खूबसूत चीजां ते धन दौलत तैस नगरे मां आनेले। 27 ते तैस मां कोई भिट्टी चीज या गन्दु कम करेनेबालो या झूठ बनानेबालो, केन्ची भी तरीके सेइं अन्तर न गालो; पन सिर्फ तैना लोक जैन केरां नंवां गबड़ेरे ज़िन्दगरे किताबी मां लिखोरां भोलां।

22 फिरी तैने मीं बिल्लौरै जेरो अक चमकतो ज़िन्दगरे पैनरो दरिया हिराव, जै परमेशेरे ते गबड़ेरे तखते केरां निस्तां तैस नगरेरी सड़की तगर मझामेई निसतो थियो। 2 ते दरियारे इस पासे ते उस पासे, ज़िन्दगरो बुट थियो, तैस मां 12 किसमां केरे फल लगते थिये, ते तै हर महीने फलतो थियो; ते तैस बुटेरे पटलान सेइं कौमां-कौमां केरे लोक बेइज्जोते थी। 3 फिरी तैड़ी लानत न भोली ते परमेशर ते गबड़ेरो तखत तैस नगर मां भोलो, ते तैसेरे दास तैसेरी सेवा केरेले। 4 ते तैना परमेशेरे आमने सामने लाएले, ते परमेशेरू नवं तैन केरे कुपाए पुड़ लिखेरू भोलू। 5 ते फिरी रात न भोली, ते तैन दीयो ते दिहाड़ेरी ज़रूरत न भोली, किजोकि प्रभु-परमेशर तैन लौ देलो, ते तैना हमेशा राज़ केरेले। (aiōn g165) 6 फिरी स्वर्गदूते मीं सेइं ज़ोवं, “इना गल्लां विश्वासेरे काबल ते सज़्ज़ीन, ते प्रभु जै नेबी केरे आत्मा केरो परमेशेरे, तैने अपने स्वर्गदूत एल्हेरेलेइ भेजे, कि अपने दासन तैना गल्लां जैन केरू जल्दी भोनू ज़रूरीए हिराए।” 7 “हेर, अवं जल्दी एजने बालोई, परमेशर तैन सेबभन बरकत देते जैना इस किताबरे सन्देशे पुड़ ध्यान देतन।” 8 अवं तैए यूहन्ना आई, जै इना गल्लां शुन्तो, ते लहतो थियो, ते जैखन मीं शुनु, ते लाऊ, त जै स्वर्गदूत मीं इना गल्लां हिरातो थियो, अवं तैस कां मथ्थो टेकने लाव। 9 ते तैने मीं सेइं ज़ोवं, “हेर, एरू न केर; किजोकि अवं तेरो, ते तेरे विश्वासी सैथी नेबी ते इस किताबरी गल्लां केरे मन्ने बालां केरो संगी दासाई; परमेशेरे कां मथ्थो टेका।” 10 फिरी तैने मीं सेइं ज़ोवं, “इस किताबरे भविष्यवेनरे गल्लन केरो भेद छुपेइतां न रख, किजोकि वक्त नेडोए। 11 जै बुरु केरते, तै बुरु केरतो राए; ते जै भिट्टो, तै भिट्टो बनोरो राए; ते जै धर्मी, तै

धर्मी बनोरो राए; ते जै पवित्रे ते पवित्र बनोरो राए।” 12 फिरी प्रभु यीशुए ज़ोवं, “अवं जल्दी एज्जेलो। अवं एज्जी रावरोई जैन लोकेई किनू तैसेरे मुताबिक इनाम देनेरे लेइ या सज़ा देनेरे लेइ। 13 “अवं अलफा ते ओमेगाई, पेइलो ते आखरी, शुरुआत ते अन्त आई।” 14 धने तै, जै अपना लिगडा धोते, किजोकि तैस ज़िन्दगरे बुटे कां एजनेरो अधिकार मैलनोए, ते तै दारां केरे बत्तां गेइतां नगर मां दाखल भोलो। 15 पन कुतरां, जैदू केरनेबाले, बदमाशी केरनेबाले, खून केरनेबाले, मूरती केरि पूजा केरनेबाले, हर कोई झूठेरो चाने बालो, ते कने झूठ बनानेबालो बेइर राले। 16 “मीं यीशुए अपने स्वर्गदूत एल्हेरेलेइ भेजो, कि तुसन अगर कलीसिया मां इन गल्लां केरे बारे मां गवाही दे, अवं दाऊदेरू ज़ील, वंश, ते झेइरो चमकतो तारोई।” 17 परमेशेरी आत्मा ते गबड़ेरी लाड़ी यीशु सेइं ज़ोतन, “तू ज़रूर एई!” ते शुने बाले भी ज़ोन, “एई!” जै ट्लिशोरो भोए, तै एज्जे ते जै कोई चाए पानी ने जैन मुफते मां ज़िन्दगी देते। 18 अवं हेर एक्की जै इस किताबरी भविष्यवेनरी गल्लां शुनते गवाही देताई, कि अगर कोई मैनु इन गल्लन मरां किछ बधाए, त परमेशर तैना आफतन जैना इस किताबी मां लिखोरिन, तैस देलो। 19 ते अगर कोई इस भविष्यवेनरी किताबरी किछ गल्लां कडे, त परमेशर तैस ज़िन्दगरे बुटे ते पवित्र नगर मरां जेसेरे बारे मां इस किताबी मांए, तैसेरो हिस्सो कढेले। 20 जै इन गल्लां केरि गवाही देते, ते इन ज़ोते, “हॉ अवं जल्दी एजने बालोई।” आमीन। हे प्रभु यीशु एई! 21 प्रभु यीशुएरो अनुग्रह परमेशेरे लोकन सेइं साथी राए। आमीन।



फिरी मीं पवित्र नगर नंवू यरूशलेम स्वर्गें परमेशरे करं एंडतू लाव, ते तैन तैस लैडारू जेरू थियूं, जै अपने लाडेंरे लेइ तियार भोरी भोए। फिरी मीं परमेशरेरे तखते मरां कोई उच्ची आवाज़ी सेइं इन ज़ोते शुनो, “अज़ेरं बाद परमेशर मैनन् सेइं साथी रालो, ते तैसेरू घर तैन लोकन मां भोलू, ते तैना तैसेरे लोक भोले, ते परमेशर एप्पू तैन, अपने लोकां केरे रूपे मां कबूल केरेलो ते तैना लोक तैस अपनो परमेशर कबूल केरेलो।”

प्रकाशित वाक्य 21:2-3

Reader's Guide

भद्रवाही at AionianBible.org/Readers-Guide

The Aionian Bible republishes public domain and Creative Common Bible texts that are 100% free to copy and print. The original translation is unaltered and notes are added to help your study. The notes show the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of afterlife destinies.

Who has the authority to interpret the Bible and examine the underlying Hebrew and Greek words? That is a good question! We read in 1 John 2:27, *"As for you, the anointing which you received from him remains in you, and you do not need for anyone to teach you. But as his anointing teaches you concerning all things, and is true, and is no lie, and even as it taught you, you remain in him."* Every Christian is qualified to interpret the Bible! Now that does not mean we will all agree. Each of us is still growing in our understanding of the truth. However, it does mean that there is no infallible human or tradition to answer all our questions. Instead the Holy Spirit helps each of us to know the truth and grow closer to God and each other.

The Bible is a library with 66 books in the Protestant Canon. The best way to learn God's word is to read entire books. Read the book of Genesis. Read the book of John. Read the entire Bible library. Topical studies and cross-referencing can be good. However, the safest way to understand context and meaning is to read whole Bible books. Chapter and verse numbers were added for convenience in the 16th century, but unfortunately they can cause the Bible to seem like an encyclopedia. The Aionian Bible is formatted with simple verse numbering, minimal notes, and no cross-referencing in order to encourage the reading of Bible books.

Bible reading must also begin with prayer. Any Christian is qualified to interpret the Bible with God's help. However, this freedom is also a responsibility because without the Holy Spirit we cannot interpret accurately. We read in 1 Corinthians 2:13-14, *"And we speak of these things, not with words taught by human wisdom, but with those taught by the Spirit, comparing spiritual things with spiritual things. Now the natural person does not receive the things of the Spirit of God, for they are foolishness to him, and he cannot understand them, because they are spiritually discerned."* So we cannot understand in our natural self, but we can with God's help through prayer.

The Holy Spirit is the best writer and he uses literary devices such as introductions, conclusions, paragraphs, and metaphors. He also writes various genres including historical narrative, prose, and poetry. So Bible study must spiritually discern and understand literature. Pray, read, observe, interpret, and apply. Finally, *"Do your best to present yourself approved by God, a worker who does not need to be ashamed, properly handling the word of truth."* 2 Timothy 2:15. *"God has granted to us his precious and exceedingly great promises; that through these you may become partakers of the divine nature, having escaped from the corruption that is in the world by lust. Yes, and for this very cause adding on your part all diligence, in your faith supply moral excellence; and in moral excellence, knowledge; and in knowledge, self-control; and in self-control patience; and in patience godliness; and in godliness brotherly affection; and in brotherly affection, love. For if these things are yours and abound, they make you to be not idle nor unfruitful to the knowledge of our Lord Jesus Christ,"* 2 Peter 1:4-8.

Glossary

भद्रवाही at AionianBible.org/Glossary

The Aionian Bible un-translates and instead transliterates eleven special words to help us better understand the extent of God's love for individuals and all mankind, and the nature of afterlife destinies. The original translation is unaltered and a note is added to 64 Old Testament and 200 New Testament verses. Compare the meanings below to the Strong's Concordance and Glossary definitions.

Abyssos g12

Greek: proper noun, place

Usage: 9 times in 3 books, 6 chapters, and 9 verses

Meaning:

Temporary prison for special fallen angels such as Apollyon, the Beast, and Satan.

aidios g126

Greek: adjective

Usage: 2 times in Romans 1:20 and Jude 6

Meaning:

Lasting, enduring forever, eternal.

aiōn g165

Greek: noun

Usage: 127 times in 22 books, 75 chapters, and 102 verses

Meaning:

A lifetime or time period with a beginning and end, an era, an age, the completion of which is beyond human perception, but known only to God the creator of the aiōns, Hebrews 1:2. Never meaning simple endless or infinite chronological time in Greek usage. Read Dr. Heleen Keizer and Ramelli and Konstan for proofs.

aiōnios g166

Greek: adjective

Usage: 71 times in 19 books, 44 chapters, and 69 verses

Meaning:

From start to finish, pertaining to the age, lifetime, entirety, complete, or even consummate. Never meaning simple endless or infinite chronological time in Koine Greek usage. Read Dr. Heleen Keizer and Ramelli and Konstan for proofs.

eleēsē g1653

Greek: verb, aorist tense, active voice, subjunctive mood, 3rd person singular

Usage: 1 time in this conjugation, Romans 11:32

Meaning:

To have pity on, to show mercy. Typically, the subjunctive mood indicates possibility, not certainty. However, a subjunctive in a purpose clause is a resulting action as certain as the causal action. The subjunctive in a purpose clause functions as an indicative, not an optative. Thus, the grand conclusion of grace theology in Romans 11:32 must be clarified. God's mercy on all is not a possibility, but a certainty. See ntgreek.org.

Geenna g1067

Greek: proper noun, place

Usage: 12 times in 4 books, 7 chapters, and 12 verses

Meaning:

Valley of Hinnom, Jerusalem's trash dump, a place of ruin, destruction, and judgment in this life, or the next, though not eternal to Jesus' audience.

Hadēs g86

Greek: proper noun, place

Usage: 11 times in 5 books, 9 chapters, and 11 verses

Meaning:

Synonymous with Sheol, though in New Testament usage Hades is the temporal place of punishment for deceased unbelieving mankind, distinct from Paradise for deceased believers.

Limnē Pyr g3041 g4442

Greek: proper noun, place

Usage: Phrase 5 times in the New Testament

Meaning:

Lake of Fire, final punishment for those not named in the Book of Life, prepared for the Devil and his angels, Matthew 25:41.

Sheol h7585

Hebrew: proper noun, place

Usage: 66 times in 17 books, 50 chapters, and 64 verses

Meaning:

The grave or temporal afterlife world of both the righteous and unrighteous, believing and unbelieving, until the general resurrection.

Tartaroō g5020

Greek: proper noun, place

Usage: 1 time in 2 Peter 2:4

Meaning:

Temporary prison for particular fallen angels awaiting final judgment.

Glossary +

AionianBible.org/Bibles/Bhadrawahi---Bhadrawahi-Bible/Noted

Glossary references are below. Strong's Hebrew and Greek number notes are added to 64 Old Testament and 200 New Testament verses. Questioned verse translations do not contain Aionian Glossary words and may wrongly imply *eternal* or *Hell*. * The note placement is skipped or adjusted for verses with non-standard numbering.

Abyssos

लूका 8:31
रोमियों 10:7
प्रकाशित वाक्य 9:1
प्रकाशित वाक्य 9:2
प्रकाशित वाक्य 9:11
प्रकाशित वाक्य 11:7
प्रकाशित वाक्य 17:8
प्रकाशित वाक्य 20:1
प्रकाशित वाक्य 20:3

aidios

रोमियों 1:20
यहूदा 1:6

aiōn

मत्ती 12:32
मत्ती 13:22
मत्ती 13:39
मत्ती 13:40
मत्ती 13:49
मत्ती 21:19
मत्ती 24:3
मत्ती 28:20
मरकुस 3:29
मरकुस 4:19
मरकुस 10:30
मरकुस 11:14
लूका 1:33
लूका 1:55
लूका 1:70
लूका 16:8
लूका 18:30
लूका 20:34
लूका 20:35
यूहन्ना 4:14
यूहन्ना 6:51
यूहन्ना 6:58
यूहन्ना 8:35
यूहन्ना 8:51
यूहन्ना 8:52
यूहन्ना 9:32
यूहन्ना 10:28
यूहन्ना 11:26
यूहन्ना 12:34
यूहन्ना 13:8
यूहन्ना 14:16

प्रेरितों के काम 3:21
प्रेरितों के काम 15:18
रोमियों 1:25
रोमियों 9:5
रोमियों 11:36
रोमियों 12:2
रोमियों 16:27
1 कुरिन्थियों 1:20
1 कुरिन्थियों 2:6
1 कुरिन्थियों 2:7
1 कुरिन्थियों 2:8
1 कुरिन्थियों 3:18
1 कुरिन्थियों 8:13
1 कुरिन्थियों 10:11
2 कुरिन्थियों 4:4
2 कुरिन्थियों 9:9
2 कुरिन्थियों 11:31
गलातियों 1:4
गलातियों 1:5
इफिसियों 1:21
इफिसियों 2:2
इफिसियों 2:7
इफिसियों 3:9
इफिसियों 3:11
इफिसियों 3:21
इफिसियों 6:12
फिलिप्पियों 4:20
कुलुस्सियों 1:26
1 तीमुथियुस 1:17
1 तीमुथियुस 6:17
2 तीमुथियुस 4:10
2 तीमुथियुस 4:18
तीतुस 2:12
इब्रानियों 1:2
इब्रानियों 1:8
इब्रानियों 5:6
इब्रानियों 6:5
इब्रानियों 6:20
इब्रानियों 7:17
इब्रानियों 7:21
इब्रानियों 7:24
इब्रानियों 7:28
इब्रानियों 9:26
इब्रानियों 11:3
इब्रानियों 13:8
इब्रानियों 13:21
1 पतरस 1:23

1 पतरस 1:25
1 पतरस 4:11
1 पतरस 5:11
2 पतरस 3:18
1 यूहन्ना 2:17
2 यूहन्ना 1:2
यहूदा 1:13
यहूदा 1:25
प्रकाशित वाक्य 1:6
प्रकाशित वाक्य 1:18
प्रकाशित वाक्य 4:9
प्रकाशित वाक्य 4:10
प्रकाशित वाक्य 5:13
प्रकाशित वाक्य 7:12
प्रकाशित वाक्य 10:6
प्रकाशित वाक्य 11:15
प्रकाशित वाक्य 14:11
प्रकाशित वाक्य 15:7
प्रकाशित वाक्य 19:3
प्रकाशित वाक्य 20:10
प्रकाशित वाक्य 22:5

aiōnios

मत्ती 18:8
मत्ती 19:16
मत्ती 19:29
मत्ती 25:41
मत्ती 25:46
मरकुस 3:29
मरकुस 10:17
मरकुस 10:30
लूका 10:25
लूका 16:9
लूका 18:18
लूका 18:30
यूहन्ना 3:15
यूहन्ना 3:16
यूहन्ना 3:36
यूहन्ना 4:14
यूहन्ना 4:36
यूहन्ना 5:24
यूहन्ना 5:39
यूहन्ना 6:27
यूहन्ना 6:40
यूहन्ना 6:47
यूहन्ना 6:54
यूहन्ना 6:68

यूहन्ना 10:28
यूहन्ना 12:25
यूहन्ना 12:50
यूहन्ना 17:2
यूहन्ना 17:3
प्रेरितों के काम 13:46
प्रेरितों के काम 13:48
रोमियों 2:7
रोमियों 5:21
रोमियों 6:22
रोमियों 6:23
रोमियों 16:25
रोमियों 16:26
2 कुरिन्थियों 4:17
2 कुरिन्थियों 4:18
2 कुरिन्थियों 5:1
गलातियों 6:8
2 थिस्सलुनीकियों 1:9
2 थिस्सलुनीकियों 2:16
1 तीमुथियुस 1:16
1 तीमुथियुस 6:12
1 तीमुथियुस 6:16
2 तीमुथियुस 1:9
2 तीमुथियुस 2:10
तीतुस 1:2
तीतुस 3:7
फिलेमोन 1:15
इब्रानियों 5:9
इब्रानियों 6:2
इब्रानियों 9:12
इब्रानियों 9:14
इब्रानियों 9:15
इब्रानियों 13:20
1 पतरस 5:10
2 पतरस 1:11
1 यूहन्ना 1:2
1 यूहन्ना 2:25
1 यूहन्ना 3:15
1 यूहन्ना 5:11
1 यूहन्ना 5:13
1 यूहन्ना 5:20
यहूदा 1:7
यहूदा 1:21
प्रकाशित वाक्य 14:6

eleēsē

रोमियों 11:32

Geenna

मत्ती 5:22
मत्ती 5:29
मत्ती 5:30
मत्ती 10:28
मत्ती 18:9
मत्ती 23:15
मत्ती 23:33
मरकुस 9:43

मरकुस 9:45
मरकुस 9:47
लूका 12:5
याकूब 3:6

Hadēs

मत्ती 11:23
मत्ती 16:18
लूका 10:15
लूका 16:23
प्रेरितों के काम 2:27
प्रेरितों के काम 2:31
1 कुरिन्थियों 15:55
प्रकाशित वाक्य 1:18
प्रकाशित वाक्य 6:8
प्रकाशित वाक्य 20:13
प्रकाशित वाक्य 20:14

Limnē Pyr

प्रकाशित वाक्य 19:20
प्रकाशित वाक्य 20:10
प्रकाशित वाक्य 20:14
प्रकाशित वाक्य 20:15
प्रकाशित वाक्य 21:8

Sheol

उत्पत्ति 37:35
उत्पत्ति 42:38
उत्पत्ति 44:29
उत्पत्ति 44:31
गिनती 16:30
गिनती 16:33
व्यवस्था विवरण 32:22
1 शमूएल 2:6
2 शमूएल 22:6
1 राजा 2:6
1 राजा 2:9
अय्यूब 7:9
अय्यूब 11:8
अय्यूब 14:13
अय्यूब 17:13
अय्यूब 17:16
अय्यूब 21:13
अय्यूब 24:19
अय्यूब 26:6

भजन संहिता 6:5
भजन संहिता 9:17
भजन संहिता 16:10
भजन संहिता 18:5
भजन संहिता 30:3
भजन संहिता 31:17
भजन संहिता 49:14
भजन संहिता 49:15
भजन संहिता 55:15
भजन संहिता 86:13
भजन संहिता 88:3
भजन संहिता 89:48


भजन संहिता 116:3
भजन संहिता 139:8
भजन संहिता 141:7
नीतिवचन 1:12
नीतिवचन 5:5
नीतिवचन 7:27
नीतिवचन 9:18
नीतिवचन 15:11
नीतिवचन 15:24
नीतिवचन 23:14
नीतिवचन 27:20
नीतिवचन 30:16
सभोपदेशक 9:10
श्रेष्ठगीत 8:6
यशायाह 5:14
यशायाह 7:11
यशायाह 14:9
यशायाह 14:11
यशायाह 14:15
यशायाह 28:15
यशायाह 28:18
यशायाह 38:10
यशायाह 38:18
यशायाह 57:9
यहेजकेल 31:15
यहेजकेल 31:16
यहेजकेल 31:17
यहेजकेल 32:21
यहेजकेल 32:27
होशे 13:14
आमोस 9:2
योना 2:2
हबक्कूक 2:5

Tartaroō

2 पतरस 2:4

Questioned

None yet noted




विश्वासे सेईं ज़ैखन परमेशरे अब्राहम, ज़ैस जगाईं गाने जो परमेशरे तै कुजोरो थियो, त तै हुक्म मेन्तां तैस जगाईं च़लो जेव, ज़ै जगाईं बादे मां परमेशर तैस विरासतरो ज़ेरो देनेबालो थियो।
हालांकी तै एन भी न थियो ज़ानतो कि अवं कोरां च़लोरोई, फिरी भी च़लो जेव। - इब्रानियों 11:8

Israel's Exodus



"When Pharaoh had let the people go, God didn't lead them by the way of the land of the Philistines, although that was near; for God said, 'Lest perhaps the people change their minds when they see war, and they return to Egypt!'" Exodus 13:17



किज्जोकि मेनेरु मड्डु, यानी अवं एस दुनियाई मां एल्लेलेइ नई ओरो कि कोई मेरी सेवा केरे, पन एल्लेलेइ ओरोई कि अवं हीरि लोकां केरि सेवा केरि त वनो बडे लोकां केरे लेइ अपनि जान बलियान केरि, ताके तैन अपने पापां केरे सजाई केरां छुटकारो मैल्ले। - मरकुस 10:45



अवं पौलुस यीशु मसीहेरो दास आई, ते प्रेरित भोनेरे लेइ परमेशरे चुनोरोई, ते परमेशेरी खुशखबरी प्रचार केरनेरे लेइ ठहरावरो आई। - रोमियों 1:1

Creation 4004 B.C.

Adam and Eve created	4004
Tubal-cain forges metal	3300
Enoch walks with God	3017
Methuselah dies at age 969	2349
God floods the Earth	2349
Tower of Babel thwarted	2247
Abraham sojourns to Canaan	1922
Jacob moves to Egypt	1706
Moses leads Exodus from Egypt	1491
Gideon judges Israel	1245
Ruth embraces the God of Israel	1168
David installed as King	1055
King Solomon builds the Temple	1018
Elijah defeats Baal's prophets	896
Jonah preaches to Nineveh	800
Assyrians conquer Israelites	721
King Josiah reforms Judah	630
Babylonians capture Judah	605
Persians conquer Babylonians	539
Cyrus frees Jews, rebuilds Temple	537
Nehemiah rebuilds the wall	454
Malachi prophecies the Messiah	416
Greeks conquer Persians	331
Seleucids conquer Greeks	312
Hebrew Bible translated to Greek	250
Maccabees defeat Seleucids	165
Romans subject Judea	63
Herod the Great rules Judea	37

(The Annals of the World, James Uusher)

Jesus Christ born 4 B.C.

New Heavens and Earth

1956	Christ returns for his people
1830	Jim Elliot martyrd in Ecuador
1731	John Williams reaches Polynesia
1614	Zinzendorf leads Moravian mission
1572	Japanese kill 40,000 Christians
1517	Jesuits reach Mexico
1455	Martin Luther leads Reformation
1323	Gutenberg prints first Bible
1276	Franciscans reach Sumatra
1100	Ramon Llull trains missionaries
1054	Crusades tarnish the church
997	The Great Schism
864	Adalbert martyrd in Prussia
716	Bulgarian Prince Boris converts
635	Boniface reaches Germany
569	Alopen reaches China
432	Longinus reaches Alodia / Sudan
397	Saint Patrick reaches Ireland
341	Carthage ratifies Bible Canon
325	Ulfilas reaches Goth / Romania
250	Niceae proclaims God is Trinity
197	Denis reaches Paris, France
70	Tertullian writes Christian literature
61	Titus destroys the Jewish Temple
52	Paul imprisoned in Rome, Italy
39	Thomas reaches Malabar, India
33	Peter reaches Gentile Cornelius
	Holy Spirit empowers the Church

(Wikipedia, Timeline of Christian missions)

Resurrected 33 A.D.

What are we? ▶			Genesis 1:26 - 2:3		Mankind is created in God's image, male and female He created us						
How are we sinful? ▶			Romans 5:12-19		Sin entered the world through Adam and then death through sin						
Where are we? ▶			When are we? ▼								
			Innocence		Fallen				Glory		
Who are we? ▶			Eternity Past	Creation 4004 B.C.	Fall to sin No Law	Moses' Law 1500 B.C.	Christ 33 A.D.	Church Age Kingdom Age	New Heavens and Earth		
			God	Father	John 10:30	Genesis 1:31 God's perfect fellowship with Adam in The Garden of Eden	1 Timothy 6:16 Living in unapproachable light				Acts 3:21 Philippians 2:11 Revelation 20:3 God's perfectly restored fellowship with all Mankind praising Christ as Lord in the Holy City
				Son	God's perfect fellowship		John 8:58 Pre-incarnate		John 1:14 Incarnate	Luke 23:43 Paradise	
				Holy Spirit			Psalm 139:7 Everywhere		John 14:17 Living in believers		
			Mankind	Living	Genesis 1:1 No Creation No people		Ephesians 2:1-5 Serving the Savior or Satan on Earth				
				Deceased believing			Luke 16:22 Blessed in Paradise				
				Deceased unbelieving			Luke 16:23, Revelation 20:5,13 Punished in Hades until the final judgment				
			Angels	Holy		Hebrews 1:14 Serving mankind at God's command					
				Imprisoned		2 Peter 2:4, Jude 6 Imprisoned in Tartarus					
				Fugitive		Genesis 1:31 No Fall No unholy Angels	Revelation 20:13 Thalaasa				
First Beast	1 Peter 5:8, Revelation 12:10			Rebelling against Christ Accusing mankind							
False Prophet			Revelation 19:20 Lake of Fire								
Satan				Revelation 20:2 Abbyss		Matthew 25:41 Revelation 20:10 Lake of Fire prepared for the Devil and his Angels					
Why are we? ▶			Romans 11:25-36, Ephesian 2:7		For God has bound all over to disobedience in order to show mercy to all						

Destiny

भद्रवाही at AionianBible.org/Destiny

The Aionian Bible shows the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of after-life destinies. The underlying Hebrew and Greek words typically translated as *Hell* show us that there are not just two after-life destinies, Heaven or Hell. Instead, there are a number of different locations, each with different purposes, different durations, and different inhabitants. Locations include 1) Old Testament *Sheol* and New Testament *Hadēs*, 2) *Geenna*, 3) *Tartaroō*, 4) *Abyssos*, 5) *Limnē Pyr*, 6) *Paradise*, 7) *The New Heaven*, and 8) *The New Earth*. So there is reason to review our conclusions about the destinies of redeemed mankind and fallen angels.

The key observation is that fallen angels will be present at the final judgment, 2 Peter 2:4 and Jude 6. Traditionally, we understand the separation of the Sheep and the Goats at the final judgment to divide believing from unbelieving mankind, Matthew 25:31-46 and Revelation 20:11-15. However, the presence of fallen angels alternatively suggests that Jesus is separating redeemed mankind from the fallen angels. We do know that Jesus is the helper of mankind and not the helper of the Devil, Hebrews 2. We also know that Jesus has atoned for the sins of all mankind, both believer and unbeliever alike, 1 John 2:1-2. Deceased believers are rewarded in Paradise, Luke 23:43, while unbelievers are punished in Hades as the story of Lazarus makes plain, Luke 16:19-31. Yet less commonly known, the punishment of this selfish man and all unbelievers is before the final judgment, is temporal, and is punctuated when Hades is evacuated, Revelation 20:13. So is there hope beyond Hades for unbelieving mankind? Jesus promised, *"the gates of Hades will not prevail,"* Matthew 16:18. Paul asks, *"Hades where is your victory?"* 1 Corinthians 15:55. John wrote, *"Hades gives up,"* Revelation 20:13.

Jesus comforts us saying, *"Do not be afraid,"* because he holds the keys to *unlock* death and Hades, Revelation 1:18. Yet too often our *Good News* sounds like a warning to *"be afraid"* because Jesus holds the keys to *lock* Hades! Wow, we have it backwards! Hades will be evacuated! And to guarantee hope, once emptied, Hades is thrown into the Lake of Fire, never needed again, Revelation 20:14.

Finally, we read that anyone whose name is not written in the Book of Life is thrown into the Lake of Fire, the second death, with no exit ever mentioned or promised, Revelation 21:1-8. So are those evacuated from Hades then, *"out of the frying pan, into the fire?"* Certainly, the Lake of Fire is the destiny of the Goats. But, do not be afraid. Instead, read the Bible's explicit mention of the purpose of the Lake of Fire and the identity of the Goats, *"Then he will say also to those on the left hand, 'Depart from me, you cursed, into the consummate fire which is prepared for... the devil and his angels,'"* Matthew 25:41. Bad news for the Devil. Good news for all mankind!

Faith is not a pen to write your own name in the Book of Life. Instead, faith is the glasses to see that the love of Christ for all mankind has already written our names in Heaven. Jesus said, *"You did not choose me, but I chose you,"* John 15:16. Though unbelievers will suffer regrettable punishment in Hades, redeemed mankind will never enter the Lake of Fire, prepared for the devil and his angels. And as God promised, all mankind will worship Christ together forever, Philipians 2:9-11.



एल्हेरेलेइ तुस गाथ ते सैरी कौमां केरे लोकन चले बनाथ, ते तैन बाजी, ते मट्टेरे, ते पवित्र आत्मारे नंवे सेइं बपतिस्मो देथ। - मत्ती 28:19